

# Mata Ifeněya Ně Od

Marik New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

Matyu .....	4
MAK .....	32
LUK .....	49
Jon.....	77
APOSEL.....	97
ROM.....	123
1 KORIN.....	135
2 KORIN.....	146
GALESIA.....	154
EFESUS.....	158
FILIPAI .....	162
KOLOSI .....	165
1 TESALONIKA .....	168
2 TESALONIKA.....	171
1 TIMOTI .....	173
2 TIMOTI .....	176
TAITUS .....	179
FILEMON .....	181
HIBRU .....	182
JEMS.....	191
1 PITA.....	194
2 PITA.....	198
1 JON.....	200
2 JON.....	203
3 JON.....	204
JUD.....	205
KURŮ FESIYA OD .....	206

# Matyu

## Jesus Wō Yen In Ibor

(Luk 3:23-38)

**1** Jesus Kristus wō yen, anī nē ibor gī isin, Ī Dawid tubu, Abraham nē ibor.  
<sup>2</sup> Isak, ne tama Abraham, Jakop, ne tama Isak, Juda, ne tura tar geid, idi temeid Jakop,  
<sup>3</sup> Feres Sera ado, nedi temeid Juda, nedi sineid Tamar, Hesron, ne tama Feres, Ram, ne tama Hesron,  
<sup>4</sup> Aminadab, ne tama Ram, Nason, ne tama Aminadab, Salmon, ne tama Nason,  
<sup>5</sup> Boas, ĩ yogon tama Salmon, Boas sina Rahab, ĩ haiden kayau, Israel kayau sã, Obed, ĩ yogon tama Boas, yogon sina Rut, ĩ haiden kayau, Israel kayau sã, Jesi, ne tama Obed,  
<sup>6</sup> King Dawid, ne tama Jesi. Solomon, ne tama Dawid, Solomon ne sina ĩ, kulu kusĩ mudur Uria nē kayaun,  
<sup>7</sup> Rehoboam, ne tama Solomon, Abiya, ne tama Rehoboam, Asa, ne tama Abiya,  
<sup>8</sup> Jehosafat, ne tama Asa, Jehoram, ne tama Jehosafat, Usia, ne tama Jehoram,  
<sup>9</sup> Jotam, ne tama Usia, Ahas, ne tama Jotam, Hesekia, ne tama Ahas,  
<sup>10</sup> Manase, ne tama Hesekia, Amon, ne tama Manase, Josia ne tama, Amon,  
<sup>11</sup> Jekonia in tura tar geid, nedi temeid Josia, sain anī bun, Babilonem Israel tamo kayau guri difeid dirou, Babilon kalabus bun dilen.  
<sup>12</sup> Babilon kalabus bun dilen sain anī bunem, Sieltiel, ne tama Jekonia, Serubabel, ne tama Sieltiel,  
<sup>13</sup> Abiud, ne tama Serubabel, Eliakim, ne tama Abiud, Asor, ne tama Eliakim,  
<sup>14</sup> Sadok, ne tama Asor, Akim, ne tama Sadok, Eliud, ne tama Akim,  
<sup>15</sup> Eleasar, ne tama Eliud, Matan, ne tama Eleasar, Jakop, ne tama Matan,

<sup>16</sup> Josef ĩ, ne tama Jakop, Josef ĩ Maria aiwa, Maria ĩ Jesus gō fen, Jesus ĩ anī Kristus † dedig.

<sup>17</sup> Anī nigin, ibor Abraham bun tamal ile Dawid, are ibor 14, Dawid bun tamal ile Babilon kalabus dilen, are ibor 14, kalabus bun tamal ile Kristus wō yen, are ibor 14.

## Jesus Kristus Wō Yen

(Luk 2:1-7)

<sup>18</sup> Jesus wō yen anī eig fiya: In sina Maria Josefem ya-louf nigin digirkenen, anī ere, idi uruwom fau mois diyo ken, Awa Uur Fateul bunem Maria bou adon anī dilen. <sup>19</sup> Josef, Maria ne aiwa, ĩ nun karīya tamo, anī ĩ Maria atun meleid bun yana sane ifenēya itor ken, ya-or to wogō yen, ĩ namen kayau anī itornēf nigin kisi fen.

<sup>20</sup> Agef kisif mog, Negur nē engel, imīya bun ĩ wagen wō ye fen, iron, "Josef, Dawid naal, Maria wale fō bun on kayau ibodōf nigin to kumī wo, ere nigin, Maria namen kare fef are, Awa Uur Fateul bunem. <sup>21</sup> Kayau anī kesu monog gō fouf, ð yana ũ Jesus wouf, ere nigin, yogon tamo kayau mosor bun temeleid kel gei fouf."

<sup>22</sup> Negur nē od, profet sigor bun eig ye wogō yen anī kisi falauf nigin, enī ganan wō yen: <sup>23</sup> "Kayau taulei kesu adouf, kesu monog gō fouf, idi yana dū Imanuel douf," †† anī nē gariya, "Negur ĩ ada ado."

<sup>24</sup> Sain Josef irik yen, Negur nē engel wogō fiyen kilei agef fen, Maria yale fō bun irou ile, in kayau ibodon.

<sup>25</sup> Anī ere, ĩ kayau ado bouweid bagu fiya san, ile kesu monog matu gō fen, anī Josef kesu yana yū Jesus yen.

## Gaa Iseyan Keleĩ Tamo Ki Dilen

**2** King Herod nē sain bun, Jesus Betlehem fonō Judia distrik bun wō yen, anī bure fele di, keleĩ tamo gaa iseyan temeleid Jerusalem disin, <sup>2</sup> idi to difen, "Kesu momou Juda neid king wō youf den anī, nain wō yen? Amã in barisa gaa iseyan melem mailen, ĩ yana malesauf nigin masin."

<sup>3</sup> King Herod od anī karī yen, ĩ wau morō fen, idi Jerusalem dibodon anī ganan geid waud morō fedin.

<sup>4</sup> Agef fen, tamo kayau neid pris odudug ganan ado, lo ifelnēdiya tamo ganan iweigneĩd, guru dife di, ĩ to fedin, "Kristus nain bagai wō youf?" <sup>5</sup> Idi aiten dalen, "Oun Betlehem fonō Judia distrik an, age fouf nigin kulu profet eig ye itoton:

† Grik od Kristus, are Hibrú od Mesia dedig. Anī nē gariya are, kabī ifenēya nigin, Negurem ĩ bouwa bun mouf fi felen. †† Asaia 7:14

<sup>6</sup> “Õ Betlehem, Juda teneub bun,  
õ Juda neid uyu irouya atun naal bagai sã,  
fau õ bunem tamo yana odug ado wõ youf,  
ĩ anim neu tamo kayau Israel marau ibodõf.’ † ”

<sup>7</sup> Age de di, Herod gaa iseyan keleĩ tamo iminēyan iweigneĩd fen, ere sain bagai barisa anĩ wõ yen anĩ kelein. <sup>8</sup> Ĩ idi Betlehem sur feid fen, iron, “Ulagauf, kesu anĩ foinenem ed ge umirēgouf. Kesu anĩ fata gouf, kaisã bagai aya urokanag, ago ge di, ayag ele fen, yana alesauf.”

<sup>9</sup> King nē od karĩ del fen, idi naab dale dilen, age de mog, barisa oun gaa iseyan idi dilen anĩ, ĩ ket uyu ile, kesu yenen nē modoũ an bagai dē yel ifaren. <sup>10</sup> Barisa anĩ dē yele di, dile fen, idi waud kulĩya odug bagai adon. <sup>11</sup> Fõ namen disorũ dilen, kesu sina Maria ado diledin, idi bobou dife fen, in yana dalesen, age de fen, nedid faa diwareĩd fen, safina ege luwa eneidi difenen, are gol, aa gaula sumeĩ nigin tõ fiyadig, moul aa bun tamal sumeĩ biya biya ado anĩ. <sup>12</sup> Herod wagenem to ke de dilauf nigin, imĩya bunem wedereid iroun, anĩ nigin, idi neid teneub bun ke douf nigin naab taka dalen.

### Isip Diya Dilen

<sup>13</sup> Idi dilel mog, Odug nē engel, imĩya bun Josef wagen wõ yen, ĩ iron, “Fã wo, kesu sina ado gei wo, uyag Isip uleg, an ubodõg uleg mog, aya fau arokonõf, gama bagai Herod kesu imirek yukesiyouf nigin age fef.” <sup>14</sup> Anĩ nigin, Josef fã yen, kesu sina ado gei feid, bõ turan Isip diya dilen. <sup>15</sup> Josef fau an ibod mog, Herod laa fen. Anĩ bun, Odug nē od, profet sigor bun eig ye wogõ yen anĩ, wõ ye kisi felen, “Isip bun tamal aya neu kesu aweignen.” ††

<sup>16</sup> Herod mogo kisi yalen, “Gaa iseyan keleĩ tamo aya didegnan,” ye fen, ĩ mogo fatuk bagai seye yen, keleĩ tamo naa nigin solo de dirokenen anĩ bun kisi es fe fen, Betlehem fonõ kalilĩ fiya anĩ kesu monog yar uru, yar tekelei anĩ ganan didenkesiyouf nigin bagai ari fedid di, didenkesin. <sup>17</sup> Anĩ bun, Negur, profet Jeremaia bunem eig ye wogõ yen anĩ, agef kisi felen:

<sup>18</sup> “Rama fonõ ait taka,  
inã wau gudũ fiya odug karĩ den,  
Rahel inã odug gere tar nigin yalen,  
ĩ taka nem bobo fiyēf anĩ itoron,  
ere nigin, yogon kesu taka to mata ibodon.” ‡

### Nasaret Ke Den

<sup>19</sup> Herod laa fe di, Odug nē engel, Josef Isip ibod mog, imĩya bun ĩ wagen wõ ye fen, <sup>20</sup> iron, “Fã wo, kesu sina ado gei wo, Israel teneub bun ule, ere nigin, idi kesu yukesiya nigin age difen are mogo gare den.”

<sup>21</sup> Age fe di, Josef fã yen, kesu sina ado gei feid, Israel teneub bun diyok dilen. <sup>22</sup> Anĩ ere, ĩ, Akelaus ĩ mogo tama Herod fotokar Judia teneub lo fef ya anĩ karĩ ye fen, ĩ an ileya nigin kumĩ yen. Imĩya bun weder iroun nigin, ĩ tokõ fel, Galili distrik ilen. <sup>23</sup> Josef ilen, taun taka Nasa-

ret dedig an ibodon. Anĩ bun, profet od eig de wogõ den anĩ kisi felen, “Ĩ Nasaret tamo douf.”

### Jon Naan Igunēdiya Tamo Naab Dodok Fenen

(Mak 1:1-8; Luk 3:1-18; Jon 1:19-28)

**3** Sain anĩ bun, Jon naan igunēdiya tamo isin, gere-tuan Judia teneub bun biya od wogõ ye fen, <sup>2</sup> iweig iron, “Wauĩ falei gei, ere nigin, saa tano mogo melsak.” <sup>3</sup> Tamo enĩ nigin profet Asaia eig ye wogõ yen,

“Ait taka gerere tuan iweig iron,  
‘Odug nē naab dodok gei,  
in naab madur gei.’” ††

<sup>4</sup> Jon ne gabar are kamel siwi, ĩ gaar gabar nem lũ diwan anim luwa gu fedig. Yogon saaf totobi nin te ado. <sup>5</sup> Tamo kayau Jon wagen guru difen, idi Jerusalem, Judia teneub ganan, Jordan naan kalilĩ fiya anĩ adok bun temeleid. <sup>6</sup> Idi neid mosor yaor difele di, Jon Jordan naan igunēdin.

<sup>7</sup> Anĩ ere, ĩ naan igunēid mog, Farisia tamo, Sadusia tamo geid musei disi di, ileid fen, ĩ idi irokenēdin, “Ã, gogour sane gere tar! Didi isiyouf anĩ wal ge fen, uya-gauf nigin aim irokenein? <sup>8</sup> Wauĩ falei gef are, age fiya gen faat biya ũ gouf. <sup>9</sup> Ã aug nigin kisi to eig ye irõf, ‘Abraham nemã tamamã.’ Aya arokeneik, meein eneidi bun Negur sã irõ di, Abraham gere tar wowã douf.

<sup>10</sup> Safor aayũ gariyan mogo ibodok, aayũ ganan faat biya to yuk, are itu ira ken, yã malan irãf.

<sup>11</sup> “Wauĩ falei gef nigin, aya naan nem naan aguneik, anĩ ere, taka ĩ aya dumeun isiyouf, ĩ megeir barikã aya wal fiya, ayam yogon ye su inukeis kenēya kisi feleya sã. †† ĩ Awa Uur Fateul yã ado nem naan igunēif. <sup>12</sup> ĩ susu fiya nē fok iman ado, ĩ yogon susu fiya nē mayã waĩ fouf, yogon wit biya are wit fõ bun kuruf fen, wit ido yã mala faimud bun an irãf.”

### Jon Jesus Naan Igunen

(Mak 1:9-11; Luk 3:21, 22)

<sup>13</sup> Anĩ bure fele di, Jesus Jonem naan igunēf nigin Galili tamal Jordan naanũ isin. <sup>14</sup> Anĩ ere, Jon Jesus gudũ fiye ken, iron, “Onom aya naan igunaya, ere nigin aya garan usif?”

<sup>15</sup> Jesus aiten yalen, “Arokonok nem ago. Negur nē madur bagai anĩ ganan kisi falauf nigin ada age tafouf, are biya.” Age ye di, Jon dõf age fen.

<sup>16</sup> Jesus naan yale bure fel fen, kaisã bagai ĩ naanũ tamal fã yen. Agef mog bagai, saa ilun bobog kã fele di, ĩ lof mog, Negur nē Awa Uur, ninã kuburir gen Jesus muduren isi, lalan ifenen. <sup>17</sup> Ait taka saa ilun iweig iron, “Eĩ neu Kesu, ĩ nigin aya wau laa fedig, ĩ nigin aya wau kulĩ yedig.”

### Satan Jesus Kisi Fiyen

(Mak 1:12, 13; Luk 4:1-13)

**4** Anĩ bure fele di, Awa Uur Jesus itonē di, gerere-tuan ile, Satanem kisi fiyen. <sup>2</sup> ĩ kuri ibodon, naa fo-

† Maika 5:2 †† Hosia 11:1 ‡ Jeremaia 31:15

†† Asaia 40:3 †† Juda neid tobonunã anĩ, sain tamo yana ado isi di, idi neid kabĩ tamo in ye su nē malũ biru difedig.

ti bō foti bure fele di, ĩ naũ fen. <sup>3</sup> Kisi fiyēya tamo Satan, ĩ bun wō ye fen, irokenen, “Ō Negur Naal ouf are, meein enidi urō di, bret falei fediyouf.”

<sup>4</sup> Jesus Satan aiten yalen, “Negur nē Itotoya bun eig ye irok, ‘Tamo bretem dogol to mata ifenēf.’ †”

<sup>5</sup> Age fe di, Satan Jesus yale irou, fateul taun Jerusalem irou iselen, an tempel fō soko ilun bagai inenē ifaren. <sup>6</sup> Satan iron, “Ō Negur Naal ouf are, ogo ufū urā. Ere nigin, Negur nē Itotoya bun eig ye irok,

“Negur ō nigin yogon engel ari fedī di, idi ō imedim ololon daleyōf, age dife di, ō yē meein takam to itutu ouf.’ ††”

<sup>7</sup> Jesus Satan aiten yale iron, “Negur nē Itotoya taka buneg eig ye irok, ‘Odug ogon Negur kisi fiya bun to unenēf.’ ‡”

<sup>8</sup> Baban, Satan Jesus yale irou, arei odug ilun biya isel fen, teneub enei nē tano ganan, nedi biya fiya adok ifelnen. <sup>9</sup> Satan iron, “Enidi ganan aya afonōf, ō wageun bobou wo, selu wabiyouf are.”

<sup>10</sup> Jesus Satan irokenen, “Satan, utorna ule! Ere nigin, Negur nē Itotoya bun eig ye irok, ‘Odug ogon Negur seli wabi fen, ĩ dogol aruna walouf.’ ††”

<sup>11</sup> Age ye di, Satan Jesus itornē ile di, engel disi Jesus aruna dalen.

### Jesus Biya Od Wogōya Gariya Inon

(Mak 1:14, 15; Luk 4:14, 15)

<sup>12</sup> Jesus mogo, Jon kalabus ibodon anī karī ye fen, kel Galili distrik ilen. <sup>13</sup> Jesus Nasaret taun itor ile, Kapenaum taun ibodon, Kapenaum are Galili daliyou sirin, Sebulun Naptali ado idi neid teneub akor bun ibodon. <sup>14</sup> Od profet Asaia eig ye wogō yen anī kisi falauf nigin, agef wō yen,

<sup>15</sup> “Sebulun nē teneub, Naptali nē teneub, are naab maaīwō ileyen, Jordan naan sitakā, Galili distrik haiden Israel sã anidi dibodok nē,

<sup>16</sup> tamo kayau gugum bun difaren, idi lalan odug dilen, tamo kayau laa teneub ado laa nē buri bun dibodon idi bun lalan iran.” †

<sup>17</sup> Sain anī bunem ilen anī, Jesus biya od wogōya gariya inon, “Wauī falei gei, ere nigin, saa tano mogo melsak.”

### Jesus In Dō Fiya Tar Uyulil Iweignēdin

(Mak 1:16-20; Luk 5:1-11)

<sup>18</sup> Jesus Galili daliyou yeri iyok isil fen, mala iran uru tura ado iledin, Simon yana taka Pita, yogon tura Endru ado. Idi maaī daliyou kakāg diran, ere nigin, idi gau yaleya tamo. <sup>19</sup> Jesus iron, “Usig, aya dō wiyag len, aya ā tamo gei fiya tamo aneneīf.” <sup>20</sup> Kaisã bagai, idi neid kakāg folō difel fen, Jesus dō difen.

<sup>21</sup> Anenem iyok ile fen, Jesus baban mala iran uru tura ado iledin, Jems Sebedi ne naal, yogon tura Jon ado. Idi waag bun nedi temeid Sebedi geid kakāg madur di-

fedif dibodon. Jesus disiyouf nigin iweignēdin. <sup>22</sup> Kaisã bagai, temeid waag ado ditor ken, Jesus dō difen.

### Jesus Dagi Adodo El Fedin

(Luk 6:17-19)

<sup>23</sup> Jesus Galili distrik akor anī adok iyo ken, Juda neid uub fō bun od ifelneīd, saa tano ne biya od anī wogō fedin, agef fen, tamo kayau atun dagi fire fire ado ilōy-abidiya adok el fedin. <sup>24</sup> ĩ nigin od anī, Siria teneub ganan bun iyokelen, age fe di, tamo kayau idi, dagi taka taka adodo anidi ganan Jesus wagen guri difeid, disin, idi darau odug biya adodo, idi kaa sesen adodo, idi mir adodo, idi bouweid ilolaisidiya anī, Jesus el fedin.

<sup>25</sup> Guru fiya odug, Galili temeleid, Dekapolis ††† temeleid, Jerusalem temeleid, Judia teneub ado Jordan naan sitakā teneub akor anī ganan tamo kayau Jesus dō difen.

### Jesus Arein Biya Od Wogō Yen

(Luk 6:20-23)

**5** Gama tamo kayau musei guru dife di, Jesus ileid fen, arei wala bun isel ibodon. Yogon dō fiya tar Jesus wagen disin. <sup>2</sup> Jesus gariya ino ifelneīd fen, iron, <sup>3</sup> “Aib idi uur nigin maleg dibodok, gama idi el fedif, ere nigin, saa tano are idi neid.

<sup>4</sup> Aib idi waud gudū fedif, gama idi el fedif, ere nigin, idi waud yo fediyouf.

<sup>5</sup> Aib idi molol dibodok, gama idi el fedif, ere nigin, idi teneub akor adouf.

<sup>6</sup> Aib idi Negur nē madur bagai nigin naũ fedif, naan ail fedif, gama idi el fedif, ere nigin, idi weit fediyouf.

<sup>7</sup> Aib idi waud ifenēdif, gama idi el fedif, ere nigin, idi wau ifenēya dalouf.

<sup>8</sup> Aib idi waud bun karētut, gama idi el fedif, ere nigin, idi Negur dilouf.

<sup>9</sup> Aib idi maur gudū difedig, gama idi el fedif, ere nigin, idi Negur gere tar difediyouf.

<sup>10</sup> Aib idi Negur nē madur bagai nigin darau dalef, gama idi el fedif, ere nigin, saa tano are idi neid.

<sup>11</sup> “Aib ā aya nigin tamo kayau idi kono diyeik, darau difeneik, idegēya bun od sane ganan ā bun dirarak, gama ā nigin el yeik. <sup>12</sup> Wauī kulīg fen, sereg, ere nigin, āgenei mala solo saa tano bun odug, profet idi ket dibodoneg kulu darau age fiya bagai dalen.

### Sol Lalan Ado

(Mak 9:50; Luk 14:34, 35)

<sup>13</sup> “Ā teneub enī nē sol, anī ere, sol in kai sa kalauf are, ere naig fe di, baban kai adouf? ĩ baban ereb kabī taka ifenēya kisi feleya sã, diraille di, tamo anī teten dilef, disi difouf dogol.

<sup>14</sup> “Ā teneub enī nē lalan. Taun taka uya bun ibodok anī inokeleya kisi feleya sã. <sup>15</sup> Age fiya gen, tamo kayau lam tō de fen, beī kur to dinouf. Age fiya ban, idi yoki

† Diuteronomi 8:3 †† Sam 91:11, 12 ‡ Diuteronomi 6:16

†† Diuteronomi 6:13 †† Asaia 9:1, 2

††† Anī nē gariya, Ten Taun.

bun diseginnē di, anī lalan tamo ganan fō anī bun ifenēdif. <sup>16</sup> Age fiya bagai, āgenei fula fiya tamo kayau lalan ifenēdiyof, ago ge di, tamo kayau idi āgenei to-bonuneī biya anī dile fen, āgenei Temeī saa ilun ibodok anī seli dabiyouf.

### Lo Od Kisi Fel Age Fen

<sup>17</sup> “Aya asin anī, Moses nē Lo, profet neid od ado alelauf nigin asin to gouf, aya anī yaleleya nigin to asin, anī kisi afalauf nigin asin. <sup>18</sup> Aya momoi bagai arokeneik, sain saa teneub ado iminkeleya sā mog, si-fa naal bagai, pen togo fiya anī Lo bun taka to fitol yale iminkalauf, idi anī ganan dibod mog, ereb ereb ganan kisi falauf. <sup>19</sup> Aibem taka, itāfiya enī nē tekelei naal bagai anī to dōf fen, tamo tunī tō dō difiyē age difouf nigin ifelnēdiyof are, t̄ saa tanon yana naal bagai youf, anī ere, aib taka itāfiya eneidi dōf agef kisi fel ifelnēdiyof, saa tanon yana odug yalouf. <sup>20</sup> Anī aya arokeneik, āgenei madur bagai anim, Farisia tamo ado lo ifelnēdiya tamo neid madur bagai to wal gouf are, ā saa tanon ileyā nigin kisi feleya sā bagai.

### Seyeya Nigin Ifelnēya

(Luk 12:58, 59)

<sup>21</sup> “Tamo itāfiya kulu eig den anī karī gen, ‘Ō tamo to ukeis, taka ne tā yukesif are, es fiya bun ifarauf.’ <sup>†22</sup> Anī ere, aya ā arokeneik, aibem taka tura seye ifenek are, t̄ es fiya bun ifarauf. Baban, aib taka tura irokenek, ‘Daku,’ t̄ kot bun ifarauf. Takag, aibem irok, ‘Ō neneya!’ age youf, hel nē yā uruwa dōya kelē fiyek.

<sup>23</sup> “Anī nigin, ō Negur bun sesewi wou fenē kisi wale, alta garan safina urou ule fen, ō turā ō bun nauseir ado anī ō weder fokō fouf are, <sup>24</sup> safina an alta garan utor yen, kel ule turā ado komo weleg fen, gama usi, Negur safina wenē, sesewi wouf.

<sup>25</sup> “Aib ō kot bun irouleyōya nigin, ā uruwom naab luwe uleg fen, on kiwai tamo ado kaisā komo gouf. Sāf, t̄ ō es fiya tamo bun inenōf. Age fe di, es fiya tamo ō irouyō polis imeid bun ino di, idim ō kalabus bun dirāyōf. <sup>26</sup> Aya momoi arokonok, ō kalabus bun kutū yesiya sā mog, wareg ganan unolauf.

### Seseirā To Inoyauf Nigin Ifelnēya

<sup>27</sup> “Tamo itāfiya eig den anī karī gen, ‘Ō seseirā to uno.’ <sup>††28</sup> Anī ere, aya ā arokeneik, taka t̄ malam kayau lof fen, mala yū yalef, t̄ mogo wau bun kayau anī bun seseirā inol. <sup>29</sup> Ō malā biyalem mosor bun inenōf are, ubodol uraile. Ō boū adok hel bun irāya anī fotokar, ō boū tunī taka iminkalauf, are deuf. <sup>30</sup> Ō imā biyalem mosor bun inenōf are, gudū uraile. Ō boū adok hel bun irāya anī fotokar, ō boū tunī taka iminkalauf, are deuf.

### Tamo Kayau Ado Bagu Fiya To Fara Fiyauif Nigin Ifelnēya

(Matyu 19:9; Mak 10:11, 12; Luk 16:18)

<sup>31</sup> “Itāfiya eig fe yenen, ‘Aibem taka yogon aiwa iruwau fenē, kayau ado bagu fiya anī fara fiya nē pepa ifen ken, bagu fiya fara fouf.’ <sup>‡32</sup> Anī ere, aya ā aroke-neik, aibem taka, yogon kayau t̄ tamo taka ado to seseirā dino mog, iruf are, t̄ kayau anī seseirā naab bun inenek. Anī aibem taka kayau anī yalef, tamo anī mogo seseirā inof.

### Wau Kuturoleya Od Nigin Ifelnēya

<sup>33</sup> “Takag, tamo itāfiya kulu eig den anī karī gen, ‘Ā wau kuturoleya od anī to waleleg. Ā wau kuturoleya od, Odug mala bun unogen anī kulatun gouf.’ <sup>34</sup> Anī ere, aya arokeneik, od megeir ifenēya bun, saa mala bun to bagai wouf, ere nigin, saa are Negur nē ibodōya modoū. <sup>35</sup> Oo teneub mala buneg to wouf, ere nigin, teneub are Negur ye inoya nē sawa. Oo Jerusale-meg mala bun to wouf, ere nigin, are King Odug in taun yana. <sup>36</sup> Ō muduremeg anī nigin megeir to unouf, ere nigin, ō ogon fatiya age fe di, lalau be karos be ta-ka wōya kisi feleya sā. <sup>37</sup> Ā nigin yo yeya are yo gouf, sā de sā gouf dogol, od enī wal fe fen, tobol fiya are Sa-tan bunem isif.

### Sane Solo Fiya Nigin Ifelnēya

(Luk 6:29, 30)

<sup>38</sup> “Tamo itāfiya eig den anī karī gen, ‘Mala fagā di-fouf, mala solo abag mala fagā wo. Waila are waila tu-ra.’ <sup>‡39</sup> Anī ere, aya arokeneik, tamo sane mala solo to wenē. Tamo taka ogon walā biyalē fakā fouf are, falei wel len, walā sitakāg fakā fouf. <sup>40</sup> Tamo taka ogon ko-los yalouf nigin kot yō fenē, malakaī ogon saket anīg utorken. <sup>41</sup> Tamo taka mail tekelei ileyā nigin nugo yōf, malakaī uruwom mail uru ulagauf. <sup>42</sup> Aibem ereb taka nigin to yok, are wenēf. Aibem ereb taka wareg ō bun yalou fenēf, ō to dudum wiyē.

### Kiwai Nigin Wau Laa Fiya

(Luk 6:27, 28, 32-36)

<sup>43</sup> “Tamo itāfiya eig den anī karī gen, ‘Ō nē tā nigin waū laaf fen, on kiwai anī kiwai wenē.’ <sup>‡‡44</sup> Anī ere, aya arokeneik, āgenei kiwai nigin wauī laaf fen, tunī darau difeneik idi nigineg kosē gouf. <sup>45</sup> Ago gouf are, ā Temeī saa ilun ibodok gere tar wowā gouf. Ī yogon gaa sur fef, tamo sane, tamo biya adok daledig, taka uyēg sur fef, tamo madur, tamo madur sā adok ifenēdidig. <sup>46</sup> Idi ā nigin orodidig anidi nigin dogol wauī laa fouf are, ere mala solo anī ā walogouf? Are takis yaleya tamog to age difedig de? <sup>47</sup> Ā tureī tar dogol aan wiyēdigouf are, ere anī tunī wal fediya ago gef? Haiden are idig, anī to age difedig de? <sup>48</sup> Anī nigin, Temeī saa ilun ibodok t̄ madur bagai gen, āg de madur bagai agog.

† Eksodas 20:13 †† Eksodas 20:14

‡ Diuteronomi 24:1 †† Eksodas 21:24; Levitikas 24:20; Diute-ronomi 19:21 †† Levitikas 19:18

### Maleg Isennēya

**6** “Ā lo welegei, āgenei tobonuneĩ madur anĩ seluma kulō difouf ge mā, anĩ tamo kayau meleid bun yaa to du wog. Ā ago gouf, Temeĩ saa ilun ibodok mala solo to ifeneĩf.

<sup>2</sup>“Sain ō maleg tamo usennēdiyōu fenē, ō anĩ taur to fū fen, ait bagauf, mala yaleya tamo Juda neid uub fō bun ado naabur, tamo idi seluma kulō difouf de fen, age difedig gen. Aya momoi arokeneik, idi anĩ nē mala solo adok mogo dalen. <sup>3</sup> Anĩ ō maleg tamo usennēdif, on imā kilē to keleĩ mog, imā biya melē age fouf, <sup>4</sup> anĩ ō iminēyan dor walef. Ago di, on Tamā, ō iminēyan agol, ile fen, mala solo ifonōf.

### Kosēya

(Luk 11:2-4)

<sup>5</sup>“Sain ā kosē gouf bun, ā mala yaleya tamo age difedig gen to agog. Idi tamo dilemāf de fen, Juda neid uub fō namen ado naab kaleyan difar fen, kosēya orodidig. Aya momoi arokeneik, idi anĩ nē mala solo adok mogo dalen. <sup>6</sup> Sain ō kosē wou fenē, ō ogon aabē ule, sukar unol fen, Tamā Negur, ĩ iminēyan ibodok, kosē wiyē. Anĩ on Tamā ō iminēyan agol, ile fen, mala solo ifonōf. <sup>7</sup> Sain ā kosē gouf, haiden age difedig gen, od musei to dīg, ere nigin, idi neid kisi, nemā od musei nigin karĩ famāf de fen, idi od musei biya wogō dedig. <sup>8</sup> Ā, idi age difedig gen, to agog, Negur āgenei Temeĩ ereb ā lau gef anĩ mogo keleĩ mog, dum ĩ to wiyēgedig.

<sup>9</sup>“Kosē gou fenē, ā eig wog urōgouf:

“Ō nemā Dei ō saa ilun ubodok,  
ō yanā fateul ibodōf,

<sup>10</sup> ogon tano isiyouf,  
ogon oroyok saa ilun age fef gen,  
tenebur einēg age fouf.

<sup>11</sup> Saaf naa enĩ nē wanamāf.

<sup>12</sup> Ō amā nemā mosor nigin wederē tu kalauf,  
are idi amā bun mosor dinof, amāg idi neid mosor nigin wederamā tu kelef gen.

<sup>13</sup> Kisi famāya bun to uroulemāf,  
sesen anĩ bun tamal amā walelnamāf. †

<sup>14</sup> Tamo idi ā bun mosor dinoyeĩf, ā idi neid mosor nigin wederē tu kalauf are, āgenei Temeĩ saa ilun ibodok, ĩg āgenei mosor nigin weder tu kalauf. <sup>15</sup> Anĩ ere, ā tamo idi neid mosor nigin wederē to tu kalauf are, āgenei Temeĩ, ĩg āgenei mosor nigin weder to tu kalauf.

### Kuriya Nigin Ifelnēya

<sup>16</sup>“Sain ā kuri gouf, mala yaleya tamo sēya nē neweid age difedig gen to ago gei, ago gouf, tamo anĩ dile fen kuri def douf. Aya momoi arokeneik, anĩ nē mala solo adok mogo dalen. <sup>17</sup> Anĩ ere, sain ō kuri wouf, fatiyā moul u ken, nawā usurūf. <sup>18</sup> Anĩ bunem, ō kuri bek oo

† *Itotoya tunĩ agef yenek: walelnamāf. Anĩ tano, megeir ado, fula fiya medeīya faimud ogon ibodōf. Momoi.*

sā be, tamo idi ō nigin to keleĩ youf. Ogon Tamā, Negur iminēyan ibodok, ĩ yogo dogol keleĩ youf, anĩ ogon Tamā ō iminēyan ereb ago wouf ile fen, mala solo ifonōf.

### Safina Biya Bagai Saa Ilun

(Luk 11:34-36; 12:33, 34; 16:13)

<sup>19</sup>“Aug nigin safina biya biya tenebur ein to kuru wog. An dedek yāf, maat te yūf, bē tamog narĩ de, bē dalouf. <sup>20</sup> Ā aug nigin safina biya biya saa ilun kuru wog. An dedek to yāf, maat te to yūf, bē tamog to narĩ de, bē dalouf. <sup>21</sup> Ogon safina biya biya ibodok nē an, ogon waūg an yenēf.

<sup>22</sup>“Mala are bouwa nē yal. Ō malā biyauf are, ogon bouwā ganā lalan lauf. <sup>23</sup> Anĩ ere, ō malā sane lauf are, ogon bouwā ganā gugum kalauf. Lalan ō ado anĩ gugum kalauf, gugum are odug bagai!

<sup>24</sup>“Aib taka ĩ yogon marau uru bun kabĩ to yalouf. Anĩ taka kiwai ifen ken, taka anĩ nigin wau laa fouf. ĩ taka anĩ dōf fen, taka anĩ mala irim fouf. Anĩ nigin, ā uru to aruneid walogouf, Negur ado moni.

### To Osig

(Luk 12:22-31)

<sup>25</sup>“Age fiya nigin, aya ā arokeneik, ā āgenei bouweĩ mata ibodōf nigin to osig fen, ere saaf tāf, ere naan tāf gouf. Ā āgenei bouweĩ nigin to osig fen, ere gabar tafilaĩf gouf. Mata anĩ saaf wal fiya, bouwa anĩ gabar wal fiya sā de? <sup>26</sup> Saa ilun ā ninā uledigouf, idi saaf to ditenedig, idi saaf u de fen, kin to dinodig, anĩ ere, āgenei Temeĩ saa ilun yogo ifoutnēdidig. Ā idi anĩ wal fediya sā de? <sup>27</sup> Ā takam yogon mata nigin osi ye fen, aua tekelei tobol fiya kisi feleya de?

<sup>28</sup>“Ere nigin ā gabar nigin osi gef? Dubur aa munĩ, naig fe odugedig anĩ ulogouf. Idi kabĩ to daledig, to diwadig. <sup>29</sup> Anĩ ere, aya ā arokeneik, kulu King Solomoneg, yogon saki gegē biya biya ifonun anim, aa munĩ eig fediya taka to wal fen. <sup>30</sup> Anĩ ere, Negur, dubur aa munĩ gama dogol ifarauf, nile di, yā irāf anĩ, agef naki fediyōuf are, ā bun idi wal fediya bagai Negur ifounēif, age fiya sā de, ā momoiya naal bagai ado? <sup>31</sup> Anĩ nigin, to osi wog urōgouf, ‘Ere saaf ada tāf?’ oo ‘Ere naan ada tāf?’ oo ‘Ere gabar ada tafilaĩf?’ <sup>32</sup> Haiden idi enĩ ganā nigin meleid dimirēdig. Āgenei Temeĩ saa ilun lau gef anĩ ganā keleĩ. <sup>33</sup> Anĩ ere, Negur nē tano ado yogon madur bagai ketem umirēg, ago ge di, safina eneidig ganā ifeneĩf. <sup>34</sup> Age fiya nigin, naa nil nē anĩ nigin to osi wog, nil nē are yogo nigin osi youf. Naa mugu mugu nē morō are idi dogo dalouf.

### Tunĩ Es Fediya

(Luk 6:37, 38, 41, 42)

**7** “Taka to es wiyēg, ago gouf, āg es yeĩf. <sup>2</sup> Anĩ nigin, tunĩ es wedigef gen, āg agef es yeĩf. Āgenei es fiya nē naab de tekelei bun āg agef es yeĩf.

<sup>3</sup>“Ō ere nigin turā mala teteur lo fen, ō ogon aa masak malā bun ibodok anĩ to ulef? <sup>4</sup> Aa masak ogon malā bun ibod mog, naig fe di, turā nigin dogol uroke-



nek, 'Utor len, aya ogon malā teteur alelkonōf'? <sup>5</sup> Ō mala yaleya tamo, ō ogon malā bun ketem aa masak walel kelē wol fen, dum turā bun mala teteur walelauf.

<sup>6</sup> "Ereb fateul anī gaū to urakenēdig. Āgenei maaī tuwa meli bagai pel anī bor to urakenēdig. Ā ago gouf, yedim lalai difouf. Age de fen, falei del, ā serek de fisik diyeīf.

### To Wouf, Umirēf, Godu Wouf

(Luk 11:9-13)

<sup>7</sup> "To gouf, agef ā ifeneīf; umirēgouf, ā gurug gouf; godugodu gouf, ā sukar kā feneīf. <sup>8</sup> Aibem taka to fef, yalouf; aibem taka imirek, gurug fouf; aibem taka godugodu fef, sukar kā fel kenēf.

<sup>9</sup> "Ā anī takam, ī naal bret nigin to fef, ī meein ifenēf de? <sup>10</sup> Takag, ī gau nigin to fef, ī gogour ifenēf de?

<sup>11</sup> Seseneī bagai ā, āgenei kesu safina biya biya anī ifenēdiya ā keleī bagai, age fiyauf are, Temeī saa ilun ibodok, safina biya biya aib idi to difiyek, āgenei wenēdigidig anī wal fiya, idi ifenēdiyof! <sup>12</sup> Anī nigin, erab erab ganan bun, erab taka idim age diyeīf anī oroyeik anī, āg idi nigin ago gouf. Od enī Lo od ado Profet od neid kaū.

### Bobog Kidō Bobog Bilalā Fiya Ado

(Luk 13:24)

<sup>13</sup> "Bobog kidō bun usorug ulagauf. Ere nigin, daū fiya bun ileya nigin bobog bilalā fiya, naab odug. Tamo kayau musei naab odug anī diledig. <sup>14</sup> Anī ere, mata tano bun ileya nigin bobog kidō, naab naal. Anī nigin, tamo kayau teke tekeleim dogol, anī fata difedig.

### Aayū Yogon Faat Ado

(Luk 6:43, 44; 13:25-27)

<sup>15</sup> "Idegēya profet anidi lo weledigei. Idi ege sipsip siwi difoun ken, ā garan disif, anī ere, idi namedin gaū kuī sane ado. <sup>16</sup> Idi neid faat yūf bun, ā idi dogo anibo be biya be ulogouf. Tamo kayau idi wei biya barik bun, gira udum bun daledig de? <sup>17</sup> Age fiya gen, aayū biya are faat biya yūdig, aayū anibo are faat anibo yūdig. <sup>18</sup> Aayū biya ī, faat sane yūya kisi feleya sā, aayū anibo are faat biya imaya kisi feleya sā. <sup>19</sup> Aayū ganan faat biya to imaf are, ditu dale yā malan dirāf. <sup>20</sup> Age fiya nigin, idi neid faat yūdig bunem, ā idi nigin yaor keleī youf.

<sup>21</sup> "Idi aya 'Odug, Odug' de fen dirokanadig, idi ganan saa tanon to dilauf. Aibem ī, neu Dei saa ilun ibodok in oroya dōf age fef anim dogol ilauf. <sup>22</sup> Naa anī bun, musei aya dirokanauf, 'Odug, Odug, amā ō yanā nem profet od wogō maun, amā ō yanā nem kaa sesen maruid fen, ō yanā nem memelik musei manodin!' <sup>23</sup> Age de di, aya yaor arokenēdiyof, 'Aya ā keleī sā. Ā sane gide gedig, uyaleleg!'

### Fō Inoya Nē Keleī Tamo Neneya Tamo Ado

(Luk 6:47-49)

<sup>24</sup> "Age fiya nigin, taka ī neu od eneidi karī ye fen, dōf age fef, ī keleī tamo yogon fō meein teten inon gen.

<sup>25</sup> Sain uyē burabura isin, kuwei odug ile, solalā fel fen, yau odug fā ye fen, fō you fe di, to kubū yen, ere nigin, tor gariya meein teten inon. <sup>26</sup> Anī ere, aib taka ī neu od eneidi karī ye fen, to dōf age fef, ī neneya tamo yogon fō subusir teten inon gen. <sup>27</sup> Sain uyē burabura isin, kuwei odug ile, solalā fel fen, yau odug fā ye fen, fō you fe di, kubū ye narīf irailen."

<sup>28</sup> Od ganan Jesus wogō ye idikele di, tamo kayau in od ifelnēdin anī nigin terē den, <sup>29</sup> ere nigin, Jesus ifelnēdin are, taka ī yana adom gen age fiya od wogō fedin, idi neid lo ifelnēdiya tamo age difedig gen sā.

### Tamo Lepra Dagi Ado

(Mak 1:40-45; Luk 5:12-16)

**8** Jesus arein tamal kutū yesi di, tamo kayau musei dō difiyen. <sup>2</sup> Tamo lepra dagi ado isi, Jesus wagen ibor bobou fe fen, irokenen, "Odug, ō waū irom are, aya el fiyaya nigin kisi feleyam."

<sup>3</sup> Jesus ima iran, tamo anī kobūf fen, iron, "Aya wau irok, bouwā biyaf." Age ye di, kaisā bagai yogon lepra dagi sa kelen. <sup>4</sup> Jesus irokenen, "Ō aib taka to urokenēf. Ō ogo pris wagen ule, bouwā ufelne ken, Moses nē od dō fen, safina sesewi wo, anī bunem ō biya lel anī, tamo kayau dilouf."

### Kusī Tamo Neid Orowa Nē Momoiya

(Luk 7:1-10)

<sup>5</sup> Jesus Kapenaum taun wō ye di, Rom kusī tamo neid orowa Jesus wagen isi fen, isennēf nigin to fiyen. <sup>6</sup> Ī iron, "Odug, neu kabī tamo fō bun darau odug ado ilolaisin yenek."

<sup>7</sup> Jesus irokenen, "Aya ele, el afiyēf."

<sup>8</sup> Age ye di, kusī orowa aiten yale iron, "Odug, aya to biya nigin aya kisi afef, ō neu fō bun to usiyouf. Mala-kāī, ō od dogol urō di, anī neu kabī tamo dagi sa kaulauf. <sup>9</sup> Aya yug nigin age fiya, ayag neu odug anī farumen abodok, kusī tamo idig aya farumeun dibodok. Aya taka enī arokenek, 'Ule' afiyek, ī ilauf. Aya taka arokenek, 'Ō usi' au di, ī isidig. Neu kabī tamo enī ago afiyek, ī agef age fedig."

<sup>10</sup> Od anī kusī orowa age irō di, Jesus od anī karī ye, terē ye fen, tamo kayau dō difiyen anidi irokenēdin, "Aya ā momoi arokenek, aya Israel bun āgenei momoia odug eig fiya taka to ailen. <sup>11</sup> Aya arokenek, musei fau gaa iseyan gaa ileyan temeledim disiyof, idim modoū dalel fen, saa tano nē tar odug bun, Abraham, Isak, Jakop geid saa tanon dibodōf. <sup>12</sup> Anī ere, Israel tamo kayau musei Negurem idi nigin saa tano dok fe kenēdin anidi, fau dumeitur gugum bē mayarē irarāf, an inā odug ado firi de fen, goboreid kikokō youf."

<sup>13</sup> Jesus age wogō yel fen, kusī orowa irokenen, "Kel ule! Ō ogon momoia kilei bagai, ō nigin dōf agef ifonōf." Sain anī wogō ye mog bagai, yogon kabī tamo dagi sa kelen.

**Jesus Dagi Tamo Kayau Musei El Fedin**

(Mak 1:29-34; Luk 4:38-41)

<sup>14</sup> Jesus Pita nē fō bun ilen, Pita nē mam bouwa uruwa odug ado fatarē yen mog, ilen. <sup>15</sup> Jesus kayau ima anī kobū fe di, bouwa uruwa fara fiye kele di, kaisā bagai kayau fā yale, Jesus aruna yalen.

<sup>16</sup> Gugum mog, tamo kayau kaa sesen adodo musei guri difeid, Jesus wagen disin. Age dife di, Jesus od nem kaa sesen iruid fen, dagi adodo ganan el fedin.

<sup>17</sup> Jesus enī ganan age fen, are Negur ĩ, profet Asaia bunem od eig ye wogō yen anī kisi falauf nigin:

“Ī yogo neda ilōyabiya yales,  
neda dagi faali fen.” †

**Jesus Dō Fiyēya Bun Kafī Fiya Fire Fire**

(Luk 9:57-60)

<sup>18</sup> Sain anī Jesus mala iran, tamo kayau musei kalifī difiyē di, daliyou sitakā dibal dilauf nigin in dō fiya tar irokenēdin. <sup>19</sup> Age fiyeid mog, lo ifelnēdiya tamo taka wagen isi fen, irokenen, “Tise, ō narib ulauf are, aya ō dō ayōf.”

<sup>20</sup> Jesus aiten yale iron, “Gaū kuī idi yenēya nē modoū ku ado, ninā lalo bun diyok idi uru ado, anī ere, Tamo Naal ĩ mudur inoya nē modoū sā.”

<sup>21</sup> In dō fiya taka irokenen, “Odug, fau de, folō wiya len, aya ele fen, neu dei mū afel fen.”

<sup>22</sup> Anī ere, Jesus ĩ irokenen, “Ō aya dō wiya, laa tamo idi, laa tutur abob mumā difouf.”

**Jesus Uyē Yau Ado Irokenēdi Di, Kee Delen**

(Mak 4:36-41; Luk 8:22-25)

<sup>23</sup> Jesus waag owor isile di, in dō fiya tar ĩ geid dilen. <sup>24</sup> Idi keleī sā mog, maaī daliyoun yau total fā yen. Agef mog, maaī odug fā ye, waag yū di, waag anī naanū imutkesilau fenē age fen. Anī ere, Jesus mulā yenen.

<sup>25</sup> In dō fiya tar dilen, turī difiyē, diron, “Odug, usen-namā! Amā mogo naanū mamutatā gare mausiyou fenē!”

<sup>26</sup> Jesus aitedin yalen, “Āgenei momoiya naal bagai, ere nigin ā fatuk kumī gef?” Age ye fen, ĩ fā ye, maaī yau ado ou fiyēdi di, oditekei kee delen.

<sup>27</sup> Tamo idi terē de fen, to difen, “Tamo eī naig fiya bagai? Maaī yau ado karī difiye ken, dō difef!”

**Tamo Uru Kaa Sesen Adodo El Fedin**

(Mak 5:1-17; Luk 8:26-37)

<sup>28</sup> Jesus Gadara neid teneub bun daliyou sitakā ilen, kaa sesen adodo tamo uru matmat bunem dile fen, Jesus tarabā difen. Tamo uru kuī bagai diledin nigin, tamo ganan naab anī to diyōdig. <sup>29</sup> Anī idi diweig fen, diron, “Negur Naal, ō amā nigin ere naig wamāf? Ō naa wenen anī fau mog, gama bagai daig wamā fenē ein usif de?”

<sup>30</sup> Idi difaren sitakā gerō nuwa an, bor musei saaf doko diyon. <sup>31</sup> Kaa sesen idi Jesus digonen, “Ō tamo

eneidi bun tamal urumā fenēf are, amā bor musei namedin sur wamāf.”

<sup>32</sup> Jesus kaa sesen irokenēdin, “Uleleg!” Idi ulolō deis fen, diselen bor namedin dilelen. Bor ganan gududu de bebeigir disil, daliyoun naanū gare desin. <sup>33</sup> Bor lo fiya tamo diya, taun disil fen, Jesus kaa sesen irudi di, bor gare den anī ganan wogō den. Age de fen, idi ereb tamo uru kaa sesen adodo bun wō yen anī nigineg wogō den. <sup>34</sup> Age de di, tamo kayau taun temeleid adok, Jesus ileya nigin dilen. Idi Jesus dile fen, idi neid fonō anī itor ilauf nigin digonen.

**Jesus Tamo Bouwa Ilolaisin Anī El Fiyen**

(Mak 2:1-12; Luk 5:17-26)

**9** Jesus waag taka sō ye, daliyou ibal fen, yogon taun ilen. <sup>2</sup> Tamo tunī tamo bouwa ilolaisin gabgab bun yen mog, Jesus wagen diroulen. Idi neid momoiya Jesus ile fen, Jesus tamo bouwa ilolaisin irokenen, “Kesu, waū unois, ogon mosor alelkonok.”

<sup>3</sup> Anī karī de fen, lo ifelnēdiya tamo tunī, idi neid kisi bun diron, “Tamo eī Negur kono fiyek!”

<sup>4</sup> Idi neid kisi keleī ken, Jesus iron, “Ā ere nigin wauī bun kisi sane agef wō yef? <sup>5</sup> Nanī anī irōya nigin karika: ‘Ogon mosor alelkonok,’ de? Oo ‘Fā, ufar uyok ule?’

<sup>6</sup> Anī ere, Tamo Naal ĩ tenebur ein mosor yaleleya nigin yana ado anī ā keleī youf nigin...” Age ye fen, tamo bouwa ilolaisin irokenen, “Fā ufar, ogon gabgab wale urou, fonō ule.” <sup>7</sup> Age ye di, tamo fā yale, fonō ilen.

<sup>8</sup> Tamo kayau guru difen ganan anī meledim dile fen, terē de kumī den. Negur yogo tamo yana enī ifenēdin anī nigin, idi Negur yana dalesen.

**Jesus Matyu Iweignen**

(Mak 2:13-17; Luk 5:27-32)

<sup>9</sup> Jesus an tamal iyok ile fen, mala irakelen, tamo yana Matyu takis yaleya fō bun ibod mog, ilen. Jesus ĩ irokenen, “Aya dō wiya.” Age ye di, Matyu fā yale, Jesus dō fen.

<sup>10</sup> Jesus Matyu nē fō bun bō saaf yō mog, takis yaleya tamo, mosor ado tamo kayau musei disi fen, Jesus in dō fiya tar geid weim saaf don. <sup>11</sup> Farisia tamo idi anī dile fen, idi Jesus nē dō fiya tar to difedin, “Ere nigin āgenei tise, takis yaleya tamo, mosor ado tamo kayau geid saaf doko?”

<sup>12</sup> Od anī Jesus karī ye fen, iron, “Idi bouweid biya bagai, dokta gein ileya nigin to waud yenēdig, tamo dagi ado idim dogol, dokta gein ileya nigin waud yenēdig.

<sup>13</sup> Uleg fen, od enī dir ge fen, kaū ere yeif anī keleī youf, ‘Aya wau ifenēya anī orouf, sesewi fiya sā.’ †† Anī nigin, aya tamo madur anidi iweignēdiya nigin to asin, aya mosor adodo anidi iweignēdiya nigin asin.”

† Asaia 53:4

†† Hosia 6:6

**Kuri Nigin Jesus To Difiyen**

(Mak 2:18-22; Luk 5:33-39)

<sup>14</sup> Age ye mog, Jon naan igunēdiya tamo nē dō fiya tar disin, Jesus to difiyen, “Naig fe di, amā Farisia tamo geid kuri mau di, ogon dō fiya tar idi kuriya sak?”

<sup>15</sup> Jesus aitedin yalen, “Tamo, kayau yalou fenē tar bun, ne tā tar disennek idi fau weim dibod ken, naig ī nigin waud gudū foug? Dum sain wō ye di, an ne tā tar bun tamal yalelnēf bun anī, idi gama kuri douf.

<sup>16</sup> “Tamo taka, gabar masak mata, gabar tubu ado baguf fen, to iwauf. Anī age foug, gabar masak matam gabar tubu dī fe di, tubu kudef, awa kanouf. <sup>17</sup> Takag, tamo idi wain mata anī meme gabar † tubu anī bun to ditinēf. Age difoug, meme gabar kude fele di, wain oho yalauf. Meme gabar sane lauf. Age fiya sā, idi wain mata are meme gabar mata bun ditinēf. Age fe di, uru idi kabī ifenēdiya nigin biya difarauf.”

**Kayau Naal Laa Fen, Dagi Kayau Taka Ado**

(Mak 5:22-43; Luk 8:41-56)

<sup>18</sup> Od enī Jesus fau wogō ye mog, Juda neid uub fō nē uyu irouya taka isin, Jesus wagen ibor bobou fe fen, iron, “Gama bagai neu barai laa fel. Ō uma fen, imā teten uno di, kayau naal baban kel mata ibodōf.” <sup>19</sup> Jesus fā yale, uruwom dile di, yogon dō fiya tar idig dilen.

<sup>20</sup> Dile mog, kayau taka ogō dagi faimud ado yar tuwelf iyon anī, Jesus dume dume isi fen, Jesus nē kolos iri kobū fen. <sup>21</sup> Kayau anī yogon kisi iron, “Aya de yogon kolos dogol kobū afoug, anī aya neu dagi sa ka-lauf.”

<sup>22</sup> Jesus falei yelen, kayau anī ile fen, iron, “Nau barai, waū unois, ogon momoiya anim dagi sa kel konok.” Age ye mog bagai, kayau in dagi sa kelen.

<sup>23</sup> Jesus uyu irouya nē fō bun isour ilen, mala iran, tamo kayau musei kokū de, i de mog, iledin. <sup>24</sup> Jesus iron, “Uyaleleg, kayau naal enī laa fiya sā, mulā yenek.” Age ye di, idi kasā difiyen. <sup>25</sup> Tamo kayau mayarē irud laisi fen, Jesus aab namen ilen, kayau naal ima yale iro-un. Age fe di, kayau naal fā yen. <sup>26</sup> Nenerī anī wogō de di, teneub anī ganan bun iyokelen.

**Jesus Tamo Towo El Fedin, Uru Meleid Ifofakeleya Ado Taka Ait Ifokeleya**

<sup>27</sup> Jesus modoū anī itor ken, iyok ile mog, tamo uru meleid ifofakeleya Jesus dō difiyen, diweig diron, “Dawid Naal, amā nigin waū inō!”

<sup>28</sup> Jesus fō aaben ile di, tamo uru meleid ifofakeleya wagen dilen, Jesus idi to fedin, “Ā momoi gef, aya ā meleī el afe di, lo gouf nigin kisi feleya?”

Idi aiten dalen, “Ao, Odug.”

<sup>29</sup> Age de di, Jesus imam meleid kobū feid fen, iron, “Momoi gef kilei, ā nigin age feneīf.” <sup>30</sup> Idi neid meleid gama kelē delen. Jesus totol bagai katū feid fen, iron, “Enī nigin taka to urokenēgoug.” <sup>31</sup> Anī ere, idi kututū

deis dile fen, Jesus age fen anī, teneub anī nē akor ganan bun od dinof diyon.

<sup>32</sup> Idi Jesus ditornē dile mog, tamo taka kaa sanem ait ifokelen anī Jesus wagen dirousin. <sup>33</sup> Kaa sane iru di, iyan, tamo ait ifokeleya wogō yen. Tamo kayau guru difen ganan terē de fen, diron, “Kulu nem isi gama, Israel bun eig fiya taka to tailen.”

<sup>34</sup> Anī ere, Farisia tamo idi diron, “Are kaa sane neid mudur yana bunem, ī kaa sesen irudif.”

**Kabī Tamo Musei Sā**

<sup>35</sup> Jesus taun ganan fonō fonō ganan bun iyo ken, ne-di uub fō bun ifelneīd, saa tano nē biya od wogō feid fen, dagi gariya fire fire ganan el fedin. <sup>36</sup> Sain Jesus mala iran, tamo kayau musei guru difen anī ileid fen, idi nigin wau yun, ere nigin, idi morō adodo isennēdiya sā, idi sipsip marau sā age fiya gen. <sup>37</sup> Anī yogon dō fiya tar irokenēdin, “Kabier saaf musei biya ima bure felen, anī ere, kabī tamo musei sā. <sup>38</sup> Age fiya nigin, kusu fiya marau, Odug to wiyēg, kabī tamo susur fedin di, yogon kabier kusus fiya nigin dilauf.”

**Jesus In Dō Fiya Tar Tuwelf Sur Fedin**

(Mak 3:13-19; Luk 6:12-16)

**10** Jesus in dō fiya tar tuwelf iweignēdi di, wagen guru difen, kaa sesen irudiya, dagi gariya fire fire ganan el difediyoug nigin megeir ifenēdin.

<sup>2</sup> Eī aposel tuwelf yeneid, Simon (in yana Pita dedig), yogon tura Endru, Jems Sebedi naal, ne tura Jon, <sup>3</sup> Filip, Batolomyu, Tomas, taka Matyu takis yaleya tamo, Jems Alfeus naal, taka Tadeus, <sup>4</sup> Simon Selot, †† taka Judas Iskariot, ī anī Jesus kiwai ifenen.

**Jesus In Dō Fiya Tar Tuwelf Kabī Ifenēdin**

(Mak 6:7-13; Luk 9:1-6)

<sup>5</sup> Idi tuwelf enidi, Jesus fadim enī ado dō difoug nigin sur fedin: “Idi ibor fire Juda ibor sā wagedin to ulagauf, Samaria neid taun taka taka buneg to uleg. <sup>6</sup> Israel atun idi sipsip fō delen anidi bun dogol ulagauf. <sup>7</sup> Sain ā ulagauf, od enī anī wogō gef uyōg, ‘Saa tano mogo melsak.’ <sup>8</sup> Dagi el wedig, gare den turī wedig, lepra dagi ado el wedig, kaa sesen urudig. Megeir anī ā na yaleya sā ege walegen, anī nigin, ege luwa wenēdigoug. <sup>9</sup> Ā gol moni, silwa moni, kapa moni be, āgenei kodolē taka to bagai ufeg. <sup>10</sup> Delē uyōgou fenē, delē iyōya nē faa sā, gabar uru, sendel uru, manig uru agog to guri gouf, tamo kabī dalef, idi de mala ereb lau difef anī difenēdiyadidig.

<sup>11</sup> “Narib gouf, taun be, fonō taka be bun uleggef, ā meleī unog, tamo ā nigin sere yeīf, yogon fō bun ubodōg, dum utorōg uleg. <sup>12</sup> Ā fō anī bun uleggef, āgenei wau inosiya nē aanya wenēdigoug. <sup>13</sup> Fō anī bun tamo kayau biya diyek, āgenei wau inosiya nē aanya an urofosis, idi age fiya sāf, āgenei wau inosiya nē aanya anī baban keg waleg. <sup>14</sup> Aib taka ī ā nigin to sere yeīf, āgenei od to karī youf, āgenei yeī aasu tu weleg fen, fō

† Juda neid tobonunā, idi meme gabar nem darum diwadig.

†† Juda neid kusī mala taka, idi Rom gawaman ado kusī dedig.

be taun anī utorōg ulagauf. <sup>15</sup> Aya momoi arokeneik, Sodom Gomora ado darau dalen anī wal fiya, es foug naa anī bun, taun anī in darau odug bagai yalouf.

### Kafī Fiya Fire Fire Fau Isiyouf

(Mak 13:9-13; Luk 21:12-17)

<sup>16</sup> "Aya ā sur ayeik are, sipsip gaū kuī atun sur fiya gen. Anī nigin, ā gogour age fedig gen, kisi ed ge waleg fen, ago gouf, ninā kuburir gen, imatkesiya ubodō-gouf. <sup>17</sup> Ā tamo nigin lo walagauf, idi fau kaunsel imeid bun dineneī di, idi Juda neid uub fō bun wagagā diyēīf. <sup>18</sup> Idi aya nigin de fen, ā guri diyēī diroule, gawaman mudur, king ado wagedin difarnei ken, ā idi geid fen, haiden Israel sā anidi meleid bun, aya nigin wogō gouf. <sup>19</sup> Anī ere, idi ā kot bun ifareya nigin gei diyēīf, ā wauī to morō ken, ere od tarōf, naig ta tarōf anī nigin to kisi fatuk walogouf. Sain anī bun, ā erob od urōgouf nigin fau ifeneīf. <sup>20</sup> Are āgem to urōgouf, āgenei Temeī nē Awa Uur ī yogo ā bunem wogō youf.

<sup>21</sup> "Tura fā youf, tura nigin kiwai fen, idegē di, laa bun inenēf, tamag naal ado age difouf, kesu fā douf, idi neid sina tama nigin kiwai dino fen, idi dogo laa bun dinenēdiyof. <sup>22</sup> Tamo ganan idi, aya nigin fau kiwai difeneīf, anī ere, aib taka megeir ino ifar ile idikeleya bun ouf, Negur isennēf. <sup>23</sup> Teneub taka bun, ā darau odug difeneīf are, uyu takā uyag uleg. Aya momoi aroke-neik, ā fau Israel neid taun ganan bun to uyōg udikeleg mog, Tamo Naal kel isiyouf.

<sup>24</sup> "Skul kesu ī yogon tise to wal foug, age fiya gen, ferfer ī yogon marau to wal foug. <sup>25</sup> Skul kesu ī yogon tise genēf, are de. Takag, kabī tamo ī yogon orowa genēf, are de. Fō anī tama yana dun Belsebub, † anī nigin, fō anī tamo ganī be dibodok idi yeneid sane bagai dalef!

### Negur Dogol Kumī Fiyēya

(Luk 12:2-7)

<sup>26</sup> "Age fiya nigin, ā idi to kumī wedig. Gama erob ein dede fiya yenek, are fau lelek falauf, gama erob iminēyan yenek, are dum fau keleī youf. <sup>27</sup> Gama erob aya gugum bun wogō ayeik, are fau gaa lalan bun wogō gouf bagai; gama erob kosesēyam karī gef, dum fau fō agaran ufareg fen, uweigig urōgouf bagai. <sup>28</sup> Idi bouwa dukesif, anī ere, malakanon yukesiya kisin sā anī to kumīg. Anī ere, taka ī malakanon bouwa ado yū orok fe, hel bun irāya kisi feleya anī dogol kumī gouf. <sup>29</sup> Fisisir uru ten toea nem na nigin sur gedig. Anī ere, āgenei Temeī yogon wau to irō mog, taka tenebur to kubū youf. <sup>30</sup> Āgenei mudureī bun fatiyēīg ganan iwes yalen. <sup>31</sup> Age fiya nigin, to kumīg, ā Negur mala bun sa-fina odug bagai, fisisir musei wal fediya.

### Kristus Nigin Kurō Fesiya Ado Wa Fiya

(Luk 12:8, 9)

<sup>32</sup> "Aibem taka aya nigin tamo meleid bun kurō falai-siyouf, ayag ī nigin neu Dei saa ilun ibodok wagen

† Belsebub are Satan nē yana taka.

kurō afalaisiyouf. <sup>33</sup> Anī ere, aibem taka aya nigin tamo meleid bun wa foug, ayag ī nigin neu Dei saa ilun ibodok wagen wa afouf.

### Wau Inosiya Sā, Anī Ere, Soworu

(Luk 12:51-53; 14:26, 27)

<sup>34</sup> "Ā to kisi eig wog, aya tenebur ein wau inosiya irou isiya nigin asin gouf. Aya wau inosiya irou isiya nigin to asin, anī ere, aya soworu irou isiya nigin asin. <sup>35</sup> Anī nigin, aya tubi kobō fiya nigin asin,

"Tamo ī tama nigin kiwai inouf, ne barai yogon sina nigin kiwai inouf, yanawau ī sina yana nigin kiwai inouf.

<sup>36</sup> Tamo nē kiwai are, de tamo anī nē ibor bun tamalem fā de fen, kiwai difenēf.'

<sup>37</sup> "Aibem taka ī, yogon tama sina nigin wau fatuk ifen ken, aya nigin to age fef, ī aya dō fiya nigin to kisi falauf. Aibem taka ī, yogon naal be, ne barai be wau fatuk ifen ken, aya nigin to age fef, ī aya dō fiya nigin to kisi falauf. <sup>38</sup> Aibem taka ī, yogon aa tetek orowa to sef fen, aya dō fiyaf, areg aya dō fiya nigin to kisi falauf.

<sup>39</sup> Aib taka tenebur ein nē mata alouf ye fen imirek, yogon mata fō yalauf. Aib taka yogon mata aya nigin iraillef, yogon mata kel yalouf.

### Mala Solo

(Mak 9:41)

<sup>40</sup> "Tamo aibem ā yaleyeik, are aya yaleyaf, tamo aibem aya yaleyaf, are aib ī aya sur fiyan ī yalef. <sup>41</sup> Aibem taka ī, ī profet nigin ye fen, profet taka yalef, ī profet mala yalouf, aibem taka ī, ī madur tamo nigin ye fen, madur tamo taka yalef, ī madur tamo nē mala yalouf. <sup>42</sup> Aibem taka, naan medir kap tekelei, tamo yeneid sā anī taka ifen yāf, ere nigin, ī neu dō fiya tamo, aya ā momoi arokeneik, ī yogon mala solo to bagai wal fiyēf."

### Jesus, Jon Naan Igunēdiya Tamo Ado

(Luk 7:18-35)

**11** Jesus yogon dō fiya tamo tuwelf tai feid bure fel fen, anenem tokō fel, Galili taun taka taka bun ifelneīd fen, biya od wogō fediyof nigin ilen.

<sup>2</sup> Age fe di, Jon naan igunēdiya tamo kalabus bun ibod ken, Kristus kabī agef yalef de di, od anī karī yen, Jon yogon dō fiya tar Jesus to difiyēf nigin <sup>3</sup> sur fedi di, dilen, to difiyen, "Tamo isiyouf den, ō ogo yeir de? Ōo amā fau taka nigin tari mafouf?"

<sup>4</sup> Jesus aitedin yalen, "Kekug uleg fen, ā wedereim karī gel, meleim ulegel anī Jon wogō wiyēg, <sup>5</sup> meleid ifofakelen kelē def, to diyon mogo diyok, lepra dagi adon mogo el fedin, wedereid daabun od karī def, gare den turī fedif, maleg bun biya od wogō fedif. <sup>6</sup> Tamo aya nigin wau to firagagaū fef, Negur ī el fiyek."

<sup>7</sup> Jon nē dō fiya tamo ditornē dilele di, Jesus, tamo kayau guru difen anidi, Jon nigin irokenēdiya anī gariya inon, "Ā ere bagai anī ulogouf nigin, gerere tuan ulegen? Ā unin yaum walala fe di, ulogouf nigin ulegen de? <sup>8</sup> Anī sāf are, ere bagai ā ulogou fenē, ulegen? Ta-

mo taka kolos biya bagai ifonun de? Sã, idi kolos biya bagai difonuk age fiya are, king nê fõ bun dibodok.

<sup>9</sup> Ba, ere bagai anī ã ulogou fenê, ulegen? Profet taka de? Are de yeir, aya ã arokeneik, ī profet wal fediya.

<sup>10</sup> Tamo anī, ī nigin Negur nê Itotoya bun eig ye itoton: “Aya neu arū tamo sur afe di, ī ket uyu ilauf, im uyulil ogon naab dodok fouf.’ †

<sup>11</sup> Aya ã momoi arokeneik, kayau onoudi kesu dalen idi atun an, taka nem Jon naan igunēdiya tamo to wal difiyen, anī ere, aib taka saa tanon yana naal bagai ado ī Jon wal fiya. <sup>12</sup> Jon naan igunēdiya tamo in sain bunem isi gama, saa tano, megeir ado bilalaū fedig, megeir ado tamom saa tano anī irou irouledig. <sup>13</sup> Profet ganan Moses nê Lo ado, saa tano nigin profet od wogõ def disin, isi Jon bun daun. <sup>14</sup> Æ walogou fenê wauī oroīf are, ī Eliya, ī fau isif ya anī. <sup>15</sup> Aib ī weder adouf, karī youf.

<sup>16</sup> “Tamo kayau sain enei bun, idi nigin ere bunem aya kisi afouf? Idi simom maket modoū bun dibod ken, abob diweignēdidig gen:

<sup>17</sup> “Amã ã nigin kelel maun, anī ere, ã to kui gen; amã kanon seg malen, anī ere, ã to wauī gudū fen.’

<sup>18</sup> Anī Jon isin, saaf to yon, wain to yon, idi dirõdig, ‘Ī kaa sane ado.’ <sup>19</sup> Tamo Naal isin, saaf yon, wain yon, ī dirõdig, ‘Eī saaf wan, wainei yedig, dobu irāya tamal, ī, takis yaleya tamo, mosor tamo ado geid nigal difedig.’ Anī ere, kisi biya ī in tobonunã anī bunem, biya ya-oref.”

#### Taun Tunī Waud Faleiya Sã Nigin Isisnēdin

(Luk 10:13-15)

<sup>20</sup> Jesus ī, taun tunī bun memelik musei inodin, anī ere, idi waud to falei den, anī nigin, Jesus ou fiyēdin.

<sup>21</sup> “Korasin taun, õ malalon ado! Betsaida, õ malalon ado! Æ bun memelik musei anodin, age fiya gen anī Taia taun Saidon taun ado bun wõ yem are, mogo kulu waud falei de fen, wau gudū fiya nê gabar difoun ken, aasur dibodom. <sup>22</sup> Anī ere, aya ã arokeneik, es fiya sain bun, morõ Taia taun Saidon taun ado dalouf anī wal fiya, ã walogouf. <sup>23</sup> Õ Kapenaum, õ yanã anī saa ilun iselauf de? Sã bagai, õ laa neid modoū bun usilauf. Memelik õ bun wõ yen anī age fiya, Sodom taun an wõ yem are, ī gamag eig fe di, ibodom. <sup>24</sup> Anī ere, aya ã arokeneik, es fiya sain bun, morõ Sodom yalouf anī wal fiya, õ walouf.”

#### Morõ Ado Aya Bun Usi, Waū Unoīs

(Luk 10:21, 22)

<sup>25</sup> Sain anī bun, Jesus iron, “Dei, saa ado teneub nê Odug, aya õ yanã alesef, ere nigin, safina eneidi, kisi biya ado keleī adodo to dilouf nigin õ unokon, ago fen, simõ dibodon anidi bun yaor won. <sup>26</sup> Ariya, Dei, enī are ogon waū filolõ fiya biya bunem agon.

<sup>27</sup> “Ereb erab ganan, neu Dei ī aya bun inon. Taka nem Naal keleī sã, Dei yogo dogol. Taka nem Dei keleī

† Malakai 3:1

sã, Naal yogo, tunī idi Naalum Dei ifelnēdiyof nigin igirnēdif anidim dogol keleī.

<sup>28</sup> “Æ ganan morõ yei ken, sii yeik, wageun usig, ago ge di, aya wau inosiya afeneīf. <sup>29</sup> Neu sū waleg, oroweī seg fen, aya bun keleī walogouf, ere nigin, aya molol fen, aya imatkesiya. Ago gouf, meleīkanon siwo inoya gurug fouf. <sup>30</sup> Ere nigin, neu sū karika fen, neu morõ yal bagai.”

#### Jesus, Ī Sabat Naa Nê Odug

(Mak 2:23-28; Luk 6:1-5)

**12** Sain anī Juda neid Sabat naa †† bun, Jesus wit kabī atu atu iyok ilen. Jesus in dõ fiya tar naū feid fen, wit tunī gei fiya gariya dino fen, don. <sup>2</sup> Farisia tamo idi anī dileid fen, idi Jesus dirokenen, “Ulef! On dõ fiya tamo tar idi, itãfiya difodul ken, Sabat naa bun oug difef.”

<sup>3</sup> Jesus aitedin yalen, “Dawid in kusī tamo anidi geid naū fedi di, Dawid age fen anī, ã Negur nê Itotoya bun to uwesegen de? <sup>4</sup> Ī Negur nê fõ namen ilen, agef fen, ī in kusī tamo anidi geid, bret fateul anī don, anī idi age fiya kisi feleya sã, anī idi itãfiya difodul ken, age difen anī, prisem sã age difoū nê anī. <sup>5</sup> Oo ã Lo od anī to be uwesegen de? Are Sabat naa bun, pris tempel namen kabī dalef bunem naa anī didodok, anī ere, anī mosor sã. <sup>6</sup> Aya ã arokeneik, tekelei ī tempel wal fiya anī, are yeir. <sup>7</sup> Æ od enī, ‘Aya wau ifenēya anī orouf, sesewi fiya sã,’ ‡ anī nê gariya keleim are, ã tamo morõ sã ege mosor ado to wiyēdigem. <sup>8</sup> Ere nigin, Tamo Naal yogo dogol Sabat naa nê Odug.”

#### Tamo Taka Ima Sitakã Gege Fefu Fiya

(Mak 3:1-6; Luk 6:6-11)

<sup>9</sup> Jesus modoū anī itor ken, iyok ile, Juda neid uub fõ namen ilen, <sup>10</sup> tamo taka ima sitakã gege fefu fen, ī an ibodon. Idi Jesus bouwa bun od dinou fenê nigin naab dimir ken, abugã to difiyen, “Sabat naa bun tamo madur fiya anī idodõya sã de?”

<sup>11</sup> Jesus idi irokenēdin, “Æ anī taka, ã atun ī sipsip taka ado anī Sabat naa bun mekur isilauf, ã to uleg waleseg unenēgouf de? <sup>12</sup> Tamo ī sipsip wal fiya bagai! Anī nigin, biya anī Sabat naa bun age tafef, are idodõya sã.”

<sup>13</sup> Age ye fen, ī tamo anī irokenen, “Imã fara wol.” Age ye di, ī ima fara fele di, oditekei ima madur len, age fe di, ima sitakã gen wõ yen. <sup>14</sup> Anī ere, Farisia tamo idi dilelel fen, Jesus yukesiya nigin katõ difen.

#### Kabī Tamo Negurem Igirnen

<sup>15</sup> Idi neid kisi keleī ken, Jesus modoū anī itoron. Tamo kayau musei ī dõ difiyē di, ī idi neid dagi ganan el fedin, <sup>16</sup> tamo kayau ganan wedereid iron, ī aib yeya anī to yaor difouf nigin. <sup>17</sup> Enī Negur, profet Asaia bunem eig ye wogõ yen anī kisi falauf nigin, agef wõ yen:

<sup>18</sup> “Eī neu kabī tamo ayam agirnen, ī nigin aya wau laa fedig, ī nigin aya wau kulī yedig; aya neu Awa Uur ī bun anouf,

†† Sabat naa anī, Juda neid uub nê naa. ‡ Hosia 6:6

Ī anī teneub ganan haiden bun Negur nē madur ba-gai anī kurō fesiyouf.

<sup>19</sup> Ī to seye ye fen, ait bagam to iweig irōf; takam in ait naabur to karī youf.

<sup>20</sup> Werī felu reya Ī to were foug, takag, lalan komomor fe mog, Ī to gare falauf, agef mog, Negur nē madur bagai anim ganan wal foug.

<sup>21</sup> In yana bun, teneub ganan haiden, idi neid waud an yenēf.” †

### Jesus Belsebub Ado Difiyen

(Mak 3:20-30; Luk 11:14-23)

<sup>22</sup> Tamo taka kaa sanem irou di, mala sigor ado ifofakelen, idi anī dirousi di, Jesus Ī el fiyen. Age fe di, Ī mala kelē ye fen, od wogō yen. <sup>23</sup> Tamo kayau adok waud bun terē de fen, diron. “Enī anī Dawid Naal de?”

<sup>24</sup> Anī ere, Farisia tamo idi karī de fen, diron, “Are kaa sane neid mudur Belsebub yana bunem dogol, tamo enī kaa sesen irudif.”

<sup>25</sup> Jesus idi neid kisi kelei ken, idi irokenēdin, “Tano ganan yogo kiwai ifen ken, fara foug, are sane lauf, taun ganan bun be, fō ganan bun be, idi dogo fara difoug, idi to difarauf. <sup>26</sup> Satan Ī yogo Satan iruf, Ī yogo nigin faraf, yogo kiwai ifenek, naig fe fen, anī yogon tano ifarauf? <sup>27</sup> Are aya Belsebub yana bunem kaa sesen arudif, ere bunem āgenei tamo kayau kaa sesen dirudidig? Anī nigin, idim ā es diyēf. <sup>28</sup> Anī ere, aya Negur nē Awa Uur bunem kaa sesen arudif are, Negur nē tano mogo ā bun isil.

<sup>29</sup> “Takag, taka megeir ado nē fō bun ile, in safina bē yalou fenē, are Ī tamo megeir ado anī ket ifokel fen, gama Ī in safina fō bun bē yalouf.

<sup>30</sup> “Taka Ī aya to fedē fiyaf, Ī neu kiwai, takag, taka Ī aya ado to guru mafef are, Ī firagagaū fef. <sup>31</sup> Anī nigin, aya ā arokeneik, mosor kono fiya ado ganan tamo bun wō yef, are yalelauf, anī ere, Awa Uur kono fiyek, are mosor to yalelauf. <sup>32</sup> Taka Ī Tamo Naal nigin kiwai ifen ken, kobu yef are, in mosor yalelauf. Ani ere, taka Ī Awa Uur Fateul nigin kiwai ifen ken, kobu yef are, in mosor to yalelauf, gama sain enī bun ado dumen isiyouf buneg to yalelauf.

### Aa Taka Yogon Faat Ado

(Luk 6:43-45)

<sup>33</sup> “Aa biya are faat biya yūdīg, aa sane are faat sane yūdīg, anī nigin, aa ganan faat bunem keleiyadig. <sup>34</sup> Ā, gogour sane gere tar, naig fe di, ā sane anim ā biya nigin wogō gouf? Ereb ā namein isokosef, are sigoreim kaaresi gef. <sup>35</sup> Tamo biya, safina biya Ī bun kuru fef anī irou isidig, age fe di, tamo sane, safina sane Ī bun kuru fef anī irou isidig. <sup>36</sup> Anī ere, aya ā arokeneik, tamo idi od kisi sā wogō den anī ganan, fau es fiya sain bun, idi fau dogo Negur mala bun, mugu mugu kurō difesiyouf. <sup>37</sup> Anī nigin, ogon od bunem ō mosor sā yōf, ogon od bunem ō mosor ado yōf.”

### Jona Nē Uris

(Mak 8:11, 12; Luk 11:29-32)

<sup>38</sup> Age fe di, Farisia tamo tunī, lo ifelnēdiya tamo tunī geid, idi Jesus dirokenen, “Tise, amā ō bun memelik nē uris taka mailau fenē.”

<sup>39</sup> Jesus aitedin yalen, “Sane seseirā ibor, sain enei nē tamo kayau anī, memelik nigin to difef! Anī ere, taka to ifelneif, de profet Jona nē uris anim dogol ifelneif.

<sup>40</sup> Ere nigin, Jona naa towo bō towo, gau odug namen ibodon, age fiya gen, Tamo Naal naa towo bō towo, teneub akor ilon yenēf. <sup>41</sup> Niniwe tamo kayau fā de fen, es fiya naa bun, ibor enī, sain enei nē tamo kayau sane difiyēdiyof, ere nigin, idi mogo Jona wogō ye di, waud falei den, gama taka Jona wal fiya are yeir. <sup>42</sup> Kuin Saut tamal fā ye fen, es fiya naa bun, ibor enī, sain enei nē tamo kayau sane fiyēdiyof, ere nigin, kayau anī, King Solomon nē keleī biya karī youf nigin teneub idiyen tamal isin, gama taka King Solomon wal fiya are yeir.

### Kaa Sane Kel Isiya Gen

(Luk 11:24-26)

<sup>43</sup> “Sain kaa sane tamo bun tamal ulō yeis fen, gerere tuan ile, si inoya modoū imirek ile to fotou fef. <sup>44</sup> Agef fen, Ī irok, ‘Aya fō atoron anī bun baban kelauf.’ Sain Ī kel isif, fō ani daku, waī difel fen, madur difen anī ilef. <sup>45</sup> Anī nigin, Ī ile fen, baban kaa sesen Ī wal fiya sewen anī geif irou isif, age de fen, idi namen dile, an difaref. Age dife di, tamo anī gai sane bagai lef, uruwa bun ne tobonunā anī wal fiya. Age fiya bagai, sain enei nē tamo kayau, ibor sane enī gama difaref, idi tobonunā anī adouf.”

### Jesus Sina, Tura Tar Geid

(Mak 3:31-35; Luk 8:19-21)

<sup>46</sup> Sain Jesus tamo kayau wogō feid mog, in sina tura tar geid serē difar fen, Ī geid od wogō douf nigin orodin. <sup>47</sup> Takam Ī irokenen, “Ogon sinā turā tar geid serē difaref, idi ō geid od wogō dou fenē orodif.”

<sup>48</sup> Jesus aiten yalen, “Ai anī neu naai, ai anī neu turau tar?” <sup>49</sup> In dō fiya tar bun imam ifelneif fen, Ī iron, “Enidi anī neu naai, neu turau tar. <sup>50</sup> Taka Ī, neu Dei saa ilun ibodok anī nē oroya dōf age fef anī Ī, neu turau, neu mainou, neu naai.”

### Faat Irarāya Tamo Nē Yaab Od

(Mak 4:1-12; Luk 8:4-10)

**13** Naa de anī bun, Jesus aaben tamal kutū yeis ile, daliyou sirin ibodon. <sup>2</sup> Guru fiya odug kaliif difiyē di, tamo kayau adok ubun difar mog, Ī waag namen isil ibodon. <sup>3</sup> Agef fen, erab erab musei yaab od nem irokeneif fen, iron, “Kabī marau taka, faat irarāf nigin ilen. <sup>4</sup> Sain Ī irarak ile mog, tunī naab luwen kuku ren, are ninā disi dakasin. <sup>5</sup> Tunī meein tuar kuku ren, an teneub badagar. Are kaisā bagai fokū den, ere nigin, teneub are badagar bagai. <sup>6</sup> Anī ere, sain gaa ise di, bali are ilala di, laasi yedin, ere nigin, idi warumutei sā. <sup>7</sup> Faat tunī malū duri atun kuku ren, are malū duri anī

† Asaia 42:1-4

fā ye fen, bali sile feledin. <sup>8</sup> Faat tunī teneub biya bun kuku ren, are idi biya imadin, taka biya hundred, taka biya siksti, taka biya teti age fef ilauf. <sup>9</sup> Aib ī weder adouf, karī youf.”

<sup>10</sup> In dō fiya tar ī wagen disi to difiyen, “Ere nigin ō yaab od nem tamo kayau urokenēdif?”

<sup>11</sup> Jesus aitedin yalen, “Saa tano nē waa keleī youf nigin are mogo ā ifenein, anī ere, tamo kayau to ifenēdin. <sup>12</sup> Ereb taka aib ī ado are, anī wal fiya ifenēf, anī ī musei adouf. Ereb taka aib ī sā, ereb ereb ī ado areg ī bun yalelauf. <sup>13</sup> Anī nigin, aya yaab od nem arokenēdif, ere nigin,

“Idi meledim diledig, anī ere, idi meleid fokōya sā, idi wederedim karī dedig, anī ere, idi wedereid fokōya sā, to keleik.

<sup>14</sup> Idi bun, Asaia nē profet od kisi felef:

“Ā wedereim karī gouf, anī ere, wedereī to fokō youf, ā meleim ulogouf, anī ere, meleī to fokō youf.

<sup>15</sup> Ere nigin, tamo kayau enei, idi waud katī felen, idi wederedim karīya malai bagai, age de fen, idi meleid difofakelen, age fiya sam are, idi meledim dilem, wederedim karī dem ado, idi waud fokō ye fen, falei de di, aya idi el afedim.’ †

<sup>16</sup> Anī ere, āgenei meleī nigin el fedif, ere nigin, ā ulegef, āgenei wedereī nigin el fedif, ere nigin, ā karī gef.

<sup>17</sup> Anī aya ā momoi arokeneik, profet musei, madur tamo geid, ā ulegef anī dilou fenē nigin waud yenen, anī ere, idi meledim to dilen, takag, karīya ā karī gef anī karī dou fenē nigin waud yenen, anī ere, idi wederedim to karī den.

### Jesus Faat Irarāya Tamo Nē Yaab Od Faded Fen

(Mak 4:13-20; Luk 8:11-15)

<sup>18</sup> “Yaab od bun, faat irarāya tamo nē gariya anī karīg: <sup>19</sup> Taka ī, saa tanon nē od karī ye fen, ī weder to fokō yef, sane taka isi, faat yogon wau bun iraran anī son fiyek. Are faat naab luwen iraran anī age fiya. <sup>20</sup> Takag, faat meein tuar kubū yen are, tamo ī od karī ye fen, kaisā bagai ī od anī yale fen, wau bun kulī yef. <sup>21</sup> Anī ere, ī warumutei sā, anī nigin, ī sain meluk to ibodōf. Sain, biya od nigin morō be, kafī fiya be isif, ī kaisā bagai irofosisif. <sup>22</sup> Takag, faat taka malū duri atun kubū yen are, tamo ī od karī yef, anī ere, tenebur mata ibodōya nē sii fiya, safina ado ibodōya nē kisi fiya anidim, biya od sile fe di, anim biya to yūf. <sup>23</sup> Takag, faat teneub biya bun kubū yen are, tamo ī od karī ye fen, fokō yef, are ī biya yūf, taka biya hundred, taka biya siksti, taka biya teti agef imauf.”

### Lili Nē Yaab Od

<sup>24</sup> Jesus yaab od taka irokenēdin, “Saa tano ī, tamo taka yogon kabī bun, wit faat biya iraran gen. <sup>25</sup> Anī ere, tamo adok mulaī den mog, yogon kiwai isin, lili wit ka-

bier irara ken, agef yen ilen. <sup>26</sup> Sain wit bali fokū ye fen, biya olili den, agef mog, lilig wowā den.

<sup>27</sup> “Marau nē kabī tamo, ī wagen disin diron, ‘Tamo biya, ō faat biya on kabier to uraran de? Lili anī naine-nem disin?’

<sup>28</sup> “Ī aitedin yalen, ‘Kiwai takam age fen.’

“Ne kabī tamom to difiyen, ‘Amā mele anī kusus mafelauf anī ō oroyok de?’

<sup>29</sup> “Ī aitedin yalen, ‘Sā, ere nigin, lili kusus ge mā, ā wit ado kusus gouf. <sup>30</sup> Malakaī, weim difar mog, fau kusu fiya sain bun. Sain anī bun, aya kusus fiya tamo arokenēdiyof: Lili ketem kurug fen, ufafāg, dum yakur feid isaikalauf nigin; agog fen, wit kurug, neu kin gurig uleg.’”

### Masted Faat Yis Ado Nē Yaab Od

(Mak 4:30-32; Luk 13:18-21)

<sup>31</sup> Jesus yaab od taka irokenēdin: “Saa tano ī, masted faat tamo takam yale fen, yogon kabier itenen gen.

<sup>32</sup> Anī ī faat ganan nigin naal bagai, anī ere, ī odugouf, ī kabier saaf ganan wal fediya aa wō youf. Age fe di, ninā ilun temeleid disi, were bun dibodōf.”

<sup>33</sup> Jesus baban yaab od taka irokenēdin: “Saa tano ī, yis kayau takam yale fen, flawa odug ado falei fe di, ganan gē yedig gen.”

<sup>34</sup> Jesus od enī ganan, yaab od nem tamo kayau wogō fiyēdin. Ī od ganan to kurō falaisi irokenēdin, yaab od nem dogol. <sup>35</sup> Anī bunem, Negur profet bunem eig ye wogō yen anī, agef kisi felen:

“Aya yaab od bunem sigoroum kurō afesiyof, gariya bun teneub ino fen, ereb ereb inokakan anī aya yaor afouf.” ††

### Jesus Lili Nē Yaab Od Faded Fen

<sup>36</sup> Jesus tamo kayau itorneīd fen, fō namen ilen. In dō fiya tar ī wagen disi fen, diron, “Kabier lili nē yaab od anī, amā faded wamā.”

<sup>37</sup> Jesus aitedin yalen, “Tamo tekelei faat biya iraran, are Tamo Naal. <sup>38</sup> Kabī are tenebur tamo kayau, faat biya anī, are Negur nē tano nē gere tar, lili are Satan nē gere tar, <sup>39</sup> kiwaim lili iraran, are Satan. Kusu fiya are saa teneub ado idiyēf bun, kusus fiya tamo are idi engel.

<sup>40</sup> “Anī nigin, lili kusus feid, yā yakur feid isaikalauf, age fiya gen, saa teneub ado idiyēf bun, age fof. <sup>41</sup> Tamo Naal ī, yogon engel sur fediyof, idi yogon tano bun ereb ereb ganan mosor dinodig ado, tamo kayau ganan sane age difedig gei difeid fen, dalelnēdiyof. <sup>42</sup> Idi yā mala bobo rouf bun dirarāf, an inā odug ado firi de fen, goboreid kikokō youf. <sup>43</sup> Age fe di, madur tamo idi, gaa gen nedi Temeid nē tanon fula difouf. Aib ī weder adouf, karī youf.

† Asaia 6:9, 10

†† Sam 78:2

### Safina Biya Bagai Inokon Ado Maaĩ Tuwa Meli Bagai Pel Nĕ Yaab Od

<sup>44</sup> "Saa tano ĩ, safina biya bagai kabier inokon gen. Tamo taka fotou fe fen, baban kabier inokon. Agef fen, wau al fef ile, safina adok ĩ ado anĩ, na nigin sur fe fen, akor anĩ na yalen.

<sup>45</sup> "Takag, saa tano ĩ, na yaleya tamo, maaĩ tuwa meli bagai pel biya, na nigin imirek gen. <sup>46</sup> ĩ meein medeĩya taka moni odug nĕ anĩ fotou fe fen, ile, safina adok ĩ ado anĩ na nigin sur fe fen, meein medeĩya anĩ na yalen.

### Kakāg Nĕ Yaab Od

<sup>47</sup> "Takag, saa tano ĩ, kakāg daliyou bun gau bou fire fire gei fiya nigin dirādig gen. <sup>48</sup> Sain kakāg isokose di, gau yaleya tamo dī dife, ubun ise di, anĩ idi dibod ken, gau biya gei de, karam namen difeid fen, sesen anĩ are dirarailen. <sup>49</sup> Age fiya bagai, saa teneub ado idikalau f bun eig foug. Engel idi disi fen, idi madur tamo atun sesen anidi gei de dale, <sup>50</sup> yā mala bobo ref bun dirarāf, an inā odug ado firi de fen, goboreid kikokō youf."

<sup>51</sup> Jesus to fedin, "Ā od enĩ ganan wedereĩ fokō yef de?"

Idi diron, "Yo, amā karĩ mauf."

<sup>52</sup> Jesus idi irokenēdin, "Anĩ nigin, lo ifelnēdiya tamo ganan saa tano nigin ifelnēdin are, idi fō tama gen, ĩ safina biya nĕ aaben tamal safina mata tubu ado irou isidig."

### Profet Yana Sā Gen

(Mak 6:1-6; Luk 4:16-30)

<sup>53</sup> Jesus yaab od eneidi bure fel fen, anenem iyok ilen. <sup>54</sup> In fō gariyan isi fen, ĩ an tamo kayau dogo neid uub fō bun ifelnēdin, age fe di, idi terē den. Idi to difen, "Tamo eĩ, kisi biya ado memelik nĕ total enei, nain yalen? <sup>55</sup> ĩ kapenta naal sā de? In sina Maria sā de? In tura tar Jems, Josef, Simon, Judas ado sā de? <sup>56</sup> In main tar ganan, ada weim to tabodok de? Tamo enĩ enei ganan nain yalen?" <sup>57</sup> Age de fen, idi ĩ kiwai difenen.

Anĩ ere, Jesus idi irokenēdin, "Profet taka ĩ, in fō gariyan ado in fō bun dogol, ĩ yana sā."

<sup>58</sup> ĩ an memelik musei to inon, ere nigin, idi to momoi den.

### Jon Naan Igunēdiya Tamo Ula Gudū Fen

(Mak 6:14-29; Luk 9:7-9)

**14** Sain anĩ bun, Galili nĕ uyu irouya Herod Jesus nigin od karĩ ye fen, <sup>2</sup> in kabĩ tamo irokenēdin, "Enĩ Jon naan igunēdiya tamo, ĩ laa fen anĩ kel fā yen! Anĩ nigin, memelik nĕ total ĩ bun kabĩ yalef."

<sup>3</sup> Kulu Herod, in tura Filip nĕ aiwa, Herodias nigin, Jon yale ifō, kalabus bun inenen. <sup>4</sup> Ere nigin, Jon ĩ irokenēdig, "Ō ĩtāfiya ufodul ken, turā nĕ kayau walen."

<sup>5</sup> Herod Jon yukesiya nigin wau yenen, anĩ ere, tamo kayau kumĩ fedin, ere nigin, idi ĩ profet taka dedig.

<sup>6</sup> Herod sina gō fen anĩ nĕ naa bun, Herodias nĕ barai seg kui ye fen, dole kenēdi di, Herod wau al bagai fen. <sup>7</sup> Age fe di, ĩ wau adok kuturol fen, ne barai ereb taka nigin to foug, de anĩ bagai ifenēf yen. <sup>8</sup> In sinam weder te yabi di, ĩ iron, "Beĩ taka bun Jon naan igunēdiya tamo mudur uno fen, ein wanauf." <sup>9</sup> King ĩ wau togun, anĩ ere, wau kuturol fen, tamo kayau meleid bun kurō fesin anĩ nigin, in oroya dōf anĩ bagai ifenēf nigin wogō ye fen, tamo sur fe di, <sup>10</sup> Jon kalabus bun ula gudū fen. <sup>11</sup> In mudur beĩ bun dino diroule, ne barai difenē di, ĩ sina gein irou ilen. <sup>12</sup> Jon nĕ dō fiya tar disi, in bouwa buru dale mū difen. Age de fen, idi dilen, Jesus dirokenen.

### Jesus Faif Tausen Tamo Saaf Ifenēdin

(Mak 6:30-44; Luk 9:10-17; Jon 6:1-14)

<sup>13</sup> Jesus, Herod Jon ula gudū fen anĩ karĩ ye fen, ĩ mugu bagai waag bun moilin ilen. Tamo kayau idi anĩ karĩ de fen, taun temeleid yedim dō difen. <sup>14</sup> Sain Jesus kutū yeis fen, mala iran, tamo kayau musei iledin, ĩ idi nigin wau yu ken, idi neid dagi el fiyēdin.

<sup>15</sup> Mogo bok isi di, in dō fiya tar Jesus wagen disi diron, "Eĩ gerere tuan, sain mogo sa kelef. Tamo kayau susur wo di, dilalauf, ago di, idi fonō fonō dile fen, dogo neid saaf na dalouf."

<sup>16</sup> Jesus irokenēdin, "Idi ileyā nigin kisi to yenēf. Saaf yōya nigin āgem wenēdigouf."

<sup>17</sup> Idi dirokenen, "Amā ein bret faif, gau uru ado dogol."

<sup>18</sup> ĩ iron, "Wageun gurig urousig." <sup>19</sup> Tamo kayau fisir bun dibodadāf nigin Jesus irokenēdin. Bret faif gau uru ado, imam yale, saa ilun itad fen, ĩ Negur de fiye ken, bret mumā fen. Agef fen, in dō fiya tar ifenēdi di, idim tamo kayau difenēdin. <sup>20</sup> Idi ganan don anĩ kisi fe-len. Age fe di, in dō fiya tar, tamo kayau bret dokon, tunĩ ditoraran anĩ fito difen, karam tuwelf eweid gere fen. <sup>21</sup> Tamo bret don anĩ, idi faif tausen age fiya, kayau kesu geid iwesediya sā.

### Jesus Naan Teteatu Iyon

(Mak 6:45-52; Jon 6:15-21)

<sup>22</sup> Kaisā bagai, Jesus, in dō fiya tar waag bun idi ketem sitakā dilauf nigin sur fedin. Age de mog, ĩ tamo kayau irudin. <sup>23</sup> Jesus idi irud le fen, ĩ yogo arein kosē youf nigin iselen. ĩ an mugu ibod mog, bō irou isin.

<sup>24</sup> Anĩ ere, waag mogo teneub itoron gerō ifaren, yau odug fā ye di, moloun wĩ ye fen, waag yū di, ilef isif fen.

<sup>25</sup> Wef mog, Jesus daliyou teteatu idi gedin iyok ilen.

<sup>26</sup> Sain in dō fiya tar meleid diran, daliyou teteatu iyō mog, dile fen, idi tererē den. Idi diron, "Eĩ baraū," kumĩ de fen, ui guru den.

<sup>27</sup> Anĩ ere, kaisā bagai Jesus irokenēdin, "Total ufareg! Are ayam. To kumĩ wog."

<sup>28</sup> Pita solof iron, "Odug, onom ouf are, urokana len, naan teteatu ō garan asiyouf."

<sup>29</sup> Jesus iron, "Usi."



Age fiyë di, Pita waag bun kutû yeis, naan teteatu Jesus wagen iyok ilen. <sup>30</sup> Anĩ ere, ĩ yau ile fen, kumĩ ye di, gamai imutuk isil fen, iweig iron, "Oduq, usenna!"

<sup>31</sup> Kaisã bagai, Jesus ima iran, yalesne ken, irokenen, "Õ momoiya naal, ere nigin õ waũ uru ado?"

<sup>32</sup> Age ye fen, idi uru waag namen sosõ de di, yau kee relen. <sup>33</sup> Anĩ dile fen, idi waag namen difaren, Jesus nigin seli dabi diron, "Momoi bagai, õ anĩ Negur Naal."

### Jesus Genesaret Oun Dagi Adodo El Fedin

(Mak 6:53-56)

<sup>34</sup> Sain idi daliyou sitakã dibal dilen, Genesaret te-neub bun wõ den. <sup>35</sup> Tamo kayau fonõ anĩ bun teme-leid, Jesus kelei ken, idi fonõ anĩ kalilĩ fiya fõ fõ ganan od dinon. Fonõ fonõ idi neid dagi tamo guri difeid, Jesus wagen disi fen, <sup>36</sup> idi dagi tamo yogon gabar irig kobũ difouf nigin, Jesus digonen. Ganan idi ĩ kobũ difen, dagi fara feledin.

### Amuyë Sã Ado Amuyë Ado

(Mak 7:1-23)

**15** Sain anĩ bun, Farisia tamo tunĩ, lo ifelnëdiya tamo tunĩ geid, Jesus garan Jerusalem temeleid disi to difiyen, <sup>2</sup> "Ere nigin on dõ fiya tar, mudur ado neid tobonunã wal difedig? Idi neid imeid kulo fiya sã, saaf dõdig!"

<sup>3</sup> Jesus solof irokenëdin, "Ere nigin ã ägenei tobonuneĩ dõg fen, Negur nẽ ĩtãfiya wal gedig? <sup>4</sup> Ere nigin, Negur iron, 'Õ sinã tamã yeneid wales,' † 'Aibem taka sina be tama be gelu fiyëf, ĩ laa bun dinenëf bagai.' <sup>††5</sup> Anĩ ere, ã urõgedig, 'Tamo taka, sina be, tama be idi bun irõf, "Ereb taka õ isennõya nigin ayam ifonõya anĩ, ayam Negur afenem," <sup>6</sup> ĩ age fef anĩ bunem in tama yana seli kulõ fiya nigin to age fouf, gedig. Ägenei tobonunã age fiya bunem Negur nẽ od to dõ gedig. <sup>7</sup> Æ mala yaleya tamo! Asaia ĩ, ã nigin profet od eig ye wogõ yen in od tutuk:

<sup>8</sup> "Tamo kayau enidi, nedi sigoredim aya selu kulõ difedig,

anĩ ere, idi neid waud aya nigin gerõ ifaref.

<sup>9</sup> Idi aya yanau dalesedig, are ege.

Idi neid ifelnëdiya are tamo nẽ kelei dogol dõ difedig.' ‡ "

<sup>10</sup> Jesus tamo kayau iweig laisi, irokeneĩd fen, iron, "Karĩg fen, wedereĩ fokõf. <sup>11</sup> Ereb taka mayarem tamo awa kurẽ isilef anim, ĩ amuyë to ifenëdig, anĩ ere, ereb taka namenem awa kurem ulõ yesif anim, ĩ amuyë ifenëdig."

<sup>12</sup> Age ye di, in dõ fiya tar ĩ garan disi to difiyen, "Faria tamo idi od enĩ karĩ de fen, waud õ nigin to biyaf anĩ, õ karĩ wof de?"

<sup>13</sup> Jesus aitedin yalen, "Aayũ ganan, neu Dei saa ilun tamal im to itenanan, are warumutei ado kususu fouf.

<sup>14</sup> Utornëdig; idi uyu irouya nigin meleid ifofakelen. Mala ifofakeleya tamo taka, mala ifofakeleya taka gim fiyëf are, idi uruwom mekur kuku douf."

† Eksodas 20:12; Diuteronomi 5:16 †† Eksodas 21:17; Levitikas 20:9 ‡ Asaia 29:13

<sup>15</sup> Pita iron, "Yaab od enĩ nẽ gariya faded wo urokanamã."

<sup>16</sup> Jesus to fedin, "Æ fau nene gef de? <sup>17</sup> Æ to ulegedig de? Ereb taka awa gerinem te namen isilef are te ado iledig. <sup>18</sup> Anĩ ere, ereb taka awa bun wõ yef are wauda bunem isedig anim, tamo amuyë ifenëdig. <sup>19</sup> Ere nigin, wauda bun tamal wõ yef, are kisi sesen, tamo yukesiya, seseirã inoya, noli tobonunã, bẽ, kot bun idegëya od bou bun yũya, dumen od wogõya. <sup>20</sup> Enĩ ganan anĩ tamo amuyë ifenëdig, anĩ ere, ima kulo fiya sã saaf doko anim, tamo amuyë to ifenëdig."

### Kanan Kayau Nẽ Momoiya

(Mak 7:24-30)

<sup>21</sup> Jesus modoũ anĩ itor ken, Taia Saidon ado neid te-neub akoron ilen. <sup>22</sup> Haiden kayau Kanan tamal taka, melsã an tamal Jesus wagen isin iweig iron, "Oduq, Dawid Naal, aya nigin malalon yõ! Neu barai kaa sa-nem irou di, to biya bagai yenek."

<sup>23</sup> Anĩ ere, Jesus od taka to solo fenen. Anĩ nigin, in dõ fiya tar Jesus wagen disi, total bagai dirokenen, "Kayau sur wo di, ile, ere nigin, ĩ iweig fen, iweig fen, dõ fadaf."

<sup>24</sup> Jesus kayau aiten yalen, "Negur aya sur fiyan are, sipsip Israel atun fõ delen anidi bun dogol."

<sup>25</sup> Kayau anĩ isin, wagen ibor bobou fe fen, ĩ iron, "Oduq, aya usenna!"

<sup>26</sup> Jesus aiten yalen, "Kesu nanaal neid saaf yale fen, gaũ irarak kenëdiya are to biya."

<sup>27</sup> Kayau anĩ iron, "Oduq, are momoi, anĩ ere, gaũ idig moroid tar tebol bun saaf dõ di, momout kuku re di, dõdig."

<sup>28</sup> Age ye di, Jesus aiten yalen, "Kayau, õ momoiya odug ado! Ogon waũ irok agef ifonok." Sain anĩ bun bagai, ĩ ne barai el felen.

### Jesus Fo Tausen Tamo Saaf Ifenëdin

(Mak 8:1-10)

<sup>29</sup> Jesus an itor ken, Galili maaĩ yeri dõ fen. Agef fen, ĩ arein isel ibodon. <sup>30</sup> Tamo kayau musei wagen disin, yeid kirorõya, meleid ifofakelen, iborodim gogo dedig, aiteid ifofakelen, dagi fire fire museig, Jesus ye gariyan guri dife dirou disi di, ĩ el fedin. <sup>31</sup> Aiteid ifofakelen od wogõ den, iborodim gogo dedig madur feid difaren, yeid kirorõya diyon, meleid ifofakelen lo difen, anĩ ganan tamo kayau dile fen, terẽ den. Age fe di, idi Israel nẽ Negur yana dalesen.

<sup>32</sup> Jesus, in dõ fiya tar iweignëdi di, wagen disi di, iro-kenëdin, "Aya tamo kayau enidi nigin waud inaf, idi mogo aya geid naa towo dibodon, anĩ ere, gama ereb taka yõya sã. Aya, idi naũ susur afedi di, dilauf anĩ to orouf, age afouf are, idi luwen kuku douf."

<sup>33</sup> In dõ fiya tar dirokenen, "Amã gerere tuan ein bret kisi feleya nain male fen, musei enĩ weit mafediyouf?"

<sup>34</sup> Jesus to fedin, "Bret ganĩ ã ado?"

Idi diron, "Bret sewen, gau nanaal teke tekelei ado."

<sup>35</sup> Jesus tamo kayau tenebur dibodadãf nigin iro-kenëdin. <sup>36</sup> Agef fen, Jesus, bret sewen gau ado, imam

yale iroun, ĩ Negur de fiye ken, bret anĭ mumā feid fen, in dō fiya tar ifenēdi di, idi bagam tamo kayau difenēdin. <sup>37</sup> Idi ganan don anĭ kisi felen. Dumen in dō fiya tar, tamo kayau bret dokon, tunĭ ditoraran anĭ fito difen, karam sewen eweid gere fen. <sup>38</sup> Tamo bret don anĭ idi fo tausen, kayau kesu geid iwesediya sã. <sup>39</sup> Jesus tamo kayau susur feid, dilele di, ĩ waag bun sō ye, Magadan akoron ilen.

### Farisia Tamo Sadusia Tamo Geid, Saa Ilun Nē Uris Nigin To Difen

(Mak 8:11-13; Luk 12:54-56)

**16** Farisia tamo Sadusia tamo geid, Jesus wagen dis, kisi difiye ken, saa ilun nē memelik taka meledin inouf nigin to difiyen.

<sup>2</sup> Jesus aitedin yalen, "Sain aragau isi di, ā urōgedig, 'Sain biyau fenē, ere nigin, saa giri yef,' <sup>3</sup> bonimei di, ā urōgedig, 'Gama uyē yau ado foug, ere nigin, saa giri ye fen, budū iyokelef.' Ā saa bun es fiya nigin keleĭ bagai, anĭ ere, ā ereb sain nē uris es fiya nigin kisi feleya sã. <sup>4</sup> Sain enei nē tamo kayau, ibor sane seseirā inoya nē anĭ, memelik nē uris dimirēdig, anĭ ere, taka to ifenēdiyof, de Jona nē uris dogol ifenēdiyof." Age ye fen, Jesus idi itorneĭd ilen.

### Farisia Tamo Ado Sadusia Tamo Neid Yis

(Mak 8:14-21)

<sup>5</sup> Sain idi daliyou sitakā dibal dilen, in dō fiya tar bret yaleya nigin wedereid tu kelen. <sup>6</sup> Jesus idi irokenēdin, "Lo welegei! Farisia tamo ado Sadusia tamo neid yis nigin, ā lo welegei."

<sup>7</sup> In dō fiya tar idi dogo dogol katō de fen, diron, "Ī agef irok, ere nigin, ada bret to tarousil nigin."

<sup>8</sup> Idi neid wogōya Jesus keleĭ ken, to fedin, "Ā momoia naal bagai, ere nigin ā bret sã ge fen, aug tutur wogō gef? <sup>9</sup> Ā wedereĭ fau to fokō yef de? Ā to karĭ welegef, bret faif anĭ faif tausen don, age fe di, karam ganĭ ā kuru ge di, eweid gere fen? <sup>10</sup> Takag, bret sewen anĭ fo tausenem don, age fe di, karam ganĭ ā kuru ge di, eweid gere fen? <sup>11</sup> Ā naig fe di, wedereĭ to fokō yef, aya bret nigin ā to arokeneim de? Anĭ ere, ā lo welegei, Farisia tamo ado Sadusia tamo neid yis nigin." <sup>12</sup> Age ye di, idi mogo wedereid fokō yen, ĩ yis bret bun dinodig anĭ nigin to wogō fedin, ĩ Farisia tamo ado Sadusia tamo neid ifelnēdiya anĭ nigin wogō fedin.

### Pita Kristus Nigin Kurō Fesin

(Mak 8:27-30; Luk 9:18-21)

<sup>13</sup> Sain Jesus Sisaria Filipai nediwon isi fen, in dō fiya tar to fiyēdin, "Tamo kayau Tamo Naal nigin ai dedig?"

<sup>14</sup> Idi dirokenen, "Tunĭ dirok, ō Jon naan igunēdiya tamo, tunĭ dirok, ō Eliya, tunĭ dirok, ō Jeremaia oo profet taka be."

<sup>15</sup> Jesus to fedin, "Ba ā uleg? Aya nigin ā ai gef?"

<sup>16</sup> Simon Pita aiten yalen, "Ō anĭ Kristus, Ō mata ibodōya Negur Naal."

<sup>17</sup> Jesus solof iron, "El fiya ō ado, Simon Jona nē naal, ere nigin, on keleĭ are tamo nē keleĭ bunem sã, are

neu Dei saa ilun tamal in keleĭ bunem. <sup>18</sup> Anĭ nigin, aya ō arokonok, ō Pita, † meein enĭ teten neu sios anouf, laa nē megeir anim sios to wal fiyēf. <sup>19</sup> Aya saa tano nē ki ō afonōf, ereb ō tenebur ein ufok, are saa ilun ouneg ifōf, ereb ō tenebur ein biru wof, are saa ilun ouneg biru foug." <sup>20</sup> Age ye fen, Jesus ĩ Kristus yeya anĭ, aib taka to dirokenēf nigin, in dō fiya tar wedereid iroun.

### Jesus Busuk Bun Laaf Fen, Mata Kel Fã Youf Yen

(Mak 8:31-9:1; Luk 9:22-27)

<sup>21</sup> Sain anĭ bunem ilauf bun, Jesus yogo nigin in dō fiya tar yaor fe irokenēdin, ĩ Jerusalem ilauf bagai, an darau musei, mudur adodo, pris odudug, lo ifelnēdiya tamo imeid bun yalouf, an ĩ dukesiyof, naa towo bure fele di, mata kel fã youf.

<sup>22</sup> Pita Jesus yale, yerin irou ile ou fiyen, ĩ iron, "Odu, sã bagai! Enĭ ganan ō nigin to bagai wō youf!"

<sup>23</sup> Jesus falei yel, Pita irokenen, "Satan, dumeun ule! Ō aya naaburau gudū wof; on kisi are Negur nē sã, on kisi tamo nē dogol."

<sup>24</sup> Age ye fen, Jesus in dō fiya tar irokenēdin, "Aib taka aya dō fiyau fenē, ĩ yogon oroya lai fesil fen, ĩ yogon aa tetek faali fe fen, anĭ aya dō fiyauf. <sup>25</sup> Ere nigin, aib taka yogon mata isennēf nigin oro fef are, fō yalauf, aib taka yogon mata, aya nigin irailauf are, mata anĭ gurug foug. <sup>26</sup> Tamo taka ĩ, teneub enĭ ganan kakarai fe fen, akorou yef, anĭ are, ĩ yogon malakanon irailauf, ere biya ĩ yalouf? Takag, tamo taka yogon malakanon nigin ere mala solof fen, ĩ kel yalouf? <sup>27</sup> Tamo Naal, in Tama nē fula fiya medeĭya ado in engel geid disiyof, agef fen, tamo mugu mugu ereb age fef anĭ kilei, ĩ mala solo age fiya bagai ifenēdiyof. <sup>28</sup> Aya momoi arokeneik, tunĭ ein difaref fau to gare de mog, idi Tamo Naal in tano bun isi di, dilouf."

### Jesus Bouwa Falei Fen

(Mak 9:2-13; Luk 9:28-36)

**17** Naa sigis bure fele di, Jesus, Pita, Jems, taka Jon Jems nē tura geif fen, idi mugu arei odug ilun diselen. <sup>2</sup> An Jesus idi meleid bun bouwa falei felen. In nawa gaa gen fula felen, in kolos lalau fen, yal gen lalanan. <sup>3</sup> Agef mog, an idi meleid bun Moses, Eliya ado wō de fen, Jesus weim wogō den.

<sup>4</sup> Pita Jesus irokenen, "Odu, ada ein ibodōya nigin biya bagai. Ō oroyōf are, aya salafat towo anouf, taka ogon, taka Moses nē, taka Eliya nē."

<sup>5</sup> Pita fau wogō ye mog, lalo lalau bagai idi kerub fedin, ait taka lalo namen iron, "Eĭ neu Kesu, ĩ nigin aya wau laa fedig, ĩ nigin aya wau kulĭ yedig. Ī karĭ wiyēg!"

<sup>6</sup> Anĭ in dō fiya tar karĭ den, idi neweid kususus de fen, tenebur gurorō de tererē den. <sup>7</sup> Anĭ ere, Jesus isin, kobū feid fen, ĩ iron, "Fafāg, to kumĭg." <sup>8</sup> Idi ditadsen, taka to dilen, Jesus dogol.

<sup>9</sup> Idi arei bun diyok disi fen, Jesus idi irokenēdin, "Ā ereb ulegel enĭ, aib taka to urokenēg, fau Tamo Naal laa bun tamal kel fã ye di."

† Pita, ani nē gariya, meein.

<sup>10</sup> In dō fiya tar Jesus to difiyen, “Ere nigin lo ifelnē-diya tamo dirōdig, ‘Eliya ī ketem isiyouf bagai’ dedig?”

<sup>11</sup> Jesus aitedin yalen, “Momoi bagai, Eliya isi fen, ereb ereb ganan madur fediyouf. <sup>12</sup> Anī ere, aya ā arokeneik, Eliya mogo isi bure felen, idi anī ī nigin to kelei ken, ereb ereb ganan idi waud iron kilei, ī nigin mogo age difen. Age fiya gen, Tamo Naal idi imeid bun darau yalouf.” <sup>13</sup> Jesus age wogō ye di, in dō fiya tar idi wede-reid fokō yen, Jon naan igunēdiya tamo nigin irok den.

### Jesus Kesu Kaa Sane Ado El Fiyen

(Mak 9:14-29; Luk 9:37-42)

<sup>14</sup> Sain idi tamo kayau gedin disin, tamo taka Jesus wagen isi fen, ibor bobou fen. <sup>15</sup> Ī iron, “Odug, neu kesu nigin malalon yō. Ī mir yuk sain, sane bagai firi ye fen, sain musei yāg iledig, naanūg iledig. <sup>16</sup> Aya, ī, on dō fiya tar wagedin arou elen, anī ere, idi el fiyēya kisi feleya sā.”

<sup>17</sup> Jesus solof iron, “Sain enei nē tamo kayau, ibor enī, sane, momoiya sā, sain ganī aya ā geid tabodōf? Sain ganī aya ā nigin wau aukesilauf? Kesu wageun ein urousig.” <sup>18</sup> Jesus kaa sane ou fiyē di, kesu bun tamal ulō yeis ile mog, kesu ī bou karika len.

<sup>19</sup> Age fe di, in dō fiya tar mugun Jesus wagen disi to difiyen. “Ere nigin amā kaa sane iruya kisi feleya san?”

<sup>20</sup> Jesus irokenēdin, “Ere nigin, āgenei momoiya naal bagai nigin. Aya momoi arokeneik, ā momoiya naal masted faat age fiya adouf are, ā arei enī urokenē-gouf, ‘Ein tamal godo urou ule, oun ufar,’ ago ge di, ī dōf age foug. Ereb ereb ganan ā age fiya kisi feleya.” †

### Jesus Baban In Laa Nigin Iron

(Mak 9:30-32; Luk 9:43-45)

<sup>22</sup> Sain idi disi, Galili guru difen, Jesus idi irokenēdin, “Tamo Naal ī fau tamo imeid bun dinouf. <sup>23</sup> Idi fau ī dukesiyouf, anī ere, naa towo bure fele di, ī fau baban mata kel fā youf.” Age ye di, in dō fiya tar waud morō gudū fesin.

### Tempel Nē Takis

<sup>24</sup> Jesus in dō fiya tar geid, Kapenaum taun disi di, tempel takis yaleya tamo, Pita wagen disi to difiyen, “Āgenei tise tempel nē takis to inodig de?”

<sup>25</sup> Pita iron, “Ariya, ī takis inodig.”

Sain Pita fō namen isi di, Jesus ket wogō yen, “Simon, ō ere kisi wof? Ai bunem tenebur nē king anidi takis daledig, idi neid kesu bunem de, oo tamo tunī bunem?”

<sup>26</sup> Pita solof iron, “Tamo tunī bunem.”

Jesus ī irokenen, “Anī nigin, kesu idi bunem sā. <sup>27</sup> Anī ere, adam idi waud saneya to tafenēdiyof nigin, ō daliyoun ule, on mū urāf. Gau uruwa walouf anī awa ge-de fen, an silwa koin moni ulouf, wale fen, takis ogon ado neu nigin wenēdiyof.”

† Itotoya tunī eig de ditoton: kisi feleya. <sup>21</sup> \* Anī ere, kaa sane eig fiya ege to ulō yeis ilauf, kurig fen, kosē ge di.

### Saa Tanon Odug Ibodōya Nigin

(Mak 9:33-37; Luk 9:46-48)

**18** Sain anī bun, in dō fiya tar Jesus wagen disi, to difiyen, “Aim saa tanon odug bagai ibodok?”

<sup>2</sup> Ī kesu naal taka iweignē isi di, idi atun ifarnen.

<sup>3</sup> Agef fen, ī iron, “Aya momoi arokeneik, ā kesu nanaal gen falei gouf anī dogol, age fiya sāf are, ā saa tanon to bagai ulagauf. <sup>4</sup> Anī nigin, aib taka yogo nigin kuru kel fen, kesu enī genēf are, ī saa tanon odug bagai ibodok.

<sup>5</sup> “Takag, aib taka kesu naal eig fiya, aya yanau nem yalef are, ī aya yaleyaf. <sup>6</sup> Anī ere, aibem taka age fe di, kesu aya nigin momoi def enidi taka, mosor bun kubū youf are, tamo anī meein odug guyutu bun ifo ken, maaīwō irāya nigin biya.

<sup>7</sup> “Tenebur tamo kayau idi meleidlouf, ere nigin, ereb to biya anī age fe di, tamo mosor bun dilalauf. To-bonunā age fiya bagai wō youf, anī ere, tamo nanī be bunem isif, ī malalon ado! <sup>8</sup> Ogon imam be, yem be mosor bun ineyōf are, gudū fen uraile. Ō imā tobega be, yē tobega ado mata bun ileyā nigin biya bagai, ere nigin, imā totoū be, yē totoū adouf are, yā faimud ibodkeleya anī bun an dirāyōf. <sup>9</sup> Age fiya bagai, ogon malam mosor bun ineyōf are, ubodol uraile. Ō malā tekelei ado mata bun ileyā nigin biya bagai, ere nigin, malā totoū adouf are, hel nē yā mala bun dirāyōf.

### Sipsip Fō Yeleya Nē Yaab Od

(Luk 15:3-7)

<sup>10</sup> “Ā lo welegei, kesu nanaal enidi taka to meleī irim gouf. Ere nigin, aya ā arokeneik, idi neid engel saa ilun dibodok, sain ganan neu Dei saa ilun ibodok no dile-dig. ††

<sup>12</sup> “Ā ere kisi ado? Tamo taka ī wan handred sipsip ado, tekelei idi atun fō yalauf are, marau ī nainti-nain sipsip uya bun itorneid fen, ile, tekelei fō yelen anī to imirēf de? <sup>13</sup> Aya ā momoi arokeneik, ī fata foug are, ī sipsip tekelei anī nigin wau kulīya odug, sipsip nainti-nain to fō delen nigin anī nē kulīya wal fiya. <sup>14</sup> Age fiya bagai, āgenei Temeī saa ilun ibodok, kesu nanaal enidi taka fō yeleya nigin to orodig.

### Turā Taka Mosor Inoyōf

<sup>15</sup> “Ogon turā taka mosor inoyōf, ule ā uruwom atun dogol in kū fenēya ufelnef. Ī ō karī yōf, ō ogon turā mogo kel walel. <sup>16</sup> Anī ere, ī to karī yōf, baban tekelei be uru age fiya ō geid fen, ulagauf, ago di, ‘od ganan isennēya uruwom be, towom sigoredim kurō difesiyouf anī megeir gouf.’ ††<sup>17</sup> Ī idi karī fediya nigin itorōf, sios urokenēf. Ī sioseg karī fiyēya nigin itorōf are, ī haiden be takis yaleya tamo sane gen unenēf.

<sup>18</sup> “Aya ā momoi arokeneik, ereb taka ā tenebur ein ufokalagauf, are saa iluneg ifokalauf, ereb taka ā tenebur ein biru walagauf, are saa iluneg biru falauf.

†† Itotoya tunī eig de ditoton: diledig. <sup>11</sup> \* Fō delen anī kel yaleya nigin Tamo Naal isin. ‡ Diuteronomi 19:15

<sup>19</sup> “Baban, aya ã arokeneik, tenebur ein ã uruwom ereb taka nigin wauĩ tekelei fen, to gouf, neu Dei saa il-un ibodok, ĩ dõf ã nigin age foug. <sup>20</sup> Ere nigin, uruwom be, towom be, aya yanau nem guru difef, aya an idi geid mabodok.”

### Kabĩ Tamo Wau To Yüdig Nē Yaab Od

<sup>21</sup> Age ye di, Pita Jesus wagen isi, to fen, “Odug, neu turau aya nigin mosor inouf, sain ganĩ neu turau nē mosor nigin wederou tu kalauf? Wederou tu kelef ile, sewen daũ de?”

<sup>22</sup> Jesus aiten yalen, “Aya õ arokonok, õ sewen dogol to agouf, sewenti anĩ are sewenem tobol wouf.

<sup>23</sup> “Anĩ nigin, saa tano ĩ, king taka, ne ferfer geid in wareg madur fiya nigin oron gen. <sup>24</sup> King ĩ wareg madur fiya nigin gariya inon, tamo taka ĩ bun ten milion kina yalen anĩ, ĩ wagen dirou disin. <sup>25</sup> ĩ wareg anĩ yukesiya kisi feleya sã nigin marau iron, ĩ yogo ado in aiwa, in gere tar ado in safina ganan na nigin sur fedi di, in wareg anĩ yukesiya kisi falauf yen.

<sup>26</sup> “Kabĩ tamo, marau wagen ibor bobou fe fen, igo-nen, ‘Õ aya nigin waũ unois fen, sain wana len, aya wareg anĩ ganan kisi afelkonõf.’ <sup>27</sup> Kabĩ tamo anĩ nē marau, ĩ nigin wau yu ken, wareg anĩ ganan lai fesil fen, itornē di, ilen.

<sup>28</sup> “Anĩ ere, kabĩ tamo anĩ oreis ile fen, ĩ yogon kabĩ tura taka fotou fen, ĩ bun wareg wan handred kina ado. ĩ ka fe, ula irou fen, iron, ‘Õ aya bun wareg walēn anĩ kel wana!’

<sup>29</sup> “In kabĩ tura kubũ ye, ibor bobou fe fen, igonen, ‘Õ aya nigin waũ unois fen, sain wana len, aya wareg anĩ mala kela afonõf.’

<sup>30</sup> “Anĩ ere, ĩ to karĩ fiyen. ĩ tamo yale irou, kalabus bun iran, are de wareg inouf anĩ dogol. <sup>31</sup> Anĩ kabĩ tura tar tunĩ, ĩ age fen anĩ dile fen, idi waud odug sanen, anĩ nigin, dile, idi neid marau ereb age fen anĩ ganan wogõ difiyen.

<sup>32</sup> “Age de di, marau tamo, kabĩ tamo anĩ iweignē isi di, ĩ irokenen, ‘Õ kabĩ tamo sane. Aya ogon wareg ganan lai afonon, ere nigin, õ aya ugonan. <sup>33</sup> Aya õ nigin wau inan gen, õ ogon kabĩ tura nigin waũ inõya san de?’ <sup>34</sup> In marau tamo name ise fen, darau ifenēya nigin kalabus lo fiya tamo imeid bun inenen, are de wareg ganan inouf anĩ dogol.

<sup>35</sup> “Age fiya bagai, neu Dei saa ilun ibodok, ã atun tureĩ tar neid mosor nigin wauĩ bun wedereĩ to tu kalauf are, ãg age yeĩf.”

### Tamo Kayau Ado Bagu Fiya Anĩ Fara Fiya

(Mak 10:1-12)

**19** Jesus od enidi wogõ ye bure fel fen, Galili distrik itor ken, Judia distrik ilen, Jordan naan sitakã.

<sup>2</sup> Tamo kayau musei dõ difiyē di, ĩ an idi dagi el fedin.

<sup>3</sup> Farisia tamo tunĩ ĩ wagen disi, kisi difiye ken, idi to difiyen, “Tamo taka, yogon kayau gariya fire fire bun iruf anĩ, lo dõ fiya de?”

<sup>4</sup> Jesus aitedin yalen, “Ã Negur nē Itotoya to uweseg ulegen de? Gariya bun, Negur ereb ereb kare fedin ĩ,

‘tamo ino kayau ino fen,’ <sup>5</sup> Negur iron, ‘Anĩ nigin, tamo ĩ in sina tama itorneĩd fen, in kayau ado bagu difouf, idi uruwom bouweid tekelei.’ <sup>6</sup> Age difef, idi uru sã, idi tekelei. Anĩ nigin, Negur tamo kayau ado bagu fedin anĩ, tamom to fara foug.”

<sup>7</sup> Idi to difiyen, “Age fiyauf are, ere nigin Moses iron, tamo taka in kayau fara fiya nē pepa ifen ken, iru di, ilauf yen?”

<sup>8</sup> Jesus idi irokenēdin, “Moses ĩ ãgenei wauĩ total anĩ ile fen, ãgenei kayau iruya nigin to katũ yein. Anĩ ere, gariya bun age fiya sã. <sup>9</sup> Aya ã arokeneik, aib taka in kayau seseirã inoya sã mog, kayau iru fen, kayau taka yalef are, ĩ seseirã inof.”

<sup>10</sup> In dõ fiya tar Jesus dirokenen, “Tamo kayau atun morõ agef yenek nigin, ĩ kayau to yalouf are biya bagai.”

<sup>11</sup> Jesus irokenēdin, “Tamo ganan od enĩ dõ fiya kisi feleya sã, teke tekeleim Negurem age fedif anidi dogol. <sup>12</sup> Tunĩ idi, sineid namenem, bouweid kesu iroya nigin tutuk sã gõ fedidig, tunĩ are tamom korõ difedidig, tunĩ saa tano nigin kisi de fen, kayau to daledig. Tamo taka kisi enĩ dõ fiya nigin kisi falauf, dõf age foug.”

### Jesus Kesu Nanaal El Fiya Ifenēdin

(Mak 10:13-16; Luk 18:15-17)

<sup>13</sup> Jesus ima tetedin ino fen, kosē fiyēdiyof nigin, kesu nanaal ĩ wagen guri de dirousin. Anĩ ere, in dõ fiya tar, idi guri de dirousin anidi ou difiyēdin.

<sup>14</sup> Jesus iron, “Utorneĩdig len, kesu nanaal aya wage-un disiyof, idi to katũ wedig, ere nigin, saa tano are eig fediya neid.” <sup>15</sup> Age ye fen, ĩ ima tetedin inol fen, an tamal tokõ fel ilen.

### Tamo Gaũ Safina Musei Ado

(Mak 10:17-31; Luk 18:18-30)

<sup>16</sup> Tamo taka Jesus wagen isi to fiyen, “Tise, ere biya anĩ aya age afe fen, mata ibodkeleya alouf?”

<sup>17</sup> Jesus aiten yalen, “Õ ere nigin ereb biya nigin aya to wiyaf? Tekelei ĩ dogol biya. Mata ibodkeleya bun ulau fenē, õ ĩtãfiya dõ woid.”

<sup>18</sup> Tamo Jesus irokenen, “ĩtãfiya nanĩ bagai?”

Jesus iron, “Õ tamo taka to ukesiyouf, seseirã to unouf, to bē walouf, õ taka nigin idegēya od to urõf, <sup>19</sup> ogon sinã tamã yeneid walesauf, <sup>20</sup> õ ogo nigin waũ laa fef gen, nē tã nigineg ago.’ <sup>21</sup> ”

<sup>20</sup> Tamo gaũ iron, “Anĩ ganan aya dõ afen, ere taka anĩ aya fau dõ fiya sã?”

<sup>21</sup> Jesus ĩ irokenen, “Õ madur bagai you fenēf, ule, ogon safina ganan na nigin sur wo fen, maleg tamo wenēdiyof, agouf, õ saa ilun safina biya adouf. Agol fen, usi, aya dõ wiya.”

<sup>22</sup> Od enĩ tamo gaũ karĩ ye fen, ĩ wau morõ fe di, itor ilen, ere nigin, ĩ safina musei ado.

<sup>23</sup> Age fe di, Jesus in dõ fiya tar irokenēdin, “Aya ã momoi arokeneik, safina musei ado tamo, saa tanon

† *Jenesis 1:27* †† *Jenesis 2:24* ‡ *Eksodas 20:12-16; Diuteronomi 5:16-20* †† *Levitikas 19:18*

ileya nigin malai bagai. <sup>24</sup> Baban aya ã arokeneik, kamel ã gabar iwaya nã nil ku bun ileya nigin karika bagai, safina musei ado tamo, Negur nã tano bun ileya nigin malai bagai."

<sup>25</sup> Od enĩ in dõ fiya tar karĩ den, idi fatuk terẽ de fen, to difen, "Age fiyauf are, aim anĩ mata ibodkeleya ya-leuf kisi feleya?"

<sup>26</sup> Jesus idi lo feid fen, iron, "Tamo yogo bun age fiya kisi feleya sã, anĩ ere, Negur yogo bun ereb ereb ganan age fiya kisi feleya."

<sup>27</sup> Pita Jesus aiten yalen, "Amã ereb ereb ganan mator ken, õ dõ mayok! Ere anĩ amã nemã mala solo malouf?"

<sup>28</sup> Jesus idi irokenẽdin, "Aya ã momoi arokeneik, ereb ereb ganan mata falei foug sain anĩ bun, Tamo Naal ã yogon king nã sia bun fula fiya medeĩya ado ibodõf, ã aya dõ wiyagef, ãg king nã sia tuwelf bun ubodõg fen, Israel ibor tuwelf es wedigouf. <sup>29</sup> Taka fõ be, tura tar be, main tar be, tama, sina, gere tar, kabĩ, aya yanau nigin itoron, idi ganan mala solo wan handred wal fiya dalouf, mata faimud ibodkeleya anĩ dalouf. <sup>30</sup> Anĩ ere, musei malabag dibodok, idi dumen dibodõf, musei dumen dibodok, idi malabag dibodõf.

#### Wain Kabĩ Tamo Neid Yaab Od

**20** "Saa tano nã tobonunã are, teneub marau taka ã, bonimeĩ bagai ile fen, yogon wain kabier kabĩ dalouf nigin tamo oroi yaledin age fiya gen. <sup>2</sup> Kabĩ marau naa tekelei nigin ten kina afeneĩf ye di, idi ganan anĩ yo de di, in wain kabier sur fedin.

<sup>3</sup> "Nain kilok bonimeĩ age fiya, ã ilen, tamo tunĩ maket modoũ bun ege difar mog, iledin. <sup>4</sup> ã idi irokenẽdin, 'ãg uleg, neu wain kabier kabĩ waleg, ago gouf, mala de afeneĩf.' <sup>5</sup> Age ye di, idi dilen.

"ã baban gaa atun ado aragau tri kilok age fiya ile feneg, de age fen. <sup>6</sup> Aragau faif kilok age fiya, ã ilen, tunĩg fau difar mog, iledin. ã idi to fiyẽdin, 'Ere nigin ã ege bagai gaa ganan ein ufaregel?'

<sup>7</sup> "Idi aiten dalen, 'Ere nigin, taka nem amã to oroi yalemam.'

"ã idi irokenẽdin, 'ãg uleg, neu wain kabier kabĩ waleg.'

<sup>8</sup> "Sain aragau di, wain kabĩ marau in kabĩ tamo neid orowa irokenen, 'Kabĩ tamo uweigneĩd fen, dogo neid mala wenẽdiyof, dumen disil idi bun gariya uno fen, ule, uyu disil bun ouf.'

<sup>9</sup> "Kabĩ tamo aragau faif kilok age fiya kabĩ dalen disi fen, mugu mugu ten kina dalen. <sup>10</sup> Sain idi bonimeĩ nem ket iweigneĩdin anidi disin, idi kisi difen, amã idi wal fiya malouf den, anĩ ere, idig mugu mugu ten kina dalen. <sup>11</sup> Sain idi moni dalel fen, idi teneub marau nigin nauseir den. <sup>12</sup> Idi diron, 'Tamo enidi dum bagai uweigneĩdi di, aua tekelei dogol kabĩ dalel, anĩ ere, amã, naa enĩ ganan bonimeĩ nem isi, gama yeiref, kabĩ total malel, gaa uruwa dõ famam, anĩ ere, õ amã idi geid ten kina dede wanamam.'

<sup>13</sup> "Anĩ ere, kabĩ marau ã, idi neid taka solof irokenen, 'Mou, aya õ sane to ayok. Õ ten kina nigin ada

uruwom sigoroda to tekelei de? <sup>14</sup> Ogon kabĩ mala wale fen, ule. Aya õ afonom age fiya, tamo dum bagai oroi aleyen anĩ, de age fiya afeneĩf nigin wau irok. <sup>15</sup> Aya neu safina ereb taka age fiya nigin wau irok anĩ, aya to age afouf de? Aya neu biya age afef nigin, õ aya kiyeĩ wanaf de?"

<sup>16</sup> "Anĩ nigin, idi dumen dibodok anidi malabag dibodõf, idi malabag dibodok anidi dumen dibodõf."

#### Jesus In Laa Nigin Irõ, Towo Fen

(Mak 10:32-34; Luk 18:31-34)

<sup>17</sup> Jesus Jerusalem iselau fenẽ, ã in dõ fiya tar tuwelf mugu bagai gei feid fen, irokenẽdin, <sup>18</sup> "Ada Jerusalem teselef, an Tamo Naal ã pris odudug, lo ifelnẽdiya tamo imeid bun dinenẽf. Idi ã laa foug nigin bou bun od dũf. <sup>19</sup> Age de fen, idi ã haiden Juda sã anidi imeid bun dino di, kono difiyẽ, wagĩ difiye ken, aa tetek bun dukesiyouf. Naa towo bun, ã mata kel fã youf!"

#### Jems Jon Ado Neid Sineid, Ne Wau Iron Anĩ Jesus To Fiyen

(Mak 10:35-45)

<sup>20</sup> Age fe di, Sebedi nã kesu uru, sineid geid Jesus wagen disin. Idi neid sineid ibor bobou fe fen, wau irok anĩ Jesus to fiyen.

<sup>21</sup> Jesus to fiyen, "Ere anĩ õ orok?"

Kayau iron, "Õ urõf, neu kesu uru enĩ, ogon tano bun taka ima biyalẽ ibodõf, taka ima kilẽ ibodõf."

<sup>22</sup> Jesus idi irokenẽdin, "ã ereb to gef anĩ nã gariya, ã keleĩ sã, naan aya ãf anĩ ã yõya kisi feleya de?"

Idi aiten dalen, "Amã kisi feleya."

<sup>23</sup> Jesus idi irokenẽdin, "ã momoi neu kap bun naan are wãgouf, anĩ ere, imau biyalẽ ibodõya be, kilẽ ibodõya are, ayam ifenẽya kisi feleya sã. Modoũ anidi are, neu Dei idi nigin dodok fen anidi neid."

<sup>24</sup> In dõ fiya tar ten, od anĩ karĩ de fen, uru tura ado nigin seye den. <sup>25</sup> Jesus idi iweig laisi fen, iron, "ã keleĩ, haiden idi dogo neid uyu irouya, tamo kayau lo fiya nigin total dinodig, idi dogo neid odudug, tamo kayau nigin megeir yaor difedig. <sup>26</sup> Anĩ ere, ã bun kisi to agef yenẽf, ã atun aib taka odug ibodõf nigin orof, ã ãgenei kabĩ tamo ibodõf. <sup>27</sup> ã atun aib taka uyun ibodõf nigin orof, ã ãgenei ferfer ibodõf. <sup>28</sup> Age fiya gen, Tamo Naal ã disennẽf nigin to isin, anĩ ere, ã tamo kayau isenneĩd fen, tamo kayau musei idi neid mosor anĩ fotokar yogon mata ifenẽdiyof nigin isin."

#### Tamo Uru Meleid Ifofakelen Anĩ Meleid Birikã Felen

(Mak 10:46-52; Luk 18:35-43)

<sup>29</sup> Jesus in dõ fiya tar geid Jeriko ditor dile mog, tamo kayau musei dõ difiyen. <sup>30</sup> Tamo uru meleid ifofakelen naab yerin dibodon. Sain idi Jesus isi ilef yeya karĩ de fen, diweig diron, "Odug, Dawid Naal, amã nigin malalon yõ!"

<sup>31</sup> Tamo kayau idi ou difiyeĩd fen, foro dalauf nigin dirokenẽdin, anĩ ere, idi wade bagai diweig diron, "Odug, Dawid Naal, amã nigin malalon yõ!"

<sup>32</sup> Jesus dē yel fen, idi iweigneïd fen, ĩ to fedin, "Ere naig ayēif nigin ā oroyeik?"

<sup>33</sup> Idi aiten dalen, "Oduġ, amā malamā fara wol kamāf nigin oromak."

<sup>34</sup> Jesus idi nigin meleidlōn fe fen, idi meleid kobū fedin. Kaisā bagai, idi meleid fara fele di, sā lo dife fen, idi Jesus dō difen.

### Jesus Tamo Yana Ado Gen Jerusalem Namen Ilen

(Mak 11:1-11; Luk 19:28-40; Jon 12:12-19)

**21** Idi Jerusalem kelē difiye ken, Moul Arei bun Betfage fonō wō den, Jesus in dō fiya tar uru sur feid fen, <sup>2</sup> ĩ idi irokenēdin, "Fonō wagein ifaref tokō weleg, ulō wesig fen, kaisā bagai donki ifōya naal ado uledigouf. Idi biru weledig fen, wageun gurig usig. <sup>3</sup> Taka nem ā erēb yeif, ĩ urokenēgouf, Oduġ ĩ kabī ifenēdiyōu fenē orof, ago ge di, kaisā bagai sur fediyouf."

<sup>4</sup> Profet eig ye wogō yen anī kisi falauf nigin agef wō yen:

<sup>5</sup> "Saion nē tamo kayau urokenēgouf, 'Ulef, ogon king ō garan isif, imatkeis fen, donki bun ibodok, donki naal teten.'" †

<sup>6</sup> In dō fiya tar dilen, Jesus iron kilei age difen. <sup>7</sup> Idi donki naal ado dirousi di, tetedin idi neid gabar du difedi di, Jesus anī tetedin ibodon. <sup>8</sup> Tamo kayau musei, idi neid gabar naabur du difedin, tunī idi aa were kokour dife, naabur du difedin. <sup>9</sup> Tamo kayau uyu dilen ado, dume dō difen diweig diron, "Hosiana, †† Dawid Naal bun!"

"Oduġ yana bunem isif, ĩ el fiya ado!" ‡  
"Hosiana, saa ilun bagai!"

<sup>10</sup> Sain Jesus Jerusalem ulō yesi di, taun anī bun tamo kayau ganān terē de fen, toti difen, "Tamo eī aim?"

<sup>11</sup> Tamo kayau diron, "Eī Jesus, profet Nasaret taun Galili teneub bun tamal."

### Jesus Tempel Bun

(Mak 11:15-19; Luk 19:45-48; Jon 2:13-22)

<sup>12</sup> Jesus tempel modoū bun ile, wō ye fen, na dale dile disi dife mog, an tamo kayau adok irudidin. ĩ moni solo fediya neid tebol ado kuburir na sur fediya neid fatar eleg feledin. <sup>13</sup> Jesus idi irokenēdin, "Negur nē Itotoya irok, 'Neu fō ĩ kosē nē fō douf,' †† anī ere, ā 'bē tamo neid iminēya fō' †† unogen."

<sup>14</sup> Meleid ifofakeleya, yeid kiorōya, Jesus wagen tempel bun disi di, ĩ el fedin. <sup>15</sup> Anī ere, Jesus erēb biya bagai age fe di, kesu nanaal tempel modoū bun diweig diron, "Hosiana, Dawid Naal bun," age de di, pris odudug, lo ifelnēdiya tamo geid, idi anī dileid fen, seye den.

<sup>16</sup> Idi Jesus to difiyen, "Kesu nanaal enidi erēb def, ō karī wof de?"

† Sekaraia 9:9 †† Anī nē gariya, 'Usennamā!' Od anī tamo kayau Negur yana yaleseya nigin wogō dedig. ‡ Sam 118:26 †† Asaia 56:7 †† Jeremaia 7:11

Jesus aitedin yalen, "Ariya, ā Negur nē Itotoya to uwesegen de?"

"Kesu momou kesu nanaal geid sigoreid bun selu kulō fiya nigin Negur idi mogo saika fedin.'" ††

<sup>17</sup> Agef fen, Jesus an tamal idi itorneïd, taun anī itor ken, Betani fonō ilen, an bō tekelei ibodon.

### Aa Fig Gariri Kelen

(Mak 11:12-14, 20-24)

<sup>18</sup> Bonimeï bagai, Jesus Jerusalem kel ile fen, naab luwen naū fen. <sup>19</sup> Mala irakelen, aa fig naab yerin ilen, Jesus iyok iselen fele fen, aa fig biya sā ege aarau dogol. Jesus aa fig irokenen, "Ō baban to bagai umauf!" Kaisā bagai, aa fig gariri kelen.

<sup>20</sup> In dō fiya tar anī dile mā, idi terē de kulō de fen, diron, "Naig fe di, aa fig kaisā bagai gariri kelen?"

<sup>21</sup> Jesus aitedin yale iron, "Aya ā momoi arokeneik, ā wauī momoi ge mā, wauī to ilef isi fouf, ā aa fig enī bun age afel dogol to ago gouf, sā arei enīg urokenēgouf, 'Kusu fen, maaīwō irāyōf,' are ĩ dōf age fouf. <sup>22</sup> Ā momoi gouf are, erēb taka nigin tog fen, kosē gouf, ā walogouf."

### Jesus Aim Igirnen Anī To Difiyen

(Mak 11:27-33; Luk 20:1-8)

<sup>23</sup> Jesus tempel modoū namen ulō yeis fen, an tamo kayau od ifelneïd mog, pris odudug, tamo kayau neid mudur adodo, ĩ wagen disi to difen, "Ere igiriya bunem ō erēb erēb enī ago wof? Aim ō igiriya enī ifonon?"

<sup>24</sup> Jesus aitedin yale iron, "Ayag to fiya tekelei afeneif. Ā solog urokanagauf are, erēb igiriya bunem erēb erēb enī age afef, aya ā arokeneif. <sup>25</sup> Jon nē naan igunēdin, are nainenem isin? Are saa ilun tamal de, tamo bunem?"

Idi dogo dogol katō de fen, diron, "Ada ĩ saa ilun tamal, tauf, ĩ irōf, 'Ba anī, ere nigin ā ĩ nigin to momoi wiyēgen?' <sup>26</sup> Anī ere, ada 'Tamo bunem' tauf, ada tamo kayau nigin kumī tafedif, ere nigin, tamo kayau idi ganān Jon nigin profet taka dedig."

<sup>27</sup> Anī nigin, idi Jesus ait solo de diron, "Amā keleī sā."

Age de di, Jesus iron, "Ago gouf are, ayag, ere igiriya bunem erēb erēb enī age afef anī to arokeneif."

### Kesu Uru Bun Yaab Od

<sup>28</sup> "Ā ere kisi gef? Tamo taka ĩ naal uru adon. Tama ĩ kesu matu garan ile iron, 'Neu kesu, gama wain kabier ule, kabī walouf.'

<sup>29</sup> "ĩ aiten yalen, 'Aya tuwauf,' dum ĩ in kisi falei ye fen, ilen.

<sup>30</sup> "Agef fen, tama kesu taka garan ile, od tekelei anī irokenen. Kesu aiten yalen, 'Dei, aya age afouf,' anī ere, ĩ ileya sā.

<sup>31</sup> "Idi uru atun, aim anī tama oron anī age fen?"

Idi aiten dalen, "Matum."

Jesus idi irokenēdin, "Aya ā momoi arokeneik, takis yaleya tamo, kayau bouweid na nē sur difedig geid, ā

††† Sam 8:2

atun, idi ketem Negur nē tano bun uyu dilauf. <sup>32</sup> Ere nigin, Jon naan igunēdiya tamo ĩ, madur ibodōya nē naab ifelneif nigin ā garan isin, ā ĩ nigin to momoi gen, anī ere, takis yaleya tamo, kayau bouweid na nē sur difedig geid, idi momoi den. Ā ĩ ulegeneg, ā wauī to falei ge fen, ĩ to momoi wiyēgen.

### Tamo Kabī Lo Difedig Nē Yaab Od

(Mak 12:1-12; Luk 20:9-19)

<sup>33</sup> “Yaab od taka nigin wedereī unog. Teneub marau taka ĩ yogon kabier aa wain itenen, ĩ kau ifō kalī felen, wain sumin asi fiya nigin ku yalen, kabī lo fiya nē fō inon. Agef fen, ĩ mala solo yalouf nigin wain kabī, kabī lo difedig tamo tunī imeid bun ino fen, uyu takā ilen.

<sup>34</sup> Sain biya bure fele di, teneub marau wain biya fito fiya nigin in ferfer susur fe di, kabī lo difedig tamo garan dilen.

<sup>35</sup> “Kabī lo difedig tamo, teneub marau nē ferfer diro-uneīd fen, taka dun, taka dukesin, taka meein tulu difen. <sup>36</sup> Age dife di, teneub marau ferfer tunī sur fedin, are idi musei uyulil sur fedin wal fiya. Age fe di, kabī lo difedig tamo uruwa age difen gen, baban yogon ferfer bun age difedin. <sup>37</sup> Dum bagai, teneub marau yogon naal idi garan sur fiyen. ĩ iron, ‘Idi neu kesu nigin fau karī difiyēf.’

<sup>38</sup> “Anī ere, kabī lo difedig tamo, naal anī dile fen, idi abob dirokenen, ‘Eī inim wain kabī akorouf. Usig, ada ĩ taukeis fen, yogon akor talouf.’ <sup>39</sup> Age de fen, idi ĩ dale, wain kabī mayarē dira ken, dukesin.

<sup>40</sup> “Age fiya nigin, sain wain kabī nē marau isiyouf, ĩ kabī lo difedig tamo ere naig fediyouf?”

<sup>41</sup> Idi Jesus aiten dalen, “Teneub marau, idi sane bagai sane ye fen, idenkesiyouf, ĩ wain kabī anī, kabī lo difedig tamo tunī imeid bun ino fen, na yaledi di, idi wain mayof sain bun fito de fen, yogon biya difenēf.”

<sup>42</sup> Jesus idi irokenēdin, “Ā od Negur nē Itotoya bun yenek anī to uwesegen de?

“Meein are fō inoya tamom sane de fen, ditoron anī, gama monog tor wō yen, anī Odug yogo age fe di, malamā yun.” †

<sup>43</sup> “Anī ere, aya ā arokeneik, Negur nē tano ā bun tamal son yeī yale, tamo kayau idi aayū faat biya yūf anidi ifenēdiyof. <sup>44</sup> Aib taka meein anī teten kubū youf, mered fe fisik fouf, takag, aib taka meein anī ĩ teten kubū youf, ĩ danīf aas lauf.” ††

<sup>45</sup> Sain pris odudug, Farisia tamo geid, Jesus nē yaab od karī den, idi kelein, Jesus idi nigin wogō yen. <sup>46</sup> Idi Jesus iroknēya nigin naab dimiren, anī ere, idi tamo kayau nigin kumī den, ere nigin, tamo kayau idi Jesus nigin profet taka dedig.

### Tamo Kayau Yalouf Bun Tar Nē Yaab Od

(Luk 14:15-24)

**22** Jesus yaab od nem baban irokeneīd fen, iron: <sup>2</sup> “Saa tano ĩ, king taka, ĩ naal kayau yalouf nigin tar dodok fen age fiya gen. <sup>3</sup> ĩ yogon ferfer sur fedī di,

† Sam 118:22, 23 †† Itotoya tunī bun, itotoya 44 to ibodok.

tamo iweignēdin yogon tar bun disiyouf nigin diro-kenēdin, anī ere, idi isiya ditoron.

<sup>4</sup> “ĩ baban ferfer tunī sur feid fen, iron, ‘Idi aya aweignēdin anī urokenēdig: Aya tar mogo saika afel. Aya bulmakau yaro biya biya ado adenen, erab erab ganan mogo dodok afelel. Bagu fiya tar bun usig.’

<sup>5</sup> “Anī ere, idi to karī difiyēdin, idi diyalelen, taka yogon kabier ilen, taka ĩ yogon bisnis kabī yalen. <sup>6</sup> Tunī idi ferfer dirouneīd fen, tadū difiyeīd didenkesin. <sup>7</sup> Anī nigin, king name odug sane fen, yogon kusī tamo sur fedī di, dilen, ferfer didenen anidi didenkeis fen, nedi taun yā dinon.

<sup>8</sup> “Agef fen, king, ne ferfer irokenēdin, ‘Bagu fiya nē tar mogo dodok afelel, aya tamo aweigneīd fen, naa afenēdin anidi, dogo sane age difen nigin, isiya kisi felelya sā. <sup>9</sup> Anī nigin, ā ulagauf, naab kaleyan aib aib uledigouf are, urokenēdig len, idi tar bun disiyouf.’ <sup>10</sup> Age ye di, ferfer dilelen, naab naab diyo ken, tamo kayau dileid fen, biya ado sane ganan gou difedin, age dife di, tamo kayau ado bagu difedig nē guru fiya modoū bun tamo kayau isokosen.

<sup>11</sup> “Age dife di, king namen isin, tamo kayau fele fedin, an ĩ tamo taka kolos biya ifonūya sā fotou fen.

<sup>12</sup> King ĩ to fiyen, ‘Mou, naig fe di, ō bagu fiya nē naki sā anī guru fiya enī namen usil?’ Tamo ĩ od sā ibodon.

<sup>13</sup> “Age fe di, king yogon kabī tamo irokenēdin, ‘Ima ye ado ufōg, mayarē gugum bun urāg, an are wifirig ye fen, gobora kikokō yediyouf.’

<sup>14</sup> “Anī nigin, tamo kayau musei iweignēdif, anī ere, teke tekelei igirnēdif.”

### Sisa Bun Takis Inoya

(Mak 12:13-17; Luk 20:20-26)

<sup>15</sup> Age fe di, Farisia tamo dilen, Jesus in od bun naig fe mog, talouf de fen, od katō difen. <sup>16</sup> Age de fen, Farisia tamo, idi neid dō fiya tar, Herod nē tamo tar geid, Jesus wagen sur difedi di, dilen, idi Jesus dirokenen, “Tise, amā keleī, ō momoi wogōya nē tamo, anī ō Negur nē naab momoi bagai ufelnēdidig, ō tamom to wewu diyōdig, ere nigin, ō idi yana ado be sā anī to es wedig. <sup>17</sup> Anī amā urokanamā, ogon kisi ere wof? Sisa ‡ takis ifenēya nigin biya de, sā?”

<sup>18</sup> Anī ere, Jesus idi neid namedin kisi sane kelei ken, iron, “Ā meleid yaleya tamo, ere nigin ā aya kisi wiyagef? <sup>19</sup> Takis ifenēya nigin koin moni ufelnag.” Idi koin moni taka wagen diroule di, <sup>20</sup> Jesus idi to fedin, “Eī ai nawa nē malakanon? Eī ai yana nē itotoya?”

<sup>21</sup> Idi aiten dalen, “Sisa nē.”

Age de di, ĩ idi irokenēdin, “Ereb Sisa nē are Sisa wenēg, erab Negur nē are Negur wenēg.”

<sup>22</sup> Od enī idi karī de fen, terē den. Age de fen, idi Jesus ditornē diya dilelen.

### Kel Fāya Bun Ai Nē Kayau Ibodōf?

(Mak 12:18-27; Luk 20:27-40)

<sup>23</sup> Naa de tekelei anī bun, Sadusia tamo idi dirōdig anī, laa bun tamal to ke de fā dedig, dedig anidim,

‡ Rom neid king odug.

Jesus wagen disi to difiyen. <sup>24</sup> Idi diron, "Tise, Moses iron, tamo taka kesu sā mog laa fef, in tura waab yale fen, tura fotokar kesu iroukenēf. <sup>25</sup> Amā atun, tura tura sewen dibodon. Matu ī kayau yalen laa fen, ī kesu sā, anī nigin, ī, in kayau, ne tura itorkenen. <sup>26</sup> Age fiya bagai, tura dō fiya īg age fen, anī dō fiya tri īg agef ile sewen adoken. <sup>27</sup> Idikeleya bun, kayau īg laa fen. <sup>28</sup> Anī nigin, kel fāya bun, idi sewen anī atun, ī ai nē kayau bagai ibodōf? Ere nigin, idi ganan kayau anī dalen."

<sup>29</sup> Jesus aitedin yale irokenēdin, "Ā od kū wenēgef, ere nigin, ā Negur nē Itotoya ado Negur nē megeir keleī sā. <sup>30</sup> Laa bun tamal kel fāya bun, an tamo kayau ado abob yalef ya sā, idi engel saa ilun difaref gen dibodōf. <sup>31</sup> Anī ere, laa bun tamal kel fāya nigin, Negur ā irokenein anī, ā to uwesegen de? <sup>32</sup> Negur iron, 'Aya Abraham nē Negur, Isak nē Negur, Jakop nē Negur.' † Ī laa neid Negur sā, ī mata ibodōya neid Negur."

<sup>33</sup> Anī tamo kayau od enī karī de fen, ī agef ifelnēdin anī nigin terē den.

### Ītāfiya Odug Bagai Ganān Wal Fiya

(Mak 12:28-34; Luk 10:25-28)

<sup>34</sup> Jesus ī Sadusia tamo od bun sigoreid ifokelen anī karī de fen, Farisia tamo idi guru difen. <sup>35</sup> Idi atun, lo keleī tamo takam Jesus kisi fiye ken, eig fiyē to fiyen,

<sup>36</sup> "Tise, Ītāfiya nanī anī, ganān wal fiya odug bagai Lo bun irok?" <sup>37</sup> Jesus irokenen, "Ō, Odug ogon Negur waū adok, malākanon adok, kisi adok bunem, ī nigin waū laaf.' ††<sup>38</sup> Ītāfiya enī ī matu, Lo bun ganān wal fiya odug bagai irok. <sup>39</sup> Anī dō fiya are eig fiya, 'Ō ogo nigin waū laa fef gen, nē tā niginēg ago waū laaf.' †<sup>40</sup> Lo ado Profet neid od ganān, Ītāfiya uru enī teten difaref."

### Ai Nē Naal Anī Kristus?

(Mak 12:35-37; Luk 20:41-44)

<sup>41</sup> Sain Farisia tamo idi guru difesi di, Jesus idi to fedin, <sup>42</sup> "Kristus nigin ā kisi ai gef? Ai nē naal anī Kristus?"

Idi aiten dalen, "Dawid naal."

<sup>43</sup> Jesus idi irokenēdin, "Dawid naig fe di, anī Awa Uu-rem irokenen, ī nigin 'Odug' yen?" Ī nigin Dawid iron,

<sup>44</sup> "Negur neu Odug irokenen:

"Imau biya melem ubod mog,

ogon kiwai tar

on yē farume gō afalauf." † †

<sup>45</sup> Dawid ī nigin 'Odug' yen ouf are, naig fe di, Kristus ī Dawid naal ouf?" <sup>46</sup> Taka nem, ī aiten yale solof irōya kisi feleya san, naa anī bunem ilen ganān, takam baban ī to fiyēya nigin kumī den.

### Jesus Farisia Tamo Ado Lo Ifelnēdiya Tamo Ketē Fiyēdin

(Mak 12:38-40; Luk 11:39-52; 20:45-47)

**23** Dum Jesus, tamo kayau in dō fiya tar geid irokenēdin, <sup>2</sup> "Lo ifelnēdiya tamo, Farisia tamo geid, Moses nē sia bun dibodōdig. <sup>3</sup> Anī nigin, ā idi karī

† Eksodas 3:6 †† Diuteronomi 6:5 † Levitikas 19:18 †† Sam 110:1

wiyēdig fen, ereb idi ā ago gei de di, ā ago gouf. Anī ere, ereb idi age difef anī, ā to agog, ere nigin, idi dirōdig anī to dō de age difedig. <sup>4</sup> Idi morō odudug difofa ken, tamo kayau oroweid se difedig, anī ere, idi dogo bagai, morō enei dalesauf nigin imeid gege tekelei bagai gebeya nigin to orodidig.

<sup>5</sup> "Idi ereb ereb ganān age difedig, are ege tamo meleid yaleya: Age de fen, idi tamo meleid yaleya nigin, lo Ītāfiya bokis naal odudug nuwa bun difeid fen, demeid bun ado imeid dā bun difofādig, idi neid kolos nē malū meluluk adodo dinodidig. <sup>6</sup> Idi, saaf odudug bun ado Juda neid uub fō bun, modoū malabag ibodōya anī orodidig. <sup>7</sup> Idi maket modoū bun, tamo kayau idim sere difiyēd fen, 'O tise' difediyouf anī orodidig.

<sup>8</sup> "Anī ere, ā tise to diyēf, ere nigin, ā Tise tekelei dogol ado, ā adok tura tura. <sup>9</sup> Ā tenebur ein aib taka to dei gouf, ere nigin, ā Temeī tekelei dogol ado, ī saa ilun ibodok. <sup>10</sup> Ā mudur ado to diyēf, ere nigin, ā Mudur Ado tekelei dogol, are Kristus. <sup>11</sup> Ā atun, aib taka ganān wal fiya wō you fenē, ī āgenei kabī tamo ibodōf. <sup>12</sup> Ere nigin, aib taka ī yogo yana yalesef, ī lai fesilauf, aib taka ī yogo nigin lai fesilauf, ī yana adouf.

<sup>13</sup> "Lo ifelnēdiya tamo, Farisia tamo geid, ā meleid yaleya tamo, ā nigin meleīlon ado! Ā tamo kayau meleid bun saa tano nigin sukar unogedig. Ā aug namen to ulegedig, idi dilau fenē age difef, ā katī welegedig. ††

<sup>15</sup> "Lo ifelnēdiya tamo, Farisia tamo geid, ā meleid yaleya tamo, ā nigin meleīlon ado! Ā, tamo tekelei waleg fen, ī āgenei dō fiya unenēgouf nigin, teneub bun uyo-keleg fen, maaī naab bun uyōgefeg ago gedig, agog fen, tamo ī anī ufelnēge di, ī āgenei dō fiya wō yef are, ī ā hel nē gere tar ubodōgef wal yeīya sane bagai wō yef.

<sup>16</sup> "Mala ifofakeleya uyu irouya, ā nigin meleīlon ado! Ā urōgedig, 'Aib taka tempel yana bunem in od isen ken, total od irok, are ege, anī ere, aib taka tempel nē gol bunem in od isen ken, total od irok, ī dōf age fouf.'

<sup>17</sup> Ā neneya, meleī ifofakeleya! Ere anī odug, gol de, oo tempel gol fateul ifenēdig anī? <sup>18</sup> Takag ā urōgedig, 'Aib taka alta yana nem in od isen ken, total od irok, are ege, anī ere, aib taka sesewi fiya nē safina alta bun ifaref anī yana nem in od isen ken, total od irok, ī dōf age fouf.' <sup>19</sup> Ā, mala ifofakeleya tamo! Ere anī odug, safina de, oo alta sesewi fiya fateul ifenēdig anī? <sup>20</sup> Anī nigin, aib taka alta yana nem in od isen ken, total od irok, ī alta ado safina ganān alta teten ifaref anim in od isen ken, total od irok. <sup>21</sup> Taka ī tempel yana nem in od isen ken, total od irok, ī tempel ado, Negur tempel namen ibodok anim in od isen ken, total od irok. <sup>22</sup> Taka ī saa yana nem in od isen ken, total od irok, ī Negur nē king sia ado, Negur ī an ibodok anim in od isen ken, total od irok.

<sup>23</sup> "Lo ifelnēdiya tamo, Farisia tamo geid, ā meleid yaleya tamo, ā nigin meleīlon ado! Ā kabier tamal sako

†† Itotoya tunī eig de ditoton: welegedig. <sup>14</sup> \* Lo ifelnēdiya tamo, Farisia tamo geid, ā meleid yaleya tamo, ā nigin meleīlon ado! Ā waab neid fō sosoin wedig kuwesig fen, tamo kayau meleid yaleya kosē meluk ago gedig. Anī nigin, ā darau odug bagai walogouf.



nanaaleg farag fen, ten tekelei unogedig, anī ere, ā, lo nē odug, are safina wal fiya anidi nigin to kisi gedig, are lo nē madur fiya, wau ifenēya, wau momoiya. Ā anī adok to tai gedig. Ā teten nē anī dōg fen, dum nē anīg tai gem, are dem. <sup>24</sup> Ā, mala ifofakeleya uyu irouya! Ā soloulā tar bun ibodok anī ulul nem yaleleya nigin kous gedig, anī ere, ā kamel tar bun ibodok anī utobogedig.

<sup>25</sup> “Lo ifelnēdiya tamo, Farisia tamo geid, ā meleid yaleya tamo, ā nigin meleilon ado! Ā kap beī ado agara anī kulo gedig, anī ere, name bun amuyē isokos fen, taka nē safina yaleya nigin imeī su lai ge fen fe tete-nem yaleya ado, akorou yeya aug naumeī nigin dogol yenek. <sup>26</sup> Farisia tamo, mala ifofakeleya! Kap beī ado name ket kulo wedig, ago ge di, teteneg fili youf.

<sup>27</sup> “Lo ifelnēdiya tamo, Farisia tamo geid, ā meleid yaleya tamo, ā nigin meleilon ado! Ā aau lalau nem matmat sigor naki fiya gen, teten lo fiya nigin biya bagai, namen anī are tamo gare den tuweid ado ereb ereb ganam amuyē isokosen. <sup>28</sup> Age fiya bagai, āg teten tamo kayau meleid bun madur tamo gen ubodogedig, anī ere, nameneī mala yaleya ado sane bagai isokosen.

<sup>29</sup> “Lo ifelnēdiya tamo, Farisia tamo geid, ā meleid yaleya tamo, ā nigin meleilon ado! Ā profet neid matmat unog fen, madur tamo neid matmat garab wiyēgedig. <sup>30</sup> Ā urōgedig, ‘Ada tubuda tar dibodon sain bun, ada tabodom are, ada idi geid to bagu tafem, profet nau-deid to filu fadam.’ <sup>31</sup> Anī nigin, ā aug nigin yaor gef, ere nigin, ā idi profet didenkesin anidi neid ibor tar. <sup>32</sup> Āgenei tubuī tar neid mosor tobol ge di, isokosef!

<sup>33</sup> “Ā gogour bagai! Ā gogour sane gere tar! Ā naig ge fen, hel nē es fiyau bun tamal uyagauf? <sup>34</sup> Age fiya nigin, aya, profet, keleī biya tamo, tise ado ā bun sur afe-diyouf. Idi tunī udenkesigouf, tunī aa tetek bun udenē-digouf, tunī āgenei uub fō bun wagagā gouf, fonō fonō idi darau wenēdig fen, urudigouf. <sup>35</sup> Anī nigin, madur tamo Abel nē naud bun ile, Sekaraia Berekia naal, ī tempel alta ado atun ā ukesigen, in naud bun, madur tamo neid naudeid ganam teneub enī iroun nigin, anī nē mala solo sane ā bun isiyouf. <sup>36</sup> Aya ā momoi arokeneik, mala solo kafī fiya enī ganam, tamo kayau sain enei bun dibodok anidi bun isiyouf.

### Jesus Jerusalem Nigin Wau Laa Fen

(Luk 13:34, 35)

<sup>37</sup> “O Jerusalem, Jerusalem, ō profet udenkeis fen, ō bun sur fedig anidi meein meein wedidig, sain musei aya ō wau afon ken, ogon gerē tar kuru afedig, tataro sina momou waye farumen kuru fedig gen, anī ere, ā utorōgedig. <sup>38</sup> Ulogouf, āgenei fō fonou lef. <sup>39</sup> Anī nigin, aya ā arokeneik, ā aya baban to uleyagauf ile, ā fau urōgouf, ‘Odug yana bunem isif, ī el fiya ado,’ † sain anī bun, ā aya uleyagauf.”

### Idikeleya Sain Nē Uris

(Mak 13:1-31; Luk 21:5-33)

<sup>24</sup> Jesus tempel bun tamal kutū yeis, iyok ile mog, in dō fiya tar Jesus wagen disin, tempel fō tunī anī difelnen. <sup>2</sup> Jesus to fedin, “Ā enī ganam ulegef de? Aya ā momoi arokeneik, meein enī taka, meein tura teten to yenēf, anī adok fau isog irailauf.”

<sup>3</sup> Jesus Moul Arein †† ibod mog, in dō fiya tar mugun wagen disin dirokenen, “Urokanamā, ere sain enī wō youf? Ere uris bagai anī, on isiya nē ado idikeleya nē?”

<sup>4</sup> Jesus aitedin yalen, “Takam to idegnēf nigin lo waleg. <sup>5</sup> Ere nigin, musei aya yanau nem disi dirōf, ‘Aya Kristus,’ age de fen, idi tamo kayau musei didegnēdiy-ouf. <sup>6</sup> Ā kusī wōya karīg fen, tamo sigoredim kusī nigin wogō douf anī karī gouf, ā anī nigin to terē gei. Ereb ereb anī agef wō youf, anī ere, idikeleya sain fau dum isiyouf. <sup>7</sup> Teneub taka fā ye fen, ī teneub taka nigin kiwai ifenēf, tano taka ī tano taka nigin kiwai ifenēf. Naū odug mimī ado, uyu taka taka bun wō youf. <sup>8</sup> Enei ganam, kayau kesu ibodōf nigin darau gariya inof gen.

<sup>9</sup> “Sain age foug bun, ā idi imeid bun ulagauf, darau odug laa bun dineneīf, teneub ganam bun tamo kayau ā nigin to orodiyouf, ere nigin, aya yanau ā ado nigin. <sup>10</sup> Sain anī bun, musei momoiya dudum difouf, idi dogo tutur abob kiwai difenēf, idi abob to orodiyouf.

<sup>11</sup> Agef mog, idegēya profet musei wowā douf, idi tamo kayau musei didegnēdiyouf. <sup>12</sup> Tobonunā sane anī fou yalauf nigin, tamo kayau musei wau laa fiya nigin folo rouf. <sup>13</sup> Anī ere, aib taka ī megeir ifar ile, idikeleya bun, Negur ī isennēf. <sup>14</sup> Saa tano nē biya od enī wogō difediyouf anim, teneub ganam bun tamo kayau wede-reid irouf fen, uris gen ifenēdiyouf, anī gama idikeleya isiyouf.

<sup>15</sup> “Sain ā log mog, ninir fonou inenēf, ‡ are profet Daniel sigor bun wogō yen anī, Jerusalem fateul modoū bun ifarauf are (ani uweseg keleī youf), <sup>16</sup> idi Judia teneub bun dibodok, arein diya diselauf. <sup>17</sup> Taka ī yogon fō sokor ibodok, ī to kel isil, aaben ereb ereb gei foug.

<sup>18</sup> Taka ī kabier ibodok, yogon gabar yalouf nigin to kel ilauf. <sup>19</sup> Naa anī bun, kayau bouweid ado, kayau kesu su ifenek ado, idi meleidlon adouf. <sup>20</sup> Feluk sain Sabat naa bun ado, ā to uyagauf nigin Negur kosē gouf.

<sup>21</sup> Sain anī bun, morō odug biya isiyouf, morō age fiya gariya bun teneub inon isi gama, taka to wō yen, dum buneg taka to wō youf. <sup>22</sup> Negurem naa anī to godo falaisim are, taka to mata ibodom, tamo kayau igirnēdin idi nigin ye fen, naa anī godo falaisiyouf. <sup>23</sup> Sain anī bun, taka ā irokeneīf, ‘Ulegef, Kristus yeir!’ oo ‘Ī your!’ ā anī to momoi ge. <sup>24</sup> Fau idegēya Kristus, idegēya profet ado wō de fen, idi kisi falauf are, Negur igirnēdin anidig didegnēdiyouf nigin uris odug memelik ado difelnēdiyouf. <sup>25</sup> Karīg, aya tetunem ā arokenein.

<sup>26</sup> “Anī nigin, takam ā irokeneīf, ‘Kristus ī your, gerere tuan,’ ā to ulagauf, ‘Kristus ī yeir, aab namen,’ ā anī to momoi ge. <sup>27</sup> Gaa iseyanem kolimei fili ye di, ile, gaa ileyaneg iledig, age fiya bagai, Tamo Naal in isiyouf

† Sam 118:26

†† ‘Oliv Arei’ dedig. ‡ Daniel 9:27; 11:31; 12:11

bun age fouf. <sup>28</sup> Nain be ereb bouwa buru waaif nē an, tum guru difouf.

<sup>29</sup> “Morō sain anī bure fele di, kaisā bagai

“gaa gugum kalauf,  
ogō to lalan youf,  
saa ilun tamal barisa kuku rediyouf,  
saa nē megeir guyoyō douf.’

<sup>30</sup> “Sain anī bun, Tamo Naal nē uris saa bun wō youf, teneub ganan bun tamo kayau waud gudū fouf. Idi Tamo Naal saa lalo bun, yogon fula fiya medeīya barikā megeir ado isi mog, dilouf. <sup>31</sup> Agef fen, ī yogon engel, taur ait odug ado susur fedī di, idi, yogon tamo kayau igirnēdin anidi, teneub akor ganan bun, saa akor ganan bun ado kuru difediyouf.

<sup>32</sup> “Gama ā, aa fig bun keleī walougouf: Susu bonuf fen, aarau inodif, ā keleī, saneya melsak. <sup>33</sup> Age fiya nigin, ā anī ganan ulougouf are, ā keleī, in isiya mogo melsā, bobogē bagai ifaref. <sup>34</sup> Aya ā momoi arokeneik, tamo kayau sain enei nē idi to sa kel mog, enī ganan wowā youf. <sup>35</sup> Saa teneub ado sa kalauf, anī ere, neu od to bagai sa kalauf.

#### Naa Sain Ado Takam To Keleī

(Mak 13:32-37; Luk 17:26-30, 34-36)

<sup>36</sup> “Taka nem, anī nē naa sain ado to keleī, saa ilun engel idig sā, Naal īg sā, Dei yogo dogol keleī. <sup>37</sup> Noa nē sain bun age fen age fiya bagai, Tamo Naal isiyouf bun age fouf. <sup>38</sup> Kuwei odug nē naa fau mog, tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen. <sup>39</sup> Idi ereb wō youf anī to keleī mog, kuwei isi, adok kuweir dilelen. Age fiya bagai, Tamo Naal ī isiyouf bun age fouf. <sup>40</sup> Tamo uru idi kabier kabī dalef difarauf, tekelei yalouf, taka itornēf. <sup>41</sup> Kayau uru idi falawa falei dife mog, tekelei yalouf, taka itornēf.

<sup>42</sup> “Age fiya nigin, meleī unog fen, log, ere nigin, ā keleī sā, naa nanī be bun āgenei Odug isiyouf. <sup>43</sup> Ā keleī youf: Fō marau, bō ereb sain, bē tamo isiyouf keleī youf are, ī mata ibod ken, bē tamo in fō to narī foug nigin ololo foug. <sup>44</sup> Age fiya nigin, āg saika gouf, ere nigin, Tamo Naal ī fau sain to isiyouf gouf bun isiyouf.

#### Ferfer Biya Ado Ferfer Sane

(Luk 12:42-46)

<sup>45</sup> “Ferfer taka aim anī dō fiya kisi biya ado de? Ī yogon odugem, ī yogon odug nē fō bun anidi neid saaf, dogo neid sain kilei dōf ifenēdiyof nigin ima bun inon anī. <sup>46</sup> Sain tamo odug kelouf bun, ferfer biya bagai age fe di, ilouf, tamo odug ī nigin biya fiyēf. <sup>47</sup> Aya ā momoi arokeneik, tamo odug ī, yogon safina ganan ferfer anī ima bun inouf. <sup>48</sup> Anī ere, ferfer taka sane ī wau bun irōf, ‘Neu tamo odug ilen, sain meluk biya gerō ibodok, ī kukula to isiyouf.’ <sup>49</sup> Age ye fen, ī, in kabī tura tar idenēdiya gariya ino fen, gama ī yogo, saaf biya naan biya, aai sē fiya tamo geid dōdig. <sup>50</sup> Ferfer anī nē tamo odug, in isiya nē naa, ferfer to isiyouf ye fen, kisif mog, in isiya sain, ī keleī sā mog, isiyouf. <sup>51</sup> Tamo odug, ferfer anī gudūf fisik fe fen, mala yaleya ta-

mo geid nedi modoū bun inenēf, an are wifirig ye fen, gobora kikokō yediyouf.”

#### Kayau Taulei Ten Idi Bun Yaab Od

<sup>25</sup> Jesus tobol fe iron, “Sain anī bun, saa tano ī, kayau taulei ten, idi neid lam gei de diyok dilen, tamo mois tarabā difiyēf age fiya gen. <sup>2</sup> Faif idi kisi neneya ado di, faif idi kisi biya ado. <sup>3</sup> Kisi neneya ado, idi neid lam gei difen, anī ere, keresin to dalen. <sup>4</sup> Anī ere, kisi biya ado, keresin kulumā ado lam dalen. <sup>5</sup> Tamo mois kaisā to isin, idi adok mulā fedī di, denenan.

<sup>6</sup> “Bō atun ait taka iweig iron, ‘Ulegēf, tamo mois mogo yeir, ulolō wesig fen, fotou wiyēg!’

<sup>7</sup> “Kayau taulei ganan fafā de fen, lam wik koriri difeselen. <sup>8</sup> Kisi neneyam, kisi biya ado dirokenēdin, ‘Āgenei keresin tunī wanamāg, amā nemā lam gare felediyou fenē.’

<sup>9</sup> “Kisi biya adodom, kisi neneya dirokenēdin, ‘Eo, keresin eī, ā ado amā ado to kisi falauf. Amam ifeneīya ban, uleg, oun keresin na nē dinodig bun, aug nigin na waleg.’

<sup>10</sup> “Kisi neneya idi, keresin na nigin dile mog, tamo mois mogo isin. Kayau taulei idi ololo difiyen, weim bagu fiya nē tar bun, aaben dilelen. Age dife di, sukar kotū felen.

<sup>11</sup> “Dum, kisi neneya idig disin, idi diron, ‘Tamo odug, tamo odug, amā nigin sukar kā wo!’

<sup>12</sup> “Anī ere, tamo mois aitedin yalen, ‘Aya ā momoi arokeneik, aya ā keleī sā.’

<sup>13</sup> “Age fiya nigin, ā lo weleg, ere nigin, naa kilok ado ā keleī sā.

#### Kabī Tamo Moni Gadō Fedin Nē Yaab Od

(Luk 19:11-27)

<sup>14</sup> “Takag, saa tano ī, tamo taka ī, uyu takā gerō naab ilau fenē nigin, ī yogon ferfer iweignēid fen, yogon safina kulatun de kenēf nigin, imeid bun inon age fiya gen. <sup>15</sup> Taka ī faif tausen kina ifenen, taka tu tausen kina ifenen, taka wan tausen kina ifenen, idi dogo mugu mugu neid safina kulatun fiya nē keleī kilei kilei ifeneīd fen, ī uyu takā gerō naab ilen. <sup>16</sup> Tamo faif tausen kina yalen, kaisā bagai ilen, moni kabī bun ino fen, baban faif tausen kina yalen. <sup>17</sup> Tamo tu tausen kina yalen, īg agef fen, baban tu tausen kina yalen. <sup>18</sup> Tamo wan tausen kina yalen, anī ere, ī ile, meku yale fen, tamo odug nē moni teneub kur inokelen.

<sup>19</sup> “Sain meluk bure fele di, ferfer neid odug kel isi fen, moni ferfer mugu mugu ifenēdin anī, idi naig dife kabī difenen anī, faded de dirokenēf nigin ferfer ganan iweig laisin. <sup>20</sup> Tamo faif tausen kina yalen, ī baban faif tausen kina taka ado irou isi fen, ī iron, ‘Tamo odug, ō aya faif tausen kina wanan, ulef, aya baban faif tausen kina taka ado.’

<sup>21</sup> “In tamo odug ī irokenen, ‘Ō de agon, ō ferfer biya dō fiya biya bagai! Ō safina naal bun kulatun biya ubodon nigin, aya ō imā bun safina musei anouf. Usi fen, ogon tamo odug nē kulīya namen ubod!’

<sup>22</sup> "Tamo tu tausen kina yalen, ïg isi fen, ï iron, 'Tamo odug, ò aya tu tausen kina wanan, ulef, aya baban tu tausen kina taka ado.'

<sup>23</sup> "In tamo odug ï irokenen, 'Ò de agon, ò ferfer biya dõ fiya biya bagai! Ò safina naal bun kulatun biya ubodon nigin, aya ò imã bun safina musei anouf. Usi fen, ogon tamo odug nẽ kulïya namen ubod!'

<sup>24</sup> "Age fe di, tamo wan tausen kina yalen, ï isi fen, iron, 'Tamo odug, aya kelein, ò tamo totol ado, onom to utenen anï kusu wodig, onom faat to uraran anï fito wodig. <sup>25</sup> Anï nigin, aya ò nigin kumï au fen, ele, ogon moni teneub kur anokelen. Ulef, ogon safina yeir.'

<sup>26</sup> "In tamo odug ï irokenen, 'Ò, ferfer sane fõ tamal! Ò kelein, ayam to atenen anï kusu afedig, ayam faat to araran anï fito afedig de? <sup>27</sup> Ò kisi agom, neu moni benk bun uno di, benk im kabï yalekanam, ago wom, sain aya kelauf bun, moni kabï yalen anï nẽ mala ado, moni ò benk wenen anï bagu fiya kel isin ado alem. Anï ò to agon.'

<sup>28</sup> "Age ye fen, ï ari fedin, 'Wan tausen kina ï bun son ge fen, tamo ten tausen kina ado anï wenëg. <sup>29</sup> Taka ï ereb ado, aya toru afouf, age fe di, ï musei adouf. Taka ï sã bagai, ereb taka ï adog, ï bun tamal son fouf.

<sup>30</sup> Ferfer sane anï mayarë gugum namen urãg, an are wifirig ye fen, gobora kikokõ yediyouf.'

### Sipsip Meme Ado

<sup>31</sup> "Sain Tamo Naal, yogon fula fiya medeïya ado engel ganan geid disiyouf, ï in ibodõya modoũ fula fiya medeïya bun ibodõf. <sup>32</sup> Teneub ganan bun, tamo kayau ï wagen kuru difediyouf, age dife di, ï tamo kayau foi fediyouf, sipsip lo fiya tamo, sipsip meme ado foi fedig gen age fouf. <sup>33</sup> Ì sipsip ima biyalë inoid fen, meme ima kilë inodiyouf.

<sup>34</sup> "Agef fen, King ï, idi ima biyalë anidi irokenëdiyouf, 'Neu Deim el yeik ã, usig, ãgenei akoreï waleg, gariya bun teneub inon bunem isi gama, tano ãgenei nigin saika fen anï. <sup>35</sup> Ere nigin, aya naũ fiya mog, ã yõya nẽ safina wanagen, aya naan ail fiya mog, ã naan yõya nigin wanagen, aya yaũ tamo abod mog, ã aabë urou uleyagen. <sup>36</sup> Aya gemũ abod mog, ã gabar ufilainagen, aya dagi abod mog, ã kulatun wiyagen, aya kalabus bun abod mog, ã usig ki wiyagen.'

<sup>37</sup> "Age ye di, madur tamo kayau aiten dalen, 'Odug, ere sain ò naũ ubod mog, amã saaf mafonon, ò naan ail yõ mog, naan mafonon? <sup>38</sup> Ere sain ò yaũ tamo mailiyo ken, amã nemã fõ bun maleyon, ò gemũ ubod mog, gabar mafilaïnon? <sup>39</sup> Ere sain ò dagi ubod mog, amã ò mailiyon, ò kalabus bun ubod mog, amã ki mayon?'

<sup>40</sup> "King aitedin yale irõf, 'Aya ã momoi arokeneik, ã neu turau tar yeneid sã enidi taka el wiyëgen, are aya el wiyagen.'

<sup>41</sup> "Age ye fen, ï ima kilë anidig irokenëdiyouf, 'Gelu yein ã, wageun uyag uleg, yã mala fitotoleya faimud, Satan in engel geid idi nigin dodok fen anï, an uleg.

<sup>42</sup> Ere nigin, aya naũ abod mog, ã ereb taka to wanagen, aya naan ail fiya mog, ã naan to wanagen. <sup>43</sup> Aya

yaũ tamo abod mog, ã aabë to urou uleyagen, aya gemũ abod mog, ã gabar to ufilainagen, aya dagi abodon, kalabus bun abod mog, ã to kulatun wiyagen.'

<sup>44</sup> "Idig aiten dale dirõf, 'Odug, ere sain ò naũ ubodon, naan sã ubodon, yaũ tamo ubodon, gabar sã ubodon, dagi ubodon, kalabus bun ubodon, amã ò to masennon?'

<sup>45</sup> "King aitedin yale irõf, 'Aya ã momoi arokeneik, ã neu idi yeneid sã enidi taka to el wiyëgen, are aya to el wiyagen.'

<sup>46</sup> "Age ye di, idi darau faimud ibodkeleya nẽ bun dilauf, madur tamo kayau idi mata faimud ibodkeleya nẽ bun dilauf."

### Jesus Yukesiya Nigin Naab Dimiren

(Mak 14:1, 2; Luk 22:1, 2; Jon 11:45-53)

**26** Jesus od enï ganan wogõ ye bure fel fen, ï in dõ fiya tar irokenëdin, <sup>2</sup> "Å kelei, naa uru bure fele di, Pasa naa isiyouf, age fe di, Tamo Naal idi imeid bun dino di, aa tetek bun dukesiyouf."

<sup>3</sup> Dum pris odudug, tamo kayau neid mudur adodo, pris mudur ado in yana Kaiafas in fõ bun guru difen.

<sup>4</sup> An idi Jesus idegëya naab bun dale fen, dukesiyouf nigin katõ difen. <sup>5</sup> Idi diron, "Sifa inoya bun to age tafouf, age tafouf, tamo kayau idi seye de fen, kusï dalesauf."

### Betani An Kayau Taka Jesus Mudur Bun Moul Fi Felen

(Mak 14:3-9; Jon 12:1-8)

<sup>6</sup> Jesus, Betani fonõ an, Simon lepra dagi kulu adon in fõ bun ibod mog, <sup>7</sup> kayau taka, Jesus wagen moul sumeï biya bagai moni odug nem anï, moul ifeya nẽ gulub † ado irou isin anï, Jesus tebol bun saaf yoko ibod mog, ï mudur bun moul fi felen.

<sup>8</sup> Anï in dõ fiya tar dile mã, idi nameid sane fen, diron, "Ere nigin enï sekil fef? <sup>9</sup> Moul enei na odug nem sur fiyam are, moni anï yale maleg tamo ifenëdiyam."

<sup>10</sup> Anï Jesus kelei ken, idi irokenëdin, "Å, ere nigin kayau enï wau morõ wenëgef? Kayau enï aya bun biya bagai age fel. <sup>11</sup> Maleg idi ã geid faimud ubodõgouf, anï ere, aya ã geid faimud to tabodõf. <sup>12</sup> Sain kayau moul enï, neu bouwau bun fi felel are, mekur ainëf nigin dok fiyal. <sup>13</sup> Aya ã momoi arokeneik, tenebur ein nain be biya od enï wogõ douf, ereb kayau anï age fen anïg wogõ douf. Age dife di, idi ï nigin dum dum wogõ de fen, karï dalauf."

### Judas Jesus Kiwai Tamo Imeid Bun Inoya Nigin Yo Yen

(Mak 14:10, 11; Luk 22:3-6)

<sup>14</sup> Agef fen, dõ fiya tar tuwelf idi atun taka, yana Judas Iskariot tamal, pris odudug wagedin ile fen, <sup>15</sup> to fedin, "Sain aya ï imeï bun ano di, ere anï ã aya wana-gauf nigin kisi gef?" Age ye di, idi teti silwa koin moni anï diweskene ken, difenen. <sup>16</sup> De anenem, Judas ï Jesus kiwai tamo imeid bun inoya nigin naab imirek ilen.

† Meein alabasta nem dinon.

**Oduġ Nĕ Bŕ Saaf**

(Mak 14:12-26; Luk 22:7-23; Jon 13:21-30; 1 Korin 11:23-25)

<sup>17</sup> Bret yis sã sifa inoya naa matu anĭ bun, in dŕ fiya tar Jesus wagen disi to difiyen, "Ō amã nain anĭ Pasa saaf wãf nigin, amã dodok mafe konŕf anĭ oroyok?"

<sup>18</sup> Jesus iron, "Taun uleg, tamo taka wagen wŕg fen, urokenĕġ, 'Tise irok: Aya neu naa mogo melsã. Aya, neu dŕ fiya tar geid, ogon fŕ bun Pasa saaf male fen, sigigi mafouf.'" <sup>19</sup> Anĭ nigin, in dŕ fiya tar, Jesus iron anĭ dŕ de fen, Pasa saaf nigin dodok difen.

<sup>20</sup> Aragau di, Jesus, in tuwelf geid, tebol bun saaf doko dibodon. <sup>21</sup> Idi saaf dokon, Jesus iron, "Aya ã momoi arokeneik, ã atun takam, aya kiwai tamo imeid bun ineyauf."

<sup>22</sup> Idi waud gudŭf fen, mugu mugu wogŕ fiyĕya nigin gariya dinon, "Oduġ, momoi bagai, aya sã?"

<sup>23</sup> Jesus aitedin yale iron, "Taka ĩ, amã uruwom imamã takai beĭ bun nu mafesil, im aya kiwai tamo imeid bun ineyauf. <sup>24</sup> Tamo Naal, ĩ nigin Negur nĕ Ito-toya irok kilei, agef bagai ilauf. Anĭ ere, tamo ĩ Tamo Naal kiwai tamo imeid bun inof, ĩ malalon ado! ĩ sina to gŕ fem, are dem."

<sup>25</sup> Age ye di, Judas, tamo ĩ Jesus kiwai tamo imeid bun inouf, iron, "Momoi bagai, aya sã, Rabi ĩ?"

Jesus aiten yale iron, "Are ŕ ogo urok."

<sup>26</sup> Idi saaf dokon, Jesus bret yale, Negur de fiye ken, bret anĭ mumãf, in dŕ fiya tar ifeneĭd fen, iron, "Bret enei waleg fen, wŕg, eĭ neu bouwau."

<sup>27</sup> Agef fen, ĩ kap yale, Negur de fiye ken, kap anĭ ifeneĭd fen, iron, "ã ganan, enĭ bun wŕg. <sup>28</sup> Eĭ neu naudou bar itenĕya nigin, are tamo kayau musei mosor yalel kenĕdiyof nigin fi felef. <sup>29</sup> Aya ã arokeneik, aya baban wain enĭ to ãf, gaman ile, aya ã geid, neu Dei nĕ tano bun, wain mata tãf anĭ bun."

<sup>30</sup> Anĭ bure fele di, idi seg taka dalel fen, idi Moul Arei bun diselen.

**Pitam Jesus Wa Fiyĕf Nigin Jesus Iron**

(Mak 14:27-31; Luk 22:31-34; Jon 13:36-38)

<sup>31</sup> Jesus idi irokenĕdin, "Bŕ enĭ bun, ã ganan aya utornagauf, ere nigin, are Negur nĕ Itotoya irok kilei:

"Aya sipsip marau aukesi di, sipsip ganan firagagaŭ difouf." ††

<sup>32</sup> Anĭ ere, aya, laa bun tamal kel fã au fen, aya ket Gali-li uyu alauf."

<sup>33</sup> Pita, Jesus aiten yale iron, "Idi ganan ŕ ditornŕfeg, aya are to bagai atornŕf."

<sup>34</sup> Jesus Pita irokenen, "Aya ŕ momoi arokonok, bŕ enĭ bun tataro kokorok yeya sã mog, ŕ aya nigin wa towo wouf."

<sup>35</sup> Anĭ ere, Pita Jesus irokenen, "Momoi ada uruwom gare tau mogoufeg, aya ŕ nigin to bagai wa afouf." Age ye di, dŕ fiya tar ganan, od tekelei anĭ diron.

**Getsemane Oun**

(Mak 14:32-42; Luk 22:39-46)

<sup>36</sup> Age de fen, Jesus in dŕ fiya tar geid, modoŭ taka yana Getsemane dilen. An, ĩ idi irokenĕdin, "Aya oun ele, kosĕ au mog, ein ubodŕgouf." <sup>37</sup> Jesus, Pita Sebedi gere tar uru gei feid fen, dile mã, ĩ wau gudŭf fen, moro kalaisin. <sup>38</sup> Age fe di, ĩ idi irokenĕdin, "Neu ma-laukanon tobega le fen, wau morŕ gudŭ falaisi, laa nĕ daŭ bun ifaref. Ein ufareg fen, ã aya geid lo tafalauf."

<sup>39</sup> Naal godof iroule fen, kubŭ ye, nawa tenebur kumokur fe fen, kosĕ yen, "Neu Dei, kisi falauf are, darau nĕ kap enĭ walel kanauf. Anĭ ere, neu oroya to dŕ wouf, on oroya anĭ dogol dŕ wo."

<sup>40</sup> Age fel fen, Jesus in dŕ fiya tar gedin kel isin, mulã den mog, ileidin, ĩ Pita to fiyen, "Tamo ã, aya geid aua tekelei lo fiya nigin to kisi feleya de? <sup>41</sup> ã, lo weleg fen, kosĕ gouf, are ã kisi yeĭya bun to kubŭ gouf nigin. Uur are orof, anĭ ere, bouwa anĭ malegef."

<sup>42</sup> ĩ, anĭ dŕ fiya, baban kel ile, kosĕ yen, "Neu Dei, kap enĭ bun aya to ãf are, ŕ kap enĭ yaleleya nigin kisi feleya sã, age fouf, ŕ ogon oroya dŕ wouf."

<sup>43</sup> ĩ kel isin, baban denena mog ileidin, ere nigin, idi meleid morŕ gudŭ fesin. <sup>44</sup> Agef fen, ĩ idi itorneĭd fen, baban kel ilen, kosĕ yen anim towo, od tekelei iron anĭ baban kosĕ yen.

<sup>45</sup> Agef fen, ĩ in dŕ fiya tar gedin kel ile, idi irokenĕdin, "ã fau si unog fen, yenĕyai gef? Ulegef, sain mog melsã, Tamo Naal mogo mosor tamo imeid bun ilef. <sup>46</sup> Fafãg fen, teleg! Kiwai imeid bun inoya tamo yeir isif!"

**Jesus Dirounen**

(Mak 14:43-50; Luk 22:47-53; Jon 18:3-12)

<sup>47</sup> Jesus fau wogŕ ye mog, in dŕ fiya tar tuwelf idi anĭ atun taka, Judas isin. Tamo musei dimig adodo seburer adodo ĩ geid disin. Pris odudug, tamo kayau neid mudur adodo idim sur difedi di, disin. <sup>48</sup> Gama Judas, Jesus kiwai tamon inoya tamo ĩ, Jesus yaor fiyĕf nigin idi uris ifenĕdin: "Tamo aya umã fiya bunem aan afiyĕf anĭ, ĩ waleg." <sup>49</sup> Judas, kaisã bagai, Jesus wagen ile iron, "O Rabi, fel!" Age ye fen, ĩ umã fiyen.

<sup>50</sup> Jesus ĩ irokenen, "Mou, erab wofon usif, are ago."

Age ye mog, tamo Jesus wagen dile dirounen. <sup>51</sup> Age dife di, tamo Jesus weim difaren anidi takam, ima iran, dimig ul feis yalen, pris mudur ado nĕ ferfer weder salŕf iran.

<sup>52</sup> Jesus ĩ irokenen, "Ogon dimig in modoŭ bun uno, ere nigin, idi ganan dimig ul difeis dalef, dimig bun gare douf. <sup>53</sup> ã kisi gef are, aya, neu Dei isennauf nigin aweignĕ di, ĩ kaisã bagai, engel musei biya, sewenti-tu tausen wal fiya imau bun inoya kisi feleya sã de? <sup>54</sup> Age afouf are, Negur nĕ Itotoya anĭ nigin iron enĭ ganan, naig fe kisi fel, agef wŕ youf?"

<sup>55</sup> Sain anĭ bun, Jesus tamo musei irokenĕdin, "ã bĕ tamo walegedig gen, aya ã dimig adodo seburer adodo waleyagau fenĕ usigef de? Naa ganan, aya tempel fofomala bun abod ken, od afelnĕdidig, anĭ ere, ã aya

† Rabi, anĭ nĕ gariya, Juda neid tise. †† Sekaraia 13:7

to urouyagen. <sup>56</sup> Anī ere, profet neid itotoya kisi falauf nigin, enī ganan wō yen." Age ye di, in dō fiya tar gan nan ditornē diyalelen.

**Jesus Juda Kaunsel Neid Kot Mala Bun Ifaren**  
(Mak 14:53-65; Luk 22:54, 55, 63-71; Jon 18:13, 14, 19-24)

<sup>57</sup> Idi Jesus dalen, pris mudur ado Kaiafas garan dirou dilen, an lo ifelnēdiya tamo, tamo kayau neid mudur adodo geid guru difen. <sup>58</sup> Anī ere, Pita, Jesus dume naal soso fiye ken, dōf tokō fel ile, pris mudur ado nē fofomalan wō yen. Ī namen ile fen, kabī tamo geid dibod ken, naig be difiyēf nigin lo fen.

<sup>59</sup> Pris odudug, Juda neid kaunsel ganan geid, Jesus laa bun dinenēf nigin, bou bun idegēya od dinou fenē dimiren. <sup>60</sup> Musei wagen disi fen, disennēd fen, idegēya od diraran, anī ere, Jesus laa bun dinenēf nigin od gariya taka to dilen.

Dum tamo uru wō den, <sup>61</sup> anidim diron, "Tamo enim iron, 'Aya Negur nē tempel narī afel fen, naa towo bun baban anouf, are kisi feleya."

<sup>62</sup> Age de di, pris mudur ado fā ye, ifar fen, Jesus irokenen, "Ō to solo urōf de? Eī ere od anī, tamo enidi ō nigin dirousif?" <sup>63</sup> Anī ere, Jesus mutū ifaren.

Pris mudur ado Jesus irokenen, "Ō mata ibodōya Negur mala bun urōf nigin, od arokonok. Ō momoi Kristus, Negur Naal be anī, amā urokanamāf."

<sup>64</sup> Jesus aiten yalen, "Ao, ō ogo yer urok. Anī ere, aya ā ganan arokeneik: Dum bun, Tamo Naal Negur megeir ado ima biyalem ibod ken, saa lalo bun isi mog, ā ulogouf."

<sup>65</sup> Jesus age ye di, pris mudur ado karī ye fen, in kolos serek fe fen, iron, "Ī Negur kono fel! Ere nigin ada od megeir fiya nigin tamo baban tamirēf? Ulegef, ā gama Negur kono fel anī karī gel. <sup>66</sup> Anī ā ere kisi gef?"

Idi aiten dalen, "Ī laa bun ilauf."

<sup>67</sup> Age de fen, idi, Jesus nawa bun disisne ken, ime-dim dun. Tanim wala fā de fen, <sup>68</sup> diron, "Kristus, kurō weis urokanamā, aim ō inok?"

**Pita Jesus Nigin Wa Fen**

(Mak 14:66-72; Luk 22:56-62; Jon 18:15-18, 25-27)

<sup>69</sup> Pita, pris mudur ado nē fō fofomalan ibod mog, kabī kayau momoul taka wagen isi iron, "Ōg Jesus Galili tamal weim uyōgen."

<sup>70</sup> Anī ere, ganan meleid bun ĩ waf fen, iron, "Ō od urok enī, aya keleī sā."

<sup>71</sup> Age ye fen, ĩ iyok ilen, bobog bun, an kayau momoul takam ile fen, tamo kayau an difaren idi irokenēdin, "Tamo enī, Jesus Nasaret tamal ĩ geiden."

<sup>72</sup> Ī baban waf fen, total od iron, "Tamo are aya keleī sā!"

<sup>73</sup> Sain naal ile di, idi an difaren Pita garan dile fen, diron, "Momoi bagai, ō idi neid taka, on od wogōya bun ogo yaor yok."

<sup>74</sup> Age de di, ĩ mogo yogo bouwa geluf fen, total od irokenēdin, "Tamo are aya keleī sā!"

Age ye mog, kaisā bagai tataro kokorok yen. <sup>75</sup> Age fe di, Pita Jesus wogō yen anī nigin weder fokō yen,

"Sain tataro kokorok yeya sā mog, ō aya nigin wa wo towo wouf." Anī nigin, ĩ weder fokō ye di, ĩ mayarē ile fen, inā odug yalen.

**Judas Ī Yogo Kosim Bun Ula Iseginen**  
(Mak 15:1; Luk 23:1, 2; Jon 18:28-32; Aposel 1:18, 19)

**27** Bonime bagai, pris odudug, tamo kayau neid mudur adodo geid, Jesus yukesiya nigin od difon. <sup>2</sup> Idi ĩ difō dale diroule, gawaman nē mudur Pailat ima bun dinon.

<sup>3</sup> Anī Judas, Jesus kiwai ifenen, ĩ lof mog, Jesus dukesiyouf nigin ĩ bou bun od dun anī ile fen, ĩ kisif wau yu ken, teti silwa koin moni kel iroule, pris odudug, tamo kayau neid mudur adodo geid ifenēdin. <sup>4</sup> Judas iron, "Aya mosor anon, ere nigin, ĩ mosor sā mog, ayam kiwai anon."

Age ye di, idi aiten dalen, "Amā ere mayōf? Are ogon sakir."

<sup>5</sup> Judas moni irou ile, tempel namen irara ken, ilen. Anī ĩ iya ile, yogo kosim bun ula iseginen.

<sup>6</sup> Pris odudug moni gei de fen, diron, "Lo to wal tafouf nigin, moni enī tempel nē kolekta bokis bun to ufeg, ere nigin, moni enī naud mala." <sup>7</sup> Katō fiya bure difel fen, moni anim, mis inoya tamo nē teneub anī na dale fen, yaū tamo mumā difediyouf nigin, idi kisi difon. <sup>8</sup> Anī bunem, gamag teneub anī yana, Naud nē Mayā dedig. <sup>9</sup> Are profet Jeremaia nē od, eig ye wogō yen anī kisi felen: "Idi teti silwa koin moni dalen, moni anī Israel tamo kayau ĩ nigin digiren. <sup>10</sup> Idi moni anim, mis inoya tamo nē teneub na dalen, Odug aya agef irokanan kilei." †

**Jesus Pailat Mala Bun Ifaren**

(Mak 15:2-15; Luk 23:3-5, 13-25; Jon 18:33-19:16)

<sup>11</sup> Jesus, Rom gawaman nē mudur Pailat, mala bun ifare di, gawaman nē mudur Pailat ĩ to fiyen, "Ō Juda neid king de?"

Jesus iron, "Are de yer, ō urok anī."

<sup>12</sup> Sain pris odudug, tamo kayau neid mudur adodo geid, Jesus bou bun od dun, ĩ aitedin to yalen. <sup>13</sup> Pailat Jesus to fiyen, "Ō boū bun od dirarak to karī wof de?"

<sup>14</sup> Anī ere, Jesus aiten to yalen, ĩ bou yūya od tekelei bagai nigin taka to solof iron. Age fe di, gawaman nē mudur, odug biya terē yen.

<sup>15</sup> Gama gawaman mudur nē tobonunā, Pasa sifa naa bun, tamo kayau, tamo taka kalabus bun digirī di, yalisenēdig. <sup>16</sup> Sain anī bun, idi kalabus tamo taka, yana sane bagai adon, ĩ yana Barabas. <sup>17</sup> Bonime, tamo kayau, Pailat nē fō bun guru difesi di, Pailat to fedin, "Nanī ā aliskeneif anī oroyeik, Barabas de oo Jesus ĩ Kristus dedig anī?" <sup>18</sup> Ere nigin, ĩ yogo kelein, tamo kayau neid mudur adodo idi, kiyēf bunem, Jesus ĩ ima bun dinon.

<sup>19</sup> Pailat od es fiya modoū bun ibod mog, in aiwa od sur fen, "Tamo anī ĩ mosor sā, ĩ nigin ereb taka to ago wouf, ere nigin, aya, nor bō, ĩ nigin ami ken, morō odug ĩ nigin ailel."

† Sekaraia 11:12, 13; Jeremaia 19:1-13; 32:6-9

<sup>20</sup> Anī ere, pris odudug, mudur adodo geid, tamo kayau od irōya nigin wedereid diroun, are idi Barabas yalisnēya nigin ado, Jesus dukesiyouf nigin nonī douf nigin age difen.

<sup>21</sup> Gawaman nē mudurem to fedin, “Aya ā aliskeneif nigin, uru enidi ā nanī oroyeik?”

Idi aiten dalen, “Barabas anī.”

<sup>22</sup> Pailat to fedin, “Age fiyauf are, aya, Jesus, Kristus dedig nigin, ere naig afouf?”

Idi ganan diron, “Aa tetek bun ūf!”

<sup>23</sup> Pailat to fedin, “Ere nigin? Ere mosor ī age fen?”

Anī ere, idi total bagai diweig diron, “Aa tetek bun ūf!”

<sup>24</sup> Pailat ī anī ile fen, ī od irōya nigin naab taka sā, anī tamo kayau idi total bagai dino fen, kusī dou fenē age dife di, ī naan yale fen, tamo kayau meleid bun ima kulof fen, ī iron, “Tamo enī naud aya bun sā, are āge-nei sakir!”

<sup>25</sup> Tamo kayau ganan aiten dale diron, “Yogon naud utorn len, amā bun ado nemā kesu tar bun yenēf!”

<sup>26</sup> Age de di, ī Barabas yalis ifenēdin. Agef fen, ī irō di, Jesus wagī de fen, ī aa tetek bun dūf nigin, kusī tamo imeid bun inon.

#### Kusī Tamo Jesus Diselinen

(Mak 15:16-20; Jon 19:2, 3)

<sup>27</sup> Gawaman mudur nē kusī tamo, Jesus dale gawaman mudur nē fō namen dile fen, an mayā taka, kusī tamo ganan gou difalaisi salili difiyen. <sup>28</sup> Idi Jesus nē kolos dinukeis fen, kolos meluk giriya anī difounnen. <sup>29</sup> Age dife fen, idi malū duri ado dale, teter tanak kori de fen, ī mudur bun kurū difen. Idi werī tibog dale, ima biyalē dino fen, wagen bobou de fen, diselinen. Idi diron, “O Juda neid king gai gai ibodōf!” <sup>30</sup> Idi ī disisne ken, idi baban werī tibog ima bun tamal dale, mudur bun baba baban dun. <sup>31</sup> Idi diseline kel fen, kolos meluk giriya anī dinukeis, yogon kolos bagai anī baban difounnen. Age de fen, kusī tamom idi, ī aa tetek bun dūf nigin dirou diselen.

#### Jesus Aa Tetek Bun Dun

(Mak 15:21-32; Luk 23:26-43; Jon 19:17-27)

<sup>32</sup> Sain idi mayā anī ditor diyok dile fen, idi Sairini tamal tamo taka fotou difen, yana Simon. Idi ī, Jesus nē aa tetek faali foug nigin nugo difiyen. <sup>33</sup> Idi disel, modoū yana Golgota (anī nē gariya, Mudur Tuwa nē Modoū) wō den. <sup>34</sup> Kusī tamo idi, an wain makik ado falei difen anī, Jesus yāf nigin difenen. Anī ere, ī yō ile fen, yōya nigin itoron. <sup>35</sup> Sain idi ī aa tetek bun du kel fen, idi aisaī dira kodē de fen, yogon kolos morou morou gadō difen. <sup>36</sup> Age de fen, idi an dibod ken, lo difiye kelen. <sup>37</sup> ī bou bun od dinon anī, idi yogon mudur ilun ditoton: EĪ JESUS, JUDA NEID KING. <sup>38</sup> Age de fen, kusī tamo idi, bē tamo urug, ī geid aa tetek bun didenen, taka yogon ima biyalē, taka yogon ima kilē. <sup>39</sup> Tamo

† Itotoya tunī dum ditoton: gadō difen, are od profet wogō yen anī kisi falauf nigin: “Idi neu gabar idi atun gadō de fen, neu kolos nigin aisaī dira ken, kodē den.” (Sam 22:18)

kayau dile disi dife, Jesus kono difiye ken, kasā difiyē, mudureid dira ken, <sup>40</sup> idi diron, “Ō onom tempel narī wol fen, baban naa towo bun anouf won, ō ogo nigin usennēf! Ō Negur Naal wouf are, aa tetek bun tamal kutū weis!”

<sup>41</sup> Age difiyen gen, pris odudug, lo ifelnēdiya tamo, tamo kayau neid mudur adodo, idi Jesus diselinen.

<sup>42</sup> Idi diron, “Tunī anī isennēdin, anī ere, ī yogo nigin isennēya kisi feleya sā! Ī Israel nē king! Utornēg len, gama aa tetek bun tamal kutū yesiyouf. Age fe di, ada ī nigin momoi tauf. <sup>43</sup> Ī Negur nigin momoi yedig. Ī irō-dig, ‘Aya Negur Naal,’ anī nigin, Negur ī nigin orouf are, utornēg len, gama Negurem ī isennēf.” <sup>44</sup> Age difiyen gen, bē tamo Jesus geid, aa tetek bun didenen idig, ī nigin kono fiya od in bou bun diran.

#### Jesus Laa Fen

(Mak 15:33-41; Luk 23:44-49; Jon 19:28-30)

<sup>45</sup> Tuwelf kilok gaa ado nē ile, tri kilok aragaun, gugum isin, teneub ganan kerub fen. <sup>46</sup> Tri kilok age fiya mog, Jesus wade bagai iweig iron, “Eloi, Eloi, lama sabaktani?” –anī nē gariya, “Neu Negur, neu Negur, ere nigin ō aya utornal?” ††

<sup>47</sup> Tunī an difaren, anī karī de fen, diron, “Ī Eliya iweigne.”

<sup>48</sup> Kaisā bagai, idi atun takam gudu re ile, spons † ya-len, wain kai ado bun nu feis fen, tibog bun ino fen, Jesus yāf nigin ifenen. <sup>49</sup> Tunī ganan diron, “Gama utornēg, Eliya isi isennē mog, tailauf.”

<sup>50</sup> Jesus baban ait odug nem iweig di, in uur ul fe yale di, laa fen.

<sup>51</sup> Sain anī bun, gabar meluk odug tempel namen modoū fateul bun ibodon anī, serek fe uru fen, ilunem irousil teneburen. Teneub yoūf fen, meein fara fedin. <sup>52</sup> Matmat bobog kā fedī di, tamo kayau fateul musei gare den idi, baban mata fafā den. <sup>53</sup> Idi matmat bunem fafā den anidi, Jesus kel fā ye di, Jerusalem fateul taun dile fen, tamo kayau musei meleid bun wowā den.

<sup>54</sup> Kusī tamo tunī, idi neid orowa geid, Jesus tari difiyen, teneub yoū fe di, ereb ereb ganan wowā ye di, dile fen, fatuk bagai terē de fen, diron, “Momoi bagai, ī Negur Naal!”

<sup>55</sup> Kayau musei an difaren, idi so del fen, lo difen. Idi Galili anenem Jesus aruna yaleya nigin dō difen anidi.

<sup>56</sup> Idi atun Maria Magdala tamal, Maria Jems Joses ado neid sineid, taka Sebedi gere tar neid sineid.

#### Jesus Mū Difen

(Mak 15:42-47; Luk 23:50-56; Jon 19:38-42)

<sup>57</sup> Aragau mog, safina ado tamo, Arimatea tamal, yana Josef isin, ī Jesus nē dō fiya tar anī nē taka. <sup>58</sup> Ī Pailat wagen ile, Jesus nē bouwa buru nigin to fiyē di, Pailat yo ye fen, Jesus nē bouwa buru ī ifenēya nigin, kusī tamo irokenēdin. <sup>59</sup> Josef bouwa buru yale gabar lalau amuyē sā anim sile fen. <sup>60</sup> Agef fen, ī yogon matmat

†† Sam 22:1 † Maaīwō tamal safina taka, ku nanaal musei ado naan dū fedig.

mata sa bun ku yalen ani bun, Jesus nē bouwa buru inenen. Ī meein odug wele fe di, isi, matmat awa ku katī fel fen, ilen. <sup>61</sup> Maria Magdala tamal, Maria taka ado, matmat wagen dibodon.

### Kusī Tamo Matmat Lo Difen

<sup>62</sup> Naa taka, Sabat naa nē dodok fiya naa anī bure fele di, pris odudug, Farisia tamo geid, Pailat wagen dilen. <sup>63</sup> Idi diron, "Tamo Odug, amā karī maulef, idegēya tamo ĩ matan iyo ken, iron, 'Naa towo bure fele di, aya laa bun tamal, baban mata kel fā auf.' <sup>64</sup> Age fiya nigin, õ urõ len, naa towo bun matmat total bagai tari difouf. Age fiya sãf, in dõ fiya tar disi, bouwa buru bē dale mã, tamo kayau didegnēid fen, ĩ laa bun tamal kel fā yel douf. Idegēya dum isiyouf anī gai sane bagai, uruwa nē wal fiyauf."

<sup>65</sup> Pailat iron, "Lo fiya tamo tekelei waleg. Uleg fen, ã, taka nem matmat bun ileya nigin, total bagai katī feleya nigin, ã keleĩ anī kilei bagai, matmat agog total bagai lo gouf." <sup>66</sup> Anī nigin, idi dile, matmat bun meein teten wõ dũ dino fen, lo fiya tamo anī dinenen.

### Jesus Laa Bun Tamal Mata Kel Fā Yen

(Mak 16:1-10; Luk 24:1-12; Jon 20:1-10)

**28** Sabat naa bure fele di, uub nē naa matu bun bonimeĩ mumurei ado, Maria Magdala tamal, Maria taka ado matmat dilou fenē dilen.

<sup>2</sup> Sain anī bun kaisã bagai, mimĩ total ado wõ yen, ere nigin, Odug nē engel saa ilun tamal isin, matmat bun ilen, meein welef yerin ile di, teten ibodon. <sup>3</sup> Agef fen, in lo fiya kolimeĩ filiya gen, in kolos lalau medeĩya saa lalo lalau gen. <sup>4</sup> Matmat lo difen tamo, idi ĩ nigin kumĩ de, tererē de fen, laa tamo gen denenan.

<sup>5</sup> Engel kayau irokenēdin, "To kumĩ wog, ere nigin, aya keleĩ, ã Jesus aa tetek bun dun anī umirnēgef. <sup>6</sup> ĩ ein sã, ĩ iron kilei, mogo laa bun tamal mata kel fā yel. Usig fen, ĩ yenen modoũ uleg. <sup>7</sup> Agog fen, kaisã bagai

uleg, in dõ fiya tar urokenēdig: 'Ī laa bun tamal kel fā ye fen, ĩ ketem Galili ilef. An ã ĩ ulogouf.' Aya mogo ã arokeneim."

<sup>8</sup> Age ye di, kayau idi, kaisã bagai matmat ditor dilen, kumĩ den, anī ere, waud kulĩya ado, Jesus nē dõ fiya tar dirokenēdiyoyou fenē nigin gududu den. <sup>9</sup> Age de mog, Jesus tarabã feid fen, iron, "Fel." Idi ĩ wagen disin, in ye dirou fen, seli dabin. <sup>10</sup> Age dife di, Jesus idi irokenēdin, "Ã, to kumĩ wog, uleg fen, neu turau tar idi, Galili dilauf nigin urokenēdig; idi an aya dileyauf."

### Matmat Lo Fiya Tamo Neid Od

<sup>11</sup> Kayau naab luwe dile mog, matmat lo difen tamo tunĩ, taun namen dile, pris odudug bun, ereb ereb ganan wõ yen anī nigin od dinon. <sup>12</sup> Pris odudug, mudur adodo geid, guru de, kisi katõ de fen, idi kusī tamo moni odug difenēdin. <sup>13</sup> Idi, matmat lo difen tamo dirokenēdin, "Ã urõgouf, 'Jesus nē dõ fiya tar bõ disi fen, mainana kel mog, in bouwa buru bē dalen' gouf. <sup>14</sup> Od enĩ gawaman nē mudur bun ilauf are, amã faded mafiyē di, ã morõ to walogouf." <sup>15</sup> Anī nigin, kusī tamo moni dalen, idi diron kilei age difen. Od enĩ, Juda tamo kayau bun iyokelen, gamag agef yenek.

### Jesus In Dõ Fiya Tar Soosi Kabĩ Odug Ifenēdin

(Mak 16:14-18; Luk 24:36-49; Jon 20:19-23; Aposel 1:6-8)

<sup>16</sup> Age fe di, in dõ fiya tar ilewen Galili dilen, arei Jesus irokenēdin nē an dilen. <sup>17</sup> Sain idi Jesus dilen, idi seli dabinen, anī ere, tunĩ waud urun. <sup>18</sup> Age dife di, Jesus wagedin isin irokenēdin, "Megeir adok, saa ilun nē ado tenebur nē anī ganan, Negurem aya ifanan. <sup>19</sup> Anī nigin, ã, teneub ganan bun, tamo kayau ganan bun uleg fen, neu dõ fiya tar unenãdigouf, Dei yana nem, Naal yana bunem, Awa Uur Fateul yana bunem, idi naan ugunēdigouf. <sup>20</sup> Agog fen, od aya ã arokenein anī ganan dõ difouf nigin ufelnēdigouf. Momoi bagai, aya ã geid sain faimud tabodok, ile, sain idikalauf bun."

# MAK

## Jon Naan Igunēdiya Tamo Naab Dodok Fenen

(Matyu 3:1-12; Luk 3:1-18; Jon 1:19-28)

- 1 Jesus Kristus, Negur Naal nigin, biya od gariya inoya.
- 2 Profet Asaia nē itotoya bun ibodok: "Aya neu arū tamo ĩ ket sur afe di, ĩ uyu ilauf, ogon naab dodok fouf." †
- 3 "Ait taka gerere tuan iweig irok, 'Odug nē naab dodok ge fen, madur wenēg.'" ††
- 4 Age fiya nigin, Jon isin, tamo kayau gerere tuan od irokenēdi di, waud falei del, nedi mosor yaleleya nigin naan igunēdin. 5 Judia kalilī fiya, Jerusalem tamo kayau ganān, ĩ garan dilen. Idi neid mosor kurō difesi di, idi im Jordan naanū naan igunēdin. 6 Jon kamel siwi nem gabar diwan anī ifonūdig. Agef fen, gaar gabar nem lū diwan anim luwa gu fedig. ĩ totobi nin te ado yōdig. 7 Eī enī yogon od iron, "Taka ĩ aya dumeun dō fiyau, anī ere, in megeir neu wal fiya. Aya to biya nigin, iborou bobou fe fen, in ye su nē malū biru fiya kisi feleya sā. 8 Aya naan nem aguneik, anī ere, ĩ Awa Uur Fateulem igunēf."

## Jesus Naan Igun Ado ĩ Bun Kisi Fiya Wō Yen

(Matyu 3:13-4:11; Luk 3:21, 22; 4:1-13)

- 9 Sain anī bun, Jesus Nasaret taun oun Galili nediwom isi, Jonem Jordan naan igunen. 10 Jesus naanum fā yale fen, ĩ lof mog, saa tano kāf fen, Awa Uur kuburir gen, ĩ bun isi mog, ilen. 11 Age fe di, ait taka saa ilunem isin, "Ō neu Kesu, ō nigin aya wau laa fedig, ō nigin aya wau kulī yedig."
- 12 Kaisā bagai, Awa Uurem sur fiyē di, gerere tuan ilen. 13 ĩ gerere tuan an, naa foti ibod mog, Satanem kisi fiyen. ĩ gaar kuī geid difar mog, engel idim anī ĩ disennen.

## Jesus Nē Dō Fiya Tar Uyulil Iweignēdin

(Matyu 4:12-22; Luk 4:14, 15; 5:1-11)

- 14 Jon kalabus bun dinenen ibod mog, Jesus Galili ile, Negur nē biya od anī kurō feis iron. 15 ĩ iron, "Sain mogo isil. Negur nē tano mogo melsak. Wauī falei wog fen, biya od enī nigin wauī momoi gei!"
- 16 Jesus Galili maaī yeri iyo ken, ĩ Simon, ne tura Endru ado, daliyou bun kakāg dirā mog, iledin, ere nigin, idi gau yaleya tamo. 17 Jesus iron, "Usig, dō wiyag, aya

† Malakai 3:1 †† Asaia 40:3 ‡ Juda neid tobonunā anī, sain tamo yana ado isi di, idi neid kabī tamo in ye su nē malū biru difedig.

ā tamo gei fiya nigin aneyēf." 18 Sain anī bun bai, nedi kakāg ditor ken, ĩ dō difiyen.

19 Sain ĩ naal iyok ile fen, ĩ Sebedi naal Jems, tura Jon ado, waag namen, idi neid kakāg dodok dife mog, iledin. 20 Kaisā bagai, ĩ iweignēdin. Age fe di, idi temeid Sebedi, in kabī tamo oroi yaledin anidi geid waag bun ditorneīd fen, Jesus dō difiyen.

## Jesus Kaa Sane Irun

(Luk 4:31-37)

21 Idi Kapenaum taun dilen. Sain Juda neid uub naa Sabat wō ye di, Jesus Juda neid uub fō namen ile fen, od ifelnēdiya gariya inon. 22 Tamo kayau in od nigin terē den, ere nigin, ĩ tamo yana adom gen ifelnēdin, ĩ lo ifelnēdiya tamo gen sā. 23 Agef mog bai, tamo taka kaa sanem ironen anī, nedi uub fō namen an kāi ye iron, 24 "Ō amā ere naig wamā fenē, Jesus Nasaret tamal? Ō amā daig wamā fenē nigin usil de? Aya ō nigin keleī, Negur nē Fateul bagai!"

25 Jesus totol ado iron, "Foro wol! ĩ namen tamal ulō weis!" 26 Kaa sane, tamo anī totol bagai yokū fiyē, sur fiyē, ira ken, kāi ye, ulō yesin.

27 Tamo kayau ganān terē de fen, abob toti difen, "Eī ere? Keleī mata, agef fen, totol ado! ĩ irō di, kaa sese-neg dō difedig." 28 ĩ age fen anī nē od kaisā bagai, Galili kalilī fiya fonō anī adok iyokelen.

## Jesus Musei El Fedin

(Matyu 8:14-17; Luk 4:38-41)

29 Sain Juda neid uub fō ditor ken, kututū desin, idi Jems Jon ado weim, Simon Endru ado neid fō bun dilen. 30 Simon nē mam, ĩ bouwa uruwa odug ado nigin fatarē yenen, anī idi ĩ nigin Jesus dirokenen. 31 Anī nigin, Jesus kayau wagen ile, kayau ima yales irou isennē di, fā yen. Age fe di, bouwa uruwa anī kayau folo fiye kele di, kayau ĩ aruneid yalen.

32 Aragau anī bun gaa kuru kel mog, tamo kayau dagi adodo, kaa sesen adodo ganān, Jesus wagen guri difeid, disin. 33 Taun anī nē tamo kayau ganān, fofomala anī bun guru difen. 34 Anī bun, Jesus, tamo kayau dagi fire fire adodo musei el fiyēdin, kaa sesen musei irudi di, diyawon. Anī ere, kaa sesen idi ĩ nigin kelein. Anī nigin, idi to wogō douf nigin sigoreid ifofan.

## Jesus Moilin Negur Kosē Fiyen

(Luk 4:42-44)

35 Bonimeī bagai mumurei ado, Jesus fā yale, fō itor, moilin ile, an Negur kosē fiyen. 36 Simon ĩ, ne tā tar



geid dimirne ken, dilen. <sup>37</sup> An fotou difiye ken, idi diro-kenen, "Tamo kayau ganan ò dimirnok!"

<sup>38</sup> Jesus aitedin yale iron, "Ada uyu takã talauf, fonò melsã anĩ bun. Aya aneg od arõf, anĩ nigin aya asin."

<sup>39</sup> Age ye fen, Jesus Galili kaliĩ fiya ganan bun iyo ken, nedi uub fõ fõ bun od iro ken, kaa sesen irudi di, diyawon.

### Tamo Taka Lepra Dagi Ado

(Matyu 8:1-4; Luk 5:12-16)

<sup>40</sup> Tamo taka lepra dagi ado, ï wagen isi, ibor bobou fe fen, igon, "Õ oroyõf are, el wiyauf."

<sup>41</sup> Jesus wau gudũf fen, ima irã, kobũ fiye ken, ï iron, "Aya wau irok, ò bouwã biyaf!" <sup>42</sup> Age ye di, kaisã bagai lepra guruma ï itornẽ di, bouwa biya len.

<sup>43</sup> Jesus kaisã bagai totol bagai weder irou fen, sur fiyẽ di, ilen: <sup>44</sup> "Karĩ welei, enĩ aib taka to urokenẽf, anĩ ere, ò pris wagen ule, ò bouwã ufelnẽf, ò bouwã biyal anĩ nigin Moses nẽ od irok anĩ dõ fen, sesewi fiya wenẽf, anĩ bunem yaore di, tamo kayau dilouf." <sup>45</sup> Anĩ ere, ï iyok ile fen, kurõ feis irõ di, od anĩ iyokelen. Anĩ nigin, Jesus mal atun taun taka bun to iledig, ï moilin ibodon. Anĩ ere, tamo kayau firen firen temeleid fau fau ï wagen disidig.

### Jesus Tamo Bouwa Ilolaisin Anĩ El Fiyen

(Matyu 9:1-8; Luk 5:17-26)

**2** Naa tunĩ bure fele di, Jesus baban Kapenaum taun ile di, tamo kayau idi, ï fõ taka bun ibodok yeya anĩ karĩ den. <sup>2</sup> Anĩ nigin, tamo kayau musei guru difen, fõ aaben ado fofomala dino dale di, modoũ san. Age dife di, Jesus od irokenẽdin. <sup>3</sup> Jesus od irokeneĩd mog, tamo tunĩ tamo ilolaisin anĩ tamo aiwa ifenẽyam faali de, dirou disin. <sup>4</sup> Idi ï Jesus garan irou ileya kisi feleya sã, ere nigin, tamo kayau musei, anĩ nigin, idi Jesus ibodok nẽ fõ soko anĩ korõ difel fen, tamo gabgab bun yen mog, folo folõ dife di, isilen. <sup>5</sup> Jesus idi neid momoiya ile fen, ï tamo ilolaisin irokenen, "Kesu, ogon mosor alelkonok."

<sup>6</sup> Age fe di, lo ifelnẽdiya tamo tunĩ an dibodon, idi dogo namedin kisi difen, <sup>7</sup> "Ere nigin ï age irok? ï kono fef! Taka nem mosor yaleleya to yenek, Negur yogo dogol."

<sup>8</sup> Kaisã bagai, Jesus yogon kisi bun, idi waudim kisi difen anĩ kelein. Agef fen, ï idi irokenẽdin, "Ã ere nigin agog kisi gef? <sup>9</sup> Tamo ilolaisin anĩ irokeneĩya nigin nanĩ anĩ karika, 'Ogon mosor alelkonok' de, 'Fã wo, ogon gabgab wale fen, uyok ule?' <sup>10</sup> Anĩ ere, Tamo Naal ï te-nebur ein mosor yaleleya nigin yana ado anĩ, ã keleĩ youf nigin..." Age ye fen, ï tamo ilolaisin anĩ irokenen, <sup>11</sup> "Aya ò arokonok, fã wo, ogon gabgab wale fen, fõ bun ule." <sup>12</sup> ï fã yale, ganan meleid bun in gabgab yale iyok ilen. Age fe di, tamo kayau ganan terẽ de fen, Negur yana dales diron, "Ada kulu ereb eig fiya taka to tailen!"

### Jesus Lewi Iweignen

(Matyu 9:9-13; Luk 5:27-32)

<sup>13</sup> Jesus ï baban daliyou sirin ilen. Tamo kayau musei ï wagen disile di, ï od gariya ino ifelnẽdin. <sup>14</sup> ï iyok ile, Lewi, Alfeus naal, takis yaleya fõ bun ibod mog, ile fen, irokenen, "Aya dõ wiya." Age ye di, ï fã yale, dõ fiyen.

<sup>15</sup> Jesus Lewi nẽ fõ bun saaf yõ mog, takis yaleya tamo musei, mosor adodo tamo kayau musei, ï, in dõ fiya tar geid, weim saaf don, ere nigin, idi musei Jesus dõ difiyen. <sup>16</sup> Sain lo ifelnẽdiya tamo, Farisia tamo idi, Jesus ï takis yaleya tamo, mosor adodo tamo kayau geid, weim saaf doko dibod mog, dileid fen, idi in dõ fiya tar anĩ to difiyẽdin, "Ere nigin ï takis yaleya tamo, mosor adodo tamo kayau geid weim doko?"

<sup>17</sup> Anĩ karĩ ye fen, Jesus idi irokenẽdin, "Dagi sã anidim dokta bun ileya nigin waud to yenek, dagi adodom dogol. Aya madur tamo anidi iweignẽdiya nigin to asin, mosor adodo tamo anidi iweignẽdiya nigin asin."

### Kuri Nigin Jesus To Difiyen

(Matyu 9:14-17; Luk 5:33-39)

<sup>18</sup> Jon nẽ dõ fiya tar, Farisia tamo geid, idi kuri den. Tamo tunĩ disin, Jesus to difiyen, "Naig fe di, Jon nẽ dõ fiya tar, Farisia tamo nẽ dõ fiya tar geid, idi kuri dedig, anĩ ere, ogon idi sã?"

<sup>19</sup> Jesus aitedin yale iron, "Naig fe di, mois tamo ibod mog, in tamo tar idi kuri douf? Idi to age difouf, ere nigin, ï idi geid fau dibodok. <sup>20</sup> Anĩ ere, naa fau isi di, anĩ bun mois tamo idi bun tamal yalelnẽ di, naa anĩ bun gama idi kuri douf.

<sup>21</sup> "Tamo taka, gabar tubu, gabar masak mata ado baguf fen, to iwauf. Taka ï age fouf are, masak mata anim tubu arirĩ fe di, tubu kudef irailauf. <sup>22</sup> Takag age fiya, taka nem wain mata meme gabar † tubu bun to itinẽf. ï age fouf are, wain anim age fe di, meme gabar gẽ ye fen, serek fouf. Age fe di, wain meme gabar ado sane lauf. Age fiya nigin, ï wain mata meme gabar mata bun itinẽf."

### Jesus ï Sabat Nẽ Odug

(Matyu 12:1-8; Luk 6:1-5)

<sup>23</sup> Sabat naa †† taka bun, Jesus in dõ fiya tar geid, wit kabĩ atu diyok dile fen, idi wit biya tunĩ fito difen.

<sup>24</sup> Age dife di, Farisia tamo idi Jesus dirokenen, "Ulef, ere nigin idi Sabat naa nẽ lo difodul ken, Sabat naa bun oug difef?"

<sup>25</sup> Jesus irokenẽdin, "Sain Dawid, ne tã tar geid naũ fedi di, saaf lau de fen, Dawid age fen anĩ, ã to uwesegen de? <sup>26</sup> Abiata, pris mudur ado ibodon sain anĩ bun, Dawid ï Negur nẽ fõ namen ile fen, bret fateul prisem dogol dõdig ‡ an ibodon anĩ yokon, ï bret tunĩ, ne tã ta-reg ifenẽdin."

† Juda neid tobonunã, idi meme gabar nem darum diwadig.  
†† Sabat naa anĩ, Juda neid uub nẽ naa. ‡ Lo bun, bret fateul anĩ, prisem dogol dõdig.

<sup>27</sup> Age ye fen, ĩ idi irokenēdin, "Tamo isennēya nigin Sabat naa inon, tamom Sabat naa anĭ isennēf nigin to inon. <sup>28</sup> Anĭ nigin, Tamo Naal ĩ Odug, Sabat nēg ĩ Odug."

### Tamo Taka Ima Sitakā Gege Fefu Fiya (Matyu 12:9-14; Luk 6:6-11)

**3** Sain taka, Jesus baban Juda neid uub fō bun ilen. Tamo taka ima sitakā gege fefu fen anĭ, an ibodon. <sup>2</sup> Tamo tunĭ an difaren idi, Jesus bouwa bun od dinouf nigin naab dimiren, anĭ nigin, idi ĩ Sabat naa bun tamo anĭ el fiyē mog, dilouf nigin ololo difen. <sup>3</sup> Jesus tamo ima fefu fiya anĭ irokenen, "Ganan meleid bun fā, ufar."

<sup>4</sup> Age ye fen, Jesus idi to fedin, "Nanĭ anĭ Sabat naa bun lo dō fiya? Tobonunā biya age fiya anĭ de, tobonunā sane age fiya anĭ; isennē di, mata ibodōya anĭ de, yukesiya anĭ?" Anĭ ere, idi nin kē delen.

<sup>5</sup> Jesus seye ye fen, idi fele fedin, idi waud togun nigin, ĩ wau odug gudūf fen, tamo anĭ irokenen, "Ogon imā yaĭ wo." ĩ yaĭ fe di, in ima oditekei biya len. <sup>6</sup> Age fe di, kaisā bagai Farisia tamo idi kututū deis dile, Herod nē dō fiya tar weim, idi Jesus naig de dukesiyouf nigin od katō difen.

### Tamo Kayau Musei Jesus Dō Difen

<sup>7</sup> Jesus in dō fiya tar geid, daliyoun disile di, tamo kayau musei Galili temeleid dō difen. <sup>8</sup> Jesus ĩ ereb ereb ganan age fen anĭ karĭ de fen, tamo kayau musei Judia distrik, Jerusalem taun, Idumea distrik, Jordan naan kalilĭ fiya, Taia Saidon ado kalilĭ fiya adok, ĩ wagen disin. <sup>9</sup> Tamo kayau museim Jesus to sile difiyēf nigin, ĩ yogon waag naal taka dodok de yenēf nigin, in dō fiya tar irokenēdin. <sup>10</sup> Ere nigin, ĩ mogo musei el fedin. Anĭ nigin, idi dagi adodo Jesus kobū fiya nigin abob susur difedin. <sup>11</sup> Kaa sesen Jesus dilef sain ganan, idi ĩ wagen kuku de, den ken, diweig dirōdig, "Ō Negur Naal." <sup>12</sup> Anĭ ere, Jesus, ĩ aib anĭ, to wogō douf nigin total bagai katū fedin.

### Jesus Aposel Tuwelf Igirnēdin (Matyu 10:1-4; Luk 6:12-16)

<sup>13</sup> Jesus arei wala bun isel ibod ken, idi ĩ aib aib oron anĭ iweignēdin. Age fe di, idi ĩ wagen disin. <sup>14</sup> Jesus ĩ tuwelf gei fen, aposel wowā douf nigin igirnēdin, are idi Jesus geid fen, dum biya od wogō douf nigin fau sur fediyouf, <sup>15</sup> idi total dale fen, kaa sesen dirudiyouf nigin age fen. <sup>16</sup> Jesus tuwelf igirnēdin enidi, are Simon (Jesus ĩ yana yun Pita), <sup>17</sup> Jems Sebedi naal, tura Jon ado (Jesus idi yeneid yun Boaneges, anĭ nē gariya, Kolime Gere Tar), <sup>18</sup> Endru, Filip, Batolomyu, Matyu, Tomas, Jems Alfeus naal, Tadeus, Simon Selot † taka, <sup>19</sup> Judas Iskariot, ĩ dum Jesus kiwai imeid bun inenen.

### Jesus Belsebub Ado Difiyen (Matyu 12:22-32; Luk 11:14-23; 12:10)

<sup>20</sup> Jesus ĩ, fō taka bun ile di, tamo kayau musei baban guru difen. Anĭ nigin, Jesus in dō fiya tar geid, saaf yōya kisi feleya san. <sup>21</sup> Jesus nē tura tar od anĭ karĭ de fen, idi ĩ dale diroulauf nigin dilen, ere nigin, idi diron, "Ĭ neneya kisi ado."

<sup>22</sup> Age dife di, lo ifelnēdiya tamo Jerusalem temeleid disi diron, "Ĭ Belsebub ado, ĩ kaa sesen neid mudur yana bunem, kaa sesen irudidig."

<sup>23</sup> Anĭ nigin, Jesus idi iweigneid fen, yaab od nem irokenēdin, "Satan ĩ naig Satan iruwauf? <sup>24</sup> Tano tekelei anĭ, yogo faraf, kiwai ifenēf are, tano anĭ to ifarauf.

<sup>25</sup> Fō tekelei anĭ, yogo faraf, kiwai ifenēf are, fō anĭ to ifarauf. <sup>26</sup> Takag, Satan ĩ yogo faraf, kiwai ifenēf are, ĩ to ifarauf, in sain mogo bure felef. <sup>27</sup> Anĭ ere, taka nem tamo total ado nē fō bun safina gei fou fenē, tamo total ado ket ifokel fen, anĭ ĩ yogon fō bun bē yalouf. <sup>28</sup> Aya ā momoi arokeneik, tamo neid mosor ganan ado kono difef are, fau yalel kenēdiyof. <sup>29</sup> Ani ere, aibem taka Awa Uur Fateul kono fiyek, in mosor to yalelauf, in mosor anĭ faimud ibodkalauf."

<sup>30</sup> Jesus od enĭ iron, ere nigin, idi dirōdig, "Ĭ kaa sane ado."

### Jesus Nē Sina, Tura Tar Geid (Matyu 12:46-50; Luk 8:19-21)

<sup>31</sup> Age ye di, Jesus nē sina, tura tar geid disin. Mayarē difar mā, idi Jesus dirokenēf nigin taka sur difen. <sup>32</sup> Tamo kayau musei ĩ salili difiyek dibodon, idi ĩ dirokenen, "Ogon sinā, turā tar geid, mayarē ō dimirnok."

<sup>33</sup> Jesus to fedin, "Ai anĭ neu naai, neu turau tar?"

<sup>34</sup> Age ye fen, ĩ, salili difiyē dibodon idi lo feid fen, ĩ iron, "Enidi anĭ neu naai, neu turau tar! <sup>35</sup> Aib idi Negur nē oroya dō difedig anidi anĭ, neu turau, neu mainou, neu naai."

### Faat Irarāya Tamo Nē Yaab Od (Matyu 13:1-23; Luk 8:4-15)

**4** Jesus baban daliyou sirin, gariya ino, od ifelnēdin. Tamo kayau guru de, salili difiyen anĭ gai musei biya, anĭ nigin, tamo kayau adok ubun difar mog, ĩ waag taka daliyoun ifaren anĭ namen isil ibodon.

<sup>2</sup> Agef fen, ereb ereb musei yaab od nem ifelneid fen, iron, <sup>3</sup> "Karĭ gei! Kabĭ marau taka faat irarāf nigin ilen.

<sup>4</sup> Sain ĩ irarak ile mog, tunĭ naab luwen kuku ren, are ninā disi dakasin. <sup>5</sup> Tunĭ meein tuar kuku ren, an teneub badagar. Are kaisā bagai fokū den, ere nigin, teneub are badagar bagai. <sup>6</sup> Anĭ ere, sain gaa ise di, bali are ilalaid, laasi yedin, ere nigin, idi warumutei sā.

<sup>7</sup> Faat tunĭ malū duri atun kuku ren, are malū duri anĭ fā ye fen, sile feledin, anĭ nigin, biya to yun. <sup>8</sup> Faat tunĭ teneub biya bun kuku ren, are idi fokū yedin, oduduge di, biya imadin, taka biya teti, taka biya siksti, taka biya wan handred, age fef ilauf."

<sup>9</sup> Age ye fen, Jesus iron, "Taka ĩ karĭya nigin weder ado, ĩ karĭ youf."

† Juda neid kusĭ mala taka, idi Rom gawaman ado kusĭ dedig.

<sup>10</sup> Sain Jesus ĩ yogo ibod mog, yogon dō fiya tar tuwelf, tamo tunĭ salili difiyen anidi geid, yaab od nigin ĩ to difiyen. <sup>11</sup> Jesus idi irokenēdin, “Negur tano nē waa are Negur mogo ifenein, anĭ ere, idi dumeitur onudi nigin, ereb ereb ganan yaab od bunem wogō yef, <sup>12</sup> ere nigin, ““idi meledim diledig, anĭ ere, idi meleid fokōya sã, idi wederedim karĭ dedig, anĭ ere, idi gariya keleĭ sã. Age fiya sãf are, idi waud falei de di, mosor yalel kenēdiyof.’ †”

<sup>13</sup> Age ye fen, Jesus idi irokenēdin, “Ā yaab od enĭ wauĭ to fokō youf? Age fiyauf are, naig fe di, ā yaab od tunĭ nigin wauĭ fokō youf? <sup>14</sup> Faat irarāya tamo, biya od irarak. <sup>15</sup> Tamo tunĭ idi faat naab luwen kuku ren gen, an biya od iraran. Idi karĭ de mog, kaisã bagai Satan isi, biya od idi namedin iraran anĭ yalededig. <sup>16</sup> Tunĭ idi faat meein tuar iraran gen, idi od anĭ karĭ de fen, kaisã bagai dale fen, waud bun kulĭ dedig. <sup>17</sup> Anĭ ere, idi warumutei sã, anĭ nigin, idi sain meluk to dibodōf. Sain, biya od nigin, morō be kafĭ fiya be isif, idi kaisã bagai dirofosif. <sup>18</sup> Tunĭg faat malū duri atun iraran gen, idi biya od karĭ den. <sup>19</sup> Anĭ ere, tenebur mata ibodōya nē sii fiya, safina ado ibodōya nē kisi fiya, oroya fire fire isif anidim, biya od sile fe di, anim biya to yūf. <sup>20</sup> Tunĭ faat teneub biya bun iraran gen, idi biya od karĭ den, dale di, anĭ biya yūf, taka biya teti, taka biya siksti, taka biya wan hundred, age fef ilauf.”

#### Lam Yoki Bun

(Luk 8:16-18)

<sup>21</sup> Jesus idi irokenēdin, “Ā lam urou usig, beĭ kuren be fatar farumen inogouf de? Age fiya ban, ā lam yogon yoki bun to useginnēgouf de? <sup>22</sup> Ereb ereb ganan iminēyan yenek anĭ ganan yaor fouf, ereb ereb ganan nar fen yenek anĭ ganan irou isi, biru fel fen, yaau du fof. <sup>23</sup> Taka ĩ kariya nigin weder ado, ĩ karĭ youf.”

<sup>24</sup> Jesus idi irokenēdin, “Ā od karĭ gef anĭ, ed ge kisi gouf, ā idi nigin kisi gef gen, ā nigineg age de kisi difouf, anĭ tobol feneĭf. <sup>25</sup> Aib taka ĩ ado, wal fiya ifenēf, aib taka ĩ sã, ereb ereb ĩ ado anĭg ĩ bun yalelauf.”

#### Faat Odugef Nē Yaab Od

<sup>26</sup> Takag Jesus iron, “Negur nē tano are eig fiya gen, tamo taka teneub bun faat irarak. <sup>27</sup> Bō ado gaa ado, tamo ĩ mulaĭ yenek, fã ye iyok, faat fokū ye fen, odugef, anĭ ere, ĩ naig be fe odugef, ĩ keleĭ sã. <sup>28</sup> Teneub yogo dogol biya inodig, uyulil bali, age fe di, turu, anĭ turu bun biya inodig. <sup>29</sup> Biya bure fele di, kaisã bagai ĩ dimig gunō waila ado inodig, ere nigin, biya yaleya sain isif.”

#### Masted Faat Nē Yaab Od

(Matyu 13:31, 32, 34; Luk 13:18, 19)

<sup>30</sup> Baban Jesus iron, “Negur nē tano, ere taka age fiya tauf? Ere bunem yaab tafouf? <sup>31</sup> ĩ masted faat age fiya. ĩ faat memereis bagai ā teneub bun utenēgedig. <sup>32</sup> Anĭ

ere, ĩ utenēge di, ĩ odugouf, ĩ kabier saaf ganan wal fediyof, in beneir odudug irara ken, buri ino di, ninã il-un temeleid disi dibodōf.”

<sup>33</sup> Jesus yaab od age fediya musei bunem, tamo kayau idi keleĭ youf kisin, od wogō fiyēdin. <sup>34</sup> ĩ tamo kayau ereb od irokenēdiyof fenē, yaab od bunem dogol. Anĭ ere, ĩ mugu yogon dō fiya tar geidef are, ereb ereb ganan faded fedidig.

#### Jesus Yau Uyē Ado Irokenēdi Di, Kee Delen

(Matyu 8:23-27; Luk 8:22-25)

<sup>35</sup> Naa anĭ bun aragau di, Jesus in dō fiya tar irokenēdin, “Ada daliyou sitakã talauf.” <sup>36</sup> Idi tamo kayau ditorneĭd fen, Jesus waag bun ibod mog, idi ĩ dale dirou dilen. Waag tunĭg weim dilen. <sup>37</sup> Yau odug fã ye di, maaĭ fã ye, waag yu ken, maaĭ ifilege di, waag namen isokosen. <sup>38</sup> Jesus ĩ, waag ibun edē bun mulaĭ yen mog, idi ĩ turĭ difiyē dirokenen, “Tise, ada naanū talalau fenē, ō to kisi walef de?”

<sup>39</sup> ĩ fã yen, yau sakã fiye ken, maaĭ irokenen, “Kee resig fen, dē weleg!” Age ye di, yau dē ye le di, maaĭg oditekei dē yelen.

<sup>40</sup> Jesus in dō fiya tar irokenēdin, “Ere nigin ā kumĭ wogef? Ā fau momoia sã de?”

<sup>41</sup> Idi fatuk bagai kumĭ tererē de fen, abob toti difen, “Eĭ aim bagai? ĩ irō di, yau maaĭ adog ait dō difef!”

#### Jesus Tamo Taka Kaa Sesen Musei Ado El Fiyen

(Matyu 8:28-34; Luk 8:26-39)

**5** Idi naan daliyou dibal dile, Gerasa teneub bun wō den. <sup>2</sup> Jesus waag bun tamal kutū yesi di, tamo taka kaa sane ado, matmat bunem ĩ fotou fiyē fenē isin. <sup>3</sup> Tamo matmat bun ibodon anĭ, taka nem ĩ ifōya nigin kisi feleya sã, sen nemeg ifōya kisi feleya sã. <sup>4</sup> ĩ sain musei sen nem, ye ima ado difofādig, anĭ ere, ĩ sen kokour fel, yem ain weweur fedig. Taka nem total ino fen, ĩ ifō di, dē yeleya kisi feleya sã. <sup>5</sup> Sain ganan bō ado gaa ado, ĩ matmat atun ado areineg iweig kaĭ ye fen, meinem yogo bouwa kokour fedig.

<sup>6</sup> ĩ mala irakelen, Jesus gerom ile fen, gudu ref ile, Jesus wagen kubū ye, ibor bobou fen. <sup>7</sup> ĩ ait odug nem iweig iron, “Ō aya ere naig wiyau fenē, Jesus, Negur Il-un Bagai nē Naal? Negur yana nem aya ō agonok, ō aya to daig wiyauf!” <sup>8</sup> Ere nigin, ĩ mogo kaa sane irokenen, “Ō tamo enĭ bun tamal ulō weis!”

<sup>9</sup> Age ye fen, Jesus ĩ to fiyen, “Ō yanã ai?”

ĩ iron, “Aya yanau Ami, ere nigin, amã musei biya.”

<sup>10</sup> Jesus idi akor anĭ bun tamal to irudiyof nigin, ĩ baba baban Jesus igonen.

<sup>11</sup> Melsã arei wala sirin, bor musei biya saaf doko difaren. <sup>12</sup> Kaa sesen Jesus digonen, “Amã bor atun susur wamãf, yo wamã di, idi namedin malalauf.” <sup>13</sup> Jesus idi yo fedidi, kaa sesen ulolō deis disel, bor namedin dilelen. Bor, tu tausen age fiya, gududu de, bebeig sane baurin daliyoun disel, naanū gare desin.

<sup>14</sup> Bor lo fiya tamo diya dile, od anĭ taun ado fonō fonō wogō den. Age dife di, tamo kayau ereb wō yen anĭ dilou fenē dilen. <sup>15</sup> Sain idi Jesus garan wō den, idi

† Asaia 6:9, 10

meleid dirã, tamo kaa sesen museim dirounen anĩ, an garab yel, kisi biya ado ibod mog, dilen. Anĩ nigin, idi kumĩ den. <sup>16</sup> Tamo idi meledim dilen anidim, kaa sesenem tamo diroun anĩ ado bor age difen anĩ nigin, tamo kayau wogõ difiyẽdin. <sup>17</sup> Age dife di, tamo kayau, Jesus ĩ idi neid teneub anĩ itor ilauf nigin digonen.

<sup>18</sup> Age de di, Jesus ĩ waag bun sõ ye mog, tamo kaa sesenem dalen anĩ, Jesus ado dilauf nigin nonĩ fiyen. <sup>19</sup> Jesus ĩ to awa yokon irokenen, "Õ fonõ ogon ibor tar gedin ulauf, Odug õ nigin age fen anĩ ado, ĩ naig fe fen, õ nigin wau yun anĩ, idi urokenẽdiyof." <sup>20</sup> Age ye di, tamo anĩ itor ilen, Jesus ĩ nigin age fen anĩ, Dekapolis † teneub bun tamo kayau wogõ fiyẽdi di, idi ganan terẽ den.

### Kayau Naal Laa Fen Ado Dagi Kayau Taka

(Matyu 9:18-26; Luk 8:40-56)

<sup>21</sup> Jesus baban waag bun ibal, naan daliyou sitakã ilen, ĩ daliyou yerin ibod mog, tamo kayau musei disi salili difiyen. <sup>22</sup> Age de mog, Juda neid uub fõ lo fiya nẽ mudur taka, yana Jairus an isin. ĩ Jesus ile fen, ĩ ye gariyan kubũ yen. <sup>23</sup> ĩ igone ken, irokenen, "Nau barai naal oboim fef. Uma fen, imã teten uno di, ĩ biyal, ma-tauf." <sup>24</sup> Anĩ nigin, Jesus ĩ uruwom dilen.

Tamo kayau musei dõ difiyẽ, kitikiti de, susir difiyek dilen. <sup>25</sup> Kayau taka idi atun an ifaren, ogõ dagi faimud ado yar tuwelf iyon. <sup>26</sup> Kayau anĩ dokta musei bun ilen, anĩ ere, bouwa bun morõ odug idi bun yalen. Agef fen, yogon safina ganan irailen. Anĩ ere, kayau ĩ bouwa biya leya ban sane len. <sup>27</sup> Sain kayau ĩ Jesus nigin karĩ yen, ĩ Jesus dume dõf, tamo kayau atu ile, in kolos kobũ fen, <sup>28</sup> ere nigin, kayau ĩ kisi fen, "Aya in gabar dogol kobũ afouf, are deuf, aya fau biyauf." <sup>29</sup> Kaisã bagai, kayau naud segẽ yelen. Age fe di, kayau ĩ yogo bouwa bun karĩ yen, are karika len.

<sup>30</sup> Kaisã bagai, Jesus in total ĩ bun tamal ul fe yale mog, karĩ yen. ĩ tamo kayau atun falei yel, to fedin, "Aim neu kolos kobũ fel?"

<sup>31</sup> In dõ fiya tar Jesus dirokenen, "Tamo kayau musei õ kiti diyok, ule fen anĩ, õ 'Aim aya kobũ fiyal?' wof."

<sup>32</sup> Anĩ ere, Jesus ĩ aibem age fen anĩ ilouf nigin, fau fau fai yen. <sup>33</sup> Age fe di, kayau ĩ yogo ereb age fen keleĩ ken, Jesus wagen isi, ye gariyan kubũ yen. ĩ kumĩ tererẽ ye fen, momoi od ganan Jesus irokenen. <sup>34</sup> Jesus kayau irokenen, "Nau barai, ogon momoiya anim el yom. Waũ unois ule, dagi anim to ifõyõf."

<sup>35</sup> Jesus fau od wogõ ye mog, tamo tunĩ, Juda neid uub fõ lo fiya mudur Jairus nẽ fõ bunem disin. Idi diron, "Nẽ barai mogo laa fel. Ere nigin õ tise fau morõ wenek?"

<sup>36</sup> Jesus od idi diron anĩ idod ken, Juda neid uub fõ lo fiya mudur anĩ irokenen, "To kumĩ wo, momoi dogol wo."

<sup>37</sup> Jesus ĩ takam dõ fediya nigin katũ fedin, Pita, Jems, ne tura Jon idim dogol. <sup>38</sup> Idi Juda neid uub fõ lo fiya mudur nẽ fõ bun ulõ deis fen, Jesus mala iran, tamo kayau waud gudũf fen, inã legur mog, iledin. <sup>39</sup> Jesus

aaben ile fen, idi irokenẽdin, "Ere nigin ã fatuk bagai inaĩ gef? Kayau naal ĩ laa fiya sã, ĩ mulã yenek." <sup>40</sup> Anĩ ere, idi Jesus kasã difiyen.

Age dife di, Jesus idi irud le fen, ĩ kesu nẽ sina tama ado, in dõ fiya tar geid, kesu yenen nẽ namen dilen.

<sup>41</sup> Jesus ĩ imalẽ yalesne ken, irokenen, "Talita kum!" (anĩ nẽ gariya, "Kayau naal, aya õ arokonok, fã wo!").

<sup>42</sup> Kaisã bagai, kayau naal fã yale iyon (ĩ yar tuwelf ado). Anĩ nigin, idi oditekei terẽ den. <sup>43</sup> Anĩ ere, taka to diro ken, karĩ youf nigin, Jesus total bagai katũ fedin. Agef fen, ĩ kayau naal saaf difenẽ di, yãf nigin irokenẽdin.

### Profet Taka Fõ Gariyan Yana Sã

(Matyu 13:53-58; Luk 4:16-30)

**6** Jesus an itor ken, in dõ fiya tar geid yogon fõ gariyan dilen. <sup>2</sup> Sabat naa wõ ye di, Jesus Juda neid uub fõ bun ifelnẽdiya gariya inon. Age fe di, musei ĩ karĩ difiye ken, terẽ de diron,

"Tamo enĩ ereb ereb enei nain gei fen? Eĩ ere keleĩ anĩ ĩ ifenen? Anĩ bunem ĩ memelikeg inodig. <sup>3</sup> ĩ to kapenta de? ĩ to Maria naal fen, Jems, Josef, Judas, Simon ado tureid de? In main tar ada to ein weim de?" Age de fen, idi ĩ kiwai difenen.

<sup>4</sup> Jesus idi irokenẽdin, "Profet taka ĩ, in fõ gariyan, in sirag atun ado, in fõ bun dogol, ĩ yana sã." <sup>5</sup> ĩ an memelik taka inoya kisi feleya sã, anĩ ere, ĩ dagi tamo teke tekelei dogol ima tetedin ino fen, el fedin. <sup>6</sup> Jesus idi neid momoiya to ile fen, terẽ yen.

### Jesus In Dõ Fiya Tar Tuwelf Sur Fedin

(Matyu 10:5-15; Luk 9:1-6)

Agef fen, Jesus fonõ fonõ iyo ken, od ifelnẽdin.

<sup>7</sup> Jesus tuwelf iweignẽdi di, idi ĩ wagen disin. ĩ uru uru, sur feid fen, kaa sesen dirudiyof nigin, idi megeir ifenẽdin.

<sup>8</sup> ĩ fadim yu ken, iron, "Delẽ uyõgouf nigin ereb taka to walogouf, bret sã, kodol sã, moni sã, manig dogol.

<sup>9</sup> Sendel ufonũg fen, gabar ufilaĩgef dogol, taka to walogouf. <sup>10</sup> Ereb sain ã fõ bun ulagauf, an ubodõgef uleg, taun anĩ utorõgouf. <sup>11</sup> Fonõ taka bun ã to daleyei ken, ã to karĩ diyeyĩ, sain ã fonõ anĩ utorõg fen, yeĩ aas tu welege di, idi ã kiwai difenein anĩ keleĩf."

<sup>12</sup> Tamo kayau waud falei youf nigin, idi dile, od wogõ den. <sup>13</sup> Idi kaa sesen musei diruid fen, tamo kayau dagi ado musei moul diguneĩd, el difedin.

### Jon Naan Igunẽdiya Tamo Ula Gudũ Difen

(Matyu 14:1-12; Luk 9:7-9)

<sup>14</sup> King Herod Jesus nigin od karĩ yen, ere nigin, Jesus nẽ yana fõ fõ ganan karĩ den. Tunĩ diron, "Jon naan igunẽdiya tamo, ĩ laa bun tamal kel fã yen, anĩ nigin, memelik nẽ total ĩ bun kabĩ yalef."

<sup>15</sup> Tunĩ diron, "ĩ Eliya."

Tunĩ diron, "ĩ profet taka, profet kulu temeleid taka gen."

<sup>16</sup> Anĩ ere, sain Herod od enĩ karĩ ye fen, ĩ iron, "Jon, tamo anĩ ayam ula gudũ afen, ĩ laa fen anĩ kel fã yen!"

† Anĩ nẽ gariya, Ten Taun.

<sup>17</sup> Ere nigin, kulu Herod ï irõ di, Jon dale difo ken, kalabus bun dinenen. Are Herod yogo tura Filip nẽ kayau Herodias yalen nigin, <sup>18</sup> Jon Herod irokenẽdig, "Õ turã nẽ kayau son won, are lo ufodulen." <sup>19</sup> Herodias Jon nigin name sane fen, ï dukesiyouf nigin wau iron. Anĩ ere, ï kisi feleya sã, <sup>20</sup> ere nigin, Herod Jon kumĩ fiye ken, ï, Jon anĩ madur fateul tamo ye fen, kulatun fedig. Sain Herod ï Jon nẽ od karĩ yedig, ï wau togudig, anĩ ere, ï in od karĩya nigin orodig.

<sup>21</sup> Dum sain biya wõ yen, Herod ï sina gõ fen anĩ nẽ naa bun, in kabĩ tamo odudug, in kusĩ mudur adodo, Galili teneub bun uyu iroya tamo anidi nigin tar inon. <sup>22</sup> Sain anĩ bun, Herodias nẽ barai isi, seg kui ye fen, dole di, Herod in tamo tar geid waud al fen.

Anĩ nigin, king kayau momoul irokenen, "Ereb taka nigin waũ iro ken, to wiyauf, are õ afonõf." <sup>23</sup> Age ye fen, ï wau adok kuturol fen, kayau momoul irokenen, "Ereb taka nigin õ to wiyauf, aya neu tano anĩ fara af, uru afe fen, sitakã ifonõya kisin anĩ afonõf."

<sup>24</sup> Kayau momoul ile, sina irokenen, "Ere bagai nigin aya to afiyẽf?"

Sina iron, "Jon naan igunẽdiya tamo nẽ mudur nigin."

<sup>25</sup> ï kaisã bagai ile, king irokenen, "Aya gama bagai Jon naan igunẽdiya tamo nẽ mudur, beĩ bun uno wanauf anĩ orouf."

<sup>26</sup> King ï wau togun bagai, anĩ ere, in wau kuturol fen, tamo kayau meleid bun mogo iron nigin, ï kayau nẽ od yaleleya itoron. <sup>27</sup> Anĩ nigin, king kaisã bagai ula gudũ fedig kabĩ tamo, Jon nẽ mudur yale irou isiyouf nigin sur fiyen. Age fe di, ï ilen, kalabus bun Jon ula gudũf fen, <sup>28</sup> mudur anĩ beĩ bun ino irou isin, kayau momoul ifenẽ di, ï bam yale, sina ifenen. <sup>29</sup> Jon nẽ dõ fiya tar anĩ karĩ de fen, disin, in bouwa dale, matmat bun mũ di-fen.

### Jesus Faif Tausen Tamo Saaf Ifenẽdin

(Matyu 14:13-21; Luk 9:10-17; Jon 6:1-14)

<sup>30</sup> Aposel idi Jesus wagen guru de fen, idi ereb age di-fen ado difelnẽdin anĩ adok, wogõ difiyen. <sup>31</sup> Age de mog, tamo kayau musei dilef disif difen, anĩ bunem, idi saaf yõya kisin san. Anĩ nigin, Jesus idi irokenẽdin, "Ã aug dogol usig, aya geid talauf, modoũ taka motikeleyan an si tanouf."

<sup>32</sup> Anĩ nigin, idi dogo dogol waag dale diya, moilin dilen. <sup>33</sup> Anĩ ere, tamo kayau musei lo difeid mog, dilen nigin, idi nigin kelei ken, taun ganan bun temeleid idi yedim gududu de dile, idi ket an wowã den. <sup>34</sup> Sain Jesus wõ ye fen, mala iran, tamo kayau musei iledin, ï idi nigin wau yun, ere nigin, idi sipsip marau sã gen. Anĩ nigin, ï ereb ereb musei idi ifelnẽdin.

<sup>35</sup> Sain anĩ bun, gaa mogo kuru kelen, anĩ nigin, in dõ fiya tar ï garan disi diron, "Eĩ gerere tuan, sain mogo sa kelel. <sup>36</sup> Tamo kayau susur wodi di, dilauf, ago di, idi fonõ kalilĩ fiya fonõ fonõ dile fen, dogo yõya nigin saaf na gei difouf."

<sup>37</sup> Anĩ ere, ï aitedin yale iron, "Idi dãf nigin ereb ãgem wenẽdigouf."

Idi ï dirokenen, "Tamo kayau musei nigin, saaf na yaleya moni odug biya. Ada tele, bret bun moni odug age fiya tara ken, tafenẽdi di, dãf de?"

<sup>38</sup> Jesus idi irokenẽdin, "Bret ganĩ ã ado? Uleg ulogouf."

Idi kelei ken, Jesus dirokenen, "Bret faif, gau uru ado."

<sup>39</sup> Age de di, Jesus, tamo kayau ganan, mala fire fire, fisir biya bun dibodadãf nigin, in dõ fiya tar irokenẽdin. <sup>40</sup> Anĩ nigin, idi mala bun dibodadan, tunĩ wan hundred, wan hundred, tunĩ fifti, fifti. <sup>41</sup> Jesus bret faif gau uru ado yale, saa ilun itad fen, ï Negur de fiye ken, bret mumã fen. Agef fen, ï in dõ fiya tar ifenẽdin, tamo kayau wagedin dinodiyouf nigin. ï gau urug agef tamo kayau atun foif ifenẽdin. <sup>42</sup> Idi ganan don kisi felen.

<sup>43</sup> In dõ fiya tar, tamo kayau bret gau ado dokon, tunĩ ditoraran anĩ fito difen, karam tuwelf isokosen. <sup>44</sup> Faif tausent tamo anidim bret don.

### Jesus Naan Teteatu Iyon

(Matyu 14:22-33; Jon 6:15-21)

<sup>45</sup> Kaisã bagai, Jesus, in dõ fiya tar waag bun, idi ketem Betsaida dilauf nigin, sur fedin. Agef fen, ï tamo kayaug irudin. <sup>46</sup> Jesus idi itorneid fen, Negur kosẽ fiyẽf nigin arein iselen.

<sup>47</sup> Aragau mog, waag daliyou atun ifaren, anĩ ere, Jesus ï yogo mugu teneub bun. <sup>48</sup> Jesus in dõ fiya tar total bagai ful dife mog, iledin, ere nigin, yau odug biya wewu fedin. Maur oboi wele ye mog, Jesus daliyou teteatu idi gedin iyok ilen. ï wal fediyou fenẽ age fen. <sup>49</sup> Anĩ ere, sain in dõ fiya tar meleid diran, Jesus daliyou teteatu iyõ mog, dile mã, idi kisi baraũ de fen, idi ui guri den, <sup>50</sup> ere nigin, idi ganan ï dile fen, kumĩ terẽ den.

Kaisã bagai, Jesus idi irokenẽdin, "Total unog! Are ayam. To kumĩ wog." <sup>51</sup> Age ye fen, ï idi gediyouf nigin waag bun sõ ye di, yau kee relen. Idi oditekei terẽ den, <sup>52</sup> ere nigin, idi bret bun waud to fokõ yen, idi neid waud katĩ felen.

### Jesus Genesaret Oun Dagi Adodo El Fedin

(Matyu 14:34-36)

<sup>53</sup> Idi sitakã dibabal dale, Genesaret teneub bun wõ de fen, an waag difokel difaren. <sup>54</sup> Idi waag bunem kututũ deis mog, tamo kayau enei Jesus yeya idi kelein. <sup>55</sup> Idi Jesus an ibodok yeya karĩ def are, idi fonõ anĩ kalilĩ fiya adok gududu de fen, dagi tamo gabgab ado guri difedi di, disin. <sup>56</sup> Sain ganan, modoũ fire fire bun, Jesus ilen, fonõ fonõ, taun tunĩ, taun dumeitur, tamo kayau idi maket modoũ bun dagi tamo dinenẽdin. Idi yogon gabar iri kobũ difouf nigin Jesus nonĩ difiyen. Ganan idi ï kobũ difen, dagi fara feledin.

### Amuyẽ Sã Amuyẽ Ado

(Matyu 15:1-20)

**7** Farisia tamo, lo ifelnẽdiya tamo tunĩ geid, Jerusalem temeleid disi guru de fen, Jesus salili difiyen. <sup>2</sup> Idi lo difeid mog, in dõ fiya tar tunĩ amuyẽ ado imeid

kulo fiya sã saaf don. <sup>3</sup> (Farisia tamo ado Juda tamo kayau ganan, saaf kaisã to dödig. Idi imeid ket kulo difel fen, saaf dãf, ere nigin, idi mudur adodo biyeid neid tobonunã dö difedig. <sup>4</sup> Idi maket bun tamal ke douf, idi saaf kaisã to dãf, idi imeid kulo de fen bagai. Idi tobonunã musei tunig dö difedig, kap, darum, ketel kulo fiya age fiya.)

<sup>5</sup> Anĩ nigin, Farisia tamo, lo ifelnēdiya tamo geid, Jesus to difiyen, “Ere nigin on dö fiya tar, mudur adodo biyeid neid tobonunã to dö de fen, amuyē ado imeid kulo fiya sã saaf dödig?”

<sup>6</sup> Jesus idi irokenēdin, “Asaia ĩ, ã mala yaleya tamo nigin wogō yen, in od tutuk, are eig ye itoton:

“Tamo kayau enidi neid sigoredim aya selu kulō difedig,

anĩ ere, idi waud aya nigin gerō ifaref.

<sup>7</sup> Idi aya yanau dalesedig, are ege.

Idi tamo nē lo dogol anĩ difelnēdidig.’ † †

<sup>8</sup> Jesus idi irokenēdin, “Ā Negur nē ĩtãfiya utorōg fen, tamo nē tobonunã anĩ urougef.”

<sup>9</sup> Age ye fen, ĩ idi irokenēdin, “Ā augeneĩ tobonunã dö fiya nigin ge fen, ã Negur nē ĩtãfiya anĩ weleĩ sirin inoya keleĩ bagai! <sup>10</sup> Ere nigin, Moses iron, ‘Ō sinã tamã yeneid wales,’ †† ‘Aibem taka sina tama ado yeneid sane inouf, ĩ laa bun dineyēf.’ <sup>11</sup> Anĩ ere, ã urōgedig, tamo taka sina tama ado nigin irōf, ‘Ereb taka ã isenneĩya nigin ayam ifeneĩya, anĩ Koban’ (anĩ nē gariya, ‘ayam Negur afenem’), <sup>12</sup> anĩ bunem, ã ĩ sina tama baban isennēdiya nigin katũ wiyēgedig. <sup>13</sup> Anĩ nigin, tubuĩ tar neid tobonunã anĩ waleg uroug fen, Negur nē od tadũ gedig. Agog fen, ã tobonunã fire fire musei ago gedig.”

<sup>14</sup> Jesus baban tamo kayau iweignēdi di, wagen disi di, iron, “Ā adok aya karĩ wiyag, enei keleĩ youf. <sup>15</sup> Safina serē tamal tamo namen isilef anim, tamo amuyē to ifenēdig, anĩ ere, ereb taka tamo namenem wō yef anim, ĩ amuyē ifenēdig.” ††

<sup>17</sup> Jesus tamo kayau itorneĩd fen, fō bun ile di, in dö fiya tar, yaab od enĩ nigin ĩ to difiyen. <sup>18</sup> Jesus idi irokenēdin, “Āg fatuk nene gef de? Ereb taka serē tamal tamo namen isiledig anim, amuyē to ifenēdig anĩ, ã to ulegedig de? <sup>19</sup> Ere nigin, safina are tamo wau bun to iledig, anĩ ere, te namen isiledig, anenem bou döf isil, ulō yesidig.” (Age ye iron anĩ bunem, Jesus kurō feis, saaf ganan amuyē sã yen.)

<sup>20</sup> ĩ od tobol fe fen, iron, “Ereb tamo namenem ulō yesef anim, ĩ amuyē ifenēdig. <sup>21</sup> Ere nigin, tamo waud bunem kisi sesen wō yef, noli tobonunã, bē, tamo yukesiya, seseirã inoya, <sup>22</sup> neu mugu yeya, tobonunã sesen, idegēya, noli kisi, kiyeĩ, ne tã bou yūya, aya aya yeya, neneya tobonunã. <sup>23</sup> Tobonunã sesen enei ganan, tamo namen tamal ulō yesef anim, tamo amuyē ifenēdig.”

### Sirofonisia Kayau Taka Nē Momoiya

(Matyu 15:21-28)

<sup>24</sup> Jesus fonō anĩ itor ken, Taia †† teneub bun ilen. ĩ fō taka aaben ile fen, taka nem ĩ an ibodok yeya to keleĩ youf nigin wau iron. Anĩ ere, ĩ iminkel ibodōya nigin kisi feleya sã. <sup>25</sup> Agef mog, kayau taka Jesus nigin od karĩ yen, ĩ, ne barai kaa sanem irounen anĩ isi fen, Jesus ye gariyan kubũ yen. <sup>26</sup> Kayau anĩ ĩ Grik ††† kayau, ĩ Siria nediwon Fonia an sina gō fen. ĩ, kaa sane, ne barai bun tamal iruwauf nigin Jesus nonĩ fiyen.

<sup>27</sup> Jesus kayau irokenen, “Kesu nanaal idi ereb orodif anĩ, idi ket dãf, ere nigin, kesu nanaal neid bret yale, gaũ irarakenēdiya, are to biya.”

<sup>28</sup> Kayau anĩ solof iron, “Odug, are momoi, anĩ ere, gaũ idig, tebol farumen kesu nanaal neid saaf momout kuku re di, dödig.”

<sup>29</sup> Age ye di, Jesus kayau irokenen, “Ago solo urok nigin, ō ule, kaa sane, nē barai mogo itornem.”

<sup>30</sup> Age ye di, kayau fō bun ilen, kaa sane, ne barai itornen anĩ, fatarē yen mog, ilen.

### Jesus Tamo Taka Weder Sigor Ado Ifofakeleya El Fiyen

<sup>31</sup> Jesus Taia teneub itor ken, Saidon teneub atu ilen, Dekapolis ††† teneub bun wō ye fen, Galili maaĩwō isilen. <sup>32</sup> An tamo kayau, tamo taka weder daabu leya tutuk wogōya kisi feleya sã anĩ, Jesus wagen dirou disin. Idi tamo anĩ bun, ima teten inouf nigin Jesus nonĩ difiyen.

<sup>33</sup> Jesus, ĩ tamo kayau atun yale, firen irou ile fen, in ima gege, tamo anĩ nē weder kur inodin. Agef fen, Jesus salina ira ken, tamo anĩ nē bale kobũ fen. <sup>34</sup> Jesus saa ilun itad fen, si odug yale fen, ĩ irokenen, “Efata!” (anĩ nē gariya, “Fokō weid!”). <sup>35</sup> Kaisã bagai, tamo nē weder fokō yedin, in bale karika le di, ĩ od atata fel wogō yen.

<sup>36</sup> Jesus, taka irokenēya nigin idi katũ fiyēdin. ĩ baba baban irokenēdin, anĩ ere, musei wogō def dilen. <sup>37</sup> Tamo kayau idi odug biya terē de fen, idi diron, “ĩ ereb ereb ganan biya dogol age fen. ĩ age fe di, weder daabuya karĩ yef, sigor ifokeleya wogō yef.”

### Jesus Fo Tausen Tamo Saaf Ifenēdin

(Matyu 15:32-39)

**8** Sain anĩ bun, baban tamo kayau musei guru di fen. Idi ereb taka yōya nigin san, anĩ nigin, Jesus in dö fiya tar ĩ garan iweig laisi fen, irokenēdin, <sup>2</sup> “Aya tamo kayau enidi waud inaf, idi mogo aya geid, naa towo ereb taka yōya sã. <sup>3</sup> Aya idi naũ ado fonō susur afouf are, idi luwen kuku douf, ere nigin, idi tunĩ egerō temeideid disin.”

<sup>4</sup> In dö fiya tar aiten dale, Jesus dirokenen, “Gerere tuan eig fiya, taka nem bret kisi feleya nain yale fen, idi ifenēdiyof?”

<sup>5</sup> Jesus to fedin, “Bret ganĩ ã ado?”

† Asaia 29:13 †† Eksodas 20:12; Diuteronomi 5:16 ‡ Eksodas 21:17; Levitikas 20:9 †† Itotoya tunĩ eig de ditoton: ifenēdig. 16 \* Taka ĩ karĩya nigin weder ado, ĩ karĩ youf.

†† Taia are taun taka. ††† Grik, idi ibor fire, Juda sã. ††† Anĩ nē gariya, Ten Taun.

Idi diron, "Sewen dogol."

<sup>6</sup>Jesus tamo kayau tenebur dibodadāf nigin irokenēdin. Agef fen, Jesus bret sewen geif iroun, ĩ Negur de fiye ken, bret anī mumā feid fen, tamo kayau wagedin dinouf nigin, in dō fiya tar ifenēdi di, idi age difen. <sup>7</sup>Idi gau nanaaleg teke tekelei adon. ĩ gau anidi nigineg Negur de fiye ken, idi gadō difediyouf nigin in dō fiya tar irokenēdin. <sup>8</sup>Tamo kayau don kisi felen. Dum in dō fiya tar, tamo kayau bret dokon, tunī ditoraran anī fito difen, karam sewen isokosen. <sup>9</sup>Tamo fo tausen age fiya an difaren. Anī Jesus idi, nedi fonō fonō sur fedid di, ke de dilen. <sup>10</sup>Agef fen, Jesus in dō fiya tar geid, waag bun sosō de fen, Dalmanuta distrik dilen.

### Farisia Tamo Saa Ilun Nē Uris Nigin To Difen

(Matyu 16:1-4)

<sup>11</sup>Farisia tamo disī, Jesus kisi difiye ken, saa ilun nē uris dilouf nigin to difiyen. <sup>12</sup>Ĭ si odug yale fen, iron, "Ere nigin tamo kayau sain enī bun difaref eneidi, uris nigin aya to difiyaf? Aya ā momoi arokeneik, uris taka idi to dalouf." <sup>13</sup>Age ye fen, ĩ idi itorneīd, waag bun kel sō ye, maaī sitakā ibal ilen.

### Farisia Tamo Geid Herod Geneid Yis

(Matyu 16:5-12)

<sup>14</sup>In dō fiya tar bret taka to dalen, wedereid tu kelen. Bret tekelei dogol waag bun idi adon. <sup>15</sup>Jesus idi wedereid iroun, "Ā, Farisia tamo geid Herod geneid yis nigin lo welegei."

<sup>16</sup>In dō fiya tar idi dogo dogol katō de fen, diron, "Ada bret sã nigin age yel."

<sup>17</sup>Idi neid wogōya Jesus kelei ken, idi to fedin, "Ere nigin ā bret to urougel nigin wogō gef? Ā fau ileya sã, wedereī fokōya sã de? Āgenei wauī total bagai lef de? <sup>18</sup>Ā meleī ado, anī ere, ā to ulegedig de? Ā wedereī ado, anī ere, ā to karī gedig de? Ā to karī welegef de? <sup>19</sup>Sain aya bret faif, faif tausen tamo nigin mumā afen, ā karam ganī bun, bret tunī kuru ge di, isokosen?"

Idi aiten dalen, "Karam tuwelf."

<sup>20</sup>"Sain aya bret sewen, fo tausen tamo nigin mumā afen, ā karam ganī bun, bret tunī kuru ge di, isokosen?"

Idi aiten dalen, "Karam sewen."

<sup>21</sup>Jesus idi irokenēdin, "Ā fau to kisi fokō yef de?"

### Tamo Taka Mala Ifofakeleya Oun Betsaida El Fiyen

<sup>22</sup>Idi Betsaida disin. An tamo kayau tunī, tamo taka mala ifofakeleya diroule fen, Jesus imam kobū fiyēf nigin nonī difiyen. <sup>23</sup>Jesus, tamo mala ifofakeleya ima yale, sibof, fonō dumeitur dilen. Agef fen, ĩ tamo mala bun salina ira ken, ima tamo mala bun ino fen, to fiyen, "Ere tau ulef?"

<sup>24</sup>Ĭ mala fara fel fen, iron, "Aya tamo kayau ailedif, idi aa gegen diyokesif."

<sup>25</sup>Jesus baban in ima, tamo mala bun inon. Age fe di, tamo mala fara fele di, tutuk kelē yelen. Ereb ereb ga-

nan ĩ yaor iledin. <sup>26</sup>Jesus tamo anī in fō bun sur fiye ken, irokenen, "Fonō atu to ulauf."

### Pita Kristus Nigin Kurō Fesin

(Matyu 16:13-20; Luk 9:18-21)

<sup>27</sup>Jesus in dō fiya tar geid, Sisaria Filipai nediwon fonō fonō diyok dilen. Naabur ĩ to fedin, "Tamo kayau idi, aya nigin ai dedig?"

<sup>28</sup>Idi diron, "Tunī dirok, Jon naan igunēdiya tamo; tunī dirok, Eliya; tunī dirok, profet anidi taka."

<sup>29</sup>Jesus to fedin, "Ba ā uleg? Aya nigin ā ai gef?"

Pita aiten yale iron, "Ō anī Kristus."

<sup>30</sup>Age ye di, Jesus ĩ nigin taka to dirokenēf nigin, idi wedereid iroun.

### Jesus In Laa Nigin Iron

(Matyu 16:21-28; Luk 9:22-27)

<sup>31</sup>Age ye fen, Jesus gariya ino, idi ifelneīd fen, irokenēdin, Tamo Naal ĩ, darau musei yale fen, mudur adodo, pris odudug, lo ifelnēdiya tamo idim dudum difiyēf. Age de fen, ĩ dukesi di, naa towo bure fele di, kel fã youf. <sup>32</sup>Jesus od anī kurō fesi di, Pita Jesus yale, yerin irou ile, ou fiyen.

<sup>33</sup>Age fe di, Jesus falei yel, in dō fiya tar lo feid fen, ĩ Pita ou fiyen. ĩ iron, "Satan! Dumeun ule. On kisi are Negur nē sã, on kisi tamo nē dogol."

<sup>34</sup>Age ye fen, Jesus, tamo kayau in dō fiya tar geid iweigneīd fen, irokenēdin, "Aib taka aya dō fiyau fenē, ĩ yogon oroya lai fesil fen, yogon aa tetek faali fe, aya dō fiyauf. <sup>35</sup>Ere nigin, aib taka yogon bouwa buru mata ibodōf nigin oro fef, are fō yalouf, anī ere, aib taka yogon mata bouwa buru, aya nigin ado biya od nigin ye fen, irailauf, are kel yalouf. <sup>36</sup>Tamo taka ĩ, teneub enī ganan kakarai fe, akorou ye fen, in malakanon irailauf, ere biya ĩ yalouf? <sup>37</sup>Takag, tamo taka, yogon malakanon nigin ere mala solof fen, ĩ kel yalouf? <sup>38</sup>Aib taka, seseirã inoya, † mosor inoya nē tamo kayau eneid bun, aya nigin ado neu od nigin mama fouf are, sain Tamo Naal in engel fateul geid, Tama nē fula fiya medēiya ado disiyouf bun, ĩg ĩ nigin mama fouf."

**9** Age ye fen, ĩ idi irokenēdin, "Aya ā momoi arokeneik, tunī ein difaref, fau to gare de mog, idi Negur nē tano †† megeir ado isi mog, dilouf."

### Jesus Bouwa Falei Felen

(Matyu 17:1-13; Luk 9:28-36)

<sup>2</sup>Naa sigis bure fele di, Jesus, Pita, Jems, Jon anidi geif fen, idi mugu arei odug ilun diselen. An Jesus idi meleid bun bouwa falei felen. <sup>3</sup>In kolos lalau medēiya bagai, lalau anī tenebur ein taka nem kulo fe di, agef filiya kisi feleya sã. <sup>4</sup>Agef mog, an idi meleid bun, Moses Eliya ado wowã de fen, Jesus weim wogō den.

<sup>5</sup>Pita Jesus irokenen, "Rabi, ‡ ada ein ibodōya nigin biya bagai. Ada salafat towo tanouf, taka ogon, taka

† Seseirã inoya, anī nē gariya ein, Negur fotokar waitou fire fire nigin momoiya. †† Negur nē tano an, Negur yogo ereb ereb ganan lo fef. ‡ Rabi, anī nē gariya, Juda neid tise.

Moses nē, taka Eliya nē.”<sup>6</sup> (Ī wogōya tata fen, ere nigin, idi fatuk bagai kumī den.)

<sup>7</sup> Agef mog, lalo isi, idi kerub feid fen, ait taka lalo bunem wō yen, “Eī neu Kesu, ĩ nigin aya wau laa fedig. Ī karī wiyēg!”

<sup>8</sup> Kaisā bagai, idi fai den, aib taka to weim difar mog, dilen, Jesus dogol.

<sup>9</sup> Idi arei nem diyok disi fen, Jesus ereb idi dilen anī, Tamo Naal laa bun tamal faūyā sā mog, taka to dirokenēf nigin, idi katū fedin. <sup>10</sup> Idi od anī dogo bun dogol ibod ken, ‘laa bun tamal kel fāya’ anī nē gariya nigin katō difen.

<sup>11</sup> Age de fen, idi Jesus to difiyen, “Ere nigin lo ifelnēdiya tamo, ‘Eliya ĩ ket uyu isi di, Mesia isiyouf,’ dedig?”

<sup>12</sup> Jesus aitedin yalen, “Momoi bagai, Eliya ket uyu isi fen, ereb ereb ganan madur fedif. Anī ere, ere nigin Tamo Naal ĩ darau musei yale fen, dudum difiyēf anī, Negur nē Itotoya bun ibodok? <sup>13</sup> Anī ere, aya ā aroke-neik, Eliya mogo isin, ĩ nigin Negur nē Itotoya bun yenek gen, ereb ereb ganan idi waud iron, ĩ nigin mogo age difen.”

### Jesus Kesu Kaa Sane Ado El Fiyen

(Matyu 17:14-21; Luk 9:37-43)

<sup>14</sup> Sain idi, in dō fiya tar tunī ganan geredin disi fen, tamo kayau musei, idi salili difiyeīd fen, lo ifelnēdiya tamo geid, od nem abob fe fe de mog, diledin. <sup>15</sup> Kaisā bagai, tamo kayau ganan Jesus isi mog, dile fen, idi fatuk bagai terē den, aan difiyēf nigin gududu de dilen.

<sup>16</sup> Jesus idi to fiyēdin, “Ā ere nigin idi geid, od nem abob fe fe gef?”

<sup>17</sup> Guru fiya atun, tamo takam aiten yale iron, “Tise, aya neu kesu, ō gein arou asil, ĩ kaa sanem irou di, ait ifokelen. <sup>18</sup> Sain ganan kaa sanem irouf, ĩ yū irā di, tenebur kubū ye, sali mokuf, gobora kikokō ye fen, bouwa teregein yedig. Aya on dō fiya tar kaa sane diruwauf nigin to afedin, anī ere, idi kisi feleya sā.”

<sup>19</sup> Jesus solof iron, “Tamo kayau eneidi momoiya sā, sain ganī aya ā geid tabodōf? Sain ganī aya ā nigin wau aukesilauf? Kesu wageun urousig.”

<sup>20</sup> Age ye di, idi kesu anī, ĩ garan dirou disi di, kaa sane Jesus ile fen, kaisā bagai kesu yū iran. Kesu ĩ tenebur kubū ye, wele yef, yen ken, awa bun sali moku fen.

<sup>21</sup> Jesus kesu nē tama to fiyen, “Sain ganī ĩ eig fiya ibodon?”

Ī aiten yale iron, “Ī kesu naalun gariya inon. <sup>22</sup> Sain musei, ĩ yukesiyou fenē nigin yā bun ado naanū irādig. Anī ere, ō ereb taka age fiya nigin kisi feleyauf are, amā nigin waū ino ken, usennamā.”

<sup>23</sup> Jesus ĩ irokenen, “Ō kisi feleyauf, wof de? Taka ĩ momoi youf, ereb ereb ganan age fiya nigin kisi feleya.”

<sup>24</sup> Kaisā bagai, kesu nē tama iweig iron, “Aya momoi auf, neu momoiya naal nigin usenna!”

<sup>25</sup> Age ye di, tamo kayau gududu de disi mog, anī Jesus ileid fen, ĩ kaa sane ou fiyen. Ī iron, “Ō daabuya ait ifokeleya kaa, aya ō arokonok, ĩ bun tamal ulō weis fen, baban ĩ namen to kel ulauf.”

<sup>26</sup> Kaa anī ui ye fen, kesu yū irā di, fatuk bagai tererē ye mog, ulō yeis ilen. Lo difen, kesu laa gen yenē di, musei diron, “Ī laa fel.” <sup>27</sup> Anī ere, Jesus kesu anī ima irou fen, yalesnē di, ĩ ifaren.

<sup>28</sup> Jesus ĩ aaben ile ibod mog, in dō fiya tar mugun ĩ to difiyen, “Ere nigin amā kaa sane iruya nigin kisi feleya san?”

<sup>29</sup> Age de di, ĩ irokenēdin, “Eig fiya are, Negur kosē fiyēya † bunem dogol iyawauf.”

### Jesus Baban In Laa Nigin Iron

(Matyu 17:22, 23; Luk 9:43-45)

<sup>30</sup> Idi modoū anī ditor ken, Galili distrik atu diyok dilen. Taka nem idi an yeya karīya nigin, Jesus to oron, <sup>31</sup> ere nigin, ĩ in dō fiya tar ifelnēdin. Ī idi irokenēdin, “Tamo Naal ĩ, fau kiwai tamo imeid bun dinouf. Idi fau ĩ dukesiyouf, naa towo bure fele di, ĩ fau kel fā youf.” <sup>32</sup> Anī ere, idi od enī nē gariya nene de fen, ĩ to fiya nigin kumī den.

### Ai Anī Odug Bagai?

(Matyu 18:1-5; Luk 9:46-48)

<sup>33</sup> Idi Kapenaum taun disin. Jesus fō bun ibod ken, ĩ idi to fedin, “Ā naabur ere luwa urougel?” <sup>34</sup> Anī ere, idi foro firi delen, ere nigin, naab luwen, aim anī idi atun odug bagai ibodok nigin luwa diroun.

<sup>35</sup> Jesus ibod ken, in dō fiya tar tuwelf iweig laisi fen, iron, “Taka ĩ uyu ifarau fenēf, ĩ gai dumen bagai youf. Agef fen, ĩ ganan neid kabī tamouf.”

<sup>36</sup> Ī kesu naal taka yale iroule, idi atun ifarnen. Ī imam yale koboi fiye ken, ĩ idi irokenēdin, <sup>37</sup> “Aib taka aya yanau bunem, kesu naal eig fiya taka yalef are, ĩ aya yaleyaf. Aib taka ĩ aya yaleyaf are, ĩ aya dogol to yaleyaf, ĩ aya sur fiyan anīg yalef.”

### Taka Ī Ada Nigin Kiwai To Inof, Are Neda

(Luk 9:49, 50)

<sup>38</sup> Jon iron, “Tise, tamo taka, ō yanā nem kaa sesen iruid mog, amā mailen. Anī nigin, amā ĩ katū mafiyen, ere nigin, ĩ neda takam sā.”

<sup>39</sup> Anī ere, Jesus iron, “To katū wiyēg, taka ĩ neu yanau nem memelik inof are, ĩ kaisā bagai aya nigin sane irōya kisi feleya sā, <sup>40</sup> ere nigin, taka ĩ ada nigin kiwai to inof, are neda. <sup>41</sup> Aya ā momoi arokeneik, taka ĩ, aya yanau nem, ā Kristus nē nigin ye fen, kap naan ado ifeneīf are, ĩ in mala solo momoi bagai yalouf.

### Mosor Bun Ineyēf

(Matyu 18:6-9; Luk 17:1, 2)

<sup>42</sup> “Aibem taka age fe di, kesu aya nigin momoi def enidi taka, mosor bun ineyēf are, tamo anī meein odug guyutu bun ifo ken, maaīwō irāyam, are dem.

<sup>43</sup> Ogon imam mosor bun ineyōf, gudū wol. Ō imā to-bega ado, mata bun ileyā nigin biya bagai, ere nigin, ima totoū adouf are, hel bun an yā faimud ibodkeleyan uleya nigin. †<sup>45</sup> Age fiya gen, ogon yē anim, mosor

† Itotoya tunī eig de ditoton: kosē fiyēya ado kuriya.



bun ineyōf, gudū wol. Ō yē tobega ado mata bun ileya nigin biya bagai, ere nigin, yē totoū adouf are, hel bun dirāyōf. <sup>†47</sup> Takag, ogon malā anim, mosor bun ineyōf, ubodol uraile. Ō malā tekelei ado Negur nē tano bun ileya nigin biya bagai, ere nigin, malā totoū adouf are, hel bun dirāyōf, <sup>48</sup> an

“idi neid mamat to gare dedig,  
yāg to gare feledig.” <sup>††</sup>

<sup>49</sup> Tamo ganan, yā tetedin sol gen tu difouf.

<sup>50</sup> “Sol ī biya, anī ere, in kai sa kalauf, naig wo di, baban kai youf? Ā aug bun sol adouf, agog fen, abob nigin wau inosiya bun ubodōgouf.”

### Tamo Kayau Ado Bagu Fiya Anī Fara Fiya

(Matyu 19:1-12; Luk 16:18)

**10** Jesus modoū anī itor ken, Judia distrik nē akor anī atu ile, Jordan naan sitakā ilen. Baban tamo kayau mala odug ī wagen disi di, ī gai age fedig gen, od ifelnēdin.

<sup>2</sup> Farisia tamo tunī disi, kisi difiye ken, to difiyen, “Tamo taka yogon kayau iruf anī, are lo dō fiya de?”

<sup>3</sup> Ī aitedin yale iron, “Moses, anī nigin ere od wogō yein?”

<sup>4</sup> Idi diron, “Moses yo yen, are tamo bagu fiya anī fara fiya pepa itot fen, kayau od sā iru di, ilauf, yen.”

<sup>5</sup> Jesus idi irokenēdin, “Moses lo anī itotkenein, ere nigin, āgenei wauī total bagai agef yeneīd. <sup>6</sup> Anī ere, gariya bun Negur erēb erēb ino fen, ‘tamo ino, kayau ino fen.’ <sup>†7</sup> Age fiya nigin, tamo ī in sina tama itorneīd fen, in kayau ado bagu difouf, <sup>8</sup> age fe di, idi uruwom bouweid tekelei youf.’ <sup>††</sup> Age dife di, idi uru sā, idi tekelei. <sup>9</sup> Anī nigin, erēb Negur bagu fedin anī, tamom to fara fouf.”

<sup>10</sup> Sain idi baban fō bun dibod ken, in dō fiya tar od enī nigin Jesus to difiyen. <sup>11</sup> Jesus idi irokenēdin, “Aib taka in kayau iru fen, kayau taka yalouf, ī kayau tubu morō ifen ken, seseirā inouf. <sup>12</sup> Age fiya bagai, kayau taka in aiwa itorne ken, tamo taka yalouf are, ī seseirā inouf.”

### Kesu Nanaal Jesus Geid

(Matyu 19:13-15; Luk 18:15-17)

<sup>13</sup> Tamo kayau, kesu nanaal Jesus wagen kobū fediyouf nigin guri difeid disin, anī ere, in dō fiya tar, idi ou difiyēdin. <sup>14</sup> Jesus anī ile fen, wau sanen. Ī idi irokenēdin, “Utornēdig len, kesu nanaal aya wageun disiyouf, idi to katū wedig, ere nigin, Negur nē tano are eig fediya neid. <sup>15</sup> Aya ā momoi arokeneik, aib taka ī, Negur nē tano kesu naal age fiya gen to yalouf are, ī namen to bagai ilauf.” <sup>16</sup> Age ye fen, ī kesu nanaal koboi feid fen, in ima tetedin ino fen, el fiya ifenēdin.

### Tamo Gaū Safina Musei Ado

(Matyu 19:16-30; Luk 18:18-30)

<sup>17</sup> Jesus mogo naab iyok ile mog, tamo taka ī garan gudu ref isel, wagen kubū ye, ibor bobou fe fen, ī to fiyen, “Tise biya, aya ere naig afouf anī, mata faimud ibodkeleya alouf?”

<sup>18</sup> Jesus ī irokenen, “Ere nigin ō aya anī biya wiyaf? Aibem taka biya sā, Negur yogo dogol. <sup>19</sup> Ō itāfiya keleī: ‘Ō tamo taka to ukseyouf, ō to seseirā unouf, ō to bē walouf, ō taka nigin idegēya od to urōf, ō idegēya bunem safina to walouf, sinā tamā sigoreid dō wouf.’ <sup>††</sup>”

<sup>20</sup> Ī Jesus irokenen, “Tise, enei ganan, aya kesu naalun dō afef asin.”

<sup>21</sup> Jesus ī lof ile, ī nigin wau laaf fen, iron, “Tekelei anī ō inī sā. Ule, ogon safina ganan na nigin sur wo fen, maleg tamo weneīd, agouf anī, ō saa ilun safina biya adouf. Ago wol fen, usi, aya dō wiya.”

<sup>22</sup> Od anī bunem, nawa kuru kele fen. Ī wau morō ado ilen, ere nigin, ī safina musei ado.

<sup>23</sup> Jesus falei yel fen, in dō fiya tar irokenēdin, “Safina musei ado tamo, Negur nē tano bun ileya nigin gai malai bagai!”

<sup>24</sup> In dō fiya tar, in od anī nigin terē den. Anī ere, Jesus baban iron, “Nau kesu tar, Negur nē tano bun ileya nigin gai malai bagai! <sup>25</sup> Kamel ī gabar iwaya nil ku bun ileya nigin karika bagai, safina musei ado tamo Negur nē tano bun ileya nigin malai bagai.”

<sup>26</sup> Od anī bun, in dō fiya tar fatuk bagai terē de fen, abob toti difen, “Age fiyauf are, aim anī mata ibodkeleya yaleya kisi feleya?”

<sup>27</sup> Jesus idi lo feid fen, iron, “Tamo bun are kisi feleya sā, anī ere, Negur bun kisi feleya. Erēb erēb ganan Negur bun kisi feleya.”

<sup>28</sup> Pita Jesus irokenen, “Amā erēb erēb ganan mator ken, ō dō mayok!”

<sup>29</sup> Jesus solof iron, “Aya ā momoi arokeneik, aib taka fō, tura tar, main tar, sina, tama, gere tar be, kabī, aya nigin ado biya od nigin itoron, <sup>30</sup> ī mala solo wan handred wal fiya, sain enī bun, (fō, tura tar, main tar, sina tar, gere tar, kabī anidi ado morōg) yalouf, ī dumen isiyouf buneg mata faimud ibodkeleya yalouf. <sup>31</sup> Anī ere, musei malabag dibodok, idi dumen dibodōf; musei dumen dibodok, idi malabag dibodōf.”

### Jesus In Laa Nigin Irō, Towo Fen

(Matyu 20:17-19; Luk 18:31-34)

<sup>32</sup> Jesus uyu irou fen, idi Jerusalem naab diselen. Age fe di, in dō fiya tar idi terē de mog, idi dō difedin anī kumī den. Baban Jesus in dō fiya tar tuwelf firen gou feid fen, ī fau bouwa bun ere wō youf anī irokenēdin.

<sup>33</sup> Jesus iron, “Ada Jerusalem teselef, an Tamo Naal ī pris odudug, lo ifelnēdiya tamo imeid bun dinenēf. Idi ī laa fouf nigin bouwa bun od dūf. Age de fen, idi ī haiden Juda sā anidi imeid bun dino di, <sup>34</sup> idi ketē difiyēf, disisnēf, wagī difiye ken, dukseyouf. Naa towo bure fele di, ī kel fā youf.”

†† Itotoya tunī eig de ditoton: nigin, <sup>44</sup> \* an idi neid mamat to gare dedig, yāg to gare feledig. † Itotoya tunī eig de ditoton: dirāyōf, <sup>46</sup> \* an idi neid mamat to gare dedig, yāg to gare feledig.

†† Asaia 66:24 ‡ Genesis 1:27 †† Genesis 2:24

‡‡ Eksodas 20:12-16; Diuteronomi 5:16-20

### Jems Jon Ado Neid To Fiya

(Matyu 20:20-28)

<sup>35</sup> Sebedi gere tar, Jems Jon ado, Jesus wagen disin. Idi diron, "Tise, amã ereb taka nigin to mafe di, ò agouf aní oromak."

<sup>36</sup> Jesus idi irokenēdin, "Ã ere aní, aya age afeneíf nigin oroyeik?"

<sup>37</sup> Idi aiten dale diron, "Ogon fula fiya medeíya bun, amã taka ogon ima biyalē ibodō di, taka ogon ima kilē ibodōf aní oromak."

<sup>38</sup> Jesus idi irokenēdin, "Ã ereb to gef aní nē gariya ã keleí sã, aya naan ãf aní, ã yōya kisi feleya de? Agef mã, naan aya agūf aní, ã igūya kisi feleya de?"

<sup>39</sup> Idi aiten dale diron, "Amã kisi feleya." Age de di, Jesus idi irokenēdin, "Naan aya ãf are, ã wāgauf, naan aya agūf are, ã ugūgouf, <sup>40</sup> aní ere, imau biyalē ibodōya, kilē ibodōya are, ayam ifenēya kisi feleya sã. Modou anidi are, idi nigin saika fen anidi neid."

<sup>41</sup> In dō fiya tar ten od aní karí de fen, Jems Jon ado nigin seye den. <sup>42</sup> Jesus idi iweig laisi fen, iron, "Ã keleí, haiden neid uyu irouya def aní, tamo kayau lo fiya nigin total dinodig, idi dogo neid odudug, idi aruneid dalouf nigin megeir dinodig. <sup>43</sup> Æ bun kisi to agef yenēf, ã atun, aib taka odug ibodōf nigin orof, ã āgenei kabí tamo ibodōf. <sup>44</sup> Aib taka uyun ibodōf nigin orof, ã ganan neid ferfer ouf. <sup>45</sup> Ere nigin, Tamo Naal ãg disenēf nigin to isin, aní ere, ã tamo kayau isenneíd fen, tamo kayau musei idi neid mosor aní fotokar, yogon ma-ta ifenēdiyof nigin isin."

### Bartimeus Mala Ifofakelen Aní Mala Fara Felen

(Matyu 20:29-34; Luk 18:35-43)

<sup>46</sup> Age de fen, idi Jeriko disin. Jesus, in dō fiya tar, tamo kayau mala odug geid, taun aní ditor dile mã, tamo taka mala ifofakeleya, Bartimeus (Timeus naal), ã naab yerin noní yef ibodon. <sup>47</sup> Sain ã Jesus Nasaret tamal yeya aní karí ye fen, ã iweig iron, "Jesus, Dawid Naal, aya nigin malalon yō!"

<sup>48</sup> Age ye di, tamo musei sakã difiye ken, foro yalauf nigin dirokenen, aní ere, ã wade bagai iweig iron, "Dawid Naal, aya nigin malalon yō!"

<sup>49</sup> Jesus dē yel fen, iron, "Uweignēg." Age ye di, idi tamo mala ifofakeleya diweignen, "Waū el fe fen, fã wale! Ì ò iweignok." <sup>50</sup> Age de di, ã yogon gabar sirilē iraile fen, fã yale, Jesus wagen isin.

<sup>51</sup> Jesus ã to fiyen, "Aya ò ere age afonōf ani, ò oroyok?"

Tamo mala ifofakeleya iron, "Rabi, aya kelē au fenē."

<sup>52</sup> Jesus iron, "Ule, ogon momoiya anim el yom." Kaisã bagai, ã kelē yel fen, Jesus dōf, naab dilen.

### Jesus Tamo Yana Ado Gen Jerusalem Namen Ilen

(Matyu 21:1-11; Luk 19:28-40; Jon 12:12-19)

**11** Idi Jerusalem kelē difiye ken, Moul Arei † bun Betfage Betani ado wō den, Jesus in dō fiya tar

† 'Oliv Arei' dedig.

uru sur feid fen, <sup>2</sup> ã idi irokenēdin, "Fonō wageik aní bun uleg, an wōg fen, donki naal difon aní ulougouf, are aibem taka aní bun to iyon. Aní biru weleg fen, ein urou usig. <sup>3</sup> Taka nem to yeíf, 'Ere nigin ã ení ago gef?' youf are, urokenēgouf, 'Odug orof nigin, fau mogo kaisã ein kel sur fouf.'"

<sup>4</sup> Idi dile, donki naal naabur bobog ileyan difokelen ifar mog, fotou difen. Idi biru de mog, <sup>5</sup> tamo tuní an difaren anidim to difedin, "Ã ere naig gouf nigin, donki naal aní biru gef?" <sup>6</sup> Idi Jesus irokenēdin kilei, solo de dirokenēdin. Age de di, tamo ditornēdi di, dilen. <sup>7</sup> Idi donki naal aní Jesus wagen dirousi fen, idi neid gabar teten dirarã di, ã aní teten ibodon. <sup>8</sup> Tamo kayau musei, idi neid gabar naabur du difedin, age de mog, tuní idi kabier aa were aarau ado kokour difedin aní du difedin. <sup>9</sup> Tamo kayau uyu dilen ado dume dō difen, kakaí de diron,

"Hosiana! ††"

"Odug yana bunem isif, are ã el fiyek!" ‡

<sup>10</sup> "Neda tamada Dawid nē tano isif, are el fiyek!"

"Hosiana, ilun bagai!"

<sup>11</sup> Jesus Jerusalem wō ye fen, tempel ilen. Ì ereb ereb ganan kii fedin, aní ere, sain bure felen nigin, ã in dō fiya tar tuwelf geid Betani dilen.

### Jesus Aa Fig Isisnen

(Matyu 21:18, 19)

<sup>12</sup> We fele di, idi Betani ditor dile fen, Jesus naū fen. <sup>13</sup> Ì mala ira kel, aa fig aarau ile fen, ã faat ado be ye mã, ilouf nigin ilen. Ì non ilen, faat taka to ilen, aarau dogol, ere nigin, imaya sain sã. <sup>14</sup> Age fiya ile fen, ã aa irokenen, "Taka nem ò bun faat baban to yãf." Agef irō geid, in dō fiya tar karí den.

### Jesus Tempel Waí Fen

(Matyu 21:12-17; Luk 19:45-48; Jon 2:13-16)

<sup>15</sup> Jerusalem wō de fen, Jesus tempel modoū namen ile, na dale dile disi dife mog, an irudidin. Ì moni solo fediya †† neid tebol ado, kuburir na nigin sur fediya neid bens eleg feledin. <sup>16</sup> Tamo ganan, tempel modoū bun safina na nē iroulediya nigin katū fiyēdin. <sup>17</sup> Agef fen, Jesus ifelneíd iron,

"'Neu fō, teneub ganan nē kosēya fō douf,' ‡  
are Negur nē Itotoya bun to yenek de?"

Aní ere, ã 'bē tamo neid iminēya fō' ††† unogen."

<sup>18</sup> Age ye di, pris odudug, lo ifelnēdiya tamo geid, od ení karí de fen, Jesus dukesiyouf nigin naab dimiren. Idi Jesus kumí difiyen, ere nigin, tamo kayau ganan in ifelnēdin aní nigin terē den.

<sup>19</sup> Aragau di, idi taun aní ditor dilen.

†† Aní nē gariya, 'Usennamã! Od aní tamo kayau Negur yana yaleseya nigin wogō dedig. ‡ Sam 118:25, 26 †† Tempel takis inoya nigin, moni serē tamal ado tempel moni solo difedig. †† Asaia 56:7 ††† Jeremaia 7:11

### Aa Fig Gariri Kelen

(Matyu 21:20-22)

<sup>20</sup> Bonimeidi idi naab diyok dile fen, idi aa fig warei bunem gariri kelen anī dilen. <sup>21</sup> Pita weder fokō yel fen, Jesus irokenen, "Rabi, ulef! Ō aa fig usisin, are gariri kelen!"

<sup>22</sup> Age ye di, Jesus solof irokenēdin, "Negur bun momoi wogei. <sup>23</sup> Aya ā momoi arokeneik, aibem taka arei enī irokenēf, 'Ō kusu urā, maaīwō usil,' age ye fen, ī wau to uru fen, momoi aya orok anī agef wō youf, youf are, agef dō fenēf. <sup>24</sup> Anī nigin, aya ā arokeneik, erab taka nigin ā kosē bun tog fen, mogo malel ge, momoi gouf, are āgenei youf. <sup>25</sup> Sain ā ufareg kosēg fen, ā takan nē sane nigin wauī bun yenēf are, wedereī tu kalauf. Ago ge di, āgenei Temeī saa tanon ibodok, āgenei mosor nigin weder tu kalauf." †

### Jesus Aim Igirnen Anī To Difiyen

(Matyu 21:23-27; Luk 20:1-8)

<sup>27</sup> Idi baban Jerusalem wō den, Jesus tempel fofomalan iyok ile mog, pris odudug, lo ifelnēdiya tamo, mudur adodo geid, ī wagen disin. <sup>28</sup> Idi Jesus to difiyen, "Ere igiriya bunem, ō erab erab enī ago wof? Aim ō enī agouf nigin igirnon?"

<sup>29</sup> Jesus aitedin yale iron, "Aya to fiya tekelei afeneīf. Solog urokanage di, erab igiriya bunem erab erab enī age afef anī, aya ā arokeneīf. <sup>30</sup> Jon naan igunēdin, are saa ilun tamal de, tamo bunem? Urokanag!"

<sup>31</sup> Idi dogo dogol katō de fen, diron, "Ada, 'Saa ilun tamal,' tauf, ī to foug, 'Age fe di, ere nigin, ā ī nigin to momoi gen?' <sup>32</sup> Anī ere, ada, 'Tamo bunem,' tauf..." (Idi tamo kayau kumī difedin, ere nigin, tamo ganan, Jon ī momoi bagai profet den.)

<sup>33</sup> Anī nigin, idi Jesus ait solo de diron, "Amā keleī sā."

Age de di, Jesus iron, "Ayag ā to arokeneīf, erab igiriya bunem aya erab erab enī age afedif."

### Tamo Kabī Lo Difedig Nē Yaab Od

(Matyu 21:33-46; Luk 20:9-19)

**12** Age ye fen, Jesus yaab od nem idi irokenēdin, "Tamo taka wain kabī yalen. Ī kau ifō kalī felen, wain sumin asi fiya nigin ku yalen, kabī lo fiya tamo neid fō inon. Agef fen, ī mala solo yalouf nigin wain kabī, kabī tamo tunī imeid bun ino fen, uyu takā ilen. <sup>2</sup> Fito fiya sain, ī, kabī tamo taka, wain kabī lo fiya tamo gedin, wain biya tunī, idi bun gei foug nigin sur fen. <sup>3</sup> Anī ere, idi ī dale, du ken, sur difiyē di, ima sāsā ilen. <sup>4</sup> Age dife di, ī kabī tamo taka idi gedin sur fen. Idi tamo anī mudur bun du ken, mama difenē di, ilen. <sup>5</sup> Ī baban takag sur fen, areg idi dukesin. Ī musei tunīg sur fedin, age fe di, tunī diden ken, tunī didenkesin.

<sup>6</sup> "Ī gama tekelei dogol sur fiya nigin ibodon, are yogo naal, ī yogon oboi bagai. Ī anī dumen bagai sur fiye ken, iron, 'Idi neu kesu anī karī difiyēf.'

† Itotoya tunī eig de ditoton: kalauf. <sup>26</sup> \*Ā wedereī to tu kalauf are, āgenei Temeī saa tanon ibodok īg, āgenei mosor nigin weder to tu kalauf.

<sup>7</sup> "Anī ere, kabī lo fiya tamo, idi abob dirokenen, 'Eī ī akorouf. Usig, ada ī tau keis fen, akor eī nedauf.' <sup>8</sup> Anī nigin, idi ī dale, dukeis fen, wain kabī dumeitor diran.

<sup>9</sup> "Age dife di, wain kabī marau naig foug? Ī isi, kabī lo fiya tamo idenkeis fen, wain kabī anī tamo tunī ifenēdiyof. <sup>10</sup> Ā Negur nē Itotoya enī to uwesegen de?"

"Meein are fō inoya tamom sane de fen, ditoron, meein anī gama monog tor wō yen,

<sup>11</sup> anī Odug yogo age fe di, malamā yū yalen.' ††"

<sup>12</sup> Age ye di, pris odudug, lo ifelnēdiya tamo, mudur adodo geid, Jesus irounēya nigin naab dimiren, ere nigin, idi kelein, ī idi nigin yaab od wogō yen. Anī ere, idi tamo kayau nigin kumī de fen, idi ī ditornē dilen.

### Sisa Takis Ifenēya

(Matyu 22:15-22; Luk 20:20-26)

<sup>13</sup> Dum idi, Farisia tamo tunī, Herod nē tamo tunī geid, Jesus garan in od bun kū fenē di, dirounēf nigin sur difedin. <sup>14</sup> Idi ī garan disi fen, diron, "Tise, amā keleī, ō momoi wogōya nē tamo. Ō tamom to wewu diyōdig, ere nigin, ō idi yeneid ado be, sā anī to es wedidig. Ago fen, ō momoi bagai Negur nē naab ufelnamādīg. Sisa † takis ifenēya nigin biya de, sā? <sup>15</sup> Amā mafenēf de, sā?"

Anī ere, Jesus idi neid namedin kisi sane keleī ken, iron, "Ere nigin ā aya nigin kor unogef? Koin moni taka urousig len, aya ailau fenē." <sup>16</sup> Idi koin moni taka dirousi di, ī idi to fedin, "Eī ai nē malakanon? Eī ai yana nē itotoya?"

Idi aiten dale diron, "Sisa nē."

<sup>17</sup> Age de di, Jesus idi irokenēdin, "Sisa nē are Sisa wenēg, Negur nē are Negur wenēg."

Age ye di, idi ī nigin terē den.

### Kel Fāya Bun Ai Nē Kayau Ibodōf

(Matyu 22:23-33; Luk 20:27-40)

<sup>18</sup> Sadusia tamo idi dirōdig, laa bun tamal to ke de fā dedig anī, Jesus wagen disi to difiyen. <sup>19</sup> Idi diron, "Tise, Moses itotkanaman, are tamo taka laaf fen, aiwa itornen, anī ere, kesu sā, tamo ī waab anī yale fen, tura nē keso diroukenēf. <sup>20</sup> Gama tura tura sewen dibodon. Matu ketem kayau yalen, anī ere, keso yaleya sā mog, laa fen. <sup>21</sup> Matu dō fiya bagam waab anī yalen, anī ere, īg keso sā mog, laa fen. Idi dō fediyag de age fen.

<sup>22</sup> Tura tura sewen anidi adok, keso taka to dalen. Dum kayau areg laa fen. <sup>23</sup> Dum laa bun tamal kel fāya sain bun, ī ai nē kayau ibodōf, ere nigin, tura tura sewen anidi adok, ī dale dogolen?"

<sup>24</sup> Jesus aitedin yale irokenēdin, "Ā od kū wenēgef, ere nigin, ā Negur nē Itotoya ado Negur nē megeir keleī sā. <sup>25</sup> Sain laa bun tamal kel fāya bun, an tamo kayau ado abob yalef ya sāf, idi engel saa ilun dibodok gen dibodōf. <sup>26</sup> Gama, laa bun tamal fāya nigin, Moses nē od Negur nē Itotoya bun ibodok, are arein aa mata bun fotou fiyen Negur ī naig fe irokenen, 'Aya Abraham nē Negur, Isak nē Negur, Jakop nē Negur' †† anī to

†† Sam 118:22, 23 ‡ Rom neid king odug. †† Eksodas 3:6

be uwesegen de? <sup>27</sup> Ì laa neid Negur sã, anĩ ere, ì mata ibodõya neid. Æ fatuk bagai kũ wenëgef!”

### Ìtãfiya Odug Bagai Ganan Wal Fiya

(Matyu 22:34-40; Luk 10:25-28)

<sup>28</sup> Lo ifelnëdiya tamo taka isi, idi od nem kusĩ de mog, karĩ fiyëdin. Jesus ì aiten, od biya irokeneĩd mog, karĩ ye fen, ì Jesus to fiyen, “Ìtãfiya ganan bun, ìtãfiya nanĩ anĩ ganan wal fiya?”

<sup>29</sup> Jesus iron, “Ìtãfiya ganan wal fiya are enĩ, ‘O Israel, karĩ wog, Odug neda Negur, Odug ì yogo tekelei. <sup>30</sup> Ò, Odug ogon Negur ì nigin waũ adok, malãkanon adok, kisi adok, megeir adok bunem, ì nigin waũ laaf.’ <sup>†31</sup> Anĩ dõ fiya are eig fiya, ‘Ò ogo nigin waũ laa fef gen, nẽ tã nigineg ago waũ laaf.’ <sup>††</sup> Ìtãfiya uru enim, ganan wal fiya.”

<sup>32</sup> Lo ifelnëdiya tamo anĩ Jesus irokeneĩd, “Tise, õ de urok. Negur ì tekelei, taka to ibodok, Negur yogo dog-ol wof, anĩ bun momoi urok. <sup>33</sup> Ò Negur nigin waũ adok, kisi adok, megeir adok bunem waũ laaf fen, õ ogo nigin waũ laa fef gen, nẽ tã nigineg ago waũ laafei yeya anim, yã bun sesewi fiya ado sesewi fiya fire fire ganan wal fiya.”

<sup>34</sup> Jesus tamo anĩ keleĩ ado aiten yale di, ile fen, Jesus ì irokeneĩd, “Ò Negur nẽ tano nigin egerõ sã.” Sain anĩ bunem ilen, taka nem baban to fiyëya nigin kumĩ den.

### Ai Nẽ Kesu Anĩ Kristus?

(Matyu 22:41-46; Luk 20:41-44)

<sup>35</sup> Jesus tempel modoũ bun ifelneĩd fen, ì to fedin, “Naig fe di, lo ifelnëdiya tamo, Kristus ì Dawid nẽ naal dedig? <sup>36</sup> Dawid ì yogo Awa Uur Fateul bunem wogõ ye fen, kurõ falaisin:

“Negur, neu Odug irokeneĩd,  
“Imau biya melem ubod mog,  
ogon kiwai tar  
on yẽ farumẽ gõ afalauf.”

<sup>37</sup> Dawid yogo, ì nigin ‘Odug’ yef, naig fe di, ì Dawid naal ouf?”

Tamo kayau musei waud el fiya ado karĩ difiyen.

<sup>38</sup> Jesus ifelneĩd fen, iron, “Lo ifelnëdiya tamo nigin lo welegei. Idi gabar meluluk difonunakel diyo ken, maket modoũ bun aan difiyëdiyof anĩ orodidig. <sup>39</sup> Age de fen, idi Juda neid uub fõ bun, sia biyai biyai bun dibod ken, tar inoya bun modoũ malabag bun dibodõdig.

<sup>40</sup> Idi, kayau waab idegnëdiya bunem nedi fõ sosoin de fen, meleid yaleya nigin meluk bagai kosẽ dedig. Tamo age fediya, mala solo sane bagai dalouf.”

### Kayau Waab Nẽ Ofa

(Luk 21:1-4)

<sup>41</sup> Jesus ofa moni bogis sitakã ibod ken, tamo kayau lo feid mog, idi moni tempel bogis bun dinon. Tamo kayau safineid adodo musei moni odudug diraran.

<sup>42</sup> Anĩ ere, kayau waab maleg taka isi, kapa koin moni giriya nanaal bagai uru inon. Are tu toea dogol.

<sup>43</sup> Jesus in dõ fiya tar iweig laisi fen, irokeneĩd, “Aya ã momoi arokeneik, kayau waab maleg enĩ ì, ganan wal fediya, odug bagai bogis bun inol. <sup>44</sup> Idi ganan dogo neid safineid bun tamal tunĩ dinon, anĩ ere, kayau maleg anĩ, erob erob adok ì isennëf anĩ ganan inon.”

### Idikeleya Sain Nẽ Uris

(Matyu 24:1-35; Luk 21:5-33)

**13** Jesus ì tempel bunem kutũ yeis mog, in dõ fiya tar taka ì irokeneĩd, “Ule, Tise! Ere meein odudug oug fediya! Ere fõ meli meli oug fediya!”

<sup>2</sup> Age ye di, Jesus ì irokeneĩd, “Fõ odudug enĩ ganan uledif de? Meein enĩ taka to abob teten yenëf, anĩ adok fau isog irailauf.”

<sup>3</sup> Jesus Moul Arein tempel sitakã ibod mog, Pita, Jems, Jon, Endru anidim mugun Jesus to difiyen, <sup>4</sup> “Ere sain enidi wõ youf? Ere uris bagai anĩ, enĩ ganan kisi falauf nigin wõ youf? Anĩ urokanamã.”

<sup>5</sup> Jesus idi irokeneĩd, “Takam idegneĩya nigin lo weleg. <sup>6</sup> Musei aya yanau nem disi dirõf, ‘Aya Kristus,’ age de fen, musei didegnëdiyof. <sup>7</sup> Sain ã kusĩ nigin karĩg fen, tamo sigoredim kusĩ nigin wogõ douf anĩ karĩ gouf, ã to tererẽ gei. Ere erob erob anidi agef wõ youf, anĩ ere, idikeleya sain fau dum isiyof. <sup>8</sup> Teneub taka fã ye fen, ì teneub taka nigin kiwai ifenëf, tano taka ì, tano taka nigin kiwai ifenëf. Uyu taka taka bun mimĩ wõ ye fen, naũ isiyof. Age foug anĩ, kayau keso gõ foug nigin darau gariya inodig age fiya.

<sup>9</sup> “Æ aug nigin lo weleg. Æ fau kaunsel imeid bun dine-nei ken, uub fõ bun wagagã diyef. Aya yanau nigin, ã gawaman mudur, king geid meleid bun ufareg fen, idi kurõ walaisig urokeneĩdigouf. <sup>10</sup> Biya od ketem teneub ganan bun iyokalauf. <sup>11</sup> Sain ã gei diyei ken, kot bun dirouleyef, ere mauf wog fen, to kisi musei waleg. Sain anĩ bun, erob ifeneik anĩ wogõ gouf, ere nigin, are ãgem to wogõ gouf, are Awa Uur Fateulem.

<sup>12</sup> “Turam, tura kiwai imeid bun ino di, dukesiyof, age fe di, tamam in keso age foug. Kesum sina tama kiwai difeneĩd fen, laa bun dinenëdiyof. <sup>13</sup> Tamo ganan aya nigin ã kiwai difeneĩf, anĩ ere, taka ì megeir ifaref ile ile idikeleyanouf, Negur ì yalouf.

<sup>14</sup> “Sain ‘ninin anĩ fonou inouf nigin’ <sup>†</sup> ã an to ifarau nẽ anĩ ulogouf (anĩ uweseg, keleĩ youf), idi Judia distrik bun dibodok, arein diya diselauf. <sup>15</sup> Taka ì yogon fõ agaran ibodok, ì kutũ yeis, aaben ile, erob erob to yalouf. <sup>16</sup> Taka ì kabier ibodok, yogon gabar yalouf nigin to kel ilauf. <sup>17</sup> Naa anĩ bun, kayau bouweid ado, kayau keso su difenëdif ado, idi meleidlon ado! <sup>18</sup> Feluk sain bun, anĩ to wõ youf nigin, ã Negur kosẽ wiyëgouf, <sup>19</sup> ere nigin, naa anidi bun morõ odug biya adouf, morõ age fiya, gariya bun Negur teneub inon bunem isi gama, taka to wõ yen, dum buneg taka to wõ youf.

<sup>20</sup> Odug morõ odug nẽ naa anĩ to guru falaisim, taka to ibodom. Anĩ ere, tamo kayau ì igirnëdin nigin, ì naa anĩ guru falaisin. <sup>21</sup> Sain anĩ bun, taka ã irokeneĩf, ‘Ulegef, Kristus yeir!’ oo ‘Ì your!’ ã anĩ to momoi ge. <sup>22</sup> Fau

† Diuteronomi 6:4, 5 †† Levitikas 19:18

‡ Daniel 9:27; 11:31; 12:11

idegëya Kristus, idegëya profet ado, wõ de fen, idi kisi falauf are, Negur igirnëdin anidi didegnëdiyof nigin uris memelik ado dinodiyof. <sup>23</sup> Anĩ nigin, lo welegei, sain anĩ fau mog, aya ã ereb ereb ganan arokenein.

<sup>24</sup> "Anĩ ere, naa anidi bun, morõ anĩ dö fiya,

"gaa gugum kalauf,

age fe di, ogõ lalan to ifenëf,

<sup>25</sup> saa ilun tamal barisa kuku rouf,

saa nẽ megeir ganan guyoyõ douf.' †

<sup>26</sup> "Sain anĩ bun, tamo idi, Tamo Naal lalo bun yogon megeir odug fula fiya medeïya ado isi mog, dilouf.

<sup>27</sup> Agef fen, ï yogon engel susur fedi di, yogon tamo kayau igirnëdin anidi, teneub akor ganan bun, gaa iseya nem ile gaa ileyen, gei de, kuru difediyof.

<sup>28</sup> "Gama ã, aa fig bun keleï walogouf. Susu bonuf

fen, aarau inodif, ã keleï, saneya melsak. <sup>29</sup> Age fiya

gen, ã ereb ereb anĩ wõ youf ulogouf, ã keleï, are

mogo melsã bagai bobogë ifaref. <sup>30</sup> Aya ã momoi arokeneik, tamo kayau sain enĩ bun dibodok eneidi to gare de mog, enĩ ganan wõ youf. <sup>31</sup> Saa teneub ado sa kalauf, anĩ ere, neu od to bagai sa kalauf.

#### Naa Sain Ado Takam To Keleï Youf

(Matyu 24:36-44)

<sup>32</sup> "Taka nem naa sain ado to keleï youf, saa ilun engel idig sã, Naal ïg sã, Dei yogo dogol. <sup>33</sup> Mata ubodõg fen, lo weleg! Ereb sain anĩ wõ youf, ã to keleï youf.

<sup>34</sup> Are tamo fõ itor ileyen. ï yogon fõ itor ken, lo difouf nigin yogon ferfer imeid bun inon, idi mugu mugu kabĩ fire fire ifenëdin. Agef fen, ï tamo bobog bun anĩ mala inof ibodõf nigin irokenen.

<sup>35</sup> "Anĩ nigin, mata ubodõg fen, lo welegei, ere nigin, ã keleï sã, ereb sain fõ marau kel isiyof, aragau be, bõ atun be, tataro yũ mog be, wef mog be. <sup>36</sup> ï isi tarabã yeïf, ã to wenëg mog, ileyëïf, are deuf. <sup>37</sup> Ereb aya ã arokeneik, aya adok ganan arokenëdif, 'Lo weleg!'"

#### Kayau Taka Betani An Jesus Mudur Bun Moul Fi Felen

(Matyu 26:1-16; Luk 22:1-6; Jon 11:45-53; 12:1-8)

**14** Gama Pasa naa ado Bret Yis Sã Sifa naa, fau uru yen mog, pris odudug, lo ifelnëdiya tamo geid, Jesus idegëya naab bun dale dirou fen, dukesiyof nigin naab dimiren. <sup>2</sup> Idi diron, "Sifa sain bun to age tafouf, age tafouf are, tamo kayau seye de fen, kusĩ dalesauf."

<sup>3</sup> Jesus Betani an, Simon kulu lepra dagi adon tamo, in fõ bun saaf yoko ibod mog, kayau taka ï wagen moul sumeï biya bagai moni odug nem, nad †† nem dogol dinon anĩ, gulub ‡ ado irou isin. Agef fen, kayau gulub anĩ karãf fen, Jesus mudur bun moul fi felen.

<sup>4</sup> Age fe di, tunĩ an difaren are waud sane fen, abob dirokenen, "Ere nigin moul enĩ sekil fef? <sup>5</sup> Moul enei yar tekelei nẽ dimig mala wal feseya nem sur fiyam, agef fen, moni anĩ yale, maleg tamo ifenëdiyam, are dem." Age de fen, idi ï total bagai ou difiyen.

† Asaia 13:10; 34:4 †† Fisir yana, fisir anĩ warumutei bun moul daledig. ‡ Meein alabasta nem dinon.

<sup>6</sup> Jesus iron, "Utornëg, ã ere nigin ï wau morõ wenëgef? Kayau enĩ aya nigin biya bagai age fel. <sup>7</sup> Maleg idi faimud ã geid ubodõgouf, anĩ nigin, ã idi isennëdiya oroyeïf, are sain musei. Anĩ ere, aya faimud ã geid to tabodõgouf. <sup>8</sup> ï ereb age fiya kisin anĩ age fel. ï moul aya bouwau bun fi felel are, mekur ainëf nigin anĩ ke-tem dodok fel. <sup>9</sup> Aya ã momoi arokeneik, tenebur ein nain be, biya od enĩ wogõ douf, ereb kayau enĩ age fel anĩg wogõ douf. Age fe di, idi ï nigin kisi difouf."

<sup>10</sup> Age ye di, Judas Iskariot, tuwelf anidi atun taka, Jesus kiwai ifen ken, pris odudug imeid bun inouf nigin wagedin ilen. <sup>11</sup> Pris odudug idi od enĩ karĩ de, waud al fe fen, ï moni difenëf nigin dirokenen. Anĩ nigin, ï Jesus idi imeid bun inouf nigin naab imirek ilen.

#### Odug Nẽ Saaf

(Matyu 26:17-30; Luk 22:7-23; Jon 13:21-30; 1 Korin 11:23-25)

<sup>12</sup> Bret Yis Sã Sifa inoya naa matu anĩ bun, sain anĩ are idi neid tobonunã, sipsip naal, Negur tubuid tar isennëdin anĩ kisi de fen, sesewi difedig anĩ, Jesus nẽ dö fiya tar Jesus to difiyen, "Õ amã nain anĩ Pasa naa nẽ saaf wãf nigin, amã dodok mafouf anĩ oroyok?"

<sup>13</sup> Age de di, Jesus in dö fiya tar uru sur feid fen, irokenëdin, "Taun uleg fen, tamo taka darum naan ado isi fotou yeïf, ï dö gouf. <sup>14</sup> ï fõ taka namen ile di, uleg fen, gama ã fõ marau eig wiyëg urokenëgouf, 'Tise to fel: Aya neu dö fiya tar geid, Pasa naa nẽ saaf mãf nigin aab nain ibodok?' <sup>15</sup> ï aab odug ilun anĩ ifelneïf, an ereb ereb dodok de bure difelen. An neda nigin dodok gouf."

<sup>16</sup> In dö fiya tar taun dile fen, Jesus iron kilei, ereb ereb age fiya dilen. Anĩ nigin, idi Pasa naa nẽ saaf dodok difen.

<sup>17</sup> Aragau di, Jesus in dö fiya tar tuwelf geid, an wõ den. <sup>18</sup> Idi tebol bun si dino, saaf dokon, Jesus iron, "Aya ã momoi arokeneik, ã atun takam aya kiwai imeid bun inoyauf, taka aya uruwom moko anim."

<sup>19</sup> Idi waud gudũf fen, mugu mugu dirokenen, "Momoï bagai, ayam sã de?"

<sup>20</sup> Jesus aidedin yale iron, "Ã tuwelf atun takam, taka ï, imamã uruwom beĩ bun nu mafef anim. <sup>21</sup> Tamo Naal ï nigin ditoton agef bai ilauf. Anĩ ere, tamo ï Tamo Naal kiwai tamo imeid bun inof, ï malalon ado! ï sina to gõ fem, are dem."

<sup>22</sup> Idi saaf dokon, Jesus bret yale, Negur de fiye ken, bret anĩ mumã fen. Agef fen, in dö fiya tar ifeneïd fen, iron, "Waleg, eĩ neu bouwau."

<sup>23</sup> Agef fen, ï kap yale, Negur de fiye ken, kap anĩ ifenëdin, age fe di, idi adok anĩ bun don.

<sup>24</sup> Jesus idi irokenëdin, "Eĩ neu naudou, ã Negur geid bar itenëya nigin, are tamo kayau musei nigin fi felel, <sup>25</sup> aya ã momoi arokeneik, aya baban wain enĩ to ãf, gaman ile, aya Negur nẽ tano bun wain mata ãf bun."

<sup>26</sup> Idi seg taka dalel fen, idi Moul Arei bun diselen.

### Pitam Jesus Wa Fiyēf Nigin Jesus Iron

(Matyu 26:31-35; Luk 22:31-34; Jon 13:36-38)

<sup>27</sup> Jesus idi irokenēdin, “Ā fau adok uyalalagauf, ere nigin, Negur nē Itotoya eig ye irok:

“Aya sipsip marau aū di, sipsip ganan firagagaū difouf.”

<sup>28</sup> Anī ere, aya kel fā auf bun, aya ket Galili uyu alauf.”

<sup>29</sup> Pita Jesus irokenen, “Ganan diyalalaufeg, aya sāf.”

<sup>30</sup> Jesus Pita irokenen, “Aya ō momoi arokonok, gama bō enī bun, tataro kokorok ye uru fiya sā mog, ō ogo aya nigin wa wo, towo wouf.”

<sup>31</sup> Anī ere, Pita total bagai iron, “Momoi aya ō uruwom gare tauf nigin oufeg, aya ō nigin to bagai wa afouf.” Age ye di, idig ganan od de tekelei anī diron.

### Getsemane Oun

(Matyu 26:36-46; Luk 22:39-46)

<sup>32</sup> Idi modoū yana Getsemane dedig, an dilen. Age de fen, Jesus in dō fiya tar irokenēdin, “Ein ubodōg mog, aya kosē auf.” <sup>33</sup> Ī, Pita, Jems, Jon anidi dogol geif fen, ĩ geid dilen. Agef fen, ĩ wau gūf fen, morō odug gudū fen. <sup>34</sup> Jesus idi irokenēdin, “Neu malaukanon to-bega le fen, wau morō gudū feis, laa nē daū bun ifaref. Ein ufareg fen, lo weleg.”

<sup>35</sup> Naal godof iroule fen, kisi falauf are, sain anī Jesus wal fiyēf nigin, ĩ tenebur kubū ye fen, kosē yen. <sup>36</sup> Jesus iron, “Aba, † Dei, ereb ereb ganan, ō age fiya kisi feleya. Kap enī walelkana. Anī ere, neu oroya anī to dō wo, on oroya dō wo.”

<sup>37</sup> Age fel fen, Jesus in dō fiya tar gedin kel isin, mulā den mog, iledin. Jesus Pita irokenen, “Simon, ō wenek de? Ō aua tekelei to mata ubodōf de? <sup>38</sup> Ā, kisi yeīya bun to kubū gouf nigin lo weleg fen, kosē gouf. Uur are orof, anī ere, bouwa anī malegef.”

<sup>39</sup> Ī baban kel ile, uruwa kosē yen gen, dōf age fen.

<sup>40</sup> Ī kel isin, baban denena mog, iledin, ere nigin, idi meleid morō gudū fesin. Idi ĩ ereb fiyēya nigin taka to kisi difen.

<sup>41</sup> Jesus kel towo fe fen, in dō fiya tar irokenēdin, “Ā fau si unog fen, yenēyai gef? Bure! Sain mogo isil. Ule-gef, Tamo Naal mogo mosor tamo imeid bun ilef.

<sup>42</sup> Fafāg fen, teleg! Kiwai imeid bun inoya tamo yeir isif!”

### Jesus Dirounen

(Matyu 26:47-56; Luk 22:47-53; Jon 18:3-12)

<sup>43</sup> Jesus fau wogō ye mog, tuwelf anidi atun taka, Judas wō yen. Tamo musei dimig adodo, seburer adodo, ĩ geid disin. Pris odudug, lo ifelnēdiya tamo, mudur adodo idim sur difedi di, disin.

<sup>44</sup> Gama Judas ĩ Jesus yaor fiyēya nē uris nigin, idi fad-ded fiyēdin: “Tamo aya umā afouf anī, ĩ waleg fen, uroug uleg.” <sup>45</sup> Judas kaisā bagai Jesus wagen ile iron, “Rabi!” Agef fen, umā fiyen. <sup>46</sup> Tamo idi Jesus ka dife dirounen. <sup>47</sup> Age dife di, tamo melsā difaren anī takam

dimig ul feis yale, pris mudur ado nē kabī tamo weder salōf iran.

<sup>48</sup> Jesus iron, “Aya bē tamo gen, ā dimig adodo, sebu-rer adodo, waleyagau fenē usigef de? <sup>49</sup> Naa ganan, aya ā geid tabod ken, tempel fofomala bun afelnein, anī ā aya to urouyagen. Anī ere, Negur nē Itotoya bun ibodok anī kisi falauf nigin.” <sup>50</sup> Age ye di, ganan ditornē diyalalen.

<sup>51</sup> Tamo gaū taka, gabar lalau dogol ifonun ĩ, Jesus dō fen. Sain idi Jesus ka dife di, <sup>52</sup> ĩ gabar inū iraille, gemū iyawon.

### Jesus Juda Kaunsel Neid Kot Mala Bun Ifaren

(Matyu 26:57-68; Luk 22:54, 55, 63-71; Jon 18:13, 14, 19-24)

<sup>53</sup> Idi Jesus dale, pris mudur ado wagen diroulen. Age dife di, pris odudug, mudur adodo, lo ifelnēdiya tamo geid, ganan disi guru difen. <sup>54</sup> Pita Jesus dume dōf, tokō fel ile, pris mudur ado nē fō fofomalan wō yen. An ĩ kabī tamo geid dibod ken, yā imidirek ibodon.

<sup>55</sup> Pris odudug, kaunsel ganan geid, Jesus laa bun di-nenēf nigin bouwa bun od dimiren. Anī ere, taka to di-len. <sup>56</sup> Musei Jesus bouwa bun idegēya od diraran, anī ere, idi neid od tekelei sā.

<sup>57</sup> Age de fen, tamo tunī fafā de fen, Jesus bouwa bun idegēya od enī diran, <sup>58</sup> “Amā karī mafiyē mog, iron, ‘Aya tempel tamom dinon anī narī afel fen, naa towo bun, taka, are tamom to inouf anī anouf.’” <sup>59</sup> Anī ere, idi neid od anīg tekelei sā.

<sup>60</sup> Age de di, pris mudur ado wagedin fā ye ifar fen, Jesus to fiyen, “Ō to solo urōf de? Eī ere od anī tamo enidi dirousi, ō boū bun duk?” <sup>61</sup> Anī ere, Jesus ĩ mutū ifar fen, to solof iron.

Baban pris mudur adom, ĩ to fiyen, “Ō Kristus, Negur Naal de?”

<sup>62</sup> Jesus iron, “Aya im, ā Tamo Naal Negur megeir ado ima biyalem ibod ken, saa lalo bun isi mog, ulogouf.”

<sup>63</sup> Age ye di, pris mudur ado in kolos serek fe fen, to fen, “Ere nigin ada od megeir fiya nigin tamo baban ta-mirēf? <sup>64</sup> Ā kono fiya od mogo karī gel. Ā ere kisi gef?”

Idi ganan ĩ laa foug nigin diron. <sup>65</sup> Age de fen, tunī Jesus disisnē, mala difofakel fen, imedim dun. Age de fen, idi diron, “Aim inok kurō weis urō!” Age dife di, kusī tamo Jesus dale fen, dun.

### Pita Jesus Nigin Wa Fen

(Matyu 26:69-75; Luk 22:56-62; Jon 18:15-18, 25-27)

<sup>66</sup> Pita fō fofomalan tenebur ibod mog, pris mudur ado nē kabī kayau taka isin. <sup>67</sup> Ī, Pita yā imidir mog, lo fel fen, iron,

“Ōg Jesus Nasaret tamal geiden.”

<sup>68</sup> Anī ere, ĩ waf fen, iron, “Ō od urok enī, aya keleī sā.” Age ye fen, ĩ bobogē iyok ilen.

<sup>69</sup> Kabī kayau anī Pita an ile fen, ĩ baban an difaren anī irokenēdin, “Tamo enī are idi neid taka.” <sup>70</sup> Ī baban wa fen.

Sain naal ilele di, idi melsā difaren anidim Pita di-ro-kenen, “Momoi bagai, ō idi neid taka, ere nigin, ō Galili tamal.”

† Anī nē gariya, Aram od bun ‘Dei.’

<sup>71</sup> Ī mogo yogo bouwa geluf fen, total od irokenēdin, "Tamo ā urōgef anī, aya keleī sã."

<sup>72</sup> Age ye mog, kaisã bagai, tataro baban kokorok yen. Age fe di, Pita Jesus od irokenen anī weder fokō felen: "Tataro fau kokorok ye uru fiya sã mog, ō aya nigin wa wo, towo wouf." Anī bunem, ĩ kusureis fen, inã yalen.

### Jesus Pailat Mala Bun Ifaren

(Matyu 27:1, 2, 11-26; Luk 23:1-5, 13-25; Jon 18:28-19:16)

**15** Bonimeī bagai, pris odudug, mudur adodo, lo ifelnēdiya tamo, Juda neid kaunsel ganan geid, od difon. Idi Jesus difō dale dirou, Pailat ima bun dinon.

<sup>2</sup> Pailat Jesus to fiyen, "Ō Juda neid king de?"

Jesus solof iron, "Are de yer, ō urok anī."

<sup>3</sup> Pris odudug ĩ bouwa bun od musei dun. <sup>4</sup> Anī nigin, Pailat baban Jesus to fiyen, "Ō to solo wo urōf de? Ereb ereb musei nigin bouwã bun od dinof anī ulef."

<sup>5</sup> Anī ere, Jesus fau od taka to solo fen. Age fe di, Pailat terē ye fen, kisi musei yalen.

<sup>6</sup> Gawaman nē tobonunã are, Pasa Sifa inoya bun tamo kayau dirō di, kalabus bun tamo taka dalisnēdig.

<sup>7</sup> Tamo taka yana Barabas ĩ, tamo kusī dales fen, tamo didenkesin, kalabus bun dinenan anidi neid taka. <sup>8</sup> Tamo kayau mala odug dise, Pailat gai age fedig anī, age fenēdiyof nigin to difiyen.

<sup>9</sup> Pailat to fedin, "Ā aya Juda neid king anī aliskeneif de?" <sup>10</sup> Pailat keleī, pris odudug idi kiyēi dino fen, Jesus ĩ ima bun dinon. <sup>11</sup> Anī ere, pris odudug tamo kayau waud dale fen, dirokenēdi di, idi Jesus ban Barabas anī Pailatem yaliskenediyof nigin diron.

<sup>12</sup> Pailat idi to fiyēdin, "Juda neid king gedig anī, aya ĩ nigin naig afiyēf?"

<sup>13</sup> Idi diweig diron, "Aa tetek bun ũf!"

<sup>14</sup> Pailat idi to fiyēdin, "Ere nigin? Ere mosor ĩ age fen?"

Anī ere, idi total bagai diweig diron, "Aa tetek bun ũf!"

<sup>15</sup> Tamo kayau waud el foug nigin, Pailat Barabas yaliskenedin. Pailat irō di, Jesus wagī difiye ken, aa tetek bun dūf nigin, kusī tamo imeid bun inon.

### Kusī Tamo Jesus Ketē Difiyen

(Matyu 27:27-31; Jon 19:2, 3)

<sup>16</sup> Kusī tamo idi, Jesus dale dirou gawaman mudur nē fō aaben dile fen, kusī tamo ganan diweignēdi di, guru difen. <sup>17</sup> Idi gabar kadaū difounkenen, age de fen, idi malū duri ado dale, teter tanak kori de fen, ĩ mudur bun kurū difen. <sup>18</sup> Age de fen, idi ĩ diweig dirokenen, "O, Juda neid king gai gai ibodōf!" <sup>19</sup> Baba baban idi werī tibog nem mudur bun du ken, disisnen. Idi iboreid bobou de, kususu de fen, ketē difiyen. <sup>20</sup> Idi ketē difiye kel fen, gabar kadaū dinukeis, yogon gabar bagai anī difounkenen. Age de fen, idi ĩ aa tetek bun dūf nigin dirou diselen.

### Jesus Aa Tetek Bun Dun

(Matyu 27:32-44; Luk 23:26-43; Jon 19:17-27)

<sup>21</sup> Tamo taka Sairini tamal, yana Simon, Aleksanda Rufus ado neid temeid, ĩ yogon fonom isi, luwen wal fediyoū mog, idi Jesus nē aa tetek faali foug nigin nugo difiyen. <sup>22</sup> Idi Jesus modoū yana Golgota (anī nē gariya, Mudur Tuwa nē Modoū) an dirou diselen. <sup>23</sup> Age de fen, idi Jesus darau naal to karī youf nigin wain marasin † taka ado falei de difenen, anī ere, ĩ to yon. <sup>24</sup> Idi ĩ aa tetek bun du ken, in gabar foi de fen, aibem ereb anī yalouf nigin aisaī kodē den.

<sup>25</sup> Bonimeī nain kilok bun, idi ĩ aa tetek bun dun.

<sup>26</sup> Jesus bouwa yūya od eig de ditoton: JUDA NEID KING. <sup>27</sup> Idi bē tamo urug, ĩ geid aa tetek bun didenen, taka Jesus ima biyalē, taka ima kilē. <sup>†29</sup> Tamo kayau dile disi dife, kono difiye ken, kasã difiyē, mudureid dira ken, diron, "Ō, tempel narī afel fen, baban naa towo bun anouf, won, <sup>30</sup> ō ogo nigin usenne ken, aa tetek bun tamal kutū weis!"

<sup>31</sup> Age difiyen gen, pris odudug, lo ifelnēdiya tamo geid, idi dogo dogol wogō de fen, ĩ ketē difiyen. Idi diron, "Ī tunī isennēdidig, anī ere, ĩ yogo isennēya kisi feleya sã! <sup>32</sup> Kristus enī, Israel neid King, utornēg len, gama aa tetek bun tamal kutū yeis len, tail fen, momoi tauf." Idi ĩ geid aa tetek bun didenēdineg, ĩ kono difiyen.

### Jesus Laa Fen

(Matyu 27:45-56; Luk 23:44-49; Jon 19:28-30)

<sup>33</sup> Gaa atun tuwelf kilok bun, gugum isi, teneub gan nan kerū fel ile, tri kilok aragaun. <sup>34</sup> Aragau tri kilok bun, Jesus wade bagai iweig iron, "Eloi, Eloi, lama sabaktani?" –ani nē gariya, "Neu Negur, neu Negur, ere nigin ō aya utornal?" ‡

<sup>35</sup> Tunī melsã difaren, anī karī de fen, idi diron, "Karīg, ĩ Eliya iweignek."

<sup>36</sup> Tamo taka gudu re ile, spons †† yalen, wain makik ado bun nu feis fen, tibog bun ino fen, Jesus yāf nigin ifenen. Agef fen, ĩ iron, "Gama utornēg. Eliya isi yaleisnē mog, tailauf."

<sup>37</sup> Jesus ait odug nem iweig fen, laa fen.

<sup>38</sup> Tempel nē gabar faraf uru fen, ilunenem irousil teneburen. <sup>39</sup> Kusī tamo neid orowa, Jesus wagen an ifaren anī, in kaīya anī karī ye, in laa anī ile fen, iron, "Momoī bagai, tamo enī Negur Naal!"

<sup>40</sup> Kayau tunī so del difar fen, lo difen. Idi atun, Maria Magdala, taka Maria, Jems naal bagai Joses ado neid sineid, taka Salome. <sup>41</sup> Galili an kayau enidi Jesus dō difiye ken, aruna dalen. Kayau musei, Jesus geid Jerusalem diselen anidig an difaren.

† Marasin nē yana, 'mer (myrrh). †† Itotoya tunī eig de ditoton: kilē. 28 \*Age de fen, Negur nē Itotoya enei kisi felen, "Ī lo difodulēdig anidi geid bagu difedin." (Asaia 53:12) ‡ Sam 22:1 †† Maaīwō tamal safina taka, ku nanaal musei ado naan dū fedig.

### Jesus Mū Difen

(Matyu 27:57-61; Luk 23:50-56; Jon 19:38-42)

<sup>42</sup> Naa are dodok fiya nē naa (naa anī bure fele di, Sabat naa wō youf). Aragau mog, <sup>43</sup> Josef, Arimatea tamal, ī kaunsel neid odug taka, ī yogo anī Negur nē tano tari fen, ī kumī sā Pailat garan ile, Jesus bouwa buru yalouf nigin to fiyen. <sup>44</sup> Pailat Jesus mogo laa fel ya anī karī ye fen, terē yen. Ī kusī tamo neid orowa iweigne ken, Jesus mogo be laa fel anī, ī to fiyen. <sup>45</sup> Sain ī kusī tamo neid orowa bun laa fel ya karī ye fen, ī Jesus bouwa buru yaleya nigin Josef yo fiyen. <sup>46</sup> Age fe di, Josef gabar lalau na yale fen, bouwa buru yaleis, gabar lalau anim sile fen. Agef fen, ī matmat sa bun ku dalen anī kur inenen. Gama ī meein wele fe di, matmat bobog katī felen. <sup>47</sup> Maria Magdala, Maria Joses nē sina ado, ī dinenen modoū anī dilen.

### Jesus Mata Kel Fā Yen

(Matyu 28:1-8; Luk 24:1-12; Jon 20:1-10)

**16** Sabat naa bure fele di, Maria Magdala, Maria Jems sina, Salome anidim dile, Jesus bouwa bun wā difouf nigin, moul sumeī biya na gei difen. <sup>2</sup> Uub nē naa matu bun † bonimeī bagai, we kurā fel mog, idi matmat bun naab diyok dile fen, <sup>3</sup> idi abob to difen, "Aim matmat bobog bun meein wele fel kanadauf?" <sup>4</sup> Age de fen, meleid diran, idi meein odug biya anī wele feleya dilen. <sup>5</sup> Idi meku namen dilen, tamo gaū taka gabar lalau ifouf, ima biya melem ibod mog, dile fen, terē den.

<sup>6</sup> Ī iron, "To terē wog, ā Jesus Nasaret tamal aa tetek bun dun anī umirnēgef. Ī mogo fā yel! Ī ein sā. Idi ī dinenē yenen modoū anī uleg. <sup>7</sup> Anī ere, uleg, in dō fiya tar Pita geid urokenēdig, Ī ketem Galili ilef. An ī ulogouf, ī irokenein kilei."

<sup>8</sup> Idi terē de fen, waud firagagaū felen, anī nigin, kayau idi ulolō deis, meku ditor diyawon. Idi kumī den nigin, aib taka to dirokenen.

† Are Sande.

[Itotoya tunī kulu bagai od gariya dino fen, ditoton anī bun, Mak 16:9-20 to ibodok.]

### Jesus Maria Magdala Bun Wō Yen

(Matyu 28:9, 10; Jon 20:11-18)

<sup>9</sup> Jesus, uub nē naa matu bun bonimeī bagai, fā ye fen, ī Maria Magdala bun ketem wō yen, kulu Jesus kaa sesen sewen kayau anī bun irudin. <sup>10</sup> Ī ile, idi Jesus geid diyon anidi, waud gudūf fen, marudim difen anī irokenēdin. <sup>11</sup> Idi, Jesus mata fā yel, kayau ī ilel ya anī karī de fen, waud to momoi den.

<sup>12</sup> Dum in dō fiya tar uru naab diyok dile mog, Jesus bouwa fire bunem, idi atun wō yen. <sup>13</sup> Age fe di, idi keku de disi, an difaren anidi dirokenēdin, anī ere, idi nigin to momoi den.

<sup>14</sup> Dum idi Īlewen, saaf doko dibod mog, Jesus idi bun wō ye fen, ou fiyēdin, ere nigin, idi Jesus fā yel mog, dilen anī to momoi de fen, waud katī difelen nigin.

<sup>15</sup> Jesus irokenēdin, "Ā teneub ganan bun uleg fen, biya od tamo kayau ganan urokenēdig. <sup>16</sup> Taka ī momoi ye fen, naan yalef are, ī kel yalouf, taka ī to momoi yef are, es fiya bun inenēf. <sup>17</sup> Momoi def idi, uris enidi idi bun wō youf, idi aya yanau nem kaa sesen dirudiyouf, idi od mata mata wogō douf. <sup>18</sup> Idi imedim gogour dale diroudiyouf, takag, laa nē mū sane dāf, to mū idenēdiyof, takag, idi dagi tamo bun imeid dino di, dagi sa kalauf."

### Jesus Saa Ilun Irou Iselen

(Luk 24:50-53; Aposel 1:9-11)

<sup>19</sup> Odug Jesus irokeneīd bure fele di, Negur Jesus yale, saa ilun irou isel, Negur ima biyalē ibodok. <sup>20</sup> Anī nigin, in dō fiya tar dile, teneub ganan bun biya od wogō den. Age dife di, Odug idi ado kabī yale di, uris bunem yogon od anī megeir fen.



# LUK

## Od Uyu Irouya

**1** Musei idi, amã atun erëb erëb wowã yen anĩ, di-totauf nigin age difen, <sup>2</sup> are biya od nẽ kabĩ tamo uyulil dibod ken, meledim dilen anidi bun tamal, anĩ wogõ difaman. <sup>3</sup> Age fiya nigin, aya yug bagai, gariya bunem erëb wowã yen anĩ ganan amir ailen, are aya kisi afen, tamo odug Teofilus õ bun el fe, itotoya nigin biya bagai aun, <sup>4</sup> anĩ bunem, õ erëb erëb difelnon are momoi yeya anĩ keleĩ youf.

### Jon Naan Igunẽdiya Tamo Gõ Fiya Sã Mog, Anĩ Ket Wogõ Yen

<sup>5</sup> Herod Judia nẽ king ibodon sain bun, pris taka ibodon, in yana Sekaraia, ĩ Abiya nẽ pris bun tamal taka, in aiwa Elisabet ĩg Aron nẽ ibor bun tamal. <sup>6</sup> Idi urom Negur mala bun madur dibodon, idi Odug nẽ ĩtãfiya ganan ado nun el de, tutuk dõ difedig. <sup>7</sup> Anĩ ere, idi urom kesu sã, ere nigin, Elisabet ĩ dali, kesu gõ fiya kisi feleya sã, agef fen, idi urom tubau bagai.

<sup>8</sup> Sain taka bun, Sekaraia, ne kabĩ tura tar geid kabĩ dale mog, ĩ Negur nẽ pris kabĩ yale fen, <sup>9</sup> pris idi neid tobonunã bunem, Odug nẽ tempel namen ile fen, aa gaula sumeĩ biya tõ fiya nigin aisaĩ kodẽ bunem ĩ digirnen. <sup>10</sup> Aa gaula sumeĩ biya tõ fiya saine di, idi Odug yana dalesedig ganan mayarẽ kosẽ den.

<sup>11</sup> Agef mog, Odug nẽ engel, ĩ bun wõ ye, alta aa gaula sumeĩ biya tõ fiyadig anĩ ima biyalẽ ifaren. <sup>12</sup> Age fe di, Sekaraia ĩ ile fen, ĩ terẽ ye mã, kumĩ ye fen, dẽ yelen. <sup>13</sup> Anĩ ere, engel ĩ irokenen, "Õ to kumĩ wo, Sekaraia, ogon kosẽya are Negur ĩ karĩ yen. Ogon aiwã Elisabet ĩ, ogon kesu monog gõ foug, age fe di, in yana ũ, Jon wouf. <sup>14</sup> ĩ bunem waũ kulĩya ado waũ al fiya õ bun ibodõf, age fe di, musei ĩ gõ foug bun waud al foug, <sup>15</sup> ere nigin, Odug mala bun ĩ yana odug adouf, ĩ wain be, aai naan total falei difef anĩg to yãf, agef fen, ĩ sina namenem Awa Uur Fateulem aura fiyẽf. <sup>16</sup> Israel tamo kayau musei fau inim, Odug, nedi Negur wagen kel gurif irou ilauf. <sup>17</sup> Agef fen, ĩ Eliya nẽ uur ado megeir bunem, Odug fau ileyã sã mog, ĩ ket uyu irou ile fen, temeid tar, naaluid tar nigin waud yenẽf nigin ado, fe temeleid idi madur ibodõya nẽ kisi biya bun ileyã nigin falei fe fen, tamo kayau Odug nẽ anidi saika fediyouf."

<sup>18</sup> Sekaraia engel to fiyen, "Naig afe fen, aya enei keleĩ youf? Aya neu kayau ado urom mabodok masi, tubau bagaif."

<sup>19</sup> Engel aiten yale iron, "Aya Gabriel. Aya Negur mala bun afaredig, anĩ nigin, aya õ wogõ yõya nigin ado, biya od enei irokonõya nigin sur fiyal. <sup>20</sup> Anĩ gama õ ait ufokol fen, od to wogõ wof ule, anĩ wõ youf naa bun, ere nigin, õ neu od to momoi wol, od enei are fau yogon sain bun bagai, kaũ wõ youf."

<sup>21</sup> Age fe di, tamo kayau Sekaraia tari de fen, idi ĩ sain meluk tempel namen ibodon nigin kisi musei dalen.

<sup>22</sup> ĩ ulõ yesin sain bun, ĩ wogõ fiyẽdiya kisi feleya san. Age fe di, idi kelein, ĩ tempel namen mala seleulã kurãf fen, erëb taka ilel, ere nigin, ĩ imam dogol ifelneĩd fen, ĩ wogõya sã ibodok ilen.

<sup>23</sup> ĩn kabĩ nẽ sain bure fele di, ĩ fõ bun kel ilen. <sup>24</sup> Anĩ bure fele di, in aiwa Elisabet bou adon, agef fen, ogõ faif ĩ iminkel ibodon. <sup>25</sup> ĩ iron, "Odugem enei age fanan. Naa eneidi bun, ĩ yogon oroya ado wau ifenẽya ifelnan, agef fen, neu mama tamo kayau atun yalelkanan."

### Jesus Gõ Fiya Sã Mog, Anĩ Ket Wogõ Yen

<sup>26</sup> Ogõ sigis bun, Negur, engel Gabriel Nasaret taun, oun Galili teneub, sur fiyẽ di, ile, <sup>27</sup> kayau taulei, tamo yana Josef, Dawid nẽ ibor bun tamalem yalouf nigin digirin gein ilen. Kayau taulei yana Maria. <sup>28</sup> Engel ĩ gein ile fen, iron, "Fel, õ nigin Negur fatuk el yok. Odug õ ado ibodok."

<sup>29</sup> Maria in od nigin wau fatuk togu fen, aanya enei naig fiya nigin ye fen, kisi musei yalen. <sup>30</sup> Anĩ ere, engel ĩ irokenen, "Maria, õ to kumĩ wo, õ Negur nẽ wau el fiya gurug wol. <sup>31</sup> Õ fau kesu ado fen, kesu monog gõ wouf, ago fen, yana ũ, Jesus wouf. <sup>32</sup> ĩ fau odug wõ ye di, Negur Ilun Bagai Naal douf. Negur Odug yogo, king nẽ modoũ tama Dawid nẽ anĩ, ĩ ifenẽf. <sup>33</sup> Age fe di, ĩ Jakop nẽ ibor bun king gai ibodkalauf, in tano to sa kalauf."

<sup>34</sup> Maria engel to fiyen, "Aya fau mois, eĩ naig fe wõ youf?"

<sup>35</sup> Engel ĩ aiten yale iron, "Awa Uur Fateul õ bun isiyouf, age fe di, Negur Ilun Bagai nẽ megeir kerub yõf. Anĩ bunem fateul bagai gõ wouf are, yana Negur Naal douf. <sup>36</sup> Ogon sirag Elisabeteg tubau mog, kesu yalouf, ĩ dali den, anĩ mogo ogõ sigis ĩ bou ado ibodok. <sup>37</sup> Ere nigin, erëb taka anĩ Negur bun malai sã."

<sup>38</sup> Maria ĩ aiten yale iron, "Aya Odug nẽ kabĩ kayau, aya bun od sã, õ urok kilei od sã agef wõ youf." Age ye di, engel ĩ itornẽ ilen.

### Maria Elisabet Ki Fiyen

<sup>39</sup> Sain anī bun, Maria dodok fel, kaisā bagai taun taka arei bun, Judia distrik nediwon ilen. <sup>40</sup> An ī Sekaraia nē fō bun wō ye fen, Elisabet fel fiyen. <sup>41</sup> Sain Elisabet Maria nē fel ya anī karī ye fen, kesu sina namen ibodon anī okī yen, age fe di, Elisabet Awa Uur Fateulem aura fiyen. <sup>42</sup> Ī ait odugem iweig iron, "Kayau ganan atun, Negur ō el yok. Agef fen, kesu gō wouf anīg, Negur ī el fiyek! <sup>43</sup> Anī ere, aya naig fiya bagai nigin, neu Odug nē sina anī aya bun isif? <sup>44</sup> Ogon fel ya nē ait wederoun ile mog bagai, momou nameun al fe fen, okī yel. <sup>45</sup> Kayau taka, ī ereb Odug ī irokenek are agef kisi fel wō youf, ye fen, momoi yef, are Negur ī el fiyek!"

### Maria Nē Seg

<sup>46</sup> Age fe di, Maria iron:  
"Neu malaukanon Odug yana yalesef,  
<sup>47</sup> agef fen, neu uur Negur Isennaya nigin kulī yef,  
<sup>48</sup> ere nigin, ī, aya yogon kabī kayau maleg nigin kisi fatuk yalen.  
Sain enei bunem ilauf ganan, ibor ganan Negur ī el fiyen douf,  
<sup>49</sup> ere nigin, Negur Megeir Barikā ī aya bun ereb odug age fel,  
ī yana fateul ibodok.  
<sup>50</sup> In wau yūya, ī nigin anini def bun tobol fouf,  
ibor gama ibodok enei ado, dumen isiyouf idi buneg gai gai ibodkalauf.  
<sup>51</sup> Ī yogo imam kabī total odug biya age fedin,  
ī idi neid kisi bun yeneid dalesef anī irudi di, firaga-gaū difen.  
<sup>52</sup> Ī yeneid adodo, nedi modoū bun yalēneīd fen,  
maleg anī yalesnēdin.  
<sup>53</sup> Ī idi naū fedif anī, ereb ereb biya ifeneīd fen,  
idi safineid adodo daku irudin.  
<sup>54</sup> Ī amā tubumā tar irokenēdin kilei,  
ī yogon kabī tamo Israel isennen,  
<sup>55</sup> agef fen, Abraham ado in ibor nē tubu tar bun faimud,  
wau yūya ifenēdiya nigin karī yeledig."  
<sup>56</sup> Maria, Elisabet ado ogō towo age fiya dibod ken, fō bun kel ilen.

### Jon Naan Igunēdiya Tamo Gō Fen

<sup>57</sup> Elisabet nē kesu gō fiya sain wō ye di, ī kesu monog gō fen. <sup>58</sup> Ī ne tā tar, in sirag tar geid, Negur nē wau yūya odug ifelnen anī karī de fen, idi weim waud al fen.

<sup>59</sup> Naa eit bun, idi mulū nigin kesu bou gudū fiya nigin disin, age de fen, ī yana dū, tama nē dait Sekaraia douf nigin age difen. <sup>60</sup> Anī ere, ne sina aitedin yale iron, "Age fiya sā! Ī yana Jon ye yauf."

<sup>61</sup> Idi ī dirokenen, "Ogon sirag tar atun, yana age fiya taka sā."

<sup>62</sup> Age de fen, in tama bun kesu yana aib youf anī karī douf nigin, uris difenen. <sup>63</sup> Age dife di, ī itotoya nē safi-

na nigin to fiyēdin, agef fen, "Ī yana Jon," ye itoto di, idi ganan terē den. <sup>64</sup> Sain anī bun bagai, ī awa kakā ye di, bale faraf yale ulō yalasi di, ī wogō ye fen, Negur yana yalesen. <sup>65</sup> Ne tā tar terē de fen, anini den, age de fen, Judia neid arein, fonō fonō wogagā de fen, ereb wō yen anī ganan wogō den. <sup>66</sup> Adok anī karī de fen, kisi musei dale fen, to difen, "Kesu enei naig fiya wō youf?" Ere nigin, Odug nē ima ī bun ibodon.

### Sekaraia Nē Seg

<sup>67</sup> In tama Sekaraia Awa Uur Fateulem aura fiyē di, ī profet od eig ye wogō yen:

<sup>68</sup> "Odug seli tabiyouf, Israel neid Negur,  
ere nigin, ī isi fen, in tamo kayau kafī fiya bun tamal kel gei fel.

<sup>69</sup> Ī yogon kabī tamo Dawid nē fō bun,  
isennadaya megeir ado yalesel ifaref,  
<sup>70</sup> (are ī yogon profet fateul kulu temeleid sigoreid bun wogō den kilei).

<sup>71</sup> Nemā kiwai tar ado,  
amā nigin to orodif anī imeid bun tamal, kel ya-lemāf.

<sup>72</sup> Nemā tamamā tar nigin wau yūya anī ifelneīd fen,  
ī yogon bar itenēya fateul anī karī yelen.

<sup>73</sup> Ī wau kuturol fen, nemā tamamā Abraham iroke-  
nen.

<sup>74</sup> Nemā kiwai tar imeid bun tamal kel gei famāf,  
agef fen, amā kumī sā ī aruna yaleya kisi falauf ni-  
gin.

<sup>75</sup> Amā nemā mabodok malauf bun, ī mala bun gai fa-  
teul bagai fen, madur bagai mabodōf nigin.

<sup>76</sup> "Age fe di, ō neu kesu, Negur Īlun Bagai nē profet  
douf,  
ere nigin, ō uyu urou fen, Odug nē naab dodok  
wouf.

<sup>77</sup> In tamo kayau neid mosor nigin wedereid tu kalauf  
bunem,  
kel yalediyouf nē keleī wenēdiyof.

<sup>78</sup> Are nemā Negur molol nem wau yūya bunem,  
anī bun gaa kurā fiya, saa ilunem amā bun isiyouf.

<sup>79</sup> Are idi gugum bun difaref ado,  
laa nē buri bun difaref anidi bun, fula fouf,  
age fe di, nemā yemā delē anidi bun madur marā di,  
wau inosiya bun malauf."

<sup>80</sup> Age fe di, kesu biya fen, uur orib yen, ī gerere tuan  
ibodok ile, dum ī Israel tamo kayau meleid bun wō  
yen.

### Jesus Gō Fen

(Matyu 1:18-25)

**2** Sain anī bun, Sisa † Ogastus, Rom teneub ganan bun, tamo kayau an temeleid anī yeneid yaleya nigin od inon. <sup>2</sup> (Eī urug bagai, sain Kwirinius ī Siria nē gawaman mudur ibod mog, tamo kayau yeneid dalen.) <sup>3</sup> Anī nigin, ganan dogo dogo neid taun bun yeneid inoya nigin dilen.

† Rom neid king odug.

<sup>4</sup> Anī nigin, Josef īg, oun Galili teneub Nasaret taun bun tamal Judia iselen, Betlehem Dawid nē taun bun iselen, ere nigin, ī Dawid nē fonō ado in ibor bun tamal. <sup>5</sup> Ī Maria ado yeneid dinouf nigin diselen, ī Maria aiwauf nigin digirin, anī ī bou ado. <sup>6</sup> Idi an dibod mog, kesu gō fiya sain wō yen. <sup>7</sup> Age fe di, kesu monog matu gō fen. Maria ī gabar nem silef fen, yaro neid beī bun inenen, ere nigin, tamo irouya fō bun modoū isokosen.

### Gaar Lo Fediya Tamo, Engel Geid

<sup>8</sup> An gaar lo fediya tamo, melsā fonō yerin dibod ken, bō nedi gaar lo difedin. <sup>9</sup> Age de mog, Odug nē engel idi bun wō yen, age fe di, Odug nē fula fiya medeīya kerub fedī di, idi kumī tererē den. <sup>10</sup> Anī ere, engel idi irokenēdin, “Ā to kumī wog, aya od biya, tamo kayau ganan waud al fouf nigin arou asif. <sup>11</sup> Ere nigin, gama Dawid nē taun bun, āgenei isenneīya wō yel, ī anī Kristus Odug. <sup>12</sup> Enei ā bun uris. Ā momou taka gabar nem sile de fen, yaro neid beī bun dinenem yenek anī ulogouf.”

<sup>13</sup> Kaisā bagai, engel musei saa ilun temeleid ulolō deis, engel anī geid Negur yana dales diron,

<sup>14</sup> “Negur ilun bagai bun fula fiya medeīya, age fe di, tenebur ein tamo kayau ī el fedif bun, wau inosiya ibodōf.”

<sup>15</sup> Sain engel idi ditorneīd, saa ilun disele di, gaar lo fiya tamo abob dirokenen, “Odug ada irokanadal anī nigin, ada Betlehem teleg, ereb wō yel anī taileg.”

<sup>16</sup> Anī nigin, idi kaisā bagai dile, Maria, Josef ado dile-din, momou yaro neid beī bun yen mog, dilen. <sup>17</sup> Idi ī dile fen, idi kesu anī nigin wogō fiyēdin anī od wogō de diyon. <sup>18</sup> Age dife di, ganan karī den idi, gaar lo fiya tamo wogō difiyēdin anī nigin terē den. <sup>19</sup> Anī ere, Maria od anī ganan yale fen, waun ino fen, kisim dogol fen. <sup>20</sup> Gaar lo fiya tamo keku de fen, idi wogō fiyēdin kilei, ereb idi karī den ado dilen anī ganan nigin, Negur seli dabi fen, yana dalesen.

### Jesus Tempel Bun Dirou Dilen

<sup>21</sup> Naa eit bun, ī mulū ileya saine di, ī yana dū, Jesus den, yana are sina fau bou ado ya sā mog, engelem yun.

<sup>22</sup> Idi neid nonorou lilik fiya naa, Moses nē Lo ifaref kilei anī bure fele di, Josef Maria ado, Jesus Jerusalem, Odug ifenēya nigin dirou diselen, <sup>23</sup> (are Odug nē Lo itotoya bun ibodok kilei, “Kesu matu monog wō douf ganan, Odug wenēdigouf” †), <sup>24</sup> idi Negur sesewi fiya difenēf nigin diselen, Odug nē Lo eig ye irok kilei, “kuburir uru be, kukutir balas uru be.” ††

<sup>25</sup> Gama Jerusalem an tamo yana Simeon ibodon, ī madur bagai fen, Odug nigin karī yeledig. Ī Israel waud inosiya dalouf anī tari fedig, Awa Uur Fateul ī bun ibodon. <sup>26</sup> Awa Uur Fateulem, ī fau to laaf mog, Odug nē Kristus wō ye di, ilouf nigin irokenen. <sup>27</sup> Awa Uurem toli fiyē di, ī tempel nē modoū bun ilen. Sain ta-

ma sina ado, Lo irok kilei age difouf nigin, kesu Jesus dirou dile di, <sup>28</sup> Simeon imam ī yales fen, Negur yana yales iron:

<sup>29</sup> “Odug, ō uron kilei, ō gama ogon ferfer wau inosiya ado sur wo di, ilauf.

<sup>30</sup> Aya malaum bagai ogon isennēya anī ailel.

<sup>31</sup> Are ganan meleid bun saika won.

<sup>32</sup> Are haiden Israel sā anidi bun, Negur nē oroya kurō falaisiya nē lalan, ago di, are ogon tamo kayau Israel bun fula fiya medeīya.”

<sup>33</sup> Kesu tama sina ado, od anī karī de fen, kisi bun terefeit den. <sup>34</sup> Age dife di, Simeon el fiya ifeneīd fen, sina Maria irokenen, “Kesu enī, Israel tamo kayau musei kuku douf, musei fafā douf nigin ado, ī daū gen ifare di, ī dumen od sane dirōf nē uris wō youf nigin igirnen. <sup>35</sup> Anī bunem, musei waud bun dinokok are yaorouf. Age fe di, ogon malākanon anīg dig otem borū fouf.” <sup>36</sup> Profet kayau takag ibodon, Ana, Fanuel ne barai, Aser nē ibor bun tamal. Ī gai tubau bagai, ī tamo yale fen, aiwa ado yar sewen dibodon. <sup>37</sup> Agef fen, ī waab ibodok ile, in yar eiti-fo. Ī tempel to itoron, bō ado gaa ado kuri ye fen, kosē ye, Negur yana yalese-dig. <sup>38</sup> Sain anī bun bagai, ī idi gein isel, Negur de fiye ken, Jerusalem tamo kayau kafī fiya bun tamal kel yalediyouf nigin ganan tari de difaren anidi, kesu anī nigin wogō fiyēdin.

<sup>39</sup> Josef, Maria ado, Odug nē Lo irok anī ganan dō de kisi fele di, idi baban ke de, Galili teneub oun, nedi taun Nasaret dilen. <sup>40</sup> An, kesu ī biya fen, total adon, ī kisi biya barikan, agef fen, Negur nē wau ifenēya ī bun ibodon.

### Jesus Kesun Tempel Bun Ilen

<sup>41</sup> Yar ganan bun, in tama sina Pasa Sifa naa bun Jerusalem taun diledig. <sup>42</sup> Sain ī tuwelf yar mog, idi neid tobonunā dō de fen, Sifa bun diselen. <sup>43</sup> Sifa bure fele di, in tama sina fonō ke de dile mog, kesu Jesus ī fau Jerusalem ibodon, anī ere, idi to kelein. <sup>44</sup> Idi weim melef den, age de fen, naa tekelei diyon. Age dife fen, idi mogo nedi sirag tar bun ado, nedi tā tar atun dimirnen. <sup>45</sup> Idi ī to dile mā, idi ī dimirnē fenē nigin, Jerusalem taun baban ke de dilen. <sup>46</sup> Naa towo bure fele di, idi ī tempel modoū bun ifelnēdiya tamo atun ibod, karī fiyeīd fen, to fiyeīd mog, fotou difiyen. <sup>47</sup> Ganan ī karī difiyen are, in karīya nigin ado aiteid solo fen anī nigin, terefeit den. <sup>48</sup> Tama sina ado ī dile fen, fatuk bagai terē den. Sina ī irokenen, “Neu kesu, ere nigin eig wamam? Aya tamā ado waumā morō ken, mamirnom.”

<sup>49</sup> Ī to fen, “Ere nigin ā aya umir nagel? Aya neu Dei nē fō bun abodōf ya, ā keleī sā de?” <sup>50</sup> Anī ere, ī ereb irokenēdin are, idi to kelein.

<sup>51</sup> Age dife di, ī weim Nasaret disil fen, sigoreid dōf el fen. Anī ere, in sina anī ganan yale, waun inon. <sup>52</sup> Jesus kisi biya ado bouwa orib yen, Negur ado tamo nē lo fiya bun biya len.

### Jon Naan Igunēdiya Tamo Naab Dodok Fenen

(Matyu 3:1-12; Mak 1:1-8; Jon 1:19-28)

**3** Taiberius, Sisa mudur ibodon yar fiftin bun, Pontius Pailat ĩ Judia distrik nē gawaman mudur ibodon, Herod ĩ Galili distrik lo fen, ĩ tura Filip Ituria distrik ado Trakonitis distrik lo fen, age fe di, Lisantias ĩ Abilene distrik lo fen. <sup>2</sup> Anas Kaiafas ado pris mudur dibodon sain bun, Negur nē od gerere tuan oun Jon, Sekaraia naal bun isin. <sup>3</sup> ĩ Jordan naan kalilī fiya ganan bun iyo ken, waud falei de fen, naan digū di, mosor yalel kenēdiyof nigin biya od wogō yen. <sup>4</sup> Are profet Asaia nē itotoya bun ibodok kilei: "Ait taka gerere tuan iweig irok, 'Odug nē naab dodok ge fen, madur wenēg. <sup>5</sup> Uus ganan bun kurokirīya yoso foug, arei ganan mudu ganado gudū falaisi tenebur ouf. Naab goigul yedin, madur foug, naab koūkī yediya yoso fediyof. <sup>6</sup> Age fe di, tamo kayau ganan, Negur nē tamo kayau kel gei fiya anī dilouf." †

<sup>7</sup> Tamo kayau Jonem naan igunēdiyof nigin guru difen anidi Jon irokenēdin, "Ā, gogour sane gere tar! Negur nē didi isiyof anī wal ge fen, uyagauf nigin, aim irokenein? <sup>8</sup> Wauī falei gef are, faat biya ū gouf. Ā aug nigin to eig ge urōg, 'Abraham nemā tamamā.' Aya arokeneik, meein enidi Negur sā irō di, Abraham gere tar wowā douf. <sup>9</sup> Safor aayū gariyan mogo ibodok, aayū ganan faat biya to yuk, are itu ira ken, yā malan irāf."

<sup>10</sup> Tamo kayau guru difen anidim to difen, "Age fiyauf are, amā naig mafouf?" <sup>11</sup> Jon aitedin yale iron, "Tamo ĩ gabar uru adouf are, aib ĩ sā anī taka ifenēf, takag, taka ĩ saaf adouf, areg de age foug."

<sup>12</sup> Takis yaleya tamog, naan igūya nigin disin, idi to difen, "Tise, amā ere naig mafouf?"

<sup>13</sup> ĩ irokenēdin, "Ā yaleya kilei anī to wal woseg waleg." <sup>14</sup> Age fe di, kuśi tamo tunī to difiyen, "Ba amā ere naig mafouf?" Age de di, ĩ iron, "Ā nedi moni nigin ge fen, to fefu wiyēdig fen, idegēya bunem tamo kayau bouweid bun od to ūg. Āgenei kabī mala walegedig anī bun dogol al gouf."

<sup>15</sup> Tamo kayau Kristus nigin tari difen, anī nigin, idi ganan waud bun Jon anī Kristus be de fen, kisi musei dalen. <sup>16</sup> Jon idi ganan aitedin yale irokenēdin, "Aya naan nem naan aguneik. Anī ere, taka ĩ in megeir neu wal fiya fau isif, aya to biya nigin, ayam in su nē malū biru felediya kisi feleya sā. ĩ Awa Uur Fateul yā ado nem naan igunēf. <sup>17</sup> ĩ es fiya nē fok iman ado, ĩ yogon mayā wā foug, yogon wit biya are yogon ki bun kuruf fen, wit ido yā mala faimud bun an irāf." <sup>18</sup> Agef fen, Jon od musei bunem, tamo kayau waud yale fen, biya od wogō fiyēdin.

<sup>19</sup> Anī ere, Jonem, Herod tano anī nē mudur, tura nē aiwa Herodias nigin ado ereb ereb sane ganan age fen nigin ou fiyē di, <sup>20</sup> Herod mosor ganan mosor enei ado baguf fen, ĩ Jon kalabus bun inenen.

### Jesus Naan Igun Ado In Ibor Nigin (Matyu 1:1-17; 3:13-17; Mak 1:9-11)

<sup>21</sup> Sain Jonem tamo kayau ganan naan igunēf fen, Jesus ĩg naan igunen. Age fe di, Jesus kosē ye mog, saa kā fele di, <sup>22</sup> Awa Uur Fateul kuburir bouwa bun genem ĩ bun isin. Age fe di, ait taka saa ilunem isin, "Ō neu Kesu, ō nigin aya wau laa fedig, ō nigin aya wau kulī yedig."

<sup>23</sup> Gama Jesus yogo ĩ yar teti age fiya bun kabī gariya inon. Tamo kayau kisi difen, ĩ Josef naal den,

Heli naal, <sup>24</sup> Matat naal,  
Lewi naal, Melki naal,  
Janai naal, Josef naal,  
<sup>25</sup> Matatias naal, Amos naal,  
Nahum naal, Esli naal,  
Nagai naal, <sup>26</sup> Mat naal,  
Matatias naal, Semen naal,  
Josek naal, Joda naal,  
<sup>27</sup> Joanan naal, Resa naal,  
Serubabel naal, Sieltiel naal,  
Neri naal, <sup>28</sup> Melki naal,  
Adi naal, Kosam naal,  
Elmadam naal, Er naal,  
<sup>29</sup> Josua naal, Elieser naal,  
Jorim naal, Matat naal,  
Lewi naal, <sup>30</sup> Simeon naal,  
Juda naal, Josef naal,  
Jonam naal, Eliakim naal,  
<sup>31</sup> Melea naal, Mena naal,  
Matata naal, Natan naal,  
Dawid naal, <sup>32</sup> Jesi naal,  
Obed naal, Boas naal,  
Salmon naal, Nason naal,  
<sup>33</sup> Aminadab naal, Ram naal,  
Hesron naal, Peres naal,  
Juda naal, <sup>34</sup> Jakop naal,  
Isak naal, Abraham naal,  
Tera naal, Nahor naal,  
<sup>35</sup> Serug naal, Reu naal,  
Peleg naal, Eber naal,  
Sela naal, <sup>36</sup> Kainan naal,  
Arpaksad naal, Sem naal,  
Noa naal, Lamek naal,  
<sup>37</sup> Metusela naal, Enok naal,  
Jared naal, Mahalalel naal,  
Kenan naal, <sup>38</sup> Enos naal,  
Set naal, Adam naal,  
Negur naal.

### Satan Jesus Kisi Fiyen

(Matyu 4:1-11; Mak 1:12, 13)

**4** Jesus Awa Uur Fateulem aura fiyen, Jordan naanum kel fen, Awa Uurem itonē, gerere tuan irou ilen. <sup>2</sup> An ĩ naa foti ibod mog, Satanem kisi fiyen. ĩ sain anī bun ereb taka to yon, naa foti bure fele di, ĩ nau fen.

† Asaia 40:3-5

<sup>3</sup> Agef mog, Satanem Jesus irokenen, "Õ Negur Naal ouf are, meein enei urokenë di, bret falei fouf."

<sup>4</sup> Jesus Satan aiten yale iron, "Negur nê Itotoya bun eig ye irok, 'Tamo bretem dogol to mata ifenëf.' †"

<sup>5</sup> Satan Jesus yale irou, modoũ ilun isel fen, kaisã bagai teneub enei nê tano ganan ifelnen. <sup>6</sup> Agef fen, Satan Jesus irokenen, "Aya õ teneub enei nê biya fiya megeir ado ganan afonõf, ere nigin, are aya ifanan, anĩ nigin, aya aib taka ifenëya orouf are afenëf. <sup>7</sup> Anĩ nigin, õ aya selu wabiyouf are, onou ganan are ogon ouf."

<sup>8</sup> Jesus Satan aiten yale iron, "Negur nê Itotoya bun eig ye irok, 'Odug ogon Negur seli wabi fen, ï dogol aruna walouf.' ††"

<sup>9</sup> Satan Jesus yale irou, Jerusalem taun ilen, an tempel fõ soko ilun bagai inenë, ifaren. Satan iron, "Õ Negur Naal ouf are, ogo einenem ufũ urã. <sup>10</sup> Ere nigin, Negur nê Itotoya bun eig ye irok:

"Negur õ nigin yogon engel ari fedi di, kulatun diyõf,

<sup>11</sup> idi õ imedim ololon daleyõf,

age dife di, õ yë meein takam to itutu ouf.' ††"

<sup>12</sup> Jesus Satan aiten yale iron, "Eig ye irok, 'Odug ogon Negur kisi fiya bun to unenë.' †††"

<sup>13</sup> Satan kisi fiya enei ganan bure fel fen, ï Jesus itorne ken, ï fau sain taka anĩ tari fen.

### Nasaret Tamo Kayau Idi Jesus Dudum Difiyen

(Matyu 4:12-17; Mak 1:14, 15)

<sup>14</sup> Jesus Awa Uur nê megeir bunem Galili kel ilen, age fe di, ï nigin od Galili teneub fonõ fonõ ganan iyokelen.

<sup>15</sup> ï idi neid uub fõ fõ bun biya od ifelnëdi di, ganan ï yana dalesen.

<sup>16</sup> ï Nasaret ilen, ï an biyan nê, agef fen, Sabat naa †† bun, idi neid uub fõ namen ilen, gai age fedig gen.

Agef fen, ï iwesauf nigin fã ye ifaren. <sup>17</sup> Age fe di, profet Asaia nê itotoya buk kori fiya anĩ difenen, age dife di, ï fara fel fen, eig ye itoton anĩ imiren:

<sup>18</sup> "Odug nê Awa Uur aya bun ibodok, ere nigin, ï aya maleg anidi biya od wogõ afediyouf nigin, igirna fen, mudurou bun mouf fi felen.

ï, aya kalabus bun difaref anidi karika dalouf nigin ado,

meleid ifofakeleya anidi meleid fara falauf nigin, kurõ afalaisiyouf nigin sur fiyan.

Tamo kayau tunim kiwai difeneid fen, morõ difenëdif anidi yalel kenëdiya nigin sur fiyan.

<sup>19</sup> Takag, Odug nê biya fiya nê yar anĩ kurõ afalaisiyouf nigin sur fiyan." †††

<sup>20</sup> Age yel fen, ï gaar gabar itotoya ado are korif fen, itotoya anĩ lo fedig tamo, kel ifen ken, ibodon. Juda neid uub fõ anĩ bun difaren ganan bagai, Jesus lo difelen. <sup>21</sup> Age dife di, ï gariya ino fen, irokenëdin, "Gama naa enĩ bun, Negur nê Itotoya enei, ägenei karĩa bun kisi felel."

† Diuteronomi 8:3 †† Diuteronomi 6:13 † Sam 91:11, 12  
†† Diuteronomi 6:16 †† Juda neid uub naa, are Sarere. †††  
Asaia 61:1, 2

<sup>22</sup> Ganan ï yana dales fen, ï sigoron, wau ifenëya od wogõ yen anĩ nigin terë den. Age de fen, idi to difen, "Eï Josef naal anĩ sã de?"

<sup>23</sup> Jesus idi irokenëdin, "Momoi bagai, aya nigin od enei tamo kayau musei wogõ dedig wogõ gouf, 'Dokta, õ ogo ogon dagi el wo! Ereb Kapenaum taun oun agon karĩ maun anĩ, ogon fõ gariyan ein ago wo.'"

<sup>24</sup> ï od tobol fe fen, iron, "Aya ã momoi arokeneik, profet taka ï yogon fõ gariyan to karĩ difiyëf. <sup>25</sup> Aya ã momoi bagai arokeneik, Eliya nê sain bun, Israel oun kayau waab musei difar mog, yar towo ogõ sigis saa katĩ fele di, teneub ganan bun uyë sã naũ odug difaren. <sup>26</sup> Age de mog, Negur idi anidi taka bun Eliya to sur fen, anĩ ere, waab taka Sarefat oun Saidon teneub bun sur fen. <sup>27</sup> Takag, Israel oun profet Elisa nê sain bun, musei lepra dagi ado dibodon, anĩ ere, idi atun taka lepra dagi to loko felen, Naman, Siria tamalem dogol."

<sup>28</sup> Juda neid uub fõ bun, ganan anĩ karĩ de fen, waud sanen. <sup>29</sup> Age de fen, idi fafã de fen, ï taun anĩ itor ilauf nigin dirun. Nedi taun are, arei bun nigin, siya sane bun dirãf nigin dirou dilen. <sup>30</sup> Anĩ ere, ï tamo kayau atu iyok ile fen, yogon naab ilauf nê anĩ dõf ilen.

### Jesus Kaa Sane Irun

(Mak 1:21-28)

<sup>31</sup> Agef fen, ï Kapenaum taun isilen, taun are Galili distrik bun ibodok, an Sabat naa bun, ï tamo kayau ifelnëdiya gariya inon. <sup>32</sup> Idi ï ifelnëdin anĩ nigin terë den, ere nigin, in od wogõya are megeir ado.

<sup>33</sup> Juda neid uub fõ bun, tamo taka kaa sanem irounen anĩ an ibodon. ï ait ilun feis iweig iron, <sup>34</sup> "O, Jesus Nasaret tamal, õ amã ere naig wamã fenë? Õ amã daũ wamã fenë nigin usil de? Aya õ nigin keleĩ, Negur nê Fateul anĩ!"

<sup>35</sup> Jesus totol ado iron, "Foro wol! ï namen tamal ulõ weis!" Age ye di, kaa sane anĩ, tamo kayau ganan atun, tamo anĩ tou fiyë ira ken, ulõ yeis ilen, tamo are bouwa to daũ fen.

<sup>36</sup> Tamo kayau ganan terë de fen, abob dirokenen, "Eï ere keleĩ eig fiya? ï yana megeir adom irõ di, kaa sesen ulõ deis dilef." <sup>37</sup> Anĩ bunem, ï nigin od teneub anĩ kalilĩ fiya ganan bun iyokelen.

### Jesus Musei El Fedin

(Matyu 8:14-17; Mak 1:29-39)

<sup>38</sup> Jesus Juda neid uub fõ itor ken, Simon nê fõ bun ilen. Simon nê mam, ï bouwa uruwa odug ado nigin yenen anĩ, isennëf nigin Jesus to difiyen. <sup>39</sup> Anĩ nigin, Jesus ï itirne ken, bouwa uruwa dagi ou fiyë di, itornen. Age fe di, kayau anĩ kaisã bagai fã yale, aruneid yalen.

<sup>40</sup> Gaa kuru kel mog, tamo kayau, dagi tamo dagi gariya fire fire adodo ganan, Jesus wagen guri difeid disin, age dife di, idi mugu mugu bun ima tetedin ino fen, ï idi el fedin. <sup>41</sup> Kaa sesen, tamo kayau musei bun, ulolõ deis fen, diweig diron, "Õ anĩ Negur Naal!" Anĩ

ere, ĩ sakã fiyeĩd fen, to wogõ douf nigin sigoreid ifofan, ere nigin, idi keleĩ, ĩ Kristus.

<sup>42</sup> Bonimeĩ gugum ado, Jesus moilin ilen. Tamo kayau ĩ dimirnek dile, ĩ ibodon nẽ disi fen, ĩ idi to itornẽdiyof nigin katũ difiyen. <sup>43</sup> Anĩ ere, ĩ iron, "Aya Negur nẽ tano nigin biya od, taun taka takag wogõ auf, ere nigin, aya anĩ nigin sur fiyan." <sup>44</sup> Age ye fen, ĩ Judia distrik oun Juda neid uub fõ fõ bun, biya od wogõ yef iyon.

### In Dõ Fiya Tar Enidi Ket Jesus Iweignẽdin

(Matyu 4:18-22; Mak 1:16-20)

**5** Naa taka bun, Jesus Genesaret daliyou † yerin ifaren. Agef mog, tamo kayau ĩ salili difiye ken, Negur nẽ od wogõ ye di, karĩ de difar mog anĩ, <sup>2</sup> ĩ mala ira kel, waag uru naan yerin difar mog, ilen, are gau yaleya tamom an ditor yen ken, nedi kakãg kulo difen. <sup>3</sup> ĩ waag anidi taka bun sõ yen, are Simon nẽ waag, agef fen, waag naanũ naal godof irou ilauf nigin to fiyen. Agef fen, ĩ waag bun ibod ken, tamo kayau biya od ifelnẽdin.

<sup>4</sup> Sain ĩ wogõya bure fel fen, ĩ Simon irokenen, "Waag naan mala bun urou ule fen, gau yaleya nigin kakãg urofossil."

<sup>5</sup> Simon aiten yale iron, "Odug, amã bõ odug kabĩ totol malel, anĩ ere, ereb taka to malel. Anĩ ere, õ urok nigin aya kakãg baban arofosilauf."

<sup>6</sup> Sain idi age difen, idi gau musei bagai gei difen, age dife di, nedi kakãg serek fou fenẽ melsan. <sup>7</sup> Anĩ nigin, idi, nedi tã tar waag taka bun temeleid disi disenẽdiyof nigin, gale difiyẽdin, age dife di, disi, waag uru bun gau dife isokos fen, waag uru are dimutũ fenẽ melsan.

<sup>8</sup> Sain Simon Pita enĩ ile fen, Jesus iboron bobou fe fen, iron, "Odug, aya utorna ule, aya mosor nẽ tamo!" <sup>9</sup> Ere nigin, ĩ ne tã tar geid gau gei difen anĩ nigin, terefeit den. <sup>10</sup> Sebedi gere tar Jems Jon ado, are Simon ne kabĩ tura tar idig age difen. Age dife di, Jesus Simon irokenen, "Õ to kumĩ wo, gama naa enĩ bunem ilauf ganan, õ tamo gei wouf." <sup>11</sup> Age fe di, idi neid waag fi-teiwõ didĩ dife di, isel fen, ereb ereb ganan ditorara ken, Jesus dõ difen.

### Tamo Lepra Dagi Ado

(Matyu 8:1-4; Mak 1:40-45)

<sup>12</sup> Jesus taun taka bun ibod mog, tamo taka lepra guruma barikã anĩ isin. Sain ĩ Jesus ile fen, ĩ tenebur kubũ ye kumokur fe, Jesus igone ken, iron, "Odug, õ oroyõf are, el wiyauf."

<sup>13</sup> Jesus ima irã, tamo anĩ kobũ fiye ken, iron, "Aya wau irok, õ bouwã biyauf." Age ye di, kaisã bagai, lepra dagi ĩ itornen.

<sup>14</sup> Agef fen, Jesus tamo anĩ irokenen, "Õ aib taka to urokenẽf, anĩ ere, õ pris wagen ule, õ bouwã ufelnef, õ bouwã biyal anĩ nigin Moses nẽ od irok anĩ dõ fen, sesewi fiya wenẽf, anĩ bunem yaore di, tamo kayau dilouf."

† Are, Galili Maaĩ.

<sup>15</sup> Anĩ ere, ĩ nigin od fau fau iyok ilen, anĩ nigin, tamo kayau musei ĩ karĩ difiye ken, idi neid dagi yalel kenẽdiyof nigin disin. <sup>16</sup> Anĩ ere, Jesus sain taka taka moilin ile fen, kosẽ yedig.

### Jesus Tamo Bouwa Ilolaisin Anĩ El Fiyan

(Matyu 9:1-8; Mak 2:1-12)

<sup>17</sup> Naa taka bun, ĩ biya od ifelneĩd mog, Farisia tamo, lo ifelnẽdiya tamo geid, Galili distrik fonõ ganan, Judia distrik ado Jerusalem temeleid idi an dibodon. Age de mog, dagi el fediyof nigin Odug nẽ megeir, ĩ bun ibodon. <sup>18</sup> Tamo tunĩ, tamo ilolaisin anĩ, gabgab bun faali de dirou disi, Jesus wagen dinenẽf nigin fõ namen dirou dilau fenẽ age difen. <sup>19</sup> Idi anĩ age fiya nigin naab taka to dilen, ere nigin, tamo kayau ino yalen, idi fõ sokoron disel, soko korõ difel fen, ĩ gabgab ado folo folõ dife di, tamo kayau atun, Jesus wagen bagai isilen.

<sup>20</sup> Jesus idi neid momoia ile fen, ĩ iron, "Mou, ogon mosor alelkonok."

<sup>21</sup> Farisia tamo, lo ifelnẽdiya tamo geid, idi dogo namedin kisi difen, "Eĩ aim bagai, kono fiya od wogõ yef? Taka nem mosor yaleleya to yenek, Negur yogo dogol."

<sup>22</sup> Jesus idi kisi difen anĩ keleĩ ken, to fen, "Ã ere nigin nameĩ bun agog kisi gef? <sup>23</sup> Od nanĩ anĩ aya wogõya nigin karika, 'Ogon mosor alelkonok' de, 'Fã wale fen, uyok ule?' <sup>24</sup> Anĩ ere, Tamo Naal ĩ tenebur ein mosor yaleleya nigin yana ado anĩ, ã keleĩ youf nigin..." ĩ tamo ilolaisin anĩ irokenen, "Aya õ arokonok, fã wo, ogon gabgab wale fen, fonõ ule." <sup>25</sup> Age ye mog bagai, ĩ fã ye, idi wagedin ifaren, yogon yenen gabgab yale, Negur yana yalesef, fonõ ilen. <sup>26</sup> Ganan terẽ de fen, Negur yana dalefen. Idi waud bun terefeit ye fen, diron, "Ada gama tobonunã fire bagai tailel."

### Jesus Lewi Iweignen

(Matyu 9:9-13; Mak 2:13-17)

<sup>27</sup> Enei bure fel fen, Jesus ile, takis yaleya tamo yana Lewi, an yogon takis yaleya fõ bun ibod mog, ilen. Jesus ĩ irokenen, "Aya dõ wiya." <sup>28</sup> Age ye di, Lewi fã ye, ereb ereb adok itor yen, Jesus dõ fiyen.

<sup>29</sup> Agef fen, Lewi yogon fõ bun, Jesus nẽ saaf odug yabi di, takis yaleya tamo musei, tunĩ geid weim saaf don. <sup>30</sup> Anĩ ere, Farisia tamo, idi neid lo ifelnẽdiya tamo geid, Jesus nẽ dõ fiya tar bun nauseir den, "Ã ere nigin takis yaleya tamo, mosor adodo geid, saaf ado naan wõgef?"

<sup>31</sup> Jesus idi aitedin yale iron, "Dagi sã anidim dokta nigin waud to yenẽdig, dagi adodom dogol. <sup>32</sup> Aya madur tamo anidi iweignẽdiya nigin to asin, mosor adodo tamo anidi waud falei douf nigin asin."

### Kuriya Nigin Jesus To Difiyen

(Matyu 9:14-17; Mak 2:18-22)

<sup>33</sup> Farisia tamo idi ĩ dirokenen, "Jon nẽ dõ fiya tar, idi kuri de fen, kosẽ dedig, Farisia tamo neid dõ fiya tar idig age fiya, anĩ ere, ogon idi dobu dirak."

<sup>34</sup> Jesus aitedin yale iron, "Mois ĩ fau ne tã tar weim dibod mog, ã ne tã tar idi kuriya nigin urokenēdigouf anĭ kisi feleya de? <sup>35</sup> Anĭ ere, naa fau isi di, anĭ bun mois tamo idi bun tamal yalelnē di, naa anidi bun idi kuri douf."

<sup>36</sup> Jesus yaab od enei idi irokenēdin, "Taka nem gabar masak mata serek fe fen, gabar tubu bun to iwadig. ĩ age foug are, ĩ gabar mata anĭ serek foug, takag, gabar mata bun tamal masak are tubu anĭ ado to susu falauf. <sup>37</sup> Takag, taka nem wain mata meme gabar † tubu bun to itinēf. ĩ age foug are, wain mata anĭ, meme gabar gē ye fen, serek foug. Age fe di, wain anĭ oho yeis fen, meme gabar sane lauf. <sup>38</sup> Age fiya sã, wain mata, meme gabar mata bun itinēf. <sup>39</sup> Agef fen, taka nem wain tubu yakas fen, mata to orodig, ere nigin, ĩ irok, 'Tubu are de biya.'"

### Jesus ĩ Sabat Naa Nē Odug

(Matyu 12:1-14; Mak 2:23-3:6)

**6** Sabat naa taka bun, Jesus in dō fiya tar geid, wit kabĭ atu diyok dile fen, in dō fiya tar wit biya tunĭ fito difen, imeid bun orok de fen, nedi ilo don. <sup>2</sup> Farisia tamo tunim to difen, "Å ere nigin Sabat naa bun ĩtãfiya ufoduleg fen, tobonunã enei ago gef?"

<sup>3</sup> Jesus aitedin yale irokenēdin, "Sain Dawid, ne tã tar geid naũ fedi di, age fen anĭ, ã to uwesegen de? <sup>4</sup> ĩ Negur nē fō namen ile fen, bret fateul prisem dogol dōdig †† an ibodon anĭ yokon, ĩ bret tunĭ ne tã tareg ifenēdin." <sup>5</sup> Age ye fen, Jesus idi irokenēdin, "Tamo Naal ĩ Sabat naa nē Odug."

<sup>6</sup> Sabat naa taka bun, ĩ Juda neid uub fō bun ile, biya od ifelnēdin, sain anĭ bun, tamo taka ima biya melem gege fefu fiya anĭ an ibodon. <sup>7</sup> Farisia tamo, lo ifelnēdiya tamo geid, idi Jesus bouwa bun od dinouf nigin naab dimiren, anĭ nigin, idi ĩ Sabat naa bun dagi el fe mog, mailauf de fen, ololo difen. <sup>8</sup> Anĭ ere, Jesus idi neid kisi kelei ken, tamo ima gege fefu fiya anĭ irokenen, "Fã wo fen, ganan meleid bun ufar." Age ye di, ĩ fã yale, an ifaren.

<sup>9</sup> Age fe di, Jesus idi irokenēdin, "Aya ã to ayeik, nanĭ anĭ Sabat naa bun lo dō fiya? Biya age fiya anĭ de, sane age fiya anĭ, oo, isennē di, mata ibodōya anĭ de, daũ fiya anĭ?"

<sup>10</sup> Jesus idi ganan fele feid le fen, tamo anĭ irokenen, "Imã yaĩ wo." ĩ yaĩ fe di, in ima oditekei biya len. <sup>11</sup> Anĭ ere, idi waud fatuk sane fen, mogo Jesus naig tafiyēf de fen, dogo tutur katō difen.

### Jesus Aposel Tuwelf Igirnēdin

(Matyu 10:1-4; Mak 3:13-19)

<sup>12</sup> Anĭ sain bun naa taka, Jesus arein kosē youf nigin iselen, bō anĭ bun Negur kosē fiyen. <sup>13</sup> We fele di, bonimei, Jesus in dō fiya tar wagen iweig laisi fen, idi atun tuwelf geif fen, idi anidi aposel wowã douf nigin igirnēdin. <sup>14</sup> Simon (Jesus ĩ yana yun Pita), in tura Endru, Jems, Jon, Filip, Batolomyu, <sup>15</sup> Matyu, Tomas, Jems Al-

† Juda neid tobonunã, idi meme gabar nem darum diwadig.

†† Lo bun, bret fateul anĭ, prisem dogol dōdig.

feus naal, Simon ĩ anĭ Selot † taka, <sup>16</sup> Judas ĩ Jems naal, Judas Iskariot, inim dum Jesus kiwai imeid bun inenen.

### El Fiya Ado Malalon

(Matyu 4:23-5:12)

<sup>17</sup> Jesus idi geid weim disil, teneub uus bun difaren. In dō fiya tar musei ado, tamo kayau musei biya, Judia distrik kaliĭ fiya ganan temeleid, Jerusalem temeleid, Taia Saidon taun ado neid ubun temeleid, an difaren, <sup>18</sup> tamo kayau anidi Jesus karĭ difiyē fenē nigin ado, idi neid dagi el fediyouf nigin, disin. Idi kaa sesenem morō difenēdin are el fedin. <sup>19</sup> Tamo kayau ganan ĩ kobũ difiyē fenē age difen, ere nigin, megeir ĩ bunem isi fen, idi ganan el fedin.

<sup>20</sup> Jesus in dō fiya tar lo fiyeĩd fen, iron:

"Å aib maleg are el yeik, ere nigin, Negur nē tano are āgenei.

<sup>21</sup> Å gama naũ ufaregef are el yeik, ere nigin, ã nameĩ isokosauf.

Å gama maruĩ isif are el yeik, ere nigin, ã kasã gouf.

<sup>22</sup> Tamo Naal nigin, tamo kayau sane diyeik, diruyei ken, kono diyeik,

ã yeneĩ sane dile fen, to orodif are, Negur ã el yeik.

<sup>23</sup> "Naa anĭ bun, wauĩ kulĩ ye fen, wauĩ al foug, ere nigin, āgenei mala solo odug oun saa ilun ibodok. Ere nigin, temeid tar profet nigin de age difedin.

<sup>24</sup> "Anĭ ere, safineĩ ado ã meleĩlon ado, ere nigin, āgenei wauĩ isenneĩya mogo walegel.

<sup>25</sup> Nameĩ gama isokosef ã meleĩlon ado, ere nigin, ã naũ ulagauf.

Gama kasã gef ã meleĩlon ado, ere nigin, ã fau wauĩ gudũf fen, maruĩ isiyouf.

<sup>26</sup> Å nigin tamo ganan biya de fen, wogō def ã meleĩlon ado,

ere nigin, temeid tar idegēya profet nigin de age difedin.

### Kiwai Tar Nigin Wau Laa Fiya

(Matyu 5:38-48; 7:12a)

<sup>27</sup> "Anĭ ere, ã aib aya karĭ wiyagef anĭ arokeneik: Ågenei kiwai tar nigin wauĩ laa foug, ã kiwai difeneik anidi nigin biya ago gouf. <sup>28</sup> Idi ã disisneik el fiya wenēdig, idi ã to biya diyeik anidi nigin kosē gouf. <sup>29</sup> Tamo taka ogon walã sitakã fakã foug, falei wel, walã sitakãg wenē. Tamo taka ogon saket yalouf are, ogon kolos yalouf nigin to katũ wiyē. <sup>30</sup> Wenēdiyof nigin to diyok are, wenēdiyof, aib taka ogon safinã yalef are, anĭ baban kel yaleya nigin to urokenēf. <sup>31</sup> Ereb taka idim age difekeneĩf anĭ oroyeik age fiya gen, āg idi bun ago gouf.

<sup>32</sup> "Idi ã nigin waud laa fef anidi nigin dogol wauĩ laa fef are, ã nigin ere mala ado? Mosor adodo idig, idi nigin waud laa fef anidi nigin, waud laa fedig. <sup>33</sup> Idi ã nigin biya diyeik anidi nigin biya ago gouf are, ã nigin ere mala ado? Mosor adodo idig age difedig. <sup>34</sup> Idi ani-

‡ Juda neid kusĩ mala taka, idi Rom gawaman ado kusĩ dedig.

di bun moni kel walogouf nigin kisig fen, moni wenēdigouf are, ā nigin ere mala ado? Mosor adodo idig, moni ganan kel yaleya nigin kisi de fen, mosor adodo tutur moni difenēdidig. <sup>35</sup> Anī ere, āgenei kiwai tar nigin wauī laa fouf, idi nigin biya ago wedigouf, ereb taka kel yaleya nigin to kisig fen, wenēdigouf. Ago gouf are, āgenei mala solo odug biyauf, agef fen, ā Negur Ilun Bagai nē gere tar wowā gouf, ere nigin, Negur ī idi to de difiyēdig sesen anidi ado, biya fiyēdidig. <sup>36</sup> Āgenei Temeī wau yūdig gen, āg idi nigin wauī ineīf.

### Ne Tā Es Fiyēya (Matyu 7:1-5)

<sup>37</sup> "Taka to es wiyēg, to ago gouf are, āg Negur to es yeīf. Taka bouwa bun od to ūg, to ago gouf are, āg Negur bouweī bun od to yūf. Mosor nigin wedereī tu kalauf, ago gouf are, Negur āgenei mosor nigin weder tu kalauf. <sup>38</sup> Wenēdig, ago gouf are, Negur ifeneīf. Ima su karikauf, lai fesil fen, baban teten ino isokose di, yokū fe di, awa gere fasauf, ā nigin gogū fouf. Tunī es wedigef gen, Negur āg agef es yeīf."

<sup>39</sup> Jesus yaab od enei irokenēdin, "Mala ifofakeleya tamo taka, mala ifofakeleya tura itonēya kisi feleya de? Idi urom bebeigir to kuku douf de? <sup>40</sup> Skul kesu in tise to wal fef, anī ere, taka ī keleī ganan yalef, yogon tise gen wō youf.

<sup>41</sup> "Ō ere nigin turā mala teteur lo fen, ō ogon aa masak malā bun ibodok anī to ulef? <sup>42</sup> Ō ogo aa masak ogon malā bun to ule fen, naig fe di, turā nigin dogol urokenek, 'Turau, utor len, aya ogon malā teteur alelkonōf? Ō mala yaleya tamo, ō ogon malā bun ketem aa masak walel fen, anī malā kare kele di, turā bun mala teteur walelauf.

### Aa Taka Yogon Faat Ado (Matyu 7:16-20; 12:33-35)

<sup>43</sup> "Aa biya ī faat sane to imadig, aa sane are faat biya to imadig. <sup>44</sup> Aa mugu mugu yogon faat bun, tamo ī keleī youf. Tamo kayau idi, wei biya barik bun to daledig, gira udum bun to daledig. <sup>45</sup> Tamo biya ī, yogon wau bun ereb biya kuru fedig anī bunem, tobonunā biya yaor fedig, age fiya gen, tamo sane, yogon wau bun ereb sane kuru fedig anī bunem, tobonunā sane yaor fedig. Yogon wau bun isokosef, yogon sigor bun wogō yedig.

### Fō Inoya Nē Keleī Tamo, Neneya Tamo Ado (Matyu 7:24-27)

<sup>46</sup> "Ere nigin ā aya nigin 'Odug, Odug,' ge fen, aya orok anī to ago gedig? <sup>47</sup> Taka ī wageun isi, neu od karī ye fen, dōf age fef, ī naig fiya anī aya ā afelneīf. <sup>48</sup> Ī fō inoya tamo taka, ku fatuk yale fen, meein teten fō gariya inon gen. Sain kuwei isin, wī ye fen, fō yun, anī ere, fō anī yokū fiya kisi feleya sā, ere nigin, fō are total ado inon. <sup>49</sup> Anī ere, taka ī neu od karī ye fen, to dōf age fef, ī tamo taka teneub bun fō gariya sā inon gen. Sain kuwei wī ye fen, fō yun, fō anī kala fel, oditekei daūf irailen."

### Kusī Tamo Neid Orowa Nē Momoiya (Matyu 8:5-13)

<sup>7</sup> Jesus tamo kayau karī douf nigin enei ganan wogō bure fel fen, ī Kapenaum taun ilen. <sup>2</sup> An kusī tamo neid orowa nē ferfer taka, in odug ī nigin wau laa fedig anī, dagi fen, laa fou fenē age fen. <sup>3</sup> Kusī orowa Jesus nigin karī ye fen, Juda neid mudur adodo Jesus garan susur fedi di, ī isi fen, yogon ferfer el fiyēf nigin to difiyen. <sup>4</sup> Idi Jesus garan disi fen, total bagai digonen, "Tamo enei, ō enī agouf nigin kisi feleya bagai, <sup>5</sup> ere nigin, ī nemā tamo kayau nigin wau laa fedig, nemā uub fōg inon." <sup>6</sup> Anī nigin, Jesus idi geid dilen.

Ī mogo fō sirin mog, kusī orowa ne tā tar Jesus dirokenēf nigin sur fedin, "Odug, ō kabī total to walouf, ere nigin, aya to biya nigin aya kisi afef, ō neu fō bun to usiyouf. <sup>7</sup> Aya to biya nigin, aya ō garan isiya nigineg to kisi afen. Anī ere, ō od urō di, neu kabī tamo dagi fara falauf. <sup>8</sup> Ere nigin, aya yug nigin age fiya, ayag neu odug anī farumen abodok, kusī tamo idig aya farumeun dibodok. Aya taka enī arokenek, 'Ule,' afiyek, ī ilauf. Aya taka arokenek, 'Ō usi,' au di, ī isidig. Neu kabī tamo enī ago afiyek, ī anī age fedig."

<sup>9</sup> Kusī orowa od enī irō di, Jesus karī ye fen, ī nigin terē yen, agef fen, tamo kayau dō difiyen anidi bun falei yel iron, "Aya ā arokenek, aya Israel bun, momoiya odug eig fiya taka to ailen." <sup>10</sup> Age ye di, kusī tamo sur fedin anidi, fō bun ke de dile fen, ferfer anī dagi sā ibod mog, fotou difen.

### Jesus Kayau Waab Taka Nē Kesu Turī Fen

<sup>11</sup> Anī dumen, Jesus taun taka Nain ilen, in dō fiya tar, tamo kayau musei, ī geid weim dilen. <sup>12</sup> Ī mogo taun bobog kelē fiyē mog, laa tamo taka faali de disin, laa tamo anī kayau waab nē kesu tekelei bagai, tamo kayau musei taun temeleid kayau waab geid. <sup>13</sup> Sain Jesus kayau waab anī fele fiyen, in wau ī nigin gudūf fen, iron, "To inā wale."

<sup>14</sup> Age ye fen, ī isel, dege kobū fe di, faali difen idi, dē delen. Ī iron, "Tamo gaū, aya ō arokonok, fā wale!"

<sup>15</sup> Laa tamo anī fā ye ibod ken, od yen, age fe di, Jesus tamo anī ī sina kel ifenen.

<sup>16</sup> Age fe di, idi ganan kumī ado terefeit de fen, Negur yana dalesen. Idi diron, "Profet odug taka, ada atun wō yel. Negur yogon tamo kayau isennēdiyof nigin isil." <sup>17</sup> Jesus nigin, od enei Judia distrik kalilī fiya ganān iyokelen. Jesus,

### Jon Naan Igunēdiya Tamo Ado (Matyu 11:2-19)

<sup>18</sup> Jon nē dō fiya tar, enei ganān nigin Jon dirokenen. Jon idi uru iweigneīd fen, <sup>19</sup> Odug eig de to difiyēf nigin sur fedin, "Tamo isiyouf den, ō ogo yeir de, amā fau taka nigin malamā manouf?"

<sup>20</sup> Tamo Jesus garan disi diron, "Jon Naan Igunēdiya Tamo, ō to mayōf nigin amā sur famam, 'Tamo isiyouf



den, ò ogo yeir de, amã fau taka nigin malamã ma-nouf?"

<sup>21</sup> Sain anĩ bun bagai, Jesus, tamo kayau musei dagi adodo, darau adodo, kaa sesenem dirounēdin el feid fen, meleid ifofakeleya el fedi di, kelē den. <sup>22</sup> Jesus solof irokenēdin, "Kekug uleg fen, ã wedereim karĩ gel, meleim ulegel anĩ Jon wogō wiyēg, meleid ifofakelen kelē def, to diyon mogo diyok, lepra dagi adon mogo el fedin, wedereid daabun od karĩ def, gare den turĩ fedif, maleg bun biya od wogō fedif. <sup>23</sup> Tamo aya nigin wau to firagagaũ fef, Negur ĩ el fiyek."

<sup>24</sup> Jon nē arũ tamo ditornē dilele di, Jesus, tamo kayau guru difen anidi, Jon nigin irokenēdin, "Ã ere bagai anĩ ulogouf nigin, gerere tuan ulegen? Ã unin yaum walala fe di, ulogouf nigin ulegen de? <sup>25</sup> Anĩ sãf are, ere bagai ã ulogouf fenē, ulegen? Tamo taka kolos biya bagai ifonun de? Sã, idi kolos medeĩya biya difoun ken, safineid inid adodo are, king nē fõ bun dibodok. <sup>26</sup> Ere bagai anĩ ã ulogouf fenē, ulegen? Profet taka de? Ariya, aya ã arokeneik, ĩ profet wal fediya. <sup>27</sup> Tamo anĩ, ĩ nigin eig ye itoton:

"Aya neu arũ tamo sur afe di, ĩ uyu ilauf, im ket ogon naab dodok fouf.' †

<sup>28</sup> Aya ã arokeneik, kayau onudi kesu dalen idi atun, taka nem Jon to wal difiyen, anĩ ere, aib taka Negur nē tanon yana naal bagai ado, ĩ Jon wal fiya."

<sup>29</sup> (Tamo kayau ganan, takis yaleya tamog, sain idi Jesus nē od karĩ de fen, Negur nē naab anĩ biya den, ere nigin, idi Jonem naan igunēdin. <sup>30</sup> Anĩ ere, Farisia tamo, lo keleĩ tamo geid, idi dogo nigin Negur nē o-ya ditoron, ere nigin, idi Jonem naan to igunēdin.)

<sup>31</sup> "Tamo kayau sain enei bun, idi nigin ere bunem aya kisi afouf? Idi ere gen? <sup>32</sup> Idi simõ maket modoũ bun dibod ken, abob diweignēdidig gen:

"Amã ã nigin kelel maun,  
anĩ ere, ã to kui gen;  
amã kanon seg malen,  
anĩ ere, ã to inã walegen.'

<sup>33</sup> Aya enei wogō auf, ere nigin, Jon naan igunēdiya tamo isin, bret to yon, wain to yon, ã urõgef, 'Ĩ kaa sane ado.' <sup>34</sup> Tamo Naal isin, saaf yon, naan yon, ã urõgef, 'Eĩ dobu irãya tamal, ĩ, takis yaleya tamo, mosor tamo adodo geid, uyu kũ difedig.' <sup>35</sup> Anĩ ere, kisi biya ĩ, in dõ fiya ganan bunem, biya yaorouf."

### Mosor Kayaum Jesus Bun Moul Fi Felen

<sup>36</sup> Farisia tamo takam, Jesus ĩ ado saaf dãf nigin iweignen, anĩ nigin, Jesus ĩ Farisia tamo anĩ nē fõ bun ile fen, tebol bun ibodon. <sup>37</sup> Taun anĩ bun, kayau taka mosor ado ibodõdig, Jesus Farisia tamo anĩ nē fõ bun, saaf yoko yeya karĩ ye fen, kayau, moul sumeĩ biya bagai anĩ gulub †† ado irou isin. <sup>38</sup> Kayau ĩ Jesus dumen ye garan ifar, maru isi fen, Jesus ye lũ fen. Agef fen, kayau yogon fatiyam Jesus ye waĩf, umã fe, moul sumeĩ biya bagai, ye bun fi felen.

<sup>39</sup> Sain Farisia tamo Jesus iweignen anim, enei ile fen, ĩ yogo kisi bun iron, "Tamo enei profet takauf, ĩ aibem

† Malakai 3:1 †† Meein alabasta nem dinon.

kobũ fiyek, ĩ ere kayau, ĩ mosor kayau taka anĩ, keleĩ youf."

<sup>40</sup> Jesus ĩ irokenen, "Simon, aya ereb taka arokonõf." ĩ iron, "Tise, urokana."

<sup>41</sup> Jesus iron, "Tamo uru, moni tamo taka bun wareg dalen, taka faif tausen kina, taka faif hundred kina.

<sup>42</sup> Idi urom wareg ifenēya moni sã, anĩ nigin, moni tamo dogo neid wareg gudũ felen. Gama nanim anĩ, moni tamo nigin wau fatuk laa fouf?"

<sup>43</sup> Simon solof iron, "Aya kisi afef, taka ĩ wareg odug yalen anĩ gudũ fel kenen anim."

Jesus iron, "Õ tutuk es wol."

<sup>44</sup> Age ye fen, Jesus falei yel, kayau wage ifen ken, Simon irokenen, "Õ kayau enei ulef? Aya ogon fõ bun asil. Õ yeu kulo fiya nē naan taka to wanal, anĩ ere, kayau ĩ yogon marum yeu lũf fen, yogon fatiyam waĩ fel. <sup>45</sup> Õ to umã wiyal, anĩ ere, kayau enei, aya asour alel sain bun, ĩ yeu umã fel anĩ, fau fau umã fiyek. <sup>46</sup> Õ mudurou bun moul to unol, anĩ ere, kayau ĩ moul sumeĩ biya bagai, yeu bun fi felel. <sup>47</sup> Anĩ nigin, aya ò arokonok, kayau enĩ nē mosor musei yalelel, anĩ nigin, ĩ fatuk wau laa fen. Anĩ ere, aib taka mosor naal yalalen, ĩ wau laa fiya naal."

<sup>48</sup> Age ye fen, Jesus kayau irokenen, "Ogon mosor alelkonok."

<sup>49</sup> Tamo Jesus geid dibodon, tutur dogo dogol diron, "Eĩ aim, ĩ mosoreg yalelef?"

<sup>50</sup> Jesus kayau anĩ irokenen, "Ogon momoia anim isennom, waũ inosiya ado ule."

### Faat Irarãya Tamo Nē Yaab Od

(Matyu 13:1-23; Mak 4:1-20)

**8** Anĩ dumen, Jesus taun ado fonõ fonõ iyo ken, Negur nē tano nigin, biya od wogō yen. In dõ fiya tar tuwelf weim, <sup>2</sup> kayau tunĩ idi kaa sesen iruid fen, dagi el fedin idig weim: Maria (Magdala tamal) ĩ bun kaa sesen sewen irudi di, diyan, <sup>3</sup> Joana Kusa nē kayau, Kusa ĩ Herod nē fõ lo fiya tamo, Susana, musei tunĩ geid. Kayau eneidi, idi neid safineid nem disennēdin.

<sup>4</sup> Tamo kayau taun ganan bun temeleid, Jesus garan disis, moku de mog, ĩ yaab od enei iron, <sup>5</sup> "Kabĩ marau taka, faat irarãf nigin ilen. Sain ĩ irarak ile mog, tunĩ naab luwen kuku ren, are teten diyon, ninã ilun temeledim dakasin. <sup>6</sup> Tunĩ meein tuar kuku ren, are bali fokũ yeid fen, laasi yedin, ere nigin, idi lumi sã. <sup>7</sup> Faat tunĩ malũ duri atun kuku ren, are malũ duri, faat anĩ ado, odudug fen, malũ durim sile feledin. <sup>8</sup> Faat tunĩ teneub biya bun kuku ren, are fokũ yedin, biya imadin, gariya tekelei yogon biya wan hundred iman, biya anim gariya anĩ wal fiya."

Sain ĩ enĩ wogō ye fen, ĩ iweig iron, "Taka ĩ karĩya nigin weder ado, ĩ karĩ youf."

<sup>9</sup> In dõ fiya tar, yaab od enĩ nē gariya nigin, ĩ to difiyen. <sup>10</sup> Jesus iron, "Negur tano nigin, iminēya od nē keleĩ are, Negur ã mogo ifenein, anĩ ere, tunĩ bun aya yaab od nem wogō auf, anĩ bunem, "idi meledim diledig, anĩ idi meleid fokõya sã, idi wederedim karĩ dedig, anĩ idi gariya keleĩ sã.' ‡

<sup>11</sup> “Yaab od anī nē gariya eig fiya. Faat are Negur nē od. <sup>12</sup> Faat tunī naab luwen kuku ren are, tamo idi od karī den, Satan isi, biya od idi namedin ibodok anī yaleledig, anī bunem, idi to momoi de di, to isennēdiy-ouf. <sup>13</sup> Faat tunī meein tuar iraran are, tamo idi od karī de fen, waud bun kulīya ado od daledig, anī ere, idi warumutei sā. Idi sain naal bagai momoi def, anī ere, kisi fiya isi di, fara furu de diyaleledig. <sup>14</sup> Faat malū duri atun kubū yen are, tamo idi od karī den, anī ere, idi diyok dile mog, tenebur mata ibodōya nē suwēya, safina ado ibodōya nē kisi, bouwa nē oroya anidim idi sile fedi di, idi faat to yūf. <sup>15</sup> Anī ere, faat teneub biya bun kubū yen are, tamo idi, kisi biya, karīya biya ado, waud bun ibodok, od karī de fen, kafī difelef, anī total difaref, faat biya yūf.

### Lam Yoki Bun

(Mak 4:21-25)

<sup>16</sup> “Taka nem lam tōf fen, mis kur be, fatar farumen to inodig. Age fiya ban, ī yoki bun iseginē di, idi aaben disif, lalan dilouf. <sup>17</sup> Ereb ereb ganan iminēya yenek anī ganan yaor fouf, ereb ereb ganan nar fen yenek anī ganan irou isi, biru fel fen, yaau du fe di, keleī youf. <sup>18</sup> Anī nigin, ā kisi el ge waleg fen, ā karī gouf. Aib taka ī ado, aya toru afouf, age fe di, ī musei adouf. Taka ī sā bagai, ereb taka ī ado nigin ī kisi fef areg, ī bun tamal son fouf.”

### Jesus Nē Sina, Tura Tar Geid

(Matyu 12:46-50; Mak 3:31-35)

<sup>19</sup> Jesus nē sina, tura tar geid, ī dilouf nigin disin. Anī ere, idi ī wagen ileyā kisi feleya sā, ere nigin, tamo kayau musei. <sup>20</sup> Takam Jesus irokenen, “Ogon sinā, turā tar geid, ō dileyōf nigin serē difaref.”

<sup>21</sup> Jesus solof iron, “Neu naai ado turau tar, are idi Negur nē od karī de fen, dō difef anidi.”

### Jesus Yau Uyē Ado Irokenēdi Di, Kee Delen

(Matyu 8:23-27; Mak 4:35-41)

<sup>22</sup> Naa taka bun, Jesus in dō fiya tar irokenēdin, “Ada daliyou sitakā talauf.” Anī nigin, idi waag bun sō de dilen. <sup>23</sup> Idi solī de mog, Jesus mulaī yenen. Yau odug daliyou bun isi di, maaī waag namen isokosen. Idi morō odug fotou difen.

<sup>24</sup> In dō fiya tar dile, Jesus turī difiyē diron, “Odug, Odug, ada naanū talalau fenē!”

Ī fā yale, yau naan moloun wī yen ado, sakā fiyēdi di, yau uyē ado irorou kel, ganan dē delen. <sup>25</sup> Jesus in dō fiya tar to fiyēdin, “Āgenei momoiya nain?”

Idi kumī terē de fen, abob toti difen, “Eī aim bagai? Ī yau ado naaneg irokenēdi di, ī ait dō difef.”

### Jesus Tamo Taka Kaa Sesen Musei Ado El Fiyen

(Matyu 8:28-34; Mak 5:1-20)

<sup>26</sup> Idi Galili tamal daliyou dibal, Gerasa teneub bun dilen. <sup>27</sup> Sain Jesus ubun kutū yesin, taun anī bun ta-

mal, tamo taka kaa sesen ado ī tarabā fiyen. Sain meluk, tamo enei kolos sā, fō buneg to ibodōdig, anī ere, ī matmat bun ibodōdig. <sup>28</sup> Ī Jesus ile fen, kaī ye, Jesus ye gariyan kubū ye, ī ait odugem ige iron, “Ō aya ere naig wiyau fenē, Jesus, Negur Ilun Biya nē Naal? Aya ō agonok, ō aya to daig wiyauf!” <sup>29</sup> Ere nigin, Jesus mogo kaa sane tamo anī bun tamal ulō yesiyouf nigin irokenen. Sain musei kaa sanem ironē di, ye ima ado, sen nem difofādīg, age de fen, tari difiyēdig, anī ere, ī sen kokour fele di, kaa sanem wala ino di, moilin iledig.

<sup>30</sup> Age ye di, Jesus ī to fiyen, “Ō yana ai?”

Ī solof iron, “Aya yanau Ami,” ere nigin, kaa museim ī namen disilen. <sup>31</sup> Idi ku isil idīya sā modouf bun to sur fediyouf nigin, baba baban Jesus digonen.

<sup>32</sup> Arei wala sirin, bor musei biya an saaf doko difaren. Kaa sesen idi, bor namedin dilauf nigin, Jesus digonē di, Jesus idi yo fedin. <sup>33</sup> Kaa sesen, tamo anī bun tamal ulolō deis fen, bor namedin dilelen. Age dife di, bor gududu de, bebeig sane baurin daliyoun disil, naanū gare desin.

<sup>34</sup> Bor lo fiya tamo, ereb ereb wō yen anī dile fen, diya dile, od anī, taun ado fonō fonō wogō den. <sup>35</sup> Age dife di, tamo kayau, ereb wō yen anī dilou fenē dilen. Sain idi Jesus garan disin, kaa sesen tamo anī bun tamal diyalelen tamo anī, garab yel, kisi biya ado, Jesus ye gariyan ibod mog, dile fen, idi kumī den. <sup>36</sup> Tamo idi meledim dilen anidim, kaa sesenem tamo diroun anī, naig be el fiyen anī, tamo kayau wogō difiyēdin. <sup>37</sup> Age dife di, Gerasa teneub bun, tamo kayau ganan, Jesus itorneīd ilauf nigin, ī dirokenen, ere nigin, idi kumim lai fedin. Anī nigin, Jesus waag bun sō ye fen, itornēdin.

<sup>38</sup> Tamo ī bun tamal kaa sesen diyalelen anī, Jesus ado dilauf nigin igonen, anī ere, Jesus ī sur fiye ken, iron, <sup>39</sup> “Fonō kel ule fen, Negur ō nigin age fen anī wogō wouf.” Age ye di, tamo anī itor ilen, Jesus ī nigin age fen anī, taun ganan bun iyo ken, wogō yen.

### Kayau Naal Laa Fen Ado Dagi Kayau Taka

(Matyu 9:18-26; Mak 5:21-43)

<sup>40</sup> Sain Jesus kele di, tamo kayau musei, ī aan difiyen, ere nigin, idi ganan ī nigin ololo difen. <sup>41</sup> Age de mog, Juda neid uub fō lo fiya nē mudur taka, yana Jairus isi, Jesus ye gariyan kubū ye fen, yogon fō bun ileyā nigin igonen, <sup>42</sup> ere nigin, ī ne barai tekelei bagai, ī kayau naal tuwelf yar age fiya, mogo laa fou fenē.

Jesus naab ile mog, tamo kayau musei kiti de fen, kafī difiyē genen. <sup>43</sup> Kayau taka an ifaren, ogō dagi faimud ado, yar tuwelf iyon. Anī ere, taka nem ī to el fiyen. <sup>44</sup> Kayau ī Jesus dume ise, in kolos iri kobū fen, age fe di, kaisā bagai, kayau nē naud segē yelen.

<sup>45</sup> Jesus to fen, “Aim aya kobū fiyal?”

Idi ganan wa dife di, Pita iron, “Odug, tamo kayau musei kiti de fen, kobū diyok

<sup>46</sup> Anī ere, Jesus iron, “Aibem aya kobū fiyal. Aya keleī, total aya bun tamal ul fe yale!”

<sup>47</sup> Age ye di, kayau ī imin ken, ileyā kisi feleya san, tererē ye fen, isi, Jesus ye gariyan kubū yen. Tamo kayau ganan meleid bun, ī ereb nigin Jesus kobū fiyem ado,

naig be ĩ kaisā bagai biya lel anĭ, wogō yen. <sup>48</sup> Age ye di, Jesus kayau irokenen, "Nau barai, ogon momoiya anim el yom. Waū inosiya ado ule."

<sup>49</sup> Jesus fau od wogō ye mog, tamo taka, Juda neid uub fō lo fiya mudur Jairus nē fō bunem isin. ĩ iron, "Nē barai mogo laa fel. Baban ō tise morō to wenēf."

<sup>50</sup> Jesus od enei karĭ ye fen, Jairus irokenen, "To kumĭ wo, momoi dogol wo, ago di, kayau fau el fiyēf."

<sup>51</sup> Jesus Jairus nē fō bun wō ye fen, takam ĩ geid, aaben ileyā nigin katū fedin, Pita, Jon, Jems ado, kesu nē tama sina dogol. <sup>52</sup> Tamo kayau ganān, ĩ nigin waud gudūf fen, inā legur mog, Jesus iron, "To inā waleg. Kayau naal ĩ laa fiya sā, ĩ mulā yenek."

<sup>53</sup> Idi Jesus kasā difiyen, idi keleĭ, kayau naal laa fel. <sup>54</sup> Anĭ ere, Jesus ĩ ima yales fen, iron, "Neu kesu, fā wo!" <sup>55</sup> Kayau nē uur kelen, age fe di, kaisā bagai, fā yale ifaren. Age fe di, Jesus, ĩ ereb taka ifen yōya nigin, idi irokenēdin. <sup>56</sup> Kayau nē sina tama terefeit de di, ereb wō yel anĭ, taka to dirokenēf nigin, Jesus idi katū fedin.

### Jesus In Dō Fiya Tar Tuwelf Sur Fedin

(Matyu 10:5-15; 14:1-12; Mak 6:7-29)

**9** Jesus in dō fiya tar tuwelf iweigneĭd fen, kuru fedin. Agef fen, ĩ, idi kaa sesen ganān dirudiyouf nigin ado, dāgi el difediyouf nigin total ifeneĭd fen, megeir fedin. <sup>2</sup> ĩ, idi Negur nē tano nigin wogō douf nigin ado, dāgi adodo el difediyouf nigin sur fedin. <sup>3</sup> Jesus idi irokenēdin, "Delē uyōgouf nigin ereb taka to walogouf, manig sā, faa sā, bret sā, moni sā, kolos uru to walogouf, tekelei dogol. <sup>4</sup> Fō nanĭ be bun sō gouf, an ubodōg ile, taun anĭ utorōgouf. <sup>5</sup> Tamo kayau ā to daleyēi ken, ā to karĭ diyēif, sain ā nedi taun anĭ utorōg fen, yeĭ aas tu welege di, idi ā kiwai difenein anĭ keleĭf." <sup>6</sup> Anĭ nigin, idi fafā de, fonō fonō diyo ken, modoū ganān bun, biya od wogō de fen, tamo kayau dāgi el difedin.

<sup>7</sup> Galili lo fiya nē mudur Herod, anĭ ganān wō yef ilef anĭ, karĭ ye fen, wau togun, ere nigin, tunim dirok, Jon ĩ laa bun tamal mata kel fā yen, <sup>8</sup> tunim dirok, Eliya wō yen, age fe di, tunĭg dirok, profet kulu temeleid anidi taka mata kel fā yen. <sup>9</sup> Anĭ ere, Herod iron, "Aya Jon ula gudū afen. Enei aim, ĩ nigin karĭ auf?" Age ye fen, ĩ Jesus ileyā nigin kisi fen.

### Jesus Faif Tausen Tamo Saaf Ifenēdin

(Matyu 14:13-21; Mak 6:30-44; Jon 6:1-14)

<sup>10</sup> Sain aposel idi keku den, idi age difen anĭ Jesus wogō difiyen. Age de di, Jesus idi geif irou, idi mugu diya, taun taka Betsaida dilen. <sup>11</sup> Anĭ ere, tamo kayau musei anĭ keleĭ ken, Jesus dō difen. Jesus idi aan fiyēĭd, Negur nē tano nigin wogō fiyēĭd fen, idi dāgi el fiya nē anidi el fedin.

<sup>12</sup> Aragau di, in dō fiya tar tuwelf, ĩ gein disi diron, "Tamo kayau susur wo di, idi fonō kalilĭ fiya fonō fonō dile fen, saaf ado yenēya modoū dilouf, ere nigin, ada ein gerere tuan tabodok."

<sup>13</sup> Jesus aitedin yale iron, "Idi dāf nigin ereb āgem wenēdigouf."

Idi solo de diron, "Ada bret faif, gau uru ado dogol. Ada tele, tamo kayau enei ganān nigin saaf to na talouf, are kisi feleya sā." <sup>14</sup> (Faif tausen tamo age fiya an dibodon.)

Anĭ ere, Jesus in dō fiya tar irokenēdin, "Tamo kayau, mala fire fire fifti age fiya bun, ubodnēdig." <sup>15</sup> In dō fiya tar age dife di, ganān dibodadan. <sup>16</sup> Jesus, bret faif gau uru ado yale, saa ilun itad fen, ĩ Negur de fiye ken, anĭ mumā fedin. Agef fen, ĩ in dō fiya tar ifenēdin, tamo kayau wagedin gō difouf nigin. <sup>17</sup> Idi ganān don kisi felen. In dō fiya tar, tamo kayau bret gau ado dokon, tunĭ ifaren anĭ fito difen, karam tuwelf isokosen.

### Pita Kristus Nigin Kurō Fesin

(Matyu 16:13-28; Mak 8:27-9:1)

<sup>18</sup> Sain Jesus mugun kosē yen, in dō fiya tar idi ĩ weim. ĩ idi to fedin, "Tamo kayau idi, aya nigin ai dedig?"

<sup>19</sup> Idi solo de diron, "Tunĭ dirok, Jon naan igunēdiya tamo, tunĭ dirok, Eliya, are tunĭg dirok, profet kulu temeleid anidi taka mata kel fā yen."

<sup>20</sup> Jesus to fedin, "Ba ā uleg? Aya nigin ā ai gef?"

Pita aiten yale iron, "Ō anĭ Negur nē Kristus."

<sup>21</sup> Age ye di, Jesus enei taka to dirokenēf nigin, idi wedereid total iroun. <sup>22</sup> Age ye fen, ĩ iron, "Tamo Naal ĩ darau musei yale fen, mudur adodo, pris odudug, lo ifelnēdiya tamo idim dudum difiyēf. Age de fen, ĩ dukesi di, naa towo bure fele di, mata kel fā youf."

<sup>23</sup> Age ye fen, Jesus idi ganān irokenēdin, "Aib taka aya dō fiyau fenē, ĩ yogon oroya dudum fe fen, yogon aa tetek, naa ganān faali fe, aya dō fiyauf. <sup>24</sup> Aib taka, yogon bouwa buru, mata ibodōf nigin oro fef, are fō yalauf, anĭ aib taka yogon mata bouwa buru, aya nigin ye fen, irailauf, are kel yalouf. <sup>25</sup> Tamo taka ĩ teneub enĭ ganān kakarai fe, akorou ye fen, ĩ yogo bou fō yalauf be irailauf, ere biya ĩ yalouf? <sup>26</sup> Aib taka, aya nigin ado neu od nigin, mama fouf are, sain Tamo Naal, in fula fiya medeĭya, Tama nē ado, engel fateul neid fula fiya medeĭya ado disiyouf bun, ĩg ĩ nigin mama fouf. <sup>27</sup> Aya ā momoi arokeneik, tunĭ ein difaref, fau to gare de mog, idi Negur nē tano dilouf."

### Jesus Bouwa Falei Felen

(Matyu 17:1-8; Mak 9:2-8)

<sup>28</sup> Jesus enei irokēl fen, naa eit age fiya ilele di, ĩ, Pita, Jon, Jems yale, kosē youf nigin arei ilun diselen. <sup>29</sup> ĩ kosē ye mog, yogon nawa falei felen, agef fen, yogon kolos, kolimeĭ filiya nē lalan gen, wō yen. <sup>30</sup> Tamo uru, Moses Eliya ado, <sup>31</sup> fula fiya medeĭya ado wowā de fen, Jesus geid wogō den. Idi Jesus teneub itorōf anĭ nigin wogō den, anĭ ĩ Jerusalem oun kisi falauf. <sup>32</sup> Pita ĩ, ne tā tar geid, mulā nigin meleid morō kelen, anĭ ere, idi odi-tekei meleid bi fel fen, idi Jesus nē fula fiya medeĭya ado, tamo uru ĩ geid difaren anĭ dilen. <sup>33</sup> Tamo idi Jesus ditornē mog, Pita Jesus irokenen, "Odug, ada ein ibodōya nigin biya bagai. Ada salafat towo tanouf, taka ogon, taka Moses nē, taka Eliya nē." (ĩ wogō yen anĭ, ĩ yogo keleĭ sā.)

<sup>34</sup> Age ye mog, lalo isi, idi kerub fedid di, idi lalo bun dilel mog, kumĩ den. <sup>35</sup> Ait taka lalo bunem wõ ye fen, iron, "Eĩ neu Kesu, ayam ĩ agirnen. ĩ karĩ wiyëg." <sup>36</sup> Ait anĩ wogõ yele di, idi Jesus mugu dilen. In dõ fiya tar anidi, enei dogo bun dogol ibodon, idi ereb dilen anĩ, sain anĩ bun, taka to dirokenen.

**Jesus Kesu Kaa Sane Ado El Fiyaen**  
(Matyu 17:14-18, 22, 23; Mak 9:14-27, 30-32)

<sup>37</sup> Naa taka bun, idi arein tamal disid mog, tamo kayau musei Jesus tarabã difiyen. <sup>38</sup> Guru fiya atun, tamo takam iweig iron, "Tise, aya õ agonok, õ neu kesu ulekanau, ere nigin, ĩ neu kesu tekelei bagai. <sup>39</sup> Kaa sanem irounẽ di, ĩ terẽ adod ye, ui yedig. Kaa sanem kesu yũ irã di, tererẽ ye fen, awa bun sali moku fedig. Agef fen, kaisã to folõ fiye kele fen, ĩ bouwa daũ fedig. <sup>40</sup> Aya, on dõ fiya tar kaa sane diruwauf nigin agonẽdin, anĩ ere, idi kisi feleya sã."

<sup>41</sup> Jesus solof iron, "Sain enei bun, tamo kayau momoia sã, sane bagai. Sain ganĩ aya ã geid tabod ken, ã nigin wau aukesilauf? Ogon kesu ein urousi."

<sup>42</sup> Kesu anĩ isi mog, kaa sanem kesu tenebur yũ irã di, tererẽ yen. Anĩ ere, Jesus kaa sane ou fiyen, agef fen, kesu anĩ el fiye ken, ĩ tama kel ifenen. <sup>43</sup> Age fe di, idi ganan, Negur nẽ megeir odug nigin terefeit den.

Idi ganan, Jesus age fen anĩ ganan nigin, terẽ de mog, Jesus in dõ fiya tar irokenẽdin, <sup>44</sup> "Ereb aya arokenẽif anĩ wedereĩ unog. Tamo Naal ĩ fau kiwai tamo imeid bun dinou fenẽ." <sup>45</sup> Anĩ ere, idi od enĩ nẽ gariya nigin nene den. Idi nigin gariya anĩ inokon, anĩ nigin, idi od anĩ to kelei ken, ĩ to fiyëya nigin kumĩ den.

**Ai Anĩ Odug Bagai?**  
(Matyu 18:1-5; Mak 9:33-40)

<sup>46</sup> Jesus nẽ dõ fiya tar idi, aim anĩ idi atun odug ibodõf nigin, luwa diroun. <sup>47</sup> Jesus idi neid kisi kelei ken, kesu naal taka yale iroule, ĩ sirin ifanen. <sup>48</sup> Agef fen, ĩ idi irokenẽdin, "Aib taka, aya yanau bunem, kesu naal eig fiya taka yalef are, ĩ aya yaleyaf. Aib taka ĩ aya yaleyaf are, ĩ aya sur fiyan anĩ yalef. ã ganan atun, taka ĩ naal bagai are, ĩ anĩ odug bagai."

<sup>49</sup> Jon iron, "Odug, tamo taka, õ yanã nem kaa sesen iruid mog, amã mailen. Anĩ nigin, amã ĩ katũ mafiyëf nigin age mafen, ere nigin, ĩ neda takam sã."

<sup>50</sup> Anĩ ere, Jesus iron, "To katũ wiyëg, taka ĩ kiwai to ifeneik, are ãgenei."

**Samaria Tamo Kayau Jesus Kiwai Difenen**

<sup>51</sup> Jesus saa ilun yale irou iseleya nẽ naa dodole di, ĩ Jerusalem ileya nigin wau kuturolen. <sup>52</sup> Age fe di, ĩ arũ tamo uyu sur fedid di, idi Jesus nẽ ereb ereb dodok fiya nigin, Samaria fonõ dilen. <sup>53</sup> Anĩ ere, tamo kayau an to aan difiyen, ere nigin, ĩ Jerusalem ilauf nigin age fen.

<sup>54</sup> Sain in dõ fiya tar Jems Jon ado, anĩ dile fen, idi to difen, "Odug, õ amã yã saa ilun tamal maweig di, isi, idi daũ fediyouf nigin oroyok de?" <sup>55</sup> Anĩ ere, Jesus falei yel, ou fiyëdin, <sup>56</sup> age de fen, idi fonõ taka bun dilen.

**Jesus Dõ Fiyëya Bun Kafi Fiya Fire Fire**  
(Matyu 8:19-22)

<sup>57</sup> Idi naab luwe dile fen, tamo taka Jesus irokenen, "Õ narib ulauf are, aya õ dõ ayõf."

<sup>58</sup> Jesus aiten yale iron, "Gaũ kuĩ idi, yenëya nẽ modoũ ku ado, ninã lalo bun diyok idi, uru ado, anĩ ere, Tamo Naal ĩ mudur inoya nẽ modoũ sã."

<sup>59</sup> Jesus tamo takag irokenen, "Dõ wiya."

Anĩ ere, tamo iron, "Odug, fau de, folõ wiya len, aya ele, neu dei mũ afel fen."

<sup>60</sup> Jesus ĩ irokenen, "Laa tamo idi, laa tutur abob mumã difouf. Anĩ ere, õ ule, Negur nẽ tano nigin wogõ wo."

<sup>61</sup> Baban takag iron, "Odug, aya õ dõ ayõf, anĩ ere, folõ wiya len, kelau ele, neu ibor tar dabuo afiyëid fen."

<sup>62</sup> Jesus solof iron, "Taka ĩ dur bun ima ino fen, koriri yedig anĩ, Negur nẽ tano nigin kabĩ yaleya to kisi faulauf."

**Jesus In Dõ Fiya Tar Sewenti-tu Sur Fedin**  
(Matyu 11:20-27; 13:16, 17)

**10** Anĩ dumen, Odug sewenti-tu tamo igirneid fen, idi, ĩ taun ganan ado modoũ ilauf nẽ bun, uyulil uru uru susur fedin. <sup>2</sup> Jesus idi irokenẽdin, "Kabier saaf musei biya bure felen, anĩ ere, kabĩ tamo musei sã. Age fiya nigin, kabĩ marau, Odug to wiyëg, kabĩ tamo sur fedid di, yogon kabier dilauf. <sup>3</sup> Uleg! Aya ã sipsip naal gen, gaũ kuĩ atun sur ayeik. <sup>4</sup> ã moni nẽ kodol be, faa be, su be to walogouf, agog fen, naab luwen taka to aan wiyëgouf.

<sup>5</sup> "Fõ taka aaben ulagauf, uruwa urõgouf, 'Fõ enei wau inosiya ado.' <sup>6</sup> Tamo taka wau inosiya nẽ anĩ an ibodõf are, ãgenei wauĩ inosiya ĩ bun ibodõf, sãf are, ã bun kel isiyouf. <sup>7</sup> Fõ anĩ bun ubodõgouf, saaf ado naan yõya nigin idi difeneif, are wãgauf, ere nigin, kabĩ tamo ĩ mala solo yaleya kisi feleya. Fõ fõ to walegef uyõg.

<sup>8</sup> "ã taun taka bun ulege di, idi ã aan diyeyif, ã ereb wagein dinouf anĩ wãgauf. <sup>9</sup> Dagi adodo an difaref, el wiyëdig fen, idi urokenẽdigouf, 'Negur nẽ tano mogo ã nigin melsã.' <sup>10</sup> Anĩ ere, ã taun taka bun ulege di, idi ã to aan diyeyif, naab toko tokõ ge fen, urõgouf, <sup>11</sup> ãgenei taun nẽ aas yemã bun degẽ fen anĩg, amã kema ã bun tu mafef. Anĩ ere, ã enei keleif youf bagai, Negur nẽ tano mogo melsã.' <sup>12</sup> Aya ã arokeneyik, es fiya naa anĩ bun, taun anĩ, in darau Sodom taun darau dalen anĩ wal fiya, yalouf.

<sup>13</sup> "Korasin taun, õ malalon ado! Betsaida taun, õ malalon ado! ã bun memelik musei anodin, age fiya gen anĩ, Taia ado Saidon taun bun wõ yem are, mogo kulu waud falei de fen, wau gudũ fiya nẽ gabar difoun ken, aasur dibodom. <sup>14</sup> Anĩ nigin, es fiya sain bun, ã, morõ Taia ado Saidon taun dalouf anĩ wal fiya, walogouf. <sup>15</sup> Õ Kapenaum taun, õ yanã anĩ saa ilun iselauf de? Sã bagai, õ laa neid modoũ bun usilauf.

<sup>16</sup> “Taka ĩ karĩ yeik, aya karĩ fiyaf, taka ĩ ã iruyeik, are aya iruyaf, anĩ ere, taka ĩ aya iruyaf, are ĩ aya sur fiyan anĩ iruf.”

<sup>17</sup> Sewenti-tu tamo idi, kulĩya ado keku de, disi diron, “Odug, õ yanã bunem kaa seseneg morõ di, dõ difen.”

<sup>18</sup> Jesus solof iron, “Aya, Satan saa ilunem kolimeĩ lalan gen kakur fen, kubũ ye mog, ailen. <sup>19</sup> Aya, ã, gogour, ambei lalai wedig fen, kiwai nẽ total ganan wal gouf nigin, megeir afenein. Ereb takam to tadũ yeĩf. <sup>20</sup> Anĩ ere, kaa sigoramã dõ difel ge fen, to wauĩ kulĩ youf, anĩ ere, ãgenei yeneĩ saa ilun itoton nigin, wauĩ kulĩ youf.”

<sup>21</sup> Sain anĩ bun, Jesus, Awa Uur Fateul bunem, kulĩya isokos fen, iron, “Dei, saa ado teneub nẽ Odug, aya õ yanã alesef, ere nigin, safina eneidi, kisi biya ado keleĩ adodo to dilouf nigin, õ unokon, ago fen, simõ gen dibodon anidi bun yaor won. Dei, enĩ are ogon waũ filolõ fiya biya bunem agon.

<sup>22</sup> “Ereb erab ganan, Dei ĩ aya bun inon. Taka nem Naal ĩ ai ya nigin keleĩ sã, Dei yogo dogol keleĩ. Taka nem Dei ĩ ai ya nigin keleĩ sã, Naal yogo dogol ado, tunĩ idi Naalum Dei ifelnẽdiyof nigin igirnẽdif anidim dogol keleĩ.”

<sup>23</sup> Age ye fen, Jesus falei yel, in dõ fiya tar lo feid fen, idi dogol irokenẽdin, “Meleim ã ulegedif anĩ dilef are el fedif. <sup>24</sup> Ere nigin, aya ã arokeneik, profet musei, king geid, ã ulegef anĩ dilou fenẽ nigin waud yenen, anĩ ere, idi meledim to dilen, idi ã karĩ gef anĩ karĩ dou fenẽ nigin waud yenen, anĩ ere, idi wederedim to karĩ den.”

### Samaria Tamo Tobonunã Biya Ado Nẽ Yaab Od

<sup>25</sup> Sain taka bun, lo keleĩ tamo taka fã ye fen, Jesus kisi fiyen. ĩ Jesus to fiyen, “Tise, aya naig afe di, mata fai-mud ibodkeleya anĩ alouf?”

<sup>26</sup> Jesus ĩ irokenen, “Negur nẽ Itotoya bun Lo ere yef? Ő uwesedig anĩ, ere yõdig?”

<sup>27</sup> Lo keleĩ tamom Jesus solof irokenen, “Ő, Odug ogon Negur ĩ nigin waũ adok, malãkanon adok, ogon megeir adok, ogon kisi adok bunem, waũ laaf yenẽf.† Takag, ‘Ő ogo nigin waũ laa fef gen, nẽ tã nigineg ago waũ laa fouf.††”

<sup>28</sup> Jesus tamo anĩ irokenen, “Ő de tutuk solo wol. Enei ago di, õ mata ibodkeleya walouf.”

<sup>29</sup> Anĩ ere, lo keleĩ tamo ĩ, Jesus ĩ nigin keleĩ biya sã fiyẽf anĩ itor ken, Jesus to fiyen, “Age fiyauf are, ai anĩ neu tã?”

<sup>30</sup> Jesus solof iron, “Tamo taka Jerusalem taun tamal Jeriko taun isil mog, bẽ tamo imeid bun ilen. Idi yogon kolos dinukeis dũ di, laa gen yen mog, ditornẽ diyalelen. <sup>31</sup> Sain anĩ bun, pris taka naab tekelei anĩ dõf isilen, tamo are de ile fen, ĩ fasis fe tokõ felen. <sup>32</sup> Age fiya gen, Lewi tamo takag modoũ anĩ bun isi, tamo are de ile fen, ĩ fasis fe tokõ felen. <sup>33</sup> Anĩ ere, Samaria tamo taka iyok isin, tamo yenen nẽ isi, wõ ye, tamo anĩ ile fen, ĩ nigin wau yun. <sup>34</sup> ĩ wagen ilen, moul wain ado gudũ fiya bun fi fel fen, ifokenen. Agef fen, tamo are yales, yogon donki teten ino irou ilen, tamo irouya fõ bun ino

† Diuteronomi 6:5 †† Levitikas 19:18

fen, kulatun fiyen. <sup>35</sup> Naa taka di, ĩ tu silwa koin moni yalis, tamo irouya fõ marau ifen ken, iron, ‘Kulatun wiyẽf, sain aya kelauf bun, õ baban mala teten be uran, are aya kela afonõf.’

<sup>36</sup> “Ő kisi wof, towo eneidi atun, ai anĩ, bẽ tamo imeid bun ilen anĩ ĩ ne tã?”

<sup>37</sup> Lo keleĩ tamo solof iron, “Tamo ĩ nigin wau yun anĩ.”

Jesus ĩ irokeken, “Ule, ĩ age fen gen, ago.”

### Marta Maria Ado Neid Fõ Bun

<sup>38</sup> Jesus, in dõ fiya tar geid, naab luwe dile fen, Jesus fonõ taka bun wõ yen, an kayau yana Marta yogon fõ bun Jesus ilauf nigin, Jesus irokenen. <sup>39</sup> ĩ tura yana Maria, ĩ anĩ, Odug ye gariyan ibod ken, ĩ wogõ yen anĩ karĩ yen. <sup>40</sup> Anĩ ere, Marta erab erab dodok fiya anĩ bun kisi yen ken, Jesus wagen isi to fiyen, “Odug, neu turau itorna di, aya mugu kabĩ alef anĩ nigin, õ to kisi wof de? ĩ uroken, aya isenna!”

<sup>41</sup> Age ye di, Odug aiten yalen, “Marta, Marta, õ erab erab musei nigin suwẽ wo fen, waũ morok, <sup>42</sup> anĩ ere, tekelei dogol õ nigin biya. Maria ĩ biya ani igirim, anĩ taka nem to yalelkenẽf.”

### Jesus Kosẽya Nigin Ifelnẽdin

(Matyu 6:9-13; 7:7-11)

**11** Naa taka bun, Jesus modoũ taka bun kosẽ yen. Sain ĩ bure fele di, yogon dõ fiya tamo takam Jesus irokenen, “Odug, amã kosẽya nigin ufelnãmã, Jon, ne dõ fiya tar ifelnẽdin gen.”

<sup>2</sup> Jesus idi irokenẽdin, “Sain ã kosẽ gouf, eig ge urõ-gouf:

“Dei,  
õ yanã fateul ibodõf,  
ogon tano isiyof.

<sup>3</sup> Naa mugu mugu bun, naa anĩ nẽ saaf wanamãf.

<sup>4</sup> Ganã amã bun mosor dinof, amã idi neid mosor nigin wederamã tu kelef,  
age fiya bagai, õg amã nemã mosor nigin wederẽ tu kel.

Ago fen, kisi famãya bun to uroulemãf.”

<sup>5</sup> Age ye fen, ĩ idi irokenẽdin, “Ãgenei taka ĩ, ne mou ado, anĩ bõ atun ĩ gein ile fen, irokenẽf, ‘Mou, bret towo nem usenna, <sup>6</sup> ere nigin, aya neu tã taka, aya bun delẽ isil, anĩ ere, aya ĩ yõya nẽ erab taka sã.’

<sup>7</sup> “Age ye di, ĩ aaben tamal anim irõf, ‘Aya kabĩ total to wana. Sukar mogo kotũ felel, aya neu kesu tar geid mogo fataren mainek. Aya fã au fen, erab taka ifonõya kisi feleya sã.’ <sup>8</sup> Aya ã arokeneik, ĩ, ne mou nigin to fã ye fen, bret ifenẽf, anĩ ere, tamo are kukĩya sã kinĩ yei fiyẽ di, fã ye fen, erab ĩ orof anĩ kilei ifenẽf.

<sup>9</sup> “Anĩ nigin, aya ã arokeneik, to gouf, agef ã ifeneĩf; umirẽgouf, ã gurug gouf; godu godu gouf, ã sukar kã feneĩf. <sup>10</sup> Aibem taka to fouf, yalouf; aibem taka imirek, gurug fouf; aibem taka godu godu fouf, sukar kã fel kenẽf.

<sup>11</sup> “Ã tama tar, aim ãgenei kesu gau nigin to fef, anĩ ban gogour wenẽgouf de? <sup>12</sup> Takag, ĩ tataro faat nigin

to fef, ĩ ambei wenĕgouf de? <sup>13</sup> Ā seseneĭ bagai, anĭ ere, āgenei kesu safina biya biya anĭ ifenĕdiya, ā keleĭ bagai youf are, āgenei anĭ wal fiya, Temeĭ saa ilun ibodok, Awa Uur Fateul aib idi to difiyek, idi ifenĕdiyof bagai!”

**Jesus Belsebub Ado Difiyen**  
(Matyu 12:22-30, 43-45; Mak 3:20-27)

<sup>14</sup> Jesus ait ifokeleya nĕ kaa sane irun. Sain kaa sane iyawo di, tamo ait ifokelen od wogō yen, age fe di, tamo kayau musei terĕ den. <sup>15</sup> Anĭ ere, tamo tunĭ diron, “Are kaa sane neid mudur Belsebub yana bunem, ĩ kaa sesen irudif.” <sup>16</sup> Tunĭ Jesus kisi difiye ken, saa ilun tamal uris nigin to difen.

<sup>17</sup> Jesus idi neid kisi keleĭ ken, idi irokenĕdin, “Tano taka yogo kiwai ifen ken, fara foug, are sane lauf, fō taka yogo kiwai ifen ken, fara foug, are kubū youf. <sup>18</sup> Satan ĩ yogo kiwai ifen ken, fara foug are, yogon tano naig fe ifarauf? Aya enĭ orok, ere nigin, ā urōgef, aya Belsebub yana bunem kaa sesen arudif. <sup>19</sup> Are aya Belsebub yana bunem kaa sesen arudif are, ere bunem āgenei dō fiya tar kaa sesen dirudidig? Anĭ nigin, idim ā es diyēĭf. <sup>20</sup> Anĭ ere, aya Negur nĕ ima gege bunem kaa sesen arudif are, Negur nĕ tano mogo ā bun isil.

<sup>21</sup> “Tamo megeir ado taka, ĩ waila kisi feleya ado yogon fō lo fef are, in safina are totoū. <sup>22</sup> Anĭ ere, taka ĩ yogon megeir wal fiya anim irounĕ lai fiye ken, yogon waila ĩ anĭ bun total yaledig anĭ son fe fen, in safina gadō foug.

<sup>23</sup> “Taka ĩ aya to fedĕ fiyaf, ĩ neu kiwai, takag, ĩ aya ado to kuru mafef are, ĩ firagagaū fef.

<sup>24</sup> “Sain kaa sane tamo bun tamal ulō yeis fen, gerere tuan ile, si inoya modoū imirek ile to fotou fef. Agef fen, ĩ irok, ‘Aya fō atoron anĭ bun baban kelauf.’ <sup>25</sup> Sain ĩ kel isif, fō ani wāĭ difel fen, madur difen anĭ ilef. <sup>26</sup> Anĭ nigin, ĩ ile fen, baban kaa sesen ĩ wal fiya sewen anĭ geif irou isif, age de fen, idi namen dile difaref. Age dife di, tamo anĭ gai sane bagai lef, uruwa bun nĕ tobonunā anĭ wal fiya.”

<sup>27</sup> Jesus eneidi nigin wogō ye mog, tamo kayau atun kayau taka iweig iron, “Sinā ō gō yo ken, su ifonon, are ĩ el fiyek.”

<sup>28</sup> ĩ solof iron, “Age fiya ban, Negur nĕ od karĭ de fen, dō difef anidi, el fedif.”

**Jona Bun Uris**  
(Matyu 12:38-42)

<sup>29</sup> Tamo kayau guru fiya mala oduge di, Jesus iron, “Tamo kayau, gama sain enei bun dibodok, are sane bagai. Idi memelik nigin to difef, anĭ ere, taka to afenĕdiyof, de profet Jona nĕ uris anĭ dogol afenĕdiyof.

<sup>30</sup> Jona are Niniwe taun tamo kayau bun uris, age fiya bagai, Tamo Naal ĩg sain enei nĕ tamo kayau bun uris.

<sup>31</sup> Es fiya sain bun, Kuin Saut tamal fā ye fen, tamo kayau sain enei bun geid, idi neid mosor nigin kurō falaisiyof, ere nigin, kayau anĭ Solomon nĕ keleĭ karĭ youf nigin, teneub idiyān tamal isin, gama taka Solomon wal fiya are yeir. <sup>32</sup> Es fiya sain bun, Niniwe tamo kayau

fā de fen, tamo kayau sain enei bun geid, idi neid mosor nigin kurō difalaisiyof, ere nigin, idi mogo Jona wogō ye di, waud falei den, gama taka Jona wal fiya are yeir.

**Bouwa Nĕ Lam**  
(Matyu 5:15; 6:22, 23)

<sup>33</sup> “Taka nem lam tōf fen, to iminĕyan be, beĭ kur inodig, age fiya ban, in yoki bun iseginĕdig, age fe di, idi aabĕ disif anidi lalan dilouf. <sup>34</sup> Malā are bouwā nĕ lam. Ō malā biyauf are, ogon bouwā gananeĕ lalan barikāf. Anĭ ere, ō malā sesen lauf are, ogon bouwāg gugum kalauf. <sup>35</sup> Anĭ nigin, lalan ō ado anĭ gugum keleya nigin lo walauf. <sup>36</sup> Age fiya nigin, ogon boū gananeĕ lalan barikāf fen, siri sitakā to gugum ouf are, lam nĕ lalan ō bun so fe di, yaor ledig gen, bouwa gananeĕ oditekei lalan ouf.”

**Jesus Farisia Tamo Ado Lo Ifelnĕdiya Tamo Isisnĕdin**  
(Matyu 23:1-36; Mak 12:38-40)

<sup>37</sup> Sain Jesus wogō ye bure fele di, Farisia tamo takam ĩ, Jesus ado saaf dāf nigin iweignĕ di, aaben ile, tebol bun ibodon. <sup>38</sup> Anĭ ere, Farisia tamo ĩ, Jesus ima ketem kulo fiya sā, saaf nigin ibodon anĭ ile fen, terĕ yen.

<sup>39</sup> Age fe di, Odug ĩ irokenen, “Farisia tamo ā, kap ado beĭ agara kulo gedig, anĭ ere, ā namein akorouya ado sanem barikā. <sup>40</sup> Ā neneya tamo! Negur agara inon anĭ, nameĕ to inon de? <sup>41</sup> Anĭ ere, ereb beĭ namen ibodok anĭ maleĕ wenĕdigouf, ago ge di, ereb ereb gananeĕ bun filiya ibodōf.

<sup>42</sup> “Farisia tamo ā meleĭlon ado, ere nigin, ā āgenei edĕ, bakso ado, kabier tamal ereb ereb gananeĕ farag fen, ten tekelei Negur wenĕgedig, anĭ ere, ā lo es fiya ado Negur nigin wau laa fiya utorōgedig. Ā dum nĕ anĭ dōg fen, uruwa nĕ anĭg to utorōgem, are dem.

<sup>43</sup> “Farisia tamo ā meleĭlon ado, ere nigin, ā Juda neid uub fō bun modoū malabag ibodōya ado, maket modoū bun tamo kayau idim sere diyēik anĭ oroyeik.

<sup>44</sup> “Ā meleĭlon ado, ere nigin, ā tamo mekura dede fiya gen, tamo idi keleĭ sa ken, teten diyōdig.”

<sup>45</sup> Lo keleĭ tamo taka Jesus irokenen, “Tise, ō enei urō di, ō amāg kono wamak.”

<sup>46</sup> Jesus solof iron, “Lo keleĭ tamo, āg meleĭlon ado, ere nigin, ā tamo kayau, morō idi faali fiya nigin malai bagai anĭ wenĕdigedig, anĭ ere, ā aug imeĭ gege tekelei idi isennĕdiya nigin to fitei yedig.

<sup>47</sup> “Ā meleĭlon ado, ere nigin, ā profet neid matmat unogedig, anĭ ere, ā tubuĭ tareĕm idi didenkesin. <sup>48</sup> Anĭ nigin, āgenei tubuĭ tar profet age difedin anĭ, ā megeir ge fen, yaor gef, ere nigin, idi profet didenkesin, ā idi neid matmat unogedig. <sup>49</sup> Age fiya nigin, Negur yogon kisi biya bunem iron, ‘Aya fau idi bun profet, aposel ado sur afediyof, age afe di, idi tunĭ didenkeis fen, tunĭ kafĭ fiya difenĕdiyof.’ <sup>50</sup> Anĭ nigin, teneub inon gariya bunem isif, profet gananeĕ naudeid fi felen anĭ nĕ mala solo, tamo kayau gama sain enei bun idim dalouf, <sup>51</sup> Abel nĕ naud bunem ile, Sekaraia ĩ tempel alta ado atun dukesin in naud bun. Aya ā momoi aroke-

neik, naud enī ganan nē mala solo, tamo kayau gama sain enei bun idim dalouf.

<sup>52</sup> “Lo keleī tamo, ā meleīlon ado, ere nigin, ā keleī nē ki walelegen, ā aug namen ileyā sa ken, ā idi namen dilef anidi neid sukar katī welegef.”

<sup>53</sup> Sain Jesus modoū anī itoron, Farisia tamo, lo ifelnēdiya tamo geid, ī bun kiwai total dino, to fiya fire fire musei to difiyen, <sup>54</sup> ereb od wogō youf bun diro-nēf nigin tari difiyen.

### Weder Irouya Ado Tai Fiya

(Matyu 10:26-33)

**12** Dirub kele di, tamo kayau tausen musei biya guru difen, anī bun idi abob tete tete lalai de difaren, age dife di, Jesus in dō fiya tar ketem irokenēd fen, iron, “Ā, Farisia tamo neid yis nigin lo welegei, are mala yaleya tobonunā. <sup>2</sup> Gama ereb dede fiya yenek, are ganan fau lelek falauf, gama ereb iminēyan yenek, are ganan fau yaorouf. <sup>3</sup> Ā gugum bun wogō gen anī, fau gaa lalan bun karī douf, ā aaben wedereim kosesē gen anī, fau fō sokoronem kurō difesiyouf.

<sup>4</sup> “Neu mou tar, aya ā arokeneik, idi bouwa dukeis fen, anī dumen ereb taka baban age fiya kisi feleya sā anidi to kumī wodig. <sup>5</sup> Anī ere, ā aib kumī wiyēgouf anī afelneīf: Ī bouwa yukeis fen, dumen ā hel bun irāyeīf nigin megeir ado anī kumī wiyēgouf. Ariya, aya ā arokeneik, ī kumī wiyēg. <sup>6</sup> Fisisir faif, tuwenti toea nē nem na nigin to sur gedig de? Anī ere, Negur ī anidi taka nigin to weder tu keledig. <sup>7</sup> Momoi, Negur āgenei mudureī bun fatiyeī ganan iwes yalen. To kumī wog, ā fisisir musei wal fediya.

<sup>8</sup> “Aya ā arokeneik, aibem taka, aya nigin tamo meleid bun kurō falaisiyouf, Tamo Naal īg, ī nigin Negur nē engel meleid bun kurō falaisiyouf. <sup>9</sup> Anī ere, taka ī, aya nigin tamo meleid bun wa foug, ayag ī nigin Negur nē engel meleid bun wa afouf. <sup>10</sup> Taka ī, Tamo Naal nigin kiwai ifen ken, koku yef are, in mosor yalelauf. Ani are, taka ī, Awa Uur Fateul kiwai ifen ken, kono fiyek, in mosor to yalelauf.

<sup>11</sup> “Sain ā Juda neid uub fō bun guri diyēī diroule, mudur adodo yeneid adodo meleid bun difarneīf, an wauī moro ken, aug isenneīf nigin naig mafouf, ere mauf, wog fen, to sii yeīf, <sup>12</sup> ere nigin, sain anī bun, Awa Uur Fateul ereb wogō gouf nigin, ifelneīf.”

### Neneya Tamo Safina Ado Nē Yaab Od

<sup>13</sup> Tamo kayau musei atun, tamo takam Jesus irokenen, “Tise, neu turau urokenē di, amā urom akor foi mafouf.”

<sup>14</sup> Jesus solof iron, “Aim aya ā atun es fiya tamo be, foi fiya tamo igirnan?” <sup>15</sup> Age ye fen, Jesus idi irokenēdin, “Lo welegei, ereb ereb ganan bun akorouya anī lo welegei, tamo nē mata in safina musei bun to ibodok.”

<sup>16</sup> Age ye fen, ī yaab od enei idi irokenēdin, “Tamo taka safina musei ado, ne teneub bun saaf musei yaledig. <sup>17</sup> Ī kisi yalen, ‘Aya naig afouf? Aya neu saaf inoya nē modoū sā.’

<sup>18</sup> “Agef fen, ī iron, ‘Aya eig afouf anī de. Neu ki narī afeleid fen, odug nuwa anodiyouf, an neu saaf ado ereb ereb ganan anouf. <sup>19</sup> Age afel fen, aya yug nigin orōf, “Ō ereb ereb biyai biyai musei biya, yar musei nē unof. Ibodōya karika, saaf, naan wokon, wau el foug.”

<sup>20</sup> “Anī ere, Negur ī irokenen, ‘Ō neneya! Bō enei bun bagai, aya ogon mata alelkonōf. Age afe di, aim ogo nigin dodok won anī yalouf?’ <sup>21</sup> “Taka ī yogo nigin, agef safina kuru fef, anī ere, Negur mala bun maleg ibodok, ī bun eig bagai fe, wō youf.”

### To Osig

(Matyu 6:25-34)

<sup>22</sup> Age ye fen, Jesus in dō fiya tar irokenēdin, “Age fiya nigin, aya ā arokeneik, ā āgenei bouweī mata ibodōf nigin to osig fen, ere saaf tāf gouf, ā āgenei bouweī nigin to osig fen, ere gabar tafilaīf gouf. <sup>23</sup> Mata anī saaf wal fiya, bouwa anī gabar wal fiya. <sup>24</sup> Ā kalog uledigedig, idi saaf to ditenedig, idi saaf to u difedig, idi ki be, udū inoya modoū sā, anī ere, Negur ifoutnēdidig. Ā ninā anidi wal fediya bagai! <sup>25</sup> Ā takam yogon mata nigin osi ye fen, aua tekelei tobol fiya kisi feleya de? <sup>26</sup> Ā naal bagai enei age fiya kisi feleya sā nigin, ere nigin anī ā ereb ereb tunī nigin osi gef?

<sup>27</sup> “Aa munī naig fe odugedig anī ulegedig. Idi kabī to daledig, to diwadig. Anī ere, aya ā arokeneik, kulu King Solomon yogon fula fiya medeīya bun naki gegē biya biya ifonun animeg, aa munī taka to wal fen. <sup>28</sup> Anī ere, Negur dubur aa munī gama dogol ifarauf, nile di, yā irāf anī, agef naki fediyouf are, ā idi wal fediya bagai, Negur naig fe ā ifounneīf, ā momoiya naal bagai ado! <sup>29</sup> Anī nigin, ā wauī ere saaf wāgauf be, ere naan wāgauf anī bun to unog, anī bun to osig. <sup>30</sup> Are haiden idi enī ganan nigin meleid dimirēdig. Āgenei Temeī ā lau gef anī ganan keleī. <sup>31</sup> Anī ere, Negur nē tano umirēg, ago ge di, safina eneidig ifeneīf.

<sup>32</sup> “Musei sā ā, to kumī wog, ere nigin, āgenei Temeī, tano anī ā ifeneīya nigin wau al fen. <sup>33</sup> Āgenei safineī na sur ge fen, maleg wenēdigouf. Ā mugu mugu moni nē kodol to serek foug anī uwagauf, agog fen, saa ilun nē safina biya biya to sa kalauf anī kuru gouf, an bē tamo non to isidig, tutū to dāf. <sup>34</sup> Āgenei safina biya biya ibodok nē an, wauīg an yenēf.

### Jesus Kel Isiyouf Nigin Ololo Fiya

(Matyu 24:43-51)

<sup>35</sup> “Kabī nē naki ufonūg fen, āgenei lam tōg saika wog, <sup>36</sup> tamo idi, nedi odug, tamo kayau ado bagu fiya nē tar bunem kelouf nigin tari difedig, anī bunem, sain ī isi, sukar godu godu fe di, idi sā kaisā bagai ī sukar kā difelkenēf anidi gen ago gouf. <sup>37</sup> Ferfer anidi ololo dife mog, nedi odug isi ilediyouf anī, idi nigin deuf, aya ā momoi arokeneik, ī fau yogo kabī nē naki ifoun kel, ferfer tebol bun ibodneīd fen, isi, aruneid yalouf.

<sup>38</sup> Ferfer anidi saika difel mog, nedi odug, bō atun be, we ado be isi ilediyouf anī, idi nigin deuf. <sup>39</sup> Anī ere, ā enei keleī youf: Fō marau ī, sain nanī be bun, bē tamo isiyouf anī keleī youf are, ī yogon fō lo fe di, to narī

fouf. <sup>40</sup> Āg saika gouf, ere nigin, Tamo Naal ĩ fau sain to isiyouf gouf bun isiyouf."

<sup>41</sup> Pita to fen, "Odug, õ yaab od enei amã nigin de, ganan nigin urok?"

<sup>42</sup> Odug solof iron, "Ferfer taka aim anĩ, dõ fiya biya, kisi biya ado de? ĩ, yogon odugem ĩ yogon odug nẽ fõ bun, anidi neid saaf dogo neid sain kilei, dõf ifenēdiy-ouf nigin, ima bun inof. <sup>43</sup> Sain tamo odug kelouf bun, ferfer biya bagai age fe di, ilouf, tamo odug ĩ el fiyēf.

<sup>44</sup> Aya ã momoi arokeneik, tamo odug ĩ, yogon safina ganan, ferfer anĩ ima bun inouf. <sup>45</sup> Anĩ ere, ferfer taka ĩ wau bun irõf, 'Neu tamo odug isiya nigin sain meluk yalef,' age ye fen, ĩ gariya ino, tamo ferfer ado kayau ferfer iden ken, ĩ yogo saaf biya naan biya yokon, aai sē fedig. <sup>46</sup> Ferfer anĩ nẽ tamo odug, in isiya nẽ naa ferfer to isiyouf ye fen, kisif mog, in isiya sain ĩ keleĩ sã mog, isiyouf. Tamo odug, ferfer anĩ gudũf fisik fe fen, momoiya sã geid, nedi modoũ bun inenēf.

<sup>47</sup> "Ferfer taka ĩ, yogon tamo odug nẽ oroya kelei ken, to dodok fef be, yogon odug orof anĩ to dõf age fef, ĩ fau wõf musei fouf. <sup>48</sup> Anĩ ere, taka ĩ to kelei ken, darau yaleya nẽ anĩ age fef, ĩ musei to wõ fouf. Aib taka ĩ musei ifenen, ĩ bun musei yaleya nigin irokenēf, agef fen, taka ĩ lo fouf nigin musei biya ifenen, ĩ bun musei biya yalouf nigin to fiyēf.

### Jesus Maur Gudũ Fiya Nigin To Isin, Isoreya Nigin

(Matyu 10:34-36)

<sup>49</sup> "Aya tenebur yã arou asiyouf nigin asin, yã mala kaur mogom are, aya orou bagai fiyam. <sup>50</sup> Anĩ ere, aya naan igũya taka fau alouf, anĩ nigin, aya wau fatuk morok ile, anĩ kisi falauf. <sup>51</sup> Ā kisi gef, aya tenebur ein maur gudũ fiya arou asiyouf nigin asin de? Sã bagai, aya ã arokeneik, isoreya nigin asin. <sup>52</sup> Gama ilauf bun, ibor tekelei bun, idi faif fara de fen, towom uru kiwai difenēdi di, urum towo kiwai difenēdiyof. <sup>53</sup> Idi fara de fen, tamam kesu kiwai ifenē di, kesum tama kiwai ifenēf, sina, ne barai kiwai ifenē di, ne barai sina kiwai ifenēf, sina yanawau kiwai ifenē di, yanawau kayau sina kiwai ifenēf."

### Sain Nigin Es Fiya

(Matyu 16:2, 3)

<sup>54</sup> Jesus tamo kayau musei irokenēdin, "Sain ã gaa ileyan budũ fã ye di, uleg fen, ã kaisã bagai urõgedig, 'Uyē isiyouf,' ago ge di, age fedig. <sup>55</sup> Takag, yau karag maaĩ ubunem fũ fef, ã urõgedig, 'Uruwa dõ fadauf,' are agef wõ yedig. <sup>56</sup> Ā mala yaleya tamo! Teneub saa ado suma dinof anĩ uleg fen, es gouf nigin ã keleĩ. Naig fe di, sain enei nẽ suma es fiya nigin ã to keleik de?

<sup>57</sup> "Ere nigin ã aug erab biya anĩg to es gedig? <sup>58</sup> Ĕ ogon kiwai ado medistret bun uleg fen, naab luwen ogon kiwai ado od madur wouf, to agouf are, ĩ õ yale, es fiya tamo bun inenõf, age fe di, es fiya tamo õ polis bun inenõ di, polis õ kalabus bun inenõf. <sup>59</sup> Aya õ arokonok, õ wareg ganan to unolauf are, õ kalabus bun to kutũ wesiyouf."

### Wauĩ Falei Gouf, Sãf, Inanakalauf

**13** Sain anĩ bun, tunĩ an difaren anidim, Pailat Galili temeleid tunĩ neid naudeid ado dogo neid sesewi fiya nẽ safina ekul fen anĩ, Jesus dirokenen.

<sup>2</sup> Jesus solof iron, "Ā kisi gef, Galili temeleid eneidi age de darau dalen nigin, idi neid mosor Galili temeleid ganan neid mosor wal fiya de? <sup>3</sup> Aya ã arokeneik, sã bagai! Anĩ ere, ã wauĩ to falei gouf are, ãg ganan inanakalauf. <sup>4</sup> Takag, Siloam fõ meluk tamo kayau bun kubũ ye fen, idi eitid idenkesin. Ā kisi gef, idi neid mosor, tamo kayau ganan Jerusalem taun difaref neid mosor wal fiya de? <sup>5</sup> Aya ã arokeneik, sã bagai! Anĩ ere, ã wauĩ to falei youf are, ãg ganan inanakalauf."

<sup>6</sup> Age ye fen, Jesus yaab od enei iron, "Tamo taka, aa fig tekelei yogon wain kabier itenen, anĩ ĩ ile, faat nigin mala itoton, anĩ ere, taka to ilen. <sup>7</sup> Anĩ nigin, ĩ wain kabĩ lo fiya tamo irokenen, 'Yar towo aya asi, aa fig enei bun faat nigin malau atoton, anĩ ere, taka to ailen. Utu urã! Ere nigin teneub gigure yakasif?"

<sup>8</sup> "Kabĩ lo fiya tamo solof iron, 'Odug, baban yar tekelei utorkana len, aya gariyan ku kalĩ afel, yaro te anouf. <sup>9</sup> Yar taka bun biyauf, are deuf! Sãf are, utu urã."

### Jesus, Kayau Taka Bagiya Fe Fesen, Sabat Naa Bun El Fiyen

<sup>10</sup> Sabat naa taka bun, Jesus Juda neid uub fõ taka bun od ifelnēdin. <sup>11</sup> Kayau taka, yar eitid kaa sanem irounen nigin dagi ado, an ibodon. Kayau ĩ bagiya fe fesen, agef fen, ĩ madur ifareya kisi feleya sã bagai.

<sup>12</sup> Sain Jesus kayau anĩ lof fen, ĩ wagen iweigne ken, ĩ irokenen, "Kayau, õ ogon dagi bun tamal õ karika afo-nok." <sup>13</sup> Age ye fen, Jesus ĩ bun ima ino di, kaisã bagai kayau ĩ madur le ifar fen, Negur yana yalesen.

<sup>14</sup> Juda neid uub fõ nẽ mudur, Jesus Sabat naa bun dagi el fiyen nigin, name sane fen, tamo kayau irokenēdin, "Kabĩ yaleya nigin naa sigis ado. Anĩ nigin, naa anidi bun usig el yeĩf, Sabat naa bun sã."

<sup>15</sup> Odug ĩ irokenen, "Ā, mala yaleya tamo! Ā mugu mugu Sabat naa bun, ãgenei bulmakau be, donki be difaredig modoũ bun tamal birug fen, naan ifenēdiya nigin to gurig ulegedig de? <sup>16</sup> Kayau enei, ĩ Abraham nẽ barai, ĩ Satanem sain meluk yar eitid ifokelnen, ĩ ifõya anĩ bun tamal Sabat naa bun to karika afenēf de?"

<sup>17</sup> Jesus od enei wogõ ye di, yogon kiwai tar ganan mama fedin, anĩ ere, Jesus erab erab biya bagai age fen ganan nigin, tamo kayau musei ganan waud al fen.

### Masted Faat Yis Ado Nẽ Yaab Od

(Matyu 13:31-33; Mak 4:30-32)

<sup>18</sup> Anĩ nigin, Jesus to fen, "Negur nẽ tano anĩ, ere taka gen? Ere bun aya kisi afe di, susu falauf? <sup>19</sup> Are masted faat gen, anĩ tamo takam yale fen, yogon kabier itenen. Anĩ odug fen, aa wõ ye di, ninã ilun temeleid disi, were bun dibodadan."



<sup>20</sup> Baban ĩ to fen, "Negur nē tano anī, ere taka bun aya kisi afe di, susu falauf? <sup>21</sup> Are yis gen, anī kayau takam yale fen, flawa odug ado falei fe di, ganan gē yen."

**Bobog Kidō**  
(Matyu 7:13, 14, 21-23)

<sup>22</sup> Jesus Jerusalem taun ilauf nigin naab luwen iyok ile fen, taun ado fonō fonō ile, od ifelnēdin. <sup>23</sup> Takam Jesus to fiyen, "Odug, are teke tekelei dogol kel yalediyouf de?"

Jesus idi irokenēdin, <sup>24</sup> "Bobog kidō anī ileya nigin kabī totol walogouf, ere nigin, aya ā arokeneik, musei idi namen dilauf nigin age difouf, anī ere, to kisi falauf. <sup>25</sup> Sain fō marau fā ye fen, sukar inolalauf, ā serē ufa-reg fen, godu godu ge ugonēgouf, 'Odug, sukar kā wana-māf.'

"Anī ere, ĩ solof irōf, 'Aya ā keleī sā, ā nainenem usigen.'

<sup>26</sup> "Age ye di, ā urōgouf, 'Amā ō geid saaf naan ado ton, ago fen, ō nemā naab bun od ufelnamak uyon.'

<sup>27</sup> "Anī ere, ĩ solof irōf, 'Aya ā keleī sā, ā nainenem usigen. Ā sane ago gedig ganan, aya malau bun uyaleleg!'

<sup>28</sup> "Sain Abraham, Isak, Jakop, profet ganan geid, Negur nē tano bun uledig fen, ā aug mayarē irarāyeif, an inā wifirig fen, goboreī kikokō youf. <sup>29</sup> Tamo kayau gaa iseyan temeleid, gaa ileyan temeleid, yat temeleid, fa temeleid disi, Negur nē tanon tar bun idi neid modoū dalouf. <sup>30</sup> Momoi, an idi dumen dibodok fau malabag dibodōf, idi malabag dibodok fau dumen dibodōf."

**Jesus Jerusalem Nigin Wau Gudū Fen**  
(Matyu 23:37-39)

<sup>31</sup> Sain anī bun, Farisia tamo tunī Jesus garan disi dirokenen, "Modoū enei utor ken, taka bun ule. King Herod ĩ ō inokesiyou fenē."

<sup>32</sup> Jesus solof iron, "Uleg, gaū kuī anī urokenēg, 'Gama ado nil, aya kaa sesen aruid fen, tamo kayau el afe-diyouf, age afe fen, naa towo bun, aya neu kabī anī uyu katō afalauf.' <sup>33</sup> Anī ere, aya gama, nil, arā toko tokō afouf, momoi bagai profet taka Jerusalem taun to ito ken, firen laa fouf!

<sup>34</sup> "O Jerusalem, Jerusalem, ō profet udenkeis fen, ō bun sur fedig anidi, meein meein wedidig, sain ganī aya ō wau afon ken, ogon gerē tar kuru afediyouf nigin age afedig, tataro sina momou waye farumen kuru fedig gen, anī ere, ō utorōdig! <sup>35</sup> Ulegouf, āgenei fō ā bun fonou lef. Aya ā arokeneik, ā aya baban to uleyagauf ile, ā fau urōgouf, 'Odug yana bunem isif ĩ el fiya ado.' † Sain anī bun, ā aya uleyagauf."

**Jesus Farisia Tamo Taka Nē Fō Bun**

**14** Sabat naa taka bun, Jesus, Farisia tamo uyu irouya taka nē fō bun, saaf yōya nigin ilen, idi an Jesus ololo difen. <sup>2</sup> Jesus wagen an, tamo taka bou

didīya nigin darau yaledig anī ibodon. <sup>3</sup> Jesus, Farisia tamo, lo keleī tamo geid to fedin, "Sabat naa bun, dagi el fediya anī lo dō fiya de, sā?" <sup>4</sup> Anī ere, idi mutū difaren. Anī nigin, Jesus tamo anī yale, el fiye kel sur fiyē di, ilen.

<sup>5</sup> Agef fen, ĩ idi to difen, "Ā taka, Sabat naa bun, kesu be, bulmakau be taka kuren isilauf, ā kaisā bagai to dī wasagauf de?" <sup>6</sup> Age ye di, idi od solof irōya kisi feleya sā.

<sup>7</sup> Jesus, tamo tebol bun modoū malabag anī gei dife di, ile fen, ĩ idi yaab od enei irokenēdin, <sup>8</sup> "Tamo kayau ado bagu fiya nē tar bun, aib ō iweignōf are, modoū malabag anī to walouf, ere nigin, tamo taka ō wal yōya iweignen be. <sup>9</sup> Age fouf are, ā uru iweigneim marau isi, ō irokonōf, 'Ogon modoū anī, tamo enei wenē.' Age ye di, ō mama yo ken, modoū dumen bagai anī walouf.

<sup>10</sup> Anī ere, ō iweignōf are, modoū dumen anī walouf, ago di, iweignom marau isiyouf, ĩ ō irokonōf, 'Mou, modoū biya bun godo urou usel.' Age fe di, ō modoū malabag anī wale di, ā iweigneim turā tar ganan meleid bun ō yanā odug adouf. <sup>11</sup> Ere nigin, aib taka yogo yana yalesef, fau lai fesilauf, aib taka ĩ yogo yana lai fesilef, Negur ĩ yana yalesauf."

<sup>12</sup> Age ye fen, Jesus fō marau irokenen, "Sain ō gaa atun saaf be, bō saaf wenēdiyof fenē, ogon mou tar, naud turā tar, sirag tar be, nē tā tar safina inid adodo to uweignēdiyof, agouf, idi aba diweignōf, anī bun ō mala solo difonōf. <sup>13</sup> Anī ere, sain ō tar unouf, maleg, bouweid sesen, yeid kirorōya, meleid ifofakeleya anī uweignēdiyof, <sup>14</sup> agouf, Negur ō el yōf. Idi aba ō ke de difonōya kisi feleya sā, anī ere, madur tamo neid mata kel fāya bun, Negur ō mala solo ifonōf."

**Tar Odug Nē Yaab Od**  
(Matyu 22:1-10)

<sup>15</sup> Tamo tebol bun weim dibodon anidi takam, od enei karī ye fen, ĩ Jesus irokenen, "Negur nē tanon tar bun tamo saaf yāf anī, ĩ el fiya ado."

<sup>16</sup> Jesus solof iron, "Tamo taka tar odug dodok fe fen, musei iweignēdin. <sup>17</sup> Tar sain bun, ĩ iweignēdin anidi irokenēdiyof nigin yogon ferfer sur fen, 'Usig, gama ereb ereb ganan dodok felel.'

<sup>18</sup> "Anī ere, idi ganan de tekelei gen galā od dinon. Uyulil ĩ iron, 'Aya gama bagai kabī na alen, anī nigin, aya anī ailau fenē alauf. O malalon ado, aya to asiyouf.'

<sup>19</sup> "Taka iron, 'Aya bulmakau ten na alen, anī idi naig fiya anī ailau fenē elef. O malalon ado, aya to asiyouf.'

<sup>20</sup> "Takag iron, 'Aya gama bagai kayau mata alen nigin, aya isiya kisi feleya sā.'

<sup>21</sup> "Ferfer kel ile, ne odug od enei irokenen. Age fe di, fō marau name sane fen, yogon ferfer irokenen, 'Kaisā bagai ule, taun nē naab odug, naab nanaal ado dō wo fen, maleg, bouweid sesen, meleid ifofakeleya, yeid kirorōya anidi guri urou usi.'

<sup>22</sup> "Ferfer iron, 'Odug, ō urom are mogo age afel, anī ere, modoū fau lolokā.'

<sup>23</sup> "Age ye di, odug yogon ferfer irokenen, 'Naab uyok ule fen, fonō fonō naabur tamo kayau idi anī disiyouf

† Sam 118:26

nigin total bagai urokenēdi di, disī, neu fō isokosauf.  
<sup>24</sup> Aya ā arokeneik, aya tamo idi aweignēdin anidi taka, neu tar bun saaf bagai to kobū de dilouf.”

### Kisi Es Wo Fen, Jesus Dō Wouf

(Matyu 10:37, 38)

<sup>25</sup> Tamo kayau musei, Jesus weim dile fen, ī falei yel, idi irokenēdin, <sup>26</sup> “Taka ī aya gein isif, ne tama, sina, ne kayau, kesu tar, ne tura tar, main tar, yogon matag to itorōf are, ī neu dō fiya tamo wō youf nigin kisi feleya sā. <sup>27</sup> Takag, taka ī yogon aa tetek to faali fe fen, aya dō fiyaf, ī neu dō fiya tamo wō youf nigin kisi feleya sā.

<sup>28</sup> “Ā taka, fō meluk taka inoya nigin orouf are, ī tetun ibod ken, fō inolauf nigin moni kisi feleya ado be anī es fouf, age fiya sā de? <sup>29</sup> Ere nigin, ī fō gariya ino mā, inoleya to kisi falauf are, tamo kayau ganān anī dile fen, kasā difiye ken, <sup>30</sup> dirōf, ‘Tamo enei fō kare fen, anī ere, inoleya kisi feleya sā.’

<sup>31</sup> “Takag, king taka, king taka ado kusī douf nigin, ī ten tausen kusī tamo adom, king taka tuwenti tausen kusī tamo ado kusī disif anī, kusī bun wal fiyēya kisi feleya be sā be anī, tetun ibod ken, es fouf, age fiya sā de? <sup>32</sup> Ī to kisi falauf are, ī king taka fau gerō ifar mog, wowor fiya tamo sur fedi di, idi komo fiya nigin to difiyēf. <sup>33</sup> Age fiya gen bagai, ā taka ī, ereb ereb ganān ī ado anī to itorōf are, ī neu dō fiya tamo wō youf nigin kisi feleya sā.

<sup>34</sup> “Anī nigin, sol ī biya, anī ere, in kai sa kalauf are, naig fe di, ī baban kai youf? <sup>35</sup> Sol age fiya are, teneub ado falei fiya nigin ado, gaar te ado falei fiya nigineg to biya, anī nigin dirailedig.

“Aib ī karīya nigin weder ado, utornē karī youf.”

### Sipsip Fō Yelen Nē Yaab Od

(Matyu 18:12-14)

**15** Takis yaleya tamo, mosor adodo geid ganān, Jesus karī difiyēf nigin ī non disin. <sup>2</sup> Anī ere, Fari-sia tamo, lo ifelnēdiya tamo geid, nauseir de fen, diron, “Tamo enei, mosor adodo aan fiyēd fen, weim saaf doko.”

<sup>3</sup> Age de di, Jesus yaab od enei irokenēdin, <sup>4</sup> “Ā taka wan hundred sipsip ado, anī tekelei iminkalauf are, ī nainti-nain sipsip yaorin itorneīd fen, iminkelen anī imirek ile fotou fedig, age fiya sā de? <sup>5</sup> Sain ī fotou fouf, ī wau adod fen, yale, benerin orowa sef, <sup>6</sup> fō bun ilauf. Agef fen, ī ne mou tar ado, ne tā tar gou feid irōf, ‘Ā aya geid kulī tauf. Aya neu sipsip fō yelen anī fotou afel.’ <sup>7</sup> Aya ā arokeneik, age fiya gen bagai, mosor ado tamo taka wau falei yef bun, saa ilun kulīya odug adouf anim, nainti-nain madur tamo baban faleiya nē sā idi nigin kulīya wal fiya.

### Silwa Koin Moni Iminkelen Nē Yaab Od

<sup>8</sup> “Takag, kayau taka silwa koin moni ten ado, anī tekelei iminkalauf are, ī lam tōf, fō waīf fen, el fe imirek ile fotou fouf, age fiya sā de? <sup>9</sup> Sain ī fotou fouf, ī ne mou tar ado, ne tā tar gou feid irōf, ‘Ā aya geid kulī

tauf. Aya neu silwa koin moni iminkelen anī fotou afel.’ <sup>10</sup> Age fiya gen bagai, aya ā arokeneik, mosor ado tamo taka wau falei yef ī nigin, Negur nē engel meleid bun kulīya odug wō yef.”

### Kesu Fō Yelen Nē Yaab Od

<sup>11</sup> Jesus tobol fe iron, “Tamo taka kesu uru adon. <sup>12</sup> Ibuyem tama irokenen, ‘Dei, akor neu anī fara wana.’ Anī nigin, temeid yogon safina idi atun foi fen.

<sup>13</sup> “Anī bure fel fen, sain meluk to ilele di, kesu ibuye, safina ī ado ganān kuruf yale irou, teneub taka bun gerō biya ilen, an in safina tobonunā to biya bun daū felen. <sup>14</sup> Ī ereb ereb ganān daū fele di, teneub anī bun naū odug wō yen, age fe di, ī bun lau fiya wō yen.

<sup>15</sup> Anī nigin, ī ile, fō morou taka bun kabī yalouf nigin to fiyē di, fō moroum ī bor saaf ifenēdiyof nigin yogon kabier sur fen. <sup>16</sup> Ī naū bagai nigin bor saaf dō di, īg anī yōya nigin orodig, anī ere, takam ereb taka to ifenēdig.

<sup>17</sup> “Ī kisi kelen sain, ī iron, ‘Neu dei ī kabī tamo musei ado, idi saaf barikā. Aya ein naum laa fiyau fenē! <sup>18</sup> Aya fā au, neu dei garan kelau fen, ī arokenēf: Dei, aya saa ilun ado ō bun mosor anon. <sup>19</sup> Aya to biya nigin, neu kesu to wouf, ogon kabī tamo oroi waledin taka gen waleyauf.’ <sup>20</sup> Anī nigin, ī fā ye, tama gein ilen.

“Anī ere, ī fau gerō iyok isi mog, tama ī kesu ile fen, ī nigin wau fatuk yū di, kesu gein gudu ref ile, kakarai fiye ken, umā fiyen.

<sup>21</sup> “Kesum tama irokenen, ‘Dei, aya saa ilun ado ō bun mosor anon. Aya to biya nigin, neu kesu to wouf.’

<sup>22</sup> “Anī ere, tama ī yogon ferfer irokenēdin, ‘Gama-nem kolos biya bagai waleg urousig, ī ufounnēg, ima gege bun sai unog fen, ye bun su unokenēg. <sup>23</sup> Bulmakau lubu bou dīya waleg urousig ukesig. Ada tar tano tokon, sigigi tafouf. <sup>24</sup> Ere nigin, neu kesu enei laa fen anī baban matal, ī fō yelen anī baban fotou tafiyem.’ Anī nigin, idi gariya dino sigigi difen.

<sup>25</sup> “Sain anī bun, kesu matu ī kabier ibodon. Dum ī iyok isi, fō kelē fiye ken, fō non kui de gurū de mog, karī yen. <sup>26</sup> Agef fen, ī kabī tamo taka iweigne ken, to fiyen, ‘Oun ere naig difef?’ <sup>27</sup> Kabī tamo ī aiten yale iron, ‘Turā kel isil, anī tamā bulmakau lubu bou dīya yum, ere nigin, tamam ī bouwa totoū biya bagai ado kel yale!’

<sup>28</sup> “Age ye di, tura matu name sane fen, fō bun ileya nigin itoron. Age fe di, tama mayarē ile wowor fiyen. <sup>29</sup> Anī ere, kesu ī tama solof irokenen, ‘Ulefe, yar enei ganān aya ō sigor taka to wal afe fen, arunā alef asin. Anī ere, ō aya meme lubu taka wana di, neu mou tar geid to sigigi mafen. <sup>30</sup> Anī ere, ō naal enei are, ogon safina, kayau bouweid na nē sur difedig anidi bun daū fel fen, fonō isi di, ō bulmakau lubu bou dīya ukenem!’

<sup>31</sup> “Tama iron, ‘Neu kesu, ō aya ado faimud tabodō-dig. Safina ganān aya ado, are ogon. <sup>32</sup> Anī ere, ada sigigi tafe fen, wauda al fem bagai, ere nigin, turā enei laa fen anī baban matal, ī fō yelen anī baban fotou tafiyem.”

### Kabī Tamo Neid Orowa Tobonunã Sane Kisi Biya Ado Nē Yaab Od

**16** Takag, Jesus in dō fiya tar irokenēdin, “Safina musei ado tamo taka, ĩ yogon kabī tamo neid orowam in safina daū fef yeya karī yen. <sup>2</sup> Anī nigin, ĩ iweignē ile di, to fiyen, ‘Eī ere od anī ò nigin karī auf? Ogon kabī walen anī faded wo di, karī auf, ere nigin, ò baban kabī tamo neid orowa to ubodōf.’

<sup>3</sup> “Kabī tamo neid orowa yogo nigin iron, ‘Gama aya naig afouf? Neu odug neu kabī yalelkanaf. Aya meku yaleya nigin totolou sã, agef mãg, aya nonīya nigin mama ado. <sup>4</sup> Aya naig be afouf are aya keleī, anī bunem sain aya neu kabī ein atorōf are, tamo kayau neid fō bun ileyā nigin aan difiyauf.’

<sup>5</sup> “Age ye fen, ĩ, yogon odug bun wareg dalen anidi mugu mugu iweignēdi di, disin. ĩ tamo uyulil anī to fiyen, ‘Ō neu odug bun wareg ganī walen?’

<sup>6</sup> “Ī aiten yale iron, ‘Eit handred galen aa oliv mou alen.’” Kabī tamo neid orowa ĩ irokenen, ‘Ogon wareg ditoton wale, kaisã ubod ken, fo handred utot.’

<sup>7</sup> “Age ye di, ĩ uyulil dō fiyen anī to fiyen, ‘Ba ò wareg ganī walen?’

“Ī solof iron, ‘Wan handred wit bek alen.’

“Kabī tamo neid orowam ĩ irokenen, ‘Ogon wareg ditoton wale, eiti utot.’

<sup>8</sup> “Yogon odug ĩ, kabī tamo neid orowa idegēya tamal, ĩ kisi el fe yale fen, age fen nigin, yana yalesen. Ere nigin, tamo kayau teneub enei bun temeleid kisi el de dale fen, ereb dogo neid nigin tamo kayau lalan bun temeleid wal fediya age difedig. <sup>9</sup> Aya ã arokeneik, teneub enei nē safina bunem ã aug nigin neī mou tar waledigouf, anī bunem, sain safina sa kalauf, mata gai ibodkeleya bun aan diyēif.

<sup>10</sup> “Taka ĩ ereb naal bagai el fe lo fef, odug buneg agef lo fouf, taka ĩ naal bagai bun idegek, odug buneg idegēf. <sup>11</sup> Anī nigin, ã tenebur enei nē safina to el ge lo gen ouf are, aim ã momoi nē safina lo fiya nigin inenēif? <sup>12</sup> ã takan nē safina to el ge kulatun gen ouf are, aim anī ã safineī ifeneīf?

<sup>13</sup> “Kabī tamo takam odug uru bun to kabī yalouf. Taka nigin to wau yen ken, taka nigin wau laa fouf be, taka anī aruna yale fen, taka anī to awa yãf. ã Negur nigin ado moni nigin aruna yaleya kisi feleya sã.”

<sup>14</sup> Faria tamo moni nigin waud laa fedig anī, od enei ganan karī de fen, Jesus kasã difiyen. <sup>15</sup> Age dife di, Jesus idi irokenēdin, “ã bagai anī, tamo meleid bun, ã aug nigin biya age mafef gedig, anī ere, Negur ĩ wauī keleī bagai. Tamo ereb nigin waud fatuk difenek, are Negur mala bun ninir bagai.”

### Ifelnēdiya Od Tobol Fiya

<sup>16</sup> “Lo nē od ado, profet neid od wogō def disi, Jon bun daun. Sain anī bunem, Negur nē tano nigin biya od wogō def disif, age fe di, ganan namen ileyā nigin mugu mugu teībir def. <sup>17</sup> Saa teneub ado iminkeleya

nigin are karika, anī ere, Lo bun itotoya togo fiya naal bagai taka to iminkalauf.

<sup>18</sup> “Taka ĩ aiwa iru fen, kayau taka yalouf are, ĩ seseirã inof, taka ĩ kayau tamo takam irun anī yalouf are, ĩ seseirã inof.

### Safina Musei Tamo Ado Lasarus

<sup>19</sup> “Safina musei ado tamo taka, naa ganan bun kolos naki biya, saaf biya, ibodōya biya ibodōdig. <sup>20</sup> Maleg taka yana Lasarus, gurumam barikã, safina musei ado tamo ne bobogē yenēdig. <sup>21</sup> Agef fen, ĩ, safina musei ado tamo nē tebol bunem kuku ref anī yãf nigin orodig. Gaūg disi, guruma seum difedig.

<sup>22</sup> “Dum maleg tamo laa fe di, engelem Abraham wagen dirou diselen. Safina musei ado tamog laa fe di, mū difen. <sup>23</sup> Laa neid modoū bun, safina musei ado tamo darau odug yale fen, ĩ gerō mala irakel, Lasarus Abraham wagen ibod mog, ilen. <sup>24</sup> Agef fen, ĩ Abraham iweigne ken, iron, ‘Dei Abraham, aya nigin waū ino ken, Lasarus sur wiyē di, ima gege uyum naan kobūf fen, irousi baleu felu kouf, ere nigin, aya yã enei bun darau odug alef.’

<sup>25</sup> “Anī ere, Abraham aiten yale iron, ‘Kesu, ò mata ubodon sain, ò ereb ereb biya wale mog, Lasarus ĩ ereb ereb to biya yalen, anī karī wo, anī ere, gama ein ĩ wau wã fe di, ò darau odug bun ubodok. <sup>26</sup> Takag, enei ganan teten, amã ã geid atun meku odug inon, anī bunem, idi ein tamal ã gein isiya nigin kisi feleya sã, takam an tamal amã gein ibal isiya nigineg kisi feleya sã.’

<sup>27</sup> “Ī aiten yale iron, ‘Age fiyauf are, Dei, aya ò agonok, neu dei nē fō bun Lasarus sur wiyē di, isilauf, <sup>28</sup> ere nigin, aya turau tar faif dibodok. Utornē len, wedereid irouwauf, age fe di, idig darau odug nē modoū enei bun to disiyouf.’

<sup>29</sup> “Abraham solof iron, ‘Idi Moses nē itotoya ado profet neid itotoya ado, utorneīd len, idi anidi bun wedereid dinouf.’

<sup>30</sup> “Ī iron, ‘Age fiya sã, Dei Abraham, laa bun tamal takam idi bun isilauf are, idi waud falei youf.’

<sup>31</sup> “Anī ere, Abraham tamo anī irokenen, ‘Idi Moses nē od ado profet neid od nigin to wedereid dinouf are, laa bun tamal takam fã ye fen, idi irokenēdiyofeg to karī douf.’”

### Jesus Mosor Ado Momoiya Nigin Ifelnēdin

(Matyu 18:6, 7, 21, 22; Mak 9:42)

**17** Jesus in dō fiya tar irokenēdin, “Ereb ereb tamo mosor bun inenēdiyof anī isiyouf bagai, anī ere, tamo nanī be bunem isif, ĩ malalon ado. <sup>2</sup> Taka ĩ nanaal enidi taka mosor bun inenēya ban, ĩ meein odug guyutu bun ifo ken, maaīwō irãya nigin biya bagai. <sup>3</sup> Anī nigin, ã lo welegei. “Ō turã mosor inouf, ou wiyēf, anī ĩ falei youf are, ò in mosor nigin wederē tu kel. <sup>4</sup> ĩ naa tekelei bun, ò bun mosor ino sewen fouf, ĩ ò gein isi, sewen fe irōf, ‘Aya awaul,’ ò in mosor nigin wederē tu kel.”

<sup>5</sup> Aposel idi Odug dirokenen, "Nemã momoiya odug wouf!"

<sup>6</sup> Jesus solof iron, "Ã momoiya naal, masted faat gen adouf are, aa enei urokenëgouf, 'Kusu wale, usil maaïwõ ufarouf,' ago ge di, ã sigoreï dõ foug.

<sup>7</sup> "Ã taka, yogon ferfer kabier teneub yũf be, sipsip lof fen, kabierem isi mog, ne maraum tau, 'Kaisã bagai saaf yõya nigin usi ubod,' fiyëf de? <sup>8</sup> Age fiya ban, ï eig youf, 'Neu saaf dodok wol fen, õ naki wol, arunau wale, akas bure afele di, gama õ saaf ado naan wãf.' <sup>9</sup> ï irokenë di, dõf age fen nigin, maraum ferfer tau de wiyal fiyëf de? <sup>10</sup> Anï nigin, ã ereb ereb irokeneik anï ganan dõg, ago weleg fen, ãg eig ge urõgouf, 'Amã ferfer to biya, amã nemã kabï anï dogol malel.'"

### Jesus Tamo Ten Lepra Dagi Adodo El Fedin

<sup>11</sup> Jesus Jerusalem ileya nigin, Samaria ado Galili distrik daũ atu iyok ilen. <sup>12</sup> ï fonõ taka bun ile mog, tamo ten lepra dagi adodo, ï fotou difiyen. Idi gerom difar fen, <sup>13</sup> aiteid odug nem diweig diron, "Jesus, Odug, amã nigin malalon yõ!"

<sup>14</sup> Sain ï idi ileid fen, iron, "Uleg, aug bouweï pris ufelnëdigouf." Age ye di, idi dile mog, bouweid biya len.

<sup>15</sup> Idi neid taka bouwa biya len anï ile fen, kel isi, ait odugem Negur yana yalesen. <sup>16</sup> Jesus ye gariyan kubũ ye yen ken, de wiyal fiyen, ï Samaria tamal.

<sup>17</sup> Age fe di, Jesus to fen, "Ten ganan to biya ledin de? Tamo nain idi nain difaref? <sup>18</sup> Takam to kel isi, Negur yana yalesel, yaũ enei dogol de?" <sup>19</sup> Jesus age ye fen, ï irokenen, "Fã wale fen, ule, ogon momoiyam õ el yom."

### Jesus Negur Në Tano Nigin Wogõ Yen

(Matyu 24:23-28, 37-41)

<sup>20</sup> Sain taka, Farisia tamom, Negur në tano ere sain isiyouf nigin Jesus to difiyë di, Jesus solof iron, "Negur në tano, malam ileya kisi feleya sã bunem isidig, <sup>21</sup> tamo to 'Eï yeir,' be, 'Your oun,' be douf, ere nigin, Negur në tano are ã atun ibodok."

<sup>22</sup> Age ye fen, Jesus yogon dõ fiya tar irokenëdin, "Sain isi di, Tamo Naal në naa taka ileya nigin oroyeïf, anï ere, ã anï to ulogouf. <sup>23</sup> Tamom dirokeneïf, 'ï your!' be, 'ï yeir!' douf. ã, to uleg, idi to dõ wedig. <sup>24</sup> Ere nigin, Tamo Naal, yogon naa bun, kolimei filiya lalan saa gariyanem irou, idikeleyan isiledig gen. <sup>25</sup> Anï ere, uruwa ï darau musei yale di, tamo kayau sain enei bun dibodok anidi ï dudum difiyëf.

<sup>26</sup> "Noa në sain bun age fen gen, age fiya bagai Tamo Naal në sain buneg age foug. <sup>27</sup> Tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen. Agef mog, kuwei isi fen, idi ganan daũ fedin.

<sup>28</sup> "Lot në sain buneg de age difen, tamo kayau saafem, naanem difen, na dalef, na sur difef, saaf diton, fõ dino mog, difen. <sup>29</sup> Anï ere, naa Lot Sodom taun itor

ilen bun, yã ado meein salfa, saa bunem uyë gen kukur fen, idi ganan daũ fedin.

<sup>30</sup> "Age fiya gen bagai, Tamo Naal yaorouf në naa bun, agef wõ youf. <sup>31</sup> Naa anï bun, taka ï yogon fõ agaran ibod mog, in safina namen ibodok anï yalouf nigin to kel isilouf. Age fiya bagai, taka ï kabier ibodok, yogon safina yalouf nigin to kel ilouf. <sup>32</sup> Lot në kayau bun kisi gouf! <sup>33</sup> Taka ï yogon mata yalouf nigin kisi foug, ï mata anï fõ yalouf. Taka ï yogon mata anï itorõf are, ï yogon mata irou kafï falauf. <sup>34</sup> Aya ã arokeneik, bõ anï bun, tamo uru idi fatar tekelei bun denëf, tekelei yalouf, taka itornëf. <sup>35</sup> Kayau uru idi wit ditutu mog, tekelei yalouf, taka itornëf." <sup>37</sup> Idi to difen, "Odug, õ urok anï nain wõ youf?" Jesus idi irokenëdin, "Nain be laa yenek në an, tum guru difoug."

### Kayau Waab Tuwa To Yu Kelen Në Yaab Od

**18** Age ye fen, Jesus, in dõ fiya tar idi faimud kosëya nigin tuweid to yũf anï ifelnëdiyof nigin, yaab od taka irokenëdin. <sup>2</sup> ï iron, "Taun taka bun, es fiya tamo taka ibodon, ï Negur to kumï fiyëdig, tamog to iwesnëdig. <sup>3</sup> Taun anï bun an, kayau waab taka ibodon, ï es fiya tamo bun toku kel fen, yogon kiwai mala solo ifenëf nigin irokenëyai yedig.

<sup>4</sup> "Es fiya tamo ï kaisã to karï fiyen, anï ere, dum ï yogo nigin iron, 'Aya Negur to kumï afiyek, tamog to awesnëdif, <sup>5</sup> anï ere, kayau waab enei toku morõ ifanaf nigin, in morõ anï ail fen, kayau ï irok anï age afouf, anï bunem ï to kel fen, morõ ifanauf!'"

<sup>6</sup> Jesus age ye fen, iron, "Es fiya tamo sane, ereb ï iron anï karïg. <sup>7</sup> Negur yogon igirnëdin anidi, bõ ado gaa ado diweig dirokeneidig nigin, ï lo në madur fiya to ifenëdiyof de? ï sain meluk to karï fiyëdiyof de?"

<sup>8</sup> Aya ã arokeneik, ï kaisã bagai lo në madur fiya ifenëdiyof. Anï ere, Tamo Naal isiyouf sain bun, tenebur ein ï momoiya fotou foug de?"

### Farisia Tamo Taka, Takis Yaleya Tamo Ado Në Yaab Od

<sup>9</sup> Tunï idi dogo nigin amã madur bagai de fen, tunï meleid irim lai difedidig anidi bun, Jesus yaab od eneig irokenëdin, <sup>10</sup> "Tamo uru tempel bun kosë douf nigin diselen, taka Farisia tamo, taka takis yaleya tamo.

<sup>11</sup> Farisia tamo ifar fen, yogo nigin kosë yen, 'Negur õ de ayok, aya tamo tunï gen sã, bẽ diledig, sane age difedig, seseirã dinodig, takis yaleya tamo enei geneg sã. <sup>12</sup> Aya uub tekelei bun naa uru kuri au fen, ereb ereb ganan aya alef anï, ten teke tekelei õ afonõdig.'

<sup>13</sup> "Anï ere, takis yaleya tamo ï so rel ifaren. ï saa iluneg to itad fen, anï ere, ï akor yu ken, iron, 'Negur, aya nigin waũ inõf, aya mosor temelou.'

<sup>14</sup> "Aya ã arokeneik, Farisia tamo anï sã, takis yaleya tamo enei, Negur mala bun ï madur fen, fõ bun ilen. Ere nigin, taka ï yogo yana yalesef, Negur ï yana lai foug, taka ï yogo yana lai fef, Negur ï yana yalesauf."

† Itotoya tunï eig de ditoton: itornëf. <sup>36</sup> \* Tamo uru idi kabier difarauf, tekelei yalouf, taka itornëf.

**Kesu Nanaal Jesus Geid**  
(Matyu 19:13-15; Mak 10:13-16)

<sup>15</sup> Takag, tamo kayau, Jesus kesu momoug kobū fe-diyouf nigin ĩ wagen guri difeid disin. Age dife di, in dō fiya tar anĭ dile fen, idi ou difiyēdin. <sup>16</sup> Anĭ ere, Jesus kesu ĩ wagen iweigneĭd fen, iron, "Uturnēdig len, kesu nanaal aya wageun disiyouf, idi to katū wedig, ere nigin, Negur nē tano are eig fediya neid. <sup>17</sup> Aya ā momoi arokeneik, aib taka ĩ, Negur nē tano, kesu naal age fiya gen to yalouf are, ĩ Negur nē tanon to bagai ilauf."

**Uyu Irouya Tamo Safina Musei Ado**  
(Matyu 19:16-30; Mak 10:17-31)

<sup>18</sup> Uyu irouya tamo taka Jesus to fiyen, "Tise biya, aya ere naig afe fen, mata faimud ibodkeleya alouf?"

<sup>19</sup> Jesus ĩ irokenen, "Ere nigin ō aya anĭ biya wiyaf? Aibem taka biya sā, Negur yogo dogol. <sup>20</sup> Ō ĩtāfiya keleĭ: 'Ō seseirā to unouf, ō tamo taka to ukesiyouf, ō to bē walouf, ō taka nigin idegēya od to urōf, sinā tamā yeneid walesauf.' "

<sup>21</sup> Age ye di, ĩ iron, "Enei ganan aya kesu naalun dō afef asin."

<sup>22</sup> Jesus enei karĭ ye fen, ĩ irokenen, "Ō fau tekelei anĭ inĭ sā. Ogon safina ganan na nigin sur wo fen, maleg tamo weneĭd, agouf anĭ ō saa ilun safina biya adouf. Ago wol fen, usi, aya dō wiya."

<sup>23</sup> Anĭ ere, ĩ od enei karĭ ye fen, wau fatuk gudū fen, ere nigin, ĩ safina musei biya ado. <sup>24</sup> Jesus ĩ lege fiye ken, iron, "Safina musei adodo tamo, Negur nē tano bun ileya nigin, gai malai bagai! <sup>25</sup> Momoi, kamel ĩ, gabar iwaya nē nil ku bun ileya nigin, karika bagai, safina musei ado tamo, Negur nē tano bun ileya nigin, malai bagai."

<sup>26</sup> Idi od anĭ karĭ de fen, to difen, "Age fiyauf are, aim anĭ mata ibodkeleya anĭ yaleya nigin kisi feleya?"

<sup>27</sup> Anĭ ere, Jesus solof iron, "Ereb tamom age fiya nigin kisi feleya sā anĭ, Negur age fiya nigin kisi feleya."

<sup>28</sup> Pita Jesus irokenen, "Ulef, amā ō dō mayōf nigin, ereb ereb ganan amā ado anĭ matoron!"

<sup>29</sup> Age ye di, Jesus idi irokenēdin, "Aya ā momoi arokeneik, aib taka fō, kayau, tura tar, sina tama tar be, gere tar, Negur nē tano nigin itoron, <sup>30</sup> ĩ mala solo musei bagai sain enĭ bun yalouf, ĩ dumen isiyouf buneg mata faimud ibodkeleya yalouf."

**Jesus In Laa Nigin Irō, Towo Fen**  
(Matyu 20:17-19; Mak 10:32-34)

<sup>31</sup> Age ye fen, Jesus, in dō fiya tar tuwelf firen geif iroule irokenēdin, "Ulegef, ada Jerusalem teselef, ereb ereb ganan Tamo Naal nigin profet ditoton anĭ, fau kisi falauf. <sup>32</sup> ĩ fau haiden Israel sā anidi imeid bun ilauf. Idi ĩ fau diselinēf, kono difiyēf, disisnēf, wagĭ difiye ken, dukesiyouf. <sup>33</sup> Naa towo bun, ĩ fau baban mata kel fā youf."

<sup>34</sup> Anĭ ere, dō fiya tar, enei ganan taka to kelein. Od anĭ nē gariya idi bun iminen, agef fen, idi ĩ ereb nigin irok anĭ to kelein.

**Maleg Tamo Mala Ifofakeleya Anĭ Mala Fara Felen**  
(Matyu 20:29-34; Mak 10:46-52)

<sup>35</sup> Sain Jesus Jeriko kelē fiyē mog, tamo taka mala ifofakeleya, naab yerin nonĭ yef ibodon. <sup>36</sup> ĩ tamo kayau musei disi dilef ya karĭ ye fen, ereb wō yef anĭ nigin to fedin. <sup>37</sup> Idi ĩ dirokenen, "Jesus Nasaret tamal isi ilef."

<sup>38</sup> Age de di, ĩ iweig iron, "Jesus, Dawid Naal, aya nigin malalon yō!"

<sup>39</sup> Tamo uyu dilen anidim sakā difiye ken, foro yalouf nigin dirokenen, anĭ ere, ĩ wade bagai iweig iron, "Dawid Naal, aya nigin malalon yō!"

<sup>40</sup> Jesus dē yel fen, tamo ĩ wagen dirou disiyouf nigin irokenēdin. ĩ isi melsā di, Jesus ĩ to fiyen, <sup>41</sup> "Aya ō ere age afonōf ani, ō oroyok?"

Tamo anĭ solof iron, "Odug, aya malau kelē yalau fenē."

<sup>42</sup> Age ye di, Jesus ĩ irokenen, "Malā fara wol, ogon momoiya anim el yom." <sup>43</sup> Kaisā bagai, ĩ mala fara fel fen, Jesus dōf, Negur yana yalesen. Tamo kayau ganan anĭ dile fen, idig Negur yana dalesen.

**Sakeus, Takis Yaleya Tamo**

**19** Jesus Jeriko taun wō ye fen, atu iyok ilen. <sup>2</sup> Tamo taka yana Sakeus an ibodon. ĩ takis yaleya tamo neid mudur, safina musei ado. <sup>3</sup> ĩ Jesus ĩ ai bagai anĭ ilouf nigin oron, anĭ ere, ĩ tobega tamo nigin ĩ kisi feleya sā, ere nigin, tamo kayau musei dinonolnen. <sup>4</sup> Anĭ nigin, ĩ ket gudu ref ile, Jesus ilouf nigin aa fig ilun sō yen, ere nigin, Jesus naab anĭ dōf, are isi ilauf.

<sup>5</sup> Sain Jesus modoū anĭ bun ulō yeis fen, mala ilun ira ken, ĩ irokenen, "Sakeus, kaisā bagai kutū weis. Gama aya ogon fō bun abodōf bagai." <sup>6</sup> Age ye di, ĩ kaisā kutū yeis fen, wau sere fiya ado Jesus aan fiyen.

<sup>7</sup> Tamo kayau ganan enei dile fen, kosesē kurā den, "ĩ mosor ado tamo nē fō bun mogo ilef."

<sup>8</sup> Anĭ ere, Sakeus ifar fen, Jesus irokenen, "Odug, ulef! Gama yeir aya neu safina atun fara afe fen, sitakā maleg tamo afenēdiyouf, aya idegēya bunem tunĭ neid safina alen are, aya idi mugu mugu mala solo aiwa ifenēya teten ano fen, afenēdiyouf."

<sup>9</sup> Age ye di, Jesus ĩ irokenen, "Gama kel yaleya anĭ fō enei bun isil, ere nigin, tamo enĭ, ĩg Abraham naal taka. <sup>10</sup> Ere nigin, Tamo Naal fō delen anidi imirneĭd fen, kel gei fouf nigin isin."

**Ferfer Ten Moni Imeid Bun Inon Nē Yaab Od**  
(Matyu 25:14-30)

<sup>11</sup> Idi od enei karĭ de mog, Jesus tobol fe, yaab od taka irokenēdin, ere nigin, ĩ mogo Jerusalem melsā ifaref, anĭ nigin, tamo kayau Negur nē tano kaisā bagai wō youf de fen, kisi difen. <sup>12</sup> Anĭ nigin, ĩ iron, "Tamo taka yana odug ado, ĩ king dinenē di, kel isiyouf nigin fō takā gerō bagai ilen. <sup>13</sup> Anĭ nigin, ĩ yogon ferfer ten

uweig laisi fen, moni wan tausen kina mugu mugu ifeneid fen, irokenēdin, 'Moni enei kabī wenēg mog, aya kelauf.'

<sup>14</sup> "Anī ere, yogon tamo tar kiwai difen ken, eig de dirōf nigin ī dumen arū tamo sur difen, 'Amā tamo enei nemā king wō youf nigin to oromak.'

<sup>15</sup> "Anī ere, ī king yana yale fen, fonō kel isin. Agef fen, ī, ferfer moni ifenēdin idi moni ado naig de kabī dalen anī ilouf nigin, iweignēdi di, disin.

<sup>16</sup> "Tamo uyu ī isi iron, 'Odug, aya ogon wan tausen kina bun, ten tausen kina taka alen.'

<sup>17</sup> "Age ye di, yogon odug solof irokenen, 'Ō ferfer biya, ō de agon! Ō safina naal bagai bun kabī biya walen nigin, taun ten lo weid.'

<sup>18</sup> "Ī dō fiya taka isi iron, 'Odug, aya ogon wan tausen kina bun, faif tausen kina taka alen.'

<sup>19</sup> "Age ye di, yogon odug īg irokenen, 'Ō taun faif lo weid.'

<sup>20</sup> "Age fe di, ferfer taka isi iron, 'Odug, ogon moni yeir. Aya moni anī gabar masak nem sile afe fen, anokon. <sup>21</sup> Aya ō nigin kumī aun, ere nigin, ō tamo total ado. Ō ereb to unokon anī waledig, onom to utenen anī kusu wodig.'

<sup>22</sup> "Yogon odug ī irokenen, 'Aya ogon od bunem es ayōf, ō ferfer sane! Ō kelein, aya tamo total ado, ayam to anokon anī aledig, ayam to atenen anī kusu afedig de? <sup>23</sup> Ere wo fen, neu moni benk bun to unon? Ago wom are, sain aya kelauf bun, moni kabī yalen anī nē mala ado, moni ō benk wenen anī bagu fiya kel isin ado alem.'

<sup>24</sup> "Age ye fen, odug idi difaren anidi irokenēdin, 'Yogon moni son ge fen, tamo ten tausen kina ado anī wenēg.'

<sup>25</sup> "Age ye di, idi ī dirokenen, 'Odug, ī mogo ten tausen kina ado!'

<sup>26</sup> "Odug solof iron, 'Aya ā arokeneik, taka ī ado, aya teten anouf, anī ere, taka ī sā bagai, ereb taka ī ado areg, ī bun tamal son fouf. <sup>27</sup> Anī ere, neu kiwai tar, aya nedi king ibodōya nigin to orodin anidi, ein wageun gurig urousig fen, malau bun udenkesig.'"

### Jesus Tamo Yana Ado Gen Jerusalem Ilen

(Matyu 21:1-11; Mak 11:1-11; Jon 12:12-19)

<sup>28</sup> Jesus od enei wogō yel fen, Jerusalem iseleya nigin, ī ketem uyu iselen. <sup>29</sup> Jesus Moul Arei † bun Betfage ado Betani fonō kelē fiye ken, in dō fiya tar uru sur feid irokenēdin, <sup>30</sup> "Fonō wageik anī bun uleg, an wōg fen, donki naal difon anī ulougouf, are aibem taka anī bun to iyon. Anī biru weleg fen, ein urou usig. <sup>31</sup> Taka nem to yeif, 'Ere nigin ā anī biru gef?' urokenēgouf, 'Odug anī kabī ifenēf nigin.'"

<sup>32</sup> Anī nigin, uyu sur fedin idi dile, Jesus irokenēdin kilei bagai anī fotou difen. <sup>33</sup> Idi donki naal biru de mog, anī nē marau tamo idi to difiyēdin, "Ā ere nigin donki naal anī biru gef?"

<sup>34</sup> Idi ī solo de dirokenen, "Odug anī kabī ifenēf nigin."

† 'Oliv Arei' dedig.

<sup>35</sup> Idi donki naal anī Jesus wagen dirousi fen, idi neid gabar teten dirara ken, ī anī teten dinenē ibodon.

<sup>36</sup> Jesus iyok ile mog, tamo kayau idi neid gabar naabur du difedin.

<sup>37</sup> Sain ī iyok isi, naab Moul Arei bunem isileya non, in dō fiya tar ganan, memelik ganan inodin dilen nigin, waud al fiya ado aiteid odug nem Negur yana dalesen: <sup>38</sup> "King, Odug yana bunem isif, are ī el fiya ado!" ††

Saa ilun wau inosiya ado, ilun bagai fula fiya me-deīya ado!"

<sup>39</sup> Tamo kayau atun, Farisia tamo tunī Jesus dirokenen, "Tise, ogon dō fiya tar sakā wiyeid!"

<sup>40</sup> Anī ere, Jesus solof iron, "Aya ā arokeneik, idi foro dalauf are, meein eneidi diweig dirōf."

<sup>41</sup> Ī Jerusalem kelē fiye ken, taun anī ile, wau gudū fe di, inā yale, <sup>42</sup> iron, "Ō Jerusalem naa enei bun, ō nigin erebem waū inosiya irou isif anī ō kelein, are dem, anī ere, gama ō malā bun iminek. <sup>43</sup> Sain taka ō bun isiyouf, ogon kiwai tar, ō bun teneub mudu dino, salili diyokel, afi diyokalauf. <sup>44</sup> Idi ō tenebur dale dirāyōf, ō ado gerē tar ogon kau namen difaref geid. Idi meein taka taka teten ditorō di, to ibodōf, ere nigin, Negur ō bun isin nē naa anī to ulegen nigin."

### Jesus Tempel Bun

(Matyu 21:12-17; Mak 11:15-19; Jon 2:13-22)

<sup>45</sup> Jesus tempel modoū bun ile, idi ereb ereb na nigin sur de mog, an irudidin. <sup>46</sup> Agef fen, Jesus idi irokenēdin, "Negur nē Itotoya bun ibodok, 'Neu fō are, kosēya nē fō ibodōf,' † anī ere, āgem 'bē tamo neid iminēya fō' †† unogen."

<sup>47</sup> Naa ganan Jesus tempel bun ifelnēdidin. Anī ere, pris odudug, lo ifelnēdiya tamo, tamo kayau neid mudur adodo geid, Jesus dukesiyouf nigin naab dimiren.

<sup>48</sup> Anī ere, idi age difouf nigin naab taka to dilen, ere nigin, tamo kayau ganan in od anī diroun.

### Jesus Aim Igirnen Anī To Difiyen

(Matyu 21:23-27; Mak 11:27-33)

**20** Naa taka bun, Jesus tempel bun tamo kayau ifelneid fen, biya od wogō yen. Agef mog, pris odudug, lo ifelnēdiya tamo, mudur adodo geid, ī gein disin. <sup>2</sup> Idi diron, "Aim ō igirnō di, ō ereb ereb enī ago wof anī urokanamā. Aim ō igirnon?"

<sup>3</sup> Jesus aitedin yale iron, "Ayag to fiya taka afeneif. So-log urokanag, <sup>4</sup> Jon naan igunēdin are saa ilun tamal de, tamo bunem?"

<sup>5</sup> Idi dogo dogol katō de fen, diron, "Ada, 'Saa ilun tamal,' tauf are, ī to fouf, 'Ere nigin ā ī nigin to momoi wiyēgen?' <sup>6</sup> Anī ere, ada, 'Tamo bunem,' tauf are, tamo kayau ganan meinem dinadauf, ere nigin, idi Jon ī profet den."

<sup>7</sup> Anī nigin, idi solo de diron, "Ī nain be tamal are amā keleī sā."

<sup>8</sup> Age de di, Jesus iron, "Ayag ā to arokeneif, aim aya igirna di, aya ereb ereb enī age afedif."

†† Sam 118:26 ‡ Asaia 56:7 †† Jeremaia 7:11

### Tamo Kabī Lo Difedig Nē Yaab Od

(Matyu 21:33-46; Mak 12:1-12)

<sup>9</sup> Jesus tobol fe, yaab od enei tamo kayau irokenēdin, “Tamo taka wain kabī yale, ī mala solo yalouf nigin wain kabī, kabī tamo tunī imeid bun ino fen, sain meluk uyu takā ilen. <sup>10</sup> Fito fiya sain, ī ferfer taka wain kabī lo fiya tamo gedin, wain biya tunī difenēf nigin sur fen. Anī ere, idi ī du ken, sur difiyē di, ima sāsā ilen. <sup>11</sup> Ī ferfer taka sur fen, anī ere, idi tamo anīg du ken, mama difenē di, ima sāsā ilen. <sup>12</sup> Ī baban takag sur fe di, idi īg darau difen ken, dumeitur diran.

<sup>13</sup> “Age dife di, wain kabī marau iron, ‘Aya ere naig afouf? Aya neu kesu, oboiyou, sur afouf. Idi ī anī karī difiyēf be.’

<sup>14</sup> “Anī ere, kabī lo fiya tamo idi ī dile fen, abob dirokenen. Idi diron, ‘Eī ī akorouf. Ada ī taukeis fen, akor eī nedauf.’ <sup>15</sup> Anī nigin, idi ī wain kabī dumeitur dira ken, dukesin.”

Age dife di, wain kabī marau naig fediyouf? <sup>16</sup> Ī isi, kabī lo fiya tamo idenkeis fen, wain kabī anī tamo tunī ifenēdiyof.”

Sain tamo kayau od enei karī de fen, idi diron, “Enei to bagai agef wō youf!”

<sup>17</sup> Anī ere, Jesus idi lo feid le fen, to fedin, “Age fiyauf are, ere gariya nigin Negur nē Itotoya bun eig ye irok: “Meein are fō inoya tamom sane de fen, ditoron, meein anī gama monog tor wō yen’ †?

<sup>18</sup> Aib taka meein anī teten kubū youf, mereb fe fisik fouf, takag, aib taka meein anī ī teten kubū youf, ī danīf aas lauf.”

<sup>19</sup> Lo ifelnēdiya tamo, pris odudug geid, Jesus kaisā bagai ironēya nigin naab dimiren, ere nigin, idi kelein, ī idi nigin yaab od enei wogō yen. Anī ere, idi tamo kayau nigin kumī den.

### Sisa Takis Ifenēya

(Matyu 22:15-22; Mak 12:13-17)

<sup>20</sup> Anī nigin, idi Jesus ololo difiye ken, kofo tamo sur difedin, kofo tamo idi idegēya bun madur tamo gen dilen. Idi Jesus ereb od wogōya bun kū fenē di, diroune ken, Rom gawaman mudur nē lo fiya ado megeir bun dinenēf nigin kisi difen. <sup>21</sup> Anī nigin, kofo tamo Jesus to difiyen, “Tise, amā keleī, ogon wogōya ifelnēya ado madur. Ō takam in oroya dō wouf nigin wewu yō di, in oroya dō fen, taka wau morō to wenēdig, anī ere, ō momoi bun Negur nē naab ufelnamādig. <sup>22</sup> Amā Sisa takis mafenēf anī lo dō fiya de, sā?”

<sup>23</sup> Anī ere, Jesus idi namedin idegēya anī ile fen, irokenēdin, <sup>24</sup> “Koin moni taka ufelnag. Ai nē malakanon ado itotoya anī bun ibodok?”

<sup>25</sup> Idi aiten dale diron, “Sisa nē.” Age de di, Jesus idi irokenēdin, “Age fiyauf are, Sisa nē are Sisa wenēg, Negur nē are Negur wenēg.”

<sup>26</sup> An Jesus mal atun wogō yen bun, idi ī ironēya kisi feleya sā. Idi ī solof iron anī bunem terefeit de fen, foro delen.

† Sam 118:22

### Mata Kel Fāya Bun Ai Nē Kayau Ibodōf?

(Matyu 22:23-33; Mak 12:18-27)

<sup>27</sup> Sadusia tamo idi dirōdig, laa bun tamal mata to ke de fā dedig, dedig anī tunim, to fiya eig fiya ado Jesus wagen disin. <sup>28</sup> Idi diron, “Tise, Moses itotkanaman, are tamo taka, ne tura laaf fen, aiwa itornen, anī ere, kesu sāf are, tamo ī kayau waab anī yale fen, tura nē kesu diroukenēf. <sup>29</sup> Gama tura tura sewen dibodon. Matu ketem kayau taka yalen, anī ere, kesu yaleya sā mog, tamo laa fen. <sup>30</sup> Matu dō fiya bagam kayau anī yalen, ī laa fe di, <sup>31</sup> ī dō fiya bagam kayau anī yalen, age de dile dile, tura tura sewen ganan kesu sā gare desin. <sup>32</sup> Dum kayau areg laa fen. <sup>33</sup> Anī nigin, dum laa bun tamal mata kel fāya sain bun, ī ai nē kayau ibodōf, ere nigin, tura tura sewen anidi adok ī dale dogolen?”

<sup>34</sup> Jesus aitedin yale iron, “Gama sain enei bun, tamo kayau yalef, kayau tamo yalef ya ibodok. <sup>35</sup> Anī ere, sain anī bun, idi laa bun tamal mata kel fāya sain bun dibodōf nigin kisi feleya anidi, an tamo kayau yalef, kayau tamo yalef ya sāf, <sup>36</sup> idi baban gare deyag kisi feleya sā, ere nigin, idi engel gen. Idi laa bun tamal mata ke de fā def nigin, idi Negur nē gere tar. <sup>37</sup> Anī ere, arein aa yā wō yen nigin Negur nē Itotoya bun, Moseseg tamo gare den anī mata ke de fā douf nigin ifelnen, ere nigin, ī Odug nigin iron, ‘Abraham nē Negur, Isak nē Negur, Jakop nē Negur.’ †<sup>38</sup> Ī laa neid Negur sā, ī mata ibodōya neid Negur, ere nigin, ī bun ganan mata dibodok.”

<sup>39</sup> Lo ifelnēdiya tamo tunī aiten dale diron, “Tise, ō de urok!” <sup>40</sup> Anī bunem idi kumī de fen, taka nem ereb taka nigin baban Jesus to, to fiyen.

### Ai Nē Kesu Anī Kristus?

(Matyu 22:41-23:7; Mak 12:35-40)

<sup>41</sup> Age dife di, Jesus idi irokenēdin, “Naig fe di, idi Kristus ī Dawid nē Naal dedig? <sup>42</sup> Dawid ī yogo Buk Sam bun kurō falaisin:

“Negur neu Odug irokenen,

“Imau biya melem ubod mog,

<sup>43</sup> ogon kiwai tar

on yē inoya nē sawa anouf.” †

<sup>44</sup> Dawid ī nigin ‘Odug’ yef, age fiyauf are, naig fe di, ī Dawid naaluouf?”

<sup>45</sup> Tamo kayau ganan karī difiyē mog, Jesus in dō fiya tar irokenēdin, <sup>46</sup> “Lo ifelnēdiya tamo nigin lo welegei. Idi gabar meluluk difonunakel diyo ken, maket modoū bun aan difiyēdiyof anī orodidig. Age de fen, idi Juda neid uub fō bun sia biyai biyai bun dibod ken, tar inoya bun modoū malabag malabag bun dibodōdig. <sup>47</sup> Idi kayau waab idegnēdiya bunem nedi fō sosoin difeid fen, meleid yaleya nigin meluk bagai kosē dedig. Tamo age fediya, mala solo darau sane bagai dalouf.”

†† Eksodas 3:6 † Sam 110:1

### Kayau Waab Nē Safina Negur Ifenēya

(Mak 12:41-44)

**21** Jesus mala irā, tamo kayau safineid adodo, nedi kolekta moni tempel bogis bun dino mog, ileidin. <sup>2</sup>Takag, ī lof mog, kayau waab maleg taka isi, peni giriya moni nanaal uru inon. <sup>3</sup>Agef fen, Jesus iron, “Aya ā momoi arokeneik, kayau waab maleg enī ī, ganan wal fediya, odug bagai bogis bun inol. <sup>4</sup>Tamo kayau enei ganan, dogo neid safineid bun tamal, nedi kolekta moni dinon, anī ere, kayau anī, maleg bun ī mata ibodōf nē anī ganan inon.”

### Idikeleya Sain Nē Uris

(Matyu 24:1-35; Mak 13:1-31)

<sup>5</sup>In dō fiya tar tunī, tempel meein biya biya nem ado, safineid biyai Negur difenen anim, tempel naki difiyen anī nigin wogō den. Anī ere, Jesus iron, <sup>6</sup>“Ā ulegef enei nigin, sain fau isiyouf, meein enī taka to abob tete tete yenēf, anī adok fau isog irilauf.”

<sup>7</sup>Idi to difen, “Tise, ere sain eneidi wō youf? Ere uris anī, eneidi kisi falauf nigin wō youf?”

<sup>8</sup>Age de di, Jesus iron, “Takam to idegneif nigin lo weleg. Ere nigin, musei aya yanau nem disi dirōf, ‘Aya Kristus,’ takag, ‘Sain mogo melsak.’ Age de di, to dō wiyēdig. <sup>9</sup>Ā kusī nigin ado, kantri bun kiwai fen, gawaman narī difef ya karī gouf, ā to tererē gei. Ereb ereb enidi ketem wō youf bagai, anī ere, idikeleya anī, sain anī bun bagai to wō youf.”

<sup>10</sup>Age ye fen, Jesus idi irokenēdin, “Teneub taka fā ye fen, ī teneub taka nigin kiwai ifenēf, tano taka ī tano taka nigin kiwai ifenēf. <sup>11</sup>Mimī odug wowā youf, naū odug ado dagi totol, modoū taka taka bun wowā youf, ereb ereb kumīya nē ado uris odudug, saa bun wowā youf.

<sup>12</sup>“Anī ere, eneidi ganan fau to wō ye mog, idi kaka diyai ken, kafī fiya difeneif. Idi Juda neid uub fō bun ado kalabus bun dineneif. Age de fen, ā king ado gawaman mudur adodo meleid bun dirouleyeif, anī ganan aya yanau nigin de fen, age diyēif. <sup>13</sup>Naab enei bunem, ā idi meleid bun, aya nigin kurō wesigouf.

<sup>14</sup>Anī ere, ā idi meleid bun aug isenneīya nigin dodok ge fen, to wogō gouf nigin ā kisi ketem ufokeleg. <sup>15</sup>Ere nigin, aya, od ado kisi biya, āgenei kiwai tar takam solof irōya be, kiwai ifenēya kisi feleya sā anī afeneif.

<sup>16</sup>Anī ere, ā fau sineī temeī tarem, tureī tarem, sirag ado neī mou taremeg kiwai difenei ken, ā tunī laa bun dineneif. <sup>17</sup>Tamo ganan, aya yanau nigin de fen, ā kiwai difeneif. <sup>18</sup>Anī ere, mudureī bun, fatiyeī tekelei bagai to iminkalauf. <sup>19</sup>Megeir ifareya bunem, mata walogouf.

<sup>20</sup>“Sain ā Jerusalem kusī tamom salili dife mog, ulogouf, ā keleī youf, Jerusalem fonou inenēya anī melsak. <sup>21</sup>Age fiya ulogouf, idi Judia distrik bun dibodok, arein diya diselauf, idi taun anī bun dibodok, anenem diyalauf, idi taun yerin difaref, namen to dilauf bagai. <sup>22</sup>Ere nigin, sain enei are, Negur nē Itotoya bun ibodok ganan kisi falauf nigin darau ifenēya nē sain. <sup>23</sup>Naa anī

bun, kayau bouweid ado, kayau kesu su difenek ado, idi meleidlon ado. Teneub anī bun, morō odug wō ye fen, Negur nē didi, tamo kayau enei bun isiyouf. <sup>24</sup>Idi dimig nem didenkeis, kalabus tamo gei difeid fen, teneub ganan bun diroulediyouf. Jerusalem fau haiden Israel sā anidim lalai difeid dile, haiden Israel sā anidi neid sain anī kisi falauf.

<sup>25</sup>“Uris gaa bun, ogō bun ado, barisa bun wō youf. Tenebur ein, teneub ganan bun moloun fire bagai fā ye fen, maaī gugu re di, idi kisi gurū ye fen, nene douf.

<sup>26</sup>Tamo kayau, teneub bun ere wowā youf de fen, kumī de, meleid waī youf, ere nigin, saa nē megeir guyoyō douf. <sup>27</sup>Sain anī bun, tamo idi, Tamo Naal lalo bun megeir ado fula fiya medeīya barikā isi mog, dilouf. <sup>28</sup>Ereb ereb enei gariya ino, wō ye di, ufareg fen, mudureī utadseg, ere nigin, kel yaleyeīya are melsak.”

<sup>29</sup>Age ye fen, Jesus yaab od enei irokenēdin, “Ā aa fig ado aa ganan ulogouf. <sup>30</sup>Sain idi aarau ifiraūd mog, anī ā aug uleg fen, ā keleīdig, saneya melsak. <sup>31</sup>Age fiya bagai, ereb ereb eneidi wō ye mog, ulogouf are, āg keleī youf, Negur nē tano are mogo melsak.

<sup>32</sup>“Aya ā momoi arokeneik, tamo kayau sain enei bun dibodok anidi to gare de mog, ereb ereb eneidi ganan wō youf. <sup>33</sup>Saa teneub ado sa kalauf, anī ere, neu od to bagai sa kalauf.

<sup>34</sup>“Lo walagauf, sāf are, saafei ge, aai naanuei ge fen, tenebur mata ibodōya nigin sii fiya anim, āgenei wauī bun kafī yeī di, ā keleī sā mog, Negur nē naa kor gen ā bun isiyouf. <sup>35</sup>Naa are, tenebur tamo kayau ganan bun wō youf. <sup>36</sup>Eneidi ganan wowā you fenē anī wal fiya kisi falauf nigin ado, Tamo Naal mala bun ufaragauf nigin, ā faimud ololo wog fen, kosē gouf.”

<sup>37</sup>Naa ganan, Jesus tempel bun ifelneid fen, aragau ganan, Moul Arein isel fen, bō an ibodōdig. <sup>38</sup>Age fe di, tamo kayau ganan, tempel bun karī difiyēf nigin, bonimeī bagai disidig.

### Judas Jesus Mudur Adodo Imeid Bun Inouf Nigin Yo Yen

(Matyu 26:1-5; Mak 14:1, 2, 10, 11; Jon 11:45-53)

**22** Gama Bret Yis Sā Sifa naa, Pasa naa dedig melsā di, <sup>2</sup>pris odudug, lo ifelnēdiya tamo geid, Jesus yukesiya nigin naab dimiren, ere nigin, idi tamo kayau nigin kumī den. <sup>3</sup>Age fe di, Satan, Judas, Iskariot tamal dedig, tuwelf dō fiya tar atun taka, ī namen ilen. <sup>4</sup>Age fe di, Judas ile, pris odudug ado tempel lo fiya tamo neid uyu irouya bun wō ye fen, idi geid ī naig fe Jesus kiwai imeid bun inouf nigin katō difen. <sup>5</sup>Idi od enī karī de, waud al fe fen, ī moni difenēf nigin diroke-nen. <sup>6</sup>Judas ī yo ye fen, tamo kayau to guru de mog, Jesus idi imeid bun inouf nigin naab imirek ilen.

### Jesus In Aposel Geid Idikeleya Nē Bō Saaf Don

(Matyu 26:17-35; Mak 14:12-31; Jon 13:21-30, 36-38)

<sup>7</sup>Anī dumen, Bret Yis Sā anī nē naa wō yen, anī bun idi Pasa naa nigin sipsip naal diden ken, sesewi dife-dig. <sup>8</sup>Jesus, Pita Jon ado sur feid fen, iron, “Uleg, ada Pasa naa nē saaf tāf nigin dodok wanadag.”



<sup>9</sup> Idi Jesus to difiyen, “Ö, amā nain anī, Pasa naa nē saaf tāf nigin, dodok mafouf anī oroyok?”

<sup>10</sup> Age de di, Jesus idi irokenēdin, “Taun wōg fen, tamo taka darum naan ado isi fotou yeif, ī fō bun ilauf anī dōg uleg. <sup>11</sup> Agog fen, ā fō marau eig wiyēg urokenēgouf, ‘Tise ö irokonok: Aab nanī bun an, aya neu dō fiya tar geid, Pasa naa nē saaf māf?’ <sup>12</sup> Ago ge di, ī aab odug ilun anī ifelneif, an ereb ereb dodok de bure difelen. An neda nigin dodok gouf.”

<sup>13</sup> Age ye di, idi dile, Jesus irokenēdin kilei ereb ereb age fiya dilen. Anī nigin, idi Pasa naa dodok difen.

<sup>14</sup> Sain wō ye di, Jesus in aposel geid tebol bun dibodon. <sup>15</sup> Age de fen, Jesus idi irokenēdin, “Aya darau yaleya sā mog, ā geid Pasa naa nē saaf tāf anī orouf bagai. <sup>16</sup> Ere nigin, aya ā arokeneik, aya baban Pasa naa nē saaf to āf ile, anī fau Negur nē tano bun kisi falauf.”

<sup>17</sup> Age ye fen, ī kap yale, Negur de fiye ken, iron, “Enei waleg fen, ā atun foig. <sup>18</sup> Aya ā momoi arokeneik, aya baban wain to āf ile, Negur nē tano isiyouf.”

<sup>19</sup> Age ye fen, Jesus bret yale, Negur de fiye ken, mumā fen. Agef fen, ī in dō fiya tar ifeneid fen, iron, “Ei neu bouwau, ā nigin afeneik. Enei agog fen, aya nigin kisi gouf.”

<sup>20</sup> Age fiya bagai, saaf bure difel fen, Jesus kap yale, iron, “Kap enei, neu naudou bun, ā Negur geid bar itenēya mata, naudou are ā nigin fi felef. <sup>21</sup> Anī ere, taka aya kiwai imeid bun inoyauf, are ein tebol bun urom imamā manof. <sup>22</sup> Momoi, Tamo Naal ī nigin iron kilei agef ilauf, anī ere, tamo ī kiwai ifenek, ī malalon ado.” <sup>23</sup> Age ye di, idi dogo dogol toti difen, idi atun aim bagai tobonunā enei age foug.

<sup>24</sup> Takag, idi atun aim anī odug bagai ibodōf nigin luwa diroun. <sup>25</sup> Age dife di, Jesus idi irokenēdin, “Haiden neid king, dogo neid tamo kayau lo difedig, idi dogo neid megeir tamo kayau bun yaor difedig, are ada biya difadauf dedig. <sup>26</sup> Anī ere, ā age fiya anī to ago gouf. Age fiya ban, ā atun odug ibodok are, kesu naal gen ibodōf, takag, uyu irouya tamo ī, aruna yaleya tamo gen ibodōf. <sup>27</sup> Ai anī odug, taka tebol bun ibodok anī de, taka ī aruna yalef anī? Taka ī tebol bun ibodok anī sā de? Anī ere, aya ā atun aruna yaleya tamo gen abodok. <sup>28</sup> Ā anī, neu kisi fiya isi di, aya bun toku ufaregen. <sup>29</sup> Neu Dei tano aya ifanan gen, ayag tano ā afeneik. <sup>30</sup> Age afe di, ā neu tanon, tebol bun saaf ado naan wāgauf, king nē sia bun ubodōg fen, Israel ibor tuwelf es gouf.

<sup>31</sup> “Simon, Simon, tamo wit biya ado wit ido foi fiya nigin age fedig gen, Satan ī āgenei momoiya kisi yeif fenē nigin to fen. <sup>32</sup> Anī ere, aya, Simon ö nigin ogon momoiya to urofosiyouf nigin kosē aun. Anī nigin, sain ö kelouf, turā tar megeir wediyouf.”

<sup>33</sup> Anī ere, Pita aiten yale iron, “Odug, aya ö ado kalabus bun ado, laa bun ileya nigin dodok afel.”

<sup>34</sup> Age ye di, Jesus iron, “Pita, aya ö arokonok, gama fau tataro kokorok yeya sā mog, ö wa fen, aya nigin keleī sā wo, towo wouf.”

<sup>35</sup> Age ye fen, Jesus idi to fedin, “Sain aya ā moni nē kodol, faa be, su sā sur ayein, ā ere taka lau gen de?” Idi solo de diron, “Sā.”

<sup>36</sup> Age de di, Jesus idi irokenēdin, “Anī ere, gama taka ī moni nē kodol adouf, yalouf, faag age fiya, taka ī dimig sā, yogon gabar na nigin sur fe fen, taka na yalouf. <sup>37</sup> Negur nē Itotoya bun eig ye ibodok, ‘Ī tamo sesen geid bagu difedin.’ † Aya ā arokeneik, enei aya bun kisi fel, agef wō youf. Ariya, aya nigin itoton are mogo kisi felef.”

<sup>38</sup> In dō fiya tar diron, “Ulef, Odug, dimig uru yeir.” Age de di, ī iron, “Are de.”

### Jesus Moul Arein Kosē Yen

(Matyu 26:36-46; Mak 14:32-42)

<sup>39</sup> Agef fen, Jesus aabē tamal ulō yeis fen, gai age fedig gen, Moul Arein iselen, age fe di, in dō fiya tareg ī dō difiyen. <sup>40</sup> Modoū anī bun wō de fen, Jesus in dō fiya tar irokenēdin, “Kisi fiya bun to kubū gouf nigin kosē wog.” <sup>41</sup> Jesus yogon dō fiya tar itorneid, meein irā di, ile kubū youn age fiyan ile, ibor bobou fe fen, kosē yen, <sup>42</sup> “Dei, ö oroyōf are, kap enī aya bun walelauf. Anī ere, neu oroya to dō wouf, on oroya dō wo.” <sup>43</sup> Engel taka saa ilun tamal, ī bun wō ye fen, megeir ifenen. <sup>44</sup> Age fe di, Jesus wau morō fatuk fe di, ī total bagai kosē yen, age fe di, maab, naud isidig gen, tenebur kuku ren.

<sup>45</sup> Ī kosē yel fen, fā ye, in dō fiya tar gedin kel ile, waud gudū falaisil, den mog, ile din. <sup>46</sup> Agef fen, Jesus idi to fedin, “Ere nigin mulaī wenēgef? Ā kisi fiya bun to kuku gouf nigin fafāg fen, kosēg.”

### Jesus Dirounen

(Matyu 26:47-56; Mak 14:43-50; Jon 18:3-11)

<sup>47</sup> Jesus fau wogō ye mog, tamo musei disin, tuwelf in dō fiya tar idi anī atun taka, Judas dedig inim uyu iroukenēdin. Ī Jesus umā fiyēf nigin non ilen. <sup>48</sup> Anī ere, Jesus ī to fiyen, “Judas, ö umāya bunem Tamo Naal kiwai wenēf de?”

<sup>49</sup> Sain Jesus nē dō fiya tar, ereb wō you fenē age fe di, dile fen, idi diron, “Odug, amā nemā dimig nem madenauf de?” <sup>50</sup> Age de fen, idi takam, pris mudur ado nē ferfer weder biyalē anī salōf iran.

<sup>51</sup> Anī ere, Jesus iron, “Baban enei to ago gouf!” Age ye fen, ī tamo anī nē weder kobūf fen, el fiyen.

<sup>52</sup> Agef fen, Jesus, pris odudug, tempel lo fiya tamo neid uyu irouya geid, mudur adodo, ī nigin disin anī irokenēdin, “Ā bē tamo ounēgouf gen, ā dimig ado do seburer adodo usigef de? <sup>53</sup> Naa ganan, aya ā geid tempel bun tabodon, anī ere, ā aya bun imeī taka to unogen. Anī ere, eī āgenei sain, are gugum irouneik nigin.”

† Asaia 53:12

### Pita Jesus Nigin Wa Fen

(Matyu 26:57, 58, 69-75; Mak 14:53, 54, 66-72; Jon 18:12-18, 25-27)

<sup>54</sup> Idi Jesus dale, diroune ken, pris mudur ado nê fô bun dirou dilen. Pita ï so rel fen, dumeid dô fen. <sup>55</sup> Anï ere, sain idi fofomala atun yã kû de dibodon, Pita ïg an weim dibodon, <sup>56</sup> Kabï kayau momoul taka, Pita yã sirin ibod mog, ilen. Kayau momoul anï Pita lo fel fen, iron, "Tamo eneig ï geid."

<sup>57</sup> Anï ere, Pita waf fen, iron, "Kayau, aya ï keleï sã."

<sup>58</sup> Sain naal ile di, taka nem ï ile fen, iron, "Ôg idi neid taka."

Anï ere, Pita iron, "Mou, aya sã!"

<sup>59</sup> Aua tekelei age fiya ile di, taka bagam ï nigin total iron, "Momoi bagai, tamo eneig ï geid diyon, ere nigin, ïg Galili tamal."

<sup>60</sup> Anï ere, Pita aiten yale iron, "Tamo, ô urok anï aya keleï sã!" ï irô mog bagai, tatara kokorok yen. <sup>61</sup> Odug falei yel, Pita lo felen. Age fe di, Pita Jesus wogô fiyen anï nigin weder fokô yen, "Gama fau tatara kokorok yeya sã mog, ô aya nigin wa wo, towo wouf." <sup>62</sup> Age fe di, ï mayarê ile fen, inã fatuk yalen.

### Kusï Tamo Jesus Diselinen

(Matyu 26:67, 68; Mak 14:65)

<sup>63</sup> Tamo Jesus diroune idi, ï diseline ken, wagï difiyen. <sup>64</sup> Age dife fen, idi Jesus mala difofakel fen, to difiyen, "Kurô weis urokanamã! Aim ô inok?" <sup>65</sup> Age de fen, idi kono fiya od musei dirokenen.

### Jesus Juda Kaunsel Neid Kot Mala Bun Ifaren

(Matyu 26:59-66; Mak 14:55-64; Jon 18:19-24)

<sup>66</sup> We fele di, tamo kayau neid mudur adodo neid kaunsel, are pris odudug, lo ifelnêdiya tamo geid, weim guru de mog, Jesus idi gedin dirou dilen. <sup>67</sup> Idi diron, "Ô Kristus ouf are, amã urokanamã."

Anï ere, Jesus aitedin yale iron, "Aya ã arokeneïf are, ã to momoi gouf, <sup>68</sup> agef fen, aya ã to ayêïfeg, ã to so-log urôgouf. <sup>69</sup> Anï ere, gama sain enei bunem ilauf ganan, Tamo Naal ï, Negur megeir ado ima biyalem ibodôf."

<sup>70</sup> Age ye di, idi ganan to difiyen, "Age foug are, ô anï Negur Naal de?"

Ï aitedin yale iron, "Ã de urôgef, aya anï."

<sup>71</sup> Age ye di, idi diron, "Ere nigin ada, ï nigin od megeir fiya nigin tamo baban tamirêf? Ada ï sigoron bagai karï taul."

### Jesus Pailat Herod Ado Meleid Bun Ifaren

(Matyu 27:1, 2, 11-26; Mak 15:1-15; Jon 18:28-19:16)

**23** Age de fen, guru fiya ganan fã de, Jesus Pailat bun dirou dilen. <sup>2</sup> Age de fen, idi mogo gariya di-no, ï bouwa bun od du ken, diron, "Amã, tamo enei nemã tamo kayau ganan idegêya bunem sanen guri feid irou ile mog, mailen. Ï Sisa takis ifenêya nigin katû fiyêïd fen, ï yogo nigin aya Kristus, aya king yen."

<sup>3</sup> Anï nigin, Pailat Jesus to fiyen, "Ô Juda neid king de?" Jesus solof iron, "Are de yer, ô urok anï."

<sup>4</sup> Age ye di, Pailat ï, pris odudug, tamo kayau geid irokenêdin, "Aya tamo enei bou bun mosor taka to ail-el."

<sup>5</sup> Anï ere, idi total dinon, "Ï Judia distrik ganan bun, in ifelnêya bunem tamo kayau waud yalen. Ï Galili an gariya ino fen, tokô fel eineg isin." <sup>6</sup> Pailat anï karï ye fen, ï Galili tamal be anï to fen. <sup>7</sup> Pailat ï, Jesus Herod nê tano bun tamal yeya kelei ken, Herod gein sur fen, Herod ïg sain anï bun Jerusalem ibodon.

<sup>8</sup> Herod Jesus ile fen, wau fatuk kulï yen, ere nigin, sain meluk bagai ï ileya nigin oron. Ï nigin karï yen nigin, Herod ï Jesus bun memelik tunï ilouf nigin age fen. <sup>9</sup> Herod Jesus musei bagai to fiyen, anï ere, Jesus taka to solof iron. <sup>10</sup> Pris odudug, lo ifelnêdiya tamo geid an difaren, ï bou bun od total bagai dinon. <sup>11</sup> Age dife di, Herod yogon kusï tamo geid, Jesus kasã difiye ken, kono difiyen. Age dife fen, kolos biya difounne ken, Pailat wagen sur difiyê di, kel ilen. <sup>12</sup> Naa anï bun, Herod Pailat ado nival dun, uruwa bun idi uruwom kiwain.

<sup>13</sup> Pailat ï, pris odudug, mudur adodo, tamo kayau geid iweignêïd fen, <sup>14</sup> irokenêdin, "Ã tamo enei, tamo kayau waud yale fen, sane nigin weleid inon ge fen, waleg, urou usigel. Aya ã meleï bun to afiyem, anï ere, ã ï bou bun od unogen anï, tamo enei bun gariya taka to ail-el. <sup>15</sup> Herod ïg age fiya, anï nigin, ï kel sur fe di, ada gein isil. Anï ulogouf, ï yukesiya nigin ereb sane taka to age fen. <sup>16</sup> Anï nigin, aya darau dogol afen ken, atornêf." †

<sup>18</sup> Anï ere, idi sigoreid takai fen, diweig diron, "Tamo enei ukesiyouf! Barabas walis kanamã!" <sup>19</sup> (Barabas ï anï taun oun kusï yales fen, tamo yukesin nigin, kalabus bun dinenen.)

<sup>20</sup> Pailat, Jesus yalishêya nigin baban total bagai irokenêdin. <sup>21</sup> Anï ere, idi baba baban diweig diron, "Aa tetek bun ïf! Aa tetek bun ïf!"

<sup>22</sup> Age de di, Pailat ï irô, towo fen sain bun anï irokenêdin, "Ere nigin? Tamo enei, ere mosor inon? Aya ï yukesiya nê gariya anï, ï bun taka to ail-el. Anï nigin, aya ï darau afen ken, atornêf."

<sup>23</sup> Anï ere, idi aiteid odudug fen, ï aa tetek bun yïf nigin, baba baban dirokenen. Age dife di, dogo neid aitedim, Pailat nê od lai difiyen. <sup>24</sup> Anï nigin, Pailat, nedi oroya dô fiya nigin kisi yale fen, irokenêdin. <sup>25</sup> Pailat ï, tamo kusï yales fen, tamo yukesi di, kalabus bun dinenen ï nigin tamo kayau to difiyen anï, yalishê ken, dogo neid oroya dô difoug nigin Jesus ifenêdin.

### Jesus Aa Tetek Bun Dun

(Matyu 27:32-44; Mak 15:21-32; Jon 19:17-27)

<sup>26</sup> Idi Jesus dirou dile fen, Simon Sairini tamal, ï yogon fonom isi mog, luwen ï dale, aa tetek orowa se dife di, faali fe, Jesus dô fen. <sup>27</sup> Tamo kayau musei, kayau idi ï nigin waud gudïf fen, inã dalen geid, dô difiyen.

<sup>28</sup> Anï ere, Jesus idi bun falei yel, idi irokenêdin, "Jerusalem nê barai tar, aya nigin inã to waleg, ã aug nigin ado gereï tar nigin inã waleg. <sup>29</sup> Ere nigin, sain fau isiy-

† *Itotoya tunï eig de ditoton: atornêf.* <sup>17</sup> \*Gama ï, kalabus bun tamal tamo taka, Sifa bun yalis kenêdiyouf bagai.

ouf bun, idi diröf, 'Kayau dali, kayau fau kesu gö fiya sã, kayau kesu su ifenëya sã anidi el fedif!' <sup>30</sup> Age de fen,

"idi arei dirokenëdiyof, "Teteman kukug!"  
arei mudu dirokenëdiyof, "Kerub wamäg!" †

<sup>31</sup> Tamo, aa mata mog, enei age difedif are, meti youf sain bun, ere wõ youf?"

<sup>32</sup> Lo wal fiya tamo uru idig, ï geid laa bun dinenëdiyof nigin dirou dilen. <sup>33</sup> Sain idi modoũ yana Mudur Tuwan dedig wõ de fen, an Jesus aa tetek bun dun, lo wal fiya tamo uru geid, taka biya melem, taka ki melem. <sup>34</sup> Age dife di, Jesus iron, "Dei, idi neid mosor nigin weder tu kel, ere nigin, idi keleĩ sa ken, enei age difef." Age fe di, idi aisaĩ kodẽ de fen, yogon kolos idi atun foifu difen.

<sup>35</sup> Tamo kayau difar fen, lo difeid mog, mudur adodomeg ï kasã difiyẽ diron, "Ï tunĩ isennẽdin, ï Kristus Negur igirnen ouf are, utornẽg len, yogo bouwa isennẽf."

<sup>36</sup> Kusĩ tamog dise fen, diselinen. Idi wain makik ado difen ken, <sup>37</sup> diron, "Õ Juda neid king ouf are, ogo boũ usennẽf."

<sup>38</sup> Ï muduren itotoya eig ya yenen: EÏ JUDA NEID KING.

<sup>39</sup> Lo wal fiya tamo aa tetek bun difaren anĩ takam, Jesus kono fiyẽ iron, "Õ Kristus ouf are, õ ogo usenne ken, amã usenamãf!"

<sup>40</sup> Anĩ ere, lo wal fiya tamo taka im, ne tã ou fiye ken, iron, "Õ kafĩ fiya tekelei walef, anĩ ere, õ Negur to kumĩ wiyek de? <sup>41</sup> Ada urom darau talef, are de, ere nigin, ada urom sane age tafen anĩ mala solo. Anĩ ere, tamo enei ereb sane to age fen."

<sup>42</sup> Age ye fen, ï Jesus irokenen, "Jesus, sain õ ogon tano bun usel fen, aya karĩ wiyalauf."

<sup>43</sup> Age ye di, Jesus tamo anĩ irokenen, "Aya õ momoi arokonok, gama õ aya ado paradis bun tabodõf."

### Jesus Laa Fen

(Matyu 27:45-56; Mak 15:33-41; Jon 19:28-30)

<sup>44</sup> Gaa atun tuwelf kilok age fiya bun, teneub ganan bun gugum kelef ile, tri kilok aragaun, <sup>45</sup> ere nigin, gaa mala ifokelen. Age fe di, tempel nẽ gabar anĩ atusil se-rek fe, uru wõ yen. <sup>46</sup> Jesus aĩ odug nem iweig iron, "Dei, neu uur õ imã bun anof." Agef iro ken, ï oboi irour yalen.

<sup>47</sup> Kusĩ tamo neid orowa, Jesus age fiya ile fen, Negur yana yales iron, "Momoi, tamo eĩ madur tamo." <sup>48</sup> Tamo kayau ganan idi lo fiya nigin guru difen, ereb anĩ wõ ye di, meledim dilen, are idi waud gudũf fen, akoreid du ken, firagagaũ difen. <sup>49</sup> Anĩ ere, idi Jesus keleĩ anidi ganan, idi atun kayau Galilim ï dõ de disin anidig, so del difar fen, eneidi wõ ye di, lo difen.

### Jesus Mũ Difen

(Matyu 27:57-61; Mak 15:42-47; Jon 19:38-42)

<sup>50</sup> Tamo taka yana Josef, ï kaunsel taka, madur tamo biya bagai, <sup>51</sup> anĩ nigin, ï idi neid tobonuneid ado od difon anĩ nigin to yo yen. Ï Judia distrik bun Arimatea

† Hosia 10:8

taun tamal, ï Negur nẽ tano isiyof anĩ tari fen. <sup>52</sup> Josef ï, Pailat gein ile, Jesus bou buru yalouf nigin to fiyen.

<sup>53</sup> Agef fen, ï Jesus bou buru yale, irou isil, gabar lalau nem silef fen, matmat sa bun ku dalen an inenen, ku anĩ bun an taka to dinenen. <sup>54</sup> Naa anĩ dodok fiya naa, Sabat naa mogo gariya inou fenẽ melsã.

<sup>55</sup> Kayau Jesus geid Galilim disin, Josef dõ de, matmat ado, Jesus bouwa buru naig de dinof anĩ, lo difen.

<sup>56</sup> Age difel fen, idi fonõ dile, bou wã fiya nẽ marasin ado moul sumeĩ biya bagai dodok difen. Anĩ ere, idi Sabat naa nigin ïtãfiya dõ de fen, si dinon.

### Jesus Mata Kel Fã Yen

(Matyu 28:1-10; Mak 16:1-8; Jon 20:1-10)

**24** Uub nẽ naa matu bun †† bonimeĩ bagai mumurei ado, kayau idi, bou wã fiya nẽ marasin dodok difen anĩ dale fen, matmat bun dilen. <sup>2</sup> Age dife fen, idi matmat bun meein wele feleya dilen. <sup>3</sup> Anĩ ere, sain idi meku namen dilen, idi Odug Jesus nẽ bouwa buru an to dilen. <sup>4</sup> Idi enei nigin kisi musei dale mog bagai, tamo uru kolos medeĩya barikã siridin difaren. <sup>5</sup> Age dife di, kayau kumĩ de fen, kususu de, teneub lo difen, anĩ ere, tamo idi kayau dirokenẽdin, "Ã ere nigin laa atun mata tamo umirnẽgef? <sup>6</sup> Ï ein sã, ï mogo fã yel! Ï Galili oun ã geid ubodõg fen, irokenein anĩ, wedereĩ fokõ youf, <sup>7</sup> ï iron, 'Tamo Naal mosor adodo imeid bun dino di, ï aa tetek bun dukesiyof, age dife di, naa towo bun, ï baban mata kel fã youf.'" <sup>8</sup> Age de di, kayau idi, in od anĩ wedereid fokõ yen.

<sup>9</sup> Sain idi matmat bunem ke de, disi fen, aposel ilewen tunĩ ganan geid, enei ganan wogõ difiyẽdin.

<sup>10</sup> Kayau idi are Maria Magdala tamal, Joana, Maria Jems nẽ sina. Kayau anidi, kayau tunĩg geid, enei aposel wogõ difiyẽdin. <sup>11</sup> Anĩ ere, idi kayau nigin to momoi den, ere nigin, kayau neid od, idi bun auya gen. <sup>12</sup> Anĩ ere, Pita fã yale, matmat bun gudu re ilen. Ï ku bun itin, gabar lalau dogol yen mog, ilen, agef fen, ereb anĩ wõ yen anĩ nigin, ï kisi musei yalef ile, yogon fõ bun ilen.

### Emaus Naab Luwen

(Mak 16:12, 13)

<sup>13</sup> Naa de anĩ bun, idi neid tamo uru, fonõ taka yana Emaus dilen, Jerusalem anenem Emaus are ilewen kilomita age fiya. <sup>14</sup> Idi urom, ereb ereb ganan wõ yen anĩ abob dirokenek dilen. <sup>15</sup> Idi eneidi nigin diro ken, katõ de dile mog, Jesus yogo isi, weim diyok dilen.

<sup>16</sup> Anĩ ere, idi Jesus keleĩya nigin meleid ifofakelen.

<sup>17</sup> Age dife di, Jesus idi to fedin, "Ã ere nigin naab luwen katõ ge usigef?" Idi dẽ del fen, idi neweid wau gudũ fiya ado agogon delen. <sup>18</sup> Idi taka yana Kleopas Jesus solof irokenen, "Õ ege Jerusalem nẽ ki tamo nigin, naa eneidi bun an ereb ereb wõ yen anĩ, õ keleĩ sã de?"

<sup>19</sup> Age ye di, Jesus idi irokenẽdin, "Ere bagai?" Idi Jesus dirokenen, "Jesus Nasaret tamal nigin. Ï profet taka, Negur ado tamo kayau ganan meleid bun, od

†† Are Sande.

ado tobonunã bun megeir barikã. <sup>20</sup> Pris odudug, neda mudur ado idim, ï laa bun dinenëf nigin imeid bun dino di, aa tetek bun dukesin. <sup>21</sup> Anï ere, amã waumã iron, im anï Israel tamo kayau kel gei foug maun. Anï dogol sã, enei ganan wõ yen are, gama naa eneim mogo naa towo ilef. <sup>22</sup> Takag, amã nemã kayau tunig, amã terë difamam. Gama bonimeï bagai, idi matmat bun dilel, <sup>23</sup> anï ere, idi yogon bouwa buru to dilel. Idi dile, meleid seleulã kurãf fen, engel diledin, engel idi dirokenëdil, Jesus ï mata ibodok, difiyëdi di, disi, amã dirokanamam. <sup>24</sup> Age de di, amã tuni matmat bun dile, kayau wogõ del gen bagai dilel, anï ere, idi Jesus to dilel."

<sup>25</sup> Jesus idi irokenëdin, "Ã neneya bagai, ã profet wogõ den anï ganan, wauï bun momoiya nigin folo reya bagai! <sup>26</sup> Kristus ï darau enei yale fen, yogon fula fiya medeïya namen to ilauf de?" <sup>27</sup> Age ye fen, ï Moses ado profet ganan neid itotoya bunem gariya ino fen, yogo nigin Negur nẽ Itotoya ganan bun ibodok anï, idi faded fedin.

<sup>28</sup> Idi fonõ dilef nẽ anï kelë difiye ken, Jesus tokõ feleya nigin suma ino genen. <sup>29</sup> Anï ere, idi total bagai dirokenen, "Amã geid tabodõf, ere nigin, gaa mogo kuru kelef, gugum irousif." Anï nigin, Jesus idi geid dibodõf nigin namen ilen.

<sup>30</sup> Sain ï idi geid tebol bun dibod ken, ï bret yale, Negur de fiyë, mumãf fen, gariya ino ifenëdin. <sup>31</sup> Age fe di, idi meleid fara fele di, idi Jesus nigin kelein. Age dife di, ï idi meleid bun iminkelen. <sup>32</sup> Idi abob dirokenen, "Sain ï naab luwen wogõ fada fen, Negur nẽ Itotoya faraf ifelnadal mog, ada namedan wauda to tõf yalel de?"

<sup>33</sup> Age de fen, idi fã de dale, kaisã bagai Jerusalem keku de dilen, an idi aposel ilewen, tamo tuni idi geid, guru de difar mog, fotou difedi di, <sup>34</sup> diron, "Are momoi! Odug fã ye fen, Simon bun wõ yen." <sup>35</sup> Age de di, tamo uru ereb naab luwen wõ yen ado, Jesus ï bret mumã fe di, idi Jesus nigin naig de kelein anï wogõ den.

### Jesus In Dõ Fiya Tar Bun Wõ Yen

(Matyu 28:16-20; Mak 16:14-18; Jon 20:19-23; Aposel 1:6-8)

<sup>36</sup> Idi fau enei nigin wogõ de mog, Jesus yogo idi atun ifar fen, irokenëdin, "Wau inosiya ã ado ibodõf."

<sup>37</sup> Idi baraũ mailef de fen, terë de fen, kumi den.

<sup>38</sup> Age dife di, Jesus idi irokenëdin, "Ere nigin ã wauï morõ fef, ere nigin ã wauï bun kisi uru wõ yef?" <sup>39</sup> Aya imau yeu ado feleg. Eï aya yug bagai! Kobũ wiyag fen, uleg. Baraũ ï aya bouwau ado, tuwau ado uleyagef gen sã, ï bou sã, tuwa sã."

<sup>40</sup> Jesus enei iro ken, ï ima ye ado ifelnëdin. <sup>41</sup> Age fe di, idi waud kulïya ado terëya bunem, fau waud to momoi de di, Jesus idi to fiyëdin, "Ã ereb yõya nẽ taka ein tau ado?" <sup>42</sup> Idi gau yã tamal masak taka difenen,

<sup>43</sup> age dife di, Jesus gau yale, meledin yon.

<sup>44</sup> Jesus idi irokenëdin, "Enei are, aya fau ã geid tabodon sain bun arokenein. Ereb ereb ganan, aya nigin Moses nẽ Lo bun, profet neid itotoya bun ado, Buk Sam bun ditoton anï ganan kisi falauf bagai."

<sup>45</sup> Agef fen, Jesus idi Negur nẽ Itotoya keleï youf nigin, waud kã fenëdin. <sup>46</sup> ï idi irokenëdin, "Negur nẽ Itotoya bun eig ye irok: Kristus ï fau darau yale fen, laa bun tamal naa towo bun mata kel fã youf, <sup>47</sup> age fe di, wau faleiya ado, mosor nigin weder tu keleya nẽ od anï, fau ï yana bunem teneub ganan bun, Jerusalem anenem gariya dino fen, wogõ de dilauf. <sup>48</sup> ã enei ulegen nigin kurõ walaisi gouf. <sup>49</sup> Aya esel fen, neu Dei sur afouf yen anï, ã bun sur afouf, anï ere, taun anï bun ubodõgef uleg, ã megeir saa ilun tamal anim ifounneif."

### Jesus Saa Ilun Iselen

(Mak 16:19, 20; Aposel 1:9-11)

<sup>50</sup> Sain Jesus idi gurif irou, Betani non dilen, an ï ima yales fen, el fiya ifenëdin. <sup>51</sup> ï idi el feid le fen, ï itornëdi di, saa ilun irou iselen. <sup>52</sup> Age fe di, idi ï yana dales fen, waud kulïya odug ado, Jerusalem ke de dilen. <sup>53</sup> Age de fen, idi tempel bun toku dibod ken, Negur yana dale-sedig.

# Jon

## Od Anĩ Tamo Wõ Yen

**1** Gariya bun Od anĩ ibodon, Od anĩ Negur ado dibodon, Od anĩ Negur. <sup>2</sup> Gariya bun ĩ Negur ado dibodon.

<sup>3</sup> ĩ bunem ereb ereb ganan inon, Od anĩ sã bun ereb inodin taka to ibodok. <sup>4</sup> Mata ĩ bun ibodon, mata anĩ tamo neid fula fiya. <sup>5</sup> Fula fiya anĩ gugum bun lalan ifenek, anĩ ere, gugum ĩ fula fiya anĩ to kelein.

<sup>6</sup> Tamo taka Negurem sur fe di, isin, ĩ yana Jon. <sup>7</sup> ĩ fula fiya anĩ yaor fe, kurõ fesiyouf nigin isin, are tamo kayau ganan ĩ bunem momoi douf nigin age fen. <sup>8</sup> ĩ anĩ fula fiya sã, ĩ fula fiya anĩ kurõ fesiyouf nigin isin. <sup>9</sup> Fula fiya bagai yogo tamo kayau ganan lalan ifenēdif, ĩ tenebur isin.

<sup>10</sup> ĩ teneub bun ibodon, are ĩ bunem teneub inon, anĩ ere, tamo kayau tenebur ein, ĩ to kelein. <sup>11</sup> ĩ yogon bagai anidi bun isin, anĩ ere, yogon bagai anidi ĩ to daleyen. <sup>12</sup> Anĩ ere, idi ĩ daleyen, ĩ yana nigin momoi den anidi bun, Negur idi Negur nē gere tar wowã douf nigin igirnēdin. <sup>13</sup> Sina tama nē naud bunem to Negur gere tar wowã den, bouwa nē oroya bunem sã, tamo nē wau irõya buneg sã, anĩ ere, Negur yogo age fe di, wowã den.

<sup>14</sup> Od anĩ tamo wõ ye fen, ada atun ibodon. Ada yogon fula fiya medeĳya tailen, fula fiya medeĳya are Naal Tekelei Yogo Dogol nē, ĩ Tama bun tamal wau ifenēya ado momoi barikã isin.

<sup>15</sup> Jon ĩ nigin kurõ falaisi wogõ yen. ĩ iweig fen, iron, “ĩ enei nigin aya arokenein, ‘Taka ĩ aya dumeun isif, ĩ aya wal fiyaya, ere nigin, ĩ ket ibodon.’” <sup>16</sup> In wau ifenēya barikã bunem, ada adok el fiya tale fen, anĩ teten el fiya musei talen. <sup>17</sup> Are Moses bunem lo anĩ talen, anĩ ere, wau ifenēya ado momoi anĩ, Jesus Kristus bunem isin. <sup>18</sup> Taka nem Negur to bagai ilen, anĩ ere, Negur Naal Tekelei Yogo Dogol, ĩ Tama wagen ibod ken, ĩ nigin yaor fen.

## Jon Naan Igunēdiya Tamo ĩ Yogo Nigin, Aya Kristus Sã, Yen

(Matyu 3:1-12; Mak 1:1-8; Luk 3:1-18)

<sup>19</sup> Juda tamo Jerusalem temeleid idim, pris tunĩ, Lewi nē ibor geid sur difedi di, Jon ĩ aim yeya anĩ to difiyē di, Jon ĩ eig ye kurõ fesin. <sup>20</sup> ĩ wa fiya sã, kurõ falaisi, “Aya Kristus sã,” yen.

<sup>21</sup> Idi ĩ to difiyen, “Age fiyauf are, õ ai? Õ Eliya de?” ĩ iron, “Aya ĩ sã.”

Idi diron, “Õ Profet amã tari mafef anim de?”

ĩ iron, “Sã.”

<sup>22</sup> Age ye di, idi diron, “Õ ai bagai? Õ amã urokanamã len, idi amã sur difaman anidi gein ke ma malauf. Õ ogo nigin ere wof?”

<sup>23</sup> Jon profet Asaia nē od bun solof iron, “Aya anĩ, ait taka gerere tuan iweig irok, ‘Odug nē naab madur gouf.’” †

<sup>24</sup> Farisia tamo tunĩ sur difedin anidim <sup>25</sup> to difiyen, “Õ Kristus sãf, Eliya sãf, Profet anĩ sãf are, ere nigin naan ugunēdif?”

<sup>26</sup> Jon aitedin yale iron, “Aya naan nem naan agunēdif, anĩ ere, ã atun, taka ã keleĩ sã anĩ ifaref. <sup>27</sup> ĩ anĩ aya dumeun dõ fiyaf, aya to biya nigin, in ye su nē malũ biru fediya kisi feleya sã.”

<sup>28</sup> Enei ganan Betani oun Jordan naan sitakã, Jon naan igunēdin nē an wõ yen.

## Jesus, Negur Nē Sipsip Naal

<sup>29</sup> Naa taka di, Jon, Jesus wagen iyok isi mog, ile fen, iron, “Ulegef, Negur nē Sipsip Naal, ĩ tamo ganan neid mosor yaleledif! <sup>30</sup> Enei nigin au fen, oron, ‘Taka ĩ aya dumeun isif, ĩ aya wal fiyaya, ere nigin, ĩ ket ibodon.’”

<sup>31</sup> Aya yug ĩ keleĩ san, anĩ ere, aya asi, naan nem naan agunēdif nē gariya are, Israel tamo kayau bun ĩ yaor fouf nigin.”

<sup>32</sup> Age ye fen, Jon enei kurõ feis iron, “Aya, Awa Uur saa ilun tamal kuburir gen isi, ĩ bun ibod mog, ailen.

<sup>33</sup> Aya ĩ to kelein, anĩ ere, taka ĩ, aya naan nem naan agunēdiyof nigin sur fiyan im irokanan, ‘Tamo anĩ, Awa Uur isi, ĩ bun ibod mog, ulouf, im Awa Uur Fateul nem naan igunēdiyof.’” <sup>34</sup> Aya ailen nigin kurõ afeis, ‘Eĩ Negur Naal,’ auf.”

## Jesus In Dõ Fiya Tar Uyulil Iweignēdin

<sup>35</sup> Naa taka di, Jon, in dõ fiya tar uru geid, baban an difaren. <sup>36</sup> ĩ, Jesus isi ile di, ile fen, ĩ iron, “Ulegef, Negur nē Sipsip Naal!”

<sup>37</sup> Sain Jon nē dõ fiya tar uru enei karĩ de fen, idi Jesus dõ difiyen. <sup>38</sup> Jesus falei yel, idi ĩ dõ difiyē mog, ile fen, to fedin, “Ã ere oroyeik?”

Idi diron, “Rabi (anĩ nē gariya, Tise), õ nain ubodõdig?”

<sup>39</sup> ĩ iron, “Umag fen, ulougouf.”

Age ye di, idi dile, ĩ ibodõdig anĩ dile fen, naa anĩ bun, ĩ geid dibodon. Are aragau fo kilok age fiya.

<sup>40</sup> Endru, Simon Pita ne tura ĩ, idi uruwom ereb Jon wogõ yen anĩ karĩ de fen, Jesus dõ difiyen anĩ taka.

† Asaia 40:3

<sup>41</sup> Ereb uruwa Endru age fen are, ã tura Simon imir ile fen, irokenen, "Amã Mesia (anã Kristus) fotou mafen."

<sup>42</sup> Age ye fen, Endru, Pita Jesus wagen irou ile di, Jesus Pita lo fiye ken, iron, "Õ Simon, Jon naal. Õ yanã Sifas douf" (Sifas falei fiyauf are, Pita).

### Jesus Filip Nataniel Ado Iweignëdin

<sup>43</sup> Naa taka di, Jesus Galili ileya nigin kisif fen, Jesus Filip fotou fiye ken, irokenen, "Aya dõ wiya."

<sup>44</sup> Filip ã, Endru Pita ado geid, Betsaida taun temeleid.

<sup>45</sup> Filip Nataniel fotou fiye ken, ã irokenen, "Amã ã nigin Moses nã Lo bun itoton ado profet idig ditoton, Jesus Nasaret tamal, Josef naal anã, fotou mafen."

<sup>46</sup> Nataniel to fen, "Nasaret! Ereb biya taka, anenem wõya nigin kisi feleya de?"

Filip iron, "Usi ule."

<sup>47</sup> Sain Jesus Nataniel non iyok isi mog, ile fen, ã nigin iron, "Ei Israel tamo bagai, ã bun erab idegëya taka sã."

<sup>48</sup> Nataniel Jesus to fiyen, "Naig wo fen, õ aya keleï?" Jesus aiten yale iron, "Aya õ Filip iweignõya sã mog, aa fig farumen ubod mog, ailiyon."

<sup>49</sup> Age ye di, Nataniel Jesus irokenen, "Rabi, õ Negur Naal, õ Israel neid King."

<sup>50</sup> Jesus iron, "Aya õ aa fig farumen ailiyon aul nigin, õ momoi wof. Õ anã wal fiya erab erab odug ulouf." <sup>51</sup> ã tobol fe iron, "Aya ã momoi bagai arokeneik, ã, saa bobog kã fele di, Negur nã engel Tamo Naal bun diselef disif dife mog, ulougouf."

### Jesus Irõ Di, Naan Wain Falei Felen

**2** Naa uru bure fele di, naa towo bun, tamo kayau ado bagu fiya, Galili distrik oun Kana fonõ wõ yen. Jesus sinag an ibodon. <sup>2</sup> Jesus in dõ fiya tar geid idig, tamo kayau ado bagu fiya bun diweignëdin. <sup>3</sup> Sain wain sa kele di, sinam Jesus irokenen, "Idi wain taka sã."

<sup>4</sup> Jesus iron, "Kayau, õ ere nigin aya kababal wiyaf? Neu sain fau isiya sã."

<sup>5</sup> Jesus sina, kabã tamo irokenëdin, "Ereb ã irokeneif anã dõg, ago gouf."

<sup>6</sup> Nodin meein gulub sigis naan ifotüya nã difaren, are Juda neid tobononeid bun imeid kulo fiya nigin, idi teke tekelei 100 lita age fiya naan iroudig.

<sup>7</sup> Jesus kabã tamo irokenëdin, "Gulub bun naan utinëdig." Age ye di, idi ditineifd eweid gere fesedin.

<sup>8</sup> Age difele di, Jesus idi irokenëdin, "Gama tuni lolob ge fen, sifa marau uroule kenëg."

Age ye di, idi age difen. <sup>9</sup> Sifa marau naan wain falei fen anã yõ ilen. ã wain anã nainenem be isin anã to kelein, anã ere, kabã tamo naan lolob difen idi kelein. Agef fen, sifa marau ã, kayau marau yerin iweignë, ile di, <sup>10</sup> irokenen, "Ganan idi wain biya anã ket dirousi di, tamo disif idi anã fatuk dõ mog, to biya gen anã dum dirousidig, anã ere, õ biya bagai urou ubodom anã, gama bagai urousif."

<sup>11</sup> Jesus memelik gariya inon are enei bun, oun Galili distrik Kana fonõ. Anã bun, ã yogon fula fiya medeïya

yaor fe di, yogon dõ fiya tar dogo neid momoia ã bun dinon.

### Jesus Tempel Waif Fen

(Matyu 21:12, 13; Mak 11:15-17; Luk 19:45, 46)

<sup>12</sup> Enei bure fele di, Jesus ã, sina, tura tar ado, yogon dõ diya tar geid, Kapenaum disilen. An naa musei to dibodon.

<sup>13</sup> Juda neid Pasa naa sain melsã mog, Jesus Jerusalem iselen. <sup>14</sup> Tempel modoü bun, tamo, bulmakau, sipsip ado, kuburir na sur difeid fen, tunig tebol bun dibod ken, moni solo de mog, ileidin. <sup>15</sup> Anã ile fen, ã malü nem wip inon, agef fen, tempel modoü bun tamal, sipsip ado bulmakau ganan irudi di, serë dilelen, ã moni solo fiya tamo neid koin moni dauf firagagaü fe fen, ã dogo neid tebol yale, falei feledin. <sup>16</sup> Idi kuburir na sur difen anã irokenëdin, "Eneidi ein waleledig, neu Dei nã fõ anã maket modoü to unog!"

<sup>17</sup> Dum in dõ fiya tar, eig ye itotoya anã nigin wedereid fokõ yen, "Ogon fõ nigin wau itenëya anim nameun isainaf." †

<sup>18</sup> Age ye di, Juda tamo Jesus dirokenen, "Ere memelik anã ufelnamã di, enei ganan agof anã nigin õ girüya ado mauf?"

<sup>19</sup> Jesus idi irokenëdin, "Tempel enei narã weleg len, naa towo bun baban alesauf."

<sup>20</sup> Juda tamo diron, "Tempel enei dinon are, foti-sigis yar yalen, anã õ naa towo bun walesauf de?" <sup>21</sup> Anã ere, tempel ã wogõ yen are, yogo bouwa nigin. <sup>22</sup> ã laa bunem kel fã yen anã bure fele di, in dõ fiya tar, ã iron anã, wedereid fokõ yen. Anã bunem, idi Negur nã Itotoya ado Jesus wogõ yen anã nigin momoi den.

<sup>23</sup> Gama ã Jerusalem oun sain Pasa Sifa bun ibod ken, tamo kayau musei memelik inodin anã dilen, anã bun ã yana nigin momoi den. <sup>24</sup> Anã ere, Jesus ã yogo bagai, idi nigin to momoi yen, ere nigin, ã tamo ganan nigin keleï. <sup>25</sup> Jesus ã, tamo takam taka nigin ã irokenëya anã kisi feleya san, ere nigin, erab tamo name bun ibodok, ã yogo keleï.

### Jesus Nikodemus Ifelnen

**3** Farisia tamo taka, yana Nikodemus ibodon, ã Juda uyu irouya neid kaunsel taka. <sup>2</sup> ã bõ Jesus wagen isi fen, iron, "Rabi, amã keleï, õ tise Negur bunem usin. Ere nigin, taka nem Negur ã ado to ibodõf are, memelik õ unodif anã inodiya kisi feleya sã."

<sup>3</sup> Jesus aiten yale iron, "Aya õ momoi bagai arokonok, taka nem Negur nã tano to ilouf, ã baban mata gõ fiyëf dogol."

<sup>4</sup> Nikodemus Jesus to fiyen, "Tamo ã biyan anã, sina naig fe baban gõ fouf? Momoi bagai, ã sina namen baban ile di, gõ fiyëya kisi feleya sã!"

<sup>5</sup> Jesus solof iron, "Aya õ momoi bagai arokonok, taka ã, naan ado Awa Uurem mata to wõ youf are, ã Negur nã tano bun ileya kisi feleya sã. <sup>6</sup> Bouwam gõ fef are, bouwa nã, anã ere, Awa Uurem gõ fef are, uur nã. <sup>7</sup> Õ

† Sam 69:9

neu od eig au wogō auf bun, kisi to gurū wouf, 'Å de baban mata wō gouf.'<sup>8</sup> Yau in oroya bun isi iledig. Ō ait dogol karī wodig, anī ere, ō nainenem isif be, nain be ilef, to keleī youf. Ganan idi Awa Uurem gogū fedif are, age fiya bagai."

<sup>9</sup> Nikodemus Jesus to fiyen, "Are naig fe, agef wō youf?"

<sup>10</sup> Jesus iron, "Ō Israel neid tise, anī ere, ō enei to ke-leik de? <sup>11</sup> Aya ō momoi bagai arokonok, ereb amā ke-leī anī wogō mauf, age ma fen, ereb amā mailen anī kurō mafesif, anī ere, tamo kayau ā fau amā nemā od to walegef. <sup>12</sup> Aya ā ereb tenebur tamal nē anī wogō ayeik, anī ere, ā to momoi gef, saa ilun tamal nē anī wogō ayeīfeg, naig ge momoi gouf? <sup>13</sup> Aibem taka saa ilun to iselen, Tamo Naal saa ilunem isin yogo dogol. <sup>14</sup> Moses gerere tuan gogour yalesen, age fiya bagai, Tamo Naaleg age de dalesnēf. <sup>15</sup> Are ganan idi ī nigin momoi def, mata faimud ibodkeleya adouf nigin.

<sup>16</sup> "Negur, tamo kayau teneub enei bun ganan nigin fatuk wau laa fen nigin, yogon Naal tekelei bagai anī ifenēdin, are taka ī, ī nigin momoi youf are, to fō ya-lauf, mata faimud ibodkeleya adouf nigin age fen.

<sup>17</sup> Negur ī, yogon Naal teneub enei bun, tamo kayau es fediya nigin to sur fen, ī bunem tamo kayau teneub enei bun, kel gei fouf nigin sur fen. <sup>18</sup> Taka, ī nigin momoi yef are, to es fiyek, anī ere, taka, ī nigin momoiya sā are, ī mogo es fiya bun ifaref, ere nigin, ī Negur Naal tekelei bagai yana nigin to momoi yen. <sup>19</sup> Foi fiya eig fiya, fula fiya teneub enei bun mogo isin, anī ere, tamo idi dogo neid tobonuneid sane nigin, fula fiya di-tor ken, gugum nigin waud laa fen. <sup>20</sup> Tamo idi sane age difef are, lalan to orodidig, ere nigin, dogo neid to-bonuneid sane anī yaoreya kumī de fen, lalan namen to disiyouf. <sup>21</sup> Anī ere, aib taka ī momoi bun age fef, lalan namen isidig, age fe di, ereb ī age fen are, Negur bunem age fen anī, yaor dilouf."

### Jon Naan Igunēdiya Tamo, Jesus Nigin Kurō Fesin

<sup>22</sup> Anī bure fele di, Jesus in dō fiya tar geid, Judia teneub bun dilen, an ī idi geid sain naal dibod ken, naan igunēdin. <sup>23</sup> Joneg Aion Salim non naan igunēdin, ere nigin, an naan musei bagai, anī nigin, tamo kayau naan igunēdiyof nigin toku disidig. <sup>24</sup> (Are Jon fau kalabus bun to dinenē mog.) <sup>25</sup> Jon nē dō fiya tar tunī, Juda tamo taka geid, dogo neid tobonuneid dō de fen, imeid kulo difedig anī nigin luwa diroun. <sup>26</sup> Idi Jon wagen disi dirokenen, "Rabi, tamo ō uruwom Jordan naan sitakā ufareg fen, ī nigin kurō weis uron, ī naan igunē-dif, age fe di, ganan ī bun dilef."

<sup>27</sup> Jon solof iron, "Tamo ī, ereb saa ilun tamal ifenek anī dogol yalouf. <sup>28</sup> Å aug aya oron anī sā kurō walaisi gef, 'Aya Kristus sā, anī ere, aya ī ket sur fiyan.' <sup>29</sup> Moīs kayau are, moīs tamo nē. Moīs nē mou ī, bagu fiya bun ifar fen, karī fiyek, ī moīs tamo nē ait anī karī ye fen, kulīya odug ado. Kulīya are neu, anī gama kisi felef. <sup>30</sup> Ī yana odug ise le di, aya yanau tenebur isilauf.

<sup>31</sup> "Taka ī ilunem isif, ī ganan wal fiya, taka ī tenebur tamal are, tenebur nē, anī nigin, tenebur nē anī wogō

yedig. Taka ī saa ilunem isif, ī ganan wal fiya. <sup>32</sup> Ereb ī ilen ado karī yen anī, kurō falaisif, anī ere, yogon od taka nem to yalef. <sup>33</sup> Taka ī yogon od yalen anim, Negur ī momoi bagai ye fen, anī megeir ifenen. <sup>34</sup> Taka ī Negur rem sur fiyen are, ī Negur nē od wogō yef, ere nigin, Negur ī Awa Uur idikeleya sā ifenek. <sup>35</sup> Tama ī Naal nigin wau laaf fen, ereb ereb ganan ī ima bun inon.

<sup>36</sup> Aib ī Naal nigin momoi yef are, mata gai ibodkeleya ado, taka ī Naal nigin itorok are, ī mata to ilouf, Negur nē didi ī bun ibodok."

### Jesus Samaria Kayau Ado Wogō Den

**4** Jesus Jon wal fiye ken, in dō fiya tar musei geif naan igunēdif ya anī, Farisia tamo karī den. <sup>2</sup> Anī ere, momoi bagai Jesusem naan igunēdiya sā, are in dō fiya tar anidim. <sup>3</sup> Sain Odug enei kelei ken, ī Judia distrik itor ken, baban Galili kel ilen.

<sup>4</sup> Gama ī Samaria atu ilauf. <sup>5</sup> Anī nigin, ī Sikar taun oun Samaria, Jakop, ne naal Josef teneub kulu ifenen non, iyok isin. <sup>6</sup> An Jakop nē naan ifotokon tutuwō ibodon, Jesus naab meluk iyok isi, tuwa yu kele di, naan ifotokon tutuwō sirin ibodon. Are mogo gaa atun age fiya.

<sup>7</sup> Agef mog, Samaria kayau taka naan ifotūya nigin isi di, Jesus kayau irokenen, "Aya naan tau wana di, āf."

<sup>8</sup> (In dō fiya tar, taun saaf na yaleya nigin dilelen.)

<sup>9</sup> Samaria kayau Jesus irokenen, "Ō Juda tamo di, aya Samaria kayau. Naig fe di, ayam ō naan afon, wāf nigin to wiyaf?" (Juda tamo kayau idi, Samaria tamo kayau geid to uyu katō difedig.)

<sup>10</sup> Jesus kayau irokenen, "Ō safina ege luwa Negur ifonok ado, aibem naan nigin to yok anī keleim are, ō ī to wiyē di, mata ifenēya nē naan anī ifonom."

<sup>11</sup> Kayau iron, "Odug, ō ifotūya nē safina sā, naan ī ilon bagai. Ō mata ifenēya nē naan are nain walouf?"

<sup>12</sup> Tamamā Jakop naan ifotok kanama ken, ī yogog gere tar ado gaareg anī bun don, ō ī wal fiya de?"

<sup>13</sup> Jesus kayau aiten yale iron, "Ganan naan enei doko, idi baban naan ail fediyouf. <sup>14</sup> Anī ere, taka ī aya naan anī afenē di, yoko, ī baban to bagai naan ail fouf. Naan aya ī afenek, warur naan ī namen faimud ulo ulō yef yenē di, anim mata gai ibodkalauf."

<sup>15</sup> Kayau Jesus irokenen, "Odug, naan enei wanauf, ago di, aya baban naan ail to fiya fen, naan enei bun ifotūya nigin toku ein to kelauf."

<sup>16</sup> Ī kayau irokenen, "Ule, ogon tamo uroken ken, kel usig."

<sup>17</sup> Kayau iron, "Aya tamo sā."

Jesus kayau irokenen, "Ō tamo sā wof are, ō tutuk urok. <sup>18</sup> Ere nigin, ō mogo tamo faif adon, tamo gama ō ado are, ogon aiwā sā. Ō ogo urom, are momoi bagai."

<sup>19</sup> Kayau iron, "Odug, aya ō ailiyok, ō profet taka.

<sup>20</sup> Amā tamamā tar, arei enei bun Negur yana dalese-dig, anī ere, Juda ā urōgedig, Negur yana yaleseyo mo-dō are oun Jerusalem dogol."

<sup>21</sup> Jesus kayau irokenen, "Kayau, aya momoi wiya, sain fau isi di, baban arei enei bun ado, Jerusalemeg

an, Dei yana to walesagauf. <sup>22</sup> Samaria ã, ereb ã keleĩ sã anĩ yana walesegedig, amã ereb amã keleĩ anĩ yana malesedig, ere nigin, tamo kayau kel yaleya nẽ are, Juda ibor bun tamal. <sup>23</sup> Sain isiyouf are, gama mogo yeir isil, Negur momoi bagai yana dalesedig are, uur ado momoi bunem Dei yana dalesauf, ere nigin, idi age fe-diya anĩ Dei ĩ imirnẽdif. <sup>24</sup> Negur ĩ uur, anĩ nigin, ĩ yana dalesedig idi, uur ado momoi bunem, yana dalesauf."

<sup>25</sup> Kayau iron, "Aya keleĩ, Mesia (Kristus dedig) fau isif. ĩ isiyouf sain bun, ereb ereb ganan faded famãf."

<sup>26</sup> Age ye di, Jesus kayau irokenen, "Aya inim yeir od ayok."

### Jesus Nẽ Dõ Fiya Tar Keku De Disi, Jesus Geiden

<sup>27</sup> Agef mog bagai, in dõ fiya tar keku de disi, Jesus kayau anĩ ado od de mog, dileid fen, terẽ den. Anĩ ere, taka nem to, to fiyen, "Õ ere oroyok?" be "Õ ere nigin ĩ ado od gef?"

<sup>28</sup> Kayau, ne naan gulub itor yen, taun kel ile, tamo kayau irokenẽdin, <sup>29</sup> "Umag, tamo taka, aya ereb ereb ganan age afef asin irokanal anĩ uleg. ĩ anĩ Kristus be."

<sup>30</sup> Idi taun ditor disi, Jesus garan dilen.

<sup>31</sup> Age de mog, in dõ fiya tar Jesus total bagai dirokenen, "Rabi, ereb taka wõ."

<sup>32</sup> Anĩ ere, ĩ idi irokenẽdin, "Aya saaf ã keleĩ sã anĩ ãf nigin ado."

<sup>33</sup> Age ye di, in dõ fiya tar abob dirokenen, "Taka nem mogo saaf irousi ifenem de?"

<sup>34</sup> Jesus iron, "Neu saaf are, aya sur fiyan in oroya dõ afe fen, in kabĩ bure afalauf anĩ. <sup>35</sup> ã eig ge to urõgedig de, 'Ogõ fo bure fele di, kusu fiya sain wõ youf? Aya ã arokeneik, meleĩ fara weleg fen, kabĩ onoudi ulogouf! Idi mogo kusu fiya nẽ mayo bure felen. <sup>36</sup> Kusu fiya tamo ĩ gama mala solo yalef, ĩ gama mata faimud ibod-keleya nẽ biya kususuf, anĩ bun, itenẽya tamo ado kusu fiya tamo waud al foug. <sup>37</sup> Anĩ nigin, od enei momoi bagai, 'Tamo takam itenẽdig, tamo takam kusu fedig.' <sup>38</sup> Aya, ã kabĩ to walegen nẽ an, kusu fiya nigin sur ayein. Tunim kabĩ total dalen, anĩ ã idi neid maab mala anĩ kusu gen."

### Samaria Tamo Kayau Musei Momoi Den

<sup>39</sup> Samaria tamo kayau, taun anĩ bun temeleid musei, ĩ nigin momoi den, ere nigin, kayau anĩ eig ye kurõ fesin, "ĩ ereb ereb ganan age afef asin anĩ irokanal."

<sup>40</sup> Anĩ nigin, Samaria tamo kayau ĩ gein disi, ĩ idi geid dibodõf nigin total bagai dirokenẽ di, ĩ naa uru, idi geid dibodon. <sup>41</sup> In od bunem, musei fau fau momoi den.

<sup>42</sup> Idi kayau anĩ dirokenen, "Amã ogon od bun dogol to momoi mauf, ere nigin, amã mug karĩ mau fen, amã keleĩ, tamo enei momoi bagai teneub ganan enei nẽ Isennẽya."

### Jesus, King Nẽ Kabĩ Mudur Naal El Fiyen

<sup>43</sup> Naa uru bure fele di, Jesus Galili ilen. <sup>44</sup> Jesus ĩ yogo iron, 'Profet taka, yogon fõ gariyan, ĩ yana sã.' <sup>45</sup> Sain ĩ

Galili wõ yen, Galili tamo kayau ĩ daleyen. Idi Jerusalem Pasa Sifa bun, ĩ ereb ereb age fen ganan dilen, ere nigin, idig an weim difaren.

<sup>46</sup> ĩ baban Galili distrik oun Kana fonõ ki fen, kulu an ĩ naan wain falei felen. Sain anĩ bun, king nẽ kabĩ mudur taka nẽ naal Kapenaum taun an dagi yenen. <sup>47</sup> Tamo enei, Jesus Judia distrik tamal Galili isin anĩ karĩ ye fen, ĩ Jesus gein ile, ne naal laa melsã yenen anĩ, isi el fiyẽf nigin igonen.

<sup>48</sup> Jesus ĩ irokenen, "Ã memelik uris ado anĩ to ulogouf are, ã to bagai momoi gouf."

<sup>49</sup> King nẽ kabĩ mudur iron, "Odug, neu kesu fau laa fiya sã mog, õ usiyouf."

<sup>50</sup> Jesus ĩ irokenen, "Õ wadã ule. Õ naal fau mata ibodõf."

Tamo anĩ, Jesus nẽ od momoi ye fen, ilen. <sup>51</sup> ĩ fau naab iyok ile mog, yogon ferfer ĩ fotou difiye ken, yogon kesu mata ibodok anĩ wogõ difiyen. <sup>52</sup> Age de di, ĩ gaa mala ganĩ bun, ne naal dagi karikan anĩ to fiyẽdin. Idi ĩ dirokenen, "Bouwa uruwa, nor wan kilok aragau folõ fiye kelen."

<sup>53</sup> Age de di, tama ĩ kelein, sain anĩ bun bagai, Jesus irokenen, "Õ naal fau mata ibodõf." Anĩ nigin, ĩ yogo, ne fõ tura tar ganan geid, momoi den.

<sup>54</sup> Jesus Judia distrik bun tamalem Galili isi fen, memelik inon, are eneim anĩ uru.

### Jesus Dagi Tamo Betesta Naan Kolili Fiyen El Fiyen

**5** Dum, Jesus Juda neid sifa bun Jerusalem iselen. <sup>2</sup> Jerusalem an Sipsip Bobog non, naan kolili fiya taka Hibru od nem Betesta dedig ibodok, naan kolili fiya anĩ sirin meein torem fõ faif dinodin dibodok. <sup>3</sup> An dagi tamo kayau musei denenãdig, meleid ifofakeleya, yeid kirorõya, bouweid ilolaisidin. <sup>15</sup> Difaren nẽ an, tamo taka dagi ado ibodok ile, teti-eit yar yalen. <sup>6</sup> Sain Jesus ĩ an yen mog, ile fen, ĩ sain meluk dagi ado an yenen anĩ kelei ken, ĩ to fiyen, "Õ biya leya oroyok de?"

<sup>7</sup> Dagi tamo iron, "Odug, sain naan moyõ fe di, taka nem isenna di, naanũ isileya to ibodok. Aya asilauf au mog, taka ketem uyu wal fiya fen, isiledig."

<sup>8</sup> Age ye di, Jesus ĩ irokenen, "Fã wo! Ogon gogoũ wenẽdig anĩ wale fen, uyok ule." <sup>9</sup> Age ye di, tamo kaisã bagai dagi sa kele di, ĩ yogon gogoũ yale fen, iyok ilen.

Anĩ wõ yen naa are, Sabat naa. <sup>10</sup> Anĩ nigin, Juda tamo idi, tamo dagi sa kelen anĩ dirokenen, "Naa eĩ Sabat naa. <sup>11</sup> Õ ogon gogoũ iroya nigin lo katũ yef."

<sup>11</sup> Anĩ ere, ĩ aitedin yale iron, "Tamo ĩ el fiyal anim, 'Ogon gogoũ wenẽdig anĩ wale fen, uyok ule,' fiyal."

<sup>12</sup> Anĩ nigin, idi ĩ to difiyen, "Tamo enei nanim, 'Ogon gogoũ wale fen, uyok ule,' yom?"

<sup>13</sup> Tamo el fiyen, ĩ aib ya anĩ nene yelen, ere nigin, Jesus ĩ an guru difen anĩ namen iwaikelen.

† Itotoya tunĩ eig de ditoton: ilolaisidin. Idi naan moyõ foug nigin tari difedig. 4 \* Sain taka taka Odug nẽ engel taka isi, naan moyõ fedig. Taka ĩ moyõ mugu mugu ile fen, ĩ ket naanũ isilef, ĩ ereb dagi ado are el feledig. †† Sabat naa anĩ, Juda neid uub nẽ naa.



<sup>14</sup> Dum Jesus tamo anī tempel bun fotou fiye ken, irokenen, “Ulef, ò baban biya lel. Baban mosor to uno, are ereb sane bagai uruwa nē wal fiya anī, ò bun to wō youf nigin.” <sup>15</sup> Tamo are ile, Juda tamo irokenēdin, ‘Aya el fiyal tamo are Jesus,’ yen.

### Negur Naal Bunem Mata Ibodōya

<sup>16</sup> Jesus Sabat naa bun enei age fedig nigin, Juda tamo idi ī morō difenen. <sup>17</sup> Jesus idi irokenēdin, “Neu Dei ī faimud kabī yalef isi, gama naa enei buneg kabī yalef, anī nigin, ayag kabī alef.” <sup>18</sup> Jesus age yen nigin, Juda tamo idi ī dukesyoun nigin kabī total dalen, Sabat naa nē lo wal fiya bun nigin dogol sā, ī Negur nigineg neu Dei ye fen, aya Negur ado tekelei yen nigin.

<sup>19</sup> Anī nigin, Jesus od enei idi irokenēdin, “Aya ā momoi bagai arokeneik, Naal ī yogon oroyam ereb taka to age foun, ī Tama age fef anī dogol ile fen, īg age fedig, ere nigin, ereb Tama age fef are Naaleg age foun. <sup>20</sup> Tama ī Naal nigin wau laaf fen, ī ereb ereb age fedig anī ganan ifelnek. Ī ereb ereb enei wal fiya Naal ifelnēf, anī bun ā terē gouf. <sup>21</sup> Tama ī laa turī feid fen, mata ifenēdidig, age fiya bagai, Naal īg aib ī orof anī mata ifenēdidig. <sup>22</sup> Tama ī aib taka to es fiyēf, anī ere, ī es fiya kabī ganan Naal bun inon, <sup>23</sup> are tamo kayau ganan idi Temeid yana dalesedig gen, Naal nigineg yana dalesauf nigin ī age fen. Taka ī Naal yana to yalesef, ī Tamam Naal sur fiyen anī yana to yalesef.

<sup>24</sup> “Aya ā momoi bagai arokeneik, taka ī neu od karī ye fen, aya sur fiyan ī nigin momoi yef, ī mata faimud ibodkeleya ado fen, es fiya bun to ilauf. Ī laa bun tamal ibal fen, mata bun ilen. <sup>25</sup> Aya ā momoi bagai aroke-neik, sain fau isif, are mogo yeir isil, laa tamo Negur Naal nē ait karī douf, idi karī def anidi mata dibodōf. <sup>26</sup> Tama ī yogo bun mata ado, age fiya bagai, ī mata de anī Naaleg adouf nigin ifenen. <sup>27</sup> Agef fen, Tama ī Naal es fediyoun nigin megeir ifenen, ere nigin, ī Tamo Naal. <sup>28</sup> “Eig fiya bun to terē gouf, sain fau isif, ganan nedi matmat bun dibodok idi, yogon ait karī de fen, <sup>29</sup> ulolō desiyoun, idi biya age difen anidi mata dibodōf nigin fafā douf, idi sane age difen anidi es fedid, hel bun dilauf nigin fafā douf. <sup>30</sup> Aya neu oroyam, ereb taka to naig be afouf. Aya karī auf kilei bagai, aya es afef, neu es fiya are madur bagai, ere nigin, aya yug nigin au fen, to age afedig, anī ere, aya sur fiyan ī wau al foun nigin au fen, age afedig.

### Jesus Yogo Nigin Kurō Fesin

<sup>31</sup> “Aya yug nigin aya mugu wogō auf are, neu wogōya are, momoi be sā be anī yaor sā. <sup>32</sup> Taka ī aya nigin kurō fesidig, agef fen, aya keleī, ī aya nigin kurō fesif are momoi.

<sup>33</sup> “Ā Jon garan tamo tunī sur wedige di, ī aya nigin momoi od anī kurō falaisi irokenēdin. <sup>34</sup> Aya tamom aya nigin kurō fesif anī to aroudig, anī ere, aya ā isen-neif au fen, od anī wogō aun. <sup>35</sup> Jon ī lam futur fen, lalan ifenen, age fe di, ā sain tobega bagai waleg fen, in lalan nigin wauī al fen.

<sup>36</sup> “Neu kurō fesiya anī Jon nē wal fiya, ere nigin, kabī aya bure afalauf nigin Dei ifanan alef anim, Dei ī aya sur fiyan anī kurō fesif. <sup>37</sup> Dei ī sur fiyan ī yogo, aya nigin kurō fesin. Ā ī ait to karī gen, nog to ulegen, <sup>38</sup> in odeg ā bun to ibodok, ere nigin, ā sur fiyen anī ī nigin to momoi gedig. <sup>39</sup> Ā Negur nē Itotoya keleī youf nigin kabī total walegedig, ere nigin, ā kisi gef, anī bunem amā mata faimud ibodkeleya malef ge fen, ago gedig. Negur nē Itotoya enei, aya nigin kurō fesif. <sup>40</sup> Anī ere, ā mata yaleya nigin, aya wageun isiya utorōgedig.

<sup>41</sup> “Aya tamom yanau dalesauf nigin to orok, <sup>42</sup> anī ere, aya ā nigin keleī. Aya keleī, ā wauī bun Negur nigin wauī laa fiya to ibodok. <sup>43</sup> Aya neu Dei yana bunem asin, anī ā aya to waleyagen, anī ere, aibem taka yogo yana bunem isif are, ā walogouf. <sup>44</sup> Ā abob yana yaleseye anī oroyei ken, yana yaleseye Negur Tekelei bunem isif anī to total unog walogouf are, ā naig ge momoi gouf?

<sup>45</sup> “Anī ere, ā ayam Dei mala bun āgenei sane anī kurō afesyoun ge fen to kisig. Āgenei sane kurō fesiya are Moses, ī bun āgenei wauī iseya unogedig anī. <sup>46</sup> Ā Moses nigin momoi gem are, aya nigineg momoi gem, ere nigin, im aya nigin itoton. <sup>47</sup> Anī ere, ereb ī itoton anī to momoi gef nigin, naig ge fen, aya wogō auf enei nigineg momoi gouf?”

### Jesus Faif Tausen Tamo Saaf Ifenēdin

(Matyu 14:13-21; Mak 6:30-44; Luk 9:10-17)

**6** Enei dumen, Jesus Galili Maaī ub sitakā ibal ilen (Galili Maaī anī, yana taka Taiberias Maaī). <sup>2</sup> Age fe di, tamo kayau musei ī dō difiyen, ere nigin, ī dagi tamo kayau bun memelik ino di, meledim dilen. <sup>3</sup> Agef fen, Jesus arein isel, yogon dō fiya tar geid dibodon. <sup>4</sup> Juda neid sifa inoya Pasa naa melsā mog.

<sup>5</sup> Sain Jesus mala irakel, tamo kayau musei ī garan disis mog, ileid fen, ī Filip irokenen, “Ada tamo kayau eneidi dāf nigin, bret nain na talouf?” <sup>6</sup> Ī Filip kisi fiye ken, enei to fen, ere nigin, Jesus ī ereb age foun nigin are ī keleī.

<sup>7</sup> Filip Jesus aiten yalen, “Ogō eit nē mala anim, idi mugu mugu nigin bret na talouf are, tunī to dō dilouf.”

<sup>8</sup> In dō fiya tamo taka Endru, Simon Pita nē tura anī Jesus irokenen, <sup>9</sup> “Kesu taka yeir baali bret faif gau uru ado, anim musei ganan enei tau kisi falauf?”

<sup>10</sup> Jesus iron, “Tamo kayau urokenēdig len, dibod.” Modou anī bun fisir musei ado, an tamo dibodadan faif tausen age fiya. <sup>11</sup> Gama Jesus bret anī geif, Negur de fiye ken, idi dibodadan neid oroya kilei, anī gadō fedin. Ī gau buneg de age fen.

<sup>12</sup> Idi ganan dō kisi fele di, Jesus in dō fiya tar irokenēdin, “Tunī ditoraram anī kurug. To sekil fiyau.”

<sup>13</sup> Anī nigin, baali bret faif anī idi dokon, masak tunī ifaredin anī kuru dife di, karam tuwelf isokosedin.

<sup>14</sup> Tamo kayau memelik inon anī dile fen, idi diron, “Momoi bagai, enei are Profet teneub enei bun isiyoun ya anī.” <sup>15</sup> Idi disis, Jesus king ibodōf nigin nugo difiyēf ya anī, ī keleī ken, baban mugu arein kel iselen.

### Jesus Naan Teteatu Iyon

(Matyu 14:22-33; Mak 6:45-52)

<sup>16</sup> Gugumek isi di, yogon dō fiya tar daliyoun disilen.  
<sup>17</sup> An idi waag taka bun sosō de daliyou dibal fen, Kapenaum luwe dile mog, mogo gugumen, anī Jesus fau idi garan to isin. <sup>18</sup> Yau total isi di, maaī moloun wī yen.  
<sup>19</sup> Idi waag sur de dira ken, ful de dile, faif kilomita be, sigis kilomita age fiya mog, Jesus naan tetenem waag garan iyok isi mog, dile fen, kumī tererē den. <sup>20</sup> Anī ere, ī idi irokenēdin, “Are ayam, to kumī wog.” <sup>21</sup> Age ye di, ī waag bun dalesnēf nigin waud yenen, kaisā bagai, idi dilauf nē waud iron ub anī bun, waag goro fen.  
<sup>22</sup> Naa taka di, tamo kayau daliyou ub sitakā difaren idi kelein, waag tekelei dogol an ibodon, anī Jesus in dō fiya tar geid to sō den, idi dogo dogol dilen. <sup>23</sup> Waag tunī Taiberias temeleid, Odug, bret Negur de fiye ken, tamo kayau ifeneīd don modoū anī non, goro difen.  
<sup>24</sup> Tamo kayau, Jesus in dō fiya tar geid an to dibodon anī kelei ken, idi waag sosō de fen, Jesus dimirnēf nigin Kapenaum dilen.

### Jesus Mata Nē Bret

<sup>25</sup> Sain tamo kayau idi, daliyou sitakā Jesus fotou dife fen, idi ī to difiyen, “Rabi, ere sain ō ein usin?”  
<sup>26</sup> Jesus aitedin yalen, “Aya ā momoi bagai arokeneik, ā aya umirnagef, ā memelik ulegen nigin sã, anī ere, ā bret ifoutneī di, wōg eweī gere fen nigin. <sup>27</sup> Saaf sane ledig anī nigin to kabī waleg, anī ere, saaf to sane le fen, mata faimud ibodkeleya bun ibodōdig anī nigin kabī waleg, are Tamo Naalem ifeneīf. Ī dogol Tama Negurem igrine ken, yoya nē megeir ganan ifenen.”  
<sup>28</sup> Age ye di, idi ī to difiyen, “Amã Negur nē kabī malouf nigin, naig bagai mafouf?”  
<sup>29</sup> Jesus solof iron, “Negur nē kabī are yeir, Negurem sur fiyen ī nigin momoi gouf.”  
<sup>30</sup> Anī nigin, idi ī to difiyen, “Ere memelik bun uris wanamã di, mail fen, ō momoi mayōf? Ere anī ō unouf?”  
<sup>31</sup> Amã nemã tubumã tar gerere tuan mana don, Negur nē Itotoya bun eig ye yenek kilei, Ī idi saa ilun tamal bret dãf nigin ifenēdin.†

<sup>32</sup> Jesus idi irokenēdin, “Aya ā momoi bagai arokeneik, Moses im bret saa ilun tamal to ifenein, anī ere, neu Dei ī yogo bret kaū bagai saa ilun tamal ifeneik.  
<sup>33</sup> Ere nigin, Negur nē bret saa ilun tamal isi fen, teneub enei mata ifenek.”

<sup>34</sup> Idi diron, “Odug, gama ilauf enei bun bret anī wanamã.”

<sup>35</sup> Jesus idi irokenēdin, “Aya anī mata nē bret. Taka ī aya bun isif, to bagai nau ilauf, taka ī aya nigin momoi yef, to bagai naan ail fouf. <sup>36</sup> Anī ere, aya ā arokenein kilei, ā mogo uleyagen, anī fau to momoi gef. <sup>37</sup> Idi ganan Deim ifanaf, aya bun disiyouf, taka ī aya bun isif, aya to bagai aruwauf. <sup>38</sup> Aya saa ilun tamal asin, aya neu oroya dō afouf nigin sã, anī ere, aya sur fiyan nē oroya dō afouf nigin. <sup>39</sup> Aya sur fiyan nē oroya are yeir,

idi ganan ī ifanan taka to folō afalauf, anī ere, aya idikeleya naa bun alesnēdiyof. <sup>40</sup> Neu Dei nē oroya anī, taka ī Naal ile fen, ī nigin momoi yef, mata faimud ibodkeleya yalouf, idikeleya naa bun aya alesnēf.”

<sup>41</sup> Od enei Juda tamo karī de fen, ī nigin nauseir den, ere nigin, Jesus iron, “Aya bret saa ilun tamal asin.”  
<sup>42</sup> Idi diron, “Eī Jesus sã de? Josef naal, in sina tama ado ada keleī. Naig fe di, ī irok, ‘Aya saa ilun tamal asin?’”

<sup>43</sup> Jesus solof iron, “Ā aug to nauseir gouf. <sup>44</sup> Taka yogon oroyam, aya wageun isiya kisi feleya sã, anī ere, Dei aya sur fiyan inim, ī namen kabī yale fen, aya garan irou isiyof. Age fe di, idikeleya naa bun, aya ī alesnēf. <sup>45</sup> Profet neid itotoya bun eig ye yenek, ‘Idi ganan Negurem ifelnēdiyof.’ † Taka ī Dei karī fiye ken, ī bun keleī yalef, aya bun isidig. <sup>46</sup> Taka nem Dei to ilen, Negur bunem isin im dogol. Ī yogo dogol Dei ilen. <sup>47</sup> Aya ā momoi bagai arokeneik, taka ī momoi yef, mata faimud ibodkeleya ado. <sup>48</sup> Aya mata nē bret. <sup>49</sup> Āgenei tubuī tar gerere tuan mana don, anī ere, idi gare den. <sup>50</sup> Anī ere, bret enei saa ilun tamal isif, are tamo yãf, to laa fouf. <sup>51</sup> Aya mata ibodōya bret, are saa ilun tamalem isin. Taka ī bret enei yoko, ī mata faimud ibodōf. Bret enei aya bouwau, are teneub ganan bun, tamo kayau mata dalouf nigin afenēdiyof.”

<sup>52</sup> Age ye di, Juda tamo dogo dogol fatuk bagai luwa diroun, “Naig fe fen, tamo enei yogon bouwa ifanada tãf?”

<sup>53</sup> Jesus idi irokenēdin, “Aya ā momoi bagai arokeneik, ā Tamo Naal nē bouwa to wãgauf, in naud to wãgauf are, ā namein mata to ibodok. <sup>54</sup> Taka ī neu bouwau yokon, neu naudou yoko, ī mata faimud ibodkeleya ado, anī aya fau idikeleya naa bun alesnēf. <sup>55</sup> Ere nigin, neu bouwau are saaf bagai, neu naudou are naan bagai. <sup>56</sup> Taka ī neu bouwau yokon, neu naudou yoko, ī aya nameun ibodok, aya ī namen abodok. <sup>57</sup> Mata ibodōya Dei aya sur fiya di, aya Dei bunem mata abodok gen, taka ī aya yōyaf, aya bunem mata ibodōf. <sup>58</sup> Bret enei saa ilun tamal isin. Āgenei tubuī tar mana don are gare desin, anī ere, taka ī bret enei yoko, faimud mata ibodkalauf.” <sup>59</sup> Ī od enei Kapenaum taun an, Juda neid uub fō bun ifelneīd fen, wogō yen.

### In Dō Fiya Tar Musei Jesus Ditornen

<sup>60</sup> Od enei karī de fen, in dō fiya tar musei diron, “Ifelnadaf eī total bagai. Aim anī keleī youf?”

<sup>61</sup> In dō fiya tar od enei nigin nauseir de di, Jesus anī kelei ken, idi irokenēdin, “Od enei ā morō ifeneik de?  
<sup>62</sup> Ba, Tamo Naal ī ibodon nē kel isel mog ulogouf are, ā ere kisi gouf? <sup>63</sup> Awa Uurem mata ifenēdig, bouwa are gorō. Od aya wogō ayein are Uur, od anī mata ifenēdig. <sup>64</sup> Anī ere, ā tunī momoiya sã.” Ere nigin, Jesus idi nigin gariya bun kelein, aiyaim ī nigin to momoi den, aim ī nigin kiwai inouf. <sup>65</sup> Ī od tobol fe iron, “Anī nigin, aya od enei arokenein, Dei ī nigin wau to yalouf, ī aya bun isiya kisi feleya sã.”

<sup>66</sup> Od enei bunem, in dō fiya tar musei keku den, ban Jesus to dō difiyen.

† Eksodas 16:4; Nehemaia 9:15; Sam 78:24, 25

†† Asaia 54:13

<sup>67</sup> Jesus in dō fiya tar tuwelf to fedin, “Āg aya utornag ulagauf de?”

<sup>68</sup> Simon Pita solof iron, “Odug, amā ai bun malauf? Ō mata faimud ibodkeleya nē od ado. <sup>69</sup> Amā momoi mau fen, keleī, ō anī Negur nē Fateul.”

<sup>70</sup> Age ye di, Jesus idi irokenēdin, “Tuwelf ā ayam to agirnein de? Anī ere, ā atun taka are Satan.” <sup>71</sup> (Ī Judas, Simon Iskariot naal nigin kisif fen, iron. Idi tuwelf anī taka Judas, fau dum Jesus kiwai ifenen.)

### Jesus Salafat Nē Sifa Bun Ilen

**7** Enei dumen, Jesus Galili an iyon, Judia distrik so fiyen, ere nigin, an Juda tamo ĩ dukesiyouf nigin ololo difen. <sup>2</sup> Anī ere, Juda neid Salafat nē Sifa naa melsā di, <sup>3</sup> Jesus tura tarem ĩ dirokenen, “Ō ein utor ken, Judia ulauf, ago di, ogon dō fiya tar, memelik uno di, dilouf. <sup>4</sup> Tamo taka ĩ, tamo kayau meleid bun mala yaor wō you fenē, ĩ iminēyan kabī to yaledig. Ō eneidi agof, ō ogo tamo kayau ganan ufelnēdiyof.” <sup>5</sup> Ī yogon tura tar bagaig, ĩ nigin to momoi den.

<sup>6</sup> Anī nigin, Jesus idi irokenēdin, “Aya neu sain bagai fau isiya sã, ā nigin sain ganan kisi feleya bagai. <sup>7</sup> Tenebur tamo kayau idi, ā to kiwai difeneik, aya nigin kiwai, ere nigin, ereb sane age difef anī kurō afesidig. <sup>8</sup> Ā Sifa bun ulagauf, aya nigin fau Sifa enei bun to eselauf, ere nigin, neu sain bagai fau isiya sã.” <sup>9</sup> Jesus od enei wogō yel fen, Galili distrik an ibodon.

<sup>10</sup> Anī ere, tura tar Sifa bun diselel mog, ĩg iselen, anī ere, mala yaor sã, iminēyan. <sup>11</sup> Sifa bun, Juda tamo idi, ĩ nigin meleid dino fen, to difen, “Tamo are nain?”

<sup>12</sup> Tamo kayau atun, ĩ nigin fatuk bagai kosesē kurā den. Tunī diron, “Ī tamo biya.”

Tunī solo de diron, “Eo, ĩ tamo kayau idegnēdidig.”

<sup>13</sup> Anī ere, taka nem ĩ nigin yaor to kurō fesin, ere nigin, idi Juda tamo nigin kumī den.

### Jesus Sifa Bun Ifelnēdin

<sup>14</sup> Sifa mogo atusil ifar mog, Jesus tempel modoū bun isel fen, od ifelnēdin. <sup>15</sup> Juda tamo idi terē de fen, diron, “Tamo enei tai fiya yaleya sã mog, naig fe fen, keleī eig fiya ado?”

<sup>16</sup> Jesus solof iron, “Neu ifelnēya are neu sã, aya sur fiyan ĩ bunem isif. <sup>17</sup> Taka ĩ Negur nē oroya dō fiya nigin orof are, neu ifelnēya Negur bunem isif be, aya neu oroya nem wogō auf be anī, ĩ keleī youf. <sup>18</sup> Taka ĩ yogon kisim wogō yef are, ĩ yogo yana yaleseya nigin age fef, anī ere, taka ĩ sur fiyen nē yana yaleseya nigin kabī yalef, tamo are momoi nē. Ī bun idegēya taka sã. <sup>19</sup> Moses lo anī to ifenein de? Anī ere, ā atun, taka nem lo to dō fedig. Ere nigin ā aya unakesigouf nigin ago gef?”

<sup>20</sup> Tamo kayau solo de diron, “Ō kaa sane ado. Aim ō inokesiyouf nigin age fef?”

<sup>21</sup> Jesus idi irokenēdin, “Aya memelik taka ano di, ā ganan terē gen. <sup>22</sup> Anī ere, Mosesem mulū ileyā ifenein nigin, ā kesu Sabat naa bun mulū ileyā wenēgedig (mulū ileyā are, Moses bunem to isin, teneub te bu-

nem isin). <sup>23</sup> Moses nē lo to wal gouf nigin, Sabat naa bun kesu nē mulū ileyā wenēgedig, ere nigin aya Sabat naa bun, tamo bou adok el afe di, ā aya nigin nameī sanedig? <sup>24</sup> Mala yaor anī dogol uleg fen, to es gei, tutuk bagai el ge, es gei.”

### Jesus Anī Kristus De?

<sup>25</sup> Sain anī bun, Jerusalem tamo kayau tunī diron, “Tamo enei are idi ĩ dukesiyouf nigin age difef anī sã de? <sup>26</sup> Ī de yeir, mal atun wogō ye di, ereb od taka to dirokenek. Mudur adodo idi, ĩ anī Kristus ya anī mogo tutuk keleī de? <sup>27</sup> Anī ere, tamo enei nain be tamal, are amā keleī. Sain Kristus isiyof, taka nem ĩ nainenem be isif to keleī youf.”

<sup>28</sup> Age de di, Jesus fau tempel modoū bun ifelnēd fen, iweig iron, “Are de, ā aya nigin keleī, aya nainem asin are ā keleī. Aya ein neu oroyam to asin, anī ere, ĩ aya sur fiyan are momoi. Ā ĩ keleī sã, <sup>29</sup> anī ere, aya ĩ keleī, ere nigin, aya ĩ bun tamal, im aya sur fiyan.”

<sup>30</sup> Od enei bun, idi ĩ dirounēf nigin age difen, anī ere, taka nem ĩ bun ima to inon, ere nigin, yogon sain fau isiya sã. <sup>31</sup> Anī ere, tamo kayau musei fau ĩ nigin momoi de fen, diron, “Sain Kristus isiyof, ĩ memelik tamo enei inodif anī wal fiya inodiyof de?”

<sup>32</sup> Tamo kayau ĩ nigin age de, kosesē kurā de mog, Farisia tamo idi karī den. Age de fen, pris odudug Faria geid, tempel lo fiya tamo Jesus dalouf nigin sur difedin.

<sup>33</sup> Jesus iron, “Aya ā geid sain modeg tabodok, age afe fen, aya ĩ aya sur fiyan bun alauf. <sup>34</sup> Ā aya umirna-gauf, anī ere, ā to fotou wiyagauf. Aya abodōf nē an, ā isiya kisi feleya sã.”

<sup>35</sup> Juda tamo abob dirokenen, “Tamo enei nari bagai ile di, anī ada ĩ to fotou tafouf? Ada neda tamo kayau firagagaū difen, Grik tamo kayau atun dibodok nē an, ĩ ile fen, Grik tamo kayau ifelnēdiyof de? <sup>36</sup> Ere gariya nigin ĩ iron, ‘Ā aya umirna-gauf, anī ere, ā to fotou wiyagauf. Aya abodōf nē an, ā isiya kisi feleya sã?’”

<sup>37</sup> Sifa naa odug idikeleya bun, Jesus ifar fen, iweig iron, “Taka ĩ naan ail fouf, aya bun isi fen, naan yāf. <sup>38</sup> Taka ĩ aya nigin momoi yef, Negur nē Itotoya iron kilei, warur naan ĩ namenem ulo ulō yef yenēf.” <sup>39</sup> Ī od enei Awa Uur nigin wogō yen, are idi Jesus nigin momoi den anidi fau dalouf. Sain anī bun, Awa Uur isiya san, ere nigin, Jesus fau fula fiya medēya yaleya sã.

<sup>40</sup> Od enei karī de fen, tamo kayau tunī diron, “Momoī bagai, tamo enei Profet ada tari tafef anī.”

<sup>41</sup> Tunī diron, “Ī Kristus.”

Tunīg diron, “Kristus ouf are, naig fe fen, Galilim isiyof? <sup>42</sup> Kristus Dawid nē ibor bunem, Betlehem taun Dawid ibodon nē anenem isiyof, anī Negur nē Itotoya to irok de?” <sup>43</sup> Anī nigin, tamo kayau Jesus nigin fara furu difen. <sup>44</sup> Tunī Jesus ka difiyēf nigin age difen, anī ere, taka nem ĩ bun ima to inon.

### Juda Neid Mudur Adodo Momoiya Sã

<sup>45</sup> Tempel lo fiya tamo idi, pris odudug Farisia tamo gedin keku de dile di, to difedin, "Ere nigin ã ĩ to urou usigel?"

<sup>46</sup> Tempel lo fiya tamo solo de diron, "Taka nem, tamo enei wogõ yedig gen to wogõ yedig."

<sup>47</sup> Farisia tamo solo de diron, "Ī ãg idegnein de?"

<sup>48</sup> Mudur adodo Farisia tamo geid atun, taka ĩ nigin momoi yen de? <sup>49</sup> Sã, anĩ ere, tamo kayau eneidi idi lo keleĩ sã, idi Negurem gelu fedif."

<sup>50</sup> Nikodemus, idi neid taka, tetunem Jesus garan ilen, ĩ irokenẽdin, <sup>51</sup> "Ada neda lo bun, taka ĩ ereb age fef anĩ ileyã nigin ketem karĩ tafiye ken, es tafedig. Age fiya sã de?"

<sup>52</sup> Idi solo de diron, "Õg Galili tamal de? Umir ken, fau keleĩ youf, profet taka Galilim to isif."

[Itotoya tunĩ kulu bagai od gariya dino fen, ditoton anĩ bun, Jon 7:53-8:11 to ibodok.]

<sup>53</sup> Age de fen, idi mugu mugu dogo neid fonõ fonõ dilen.

**8** Anĩ ere, Jesus Moul Arei bun iselen. <sup>2</sup> Bonimeimumurei ado, ĩ baban tempel modoũ bun wõ yen, an tamo kayau ganan guru de salili difiyẽ di, ĩ ifelnẽdiyof nigin ibodon. <sup>3</sup> Lo ifelnẽdiya tamo Farisia tamo geid idi, kayau taka noli ye mog, dale dirou disi, guru fiya mala bun dinenẽ di, ifaren. <sup>4</sup> Age dife fen, Jesus dirokenen, "Tise, kayau enei noli tobonunã ino di, malel. <sup>5</sup> Lo bun, kayau age fediya meein tulu fiya nigin Moses irokanaman. Gama õ ere wof?" <sup>6</sup> Idi ĩ bou bun od yũya nigin kor dino fen, age de, to difiyen.

Anĩ ere, Jesus obũ yeis fen, ima gegem teneub bun itoton. <sup>7</sup> Idi ĩ to difiyẽtu di, ĩ fã ye, saules fen, irokenẽdin, "Ã atun, aib taka ĩ mosor sãf, ĩ ketem kayau bun meein irãf." <sup>8</sup> Baban ĩ obũ yeis fen, teneub bun itoton.

<sup>9</sup> Idi od anĩ karĩ de fen, idi mugu mugu ul de, diyalolen, biyedim uyu dirou di, age de dile, Jesus kayau ifaren anĩ ado dogol ditornẽdin. <sup>10</sup> Jesus saules fen, kayau to fiyen, "Kayau, idi nai difef? Idi takam baban õ bun od to yuk de?"

<sup>11</sup> Kayau iron, "Odug, takam to age fef."

Jesus iron, "Ayag õ boũ bun od to auk. Ule fen, sain enei ilauf ganan, mosor baban to uno."

### Jesus Nẽ Wogõya Are Momoi

<sup>12</sup> Jesus baban tamo kayau irokeneĩd fen, ĩ iron, "Aya tenebur enei nẽ fula fiya. Taka ĩ aya dõ fiyauf, ĩ gugum namen to bagai iyõf, anĩ ere, ĩ mata nẽ fula fiya adouf."

<sup>13</sup> Age ye di, Farisia tamo idi Jesus dirokenen, "Õ ogo nigin wogõ wof, anĩ nigin, ogon wogõya are, momoi be sã be anĩ yaor sã."

<sup>14</sup> Jesus solof irokenẽdin, "Aya yug nigin wogõ auf, anĩ ere, neu wogõya are momoi, ere nigin, aya nainenem asin, nain be alauf anĩ, aya keleĩ. Anĩ ere, ã, aya nainenem asin, nain be alauf anĩ, keleĩ sã. <sup>15</sup> Ã tamo nẽ tobonunã bunem es gedig, aya aib taka to es afedig.

<sup>16</sup> Anĩ ere, aya es afouf are, neu es fiya are tutuk, ere nigin, aya mugu sã. Aya Dei inim sur fiyan ado mafaref. <sup>17</sup> Ågenei Lo bun itotoya irok, tamo urom wogõ tekelei dinof, are momoi. <sup>18</sup> Aya yug nigin kurõ afalaisidig, age afe di, Dei aya sur fiyan ĩ, aya nigin kurõ fesidig."

<sup>19</sup> Age ye di, idi Jesus dirokenen, "Õ tamã nain?"

Jesus solof iron, "Ã aya nigin ado neu Dei nigineg keleĩ sã. Ã aya nigin keleim are, neu Dei nigineg keleim."

<sup>20</sup> Ī tempel bun kolekta inoya nẽ modoũ non ifelneĩd fen, od enei wogõ fiyẽdin. Anĩ ere, takam ĩ to ima ka fen, ere nigin, in sain fau isiya sã.

<sup>21</sup> Jesus baban idi irokenẽdin, "Aya atorneĩ di, ã umir-nagau, agog fen, ã ãgenei mosor bun gare gouf. Aya elef nẽ an, ã isiya kisi feleya sã."

<sup>22</sup> Anĩ bunem, Juda tamo idi diron, "Ī yogo bouwa yukesiyouf de? Anĩ nigin, ĩ, 'Aya elef nẽ an, ã isiya kisi feleya sã,' yef de?"

<sup>23</sup> Anĩ ere, Jesus tobol fe fen, irokenẽdin, "Ã tenebur temeĩ, aya ilun temelou. Ã teneub enei nẽ, aya teneub enei nẽ sã. <sup>24</sup> Anĩ nigin, aya, ã ãgenei mosor bun gare gouf ayein. Aya yug nigin, aya im audig anĩ, to momoi gouf are, ã momoi bagai ãgenei mosor bun gare gouf."

<sup>25</sup> Age ye di, idi ĩ to difiyen, "Õ ai?"

Jesus idi irokenẽdin, "Aya aib anĩ, mogo gariya bunem arokeneik asin. <sup>26</sup> Aya ã nigin wogõya musei ado, es fiya nigineg musei. Anĩ ere, sur fiyan ĩ, momoi bagai, anĩ nigin, ereb aya ĩ bun karĩ aun anĩ, tamo kayau tenebur ein arokenẽdif."

<sup>27</sup> Idi, ĩ Tama nigin irokenẽdif ya anĩ, to kisi fokõ yen. <sup>28</sup> Anĩ nigin, Jesus iron, "Sain ã Tamo Naal walesagauf bun, aya yug nigin aya im audig anĩ, ã keleĩ youf, aya neu oroyam ereb taka to age afedig, anĩ ere, aya Dei ifelnan anĩ dogol wogõ audig anĩ, ã keleĩ youf. <sup>29</sup> Aya sur fiyan ĩ, amã urom mabodok, ĩ mugu to itornal, ere nigin, aya faimud, ereb ĩ wau al fouf anĩ, age afedig."

<sup>30</sup> Age wogõ ye di, musei ĩ nigin momoi den.

### Abraham Gere Tar

<sup>31</sup> Jesus, Juda tamo ĩ momoi difiyen anidi irokenẽdin, "Aya afelnein anĩ uroug tokõ walagau, ã momoi bagai neu dõ fiya tar. <sup>32</sup> Agog fen, ã momoi anĩ keleĩ youf, momoi anim kafĩ fiya bun tamal yalnelneĩf."

<sup>33</sup> Idi aiten dale dirokenen, "Amã Abraham nẽ ibor nẽ tubu tar, amã aib taka nẽ ferfer to mabodon. Ere wo fen, amã kafĩ fiya bun tamal yalnelnamãya nigin urok?"

<sup>34</sup> Jesus aitedin yale iron, "Aya ã momoi bagai arokeneik, taka ĩ mosor inof are, ĩ mosor nẽ ferfer. <sup>35</sup> Ferfer ĩ, ibor anĩ bun gai ibodkeleya modoũ sã, anĩ ere, modoũ are naal nẽ faimud ibodkalauf. <sup>36</sup> Anĩ nigin, Naal ĩ kafĩ fiya bun tamal yalnelneĩf are, ã momoi bagai karika lauf. <sup>37</sup> Ã Abraham nẽ ibor nẽ tubu tar are, aya keleĩ. Anĩ ere, ã aya unakesigouf nigin dodok gef, ere nigin, ã neu od nẽ modoũ namein to ibodok. <sup>38</sup> Ereb aya Dei mala bun ailen anĩ, aya ã arokeneik, ãg ereb ãgenei temeĩ bun karĩ gen anĩ ago gedig."

<sup>39</sup> Idi aiten dale dirokenen, "Abraham ĩ tamamã."

Age de di, Jesus iron, "Å Abraham gere tarem are, Abraham age fedin anī ago gem. <sup>40</sup> Gama ā, aya Negur bun momoi anī karī au fen, arokenein anī, unakesigouf nigin naab umirēgef. Abraham ī to age fen. <sup>41</sup> Å temeī age fedig anī ago gef."

Age ye di, idi Jesus dirokenen, "Amā seseirā inoya naab bun temelamā sā. Nemā Tamamā are Negur yogo dogol."

#### Satan Gere Tar

<sup>42</sup> Jesus idi irokenēdin, "Negur ī Temeim are, ā aya nigin wauī laa fem, ere nigin, aya Negur bunem asi fen, yeir afaref. Aya neu oroyam to asin, im sur fiyan. <sup>43</sup> Ere nigin neu od nigin wauī to fokō yef? Are aya wogō auf anī, ā karīya kisi feleya sā nigin. <sup>44</sup> Å, temeī Satan nē, anī nigin, ā temeī nē oroya dō fiya nigin oroyeik. Ī gariya bunem isin, ī yukesiya kaa, momoi to iroudig, ere nigin, ī namen momoi sā. Ereb sain ī idegēya od wogō yedig, ī yogon od bagai wogō yedig, ere nigin, ī kori tamal, idegēya tama. <sup>45</sup> Anī ere, aya momoi anī wogō audig nigin, ā to momoi wiyagedig! <sup>46</sup> Å takam, aya neu mosor anī tau kurō fesiya kisi feleya? Aya momoi wogō auf are, ere nigin ā to momoi wiyagef? <sup>47</sup> Aib ī Negur nē, ī Negur ereb yef anī karī yedig. Å to karī gef anī nē gariya are, ā Negur nē sā nigin."

#### Jesus Yogo Nigin Iron

<sup>48</sup> Juda tamo aiten dale dirokenen, "Amā ō Samaria tamal, kaa sanem ironon mauf are, momoi to morok de?"

<sup>49</sup> Jesus solof iron, "Aya kaam to ironan, anī ere, aya neu Dei yana seli abidig, ā aya selu to wabigedig.

<sup>50</sup> Aya yug nigin fula fiya medeīya to amirek, anī ere, taka ī anī imirek are ibodok, ī anī es fiya tamo. <sup>51</sup> Aya ā momoi bagai arokeneik, taka ī neu od irou kafī falauf are, ī laa to bagai gurug fouf."

<sup>52</sup> Juda tamo, anī bun Jesus dirokenen, "Gama amā keleī, ō kaa sanem ironon! Abraham laa fen, profeteg gare den, anī ere, ō, taka ī ogon od irou kafī falauf are, ī laa to bagai kobūf ilouf, wof. <sup>53</sup> Ō tamamā Abraham wal fiya de? Ī laa fen, profeteg age difen. Ō kisi wof, ō ai?"

<sup>54</sup> Jesus aitedin yale iron, "Aya yug selu alesauf are, neu seli alef are ege. Neu Dei, ī anī āgenei Negur gef, ī aya yanau yalesedig. <sup>55</sup> Å ī keleī sā, anī ere, aya ī keleī. Aya ī keleī sā auf are, aya ā gen idegēya tamouf, anī ere, aya ī keleī bagai, in od dō afedig. <sup>56</sup> Temeī Abraham ī, neu naa anī ilouf nigin kisif fen, wau al fen. Ī anī mogo ile fen, kulī yen."

<sup>57</sup> Anī nigin, Juda tamo Jesus dirokenen, "Ō fau yar fifi yaleya sā, anī ō mogo Abraham ulen de?"

<sup>58</sup> Jesus idi irokenēdin, "Aya ā momoi bagai arokeneik, Abraham gō fiya sā mog, aya abodon." <sup>59</sup> Anī nigin, idi ī meein tulu difouf nigin meein gei difen, anī ere, Jesus bouwa inokel fen, tempel modoū bun tamal iya ilen.

#### Jesus Tamo Taka Mala Ifofakeleya Gō Difiyen Anī El Fiyen

<sup>9</sup> Jesus iyok ile fen, tamo taka mala ifofakeleya gō difen anī ilen. <sup>2</sup> In dō fiya tar Jesus to difiyen, "Rabi, aim mosor ino di, ī mala ifofakeleya gō difen, tamo enei yogo de, sina tamam de?"

<sup>3</sup> Jesus aitedin yale iron, "Tamo eneimeg sā, sina tama adomeg sā, anī ere, Negur nē kabī ī bunem yaorouf nigin eig fiya wō yen. <sup>4</sup> Eī fau gaa ado, aya sur fiyan in kabī talouf bagai. Bō fau isif, sain anī, taka nem kabī yaleya kisi feleya sā. <sup>5</sup> Sain aya tenebur abodok, aya teneub enei nē fula fiya."

<sup>6</sup> Age wogō yel fen, ī tenebur isis fen, salina buru ado falei fe fen, tamo mala bun inon. <sup>7</sup> Jesus ī irokenen, "Ule, Siloam naan kukor ugū" (Siloam nē gariya, are 'Sur fiyen'). Anī nigin, tamo ile, naan igun, agef fen, mala kelē yel, fō bun isin.

<sup>8</sup> In fō tura tar ado, idi ī nonī ye mog diledig anidi diron, "Tamo de eneim ibod ken, nonī yedig anī sā de?"

<sup>9</sup> Idi tunī diron, "Im."

Tunī diron, "Im sā, taka ī genem."

Anī ere, ī yogo iron, "Aya de tamo anim."

<sup>10</sup> Idi ī dirokenen, "Naig fe di, ō malā kelē yeledin?"

<sup>11</sup> Ī aitedin yale iron, "Tamo yana Jesus dedig im, buru falei fe fen, malau uru bun inodin. Ī, aya ele, Siloam naan agūf nigin irokanan. Anī aya ele, naan agun, age afe fen, aya malau kelē aun."

<sup>12</sup> Idi ī to difiyen, "Tamo are nain?"

Ī iron, "Aya keleī sā."

#### Farisia Tamo Idi Mala El Fiyen Nē Gariya Dimiren

<sup>13</sup> Idi tamo mala ifofakelen anī, Farisia tamo gedin dale dirou disin. <sup>14</sup> Jesus buru falei fe fen, tamo mala el fedin nē naa are Sabat naa. <sup>15</sup> Anī nigin, Farisia tamo idig, ī naig fe fen, mala kelē yedin anī to difiyen. Tamo are irokenēdin, "Ī malau buru inodin, age fe di, agun, anī aya gama kelē auf."

<sup>16</sup> Farisia tamo tunī diron, "Tamo enei Negur bun tamal sā, ere nigin, ī Sabat naa to dō fef."

Anī ere, tunī diron, "Naig fe di, mosor tamo memelik age fediya inoya kisi feleya?" Anī nigin, idi fara difen.

<sup>17</sup> Idi baban tamo mala ifofakelen anī dirokenen, "Ī ō malā el fen anī, ō ī nigin ere wof?"

Age de di, ī iron, "Ī profet."

<sup>18</sup> Juda tamo idi, tamo mala ifofakeleya mala kelē yelen anī, fau to momoi den. Anī nigin, idi tamo anī sina tama diweignēdin. <sup>19</sup> Idi to difen, "Eī ā naaluī de? De ī anī mala ifofakeleya gō mafen gef? Naig fe di, ī gama sā mala kelē yelef?"

<sup>20</sup> Sina tama diron, "Amā keleī, ī nemā kesu, anī ī mala ifofakeleya gō mafen. <sup>21</sup> Anī ere, ī naig fe fen, gama sā lo fef, aim ī mala el fedin anī, amā keleī sā. Yogo to wiyēg, ī biya, yogo nigin wogō youf." <sup>22</sup> Sina tama idi, Juda tamo kumī difiyeīd fen, age de diron, ere nigin, Juda tamo idi mogo od difon, aib taka Jesus anī Kristus

youf are, Juda neid uub fō bun dalelnēf. <sup>23</sup> Age fiya nigin, sina tama eig de diron, "Ī biya, yogo to wiyēg."

<sup>24</sup> Baban Juda tamo idi, mala ifofakelen anī diweigne ken, diron, "Negur yana wales fen, momoi nē od dogol urōf, amā keleī, tamo are mosor tamal."

<sup>25</sup> Ī solof iron, "Ī mosor ado be sā be, aya keleī sā. Te-kelei aya keleī are, aya malau ifofakelen, anī ere, gama lo afedig."

<sup>26</sup> Age ye di, idi ĩ to difiyen, "Ī ō ere naig yon? Naig fe di, ō malā birikā fedin?"

<sup>27</sup> Ī aitedin yale iron, "Aya ā mogo arokenein, anī ere, ā to karī gen. Ere nigin ā baban karī gou fenē? Āg in dō fiya tar wowā gou fenē de?"

<sup>28</sup> Age ye di, idi kono difiye ken, diron, "Ō tamo enei nē dō fiya taka! Amā are Moses nē dō fiya tar! <sup>29</sup> Negur Moses wogō fiyen are amā keleī, anī ere, tamo enei nigin, ĩ nainenem isin areg, amā keleī sā."

<sup>30</sup> Tamo anī aitedin yale irokenēdin, "Ago ge di, terē auf. Ī nainenem isin, ā keleī sā, anī ere, aya malau birikaū fedin. <sup>31</sup> Amā keleī, Negur ĩ mosor dinodidig anī to karī fiyēdidig, anī ere, taka ĩ Negur anini fiye ken, Negur nē oroya dō fef are, Negurem ĩ karī fiyēdig. <sup>32</sup> Gariya bunem isi gama, taka nem, tamo mala ifofakeleya gō difen anī birikā fedin yeya to karī yedig. <sup>33</sup> Tamo enei Negur bun tamal sam are, ĩ ereb taka to naig fem."

<sup>34</sup> Age ye di, idi diron, "Ō mosor barikā gō diyon, naig fe di, ō amā ufelnamak?" Age de fen, idi ĩ mayarē diru dirā di, isin.

### Uur Bun Mala Ifofakeleya

<sup>35</sup> Jesus, idi tamo anī serē diran yeya anī karī yen. Jesus ĩ fotou fiye ken, iron, "Ō Tamo Naal nigin momoi wof de?"

<sup>36</sup> Tamo to fen, "Oduq, ai anī ĩ? Urokana di, aya ĩ nigin momoi auf."

<sup>37</sup> Jesus iron, "Ō gama ĩ ulel, de ĩ anī urom wogō gef."

<sup>38</sup> Age ye di, tamo iron, "Oduq, aya momoi auf." Agef fen, ĩ Jesus seli yabin.

<sup>39</sup> Jesus iron, "Es fiya nigin aya tenebur ein asin, are mala ifofakeleya meleid kelē youf, age fe di, idi meleid kelē yef, are meleid ifofakalauf nigin."

<sup>40</sup> Farisia tamo tunī Jesus geid difaren anī, agef wogō ye di, karī de fen, to difen, "Ere? Amāg malamā ifofakeleya de?"

<sup>41</sup> Jesus iron, "Ā momoi bagai meleī ifofakeleyam are, ā mosor sam, anī ere, gama ā malamā kelē yef gef, anī nigin, āgenei mosor fau ibodok.

### Sipsip Lo Fiya Tamo Yogon Sipsip Geid

**10** "Aya momoi bagai arokeneik, tamo taka ĩ, sipsip nē kauwor bobog bunem to ilauf, anī ere, naab taka bunem gar ye isilauf are, ĩ bē tamo, bē yaledig.

<sup>2</sup> Tamo ĩ bobog bunem ilef are, ĩ yogo sipsip marau.

<sup>3</sup> Lo fedig tamo ĩ bobog kāf kenēdidig, age fe di, sipsip ĩ ait karī dedig. Ī yogon sipsip yana yaleid fen, mayarē guri feid, irouledig. <sup>4</sup> Sain ĩ yogon ganan mayarē guri

feid iroule fen, ĩ ketem uyu iledig, age fe di, yogon sipsip dō difedig, ere nigin, idi yogon ait keleī. <sup>5</sup> Anī ere, idi tamo urug to dō difedig, idi ĩ mā diyawauf, ere nigin, ĩ ait urug nigin idi keleī sā." <sup>6</sup> Jesus yaab od enei nem wogō fiyēdin, anī ere, ĩ idi ereb gariya nigin irokenēdin anī, idi to kelein.

<sup>7</sup> Anī nigin, Jesus baban iron, "Aya ā momoi bagai arokeneik, aya sipsip neid bobog. <sup>8</sup> Ganan uyulil disin are, idi bē tamo, bē daledig, anī ere, sipsip idi to karī difiyēdin. <sup>9</sup> Bobog are aya, taka ĩ aya bunem isiyouf are, mata kel yalouf. Ī namen isi fen, ulō yeis ilauf, agef fen, fisir yōya nē fotou foug. <sup>10</sup> Bē tamo are bē nigin, yukesiyouf nigin ado, narī foug nigin dogol isif, aya idi mata dale fen, barikāuf nigin asin.

<sup>11</sup> "Aya sipsip lo fiya tamo biya, sipsip lo fiya tamo biya, yogon mata sipsip nigin itorōdig. <sup>12</sup> Oroī tamo are ĩ sipsip marau sā. Anī nigin, ĩ gaū kuī isi di, ile fen, sipsip itorarā iyadig. Age fe di, gaū kuī sipsip kaka feid fen, firagagaū fedidig. <sup>13</sup> Tamo are iyadig, ere nigin, ĩ oroī tamo, sipsip nigin to karī yedig.

<sup>14</sup> "Aya sipsip lo fiya tamo biya, aya neu sipsip keleī, neu sipsip idi aya keleī, <sup>15</sup> are Dei ĩ aya keleī, aya Dei keleī gen. Anī nigin, aya neu mata sipsip nigin atorok. <sup>16</sup> Aya sipsip tunī ado, are sipsip kau enei bun temeleid sā, aya idig de guri afeid, arou asiyouf. Idig aitou karī douf, age fe di, idi uū tekelei, sipsip lo fiya tamo tekelei youf. <sup>17</sup> Neu Dei, aya nigin wau laa fef nē gariya are, aya neu mata baban kel yalouf nigin anī atorok. <sup>18</sup> Taka nem neu mata to son fiyauf, anī ere, aya neu oroyam neu mata atorok. Aya neu mata itorōya nigin megeir ado, kel yaleya nigin megeir ado. Od enei neu Dei bun tamal alen."

<sup>19</sup> Juda tamo od enei nigin baban fara difen. <sup>20</sup> Musei idi diron, "Ī kaa sane ado, agef fen, wadak. Ere nigin ĩ karī wiyēgef?"

<sup>21</sup> Anī ere, tunī diron, "Wogōya enei are, tamo kaa sane ado nē sā. Kaa sane ĩ mala ifofakeleya birikā feleya kisi feleya de?"

### Juda Tamo Idi To Momoi Den

<sup>22</sup> Sain anī bun, Negur bun Kel Inoya nē Sifa naa Jerusalem wō yen. Are saneya sain. <sup>23</sup> Anī Jesus tempel modoū bun, Solomon nē Waranda dō fef iyon. <sup>24</sup> Juda tamo guru de, Jesus salili difiye ken, dirokenen, "Sain ganī amā lo wamā di, nene mauf? Ō Kristus ouf are, amā el wo, faded wamāf."

<sup>25</sup> Jesus aitedin yale irokenēdin, "Aya mogo arokenein, anī ere, ā to momoi gef. Memelik neu Dei yana nem anodif, are aya nigin irok. <sup>26</sup> Anī ere, ā to momoi gef, ere nigin, ā neu sipsip sā. <sup>27</sup> Neu sipsip aya aitou karī dedig, aya idi keleī, anī nigin, idi aya dō difiyadig.

<sup>28</sup> Aya idi mata faimud ibodkeleya afenēdidig, age afe di, idi to bagai inanakalauf. Takam idi imaun tamal to sosoin fiyauf. <sup>29</sup> Neu Dei idi aya ifanan ĩ, ereb ereb ganan wal fiya. Takam idi neu Dei ima bun tamal son fiya kisi feleya sā. <sup>30</sup> Aya Dei ado tekelei."

<sup>31</sup> Juda tamo baban ĩ meein tulu difiyēf nigin, meein gei difen. <sup>32</sup> Anī ere, Jesus idi irokenēdin, "Aya Dei bun

tamal, ã memelik odudug musei afelnein. Anidi atun nanĩ anĩ nigin, ã aya meein tulu wiyagau fenē?"

<sup>33</sup> Juda tamo aiten dale diron, "Amã anidi taka nigin meein to tulu mayōf, anĩ ere, Negur kono fiya nigin, ere nigin, õ tamo maug anĩ, 'aya Negur' wof."

<sup>34</sup> Jesus idi aitedin yale irokenēdin, "Ägenei Lo bun itotoya anĩ to ibodok de, 'Aya aron, ã waitou' <sup>17</sup> <sup>35</sup> Negur nē od idi bun isin are, Negur idi anĩ waitou yen. Negur nē Itotoya are narĩ fiya kisi feleya sã. <sup>36</sup> Age yen ouf are, Dei yogon bagai igirna fen, ein tenebur sur fiyan anĩ, aya Negur Naal aul anĩ, ere nigin aya kono afel wiyagef? <sup>37</sup> Aya erob neu Dei age fedig anĩ, to age afef are, aya to momoi wiyagauf. <sup>38</sup> Anĩ ere, aya age afe di, ã neu od to momoi goufeg, memelik anodif anĩ momoi gouf, anĩ bunem Dei aya bun ibodok, aya Dei bun abodok ya anĩ, ã karĩg fen, keleĩ youf." <sup>39</sup> Idi baban Jesus ka difiyēf nigin age difen, anĩ ere, ĩ oreis iyawon.

<sup>40</sup> Agef fen, Jesus ĩ, Jordan naan sitakã, uruwa bun Jon naan igunēdin modoũ bun, kel ile, an ibodõ di, <sup>41</sup> tamo kayau musei ĩ garan disi diron, "Jon memelik taka to inon, anĩ ere, Jon tamo enei nigin wogõ yen garan, are momoi." <sup>42</sup> Age de fen, an musei idi Jesus nigin momoi den.

#### Lasarus Laa Fen

**11** Gama tamo Lasarus dedig dagin. ĩ Betani tamal, Maria ĩ tura Marta ado neid fonõ. <sup>2</sup> Maria de anim, kulu moul sumeĩ biya ado, Jesus bun fi fel fen, fatiyam Jesus ye waĩ fen. ĩ main Lasarus gama dagi yenek. <sup>3</sup> Anĩ nigin, main tar Jesus garan od sur difen, "Odug, ĩ nigin waũ laa fedig are dagi."

<sup>4</sup> Jesus ĩ enei karĩ ye fen, iron, "Dagi eneim to laa ilauf, are Negur nē fula fiya medeĩya nigin, anĩ bunem, Negur Naal yana dalesauf." <sup>5</sup> Marta, tura ado, maineid Lasarus nigin, Jesus wau laa fen. <sup>6</sup> Anĩ ere, Jesus ĩ Lasarus dagi yenek ya karĩ ye fen, ĩ ibodon nē an baban naa uru ibodon.

<sup>7</sup> Anĩ bure fele di, Jesus in dõ fiya tar irokenēdin, "Ada Judia distrik baban keku tagauf."

<sup>8</sup> Anĩ ere, idi diron, "Rabi, õ gama bagai Juda tamo meein tulu diyōf nigin age difen, anĩ õ an kel ulau fenē de?"

<sup>9</sup> Jesus irokenēdin, "Gaa tekelei bun aua tuwelf to ado de? Anĩ ege aa luwan to ilauf. Tamo ĩ gaa ado iyok, ĩ ye to tũ fedig, ere nigin, ĩ teneub enei nē lalan anim lo fedig. <sup>10</sup> Sain ĩ bõ iyōf are, ye tũ fouf, ere nigin, ĩ lalan sã."

<sup>11</sup> Enei irokel fen, Jesus idi irokenēdin, "Neda mou Lasarus ĩ mulã yenek, anĩ ere, aya turĩ afiyēf nigin an elef."

<sup>12</sup> In dõ fiya tar Jesus solo de dirokenen, "Odug, ĩ yenek are, ĩ fau karikauf." <sup>13</sup> Lasarus laa fen nigin Jesus iron, anĩ ere, in dõ fiya tar kisi difen, ĩ mulã yenēya maug bagai nigin irok den.

<sup>14</sup> Anĩ nigin, Jesus idi faded feid, irokenēdin, "Lasarus laa fen. <sup>15</sup> Ä nigin au fen, aya an to abodon anĩ nigin,

aya wau al fef, ere nigin, anĩ bunem ã momoi gouf. Anĩ ere, ada ĩ gein talauf."

<sup>16</sup> Anĩ nigin, Tomas Didimus dedig, dõ fiya tar tunĩ garan irokenēdin, "Weim gare tauf nigin, adag talauf."

#### Jesus Lasarus Main Tar Waud Wã Fen

<sup>17</sup> Sain Jesus ile wõ yen are, Lasarus mogo matmat bun naa fo ilelen anĩ karĩ yen. <sup>18</sup> Betani are Jerusalem melsã, tri kilomita age fiya. <sup>19</sup> Juda tamo kayau musei, Marta Maria ado maineid laa fen anĩ, waud yo difouf nigin idi gedin disin. <sup>20</sup> Marta Jesus isif ya karĩ ye fen, Jesus fotou fouf nigin ilen, anĩ ere, Maria ĩ fõ bun ibodon.

<sup>21</sup> Marta Jesus irokenen, "Odug, õ ein udobom are, mainou to laa fem. <sup>22</sup> Anĩ ere, aya keleĩ, gamag õ erob taka nigin Negur urokenēf are, ifonõf."

<sup>23</sup> Jesus Marta irokenen, "Nē main baban kel fã youf."

<sup>24</sup> Marta Jesus aiten yale iron, "Aya keleĩ, idikeleya naa kel fãya sain bun, ĩ baban kel fã youf."

<sup>25</sup> Jesus ĩ irokenen, "Aya dogol kel fãya nē ado mata nē. Taka ĩ aya nigin momoi yef are, ĩ mata ibodõf, laa foufeg, ĩ mata ibodõf. <sup>26</sup> Taka ĩ mata ibod ken, aya nigin momoi yef are, ĩ to bagai laa fouf. Õ enei momoi wof de?"

<sup>27</sup> Marta Jesus irokenen, "Momoi, Odug, aya momoi auf, õ Kristus, Negur Naal, teneub enei bun usin."

<sup>28</sup> ĩ agef irokel fen, ĩ kel ile, tura Maria iweigne ken, mugun irokenen. ĩ iron, "Tise yeir, ĩ iweignok." <sup>29</sup> Maria od enei karĩ ye fen, ĩ kaisã bagai fã yale, Jesus garan ilen. <sup>30</sup> Jesus fonõ wõya sã, ĩ fau Marta fotou fiyen modoũ anĩ bun ibodon. <sup>31</sup> Juda tamo kayau, Maria geid, fõ bun dibod ken, ĩ wau wã difenen, ĩ kaisã bagai fã yale, ulõ yeis ile di, dile fen, ĩ matmat bun inã yalouf nigin ilef de fen, dõ difiyen.

<sup>32</sup> Sain Maria Jesus ibodon nē modoũ anĩ bun wõ ye, Jesus ile fen, ĩ ye gariyan kubũ ye fen, iron, "Odug, õ ein ubodom are, mainou to laa fem."

<sup>33</sup> Sain Maria inã yalen ado, Juda tamo kayau Maria geid disin idig inã dalen, Jesus anĩ ile fen, wau fatuk bagai gudũf morõ fen. <sup>34</sup> Jesus to fen, "ĩ nain mũ gen?" Idi diron, "Odug, usi fen, ule."

<sup>35</sup> Jesus ĩ inã yalen.

<sup>36</sup> Age fe di, Juda tamo kayau diron, "Ulegef, ĩ nigin fatuk bagai wau laa fen anĩ!"

<sup>37</sup> Anĩ ere, idi tunĩ diron, "ĩ tamo mala ifofakeleya birikã fedin, tamo enei laa bun ileyã nigin katĩ feleya to kisi feleyan de?"

#### Jesus Lasarus Laa Bun Tamal Turĩ Fen

<sup>38</sup> Jesus baban wau fatuk bagai gudũf fen, matmat bun isin. Matmat are ku, meein nem bobog katĩ difelen. <sup>39</sup> Jesus iron, "Meein waleleg."

Marta, laa tamo nē main iron, "Anĩ ere, Odug, are gama waai sane, ere nigin, ĩ an naa fo ibodon."

<sup>40</sup> Age ye di, Jesus iron, "Õ momoi wof are, Negur nē fula fiya medeĩya ulouf, to age ayon de?"

† Sam 82:6: Negur ĩod enei Juda nē es fiya tamo ifenēdin.

<sup>41</sup> Anī nigin, idi meein are dalelen. Age dife di, Jesus itad fen, iron, “Dei, ò aya karī wiyal nigin, ò de ayok.  
<sup>42</sup> Aya kelein, ò faimud aya karī wiyadig, anī ere, aya tamo kayau yeir difaref nigin od enei orom, are idi onom aya sur wiyān anī momoi douf nigin.”  
<sup>43</sup> Jesus od enei wogō yel fen, ait odug nem iwegin, “Lasarus, ulō weis!”  
<sup>44</sup> Laa tamo, ye, ima gabar masak nem filu difen ado, nawa gabarem sile difen ulō yesi di,  
 Jesus idi irokenēdin, “Gabar waleleg fen, utornēge di, ile.”

### Jesus Dukesiyouf Nigin Od Difon (Matyu 26:1-5; Mak 14:1, 2; Luk 22:1, 2)

<sup>45</sup> Anī nigin, Juda tamo kayau musei Maria gein disin, Jesus ereb age fen anī dile fen, ī nigin momoi den.  
<sup>46</sup> Anī ere, idi tunī Farisia tamo gedīn dile fen, Jesus ereb age fen anī dirokenēdin.  
<sup>47</sup> Anī nigin, pris odudug Farisia tamo geid, katō difouf nigin Juda uyu irouya neid kaunsel guru fiya diwegin.  
 Idi diron, “Ada naig tafouf? Ere nigin, tamo enei memelik musei inodif.  
<sup>48</sup> Ada lo tafe di, ī enei eig fef ilauf are, tamo ganān ī nigin momoi douf, age dife di, neda ibodōya ado teneub, Rom tamom disi dalouf.”  
<sup>49</sup> Age de di, idi atun taka, yana Kaiafas, ī yar anī bun pris neid mudur ibod ken, wogō yen, “Ā ereb taka keleī sā!  
<sup>50</sup> Tamo kayau ganān inanakalauf ban, tamo tekeleim tamo kayau nigin laa fouf, are ā nigin deuf anī, ā to kisi gef.”  
<sup>51</sup> Ī yogon kisi bunem od enei to iron, anī ere, ī yar anī bun pris neid mudur ibodon nigin, profet od wogō yen, Jesus Juda tamo kayau ganān nigin laa fouf yen.  
<sup>52</sup> Are Juda tamo kayau nigin dogol sā, Negur gere tar firagagaū difen anidig, guri feid irosi kuru fedī di, idi tekelei youf nigin, Jesus laa fouf yen.  
<sup>53</sup> Anī nigin, naa anī bunem ilen, idi Jesus dukesiyouf nigin naab dimiren.  
<sup>54</sup> Age dife di, Jesus ī, Juda tamo kayau meleid bun mala yaor to iyon, ī an iminkele fen, teneub akor taka, gerere tuan melsā, fonō yana Efraim ilen, an yogon dō fiya tar geid dibodon.  
<sup>55</sup> Sain anī Juda neid Pasa naa melsā, musei fonō fonō temeleid, dogo neid nonorou lilik fiya nigin, Pasa naa wōya sā mog, Jerusalem diselen.  
<sup>56</sup> Idi Jesus nigin meleid dinof diyon. Idi tempel modoū bun difar fen, abob to difen, “Ā ere kisi gef? Ī Sifa bun to isiyouf de?”  
<sup>57</sup> Anī ere, pris odudug Farisia tamo geid, taka nem Jesus nain be ibodok ya anī ile fen, irokenēdi di, diro-unēf nigin wedereid diroun.

### Betani Oun Jesus Ye Bun Maria Moul Fi Felen (Matyu 26:6-13; Mak 14:3-9)

**12** Pasa nē naa wōya nigin, naa sigis fau ibod mog, Jesus Betani wō yen, an Lasarus ibodon, ī Jesussem laa bun tamal turī fiyen.  
<sup>2</sup> An Jesus nigin waud el fe fen, bō saaf dabin, anī Marta aruna yalen. Idi Jesus geid tebol bun dibodon atun, Lasarus ibodon.  
<sup>3</sup> Age de mog, Maria moul sumeī biya, hap lita nad nem dinon,

are moni odug nē anī yale fen, Jesus ye bun fi fel fen, fatiyam ye waī fen. Age fe di, moul sumeī biyam, fō anī ino yalen.

<sup>4</sup> Anī ere, Judas Iskariot, in dō fiya taka, fau dum im Jesus kiwai imeid bun inouf, im iron,  
<sup>5</sup> “Ere nigin moul sumeī biya enei, na nigin sur fe fen, moni anī maleg tamo to ifenēdiyam? Are yar tekelei bun, kabī tamo nē mala yaledig kilei.”  
<sup>6</sup> Ī maleg tamo nigin kisif fen, enei to iron, ī yogo bē tamo nigin age yen. Ī moni nē kodol lo fiya tamo, moni nē kodol bun dinodig are bē yaledig.

<sup>7</sup> Anī nigin, Jesus iron, “Kayau are utornēg, ī aya mū difiyauf naa nē nigin, moul sumeī biya enei irouwauf.  
<sup>8</sup> Maleg idi, ā geid sain faimud ubodōgouf, anī ere, aya, ā geid sain faimud to tabodōf.”

<sup>9</sup> Age de mog, Juda tamo kayau musei, Jesus an ibodok ya kelei ken, disin, are ī nigin dogol sā, Lasarus Jesussem laa bun tamal turī fiyen īg dilouf nigin.  
<sup>10</sup> Anī nigin, pris odudug Lasarus īg dukesiyouf nigin naab dimiren,  
<sup>11</sup> ere nigin, Lasarus bunem, Juda tamo kayau musei Jesus garan dile fen, ī nigin momoi den.

### Jesus Tamo Yana Ado Gen Jerusalem Ilen (Matyu 21:1-11; Mak 11:1-11; Luk 19:28-40)

<sup>12</sup> Naa anī ile di, tamo kayau musei Sifa bun disin, Jesus Jerusalem isif ya anī karī den.  
<sup>13</sup> Idi pam aarau anā aarau gen anī guri de, Jesus tarabā difiyēf nigin dile fen, diweig diron, “Hosiana! †”  
 “Odug yana bunem isif, ī el fiya ado!” ††  
 “Israel neid King, ī el fiya ado!”  
<sup>14</sup> Jesus donki naal fotou fe fen, teten ibodon, are Negur nē Itotoya eig ye irok kilei,  
<sup>15</sup> “To kumīg, Saion nē tamo kayau, uleg, āgenei king, donki naal teten ibod ken, isif.” ‡  
<sup>16</sup> Uruwa bagai, in dō fiya tar, enei ganān nigin wedereid fokōya san. Dum Negur Jesus fula fiya medeīya ifenē di, enei ī nigin ditoton ado, enei tamo kayau ī bun age difen anī, wedereid fokō yen.  
<sup>17</sup> Tamo kayau Jesus geid difar fen, ī Lasarus matmat bun tamal iweigne ken, laa bun tamal turī fe di, lo difen idim wogagā def, dile di, od iyokelen.  
<sup>18</sup> Tamo kayau musei, Jesus memelik anī inon karī den nigin, ī fotou difiyēf nigin dilen.  
<sup>19</sup> Age dife di, Farisia tamo idi abob dirokenen, “Ulegef, ada kabī ege talegef. Lo gouf are, tamo kayau ganān ī dō difiyek!”

### Jesus Yogon Laa Nigin Iron

<sup>20</sup> Sifa bun Negur yana dalesauf nigin diselen idi atun, Grik tunī difaren.  
<sup>21</sup> Idi Filip Betsaida tamal Galili teneub bun, ī garan disi fen, to difiyē diron, “Tamo biya, amā Jesus mailau fenē.”  
<sup>22</sup> Age de di, Filip ile, Endru iroken ken, uruwom Jesus dirokenen.

<sup>23</sup> Jesus idi irokenēdin, “Negur Tamo Naal fula fiya medeīya ifenēf nigin, sain anī mogo yeir isil.”  
<sup>24</sup> Aya ā

† Anī nē gariya, ‘Usennamā!’ Od anī tamo kayau Negur yana yaleseyā nigin wogō dedig. †† Sam 118:25, 26 ‡ Sekaraia 9:9



momoi bagai arokeneik, wit faat taka teneub bun kubū ye fen, to burauf are, faat tekelei dogol agef ibodōf, anī ere, ī burauf are, faat musei wowā douf.  
<sup>25</sup> Tamo ī yogon mata nigin wau laa fef are, ī mata anī itornēf, anī ere, tamo ī teneub enei bun, yogon mata atorok bagai ye fen, itorok are, ī irounek ile, mata ibodkeleya bun ilauf. <sup>26</sup> Taka ī aya arunau yalef, ī aya dō fiyauf bagai. Aya abodok nē an, neu kabī tamo īg an ibodōf. Taka ī arunau yalef, neu Dei ī yana yalesauf.

<sup>27</sup> "Gama neu wau morok, anī aya ere auf? 'Dei sain enei bun usenna,' auf de? Sā, gariya enei nigin bagai, sain enei bun asin. <sup>28</sup> Dei ogo yanā self kulō!"

Age ye di, ait taka saa ilunem isin, "Aya mogo anī selu abin, aya baban anī selu abiyouf." <sup>29</sup> Tamo kayau an difaren anī karī de fen, diron, kolimei den, tunī diron, engel takam wogō fiyem.

<sup>30</sup> Jesus iron, "Ait enei, ā isenneī di, momoi gouf nigin, aya nigin sā. <sup>31</sup> Gama Negur ī, teneub enei nē tamo kayau es fedif, gama teneub enei nē mudur iruwauf.

<sup>32</sup> Anī ere, aya tenebur tamal dalesnauf sain, aya tamo ganan aya bun, didī afediyouf." <sup>33</sup> Jesus yogo naig fe, laa foug anī ifelnēdiyof nigin, od enei wogō yen.

<sup>34</sup> Tamo kayau aiten dale diron, "Lo bun amā Kristus gai gai ibodōf ya anī karī maun, naig fe di, ō urok, 'Tamo Naal ī dalesnēf bagai?' Ai anī Tamo Naal?"

<sup>35</sup> Age de di, Jesus idi irokenēdin, "Sain naal bagai ā lalan adouf. Ā lalan ado mog, uyōg, anī bunem gugum to irousi kerū yeīf. Tamo ī gugum bun iyok, ī naib ilef are keleī sā. <sup>36</sup> Ā lalan ado mog, āgenei momoiya lalan bun unog, ago gouf, ā lalan gere tar wowā gouf." Jesus od enei wogō yel fen, ī itorneīd ile, iminkelen.

### Juda Tamo Kayau Jesus Nigin Fau To Momoi Den

<sup>37</sup> Jesus idi meleid bun memelik musei inodin, anī ere, idi fau ī nigin to momoi den. <sup>38</sup> Enei are profet Asaia nē od kisi falauf nigin wō yen:

"Odug, aim nemā od nigin momoi yen?"

Aiyai bun Odug nē megeir yaor fen?"

<sup>39</sup> Gariya enei nigin, idi momoiya kisi feleya sā, ere nigin, Asaia baban od enei iron:

<sup>40</sup> "Negur idi meleid ifofa ken,

waud ifofakelen,

anī bunem, idi meledim ileya kisi feleya sā,

waud fokōya kisi feleya sā,

waud faleiya kisi feleya sā, age fiya sam, aya el afe-dim." †

<sup>41</sup> Asaia od enei iron, ere nigin, ī Jesus nē fula fiya medeīya ile fen, ī nigin iron.

<sup>42</sup> Mudur adodo idi atun, museig ī nigin momoi den. Anī ere, Farisia tamo idim Juda neid uub fō bun dirudi-diya nigin kumī de fen, dogo neid momoiya to yaor di-fen. <sup>43</sup> Ere nigin, idi Negurem yeneid yaleseya ban, tamom yeneid dalesauf anī orodidig.

<sup>44</sup> Jesus iweig iron, "Tamo ī aya nigin momoi yef, ī aya nigin dogol to momoi yef, ī aya sur fiyan nigineg momoi yef. <sup>45</sup> Ā aya lo fiyaf, im aya sur fiyan anī ilef. <sup>46</sup> Aya

lalan anī, tenebur ein asin, are taka ī aya nigin momoi yef, ī gugum bun to ibodōf nigin age afen.

<sup>47</sup> "Taka ī neu od karī ye fen, to dō fef, aya ī to es afiyek, ere nigin, aya tamo kayau es fiya nigin to asin, aya kel gei fiya nigin asin. <sup>48</sup> Taka ī aya itorna fen, neu od to irouf, ī nigin es fiya tamo ibodok. Od de wogō aun anim, idikeleya naa bun ī es fiyēf. <sup>49</sup> Ere nigin, aya neu kisi nem to wogō aun, anī ere, Dei aya sur fiyan im, ere anī wogō auf, naig afe wogō auf anī, toli fiya di, wogō aun. <sup>50</sup> Aya keleī, yogon si fiya are mata faimud ibodkeleya bun ileya nē, anī nigin, ereb aya wogō auf, Dei aya wogō auf nigin irokanan kilei bagai, aya wogō auf."

### Jesus In Dō Fiya Tar Yeid Kulo Fedin

**13** Pasa nē Sifa fau wōya sā mog, Jesus kelein, ī teneub enei itor ken, Tama garan ileya nē sain mogo wō yel. Ā yogon tamo tar tenebur ein dibodok anidi nigin wau laa fedig, ī idi nigin wau laa fen are iroule idikeleya bun.

<sup>2</sup> Bō saaf dō mog, Satanem Judas Iskariot, Simon naal namen Jesus kiwai imeid bun ifenēf nigin, kisi mogo ifenen. <sup>3</sup> Tama ī ereb ereb ganan, Jesus ima bun inon, ī Negur bunem isin anī, Negur bun kel ilef, are Jesus ī keleī. <sup>4</sup> Jesus saaf bun ibodon anī fā ye, yogon kolos teten inukeis fen, taul yale, luwa gu fen. <sup>5</sup> Age fel fen, ī naan yale, beī bun yu ken, yogon dō fiya tar yeid kulo fiya gariya inon, agef fen, taul luwa gu fen anim yeid waī fedin.

<sup>6</sup> Jesus Simon Pita garan isi di, ī Jesus irokenen, "Odug, ō aya yeu kulo wou fenē de?"

<sup>7</sup> Jesus Pita aiten yale irokenen, "Ereb aya age afef, ō gama keleī sā, anī ere, fau dum ō keleī youf."

<sup>8</sup> Pita iron, "Aya yeu to bagai kulo wouf."

Jesus Pita irokenen, "Aya ō to kulo ayōf are, ō aya ado nugal fiya sā."

<sup>9</sup> Simon Pita Jesus irokenen, "Odug, agouf are, yeu dogol sā, imau mudurou adog kulo wouf."

<sup>10</sup> Jesus aiten yale iron, "Taka ī naan igukelel, ye dogol kulo foug, bouwa ganan filiya. Ā filiya ba, anī ere, ā ganan sā." <sup>11</sup> Jesus ī aibem kiwai ifenēf anī keleī, anī nigin, ganan filiya sā yen.

<sup>12</sup> Jesus yeid kulof bure fel fen, yogon kolos ifounkel, yogon modoū bun kelen. Agef fen, ī idi to fedin, "Aya ereb ā bun age afel anī, ā wedereī fokō yef de? <sup>13</sup> Ā aya 'Tise' ado 'Odug' gedig, are tutuk, ere nigin, aya de anī.

<sup>14</sup> Aya āgenei Tise ado Odug, ā yeī kulo afel, anī nigin, āg abob ye kulo gouf. <sup>15</sup> Aya malakanon anokeneim, are ā nigin age afel gen, āg ago gouf. <sup>16</sup> Aya ā momoi bagai arokeneik, ferfer takam yogon odug to wal fiyēdig, arū tamom ī sur fiyen to wal fiyēdig. <sup>17</sup> Gama ā enei keleī, anī nigin, enei dōg ago gouf are, ā el yeīf.

### Jesus Ī Kiwai Imeid Bun Inenēf Nigin Iron

(Matyu 26:20-25; Mak 14:17-21; Luk 22:21-23)

<sup>18</sup> "Aya ā ganan nigin to wogō auf. Aya agirnēdin idi, aya keleī, anī ere, enei are Negur nē Itotoya bun yenek anī kisi falauf nigin, 'Taka ī aya urom neu bret moko, ī aya kiwai ifana fen, dā fiyal.' ††

† Asaia 6:10

<sup>19</sup> “Anī fau to wō ye mog, gama aya ā arokeneik, anī bunem, anī wō youf sain bun, aya de Im ya anī momoi gouf. <sup>20</sup> Aya ā momoi bagai arokeneik, taka ayam sur afe di, ī yalef are, ī aya yaleyaf, taka ī aya yaleyaf are, ī aya sur fiyan anī yalef.”

**Jesus Judasem Kiwai Ifenēf Yen**  
(Matyu 26:20-25; Mak 14:17-21; Luk 22:21-23)

<sup>21</sup> Jesus od enei wogō yel fen, ī wau moro ken, kurō feis iron, “Aya ā momoi bagai arokeneik, āgenei takam aya kiwai ifanauf.”

<sup>22</sup> Yogon dō fiya tar idi abob loli difen, ai nigin bagai wogō yef de fen, nene den. <sup>23</sup> Idi neid taka, dō fiya taka Jesus ī nigin wau laa fedig ī, Jesus sirin ibodon. <sup>24</sup> Simon Pita, dō fiya tamo enei mudurem fiye ken, ī iron, “Ī ai nigin irok anī to wiyē.”

<sup>25</sup> Dō fiya tamo anī, Jesus akoron mudur isen ken, to fen, “Odug, ō ai wof?”

<sup>26</sup> Jesus aiten yale iron, “Tamo bret enei beī bun nu afe fen, afenēf anī.” Age ye fen, ī bret nuf fen, Judas Iskariot, Simon naal ifenen <sup>27</sup> Judas bret anī yale di, Satan ī namen ilen.

Jesus Judas irokenen, “Ereb agou fenē, kaisā bagai ago.” <sup>28</sup> Anī ere, saaf bun dibodon anī takam, ere nigin Jesus od enei Judas irokenen anī, kisi to fokō yen. <sup>29</sup> Judas ī moni lo fiya tamo nigin, tunī kisi difen, Sifa nē ereb ereb na yalouf nigin be, maleg ereb ereb ifenē-diya nigin be, Jesusem Judas irokenē di, ilef den. <sup>30</sup> Judas ī bret yale fen, kaisā bagai oreis ilen. Sain anī bō.

**Pita Nē Wa Fiya Nigin Jesus Iron**  
(Matyu 26:31-35; Mak 14:27-31; Luk 22:31-34)

<sup>31</sup> Judas iya ile di, Jesus iron, “Gama Tamo Naal fula fiya medeīya yale di, Negur fula fiya medeīya Tamo Naal bun yalef. <sup>32</sup> Negur fula fiya medeīya Naal bun yalef are, Negur ī fula fiya medeīya Yogo bun Naal ifenēf, fula fiya medeīya anī kaisā bagai Naal ifenēf.

<sup>33</sup> “Neu kesu tar, aya ā geid sain naal bagai tabodōf. Ā aya umirnagauf. Aya Juda tamo arokenēdin kilei, gama ā arokeneik, aya elef nē an, ā isiya kisi feleya sā.

<sup>34</sup> “Aya itāfiya mata afeneik, abob nigin wauī laa foug. Aya ā nigin wau laa fedig kilei, āg abob nigin wauī laa foug bagai. <sup>35</sup> Ā abob nigin wauī laa foug, anī bunem tamo ganan idi keleī youf, ā neu dō fiya tamo tar.”

<sup>36</sup> Simon Pita Jesus to fiyen, “Odug, ō nai ulef?”

Jesus iron, “Aya elef nē an, ō gama aya dō fiyaya kisi feleya sā, anī ere, ō fau dum dō wouf.”

<sup>37</sup> Pita to fen, “Odug, ere nigin gama aya ō dō yōya kisi feleya sā? Aya ō nigin neu mata atorōf.”

<sup>38</sup> Age ye di, Jesus iron, “Ō aya nigin ogon mata atorōf de? Aya ō momoi bagai arokonok, tataro fau kokorok yeya sā mog, ō aya nigin wa wo, towo wouf!”

**Jesus In Dō Fiya Tar Neid Waud Wā Fen**

**14** “Ā wauī to morō yeī. Negur nigin momoi gouf, aya nigineg momoi gouf. <sup>2</sup> Neu Dei nē fō bun

†† Sam 41:9

aab musei ado, age fiya sam are, arokeneim. Aya ese-lef nē an, āgenei modoū dodok afouf. <sup>3</sup> Aya esel, āgenei modoū dodok afel fen, aya ā geid tabodōf nigin, aya kelau gei ayeīf, are āg aya abodok nē an ubodō-gouf nigin. <sup>4</sup> Aya eselef nē naab anī, ā keleī.”

**Negur Bun Ileya Naab, Jesus**

<sup>5</sup> Tomas Jesus irokenen, “Odug, ō narib ulef are, amā keleī sā, anī nigin, naig mafe fen, amā naab anī keleī youf?”

<sup>6</sup> Jesus Tomas irokenen, “Aya dogol naab anī, aya dogol momoi anī, aya dogol mata anī. Taka ī naab taka bunem, Dei wagen to isiyouf, aya bunem dogol. <sup>7</sup> Ā aya keleim are, ā neu Deig keleim. Gama sain enei bun ilauf, ā ī keleī, ī ulegel.”

<sup>8</sup> Filip iron, “Odug, Tamada ufelnamā, anī amā nigin deuf.”

<sup>9</sup> Jesus iron, “Filip, aya ā geid sain meluk tabodon, anī ere, ō aya keleī sā de? Taka ī aya ileyen are Dei ilen. Naig fe di, ō urok, ‘Tamada ufelnamā?’ <sup>10</sup> Aya Dei bun abodok, Dei aya bun ibodok anī to momoi wof de? Od aya wogō ayeik are, aya yug bun tamal sā, are Dei aya bun ibodok ī kabī yalef. <sup>11</sup> Aya Dei bun abodok, Dei ī aya bun ibodok anī, momoi wiyagauf, sāf are, aya kabī aledig bun, momoi wiyagauf. <sup>12</sup> Aya ā momoi bagai arokeneik, taka ī aya nigin momoi yef, ereb aya age afedig, īg age foug, enei age afedig anī wal fiyag age foug, ere nigin, aya Dei gein eselef. <sup>13</sup> Ā ereb taka nigin, aya yanau nem to gouf, aya age afouf, anī bunem, Dei ī Naal bun, fula fiya medeīya yalouf. <sup>14</sup> Ereb taka nigin, aya yanau nem to wiyagauf are, aya age afouf.”

**Jesus Awa Uur Fateul Sur Afouf Yen**

<sup>15</sup> “Ā aya nigin wauī laa foug are, neu itāfiya anī dō gouf. <sup>16</sup> Aya Dei arokenē di, ī Isenneīya taka, ā geid gai gai ibodōf nigin ifeneīf, <sup>17</sup> are momoi nē Awa Uur. Tenebur ein tamo kayau ī to dalouf, ere nigin, idi ī to dilef, to keleī. Anī ere, ā ī keleī, ere nigin, ī ā geid ibodok, ā bun ibodōf. <sup>18</sup> Aya ā madmad gen to atorneīf. Aya ā gein asiyouf. <sup>19</sup> Sain naal bagai ile di, tenebur ein tamo kayau, aya to dileyauf, anī ere, ā uleyagauf. Aya mata abodok nigin, āg mata ubodōgouf. <sup>20</sup> Naa anī bun, aya neu Dei bun abodok, ā aya bun ubodōgef, aya ā bun abodok anī, ā keleī youf. <sup>21</sup> Taka ī neu itāfiya irou dō fef, ī aya nigin wau laa fedig. Ī aya nigin wau laa fedig anī, neu Dei ī nigin wau laa foug, ayag ī nigin wau laaf fen, aya yug ī bun yaor afouf.”

<sup>22</sup> Age ye di, Judas taka (Judas Iskariot anī sā) iron, “Odug, ere nigin ō ogo, amā bun dogol ō yaorōf, tenebur ein tamo kayau bun sā?”

<sup>23</sup> Jesus iron, “Taka ī aya nigin wau laa fef, ī neu od dō foug. Neu Dei ī nigin wau laa foug, anī amā ī gein masi, weim mabodōf. <sup>24</sup> Taka ī aya nigin to wau laa fef, ī neu od to dō foug. Od enei ā karī gef, are aya bun tamal sā, are Dei aya sur fiyan nē od.

<sup>25</sup> “Aya fau ā geid tabod ken, od enei ganan wogō ay-ein. <sup>26</sup> Anī ere, Isenneīya, Awa Uur Fateul anī, Deim aya

yanau nem sur foug, Awa Uur Fateul ĩ, ereb ereb ganan ifelnei ken, aya arokenein anĭ ganan wedereĭ fokōf fen, kisi turĭ foug. <sup>27</sup> Wau inosiya atorkeneik, neu wau inosiya afeneik, aya afeneik are, tenebur ein tamo kayau wau inosiya difeneik gen sã. Ā wauĭ to morō yei ken, kumĭg.

<sup>28</sup> "Aya eig au di, karĭ gel, 'Aya ele fen, ā gein kelau asiyouf.' Ā aya nigin wauĭ laa fem are, aya Dei bun elef anĭ nigin, ā kulĭya adom, ere nigin, Dei ĩ aya wal fiyaya. <sup>29</sup> Anĭ wōya sã mog, aya mogo arokeneim, anĭ bunem, agef wō ye di, ā momoi gouf. <sup>30</sup> Aya ā geid, sain meluk to wogō tauf, ere nigin, teneub enei nē mudur mogo isif. Anĭ ere, ĩ aya lai fiyaya nigin megeir sã, <sup>31</sup> anĭ ere, tenebur ein tamo kayau keleĭ bagai youf, are aya Dei nigin wau laa fef, anĭ nigin, neu Dei irokanan kilei bagai age afedig.

"Fafãg fen, modoũ enei tatorōg.

### Aa Wain Gariya Ado Yogon Were

**15** "Aya aa wain bagai, neu Dei ĩ kabĭ marau. <sup>2</sup> Were aya bun biya to yuk anĭ ganan, Deim kokour falauf, were biya yuk anĭ ganan, Deim dē fe di, biya musei imauf. <sup>3</sup> Aya od wogō ayein anim, ā amuyē sã, ā mogo filiya. <sup>4</sup> Ā aya bun ubodōgouf, ayag ā bun abodōf. Were taka aa wain luwa ado to susu falauf are, yogo biya yūya kisi feleya sã. Age fiya bagai, āg aya bun to ubodōgouf are, biya yūya kisi feleya sã.

<sup>5</sup> "Aya aa wain gariya, ā were. Taka ĩ aya bun ibodō di, ayag ĩ bun abodōf are, ĩ biya musei imauf. Aya utornagauf are, ā ereb taka to ago gouf. <sup>6</sup> Taka ĩ aya bun to ibodōf are, ĩ were diraille di, meti ledig gen. Were age fediya are gei de fen, yã dirarã di, isasaikediyouf. <sup>7</sup> Ā aya bun ubodōge di, neu od ā bun ibodōf are, ereb taka oroyei ken, urokanage di, ifeneĭf. <sup>8</sup> Biya musei ũg fen, neu dō fiya tar wowã gouf are, neu Dei ĩ fula fiya medeĭya yalouf.

<sup>9</sup> "Neu Dei aya nigin wau laa fedig kilei, ayag ā nigin wau laa fedig. Gama ā neu wau laa fiya anĭ bun ubodōg. <sup>10</sup> Aya neu Dei nē ĩtãfiya dō afe fen, yogon wau laa fiya bun abodok kilei, ā neu ĩtãfiya dō gouf are, neu wau laa fiya bun ubodōgouf. <sup>11</sup> Aya enei arokeneim, are neu kulĭya ā namein ibod ken, āgenei kulĭya barikãf nigin. <sup>12</sup> Neu ĩtãfiya are yeir, aya ā nigin wau laa fedig gen, āg abob nigin wauĭ laa foug. <sup>13</sup> Wau laa fiya enei wau laa fiya ganan wal fiya, are yogon mou tar nigin yogon mata itorok anĭ. <sup>14</sup> Ā aya ereb ĩtãfiya arokenein anĭ dōg, ago gouf are, ā neu mou tar. <sup>15</sup> Aya baban ā to ferfer ayeĭf, ere nigin, ferfer ĩ yogon tamo odug nē kabĭ keleĭ sã. Anĭ ere, aya ā neu mou tar ayeim, ere nigin, ereb ereb ganan aya Dei bun karĭ aun anĭ, aya ā afelneim. <sup>16</sup> Āgem aya to ugirnagen, aya ā agirnei ken, uleg, biya ũg fen, biya anĭ ibodkalauf nigin ā ayein. Agog fen, aya yanau nem, ereb taka nigin Dei urokenēge di, ifeneĭf. <sup>17</sup> Enei anĭ neu ĩtãfiya, abob nigin wauĭ laa foug.

### Tenebur Tamo Kayau, Dō Fiya Tamo Tar Nigin Kiwai Difeneĭdiyof

<sup>18</sup> "Tenebur tamo kiwai difeneĭf are, aya ketem kiwai difanan anĭ, ā keleĭ youf. <sup>19</sup> Ā teneub enei nēf are, ā yogon nigin, ā nigin wau laa foug. Anĭ ere, ā teneub enei nē sã, aya ā tenebur tamal gei ayei ken, agirnein. Anĭ nigin, tenebur ein ā kiwai difeneik. <sup>20</sup> Aya od arokenein anĭ, ā karĭ walagauf, 'Ferfer taka yogon odug to wal fedig.' † Idi aya darau difanan are, āg age de darau difeneĭf. Idi neu od dō difen are, idi āgeneig age de dō difoug. <sup>21</sup> Idi enei ganan ā bun age difoug, ere nigin, aya yanau ā ado, are aya sur fiyan idi ĩ keleĭ sã nigin. <sup>22</sup> Aya to asi fen, arokenēdim are, idi mosor sam. Anĭ ere, idi neid mosor nigin to galã dūf. <sup>23</sup> Taka ĩ aya kiwai ifanaf, ĩ neu Deig kiwai ifenek. <sup>24</sup> Taka nem to age fen anĭ, aya idi atun to age afem are, idi mosor sam. Anĭ ere, gama idi memelik dile fen, aya neu Dei ado kiwai difanaman. <sup>25</sup> Anĭ ere, enei, idi neid Lo bun ditoton yenek anĭ, kisi falauf nigin, 'Idi aya mura sã kiwai difanan.' ††

<sup>26</sup> "Awa Uur Isenneĭya are, ayam Dei bun tamal ā bun sur afe di, isiyouf, are momoi nē Awa Uur, Dei bun tamal ulō yeis isi fen, ĩ aya nigin kurō fesiyouf. <sup>27</sup> Āg agog kurō wesigouf bagai, ere nigin, ā aya geid fen, gariya bunem tasin.

**16** "Ā to felu rogouf nigin, od enei ganan mogo ā wogō ayeim. <sup>2</sup> Idi ā Juda neid uub fō bun diruy-eĭf. Takag, sain fau isiyouf bun, taka ĩ ā ideneĭkeis fen, kisi foug, Negur sesewi afiyek youf. <sup>3</sup> Idi enei age difoug, ere nigin, idi Dei keleĭ sã, aya nigineg keleĭ sã. <sup>4</sup> Aya enei mogo arokeneim, are sain isiyouf bun, ā wedereĭ aroud anĭ, karĭ walagauf nigin. Aya enei tetun to arokenein, ere nigin, aya ā geiden.

### Awa Uur Fateul Nē Kabĭ

<sup>5</sup> "Gama aya ĩ sur fiyan gein eselef, anĭ ere, ā takam to aya to fiyaf, 'Ō nai ulef?' <sup>6</sup> Aya enei arokeneim nigin, ā fatuk bagai wauĭ gudū fef. <sup>7</sup> Anĭ ere, aya momoi arokeneik, aya āgenei biya fiya nigin eselef. Aya to eselauf are, Isenneĭya anĭ ā bun to isiyouf, aya eselauf are, aya ĩ, ā bun sur afoug. <sup>8</sup> Sain ĩ isiyouf, tenebur ein tamo kayau bun, mosor nigin, Negur nē madur fiya nigin ado, Negur nē es fiya nigin, idi neid kũ fenēya anĭ yaor fe, faded fediyouf. <sup>9</sup> Mosor are, idi aya nigin to momoi def nigin. <sup>10</sup> Negur nē madur fiya are, aya Dei gein esele di, ā aya to uleyagauf nigin. <sup>11</sup> Negur nē es fiya are, teneub enei nē mudur mogo es fiyen nigin.

<sup>12</sup> "Aya ā irokeneĭya nigin musei biya, anĭ ere, ā gama keleĭya kisi feleya sã. <sup>13</sup> Anĭ ere, sain momoi nē Awa Uur isiyouf bun, momoi nē anĭ ganan bun, im itoneĭf. ĩ yogon kisim to wogō youf, ereb ĩ karĭ yef anĭ wogō youf, agef fen, ereb fau wō youf anĭ irokeneĭf. <sup>14</sup> ĩ neu bun tamal yale fen, ā ifelneĭf, anĭ bunem, aya fula fiya medeĭya ifanauf. <sup>15</sup> Dei nē ganan are neu, anĭ nigin,

† Jon 13:16 †† Sam 35:19; 69:4

aya arom, Awa Uur neu bun tamal yale fen, ã ifelneif aul.

<sup>16</sup>“Sain naal bagai ile di, ã to uleyagauf, agef fen, baban sain naal bagai ile di, aya uleyagauf.”

### In Dõ Fiya Tar Waud Gudũ Fef Are Fau Kulĩ Douf

<sup>17</sup>In dõ fiya tar tunĩ abob dirokenen, “Ere gariya nigin eig ye irok, ‘Sain naal bagai ile di, ã to uleyagauf, agef fen, baban sain naal bagai ile di, aya uleyagauf,’ takag, ‘Ere nigin, aya Dei gein eselef nigin,’ yef?” <sup>18</sup>Idi anĩ fau fau wogõ den, “I ere ye fen, ‘sain naal bagai’ yen? I irok anĩ, amã gariya keleĩ sã.”

<sup>19</sup>Idi enei nigin Jesus to difou fenẽ mog, Jesus anĩ ile fen, idi irokenẽdin, “Aya eig aul anĩ nẽ gariya nigin abob to wiyẽgef de, ‘Sain naal bagai ile di, ã to uleyagauf, agef fen, baban sain naal bagai ile di, aya uleyagauf?’ <sup>20</sup>Aya ã momoi bagai arokeneik, ã fau maruĩ isi fen, wauĩ gudũ foug, tenebur tamo kayau kulĩ de mog. ã wauĩ gudũ foug, anĩ ere, ãgenei wauĩ gudũ fiya falei yel kulĩ youf. <sup>21</sup>Kayau kesu ibodõ fenẽ darau fef, ere nigin, yogon naa wõ yel, anĩ ere, yogon kesu wõ ye di, darau weder tu kelef, ere nigin, kesu tenebur wõ yel nigin kulĩ yef. <sup>22</sup>ãg age fiya, gama ãgenei wauĩ gudũ fiya nẽ naa, anĩ ere, aya baban ailiyeĩ di, ã kulĩ goug, taka nem ãgenei kulĩya to yalelkeneif. <sup>23</sup>Naa anĩ bun, ereb taka nigin ã to, to wiyagauf. Aya ã momoi bagai arokeneik, aya yanau bunem, ereb taka nigin neu Dei to wiyẽgoug are, ifeneif. <sup>24</sup>Uruwa bunem isi gama, aya yanau nem, ereb taka nigin to, to gen. To goug, walogoug, ago goug, ã kulĩya barikãf.

<sup>25</sup>“Aya yaab od wogõ audig, anĩ naa taka isiyoug bun, aya yaab od to wogõ auf, anĩ ere, neu Dei nigin yaor arokeneif. <sup>26</sup>Naa anĩ bun, aya yanau bunem to goug. Aya ã nigin Dei to afiyẽf ya anĩ to arokeneik, <sup>27</sup>ere nigin, ã aya nigin wauĩ laaf fen, aya Negur bun tamal asin anĩ, momoi gedig nigin, Dei ã nigin wau laa fedig. <sup>28</sup>Aya Dei bun tamal ulõ aus fen, tenebur asin, gama aya teneub enei ator ken, Dei bun kelauf.”

<sup>29</sup>Age ye di, Jesus nẽ dõ fiya tar diron, “Gama õ yaor wogõ wof, yaab od nem sã. <sup>30</sup>Gama amã mailef, õ ereb ereb ganan keleĩ, are taka nem to yõf anĩg to tari wodig. Anĩ bunem, õ Negur bun tamal usin anĩ, momoi mauf.”

<sup>31</sup>Jesus aitedin yale iron, “ã gama momoi gef de?

<sup>32</sup>Anĩ ere, naa fau isif, are mogo isil, anĩ bun, ã firaga-gau yeĩ, ãgenei fonõ fonõ yeif. ã aya mugu utorna-gauf. Anĩ ere, aya mugu sã, ere nigin, neu Dei i aya ado.

<sup>33</sup>“ã aya bun wauĩ inosiya adoug nigin, od enei aroke-neim. Tenebur ein ã morõ adoug, anĩ ere, total ado ufaragauf! Aya teneub enei nẽ megeir mogo wal afen.”

### Jesus Yogo Nigin Kosẽ Yen

**17** Jesus od enei wogõ yel fen, saa ilun itad fen, kosẽ yen:

“Dei, naa mogo isil, fula fiya medeĩya õ Naal wenẽ, ago di, õ Naal õ selĩ kulõ foug. <sup>2</sup>Are õ Naal, idi ganan

õ wenen bun, mata faimud ibodkeleya ifenẽdiyoug nigin, tamo kayau ganan lo fediya nẽ megeir õ wenen. <sup>3</sup>Mata faimud ibodkeleya are yeir, õ momoi Negur tekelei ado Jesus Kristus õ sur won anĩ, idi keleĩ youf anĩ. <sup>4</sup>Kabĩ õ wanan anĩ adikelen bunem, tenebur ein aya õ bun fula fiya medeĩya arou asin. <sup>5</sup>Dei, teneub kare fiya sã mog, ada urom fula fiya medeĩya adon anĩ, õ malã bun fula fiya medeĩya anĩ gama wana.

### Jesus In Dõ Fiya Tar Nigin Kosẽ Yen

<sup>6</sup>“Aya teneub enei bun tamal õ wanan idi bun, õ yaor ayon. Idi ogon, anĩ ere, õ idi wanan, ago di, idi ogon od dõ difedig. <sup>7</sup>Gama idi keleĩ, ereb ereb ganan aya wanan are õ bun tamal. <sup>8</sup>Aya od wanan anĩ afenẽdi di, idi dalen. Aya õ bun tamal asin anĩ, idi momoi bagai kelein, idi onom aya sur wiyan anĩ momoi den. <sup>9</sup>Aya idi nigin kosẽ auf. Aya teneub enei nẽ tamo kayau nigin to kosẽ auf, anĩ ere, idi õ wanan anidi nigin kosẽ auf, ere nigin, idi ogon. <sup>10</sup>Neu ganan are ogon, ogon are neu. Idi bunem, aya fula fiya medeĩya alel. <sup>11</sup>Aya tenebur ein to abodõf, anĩ ere, idi fau tenebur dibodok, aya õ gein esef. Dei Fateul, õ yanã wanan nẽ megeir bunem, kulatun wediyoug, anĩ bunem, ada tekelei gen idig tekelei youf. <sup>12</sup>Sain aya idi geid mabodon, õ aya yanã wanan anĩ bunem, kulatun afeid el afen. Taka to fõ yelen, tamo i fõ yalauf nẽ dogol fõ yelen, are Negur nẽ Itotoya kisi falauf nigin.

<sup>13</sup>“Gama aya õ gein esef, neu kulĩya idi namedin barikãf nigin, tenebur ein fau abod ken, od enei arok. <sup>14</sup>Aya ogon od afenẽdi di, teneub enei nẽ tamo kayau idi kiwai difenẽdin, ere nigin, gama aya teneub enei nẽ sã, age fiya gen, idig teneub enei nẽ sã. <sup>15</sup>Aya teneub enei bun tamal walelnẽdiyoug nigin to kosẽ auf, anĩ ere, wadãgen tamo sane isi fen, daũ fediya nigin, kulatun wediyoug anĩ kosẽ auf. <sup>16</sup>Aya teneub enei nẽ sã, age fiya gen, idig teneub enei nẽ sã. <sup>17</sup>Momoi bunem fateul unenẽdiyoug, ogon od are momoi. <sup>18</sup>Õ tenebur ein sur wiyan gen, ayag teneub enei bun sur afiyẽdin. <sup>19</sup>Idi nigin, aya yug adok bagai afonok, are idig momoi bagai dogo adok Negur difenẽf nigin.

### Jesus Momoiya Tamo Kayau Ganan Nigin Kosẽ Yen

<sup>20</sup>“Aya neu kosẽya are idi nigin dogol sã, idi neid od bunem, aya nigin momoi douf anidi nigineg, aya kosẽ auf, <sup>21</sup>idi ganan tekelei youf nigin kosẽ auf, Dei õ aya bun ubodok, aya õ bun abodok gen, idig ada bun dibodõ di, teneub enei nẽ tamo kayau, onom aya sur wiyan anĩ, momoi douf nigin. <sup>22</sup>Fula fiya medeĩya õ wanan anĩ, idi afenẽdin, are ada tekelei gen, idig tekelei youf nigin. <sup>23</sup>Aya idi bun, õ aya bun, are idi tekelei youf nigin, anĩ bunem, onom aya sur wiya fen, aya nigin wau laa fedig gen, idi nigineg wau laa fedig anĩ, teneub enei nẽ tamo kayau keleĩ youf.

<sup>24</sup> “Dei, idi ò aya wanan anidi, aya abodok nē an, aya geid mabodōf anī orouf, are idi neu fula fiya medeīya dilouf nigin, fula fiya medeīya anī teneub kare fiya sā mog, ò aya nigin waū laaf fen, wanan anī.

<sup>25</sup> “Dei madur bagai, teneub enei nē tamo kayau idi ò keleī sā, anī ere, aya ò keleī, neu dō fiya tar idi, onom aya sur wiyan anī keleī. <sup>26</sup> Aya ò anī afelnēdi di, idi ò keleī, ò nigin fau fau afelnēdif alauf, are ò aya nigin waū laa fiya anī, idi bun ibodōf ado, ayag idi bun abodōf nigin.”

### Jesus Dirounen

(Matyu 26:47-56; Mak 14:43-50; Luk 22:47-53)

**18** Jesus od enei wogō yel fen, ī yogon dō fiya tar geid, Kidron naan uus atu dilen. Kidron sitakā kabī taka ibodon, ī yogon dō fiya tar geid, kabī atu dilen.

<sup>2</sup> Kiwai tamo Judas ī modoū anī keleī, ere nigin, sain musei Jesus in dō fiya tar geid an guru difedig. <sup>3</sup> Anī nigin, Judas, kusī tamo tunī ado, tempel lo fiya tamo tunī pris mudur adodo Farisia tamo geid idim sur difedin anidi geif fen, kabier uyu ile di, dilen. Idi yal, lam, kusī nē waila guri de fen, dilen.

<sup>4</sup> Jesus, ī bun wō youf anī ganan keleī, ī iyok ile to fedin, “Ā ai umirnēgef?”

<sup>5</sup> Idi diron, “Jesus Nasaret tamal.”

Jesus iron, “Aya im.” Kiwai tamo Judas, idi geid an difaren. <sup>6</sup> Sain Jesus iron, “Aya im,” ye di, idi soso de dile, tenebur kuku den.

<sup>7</sup> Jesus baban idi to fedin, “Ā ai umirnēgef?”

Idi diron, “Jesus Nasaret tamal.”

<sup>8</sup> Jesus iron, “Aya ā arokeneim, aya im. Aya anī umir-nagauf are, tamo eneidi utornēdig len, dile.” <sup>9</sup> Agef iron are, od Jesus wogō yen anī kisi falauf nigin, “Aya ò wanan anidi taka to folō afelen.” †

<sup>10</sup> Age dife di, Simon Pita ī, dimig adon anī ul feis yale, pris neid mudur nē ferfer weder biya melem salōf iran. Ferfer anī yana Malkus.

<sup>11</sup> Age fe di, Jesus Pita irokenen, “Ogon dimig yogon modoū bun kel uno! Dei aya naan kap ifanan anī, aya to āf de?”

### Jesus Anas Garan Dirou Dilen

<sup>12</sup> Age ye di, kusī tamo, nedi mudur, Juda neid tempel lo fiya tamo geid, Jesus dalen. Idi ī difo ken, <sup>13</sup> Anas garan ket dirou dilen, Anas ī, Kaiafas ne ten, yar anī bun Kaiafas ī pris neid mudur ibodon. <sup>14</sup> Kaiafas im, Juda tamo kayau wedereid irou fen, tamo tekeleim tamo kayau ganan nigin laa fouf, are deuf, yen.

### Pita Jesus Nigin Wa Fen

(Matyu 26:69, 70; Mak 14:66-68; Luk 22:55-57)

<sup>15</sup> Simon Pita, Jesus nē dō fiya tar taka ado, Jesus dō difen. Pris neid mudur, dō fiya tar taka anī keleī, anī nigin, ī Jesus ado, pris neid mudur nē fofomalan kau na-

† Jon 6:39

men dilen. <sup>16</sup> Anī ere, Pita ī serē bobogen ifaren. In dō fiya taka ī pris neid mudur ī nigin keleī, ī baban serē ke len, bobog lo fiya kayau iroken ken, Pita yale irou, nament dilen.

<sup>17</sup> Kabī kayau bobog lo fedig ī, Pita to fiyen, “Ōg be, in dō fiya tamo taka anī sā de?”

Pita iron, “Aya sā.”

<sup>18</sup> Menig nigin, ferfer, tempel lo fiya tamo geid, yā kū de fen, salili de, bouweid diroron. Pita īg weim difar fen, bouwa iroron.

### Pris Neid Mudur Jesus To Fiyen

(Matyu 26:59-66; Mak 14:55-64; Luk 22:66-71)

<sup>19</sup> Fō namen, pris neid mudur, Jesus ī, in dō fiya tar nigin ado, yogon od tai fedin nigin to fiyen.

<sup>20</sup> Jesus solof iron, “Aya tamo kayau atun, mala yaor wogō aun. Aya sain faimud Juda neid uub fō bun be, tempel bun, Juda tamo kayau ganan guru de mog, wogō audig. Aya iminēyan taka to wogō aun. <sup>21</sup> Ere nigin anī aya to wiyaf? Idi aya wogō au di, karī difiyan onou idi to wiyeīd. Ere aya wogō aun, idi keleī.”

<sup>22</sup> Jesus age ye irō di, tempel lo fiya tamo taka non ifaren anim, Jesus wala fāf fen, iron, “Pris neid mudur anī, ò ago urokenēdig de?”

<sup>23</sup> Jesus solof irokenen, “Aya ereb kū fenēya arom are, ò ereb kū fenēya anī urōf. Anī ere, aya momoi arom are, ere nigin ò walau fā wol?” <sup>24</sup> Age ye di, Anas Jesus difon ado, pris neid mudur Kaiafas gein sur fen.

### Pita Jesus Nigin Baban Wa Fen

(Matyu 26:71-75; Mak 14:69-72; Luk 22:58-62)

<sup>25</sup> Simon Pita bouwa irorouk ifar mog, idi ī to difiyan, “Ōg be, in dō fiya tamo taka anī sā de?”

Ī waf fen, iron, “Aya sā.”

<sup>26</sup> Pris mudur nē ferfer taka, ī Pitam weder salōf iran nē sirag anim iron, “Aya ò ī urom kabier to ailiyeim de?” <sup>27</sup> Pita baban waf mog, kaisā bagai tataro kokorok yen.

### Jesus Pailat Mala Bun Ifaren

(Matyu 27:1, 2, 11-31; Mak 15:1-20; Luk 23:1-25)

<sup>28</sup> Age fe di, Juda tamo, Jesus Kaiafas bun tamal dale dirou, Rom gawaman mudur nē fō bun dilen. Are bonime bagai, Juda tamo idi Pasa nē saaf dāf nigin, kal sese de fen, gawaman mudur nē fō namen to dilen.

<sup>29</sup> Anī nigin, Pailat idi gedin ulō yeis isi fen, to fedin, “Ere od ā tamo enei bou bun unogouf?”

<sup>30</sup> Idi solo de diron, “Ī lo wal fiya tamo sam are, amā ò gein to marou masim.”

<sup>31</sup> Pailat idi irokenēdin, “Ā aug ī waleg fen, āgenei lo bun es wiyēg.”

Juda tamo idi Pailat dirokenen, “Amam tamo yukesiya nigin Rom gawaman to yo faman.” <sup>32</sup> Are Jesus ī naig be fe, laa fouf nigin wogō yen anī, kisi falauf nigin agef wō yen.

<sup>33</sup> Age de di, Pailat aaben kel ile, Jesus iweigne ken, to fiyen, “Ō Juda neid king de?”

<sup>34</sup> Jesus solof iron, "Õ ogon kisim od enei urok de, tunim be aya nigin õ dirokono?"

<sup>35</sup> Pailat solof iron, "Aya Juda tamo de? Õ ogon tamo kayaum pris odudug geid, aya bun dirousiyom. Õ ere taka tau agon?"

<sup>36</sup> Jesus iron, "Aya neu tano teneub enei nẽ sã. Aya neu tano teneub enei nem are, neu kabĩ tamo, Juda tamom aya to daleyauuf nigin kusĩ dem. Anĩ ere, neu tano teneub enei nẽ sã."

<sup>37</sup> Age ye di, Pailat Jesus irokenen, "Age fouf, õ king de?"

Jesus solof iron, "Õ ogo yer urok, aya king. Enei nigin aya wõ aun, are momoi anĩ wogõ auf nigin, anĩ nigin, aya tenebur asin. Momoi nẽ ganan, aya karĩ difiyadig."

<sup>38</sup> Pailat to fen, "Ere anĩ momoi?" Age yel fen, ĩ baban Juda tamo gedin serẽ ile, idi irokenẽdin, "Aya ĩ bun mosor taka to ailef. <sup>39</sup> Anĩ ere, ãgenei tobonuneĩ eig fiya, Pasa naa bun, kalabus tamo taka aliskeneĩdig. Ā Juda neid king aliskeneĩf anĩ oroyeik de?"

<sup>40</sup> Idi baban diweig, solo de diron, "Sã, ĩ sã! Barabas anĩ wanamãf!" Barabas ĩ anĩ bẽ tamal.

### Pailat Jesus Aa Tetek Bun Dũf Nigin Iron

**19** Age de di, Pailat Jesus yale fen, irõ di, wagĩ difiyen. <sup>2</sup> Kusĩ tamo malũ duri ado dale, teter tanak kori de fen, ĩ mudur bun kurũ difiyen. Idi gabar kadaũ dale difounne ken, <sup>3</sup> idi baba baban ĩ wagen dile fen, diron, "O Juda neid king gai gai ibodõf!" Age de fen, wala fã difen.

<sup>4</sup> Pailat baban serẽ kel isi fen, Juda tamo irokenẽdin, "Ulegef, aya ĩ bun mosor taka to ailef anĩ, ã keleĩ youf nigin, ĩ ã gein arou asif." <sup>5</sup> Sain Jesus malũ duri kurũ difiyen, gabar kadaũ difounnen ado, serẽ isi di, Pailat idi irokenẽdin, "Tamo are yeir!"

<sup>6</sup> Pris odudug, tempel lo fiya tamo geid, ĩ dile fen, diweig diron, "Aa tetek bun ũf! Aa tetek bun ũf!"

Anĩ ere, Pailat idi irokenẽdin, "Ā aug waleg, aa tetek bun ũg. Aya ĩ bun mosor taka to ailef."

<sup>7</sup> Juda tamo idi solo de diron, "Amã nemã lo ado, lo anĩ kilei ĩ laa fouf, ere nigin, ĩ yogo aya Negur Naal yedig."

<sup>8</sup> Od enei Pailat karĩ ye fen, fatuk bagai kumĩ yen. <sup>9</sup> ĩ baban fõ aaben kel ile fen, Jesus to fiyen, "Õ nain tamal?" Anĩ ere, Jesus aiten to yalen. <sup>10</sup> Pailat Jesus irokenen, "Õ aya od to urokanauf de? Aya õ kafĩ fiya bun tamal yalelnõya nigin megeir ado, õ aa tetek bun inõya nigineg megeir ado anĩ, õ keleĩ sã de?"

<sup>11</sup> Jesus solof iron, "Ilun tamal megeir õ to ifonom are, aya ogon megeir farumen to abodom. Anĩ nigin, tamo taka ĩ aya õ imã bun inenan, ĩ yogon mosor odug bagai, ogon wal fiya."

<sup>12</sup> Jesus Pailat age fiyẽ di, Pailat Jesus kafĩ fiya bun tamal yalishẽf nigin, naab imiren, anĩ ere, Juda tamo idi diweig diron, "Õ tamo enei utornẽ di, ilauf are, õ Sisa † nẽ mou sã. Taka ĩ yogo anĩ king yef, ĩ Sisa kiwai ifenek."

<sup>13</sup> Pailat od enei karĩ ye fen, Jesus serẽ yale irou isi fen, es fiya tamo nẽ sia, Meein Bedu dedig modoũ bun

ibodon (Meein Bedu are, Hibru od nem yana Gabata).

<sup>14</sup> Naa are Pasa Sifa nigin dodok fiya naa, gaa atun age fiya, naa anĩ ilele di, Pasa naa wõ youf.

Pailat Juda tamo idi irokenẽdin, "Āgenei king yeir."

<sup>15</sup> Anĩ ere, idi diweig diron, "Uru uraile! Uru uraile! Aa tetek bun ũ!"

Pailat to fen, "Aya ãgenei king aa tetek bun aũf de?"

Pris odudug solo de diron, "Amã king taka sã, Sisa dogol."

<sup>16</sup> Anĩ nigin, Pailat Jesus aa tetek bun dũf nigin, idi imeid bun inon.

### Jesus Aa Tetek Bun Dun

(Matyu 27:32-44; Mak 15:21-32; Luk 23:26-43)

Anĩ nigin, kusĩ tamo Jesus dalen. <sup>17</sup> ĩ yogon aa tetek faali fe, modoũ Mudur Tuwan (Hibru od nem Golgota dedig) iselen. <sup>18</sup> An idi Jesus aa tetek bun dun, tamo uru idig, ĩ geid aa tetek bun didenen, idi urom si sitakã, Jesus atun.

<sup>19</sup> Pailat irõ di, eig de ditot fen, aa tetek bun degẽ difen: JESUS NASARET TAMAL, JUDA NEID KING. <sup>20</sup> Juda tamo kayau musei itotoya enei diwesen, ere nigin, Jesus aa tetek bun dun modoũ are taun non. Itotoya are Hibru od nem, Rom od nem, Grik od nem. <sup>21</sup> Juda neid pris odudug Pailat dirokono, "To 'Juda neid King' wo utot, anĩ ere, tamo enei yogo aya Juda neid king yen, ago utot."

<sup>22</sup> Pailat aitedin yale iron, "Ereb aya atoton, are de agef ibodõf."

<sup>23</sup> Sain kusĩ tamo Jesus aa tetek bun du ken, Jesus nẽ kolos gei difeid, aiwa adodo foi difen, are teke tekelei kusĩ tamo mugu mugum gei difen, kolos meluk ilon tamal dogol foi fiya sã. Kolos are meluk tekelei tokõ felelya diwan.

<sup>24</sup> Idi abob dirokono, "Ada anĩ to serek tafouf, ada aisaĩ tara ken, aibem yalouf anĩ tailauf."

Negur nẽ Itotoya eig ye irok anĩ kisi falauf nigin, agef wõ yen,

"Neu kolos idi atun foi difeid fen, neu kolos meluk nigin aisaĩ diran." ††

Anĩ nigin, kusĩ tamo idi enei age difen.

<sup>25</sup> Jesus nẽ aa tetek sirin, Jesus sina, sina nẽ tura, Maria Kolopas aiwa, Maria Magdala tamal an difaren.

<sup>26</sup> Sain Jesus mala irã, sina ado in dõ fiya tamo taka ĩ nigin wau laa fedig non difar mog, ileid fen, Jesus ĩ sina irokenen, "Kayau, õ naal yeir." <sup>27</sup> Age ye fen, Jesus yogon dõ fiya tamo irokenen, "Enei ogon sinã." Naa anĩ bunem ilen, dõ fiya tamo enei sinawau yale, yogon fõ bun iroule, kulatun fiyen.

### Jesus Laa Fen

(Matyu 27:45-56; Mak 15:33-41; Luk 23:44-49)

<sup>28</sup> Anĩ dumen, Jesus keleĩ, erab erab ganan mogo gama bure felel, Negur nẽ Itotoya bun ibodok anĩ kisi falauf nigin, Jesus iron, "Aya naan ail fiyaf." <sup>29</sup> Wain makik yag ado an ibodon, idi spons dale, wain bun nu dife, aa hisop were bun dino fen, dales, Jesus sigoron di-

† Rom neid king odug.

†† Sam 22:18

non.<sup>30</sup> Jesus wain makik anī yale fen, iron, “Gama bure.” Age yel fen, guyu kureis, yogon uur itoron.

<sup>31</sup> Gama naa are dodok fiya nē, we fele di, are Sabat naa, Sabat anī are, uub odug. Juda tamo idi, Sabat naa bun, bouweid aa tetek bun ifareya ditorōdig, anī nigin, idi yeid weweur difeid, bouweid gei difalaisiyouf nigin, Pailat dirokenen. <sup>32</sup> Anī nigin, kusī tamo disin, tamo taka ket ye weweur difen, takag age difen, idi Jesus geid, aa tetek bun didenen anidi. <sup>33</sup> Anī ere, idi Jesus wagen disi fen, ī mogo laa fen anī dilen, anī nigin, idi ī ye to weweur difen. <sup>34</sup> Anī fotokar, kusī tamo takam, ot nem Jesus siri gilī fe di, naud naan ado fi felen. <sup>35</sup> Tamo enei ilen im wogō yen, yogon wogōya are momoi, ī keleī, ī momoi wogō yef, are āg momoi gouf nigin wogō yef. <sup>36</sup> Negur nē Itotoya enei kisi falauf nigin agef wō yen, “Yogon tuwa taka to were fouf,” <sup>37</sup> agef fen, Negur nē Itotoya takag irok, “Idi siri gilī difen tamo ī, idim dilouf.” ††

### Jesus Mū Difen

(Matyu 27:57-61; Mak 15:42-47; Luk 23:50-56)

<sup>38</sup> Anī dum, Josef Arimatea tamal, Jesus bouwa buru yalouf nigin Pailat irokenen. Josef ī, Jesus nē dō fiya tamo taka, anī ere, ī Juda tamo nigin kumī ye fen, iminēyan Jesus dō fen. Pailat yo ye di, ī isi, Jesus bouwa yalen. <sup>39</sup> Josef ī Nikodemus ado fen, disin, kulu tamo anim, bō Jesus gein ilen. Nikodemus ī, marasin yana mer (myrrh) aloi (aloe) ado falei difen anī iroulen, anī nē morō teti kilogram age fiya. <sup>40</sup> Idi urom Jesus bouwa dale, marasin ado gabar lalau nem filu difen. Juda neid tamo mū fiya tobonunā bunem age difen. <sup>41</sup> Jesus aa tetek bun dun nē modoū an, kabī taka ado, kabier an, ku mata taka ado, taka an to goro difen. <sup>42</sup> Naa are Juda neid dodok fiya nē naa nigin ado, tokō kug melsā nigin, idi Jesus an goro difen.

### Matmat Gorō Ibodon

(Matyu 28:1-8; Mak 16:1-8; Luk 24:1-12)

**20** Uub nē naa matu Sande bun, bonimei bagai gum ado, Maria Magdala tamal matmat bun ile fen, mala irā, bobog bun meein yaleleya ilen. <sup>2</sup> Anī kayau, Simon Pita, dō fiya taka Jesus ī nigin wau laa fedig anidi gedin gudu ref ile, irokenēdin, “Idi Odug matmat bun tamal dale diroulen, ī nain be dinon, ada keleī sā!” <sup>3</sup> Anī nigin, Pita, dō fiya tamo taka ado, matmat bun dilen. <sup>4</sup> Urom gududu den, anī ere, dō fiya tamo takam Pita wal fe, ī ket matmat bun wō yen. <sup>5</sup> Ī iti ken, fai yen, gabar lalau filu difen anī an yen mog, ilen, anī ere, ī kuren to ilen. <sup>6</sup> Age fe di, Simon Pita dum dō fiyen, wō ye fen, tokō fel, matmat kuren ile, gabar lalau filu difen an yen mog, ilen, <sup>7</sup> mū difen gabar Jesus mudur sile difen anīg ilen. Mudur sile difen gabar are, yogo fire kori fel, gabar lalau filu difen anī firen ibodon. <sup>8</sup> Age fe di, dō fiya tamo taka, ī ket matmat bun wō yen īg, kuren ilen. Ī ile fen, momoi yen. <sup>9</sup> (Jesus laa bun tamal kel fā youf ya, Negur nē Itotoya bun yenek anī, idi fau wedereid fokōya sā.)

### Jesus Maria Magdala Tamal Bun Wō Yen

(Matyu 28:9, 10; Mak 16:9-11)

<sup>10</sup> Age de fen, dō fiya tar, nedi fō bun ke de dilen. <sup>11</sup> Anī ere, Maria matmat serē inā yalef ifaren. Ī inā ado inā ado iti ken, matmat namen fai yen. <sup>12</sup> Agef fen, ī, engel uru kolos lalau adodo, Jesus yenen modoū bun dibod mog, ileidin, taka muduren, taka yen. <sup>13</sup> Idi ī to difiyen, “Kayau, ō ere nigin inā walef?” Maria iron, “Idi neu Odug dale diroulen, ī nain be dinon anī, aya keleī sā.” <sup>14</sup> Age ye fen, ī falei yel, Jesus an ifar mog ilen, anī ere, are Jesusem ya anī to kelein. <sup>15</sup> Jesus iron, “Kayau, ō ere nigin inā walef? Ō ai anī umirnek?” Maria kisi fen, ī kabī lo fedig anim ye fen, irokenen, “Tamo biya, onom ī wale uroulen ouf are, nain be unon anī, aya urokana di, aya ī alouf.” <sup>16</sup> Jesus ī irokenen, “Maria.” Maria ī falei yel, Jesus wage ifen ken, Hibru od nem irokenen, “Raboni!” (anī nē gariya, Tise). <sup>17</sup> Jesus iron, “Aya to urouna, ere nigin, aya Dei gein fau kel iseleya sā. Anī ere, neu turau tar gedin ule urokeneīd, ‘Aya neu Dei, āgenei Temeī, neu Negur, āgenei Negur bun kelau eselauf.’” <sup>18</sup> Anī nigin, Maria Magdala tamal, in dō fiya tar gedin ile irokenēdin, “Aya Odug aile!” Age ye fen, Maria Jesus od enei irokenen anī, idi wogō fiyēdin.

### Jesus In Dō Fiya Tar Meleid Bun Wō Yen

(Matyu 28:16-20; Mak 16:14-18; Luk 24:36-49)

<sup>19</sup> Uub nē naa matu Sande aragau anī bun, Jesus nē dō fiya tar, Juda tamo nigin kumī de fen, sukar kotū difel, aaben guru de dibod mog, Jesus isi, idi atun ifar fen, iron, “Wau inosiya ā ado ibodōf!” <sup>20</sup> Od enī irokel fen, ī ima siri ado idi ifelnēdin. In dō fiya tar idi, Odug dile fen, fatuk bagai kulī den. <sup>21</sup> Jesus baban iron, “Wau inosiya ā ado ibodōf! Dei aya sur fiyan gen, ayag ā sur ayeik.” <sup>22</sup> Age ye fen, idi bun fuu fiyēid fen, iron, “Awa Uur Fateul waleg.” <sup>23</sup> Ā, tamo neid mosor nigin, wedereī tu kalauf are, idi neid mosor nigin weder tu kelef, ā idi neid mosor nigin, wedereī to tu kalauf are, idi neid mosor nigin weder to tu kelef.”

### Jesus Tomas Mala Bun Wō Yen

<sup>24</sup> Anī ere, Jesus in dō fiya tar meleid bun wō yen sain, tuwelf idi neid taka Tomas (yana taka Didimus), idi geid to ibodon. <sup>25</sup> Anī nigin, dō fiya tar tunim ī dirokenen, “Amā Odug mailen!” Anī ere, ī idi irokenēdin, “Aya yogon ima bun tuti ba to ailouf, aya imau gege tuti ba bun to ano fen, aya imau siri bun to anouf, aya to momoi auf.” <sup>26</sup> Uub tekelei ilele di, in dō fiya tar baban fō bun dibodon, are Tomas geid. Sukar kotū difedin, anī ere, Jesus isi, idi atun ifar fen, iron, “Wau inosiya ā ado ibodōf!” <sup>27</sup> Agef fen, Jesus Tomas irokenen, “Ogon imā

† Eksodas 12:46; Namba 9:12; Sam 34:20 †† Sekaraia 12:10

gege ein uno, neu imau uleid. Imã urã siru bun uno. Waũ to ilef isif fouf, momoi dogol wo."

<sup>28</sup> Tomas Jesus irokenen, "Neu Odug, neu Negur!"

<sup>29</sup> Age ye di, Jesus Tomas irokenen, "Õ malam aya uleyaf nigin, momoi wof. Idi meledim to dile fen, momoi def, are el fedif."

<sup>30</sup> Jesus, in dõ fiya tar meleid bun, memelik musei inodin, are buk enei bun itotoya san. <sup>31</sup> Anĩ ere, Jesus ĩ Kristus, Negur Naal anĩ ã momoi ge fen, ĩ yana nigin momoiya bunem, ã mata walogouf nigin enei itoton.

### Jesus Gau Yaleyã Bun Memelik Inon

**21** Anĩ dum, Jesus baban in dõ fiya tar gedim, Taiberias daliyoun † wõ yen. Anĩ eig fe wõ yen. <sup>2</sup> Simon Pita, Tomas (yana taka Didimus), Nataniel Kana tamal Galili teneub bun, Sebedi gere tar ado, dõ fiya tar uru anidim guru de dibodon. <sup>3</sup> Simon Pita idi irokenẽdin, "Aya gau nigin ayõ fenẽ." Idi diron, "Amãg õ geid ta-lauf." Anĩ idi dile, waag bun sosõ den, anĩ ere, bõ anĩ bun, gau taka to dalen.

<sup>4</sup> Bonimeĩ bagai, Jesus maaĩ yerin ifaren, anĩ ere, dõ fiya tar idi, Jesusem ya anĩ to keleĩn.

<sup>5</sup> ĩ idi iweig irokenẽdin, "Mou tar, ã gau taka tau walegel?"

Idi aiten dalen, "Sã."

<sup>6</sup> ĩ irokenẽdin, "Waag siri biya melem kakãg urãg fen, tunĩ gei gouf." Idi age difen sain, idi kakãg dĩ fiya kisi feleya san, ere nigin, gau musei biya.

<sup>7</sup> Anĩ in dõ fiya tamo Jesus ĩ nigin wau laa fedig ĩ, Pita irokenen, "Are Odugem!" ĩ, "Are Odugem," ye di, Simon Pita karĩ ye fen, ĩ kolos teten tamal inũ inon anĩ yale, luwa guf fen, naanũ ifũ iran. <sup>8</sup> In dõ fiya tar tunĩ ganan, waag bun disi, kakãg gau isokosen ado dĩ de dilen, ere nigin, are idi daliyou yeri gerõ sã, hundred mita age fiya. <sup>9</sup> Sain idi kutũ desin, yã kaureya anĩ bun, gau yã bẽ bret tunĩ ado dilen.

<sup>10</sup> Jesus idi irokenẽdin, "Ã gau gama bagai walegel tunĩ urousig."

<sup>11</sup> Simon Pita waag sõ ye fen, kakãg dĩ falaisi, maaĩ yerin irousin. Kakãg are gau odudug isokosen, gau are 153, gai musei biya, anĩ ere, kakãg to kokour fen.

<sup>12</sup> Jesus idi irokenẽdin, "Usig, saaf wõg." In dõ fiya tar kukĩ de fen, takam ĩ to, to fiyen, "Õ aim?" Idi keleĩ, are Odug yogo. <sup>13</sup> Jesus isi, bret yale fen, idi ifenẽdin, gaug

de age fen. <sup>14</sup> Jesus laa bun tamal kel fã ye fen, in dõ fiya tar meleid bun wõ yen are, gama eneim towo fen.

### Jesus Pita Baban Wau Yalen

<sup>15</sup> Sain idi saaf dakas fen, Jesus Simon Pita irokenen, "Simon Jon naal, õ aya nigin fatuk waũ laa fef, tunĩ eneidi neid wal fiya de?"

Pita iron, "Odug, momoi, õ keleĩ, aya õ nigin wau laa fef."

Jesus iron, "Neu sipsip momou ufoutneĩd."

<sup>16</sup> Baban Jesus iron, "Simon Jon naal, õ aya nigin waũ laa fef de?"

Pita solof iron, "Odug, momoi, õ keleĩ, aya õ nigin wau laa fef."

Jesus iron, "Neu sipsip kulatun wiyẽdiyof."

<sup>17</sup> Jesus Pita iroken towo fe fen, iron, "Simon Jon naal, õ aya nigin waũ laa fef de?"

Pita wau moron, ere nigin, Jesus ĩ to fiyẽ towo fen, "Õ aya nigin waũ laa fef de?" Pita iron, "Odug, erob erob ganan õ keleĩ, õ keleĩ, aya õ nigin wau laa fef."

Jesus iron, "Neu sipsip ufoutneĩd. <sup>18</sup> Aya õ momoi bagai arokonok, sain õ gaun, õ naki rel, ogon oroya dõ fen uledig, anĩ ere, sain õ tubau bun, imã walese di, taka nem ifõyo ken, õ to oroyok nẽ an irouleyõf." <sup>19</sup> Pita naig be fe, laaf fen, Negur fula fiya medeĩya ifenẽf anĩ nigin, Jesus od enei iron. Age ye fen, Jesus Pita irokenen, "Aya dõ wiya!"

<sup>20</sup> Pita falei yel fen, dõ fiya taka Jesus ĩ nigin wau laa fedig anĩ, dõ feid mog, ilen. (Tamo enei bõ saaf yõya bun, Jesus akoron mudur isen ken, iron, "Odug, aim anĩ õ kiwai ifonõf?") <sup>21</sup> Sain Pita tamo anĩ ile fen, Jesus to fiyen, "Odug, tamo enei ĩ naig foug?"

<sup>22</sup> Jesus solof irokenen, "Tamo enei mata ibod mog, aya kelauf anĩ aya orouf aufeg, õ nigin ere yok? Õ de aya dõ wiyauf." <sup>23</sup> Enei nigin, dõ fiya tar idi atun, od enei iyokelen, are dõ fiya tamo enei to laa foug den. Anĩ ere, Jesus, tamo anĩ to laa foug ya nigin to iron, Jesus ĩ eig ye iron, "Tamo enei mata ibod mog, aya kelauf anĩ aya orouf aufeg, õ nigin ere yok?"

<sup>24</sup> In dõ fiya tamo enei, anĩ ganan wogõ ye fen, itoton. Amã keleĩ, in od are momoi.

<sup>25</sup> Jesus ĩ erob erob museig age fen. Aya kisi afef, anĩ ganan buk bun ditotlem are, teneub ganan bun mo-dou sam.

† Yana taka are Galili Daliyou.



# APOSEL

## Jesus Saa Ilun Yale Irou Iselen

**1** Teofilus, uruwa buk aya atoton anī bun, Jesus gariya ino, ereb ereb age fen ado ifelnēdif ile, <sup>2</sup> aposel ī igirnēdin anidi Awa Uur Fateul bunem faded fiye keleid fen, Jesus saa ilun iselen nē naa bun, aya anī gan nigin atoton. <sup>3</sup> Ī darau yale fen, laa fen, mata kel fā ye fen, tamo eneidi meleid bun wō yen, agef fen, idi ī mata ibodok ya anī momoi douf nigin, ereb ereb musei age fen. Naa foti anī namen, ī idi meleid bun wō ye fen, Negur tano nigin wogō fiyēdin. <sup>4</sup> Jesus idi geid saaf doko dibod ken, ī idi eig ye fadim yukenēdin, “Ā Jerusalem to utorōgouf, anī ere, ereb aya wogō au di, karī gen, are neu Dei ereb sur afouf yen anī tari gouf. <sup>5</sup> Are Jon ī naan nem dogol igunein, anī ere, naa tunī il-ele di, ā Awa Uur Fateulem naan iguneif.”

<sup>6</sup> Anī nigin, sain idi takai guru de dibod ken, idi ī to difiyen, “Odug, ō sain enei bun, Israel neid tano baban unouf de?”

<sup>7</sup> Jesus idi irokenēdin, “Are Dei ī yogon megeir bunem, sain nanī be naa inon ibodok anī, ā to keleī youf. <sup>8</sup> Anī ere, ā fau sain Awa Uur Fateul ā bun isiyouf are, megeir walogouf, agog fen, ā aya age afen anī nigin wogōg fen, Jerusalem bun, Judia distrik ado Samaria distrik ganan bun ile, teneub idikeleya buneg, aya nigin wogō gouf.”

<sup>9</sup> Ī enei irokel fen, idi meleid bun bagai, ī yale irou iselen, ī lalo bun iminkele di, to dilen.

<sup>10</sup> Jesus iseled di, idi saa ilun ditad se, lo difef den mog, kaisā bagai tamo uru kolos lalau adodo, idi siridin difaren. <sup>11</sup> Idi diron, “Galili tamo ā, ere nigin ein ufareg utadseg fen, saa ilun lo gef? Jesus enei ā bun tamal yale irou, saa ilun iseled, ā ī saa ilun isel mog, ulegel kilei bagai, agef ī kel isiyouf.”

## Judas Fotokar Matias Digirin

<sup>12</sup> Age de fen, idi Moul Arei dedig bun tamal, Jerusalem keku de dilen, Moul Areinem Jerusalem ileya are wan kilomita age fiya, anī nigin, Sabat naa † bun iyōya kisi feleya. <sup>13</sup> Sain idi Jerusalem wō de fen, idi aab ilun dibodōdig nē an diselen, idi eneidim, Pita, Jon, Jems, Endru, Filip, Tomas, Batolomyu, Matyu, Jems Alfeus naal, Simon Selot †† taka, Judas Jems naal. <sup>14</sup> Idi ganan guru de, waud tekelei dino fen, toku kosē dedig, kayau tunī geid, Maria Jesus sina, Jesus tura tar geid.

† Sabat naa anī, Juda neid uub nē naa. †† Juda neid kusī mala taka, idi Rom gawaman ado kusī dedig.

<sup>15</sup> Sain anī bun, Pita, momoiya tamo kayau handred tuwenti age fiya idi atun, ifar fen, iron, <sup>16</sup> “Turau tar, kulu Awa Uur Fateulem Dawid sigoron, Judas ī tamo uyu iroukenēdi di, Jesus dalen ī nigin wogō yen anī, Negur nē Itotoya bun ibodok, are de agef kisi felen. <sup>17</sup> Ī amā nemā taka, ī amā weim kabī enei malen.”

<sup>18</sup> (Judas yogon sane bunem moni yale fen, teneub taka na yalen, an ī kubū ye mudur iten ken, yogon bouwa faraf fen, te galelei adok ulō yesin. <sup>19</sup> Age fe di, tamo kayau Jerusalem dibodon anī ganan, od anī karī den, anī nigin, teneub anī, dogo neid od nem yana dū Akeldama den, anī nē gariya, Naud Teneub.)

<sup>20</sup> Pita wogō tobol fe, irokeneg iron, “Buk Sam bun eig ye itoton,

“Yogon modoū are fonou inouf,

an taka nem to ibodōf, ‡

takag,

“Taka nem ī fotokar yogon kabī yalouf.’ ‡‡

<sup>21</sup> Anī nigin, Odug Jesus ada atun kabī yale ilef isif mog, <sup>22</sup> Jon naan igunēdin sain bunem ile, Jesus ada bun tamal, yale irou iselen sain bun, sain ganan ada weim tabodon anidi taka tagirnef. Are idi eneidi atun, takam Jesus mata kel fāya nigin, ada geid od wogō tauf.”

<sup>23</sup> Anī nigin, idi tamo uru dinenēdin, Josef Basabas dedig (yana taka Jastus), taka Matias. <sup>24</sup> Age de fen, idi kosē de fen, diron, “Odug, tamo ganan neid waud ō keleī, uru eneidi bun, ō aib ugin anī ufelnamā, <sup>25</sup> are Judas ī itor ken, yogon modoū bun ilen anī, ī fotokar aposel kabī yalouf nigin.” <sup>26</sup> Age de fen, idi aisaī dira ken, aisaī Matias wagen kubū yen, anī bunem, Matias ī aposel ilewen baguf weimen.

## Awa Uur Fateul Pentikos Naa Bun Isin

**2** Sain Pentikos naa ‡ isi di, idi ganan modoū tekelei bun, guru de dibodon. <sup>2</sup> Idi an dibod mog, kaisā bagai, ait yau total ado gugu redig gen, saa ilun tamal isi fen, fō aab ino yalen. <sup>3</sup> Idi ereb yā bale gen isi di, dile mog, fara furu feid, idi mugu mugu tetedin ibodon. <sup>4</sup> Age fe di, idi ganan Awa Uur Fateulem aura fiyēdi di, gariya dino, od fire fire bunem wogō den, Awa Uurem fiyēdi di, age difen.

<sup>5</sup> Sain anī bun, Juda tamo Negur nigin momoi den idi, teneub ganan bun temeleid disi, Jerusalem dibodon.

<sup>6</sup> Sain idi ait anī karī de fen, tamo kayau musei idi nene de fen, guru difen, ere nigin, idi mugu mugu dogo neid od bun wogō den anī karī den. <sup>7</sup> Idi fatuk bagai

‡ Sam 69:25 ‡† Sam 109:8 ‡‡ Naa anī are, Pasa naa bunem naa fifti ilele di, wō yedig.

terē de fen, diron, “Tamo od wogō def eneidi ganan, Galili temeleid sã de? <sup>8</sup> Naig fe di, ada mugu mugu, idi neda od bunem wogō de di, karī tauf? <sup>9</sup> Ada fire firen temelada, Patia, Media, Elam kantri, Mesopotamia, Judia distrik, Kapadosia, Pontus, Asia provins, <sup>10</sup> Frigia, Pamfilia distrik, Isip kantri ado Libia distrik tunī Sairini taun non. Amã tunī Rom kantri temelamã, Juda temeleid ado haiden Juda neid momoiya bun falei maun, <sup>11</sup> Krit nuyo ado Arabia distrik. Ada mugu mugu neda od bun, Negur kabī odug age fen anī wogō de di, karī tauf.” <sup>12</sup> Idi terē de nene de fen, abob toti difen, “Eī ere gariya nigin?”

<sup>13</sup> Anī ere, tunī idi weli difiyēid diron, “Idi wain fatuk domō.”

### Pita Tamo Kayau Meleid Bun Wogō Yen

<sup>14</sup> Pita aposel ilewen geid difar fen, ait odugem tamo kayau wogō fiyēdin, “Juda tamo kayau ado ã ganan Jerusalem ubodōgef, utorōg len, aya ã enei faded ay-eīf, kee releg fen, aya wogō auf anī karīg. <sup>15</sup> ã kisi gef, tamo eneidi wain domō gef, age fiya sã, gama eī nain kilok bonimeil! <sup>16</sup> Anī ere, eī are Profet Joel eig ye wogō yen:

<sup>17</sup> “Negur irok, idikeleya naa bun, aya neu Awa Uur, tamo kayau ganan bun gō afalauf. Age afe di, ãgenei kesu, kayau momoul ado, profet od wogō douf,

ãgenei tamo gaũ meleid bun seleulã kurã foug,  
ãgenei tamo tubau dimīdiyof.

<sup>18</sup> Neu ferfer tamo ado kayau geid buneg, aya neu Awa Uur naa anī bun gō afalasi di, idi profet od wogō douf.

<sup>19</sup> Aya saa ilun, memelik fire fire afelnēdiyof, tenebur ein uris anodiyof.

Naud, yã ado, kaa tubutubuya wō youf.

<sup>20</sup> Odug nē Naa odug fula fiya medeīya ado, fau to isi mog,

gaa gugum kele fen,  
ogō naud gen wō youf.

<sup>21</sup> Age fe di, aib taka ī, Odug yana yale iweignēf are, Odug ī kel yalouf.†

<sup>22</sup> “Israel tamo kayau, od enei karīg, ã aug keleī, Negur ã atun, Jesus Nasaret tamal bunem memelik, ereb urug bagai ado, uris inodin, anī bunem Jesus ī Negur rem sur fiyen anī, Negur ã ifelnein. <sup>23</sup> Tamo enei nigin, Negurem ereb ereb wōya sã mog, yogon keleī ado kisi bunem, ī ã imeī bun inon, age fe di, ã tamo sesenem disenneī di, ī laa foug nigin, aa tetek bun tuti nem ūgen. <sup>24</sup> Anī ere, Negur ī laa bun tamal turī fe di, mata kel fã yen, laa nē darau bun tamal yalellen, ere nigin, laa anim ī irounēya kisi feleya sã. <sup>25</sup> Are Dawid ī nigin iron:

“Odug sain faimud malau bun ifar mog, ailedig.

Ī aya imau biyalem ibodok nigin,  
aya to kumī au fen, terē auf.

<sup>26</sup> Anī nigin, neu wau seref fen, sigorou seli abidig,

aya, ereb Negur aya bun biya age foug anī tari afe-dig,

<sup>27</sup> ere nigin, ò neu malaukanon to utornē di, bouwau laa neid modoũ bun ibodōf,

ō ogon Fateuleg to utorō di, bura lauf.

<sup>28</sup> Ō mata bun ileya nē naab ufelna fen,

ō malã bun kulīya barikã wiyauf.††

<sup>29</sup> “Turau tar, aya ã yaor arokeneik, tubuda Dawid ī laa fe di, mū difen. Yogon matmat, ada atun naa enei bun fau ibodok. <sup>30</sup> Anī ere, ī profet taka, anī nigin, ī keleī, Negur wau kuturof fen, Dawid yogon ibor nē tubu tar bun tamal taka, yogon king nē sia bun inenēf nigin irokenen. <sup>31</sup> Dawid ī ereb fau wōya sã mog, anī tetu-nem ile fen, Kristus mata kel fã youf nigin eig ye wogō yen, Ī laa neid modoũ bun to ibodōf, ī bouwag to bura lauf, yen. <sup>32</sup> Negur Jesus enei turī fe di, ī mata kel fã yen anī, amã ganan mailen. <sup>33</sup> Negur ī ima biyalem yalesnē di, Jesus ī, Tama bun Awa Uur Fateul Negur afe-nēif yen anī yale fen, fi felen, are ã gama ulegef ado karī gef anī. <sup>34</sup> Dawid saa ilun to iselen, anī ere, ī iron, “Negur neu Odug irokenen:

“Imau biya melem ubod mog,

<sup>35</sup> ogon kiwai tar

ogon ye inoya nē sawa anodiyof.”† ‡

<sup>36</sup> “Anī nigin, Israel tamo kayau ganan enei keleī bagai youf, Jesus enei ã aa tetek bun ukesigen anī, Negur yogo, Odug ado Kristus inenen.”

<sup>37</sup> Tamo kayau od enei karī de fen, idi waud gudũ fe di, Pita aposel tunī ganan geid dirokenēdin, “Turamã tar, amã naig mafoug?”

<sup>38</sup> Pita solof irokenēdin, “ã mugu mugu wauī falei wog fen, Jesus yana bunem naan igunēī di, ãgenei mosor nigin weder tu kalauf, ago ge di, ege luwa are Awa Uur Fateul walougouf. <sup>39</sup> Promis od are ãgenei, ãgenei kesu tar ado, idi gerō difaref ani ganan neid, are Odug neda Negur iweignēdiyof anī ganan neid.”

<sup>40</sup> Age ye fen, Pita od musei bun, idi wedereid irou fen, totol irokenēdin, “ã aug isenneīf nigin, tamo kayau sane sain enei bun tamal urab uraileg.” <sup>41</sup> Yogon od dalen idi naan igunēdin, age dife di, naa anī bun, tri tausen tamo kayau age fiya, idi neid bun tobol difen.

### Momoiya Tamo Kayau Neid Uyu Kū Fiya

<sup>42</sup> Idi aposel neid ifelnēdiya, uyu kū fiya, saaf weim yōya, kosēya bun, idi neid kisi adok dino fen, age dife fen. <sup>43</sup> Tamo kayau ganan terē de inid ifitin. Age dife di, aposel idi, uris ado memelik musei dinon. <sup>44</sup> Momoiya tamo kayau ganan weim dibod ken, safineid ganan gadō difedig. <sup>45</sup> Safineid na nigin sur difeid fen, taka ī lau fef anī difenēdig. <sup>46</sup> Naa ganan idi toku waud tekelei fen, tempel modoũ bun guru difedig. Idi dogo neid fō fō bun, kulīya ado waud adok an yen ken, weim saaf dōdig. <sup>47</sup> Idi Negur yana dalesedig, tamo kayau ganan, idi nigin biya difiyēdidig, age dife di, Odug naa ganan bun, tamo kayau kel gei feid fen, idi neid bun tobol fedig.

† Joel 2:28-32

†† Sam 16:8-11 ‡ Sam 110:1

### Pita Tamo Nonĩ Tamal Ye Ilolaisin El Fiyen

3 Naa taka bun, Pita Jon ado, tri kilok aragau kosēya sain nigin, tempel bun diselen. <sup>2</sup> Tamo taka sina namen ye ilolaisin gō fen, tempel bobog yana 'Meli Bagai' dedig an faali de diroulen, an naa ganan bun dinenē di, ibod ken, tempel bun dilef anidi moni nigin nonĩ fiyēdidig. <sup>3</sup> Sain Pita Jon ado, tempel namen dilau fenē age dife di, ileid fen, moni nigin irokenēdin. <sup>4</sup> Anĩ ere, Pita Jon ado, ĩ lo difel fen, Pita iron, "Amã lo wamã!" <sup>5</sup> Age ye di, ĩ ereb difanauf ye fen, lo feidlen.

<sup>6</sup> Age fe di, Pita iron, "Silwa be gol are aya sã, anĩ ere, ereb aya ado anĩ, õ afonok, are Jesus Kristus Nasaret tamal yana bunem uyõ." <sup>7</sup> Age ye fen, Pita tamo ima biyalē yale iroune ken, isennē yalesnen, kaisã bagai tamo nē ye guyu totoledin. <sup>8</sup> ĩ gurusã ye ifar fen, iyōya gariya inon. Agef fen, ĩ weim tempel namen dilen, iyõ, gurusã ye fen, Negur yana yalesen. <sup>9</sup> Tamo kayau ganan ĩ iyo ken, Negur yana yalese di, dile fen, <sup>10</sup> idi, im bagai tempel bobog yana 'Meli Bagai' dedig bun ibod ken, nonĩ yedig den. Idi ĩ bun ereb wõ yen anĩ nigin, fatuk bagai terē de fen, inid ifitin.

### Pita Tempel Bun Od Wogõ Yen

<sup>11</sup> Solomon nē Waranda dedig an, noniãya tamo anĩ, Pita Jon ado irounēdi di, tamo kayau ganan terē de fen, gududu de, idi gedin disin. <sup>12</sup> Pita anĩ ile fen, idi irokenēdin, "Israel tamo, ere nigin eneim ã terē yeik de? Ere nigin nemã megeir bunem be, nemã Negur aniniya bunem, tamo enei el mafiyen gen amã lo wamãglef? <sup>13</sup> Abraham, Isak, Jakop idi neid Negur, tubuda tar neid Negur im, yogon kabĩ tamo Jesus fula fiya medeïya ifenen. Ā ĩ dukesiyouf nigin wenēdig fen, Pailat ĩ itornē di, ilauf nigin kisi ino mog, ã Pailat mala bun ĩ nigin wa gen. <sup>14</sup> Ā, ĩ Fateul Madur tamo anĩ wag fen, tamo yukesiya tamo anĩ yaliskeneïf nigin urokenēgen. <sup>15</sup> Ā mata nē gariya anĩ ukesigen, anĩ ere, Negur ĩ laa bun tamal yalesnen. Amã enei mailen nigin wogõ mauf. <sup>16</sup> Jesus yana nigin momoiya bunem, Jesus yana anim, tamo enei ã keleĩ ken, ulegedig anĩ total ifenem. Momoiya ĩ bunem isif anim, tamo enei ã ganan log mog, el fiye keleĩ.

<sup>17</sup> "Turau tar, aya keleĩ, ã āgenei uyu irouya geid, keleĩ sã nigin ago gen. <sup>18</sup> Anĩ ere, enei wõya sã mog, Negur profet ganan bun wogõ yen, are yogon Kristus darau yalouf bagai, anĩ Negurem agef kisi felen. <sup>19</sup> Anĩ nigin, wauĩ falei ge fen, Negur bun uleg, anĩ bunem āgenei mosor isasalau. Ago gouf, wauĩ mata wõya nē sain Odug bunem isi fen, <sup>20</sup> Negur, Kristus ã nigin igirin, are Jesus sur fouf. <sup>21</sup> Jesus fau de saa ilun ibod mog, Negur ereb ereb ganan mata inouf nē sain wõ youf, kulu yogon profet fateul sigoreid bun Negur wogõ yen kilei.

<sup>22</sup> Moses iron, 'Odug āgenei Negur, profet taka aya gen, tamo kayau ã atun wõ ye keneïf. Ā ereb irokenēïf ganan, karĩ gouf bagai. <sup>23</sup> Taka nem profet anĩ to karĩ fiyēf, ĩ tamo kayau atun gai gai gudũf irailauf.' †

<sup>24</sup> "Age fiya gen, profet ganan Samuel bun gariya ino fen, isin idig, gama naa eneidi bun ereb wowã yef isin anĩ nigin wogõ den. <sup>25</sup> Ā profet neid gere tar, Negur āgenei tubuĩ tar geid bar itenēya inon, ã bar itenēya anĩ nē gere tar. Negur Abraham irokenen, 'Ogon ibor bunem, tamo kayau teneub ganan bun el fediyouf.'

††<sup>26</sup> Negur yogon kabĩ tamo yalesne ken, āgenei sane bun tamal, ã mugu mugu ganan falei ge di, el yeĩf nigin, ã bun ket Jesus sur fen."

### Pita Jon Ado Juda Neid Uyu Irouya Meleid Bun Difaren

4 Pita Jon ado, tamo kayau od dirokeneïd mog, pris tunĩ, tempel lo fiya tamo neid mudur, Sadusia tamo tunĩ geid, idi gedin disin. <sup>2</sup> Idi fatuk bagai waud moron, ere nigin, aposel idi tamo kayau difelneïd fen, Jesus laa bun tamal mata kel fã yen anĩ wogõ den. <sup>3</sup> Idi Pita Jon ado dirouneïd fen, aragau nigin idi kalabus bun dinenēdi di, ile we felen. <sup>4</sup> Anĩ ere, od karĩ den idi musei momoi den, momoiya tamo faif tausen age fiya wõ den.

<sup>5</sup> Naa taka di, nedi uyu irouya, mudur adodo, lo ifelnēdiya tamo geid, Jerusalem guru difen. <sup>6</sup> Pris neid mudur Anas an ibodon, Kaiafas, Jon, Aleksanda, pris mudur neid ibor tunĩ ganan idig an dibodon. <sup>7</sup> Idi Pita Jon ado guri de dirousi, atũ difeid fen, to difedin, "Ere megeir bunem be, ere yana bunem enei ago gen?"

<sup>8</sup> Age de di, Pita Awa Uur Fateulem aura fiyen ĩ, idi irokenēdin, "Tamo kayau neid uyu irouya, mudur adodo! <sup>9</sup> Amã gama, tamo ye ilolaisin bun ereb biya age mafe di, naig fe el fiyen nigin to wamãgouf are, <sup>10</sup> ã, Israel tamo kayau ganan geid enei keleĩ youf, ã Jesus Kristus Nasaret tamal aa tetek bun ukesigen, anĩ ere, Negur ĩ laa bun tamal yalesnen, ĩ yana bunem, tamo ã meleĩ bun ifaref enei el fiyen. <sup>11</sup> Tamo are

"meein fõ inoya tamo āgem sane ge fen, utorõgen, anĩ gama monog tor wõ yen." ‡

<sup>12</sup> Taka bun tamo kel gei fiya to ibodok, ere nigin, ada kel gei fadauf nigin, saa farumen yana taka to tamo ifenēdin."

<sup>13</sup> Pita Jon ado skul ileya sã, fonõ tamo, are idi keleĩ, anĩ ere, idi kumĩ sã wogõ de di, dile fen, terē den. Age de fen, idi keleĩ, tamo eneimid Jesus geid diyon. <sup>14</sup> Anĩ ere, tamo el difiyen anĩ, Pita Jon ado geid difar mog, dilen nigin, idi ereb od irõya nigin od sã. <sup>15</sup> Anĩ nigin, Juda uyu irouya neid kaunsel guru fiya anĩ ditor dilauf nigin, idi dirokeneïd, ditor dile di, idi dogo dogol katõ difen. <sup>16</sup> Idi diron, "Tamo eneidi ere naig tafiyēdiyof? Idi memelik enei fire bagai dinon anĩ, Jerusalem dibodok idi ganan keleĩ, are ada wa fiya kisi feleya sã. <sup>17</sup> Anĩ ere, enei, tamo kayau bun to iyokalauf nigin, tamo eneidi Jesus yana bunem taka to wogõ difiyēf nigin, ada wedereid tarouwauf bagai."

<sup>18</sup> Age de fen, idi baban namen diweigneïd, disi di, Jesus yana bunem to bagai wogõ douf be difelnēdiyof nigin, total bagai dirokeneïdin. <sup>19</sup> Anĩ ere, Pita Jon ado solo de dirokeneïdin, "Negur mala bun, Negur dõ fiya ban, ã dõ mayeïf, are tutuk de, sã de anĩ, ã aug es

† Diuteronomi 18:15, 18, 19

†† Jenesis 22:18; 26:4 ‡ Sam 118:22

wog.<sup>20</sup> Ereb amā mailen, karī maun nigin, sigoramā ifōya kisi feleya sā.”

<sup>21</sup> Uyu irouya idi baban kumī od difeneīd le fen, folō difeid le di, dilen. Uyu irouya idi darau ifenēdiya nigin kisi taka to dalen, ere nigin, tamo kayau ganan ereb wō yen anī nigin, Negur yana dalesen. <sup>22</sup> Tamo memelik dino fen, el difiyen are, yar foti wal feseya.

### Momoiya Tamo Kayau Neid Kosēya

<sup>23</sup> Sain Pita Jon ado dalisnēdi di, idi dogo neid tamo kayau bun keku de dile fen, pris odudug mudur adodo geid, od dirokenēdin anī ganan wogō difiyēdin. <sup>24</sup> Idi od anī karī de fen, idi aiteid tekelei dales fen, Negur kosē difiyē diron, “Odug ereb ereb ganan nē Marau, ō saa, teneub, maaī, anidi namen ereb ereb ganan unodin. <sup>25</sup> Tamamā Dawid, ogon kabī tamo sigor bun Awa Uur Fateulem wogō won:

“Ere nigin haiden idi Odug bun seye de fen, tamo kayau idi kiwai nē kisi are ege bagai dinof?

<sup>26</sup> Tenebur nē king idi kusīya nigin dodok difef, uyu irouya tamo guru de fen, Odug bun ado

yogon Kristus bun kiwai dinof.’ †

<sup>27</sup> Momoi, Herod, Pontius Pailat idim, haiden, Israel tamo kayau geid, taun enei bun guru de fen, ogon kabī tamo fateul Jesus ō ogo uginin ī kiwai difenen. <sup>28</sup> Ō ogon megeir ado oroya bunem agef wō youf wo fen, tetun ufon anī kilei, idi age difen. <sup>29</sup> Odug, gama idi dogo neid kumī od dinon anī kisi fen, amā ogon ferfer, ogon od kumī sā megeir ado wogō mauf nigin megeir wanamā. <sup>30</sup> Imā ura ken, dagi el wo, ago fen, ogon kabī tamo fateul Jesus yana bunem memelik uris ado unodiyouf.”

<sup>31</sup> Kosē de bure difel mog, idi guru difen nē modoū anī guyoyō fen. Age fe di, idi ganan Awa Uur Fateulem aura fiyēid fen, toli fedī di, kumī sā Negur nē od wogō den.

### Momoiya Tamo Kayau Dogo Neid Safina Weim Dile Dogolen

<sup>32</sup> Momoiya tamo kayau ganan waud ado kisi tekelein. Taka nem, yogon safina taka to neu mugu yen, anī ere, ereb ereb ganan idi ado are weim dile dogolen.

<sup>33</sup> Aposel idi megeir odug nem, Odug Jesus mata kel fā yen nigin wogō den, age dife di, Negur nē wau ifenēya odug, idi ganan bun ibodon. <sup>34</sup> Age fe di, idi atun taka nem ereb taka to lau fen, ere nigin, teneub be fō adodo anī na nigin sur difeid fen, moni dale dirou disi, <sup>35</sup> aposel imeid bun dinodig, anī gadō de fen, taka ī lau fef anī difenēdig.

<sup>36</sup> Josef, Lewi ibor taka, Saipras nuyo tamal, aposel idi ī anī Banabas dedig (anī nē gariya, Wau Yaleyā Tamo), <sup>37</sup> ī yogon teneub na nigin sur fe fen, moni yale, aposel imeid bun inon.

### Ananias Safira Ado

<sup>5</sup> Tamo taka yana Ananias, aiwa Safira ado, nedi safina taka na nigin sur difen. <sup>2</sup> Ī, yogon aiwa anī ganān keleī mog, moni tunī yogon nigin irou fen, tunī anī yale iroule, aposel imeid bun inon.

<sup>3</sup> Age fe di, Pita iron, “Ananias, naig fe di, Satan waū bun isokose di, Awa Uur Fateul udegne ken, moni teneub nē walen anī tunī ogon nigin urouf? <sup>4</sup> Fau na sur fiya sā mog are ogonen, na nigin sur wol fen, moni areg ogonek. Ere nigin ō waū bun enei ago wouf nigin kisi unol? Ō tamo to udegnēdil, are ō Negur udeg-nem.”

<sup>5</sup> Ananias od enei karī ye fen, ī kubū ye laaf yenen. Ganān od enei karī den, idi kumī tererē den. <sup>6</sup> Age fe di, tamo gaū gaū disi, yogon bouwa sile de, faali de diroule, mū difen.

<sup>7</sup> Tri aua age fiya ilele di, aiwa gober ereb wō yen anī keleī sa ken, isin. <sup>8</sup> Age fe di, Pita kayau to fiyen, “Urokana, ō aiwā ado teneub nē moni de enei kilei walegen de?”

Kayau iron, “Ao, de enei kilei dogol.”

<sup>9</sup> Age ye di, Pita kayau irokenen, “Naig fe di, ō aiwā ado wauī tekelei fen, Odug nē Awa Uur kisi wiyēgel? Ulef, tamo idi ogon aiwā mū difel, idi neid yebureid yer bobogē, ōg idi age de faali de dirouleyōf.”

<sup>10</sup> Agef irokenē di, kaisā bagai, Pita ye gariyan, kayau are kubū ye laa fen. Age fe di, tamo gaū namen disi, kayau laa fel dile fen, faali de diroule, aiwa mū difen sirin mū difen. <sup>11</sup> Sios adok, tamo kayau ganān od enei karī den idi geid, fatuk bagai kumī den.

### Aposel Idi Tamo Kayau Musei El Difedin

<sup>12</sup> Aposel idi tamo kayau atun memelik uris ado musei dinodin. Age dife di, momoiya tamo kayau ganān Solomon nē Waranda bun guru difedig. <sup>13</sup> Tamo kayau idi nigin yeneid dalesedig, anī ere, idi kumī de fen, taka nem idi geid to bagu difen. <sup>14</sup> Anī ere, tamo kayau musei Odug nigin momoi de di, momoiya tamo kayau baba baban tobol fef iselen. <sup>15</sup> Aposel age difef ya anī keleī ken, tamo kayau dagi adodo naabur guri difedi di, fatar bun ado gogoū bun dinenādin, are Pita ile di, yogon burig idi tunī bun irā di, el be fediyouf de fen, age difen. <sup>16</sup> Tamo kayau musei Jerusalem kalilī fiya taun temeideg, dogo neid dagi adodo, kaa sesenem darau difenēdin anidi guri de dirou disi di, idi ganān el difiyēdin.

### Idi Aposel Darau Difenēdin

<sup>17</sup> Age dife di, pris neid mudur ī, yogon katō tura tar are Sadusia tamo geid, kiyeī beberīdin. <sup>18</sup> Idi aposel dirounēid fen, kalabus bun dinenēdin. <sup>19</sup> Anī ere, bō anī bun, Odug nē engel kalabus fō sukar kā feleid, gurif, mayarē disi fen, irokenēdin, <sup>20</sup> “Ulagauf, tempel bun ufareg fen, tamo kayau mata enei nē od ganān urokenēdig.”

† Sam 2:1, 2

<sup>21</sup> Idi irokenēdin kilei, bonimei bagai idi tempel bun dile fen, tamo kayau ifelnēdiya gariya dinon.

Sain pris neid mudur, yogon katō tura tar geid disi di, idi Israel neid uyu irouya ganan neid guru fiya yana Sanhedrin dedig anī diroun, age de fen, idi aposel kalabus bun temeleid guri difeid dirou disiyouf nigin tamo sur difedin. <sup>22</sup> Anī ere, sain kabī tamo kalabus fō bun dilen, aposel an to diledin. Anī nigin, idi keku de dile dirokenēdin, <sup>23</sup> “Amā kalabus fō kotū feleya ado lo fiya tamo bobog bun difar mog, mailedil, anī ere, sukar kā mafel fen, an taka nem to ibod mog maillel.” <sup>24</sup> Od anī karī de fen, tempel lo fiya tamo neid mudur, pris odudug geid, nene de fen, enei bunem naig be fe wō youf de fen, sii fedin.

<sup>25</sup> Age de mog, taka nem isi iron, “Ulegef! Tamo kalabus bun unenēdigen idi tempel bun difar fen, tamo kayau difelnēdif.” <sup>26</sup> Age ye di, tempel lo fiya tamo neid mudur, yogon kabī tamo geid, dile, aposel gei difeid fen, dirou disin. Idi to sibu difiyēid fen, daū difiyēdin, ere nigin, idi tamo kayau meein tulu difiyēdiya nigin kumī difiyēdin.

<sup>27</sup> Idi aposel gei de dirousi, Israel uyu irouya neid guru fiya meleid bun difarnēdi di, pris neid mudur idi to fiyēid <sup>28</sup> iron, “Amā yana enei bunem to ufelnēdigouf nigin, totol bagai katū mayein, anī ere, ā wogō ge di, ā ufelnēdigen anī Jerusalem ganan bun iyokelen, ago ge di, tamo enei nē naud amā bouwamā bun unogef.”

<sup>29</sup> Pita aposel ganan geid aiten dale diron, “Amā tamo aiteid dō fiya ban, Negur ait anī dō mafouf bagai. <sup>30</sup> Jesus laa fouf nigin aa bun useginnēgen, anī ere, tamada tar neid Negurem Jesus laa bun tamal yalesnen. <sup>31</sup> Ī Negurem yalesne ken, ima biyalē neda King, neda Kel Gei Fadaya inenen, are Negurem Israel tamo kayau waud falei fe di, nedi mosor weder tu kalauf nigin age fen. <sup>32</sup> Amā enei mailen anī yaor ma wogō mauf, Awa Uur Fateul, are Negur dō difef anidi ifenēdin, ĩg age fef.”

<sup>33</sup> Idi od enei karī de fen, idi seye de, didenkesiyouf nigin age difen. <sup>34</sup> Anī ere, Farisia tamo taka yana Gamaliel, ĩ lo ifelnēdiya tamo, tamo kayau ganan ĩ yana dalesedig, ĩ guru fiya atun ifar fen, aposel idi sain naal mayarē dinenēdiyof nigin irokenēdin. <sup>35</sup> Age dife di, ĩ idi irokenēdin, “Israel tamo, ā tamo eneidi ereb naig wiyēdigou fenē are, ā kisi el ge waleg le fen, ago gouf. <sup>36</sup> Kulu sain taka bun, Teudas ĩ yogo anī tamo odug ye fen, wō yen, age fe di, fo handred tamo age fiya dō difiyen, anī ere, ĩ dukesi di, yogon dō fiya tar ganan firagagaū dife, ege sa kelen. <sup>37</sup> Tamo enei dumen, Judas Galili tamal, tamo kayau yeneid iweseya sain bun wō ye fen, tamo kayau geif yalen, anī ere, ĩg dukesi di, yogon dō fiya tar ganan firagagaū difen. <sup>38</sup> Anī nigin, enei nigin aya ā arokeneik, tamo eneidi utornēdig len dile! Idi ereb kisi difef be, ereb age difef, are tamo bun tamal ouf are, fau sa kalauf. <sup>39</sup> Anī ere, enei Negur bun tamal ouf are, ā tamo eneidi katū fiyēdiya kisi feleya sā, age fiya ban, ā aug Negur geid kusī gef anī ulogouf.”

<sup>40</sup> Age ye di, idi yogon od diroun. Idi aposel diweig-neīd, namen dile di, wagagā difedin, age de fen, idi ban Jesus yana bunem to wogō douf nigin dirokenēid fen, ditornēdi di, dilen.

<sup>41</sup> Aposel idi kaunsel guru fiya anī ditor dile fen, kulī den, ere nigin, Negur kisi fen, are idi Jesus yana nigin mama dalouf nigin kisi feleya. <sup>42</sup> Naa ganan, tempel bun ado fō bun fō bun dile, toku difelneīd fen, biya od wogō de, Jesus ĩ Kristus den.

### Tamo Sewen Digirnēdin

**6** Sain anī bun, dō fiya tamo kayau musei di, Juda tamo kayau Grik od wogō dedig anidim, Juda tamo kayau Hibru od wogō dedig anidi nauseir difiyēdin, ere nigin, idi neid kayau waab naa ganan saaf gadō fiya bun ditornēdidig. <sup>2</sup> Anī nigin, aposel tuwelf idim, dō fiya tamo kayau ganan kuru difeid fen, diron, “Amam Negur nē od wogōya kabī mator ken, saaf lo fiya kabī malouf, are to biya. <sup>3</sup> Anī nigin, turamā tar, ā atun tamo sewen Awa Uur ado kisi biya barikā nigin yeneid walesegedig anidi ugirnēdig. Kabī enei amā idi bun manouf. <sup>4</sup> Age ma fen, amā, kosēya ado od wogōya kabī bun dogol, kabī totol malouf.”

<sup>5</sup> Od enei karī de fen, idi ganan yo den. Idi digirin, Stiwen, ĩ tamo momoiya ado Awa Uur Fateul barikā, taka Filip, Prokoros, Nikanor, Timon, Pamenas, Nikolas Antiok tamal ĩ Juda neid momoiya bun falei ye fen, Kristus nē momoiya yalen. <sup>6</sup> Age dife fen, idi, tamo anidi aposel wagedin dinenēdi di, aposel idi kosē del fen, imeid tetedin dinon.

<sup>7</sup> Negur nē od iyokelen. Jerusalem an, dō fiya tamo kayau tobol fe, musei biya wowā den. Age dife di, pris musei idig momoiya anī dō difen.

### Idi Stiwen Ka Difen

<sup>8</sup> Stiwen ĩ, Negur nē wau ifenēya ado megeir barikā tamo, ĩ tamo kayau atun memelik uris ado odudug inodin. <sup>9</sup> Anī ere, fefeya yenen, Friman † dedig neid uub fō bun temeleid tamo, are idi Juda tamo Sairini ado Aleksandria taun temeleid ado, Silisia ado Asia provins bun temeleid anidim, Stiwen geid fefe den. <sup>10</sup> Anī ere, Stiwen ĩ kisi biya ado Awa Uur bunem wogō yen anī, idim wal fiyēya kisi feleya sā.

<sup>11</sup> Age fe di, idi iminēyan, tamo tunī eig de dirōf nigin waud dalen, “Stiwen ĩ Moses ado Negur nigin kono fiya od wogō ye di, karī maun.”

<sup>12</sup> Idi od anim, tamo kayau, uyu iroudiya tamo ado, lo ifelnēdiya tamo geid nameid dalesen. Age dife di, idi Stiwen ka dife, Juda uyu irouya tamo neid guru fiya bun diroulen. <sup>13</sup> Idi, tamo tunī idegēya od wogō douf nigin, guri de disi di, diron, “Tamo enei faimud sigor taka to ifōdig, Negur nē tempel enei nigin ado, Moses nē Lo nigin, kiwai od wogō yedig. <sup>14</sup> Ere nigin, amā karī mafiyē mog, ĩ iron, Jesus Nasaret tamal eneim, modou

† Are idi Juda tamo kulu ferfer dibodon, anī ere, idi gama ferfer sā.

enei narī fel fen, Moses nē tobonunā ifanadan anī falei foug yen."

<sup>15</sup> Ganan kaunsel guru fiya anī bun dibodon idi, Stiwen lo difelen, ī nawa engel nawa gen dilen.

### Juda Uyu Irouya Neid Guru Fiya Meleid Bun Stiwen Wogō Yen

**7** Age de fen, pris neid mudur Stiwen to fiyen, "Od wogō den enei, are momoi de?"

<sup>2</sup> Stiwen solof iron, "Turau tar ado Dei geg, karī wiy-ag, tubuda Abraham Haran taun fau ileyā san, Mesopotamia ibod mog, fula fiya medeīya nē Negur ī bun wō yen. <sup>3</sup> Negur Abraham irokenen, 'Ogon teneub ado ogon tamo kayau utorneīd fen, teneub aya afelnōf nē an ulauf.' †

<sup>4</sup> "Anī nigin, ī Kaldia teneub itor ken, Haran ile ibodon. Dum yogon tama laa fe di, Negur ī sur fiyē di, teneub gama ubodōgef enei bun ibodon. <sup>5</sup> Negur Abraham ein teneub taka to ifenen, teneub masak bagaig taka to ifenen. Anī ere, Negur, Abraham ī dumen yogon ibor nē tubu tar geid, teneub anī afenēdiyof yen, anī ere, sain anī bun Abraham ī kesu san. <sup>6</sup> Negur Abraham eig ye irokenen, 'Ogon ibor nē tubū tar, yaū tamo teneub taka bun dibodōf, an idi ferfer dibodōf, fo handred yar to biya difiyēdiyof. <sup>7</sup> Anī ere, aya, idi ferfer dibod ken, aruneid dalef neid teneub darau afenēf, anī dumen, idi teneub anī bun tamal diya disi, modoū enī bun aya arunau dalouf.' †† <sup>8</sup> Agef fen, Negur Abraham bar itenēya nē uris, mulū anī ifenen. Age fe di, Abraham naal Isak wō ye, naa eit ilele di, mulū ifenen, dumen Isak naal Jakop wō yen, Jakop ī tubuda tar tuwelf neid temeid ibodon.

<sup>9</sup> "Tubuda tar, Josef kiyeī difen ken, Josef Isip neid ferfer wō youf nigin, na nē sur difen. Anī ere, Negur ī adon, <sup>10</sup> agef fen, Negur Josef morō ganā bun isenen. Negur ī, Josef Isip nē king Farao mala bun, kisi biya ado wau ifenēya anī ifenē di, Farao ī, Josef Isip teneub ado yogon fō ganā lo fiya nigin uyu irouya inenen.

<sup>11</sup> "Age fe di, Isip teneub ado Kanan teneub ganā bun, naū odug wō ye di, morō odug dalen, age fe di, tubuda tar saaf fotou fiya kisi feleya san. <sup>12</sup> Anī ere, Jakop, Isip oun saaf ado ya karī ye fen, tamada tar urug bagai sur fedin. <sup>13</sup> Idi baban dile di, Josef ī yogo nigin tura tar bun yaor fen, age fe di, Farao ī Josef nē ibor nigin kelein. <sup>14</sup> Anī dumen, Josef, tama Jakop ado yogon ibor ganā Isip dilauf nigin od sur fen, idi ganā sewenti-faif. <sup>15</sup> Age fe di, Jakop Isip ilen, an ī ado tubuda tar gare desin. <sup>16</sup> Idi neid bouweid keku de, Sikem taun guri de diroule, kulu Abraham Sikem oun, Hamor gere tar bun moni nem matmat na yalen anī bun mumā difen.

<sup>17</sup> "Negur Abraham irokenen anī kisi falauf nigin sain dodol mog, Isip oun neda tamo kayau musei biya isoran. <sup>18</sup> Age dife di, king taka ī Josef nigin keleī sā, ī bagam Isip nē king wō yen. <sup>19</sup> Ī ada neda tamo kayau idegneīd fen, darau ifenēdin, are tubuda tar nugo fiyē-

di di, idi neid kesu momou sineid gogū difedif anī, mayarē dirarā di, gare douf nigin age fen.

<sup>20</sup> "Sain anī bun, Moses wō yen, ī Negur mala bun kesu meli bagai. Ogō towō, tama nē fō bun kulatun difen. <sup>21</sup> Sain ī mayarē dinenē di, Farao ne baraim yalen, ī yogon kesu ouf nigin yale iroulen. <sup>22</sup> Moses ī, Isip neid keleī biya adok difelnē di, wogōya bun ado ereb ereb age fediya nigin, tamo megeir ado wō yen.

<sup>23</sup> "Moses ī yogon yar foti mog, ī Israel tura tar ki fediyof nigin kisi fen. <sup>24</sup> Moses ī, idi neid taka Isip tamom to biya fiyē mog, ilen, anī nigin, ī Israel tura isenne ken, aba solof Isip tamo anī yukesin. <sup>25</sup> Moses kisi fen, yogon tamo kayau keleī youf, are Negurem idi kafī fiya bun tamal gei fediyof nigin, ī itonek, anī ere, idi to kelein. <sup>26</sup> We fele di, Israel tamo kusī de mog, Moses wō yen. Ī, idi komo difouf nigin daū gudūf fen, iron, 'Are ā tutur, ere nigin ā abob darau wenēgef?'

<sup>27</sup> "Anī ere, tamo ī, ne tā darau ifenen anim, Moses sur fiyē ira ken, iron, 'Aim ō amā bun, uyu irouya ado es fiya tamo inenon? <sup>28</sup> Ō nor Isip tamo ukesin gen, ay-ag ago unakesiyou fenē de?' <sup>29</sup> Moses od enei karī ye fen, ī Midian teneub bun iya ilen, an ī yaū tamo ibod ken, kesu monog uru adon.

<sup>30</sup> "Yar foti ilele di, engel taka, gerere tuan Sinai Arei non, aa balai duri ado an yā bale namen, Moses bun wō yen. <sup>31</sup> Moses anī ile fen, terefeit yen. Ī tutuk ilouf nigin aa non iyok ile mog, ī Odug nē ait karī yen, <sup>32</sup> 'Aya tubuī tar neid Negur, Abraham, Isak, Jakop idi neid Negur.' †† Moses kumī tererē ye fen, lo fiya itoron.

<sup>33</sup> "Age fe di, Odug Moses irokenen, 'Ogon sendel unukakā, ere nigin, modoū ō ufaref nē are fateul teneub. <sup>34</sup> Momoi, aya neu tamo kayau Isip oun darau fatuk bagai dale mog, ailen. Aya idi neid kaīya karī au fen, idi kafī fiya bun tamal alelnēdiyof nigin asin. Anī nigin, gama usi, aya sur ayō di, Isip kel ulauf.' ††

<sup>35</sup> "Moses enei, idi kulu ī nigin eig de diro ken, ditoron, 'Aim ō amā bun uyu irouya ado es fiya tamo inenon?' De ī anī, Negurem idi uyu iroukenēdiyof nigin ado kafī fiya bun tamal yalelnēdiyof nigin, engel aa balai bun yā bale namen Moses mala bun wō yen anī bunem sur fiyen. <sup>36</sup> Moses ī, tamo kayau Isip temeleid uyu iroukeneīd fen, Isip an, Maaī Giriya bun ado, yar foti gerere tuan, memelik uris ado inodin.

<sup>37</sup> "Moses de anim, Israel tamo kayau eig ye irokenēdin, 'Negur ī, āgenei tamo kayau bun tamal, profet taka aya gen sur feneīf.' ††† <sup>38</sup> Ī, engel Sinai Arei bun wogō fiyen anī ado tubuda tar geid, gerere tuan tamo kayau guru fiya atun ibod ken, mata ibodōya od ifenēdi di, tobol fe isi, ā bun isiyof nigin od anī yalen.

<sup>39</sup> "Anī ere, tubuda tar, Moses nē od dō fiya ditoron. Idi Moses anī ditor ken, Isip kel ileyā nigin waud iron. <sup>40</sup> Age de fen, idi Aron dirokenen, 'Uyu diroukanamāf nigin, waitou uneye kanamādiyof. Ere nigin, Moses enei, Isip tamal gei famā irousin ī bun ereb wō yen are, amā keleī sā.' ††† <sup>41</sup> Sain anī bun, idi idegēya waitou bulmakau lubu dinon. Idi anī bun sesewi dife fen, idi ime-

† *Jenesis 12:1* †† *Jenesis 15:13, 14*

‡ *Eksodas 2:14* †† *Eksodas 3:6* ††† *Eksodas 3:5, 7, 8, 10*  
††† *Diuteronomi 18:15* †††† *Eksodas 32:1*

dim dinon anī nigin seli dabiyou fenē, tar odug dinon.  
<sup>42</sup> Anī nigin, Negur idi itornēdi di, saa ilun nē megeir anī seli dabiyouf nigin folō feid len. Are profet neid buk bun itotoya yenek kilei:

“O Israel tamo kayau, ā gerere tuan oun, foti yar bun, sesewi fiya ado ofa wanagen,

anī ere, ā aya yanau to seli wabigen.

<sup>43</sup> Ā idegēya waitou Molek nē salafat unog fen, āgenei waitou Refan nē barisa yana walesegen, are idegēya waitou ā selid wabidigouf nigin unodigen.

Anī nigin, aya ā āgenei teneub bun tamal alelnei ken, oun Babilon kantri ubodōgouf nigin sur ayeif.†

<sup>44</sup> “Sain neda tubuda tar gerere tuan dibodon, idi Negur nē salafat adon, salafat anī bun Negur ibod ken, od wogō yedig. Salafat are, Negur Moses irokenē di, Negur Moses ifelnen kilei bagai dinon. <sup>45</sup> Neda tubuda tar, salafat dalen anī dirou fen, Josuam uyu irou di, Negur tubuda tar meleid bun haiden irud iraille, diya di, teneub anī dalen an salafat dirou disin. Salafat anī, teneub anī bun ibodon, ile Dawid nē sain bun. <sup>46</sup> Negur Dawid isennē el fe di, Dawid wau el fen, anī Jakop nē Negur ibodōf nē modoū, inim inouf nigin Negur irokenen. <sup>47</sup> Anī ere, Dawid naal Solomon im, Negur nē fō inon.

<sup>48</sup> “Anī ere, Negur Ilun Bagai ī, tamo imedim fō dinof anī bun to ibodōdig, are profet eig ye irok kilei:

<sup>49</sup> “Odug irok, saa are neu king nē sia,

teneub are yeu inoya nē sawa.

Ā ere fō anī aya unokanagauf?

Neu si inoya nē modoū nain ibodok?

<sup>50</sup> Aya imaum eneidi ganan to anodin de?††

<sup>51</sup> “Ā uleī teregein yediya tamo, ā wauī ado wedereī fitok yukeledin! Ā āgenei tubuī tar gen, faimud Awa Uur Fateul dudum wiyēgedig! <sup>52</sup> Tubuī tar profet taka to darau difenen de? Tubuī tar idi, Madur Tamo anī fau isiyouf de fen, wogō den tamo anidig didenkesin. Are gama Madur Tamo anī kiwai wenēg fen, ukesigen. <sup>53</sup> Ā, lo engel bunem kabī bun difenen anī walegen, anī ere, ā anī to dō gen.”

### Stiwen Meein Tulu Difiyen

<sup>54</sup> Idi enei karī de fen, idi nameid fatuk bagai sane fen, ī nigin goboreid kikokō yedin. <sup>55</sup> Anī ere, Stiwen, Awa Uur Fateulem barikā, saa ilun mala ira ken, Negur nē fula fiya medeīya ado Negur ima biya melē Jesus ifar mog, ilen. <sup>56</sup> Agef fen, Stiwen iron, “Ulegef, aya saa kā fele di, Tamo Naal Negur ima biyalē ifar mog, ailef.”

<sup>57</sup> Age ye di, idi aiteid odugem kakaī de, imedim wedereid fitok du ken, idi adok ī garan gududu den. <sup>58</sup> Idi taun tamal Stiwen dī de dirou dile, serē meein tulu difiyen. Age dife mog, Stiwen bou bun od dun idi, nedi kolos dinukaka ken, tamo gaū yana Sol ī ye gariyan gō difen.

<sup>59</sup> Idi Stiwen meein tulu difiyē mog, Stiwen kosē yen, “Odug Jesus, neu uur wale.” <sup>60</sup> Age ye fen, ī ibor itena-

na ken, wade iweig iron, “Odug, mosor age difef enei mala solo to wenēdiyof.” Ī agef irok fen, laa fen.

**8** Sol ī Stiwen dukesiyouf nigin, idi geid waud tekelein.

### Sol Sios Darau Ifenen

Naa anī bun, darau odug Jerusalem sios bun wō yen. Age fe di, momoiya tamo kayau ganan firagagaū dife, Judia ado Samaria distrik bun dilelen, aposel dogol Jerusalem difaren. <sup>2</sup> Negur oroya dō difedig tamo tunī Stiwen mū difel fen, ī nigin waud fatuk gudūf, inā loguren. <sup>3</sup> Anī ere, Sol gariya ino, sios daū fouf nigin age fen. Ī fō bun fō bun ile fen, momoiya tamo kayau geif fen, kalabus bun inenēdin.

### Filip Samaria Ilen

<sup>4</sup> Momoiya tamo kayau firagagaū de dilelen, idi dilelen nē an biya od wogō den. <sup>5</sup> Filip Samaria neid taun taka bun ile fen, an Kristus nigin wogō yen. <sup>6</sup> Tamo kayau, Filip nē od karī den ado ī memelik inodin anī dile fen, idi ganan Filip wogō yen anī bun kisi fatuk dino, karī difiyen. <sup>7</sup> Tamo kayau musei bun tamal, kaa sesen kakaī de ulolō deis diyalelen, ilolaisin musei ado yeid fefu fedin musei el fedin. <sup>8</sup> Anī nigin, taun anī bun kulīya odug adon.

### Idegēya Waitou Kosē Fiyēdig Tamo Simon

<sup>9</sup> Tamo taka yana Simon dedig an ibodon, ī taun anī bun idegēya kosē inodidig, anī bunem Samaria tamo kayau ganan terē fiyēdidig. Ī yogo nigin anī, aya tamo odug yedig. <sup>10</sup> Age fe di, tamo kayau yeneid adodo, yeneid sāsā geid ganan, ī bun kisi fatuk dino karī difiye ken, diron, “Tamo enei, Negur nē megeir, Megeir Odug dedig anī.” <sup>11</sup> Idi ī bun kisi fatuk dino karī difiyen, ere nigin, ī sain meluk idegēya kosē bunem terē fiyēdidig. <sup>12</sup> Anī ere, sain Filip Negur nē tano ado Jesus Kristus yana nigin biya od wogō ye di, idi in od momoi den, age dife di, idi naan igunēdin, tamo ado kayau geid. <sup>13</sup> Simon īg momoi ye di, naan igunen. Agef fen, Filip nain be ilef are, ī dō felef iyo ken, memelik uris ado odudug wō yedin anī ileid fen, terē yen.

<sup>14</sup> Aposel Jerusalem dibodon idi, Samaria tamo kayau, Negur nē od mogo dalen anī karī de fen, idi, Pita Jon ado, idi gedin sur difedin. <sup>15</sup> Idi an wō de fen, Samaria tamo kayau Awa Uur Fateul dalouf nigin kosē den, <sup>16</sup> ere nigin, Awa Uur Fateul idi taka bun fau isiya san, idi Odug Jesus yana bunem naan igunēdin dogol. <sup>17</sup> Age dife fen, Pita Jon ado, imeid idi tetedin dino di, idi Awa Uur Fateul dalen.

<sup>18</sup> Aposel imeid tamo kayau tetedin dino di, tamo kayau Awa Uur ifenēdin, Simon anī ile fen, aposel moni ifenēdiyof nigin agef fen, <sup>19</sup> iron, “Ayag megeir enei wanage di, taka teten imau ano di, Awa Uur Fateul ya-louf.”

<sup>20</sup> Age ye di, Pita ī irokenen, “Ogon moni ō ado inana-kalauf, ere nigin, ō Negur nē ege luwa, Awa Uur Fateul moni nem na yaleya kisi feleya wol. <sup>21</sup> Ō amā nemā

† Amos 5:25-27 †† Asaia 66:1, 2

kabī bun, amā geid katō tekelei sã, nemã kabī taka to walef, ere nigin, Negur mala bun waũ tutuk sã. <sup>22</sup> Ani nigin, sane enei nigin waũ falei wo fen, Odug bun kosē wo. Ō waũ bun kisi agef yenek anī nigin Odug weder tu kalauf be. <sup>23</sup> Ere nigin, ō waũ bun dirikeī bagai fen, mosorem ironok anī ailef.”

<sup>24</sup> Age ye di, Simon solof iron, “Ereb ã wogō gel anī, aya bun to wō youf nigin, Odug kosē wiyēg.”

<sup>25</sup> Pita Jon ado, Odug nē od kurō difeis fen, wogō di-fiyēdin, age difel fen, idi Jerusalem keku de, naab luwen Samaria fonō musei bun biya od wogō de dilen.

### Filip Itiopia Tamo Ado

<sup>26</sup> Odug nē engel Filip irokenen, “Fã wo fen, ō saut melem naab gerere tuan ibodok an ule, naab are Jerusalem isil, Gasa taun wō yen.” <sup>27</sup> Anī nigin, Filip fã ye fen, ilen, luwen Itiopia tamo faat korō feleya anī ĩ ket ile mog, fotou fiyen, tamo are Itiopia nē kuin Kandasi nē safina ganan lo fiya tamo, yana odug ado. ĩ Negur yana yalesauf nigin Jerusalem ilen, <sup>28</sup> ĩ karis bun ibod ken, kel yogon fonō naab yale ile fen, profet Asaia nē buk iwesef ilen. <sup>29</sup> Awa Uur Filip irokenen, “Karis anī garan ule fen, non ufar.”

<sup>30</sup> Age ye di, Filip karis anī garan gududu ye isel, tamo anī profet Asaia nē buk iwes mog, karī ye fen, to fiyen, “Ō uwesef anī nē gariya keleī de?”

<sup>31</sup> ĩ iron, “Tamo takam to faded fiyauf are, naig fe di, aya keleī youf?” Anī nigin, ĩ Filip isel, urom karis bun dibodōf nigin irokenen.

<sup>32</sup> Faat korō feleya tamo are, Negur nē Itotoya bun yenek enei iwesen:

“ĩ sipsip dukesiyouf nigin dirou dilen gen dirou dilen, ĩ, sipsip momou siwi gudū fiya tamo wagen dē yeledig gen,

od taka to wogō yen.

<sup>33</sup> ĩ lai difiye ken, ĩ to tutuk es difiyen.

Taka nem yogon ibor nē tubu tar nigin to wogō youf,

ere nigin, yogon mata tenebur ein dalelen.” †

<sup>34</sup> Faat korō feleya tamo Filip to fiyen, “Profet ai nigin enei wogō yef anī urokana, ĩ yogo nigin de, tamo taka nigin?” <sup>35</sup> Age ye di, Filip Negur nē Itotoya enei bun gariya ino fen, Jesus nigin biya od wogō fiyen.

<sup>36</sup> Idi naab diyok dile fen, naan taka bun disi fen, faat korō feleya tamo iron, “Ulef, naan yeir, erem anī aya naan igunauf nigin katū fiyaf?” ††<sup>38</sup> Age ye fen, ĩ karis irou dē yalauf nigin irokenen. Age fe di, ĩ Filip ado kututū deis, naanū disil fen, Filipem naan igunen.

<sup>39</sup> Sain idi naanū tamal disele di, Odug nē Awa Uur Filip yale irou ilen, age fe di, faat korō feleya tamo Filip baban to ilen, anī ere, ĩ kulīya odug ado naab iyok ilen.

<sup>40</sup> Anī ere, Filip Asdot taun wō ye, naab iyok ile fen, taun ganan bun biya od wogō yef ile, Sisaria taun wō yen.

### Sol Wau Falei Yen

(Aposel 22:6-16; 26:12-18)

<sup>9</sup> Sain anī bun, Sol ĩ fau fau Odug nē dō fiya tar idenkesiya nigin wau ifokel fen, kumī ifenēdif isin. Anī nigin, ĩ pris neid mudur garan ile fen, <sup>2</sup> Damaskus taun oun Juda neid uub fō fō bun pas itotkenēdiyof nigin irokenen, are ĩ an Odug nē naab dō difef anidi, tamo be kayau be, taka fotou fiyēf are, ifokel yale, Jerusalem irou ilauf nigin age fen. <sup>3</sup> Sol ĩ ile Damaskus wō you fenē mog, kaisã bagai, fula fiya taka saa ilun tamal, ĩ bun fulaf irailen. <sup>4</sup> Age fe di, ĩ tenebur kubū ye isil fen, ait taka wogō fiyē mog, karī yen, “Sol, Sol, ere nigin ō aya daig wiyaf?”

<sup>5</sup> Age ye di, Sol to fen, “Odug, ō aim?”

ĩ iron, “Aya Jesus, ō daig wiyaf anim. <sup>6</sup> Fã wale fen, taun ule, an ō ereb ago wouf nigin irokonōf.”

<sup>7</sup> Tamo tunī Sol geid dilen idi, an terefeit de mã, mutū difaren. Idi ait karī den, anī ere, aib taka to dilen. <sup>8</sup> Sol tenebur tamal fã yale, mala birikã felen, anī ere, ĩ ereb taka ileya kisi feleya san. Anī nigin, idi ima gim de, Damaskus diroulen. <sup>9</sup> ĩ naa towo lo fiya kisi feleya san, agef fen, saaf ado naaneg to yon.

<sup>10</sup> Damaskus an, dō fiya tamo taka yana Ananias ibodon. ĩ mala seleulã kurã fen sain, Odug ĩ irokenen, “Ananias!” fiyē di,

ĩ iron, “Odug, aya yeir.”

<sup>11</sup> Odug Ananias irokenen, “Fã wale, naab yana Naab Madur dedig an, Judas nē fō bun ule fen, tamo taka Tasus tamal, yana Sol nigin to wouf. ĩ kosē yef ibodok. <sup>12</sup> ĩ mala seleulã kurã fen, tamo taka yana Ananias isi, baban mala lo fouf nigin ima teten ino mog, ilen.”

<sup>13</sup> Ananias solof iron, “Odug, aya tamo enī nē od, Jerusalem oun ogon tamo kayau fateul daig fiyēdin, are museim mogo dirokana di, karī aun. <sup>14</sup> ĩ, tamo kayau ganan ō yana seli dabidig anidi, kafī fiya bun inenēdiyof nigin, pris odudug bun tamal megeir yale fen, ein isin.”

<sup>15</sup> Anī ere, Odug Ananias irokenen, “Ō ulauf, tamo enei are, neu yanau, haiden, dogo neid king ado, Israel tamo kayau bun irou ilauf nigin agirnen. <sup>16</sup> ĩ aya yanau nigin darau naig be fiya yalouf are, fau aya yug afelnēf.”

<sup>17</sup> Age ye di, Ananias fō anī bun ilen, aaben ile fen, ima Sol teten ino fen, iron, “Turau Sol, Odug Jesus ō ein usi mog, naabur ō bun wō yen ĩ, ō baban malã kelē wol fen, Awa Uur Fateul aura yōf nigin sur fiyal.”

<sup>18</sup> Kaisã bagai, Sol mala bun tamal, ereb gau genī gen anī kuku ralaisin, age fe di, ĩ baban mala kelē yelen. ĩ fã yale di, naan igunen. <sup>19</sup> Age fel fen, saaf yō di, ĩ bouwa baban total kel yalen.

### Sol ĩ Damaskus Ado Jerusalem An Biya Od Wogō Yen

Sol ĩ, Damaskus an, naa tunī dō fiya tar geid dibodon. <sup>20</sup> ĩ kaisã bagai gariya ino, Juda neid uub fō fō bun od wogō ye iron, Jesus ĩ Negur Naal yen. <sup>21</sup> Idi ganan ĩ karī difiyen idi terē de fen, to difen, “Im anī, Jerusalem oun Jesus yana diweignēdig tamo kayau tadū fedin anī

† Asaia 53:7, 8 †† Itotoya dum ditoton tunī eig ye irok: fiyaf?  
37 \* Age ye di, Filip ĩ irokenen, “Ō waũ adok momoi youf are, ō naan agunōf.” Faat korō feleya tamo solof iron, “Aya momoi auf, Jesus Kristus ĩ Negur Naal.”



sā de? Im anī, tamo kayau ifofā, pris odudug gedin irou ilauf nigin isin anī sā de?" <sup>22</sup> Anī ere, Sol nē od wogōya totolef ilen, agef fen, Jesus anī Kristus ye yaor fe, wogō ye di, Juda tamo idi Damaskus dibodon anidi, yogon od solo fiyēya kisi feleya sā.

<sup>23</sup> Naa musei ilele di, Juda tamo idi, Sol yukesiya nigin kisi katō difen, <sup>24</sup> anī ere, Sol idi kisi dinon are kelein. Idi Sol dukesiyouf nigin, naa ganan bō ado gaa ado, taun nē kau bobog bun ololo difiyen. <sup>25</sup> Anī ere, bō taka bun, in dō fiya tar ī dale, karam bun dife fen, kau kurenem folo folō dife di, tenebur isilen.

<sup>26</sup> Sain Sol Jerusalem ile fen, dō fiya tar geid weim bagu difouf nigin age fen. Anī ere, idi Sol ī dō fiya tamo taka wō yen anī to momoi de fen, ganan ī nigin kumī den. <sup>27</sup> Anī ere, Banabas ī Sol yale, aposel gedin iroule fen, Sol ī naab luwen Odug ile di, ī wogō fiyen ado, Sol Damaskus oun, kumī sā Jesus yana bunem wogō yen anī, aposel faded fedin. <sup>28</sup> Anī nigin, Sol idi weim dibod ken, Jerusalem oun karika bagai iyo ken, Odug yana bunem, kumī sā biya od wogō yef iyon. <sup>29</sup> Ī Juda tamo Grik od wogō dedig anidi geid, od wogō de fefe den, ani ere, idi ī dukesiyouf nigin age difen. <sup>30</sup> Kabī tura tar enei kelei ken, idi ī dale, Sisaria taun dirou dilen, anenem Tasus taun sur de dirā di, ilen.

<sup>31</sup> Anī nigin, sios an Judia, Galili ado Samaria teneub ganan bun, idi wau inosiya sain biya ado fen, megeir ifenēdin. Idi Awa Uur Fateul nem waud yalese di, Odug nigin aniniya ado dibodok dile di, momoiya tamo kayau musei len.

### Ainias Dokas Ado

<sup>32</sup> Pita ī modoū ganan iyokelen, agef fen, ī Lida tau-neg Negur nē tamo kayau ki fediyouf nigin ilen. <sup>33</sup> Pita, an tamo taka yana Ainias bouwa ilolaisin, ī yar eit fata-ren yenēyai yedig fotou fiyen. <sup>34</sup> Pita Ainias irokenen, "Ainias, Jesus Kristus ō el yok. Fā wale fen, ogon bedu madur wo." Kaisā bagai, Ainias fā yalen. <sup>35</sup> Tamo kayau, Lida taun ado Saron fonō dibodon idi ganan ī dile fen, waud falei ye, Odug nigin momoi den.

<sup>36</sup> Jopa an, dō fiya kayau taka, yana Tabita (anī Grik od bun Dokas dedig) ibodon. Ī faimud tobonunā biya inodidig ado maleg isennēdidig. <sup>37</sup> Sain anī bun, Tabita dagi yale fen, laa fen. Ī laa fe di, yogon bouwa buru naan digune kel, fō aab ilun dinenē di, yenen. <sup>38</sup> Lida taun are Jopa taun non. Anī nigin, dō fiya tar, Pita Lida ibodok yeya karī de fen, tamo uru sur dife di, ī gein dile, total bagai dirokenen, "Kaisā bagai talauf!"

<sup>39</sup> Anī nigin, Pita idi geid dile, an ulō yesi di, idi Pita fō aab ilun dale dirou diselen. Kayau waab ganan an Pita salili difiye ken, idi inā dale fen, Dokas ī fau matan ibod ken, kolos ado saket iwadin anī ganan difelnen.

<sup>40</sup> Anī ere, Pita idi ganan mayarē sur feid fen, ī ibor bobou fe kosē yen. Agef fen, ī falei yel, kayau nē bouwa buru irokenen, "Tabita, fā wale." Kayau ī mala birikā feid, Pita ile fen, fā yale ibodon. <sup>41</sup> Age fe di, Pita kayau ima irou yalesnē di, ī fā ye ifaren. Age fel fen, Pita, momoiya tamo kayau ado kayau waab geid iweignēd fen, Dokas ī mata kel fā yel anī ifelnēdin. <sup>42</sup> Pita

enei age fen are, Jopa taun ganan od iyokelen, age fe di, tamo kayau musei Odug nigin momoi den. <sup>43</sup> Pita Jopa an, gaar gabar el fiya tamo yana Simon dedig ī ado, naa musei dibodon.

### Konelius Pita Bun Od Sur Fen

**10** Sisaria taun oun, tamo taka yana Konelius ibodon, ī wan handred kusī tamo neid orowa taka, 'Itali kusī tamo mala' dedig anī bun tamal. <sup>2</sup> Ī Rom tamal, Juda tamo sā, anī ere, Negur yana yalesedig, agef fen, ī yogon ibor adok geid, Negur nigin anini dedig. Ī Juda maleg tamo musei isennēdidig, takag, ī toku Negur kosē fiyēdig. <sup>3</sup> Naa taka bun tri kilok aragau age fiya, Konelius ī mala seleulā kurāf fen, ī yaor bagai ilen, Negur nē engel isi fen, irokenen, "Konelius!"

<sup>4</sup> Konelius kumī ado lo fiyekel fen, ī to fen, "Odug, ere?"

Engel ī irokenen, "Ogon kosē ado wau sā maleg tamo bun agodig are, Negur wagen sesewi fiya gen iseled di, Negur wau kulī yen. <sup>5</sup> Gama tamo tunī Jopa taun sur wodi di, dile, tamo taka yana Simon, Pita dedig dirou disiyouf. <sup>6</sup> Ī gaar gabar el fiya tamo Simon ado dibodok, Simon nē fō are maaī yerin ibodok."

<sup>7</sup> Engel Konelius od wogō fiyekel fen, ī itornē di, Konelius yogon kabī tamo uru ado kusī tamo taka iweignēdin, kusī tamo are Negur yana yalesedig ado Konelius aruna daledig anidi taka. <sup>8</sup> Konelius ī, ereb wō yen anī ganan irokeneid le fen, Jopa taun sur fedin.

### Pita Mala Seleulā Kurāf Fen, Ilen

<sup>9</sup> Naa anī ile di, idi naab diyok dile, Jopa taun kelē di-fiyē mog, Pita kosē youf nigin, fō sokoron iselen, are gaa atun age fiya. <sup>10</sup> Pita ī naū fe di, ereb taka yōya nigin oron. Saaf dodok dife mog, ī mulā fe di, yen mog, mala seleulā kurā fen. <sup>11</sup> Ī, saa kā fele di, anenem ereb taka gabar odug gen, iri aiwa adodo kaleya bun irou fen, tenebur folō fele di, isil mog, ilen. <sup>12</sup> Anī namen, gaar fire fire yeid imeid adodo, gaar luwedim diyōdig ado, ninā ilun temeleid dibodon. <sup>13</sup> Anī ait taka Pita irokenen, "Pita, fā wale, udenkeis fen, wō."

<sup>14</sup> Anī ere, Pita iron, "Odug, sā bagai! Aya sesen amuyē adodo yōya nigin katū difaman taka to bagai ōdig."

<sup>15</sup> Ait anī baban Pita wogō fiyen, "Ereb taka Negur ī amuyē sā inon anī, to amuyē ado wouf."

<sup>16</sup> Agef towo fe fen, kaisā bagai gabar kel yale, saa il-irou iselen.

<sup>17</sup> Pita mala seleulā kurāf fen, ilen anī nē gariya nigin, nene ye kisif mog, Konelius tamo sur fedin idi, Simon nē fō nain be ifaref anī to dife kelei ken, dile, fō bobogē difaren. <sup>18</sup> Idi diweig fen, Simon, yana taka Pita dedig an ibodok be anī to difen.

<sup>19</sup> Pita ī mala seleulā kurāf fen, ilen anī nigin fau kisif mog, Awa Uur ī irokenen, "Simon, tamo towo ō dimir-nok. <sup>20</sup> Ani nigin, fā wale, tenebur kutū weis usil. Idi geid ileyā nigin to utor, ere nigin, ayam idi sur afedin."

<sup>21</sup> Pita kutū yeis isil fen, idi irokenēdin, “Aya anī umir-nagef. Anī ā ere nigin usigel?”

<sup>22</sup> Idi diron, “Amā Konelius kusī tamo neid orowa takam sur famā di, masil. Ī madur tamo, Negur nigin anini yedig. Juda tamo kayau ganan, ĩ tamo biya difiyēdig. Engel fateul, ō Konelius nē fō bun ule fen, ō urōf anī Konelius karī youf nigin ĩ irokenen.” <sup>23</sup> Age de di, Pita, idi bō anī bun an denēf nigin, aabē geif iroulen.

### Pita Konelius Nē Fō Bun Ilen

We fele di, Pita ĩ fā yale, tamo anidi weim dilen. Jopa taun temeleid kabī tura tar tunīg, Pita geid weim dilen. <sup>24</sup> Naa anī ile di, Pita Sisaria taun wō yen. Konelius idi tari feid fen, ĩ yogon sirag tar ado mou tar melsā difaref anidi geid iweig laisi difaren. <sup>25</sup> Pita Konelius nē fō aaben isour iroule di, Konelius ĩ tarabā fiye ken, ĩ yogo lai feis, ye gariyan bobou fen. <sup>26</sup> Anī ere, Pita ĩ yalesne ken, iron, “Ufar, ayag tamo maug.”

<sup>27</sup> Pita Konelius aaben wogō fiyek dile fen, tamo kayau musei guru difen anī iledin. <sup>28</sup> Pita idi irokenēdin, “Ā aug keleī bagai, Juda tamo taka, haiden tamo taka ado nugal difouf be, ĩ ki fiyēf, are lo wal fiya. Anī ere, aya, tamo taka sane be, amuyē ado be, to age auf nigin, Negur aya mogo ifelnan. <sup>29</sup> Anī nigin, aya uweignag fen, tamo sur wedigen sain, aya wau uruya sā asil. Anī nigin, aya to ayeik, ere nigin ā uweignagen?”

<sup>30</sup> Konelius iron, “Naa fo mogo ilelen, sain anī bun, aya neu fō bun sain eig fe mog, tri kilok aragau kosē aun. Kaisā bagai, tamo taka kolos medēya ado, wageun ifar fen, <sup>31</sup> iron, ‘Konelius, Negur, ogon kosēya karī yen ado, maleg bun ogon wau sā ifenēya anī karī yelen. <sup>32</sup> Anī nigin, oun Jopa taun, tamo Simon, yana taka Pita dedig gein, tamo sur wo di, idi Pita ō bun isiyouf nigin dirokenēf. Ī gaar gabar el fiya tamo Simon nē fō maaī yerin ifaref an ibodok.’ <sup>33</sup> Anī nigin, aya kaisā bagai ō bun tamo sur afedin, ō usil are de agol. Odug, urokanamāf nigin irokonon anī ganan karī mauf nigin, amā ganan Negur mala bun gama yeir.”

<sup>34</sup> Age ye di, Pita iron, “Aya gama momoi bagai keleī, are Negur ĩ taka nigin dogol to wau yenēdig, <sup>35</sup> anī ere, teneub ganan bun, tamo taka ĩ Negur nigin anini ye fen, tobonunā biya age fedig are, Negur ĩ nigin wau yenek. <sup>36</sup> Israel tamo kayau bun, Negur od sur fen anī ā keleī, biya od eig ye wogō yen, Jesus Kristus, ĩ ganan neid Odug, ĩ bunem maur gudū fiya wō yen. <sup>37</sup> Ā keleī, Jon naan igunēdiya nigin od wogō ye di, Galili distrik oun gariya ino fen, Judia distrik ganan bun ereb wō yen anī. <sup>38</sup> Ā keleī, Negur, Jesus Nasaret tamal bun, Awa Uur Fateul ado megeir fi fele di, Jesus iyo ken, tobonunā biya agef fen, Satan nē megeir farumen dibodok anidi ganan el fiyēdin, ere nigin, Negur ĩ ado ibodon.

<sup>39</sup> “Amā, Jerusalem ado Juda neid teneub bun, ereb Jesus age fen anī ganan malamā mailen. Idi ĩ aa tetek bun dū di, laa fen. <sup>40</sup> Anī ere, Negur ĩ naa towo ilele di, laa bun tamal ĩ turī fiyē di, tamo kayau dilouf nigin age fen. <sup>41</sup> Anī ere, tamo kayau ganan ĩ dilouf nigin to age fen, Negur mogo igirnēdin anidim dogol dilouf nigin

age fen, are amam Jesus laa bun tamal mata kel fā ye fen, weim saaf ado naan mon anim. <sup>42</sup> Ī, amā tamo kayau biya od wogō mafiyēid fen, Jesus ĩ mata nē ado laa nē es fiya tamo ĩ Negurem igirnen anī, kurō mafesyouf nigin irokanaman. <sup>43</sup> Profet ganan ĩ nigin kurō difeis wogō den, are taka ĩ Jesus nigin momoi youf are, Jesus yana bunem yogon mosor nigin weder tu ka-lauf.”

<sup>44</sup> Pita ĩ fau od enei wogō ye mog, Awa Uur Fateul od karī den anidi ganan bun isin. <sup>45</sup> Juda momoiya tamo mulū bun temeleid Pita geid disin idi, Negurem Awa Uur Fateul wau sā haiden buneg fi fele di, dile fen, terefeit den. <sup>46</sup> Ere nigin, haiden idi od fire fire bun wogō de, Negur yana dales mog, karī den.

Age dife di, Pita iron, <sup>47</sup> “Taka nem, tamo kayau enei-di naan igunēdiya nigin katū fedyouf de? Idi amā Awa Uur Fateul malen age fiya bagai dalel.” <sup>48</sup> Anī nigin, Pita, idi Jesus yana bunem naan digunēdiyof nigin irokenēdin. Age fe di, Pita idi geid naa tunī dibodōf nigin idi Pita dirokenen.

### Pita Age Fen Anī Faded Fiyēdin

**11** Aposel ado, momoiya tamo kayau Judia distrik ganan bun dibodon anidi, haiden idig Negur nē od dalen yeya anī karī den. <sup>2</sup> Sain Pita Jerusalem iseled di, Juda momoiya tamo mulū bun temeleid kekeir od diroken ken, <sup>3</sup> diron, “Ō haiden mulū to dilen neid fō bun ule fen, weim saaf wōgen.”

<sup>4</sup> Age de di, Pita gariya ino, ereb ereb ganan wō yen anī dir fe faded fiyēdin, <sup>5</sup> “Aya Jopa taun abod ken, kosē au mog, aya mulam malau gelele fe, malau seleulā kurāf fen, ailen. Aya ereb taka gabar odug gen, iri aiwa adodo kaleya bun irou fen, saa ilun tamal, aya abodon nē an folō fele di, isil mog, ailen. <sup>6</sup> Aya anī fele afe fen, tenebur tamal gaar fire fire yeid imeid adodo, gaar kuī, gaar luwedim diyōdig ado, ninā ilun temeleid ailedin. <sup>7</sup> Agef fen, ait taka karī au mog, irokanan, ‘Pita, fā wale, udenkeis fen, wō.’

<sup>8</sup> “Anī ere, aya aron, ‘Odug, sā bagai! Aya sesen amuyē adodo yōya nigin katū difaman taka to bagai ō ailen.’

<sup>9</sup> “Ait anī baban saa ilunem wogō yen, ‘Ereb taka Negur ĩ amuyē sā inon anī, to amuyē ado wouf.’ <sup>10</sup> Agef towo fe fen, anī ganan baban kel dīf, saa ilun irou iselen.

<sup>11</sup> “Sain anī bun bagai, tamo towo aya gein Sisariam sur difedin idi, fō aya abodōdig nē an wō den. <sup>12</sup> Awa Uur aya idi weim ileyā to atorōf nigin irokanan. Kabī turau tar sigis eneidig, aya weim mele, tamo anī nē fō namen melen. <sup>13</sup> Age mafe di, ĩ engel taka naig be fe fen, yogon fō bun wō ye fen, eig ye irokenen, ‘Jopa taun oun, Simon yana taka Pita dedig gein tamo sur woid. <sup>14</sup> Ō ado ogon ibor tar ganan kel gei yeif nigin, ĩ od ō gein irou isiyouf,’ ye di, ilen anī irokanaman.

<sup>15</sup> “Aya od gariya ano, wogō au mog, Awa Uur Fateul uruwa bun ada bun isin gen, idi buneg agef isin. <sup>16</sup> Age fe di, aya Odug eig ye iron anī, wederou fokō yen, ‘Jon ĩ naanem igunēdin, anī ere, ā Awa Uur Fateulem igun-

eif.' <sup>17</sup> Anī nigin, ada Odug Jesus Kristus nigin momoi tau di, Negur wau sā ege luwa ifanadan anī, idig ifenēdin anī youf are, aya ai nigin Negur naabura gudū afiyēf?"

<sup>18</sup> Idi od enei karī de fen, idi kekeir od ditor ken, Negur yana dales diron, "Age fiyauf are, Negur ī haiden idig waud falei de fen, mata bun dilauf anī ifenēdin."

### Sios Oun Antiok Taun

<sup>19</sup> Stiwen duketin sain bun, kafī fiya wō ye di, momoiya tamo kayau firagagaū dife fen, tunī Fonisia distrik, Saipras nuyo ado, Antiok taun dile fen, Juda tamo kayau bun dogol biya od wogō difiyēdin. <sup>20</sup> Anī ere, idi tunī Saipras nuyo ado Sairini taun temeleid, Antiok taun dile fen, Grik tamo kayau buneg wogō de fen, Odug Jesus nigin biya od dirokenēdin. <sup>21</sup> Odug nē megeir idi adon, age fe di, tamo kayau musei momoi de fen, Odug bun falei den.

<sup>22</sup> Od enei, Jerusalem taun oun sios bun iyokele di, idi Banabas Antiok taun sur difiyen. <sup>23</sup> Banabas an wō ye, Negur wau ifenēdin anī ilen, ī kulī ye fen, idi waud adok Odug bun momoi dibodōf nigin ganan waud yalesen. <sup>24</sup> Banabas ī tamo biya, Awa Uur Fateul ado momoiya barikā. Tamo kayau musei Odug bun geif iroulen.

<sup>25</sup> Age dife di, Banabas Sol imirnēf nigin Tasmus ilen. <sup>26</sup> Banabas Sol fotou fiye ken, Sol Antiok taun irou isin. Agef fen, Banabas Sol ado yar tekelei adok, sios geid dibod ken, tamo kayau musei difelnēdin. Antiok an, dō fiya tar anidi bun yana mata dun, are Kristen den.

<sup>27</sup> Sain anī bun, profet tunī Jerusalem anenem Antiok disin. <sup>28</sup> Idi neid taka, yana Agabus fā ye fen, Awa Uur bunem profet od wogō yen, kadir odug Rom teneub ganan bun iyokalauf yen. (Sisa † Klodius nē sain bun, kadir enei wō yen.) <sup>29</sup> Dō fiya tar, idi mugu mugu, dogo neid megeir bunem, momoiya tamo kayau Judia distrik bun dibodon anidi disennēdiyof nigin, kisi difon. <sup>30</sup> Idi enei age de fen, moni wau sā Banabas Sol ado imeid bun dino, sios nē uyu irouya anidi bun sur difen.

### Pita Kalabus Bun Tamal Yalisnen

**12** Sain anī bun, King Herod sios bun temeleid tunī kafī fiya ifenēdiyof nigin, gei fedin. <sup>2</sup> Ī irō di, Jon tura Jems dimig nem duketin. <sup>3</sup> Herod ī Jems laa fe di, Juda tamo kayau waud al fen anī ile fen, ī Pitag dalouf nigin ari fedin. Enei are, Bret Yis Sā Sifa sain bun wō yen. <sup>4</sup> Idi Pita dale di, ī kalabus bun inenen, ī kusī tamo mala aiwa adodo, mala mugu mugu kusī tamo aiwa adodom lo difouf nigin idi imeid bun inon. Herod ī, Pasa naa ilele di, ganan meleid bun, Pita kot bun inenēf nigin kisi yalen.

<sup>5</sup> Anī nigin, Pita kalabus bun dinenē ibodon, anī ere, sios idi Pita nigin Negur total bagai kosē difiyen.

<sup>6</sup> Herod ī Pita fau nil kot bun ifarauf ye mog, bō anī bun, Pita sen uru nem ifokeleya ado kusī tamo uru atun mulā yenen, kalabus bobog lo fiya tamo, bobog

† Rom neid king odug.

tari de difaren. <sup>7</sup> Kaisā bagai, Odug nē engel wō ye di, kalabus Pita ibodon aab namen fula felen. Agef fen, engel Pita siri yu ken, turī fiyē iron, "Gama nem, fā wale!" Age fe di, Pita ima bun tamal sen irokakakesin.

<sup>8</sup> Age fe di, engel Pita irokenen, "Ogon let luwā gu fen, sendel ufoukel." Age fele di, engel Pita irokenen, "Ogon kolos meluk ufoukel, dō wiya." <sup>9</sup> Pita engel dōf kalabus bun tamal ilen, anī ere, ī engel age fen are, momoi bagai be anī to kelein, ī malau seleulā kurā fe di, ailef yen. <sup>10</sup> Idi, kusī tamo kalabus bobog lo difedig uyulil ado anī dō fiya, wal difeid fen, taun isileya ain bobog bun disi di, sukar are yogo kā fel kenēdin, age fe di, idi ulolō desin. Idi naab taka luwe diyok disil fen, kaisā bagai engel Pita itornen.

<sup>11</sup> Age fe di, Pita weder fokōf mā, iron, "Momoi bagai aya gama keleī, Odug engel sur fe di, aya Herod nē megeir bun ado Juda tamo idi ereb wōya nigin kisi difen anī ganan bun tamal yalelnal."

<sup>12</sup> Enei nigin weder fokō yel fen, Pita ī, Jon yana taka Mak dedig sina Maria nē fō bun ilen, an tamo kayau musei guru de fen, kosē def dibodon. <sup>13</sup> Pita fō sukar godu godu fe di, kabī kayau taka yana Roda dedig sukar kā fouf nigin isin. <sup>14</sup> Ī Pita ait karī ye fen, fatuk bagai kulī ye fen, ī sukar kā fiya sā, kel gudu ref ile fen, iron, "Pita yeir bobogē ifaref!"

<sup>15</sup> Idi ī dirokenen, "Ō wadak." Anī ere, kayau ī total bagai ino fen, agef irō di, idi diron, "Are Pita nē engel."

<sup>16</sup> Age de mog, Pita ī fau fau sukar godu godu fe di, idi sukar kā difel, Pita dile fen, terē den. <sup>17</sup> Pita foro dalauf nigin imam dogol fiyeid le fen, Odug ī kalabus bun tamal yalis irou isil anī faded fiyeid fen, iron, "Jems tura tar geid od enei urokenēdigouf." Age ye fen, Pita idi itorneid, uyu takā ilen.

<sup>18</sup> Bonimeī di, kusī tamo Pita to dile fen, fatuk bagai nene de, abob to difen. <sup>19</sup> Herod Pita dimirnēf nigin irokenēdin, anī ere, idi ī to fotou difiyēn. Age dife di, Herod kalabus lo fiya tamo Pita lo difen idi to fiyeid le fen, kalabus lo fiya tamo anidi didenkesiyof nigin irokenēdin.

### Herod Laa Fen

Agef fen, Herod Judia distrik bun tamal Sisaria taun ile, sain naal an ibodon. <sup>20</sup> Herod ī, Taia ado Saidon taun tamo kayau nigin name fatuk bagai sanen, anī ere, gama idi waud tekelei fen, Herod dilouf nigin disin. Uyulil idi Blastus, king nē ibodōya modoū nē lo fiya mudur, ī idi isennēdiyof nigin dirokenē di, Blastus yo yen. Age de fen, idi Herod garan dile, maur gudū fiya nigin dirokenen, ere nigin, idi king nē akor bun tamal saaf daledig.

<sup>21</sup> Naa inon anī bun, Herod ī king nē kolos ifoukel, king nē sia bun ibod ken, tamo kayau od wogō fiyēdin.

<sup>22</sup> Tamo kayau diweig diron, "Eī waitou ait, tamo nē sā."

<sup>23</sup> Kaisā bagai, Odug nē engel Herod yū iran, ere nigin, ī Negur yana to yalesen. Ī mamatem dō di, laa fen.

<sup>24</sup> Anī ere, Negur nē od bilalaū fel iyokelen.

<sup>25</sup> Banabas Sol ado, dogo neid kabī bure difel fen, Jerusalemem keku de disin, idi Jon, yana taka Mak dedig dale fen, weim disin.

### Idi Banabas Sol Ado Sur Difedin

**13** Antiok sios bun, profet ado tise difaren, are Banabas, Simeon yana taka Karos dedig, Lusius Sairini taun tamal, Manain (ī king Herod ado bibiyedin) ado, Sol. <sup>2</sup> Idi Odug yana dales fen, kuri de mog, Awa Uur Fateul idi irokenēdin, “Banabas Sol ado kabī aya agirkenēdin anī dalouf nigin, gadi weleid kanag.” <sup>3</sup> Anī nigin, idi kuri de kosē del, imeid idi tetedin dino fen, sur difedin.

### Oun Saipras Nuyo

<sup>4</sup> Awa Uur Fateul, Banabas Sol ado sur fedī di, idi Selusia taun dile fen, anenem waag dale, Saipras nuyo dilen. <sup>5</sup> Idi Salamis taun wō de fen, Negur nē od Juda neid uub fō fō bun wogō den. Jon idi isennēdiyof nigin, ī dale weim dilen.

<sup>6</sup> Idi nuyo anī ganan atu diyok dile, Pafos taun wō den. Idi an idegēya kosē tamo taka, idegēya profet Juda tamal, yana Bar-Jesus dedig fotou difen. <sup>7</sup> Bar-Jesus ī nuyo anī nē gawaman mudur Segius Paulus ado dibodon. Segius Paulus ī tamo kisi biya ado. Gawaman mudur ī, Negur nē od karī youf nigin, Banabas Sol ado iweignēdin. <sup>8</sup> Anī ere, idegēya kosē tamo Elimas (yana are Grik od nem ‘idegēya kosē tamo’) idi naabureid gudū fe di, gawaman mudur to momoi youf nigin age fen. <sup>9</sup> Age fe di, Sol, yana taka Pol dedig, Awa Uur Fateul barikā, ī idegēya kosē tamo lo fiyekel fen, iron, <sup>10</sup> “Ō Satan naal, ō Negur nē madur fiya ganan nē kiwai! Idegēya ado sesen ganan, ō bun isokosef. Ō ere sain anī, Odug nē naab madur anī, idegēya bun falei fiyai wodig utorlauf? <sup>11</sup> Gama Odug ima, ō teten isif. Ō malā ifofakalauf, ō sain naal meluk, gaa lalan to ulouf.”

Kaisā bagai, budū ado gugum isi, kerub fiyē di, ī taka nem ima gim foug nigin, ima ra yef iyon. <sup>12</sup> Gawaman mudur ī agef wō yen anī ile fen, ī momoi yen, ere nigin, ī Odug nigin ifelnē di, ilen anī nigin terē yen.

### Pisidia Distrik Nediwon Antiok Taun

<sup>13</sup> Pol yogon kabī tura tar geid, waag dale, Pafosem, Pamfilia provins oun Perga taun dilen, an Jon idi itorneīd fen, Jerusalem kel ilen. <sup>14</sup> Idi Perga taun anenem, Pisidia distrik nediwon Antiok taun dilen. Sabat naa bun, idi Juda neid uub fō bun dile dibodon. <sup>15</sup> Lo ado profet neid itotoya diwesleid fen, Juda neid uub fō nē mudur adodo, Banabas Pol ado gein od sur dife fen, diron, “Turamā tar, ā tamo kayau waud yaleseya nigin od adouf are, wogōg.”

<sup>16</sup> Pol fā ye, foro dalauf nigin imam fiyeīd le fen, iron, “Israel tamo kayau ado, haiden Juda tamo kayau geid Negur nigin anini gedig ā, karī wiyag! <sup>17</sup> Israel tamo kayau neid Negur, tubumā tar igrneīd fen, idi Isip dibodon sain, Negurem age fe di, idi fulus difen. Negur ī megeir odug nem, idi Isip tamal gurif irou ilen. <sup>18</sup> Ne-

gur ī, foti yar age fiya gerere tuan, idi tobonunā sane age difen anī lolou fesif isin. <sup>19</sup> Ī Kanan teneub bun, tamo ibor sewen adok daūf iraile fen, dogo neid teneub, yogon tamo kayau idi akorouf nigin ifenēdin. <sup>20</sup> Enei ganan fo handred fifti yar age fiya ilelen.

“Enei bure fele di, Negur ī, Israel tamo kayau es fiya tamo ifenēdif ile, profet Samuel nē sain bun. <sup>21</sup> Anī bure fele di, tamo kayau king nigin dirō di, Negur, Sol Kis naal, Benjamin nē ibor bun tamal ifenēdin, Sol foti yar king ibodon. <sup>22</sup> Negur Sol yalelne ken, ī Dawid idi neid king inenen. Negur Dawid nigin eig ye iron, ‘Aya, Jesi naal Dawid ī, tamo aya wau irok kilei anī ailen, ī ereb ereb ganan, neu oroya yenek anī dōf age foug.’

<sup>23</sup> “Negur ī age afouf yen kilei, Dawid nē ibor nē tubu tar bun tamal, kel yaleya tamo Jesus Israel ifenēdin.

<sup>24</sup> Jesus fau isiya sā mog, Jon Israel tamo kayau ganan waud falei ye di, naan igunēdiyof nigin od wogō yen. <sup>25</sup> Jon ī yogon kabī idikalau fenē mog, ī iron, ‘Aya nigin ā aim gef? Aya tamo ī tari gef anim sā. Anī ere, ī aya dumeun dō fiyaf, aya to biya nigin yogon su malū biru fediya kisi feleya sā.’

<sup>26</sup> “Turau tar, Abraham gere tar ado, haiden ā Negur nigin anini gedig, Negur tamo kayau kel yaleya nē od, amā bun sur fen. <sup>27</sup> Jerusalem tamo kayau, dogo neid mudur adodo geid, Jesus ado, profet neid od Sabat naa ganan bun diwesedig anī to kelei ken, Jesus bouwa bun od dun, anī bunem profet neid od kisi fel wō yen. <sup>28</sup> Idi Jesus dukesiyof nigin, gariya taka to dilen, anī ere, idi ī dukesiyof nigin, Pailat dirokenen.

<sup>29</sup> Idi Jesus nigin Negur nē Itotoya bun yenek anī ganan, dō de age difel fen, idi ī aa tetek bun tamal dalisne ken, matmat bun dinenen. <sup>30</sup> Anī ere, Negur Jesus laa bun tamal kel turī fe di, mata kel fā yen. <sup>31</sup> Agef fen, Jesus, tamo idi, ī geid Galili teneub bun tamal Jerusalem dilen anidi bun, naa musei wō yen. Idi anidim gama, tamo kayau bun, ī nigin wogō def dilef.

<sup>32</sup> “Amā biya od ā marokeneik, Negur tubumā tar age afouf fiyēdin are, <sup>33</sup> Jesus kel turī fiyen anī bunem, amā idi gereneid tar kisi fel naman. Sam tu bun itotoya yenek kilei:

“Ō neu Kesu,  
aya gama ō Tamā wō aul.’ †

<sup>34</sup> Negur ī laa bun tamal kel turī fiyē di, ī to bagai bura lauf nigin, Negur eig ye iron:

“Aya momoi bagai nē ado fateul nē el fiya, are aya Dawid afenēf aun anī, ā afenēf.’ ††

<sup>35</sup> Negur nē Itotoya taka buneg eig ye irok:

“Ō ogon Fateul Tamo to utorō di, bura lauf.’ ‡

<sup>36</sup> “Dawid ī yogon sain bun, Negur nē oroya anī aruna yale fen, laa fen. Ī tubu tar geid mū dife di, bouwa bura len. <sup>37</sup> Anī ere, Negurem laa bun tamal kel turī fiyen ī, bura leya san.

<sup>38</sup> “Anī nigin, turau tar, ā keleī youf, Jesus bunem mosor weder tu keleya nigin od wogō yeik. <sup>39</sup> Tamo ganan Jesus nigin momoi def, mosor ganan yalelkenēid fen, madur fedif, anī ere, Moses nē Lo bunem, tamo neid mosor ganan yalelkenēid fen, madur fediya kisi feleya

sã. <sup>40</sup> Anĩ nigin, profet wogõ den anĩ, ã bun to wõ youf nigin lo weleg:

<sup>41</sup> "Ulegef, ã kono fiya tamo!

Terëg fen, gare gouf,

ere nigin, aya ãgenei sain bun erab taka age afouf,

are taka nem irokeneifeg,

ã to bagai momoi gouf.' † "

<sup>42</sup> Pol Banabas ado, Juda neid uub fõ ditor dile mog, tamo kayau, Sabat naa taka bun, od enei baban tobol difouf nigin dirokenëdin. <sup>43</sup> Tamo kayau dilele di, Juda tamo kayau musei ado, haiden Juda neid momoiya bun falei de fen, Negur nigin anini dedig musei idi, Pol Banabas ado dõ difedin. Age dife di, Pol Banabas ado weim wogõ de fen, idi Negur nẽ wau ifenëya bun toku dibodõf nigin waud dalesen.

<sup>44</sup> Sabat naa taka bun, taun dibodõdig anidi musei ganan, Odug nẽ od karĩ douf nigin guru difen. <sup>45</sup> Anĩ ere, Juda tamo idi, tamo kayau guru difen anidi dileid fen, kiyeim aura fiyëdi di, Pol wogõ yen anĩ nigin kiwai difen ken, kono difiyen.

<sup>46</sup> Age dife di, Pol Banabas ado kumĩ sã wogõ eig de diron, "Amã Negur nẽ od, ã bun ketem sã wogõ mayeim. Anĩ ere, ã Negur nẽ od utorõg fen, amã to biya nigin mata faimud ibodkeleya to malouf gen. Anĩ nigin, amã gama haiden gedin melef. <sup>47</sup> Are Odug eig ye irokanaman:

"Aya õ haiden neid lalan anenon,

anĩ bunem, teneub idikelediya bun, tamo kayau usenneid, kel gei wediyouf.' †† "

<sup>48</sup> Haiden idi od enei karĩ de fen, waud kulĩ ye, Odug nẽ od seli dabin. Mata faimud ibodkeleya nigin igirnëdin anidi ganan momoi den.

<sup>49</sup> Age dife di, Odug nẽ od, teneub anĩ ganan bun iyokelen. <sup>50</sup> Anĩ ere, Juda tamo idi, haiden kayau yeneid adodo Negur nigin anini dedig ado, taun uyu iroyua tamo anidi nameid dalesen. Idi Pol Banabas ado darau difenëdiyof nigin, tamo kayau nameid dalese di, dogo neid teneub bun tamal dirudidin. <sup>51</sup> Anĩ nigin, Pol Banabas ado, idi neid tobonunã sane anĩ difelnëdi di, keleĩ youf nigin, yeid aas tu difel fen, Ikonium taun dilen. <sup>52</sup> Dõ fiya tar idi, kulĩya ado Awa Uur Fateul bari-kan.

### Oun Ikonium Taun

**14** Oun Ikonium taun, Pol Banabas ado, idi gai age difedig gen, Juda neid uub fõ bun dile fen, an tamo waud yaleya bun wogõ de di, Juda tamo kayau ado Grik tamo kayau musei momoi den. <sup>2</sup> Anĩ ere, Juda tamo momoiya sã anidim, haiden idi nameid dalese di, haiden idi, momoiya tamo kayau kiwai difenëdin. <sup>3</sup> Anĩ nigin, Pol Banabas ado, sain meluk an dibod ken, Odug nigin kumĩ sã wogõ den. Age dife di, Odug ã, idi memelik uris ado dinodiyof nigin, megeir ifenëdin, anĩ bunem, Odug yogon wau ifenëya nẽ od anĩ megeir fen. <sup>4</sup> Tamo kayau taun temeleid faraf fen, tunĩ Juda tamo geideid, tunĩ aposel geid. <sup>5</sup> Age de fen, Juda tamo ado haiden, dogo neid uyu iroyua geid, aposel to biya

difiyëd fen, meein tulu difiyëdiyof nigin age difen.

<sup>6</sup> Anĩ ere, aposel idi anĩ kelei ken, idi diya, Likonia distrik nediwon Listra taun, Derbe taun, anĩ kalilĩ fiya bun diyok dile fen, <sup>7</sup> an biya od wogõ den.

### Oun Listra ado Derbe Taun

<sup>8</sup> Oun Listra taun, tamo taka ye ilolaisin ibodon, ã sina namenem ye ilolaisin wõ yen, anĩ to iyõdig. <sup>9</sup> ã, Pol od wogõ ye mog, karĩ fiyen. Pol ã lo fiyekel fen, ã bouwa biya lauf nigin momoiya ado anĩ ile fen, <sup>10</sup> Pol ait odugem iweig iron, "Fã wale ufar!" Age ye di, ã gurusã ye, iyok ilen.

<sup>11</sup> Tamo kayau musei Pol age fen anĩ dile fen, Likonia od nem diweig diron, "Waitou tamo falei difel fen, ada gein disil!" <sup>12</sup> Idi Banabas ã Sus difiye ken, Pol ã Hermes difiyen, ere nigin, Pol ã ait ado tamo. <sup>13</sup> Waitou Sus nẽ tempel, taun yerin ibodon. Waitou Sus nẽ pris, bulmakau bobõ gĩ fediya adodo, taun bobogë irou isin, ere nigin, ã tamo kayau musei geid, aposel sesewi fiya difenëdiyof nigin age fen.

<sup>14</sup> Anĩ ere, aposel Banabas Pol ado, anĩ karĩ de fen, dogo neid kolos serek difeid fen, tamo kayau musei atun gududu de dile diweig diron, <sup>15</sup> "Tamo kayau, ã ere nigin enei ago gef? Amãg tamo maug, ã gen. Amã ã gein biya od marou masif, are ã kaũ sã enei utorõg fen, mata ibodõya Negur ã, saa, teneub, maaĩ ado, anidi namen erab erab ganan inodin, ã bun falei gouf nigin marokeneik. <sup>16</sup> Kulu Negur ã tamo kayau teneub ganan bun itornëdi di, dogo neid oroya dõ difen. <sup>17</sup> Anĩ ere, Negur ã yogo nigin yaor fiya to itor ken, faimud erab erab biya age fedig anĩ bunem, yogo nigin yaor fedig. ã saa bunem uyë ado, saaf dogo neid sain dõf fen, ifeneidig. ã saaf musei biya ifenei ken, wauĩ bun kulĩya ifeneidig." <sup>18</sup> Od enei nemeg, tamo kayau musei aposel sesewi difenëdiyof nigin age difen, anĩ ere, aposel idi naabureid gudũ difenëdiyof nigin lakĩ difen.

<sup>19</sup> Age dife di, Juda tamo tunĩ, Antiok ado Ikonium taun temeleid disi fen, tamo kayau musei waud dalen. Age de fen, idi Pol meein tulu difiyë, laa fel de fen, taun yerin diror diroulen. <sup>20</sup> Anĩ ere, dõ fiya tar guru de, Pol salili difiyë di, ã fã yale fen, baban taun kel ilen. Naa taka di, ã Banabas ado Derbe taun dilen.

### Aposel Siria Distrik Oun Antiok Taun Keku Den

<sup>21</sup> Idi taun anĩ bun biya od wogõ de fen, dõ fiya tar musei dalen. Age difel fen, idi Listra, Ikonium ado, Antiok taun keku de dile, <sup>22</sup> dõ fiya tar megeir difiyëd fen, idi momoiya bun dibodõf nigin waud dalesen. Idi diron, "Ada Negur nẽ tano bun ilya nigin, morõ musei talouf bagai." <sup>23</sup> Pol Banabas ado, sios mugu mugu bun, uyu iroyua digirneid fen, kosëya ado kuriya bunem, Odug idi ã nigin momoi dedig, ã ima bun dinenëdin. <sup>24</sup> Idi Pisidia distrik atu diyok dile, Pamfilia provins bun wowã den. <sup>25</sup> Age de fen, idi Perga taun an od wogõ del fen, Atalia taun disilen.

† Habakuk 1:5 †† Asaia 49:6

<sup>26</sup> Idi Ataliam waag dale, Antiok keku de dilen, kulu an, sios, kabĩ gama bure difelex anĩ nigin, aposel idi Negur nẽ wau ifenẽya bun dinenẽdin. <sup>27</sup> Idi Antiok taun wowã de fen, sios kuru difeid fen, Negur idi bunem ereb age fen anĩ ganan ado, Negur ĩ haiden momoi douf nigin sukar kã fen anĩ, wogõ difiyẽdin. <sup>28</sup> Age dife fen, idi, dõ fiya tar geid, sain meluk an dibodon.

### Guru Fiya Oun Jerusalem

**15** Tamo tunĩ, Judia distrik bun temeleid Antiok taun disi fen, momoiya tamo kayau eig de difelnẽdin, "Ã Moses nẽ tobonunã kilei, mulũ to ulagauf are, ã kel gei yeĩya kisi feleya sã." <sup>2</sup> Od enei nigin, idi Pol Banabas ado geid fatuk bagai fefe de fen, luwa diroun. Anĩ nigin, momoiya tamo kayau enei nigin Jerusalem disel fen, aposel ado uyu irouya geid to difiyẽdiyof nigin, Pol Banabas ado momoiya tamo tunĩ geid digirnẽdin. <sup>3</sup> Sios idi sur difedi di, Fonisia ado Samaria distrik atu dile fen, haiden idi Negur bun falei den anĩ dirokenẽdin. Od eneim, momoiya tamo kayau ganan fatuk bagai kulĩ den. <sup>4</sup> Idi Jerusalem wõ de di, sios, aposel geid, uyu iroudiya anidim idi aan difiyẽdin. Age dife di, Negur idi bunem ereb age fen anĩ ganan, sios, aposel geid, uyu iroudiya wogõ difiyẽdin.

<sup>5</sup> Age dife di, momoiya tamo tunĩ Farisia mala bun temeleid, fã de fen, diron, "Haiden idi mulũ dile fen, Moses nẽ Lo dõ difouf nigin dirokenẽdiyof bagai."

<sup>6</sup> Age de di, aposel idi, uyu iroudiya geid, od enei nigin guru de katõ difen. <sup>7</sup> Od musei sain meluk katõ difen sain, Pita fã yale irokenẽdin, "Turau tar, ã keleĩ, kulu, sain taka bun, haiden idi aya sigorou bun biya od karĩ de fen, momoi douf nigin, ã atun Negur aya igrinan. <sup>8</sup> Negur ĩ, tamo nẽ wau keleĩ, ĩ Awa Uur Fateul, ada ifanadan gen, haiden idig ifenẽdin anĩ bunem, idig yaledin anĩ ifelnẽdin. <sup>9</sup> Negur, ada ado idi geid atun daũ taka to inon, ere nigin, momoiya bunem ĩ waud kulo feledin. <sup>10</sup> Anĩ ere, ere nigin ã gama Negur kisi wiyẽg fen, morõ adag age fiya, tubuda tareg faali fiya kisi feleya san anĩ, dõ fiya tar tetedin unogouf nigin ago gef? <sup>11</sup> Sã! Ada, idi agef kel gei fedif gen, neda Odug Jesus nẽ wau ifenẽya bunem, adag agef kel gei fadaf anĩ momoi tauf."

<sup>12</sup> Tamo kayau ganan guru difen anidi ganan foro del fen, Banabas Pol ado, Negur idi bunem memelik ado uris fire fire haiden atun inodin anĩ wogõ de di, karĩ den. <sup>13</sup> Idi wogõ dele di, Jems ĩ iron, "Neu turau tar, karĩ wiyag. <sup>14</sup> Simon mogo faded fadal, are Negur ĩ yogo yana nigin ye fen, haiden atun tamo kayau yaledin anĩ bunem, ĩ urug bagai haiden nigin wau yenen anĩ ifelnadan. <sup>15</sup> Profet neid od are, enei ado susu felef, are Negur nẽ Itotoya bun eig ye irok kilei:

<sup>16</sup> "Enei dumen, aya kelau fen,

Dawid nẽ salafat kubũ yen anĩ baban alesauf.  
Aya sesen ledin anĩ madur afeleid fen,  
baban anouf,

<sup>17</sup> anĩ bunem, tamo kayau ganan atun tunĩ ado, haiden ganan neu nigin agirnẽdin geid,  
Odug dimirnẽf.†

<sup>18</sup> Odug ĩ enei kulu bagai yaor fen, ĩ anĩ agef irok.

<sup>19</sup> "Anĩ nigin, neu es fiya bun, ada haiden Negur bun falei def anidi, morõ to tafenẽdiyof. <sup>20</sup> Age fiya ban, ada pas tatot fen, idi saaf idegẽya waitou bun sesewi difen anĩ to dãf nigin, noli tobonunã bun to dilauf nigin, yaro uleid kakã difeid fen, didenkesif anĩ to dãf nigin ado, yaro naud adodo to dãf nigin torokenẽdiyof. <sup>21</sup> Ere nigin, sain meluk bagai, Moses nẽ Lo taun ganan bun wogõ de fen, Sabat naa ganan bun Juda neid uub fõ fõ bun diweseidig."

### Guru Fiya Nẽ Pas Haiden Momoiya Tamo Kayau Bun Sur Difen

<sup>22</sup> Age ye di, aposel idi, uyu iroudiya ado, sios ganan geid, idi atun tamo tunĩ digirnẽd fen, Pol Banabas ado weim Antiok taun sur difedyof nigin kisi difon. Idi Judas (yana taka Basabas dedig) ado Sailas digirnẽdin, tamo uru anidi, momoiya tamo kayau atun, idi uyu irouya. <sup>23</sup> Idi bun pas eig de ditoton anĩ sur difen:

Amã aposel, uyu iroudiya geid, ãgenei tureĩ tar, haiden bun temeleĩ turamã tar Antiok taun, Siria ado, Silisia provins bun ubodõgef aan mayeik.

<sup>24</sup> Amã nemã tamo tunĩ, yoya to dale fen, dile, idi neid wogõya bunem gelele diyei ken, wauĩ morõ difenein anĩ, amã karĩ maun. <sup>25</sup> Anĩ nigin, amã ganan kisi tekelei mano fen, tamo tunĩ magirneid fen, nemã oboimã tar bagai Banabas Pol ado geid ã gein sur mafedif. <sup>26</sup> Banabas Pol ado idi, neda Odug Jesus Kristus yana nigin, dogo neid mata itorõya nigin to fese den. <sup>27</sup> Anĩ nigin, amã matotkeneik anĩ sigoredim megeir fiya nigin, Judas Sailas ado sur mafedif. <sup>28</sup> Awa Uur Fateul, amã geid, kisi tekelei fen, ã bun nun enei teten baban morõ taka to mafeneĩf nigin yo maun: <sup>29</sup> ã saaf idegẽya waitou bun sesewi difen anĩ to wãgauf, yaro naud adodo to wãgauf, yaro uleid kakã difeid fen, didenkesif anĩ to wãgauf ado, noli tobonunã bun to ulagauf. ã enei adok irok kilei sese gouf are, ã nigin deuf.

Dabuo.

<sup>30</sup> Tamo idi sur difedi di, Antiok taun disil, sios kuru difeid fen, pas anĩ difenẽdin. <sup>31</sup> Tamo kayau pas anĩ diwes fen, waud yaleseya od anĩ nigin kulĩ den. <sup>32</sup> Judas Sailas ado, idi dogo profet, momoiya tamo kayau waud dales fen, megeir difenẽdiyof nigin od fatuk wogõ den. <sup>33</sup> Idi an sain naal meluk dibodon, age dife di, momoiya tamo kayaum waud inosiya ado sur difedi di, idi sur difedin anidi gedin keku de dilen. <sup>†35</sup> Anĩ ere, Pol Banabas ado Antiok dibodon, an idi tunĩ museig geid fen, Odug nẽ od difelneid fen, wogõ den.

### Pol Banabas Ado Waud Tekelei San

<sup>36</sup> Naa tunĩ ilele di, Pol Banabas irokenen, "Ada keku tau fen, taun ganan Odug nẽ od wogõ tafiyẽdin nẽ an turada tar ki tafiyẽd fen, idi naig difef anĩ tailauf."

<sup>37</sup> Banabas ĩ, Jon yana taka Mak dedig, idi geid dilauf

† Amos 9:11, 12 †† Itotoya tunĩ eig ye irok: dilen. 34 \* Anĩ ere, Sailas ĩ an ibodõf nigin kisi fen.

nigin oron, <sup>38</sup> anī ere, Pol ī weim dilauf are to biya ye kisi fen, ere nigin, Jon ī Pamfilia provins oun idi itorneīd fen, idi geid kabī to dalef dilen. <sup>39</sup> Idi fatuk bagai fe de fen, fara difen. Banabas ī Mak yale fen, waag bun Sai-pras nuyo dilen, <sup>40</sup> anī ere, Pol ī Sailas igirnē di, momoia tamo kayaum Odug nē wau ifenēya bun dinenēdi di, dilen. <sup>41</sup> Ī Siria ado Silisia provins atu ile fen, sios megeir fiyēdif ilen.

#### Timoti Ī Pol Sailas Ado Weim Dilen

**16** Pol ī Derbe taun isi fen, anenem Listra taun ilen, an dō fiya tamo taka yana Timoti ibodōdig, ī sina Juda tamal momoia kayau, anī ere, ī tama Grik tamal. <sup>2</sup> Momoia tamo kayau Listra ado Ikonium taun teme-leid, Timoti biya difiyēdig. <sup>3</sup> Pol ī Timoti ado dilauf nigin oron, anī nigin, ī, Juda tamo modoū anī bun dibodōdig anidi nigin, Timoti mulū inenen, ere nigin, idi ganan keleī, Timoti ī tama Grik tamal. <sup>4</sup> Idi taun mugu mugu bun diyok dile fen, oun Jerusalem aposel idi uyu irou-diya tamo geid, tamo kayau dō difouf nigin od difon anī wogō difiyēdif dilen. <sup>5</sup> Anī bunem, sios idi momoia megeir dale fen, naa ganan momoia tamo kayau ifagaf ilen.

#### Pol Mala Seleulā Kurāf Fen, Masedonia Tamo Taka Ilen

<sup>6</sup> Pol yogon kabī tura tar geid, Frigia distrik ado Galesia provins bun diyok dilen, ere nigin, Awa Uur Fateul, idi Asia provins bun od wogōya nigin katū fiyēdin. <sup>7</sup> Idi Misia distrik nē daū bun disi fen, Bitinia provins bun dilauf nigin age difen, anī ere, Jesus nē Awa Uur ī katū fiyēdin. <sup>8</sup> Anī nigin, idi Misia distrik wal dife fen, Troas taun disilen. <sup>9</sup> Bō anī bun, Pol mala seleulā kurāf fen, Masedonia provins tamal tamo taka ifar fen, igonen, "Masedonia usi fen, usenamā," fiyē mog, ilen. <sup>10</sup> Pol mala seleulā kurāf fen, anī ilen, age fel fen, amā kaisā bagai Masedonia provins malauf nigin dodok mafen, ere nigin, amā kisi mafen, Negur idi bun biya od wogō mauf nigin iweignaman.

#### Filipai Taun Oun Lidia Jesus Nigin Momoī Yen

<sup>11</sup> Troas taun anenem, amā waag bunem madur kilei Samotres nuyo melen, naa taka di, Neapolis melen. <sup>12</sup> Anenem amā Filipai melen, Filipai are Rom gawamanem lo fedig, Masedonia provins bun taun anī uyu irouf. An naa tunī mabodon.

<sup>13</sup> Sabat naa bun, amā taun mator ken, taun bobog serē naan yerin an, amā kosēya nē modoū mamirēf nigin melen. Amā mabod ken, kayau an guru difen anidi wogō mafiyēdin. <sup>14</sup> Idi neid taka karī faman, kayau anī yana Lidia, Taiataira taun tamal, ī gabar kadaū na nigin susur fedig, ī Negur yana yalesedig. Odug, ī Pol nē od karī youf nigin wau bun sukar kāf kenen. <sup>15</sup> Kayau anī yogon ibor tar geid naan diguneīd kele di, ī yogon fō bun malauf nigin irokanama ken, iron, "Aya Odug nigin momoi auf agef kisi gouf are, umag, neu fō bun ubodōg." Ī nugo famā di, amā dō mafiyen.

#### Pol Sailas Ado Kalabus Bun

<sup>16</sup> Naa taka bun, kosēya nē modoū bun mele mog, ferfer kayau momoul taka fotou faman, ī kaa sane ado, anī bunem ereb fau wō youf anī wogō yedig. Yogon marau tar, ī ereb fau wō youf anī wogō yedig anī bunem, moni musei daledig. <sup>17</sup> Kayau momoul enei, amā Pol geid dō fama ken, iweig iron, "Tamo eneidi Negur Ilun Bagai nē ferfer tar. Idi ā isennēya walogouf nē naab dirokeneik." <sup>18</sup> Kayau ī naa musei age fe di, Pol wau fatuk bagai moro ken, falei ye, kaa sane irokenen, "Jesus Kristus yana bunem, aya ī bun tamal ulō wesiyouf nigin arokonok!" Sain anī bun bagai, kaa sane kayau anī itornen.

<sup>19</sup> Ferfer kayau momoul nē marau tar, moni yaleya nē naab gudū felen anī kelei ken, Pol Sailas ado gei de didū difeid, maket modoū bun yeneid adodo tamo gedin dirouledin. <sup>20</sup> Idi Rom neid lo es fiya tamo bun guri difeid dile fen, diron, "Tamo eneidi are Juda temeleid, idi neda taun bun morō odug dinof. <sup>21</sup> Idi tobonunā difelnēdif are neda lo to irok anī, ada Rom tamo, anī nigin, ada tobonunā enei to talouf, to dō tafouf."

<sup>22</sup> Age de di, tamo kayau, idi geid bagu de fen, Pol Sailas ado kiwai difenēdin. Age dife di, Rom es fiya tamo kolos dinukaka keneīd fen, wagagā difediyouf nigin dirokenēdin. <sup>23</sup> Idi fatuk bagai wagagā difiyēid kele fen, kalabus bun dinenēdin. Age dife fen, kalabus lo fiya tamo el fe lo fediyouf nigin dirokenei. <sup>24</sup> Kalabus lo fiya tamo od anī yale fen, kalabus fō aab namen inenēid fen, yeid aam kotū feledin.

<sup>25</sup> Bō atun age fiya, Pol Sailas ado Negur kosē difiye ken, seg dale mog, kalabus tamo ganan karī difiyēdin. <sup>26</sup> Kaisā bagai, mimī odug fā ye fen, kalabus fō gariya anī guyō fen. Kaisā bagai, kalabus fō nē sukar ganan kā feleid fen, kalabus tamo ganan bun sen irokaka kalaisi keledin. <sup>27</sup> Kalabus lo fiya tamo irik yel fen, kalabus fō nē sukar kā felediya ilen, agef fen, ī kisi fen, kalabus tamo diyalelel ye fen, yogon dimig ul feis, yogo bouwa yukesiyouf nigin age fen. <sup>28</sup> Anī ere, Pol iweig iron, "Ō ogo bouwā to tū wo! Amā ganan yeir!"

<sup>29</sup> Kalabus lo fiya tamo yal nigin iweig fen, namen gudu ref ile, Pol Sailas ado yedin kubū ye, tererē yen.

<sup>30</sup> Agef fen, idi gurif irou, mayarē isi fen, to fiyēdin, "Tamo bibiyeī, aya naig afe fen, isennēya alouf?"

<sup>31</sup> Idi diron, "Odug Jesus nigin momoi wouf are, ō isennōf, ō ogon ibor tar geid." <sup>32</sup> Age de fen, idi Odug nē od, ī ado ganan yogon fō bun dibodon anidi geid, wogō difiyēdin. <sup>33</sup> Sain anī bun bagai bō, kalabus lo fiya tamo, Pol Sailas ado gurif iroule, bouweid gali gedin anī kulo fedin. Age fel fen, kaisā bagai ī yogon ibor tar ganan geid, naan digunēdin. <sup>34</sup> Kalabus lo fiya tamo, idi yogon fō aaben gurif iroule, saaf ifenēdin. Ī wau kulīya barikan, ere nigin, ī Negur nigin momoi yen, yogon ibor tar ganan geid.

<sup>35</sup> We fele di, Rom es fiya tamo, dogo neid kabī tamo anidi bun, kalabus lo fiya tamo gein od sur difen, "Tamo anidi walisneīd." <sup>36</sup> Age difiyē di, kalabus lo fiya tamo Pol irokenen, "Rom es fiya tamo, ō Sailas ado alis-

neif nigin dirokanal. Gama ã wadã ulagauf. Wauĩ ino-siya ado ulagauf.”

<sup>37</sup> Anĩ ere, Pol kabĩ tamo irokenẽdin, “Amã Rom tamo ba, anĩ ere, idi to es difama ken, amã mal atun wagagã difaman. Age dife fen, amã kalabus bun dinenaman. Anĩ gama idi iminẽyan dirumã fenẽ de? Sã! Idi dogo disi, dalisnama ken, dinenamãf.”

<sup>38</sup> Kabĩ tamo, od enei Rom es fiya tamo dirokenẽdin. Pol Sailas ado idi Rom tamo yeya anĩ karĩ de fen, idi kumĩ den. <sup>39</sup> Idi Pol Sailas ado gedin bobo difiyẽdiyof nigin disi fen, kalabus bun tamal dalis dinenẽdin. Age dife fen, Rom es fiya tamo idi, Pol Sailas ado taun anĩ ditor dilauf nigin dirokenẽdin. <sup>40</sup> Pol Sailas ado, kalabus bun tamal ulolõ deis fen, Lidia nẽ fõ bun dilen, idi an momoia tamo kayau fotou difeid, waud dales le fen, ditorneĩd dilen.

### Oun Tesalonika Taun

**17** Pol Sailas ado, Amfipolis ado Apolonia taun atu diyok dile fen, Tesalonika taun wõ den, an Juda neid uub fõ ibodon. <sup>2</sup> Pol ĩ gai age fedig gen, Juda neid uub fõ bun ilen. Sabat naa towo bun, ĩ Negur nẽ Itotoya bun ibodok anĩ, tamo kayau geid katõ de, ifelneĩd fen, <sup>3</sup> Kristus ĩ darau yale fen, laa bun tamal mata kel fã youf bagai nigin, el fe faded fiyẽdin. Pol iron, “Jesus enei aya ã arokeneik are, ĩ anĩ Kristus.” <sup>4</sup> Juda tamo kayau tunĩ karĩ de, momoi de fen, Pol Sailas ado dõ difedin, Grik tamo kayau museig Negur nigin anini dedig ado, kayau yeneid adodo museig age difen.

<sup>5</sup> Anĩ ere, Juda tamo, Pol Sailas ado kiyeĩ difeneĩd fen, maket modoũ bun tamo sesen tunĩ kuru difeid waud dalese di, tamo kayau guru difalasi fen, taun anĩ bun kakaĩ den. Idi Pol Sailas ado, tamo kayau bun diroulediyof nigin, Jeson nẽ fõ bun dile dimirnẽdin. <sup>6</sup> Anĩ ere, idi Pol Sailas ado to fotou difeid fen, Jeson momoia tamo tunĩ geid didũ difeid, taun nẽ uyu iroudiya gedin dirouleid fen, diweig diron, “Tamo eneidi teneub ganan bun morõ difenẽdin anĩ gama yeir disin. <sup>7</sup> Age dife di, Jeson idi aan fiyeĩd fen, yogon fõ aaben gurif iroulen. Idi ganan Sisa nẽ lo difodul ken, king taka yana Jesus dedig ibodok, age de wogõ dedig.” <sup>8</sup> Tamo kayau ado, taun nẽ uyu iroudiya geid, od enei karĩ de fen, nibur den. <sup>9</sup> Age dife fen, taun nẽ uyu iroudiya, Jeson ado tamo tunĩ geid kot na dalouf nigin dirokenẽdi di, na dalen, age difele di, ditornẽdi di, dilen.

### Oun Berea Taun

<sup>10</sup> Bo kele di, kaisã bagai momoia tamo kayau, Pol Sailas ado Berea taun sur difedin. Idi an wõ de fen, Juda neid uub fõ bun dilen. <sup>11</sup> An Berea tamo kayau idi, Tesalonika tamo kayau gen sã, idi wedereid dino fen, od karĩ dedig. Idi waud adod fen, od karĩ den, age de fen, idi Pol wogõ yen anĩ, momoi be dilouf nigin, naa ganan Negur nẽ Itotoya felei difedig. <sup>12</sup> Juda tamo kayau musei momoi den, age fiya bagai, Grik kayau yeneid adodo musei ado Grik tamo museig momoi den.

<sup>13</sup> Tesalonika taun an Juda tamo idi, Pol Negur nẽ od oun Berea tauneg irok ya karĩ de fen, idig an dile, tamo kayau nameid dalese di, seye den. <sup>14</sup> Age dife di, momoia tamo kayau, kaisã bagai Pol maã ubun sur difiyen, anĩ ere, Sailas Timoti ado idi an Berea taun dibodon. <sup>15</sup> Tamo tunĩ Pol dinenekel fen, weim Atens taun dilen, Pol ĩ, Sailas Timoti ado kaisã bagai ĩ gein disiyouf nigin, irokenẽdi di, idi keku de dilen.

### Oun Atens Taun

<sup>16</sup> Pol, oun Atens Sailas Timoti ado tari fedin, agef fen, ĩ idegẽya waitou taun anĩ bun isokosen anĩ ile fen, wau fatuk moron. <sup>17</sup> Anĩ nigin, Pol ĩ, Juda tamo kayau ado, Grik tamo kayau Negur nigin anini dedig geid, Juda neid uub fõ bun wageid yalouf nigin od solo difedin, ĩ naa ganan maket modoũ bun, tamo kayau idi dilef disif difedig geideg, wageid yalouf nigin od solo difedin. <sup>18</sup> Epikurian ifelnẽdiya tamo † tunĩ ado, Stoik ifelnẽdiya tamo †† tunĩg, Pol geid fefe den. Idi tunĩ to difen, “Golẽ tamal enei, ere od wogõ you fenẽ?” Tunĩ diron, “Ĩ yaũ waitou nigin wogõ yef be.” Idi age de diron, ere nigin, Pol ĩ Jesus nigin ado, laa bun tamal mata kel fãya nigin, biya od wogõ yen. <sup>19</sup> Age fe di, idi Pol dale, taun uyu irouya neid guru fiya, yana Areopagus dedig, an dirou dile fen, diron, “Keleĩ mata enei urokanamak anĩ, amã tau keleĩ youf?” <sup>20</sup> Ő keleĩ mata bagai wederaman urou usif, ereb gariya nigin irok anĩ, amã keleĩ you fenẽ.” <sup>21</sup> (Atens tamo kayau ganan ado yaũ tamo kayau an difaredig idi, sain ganan kisi mata mata nigin karĩ yei dedig, wogoĩ dedig, idi kabĩ taka to daledig.)

<sup>22</sup> Age de di, Pol Areopagus guru fiya atun ifar fen, iron, “Atens tamo, ereb ereb ganan bun, ã waitou karĩ fiyẽya nigin kisi fatuk unogedig anĩ ailef. <sup>23</sup> Ere nigin, aya ayo ken, ereb ereb yana walesegedig fele afedin, aya alta takag itotoya enei ado ailen: WAITOU, ADA KELEĨ SÃ ANĨ BUN. ã keleĩ sã anĩ yana walesegedig nigin, aya yaor afe arokeneik.

<sup>24</sup> “Negur ĩ, teneub ado ereb ereb ganan anĩ namen difaref inodin, ĩ anĩ, saa ado teneub nẽ Odug nigin, ĩ tamo imedim tempel dinodin anĩ bun to ibodõdig. <sup>25</sup> ĩ ereb taka to lau fedig, anĩ nigin, tamo imam ereb taka ifenẽya kisi feleya sã, ere nigin, ĩ yogo tamo ganan mata, si neseya ado, ereb ereb ganan ifenẽdidig. <sup>26</sup> Tamo tekelei bunem, ĩ tamo kayau fire fire ganan inodin, idi teneub adok ino yalouf nigin age fen. ĩ dogo neid sain ifeneĩd fen, idi ibodõya nẽ modoũ daũ fire fire ifenẽdin. <sup>27</sup> Tamo ĩ dimirnẽf nigin, imeid ra de dimirek dile, fotou difiyẽf nigin be, ĩ age fen. Anĩ ere, ĩ ada mugu mugu bun gerõ to ibodok. <sup>28</sup> ĩ bun ada mata tabod ken, telef tasif tafef, tabodok.’ Āgenei itotoya tamo tunĩg eig de diron, ‘Ada yogon gere tar.’

<sup>29</sup> “Age fiya bagai, ada Negur nẽ gere tar, anĩ nigin, ada kisi to eig tauf, waitou ĩ, gol nem, silwa nem, mee-in nem be, tamo nẽ kisi ado imam malakanon inodig age fiya, to tauf. <sup>30</sup> Tamo kayau Negur nigin to kelein

† Epikurian tamo idi bouwa buru nẽ oroya nigin al difedig. †† Stoik tamo idi bouwa buru nẽ oroya lai fiya nigin al difedig.



sain, idi to kelei ken, age difedig anī, Negur to eweid yon, anī ere, gama ī, tamo kayau adok teneub ganan bun waud falei youf nigin irokenēdif. <sup>31</sup> Ī naa inon anī bun, ī tamo igirnen ī bunem, teneub ganan madur fiya bun es fouf. Negur ī laa bun tamal mata kel turī fe di, fā yen anī bunem, enei agef wō youf anī tamo ganan ifelnēdin.”

<sup>32</sup> Laa bun tamal mata kel fāya nigin, Pol wogō yen anī karī de fen, tunī Pol kasā difiyen, anī ere, tunī diron, “Amā enei nigin baban karī mayō fenē.” <sup>33</sup> Age de di, Pol guru fiya anī itor ilen. <sup>34</sup> Tamo tunī Pol dō dife fen, momoi den. Idi atun, Dionisius, guru fiya yana Areopagus neid taka, kayau taka yana Damaris ado, tunī geid, dibodon.

### Oun Korin Taun

**18** Enei bure fel fen, Pol Atens taun itor ken, Korin taun ilen. <sup>2</sup> Pol ī, an Juda tamo taka yana Akwila, Pontus provins tamal, fotou fiyen, Akwila ī aiwa Prisila ado Italim disi dibod dirubkelen, ere nigin, Sisa Klodius, Juda tamo kayau ganan Rom taun ditorōf nigin totol od irokenēdin. Pol idi ilediyof nigin ilen. <sup>3</sup> Agef fen, Pol ī an idi geid dibod ken, weim kabī dalen, ere nigin, īg idi gen salafat inoya tamo. <sup>4</sup> Sabat naa ganan, Pol Juda neid uub fō bun, Juda tamo kayau ado Grik tamo kayau geid, od kuruwa difedig, are idi kisi falei de momoi douf nigin age fedig.

<sup>5</sup> Sailas Timoti ado Masedoniam disi di, Pol ī Juda tamo kayau bun, Jesus ī anī Kristus fiyeīd fen, wogō ye kurō fesin, ī yogon sain adok kabī anī bun inon. <sup>6</sup> Anī ere, Juda idi Pol kiwai difen ken, kono difiyē di, ī so fiyeīd fen, yogon kolos tu fel fen, irokenēdin, “Ā naudeī aug mudureī bun ibodōf! Aya to kababal fiyauf. Gama sain enei bunem ilef, aya haiden gedin alauf.”

<sup>7</sup> Pol age ye fen, Juda neid uub fō itor ken, Negur yana yalesedig tamo Titius Justus nē fō bun ilen, fō are Juda neid uub fō anī non. <sup>8</sup> Krispus, Juda neid uub fō nē mudur, ī yogon ibor ganan geid, Odug nigin momoi den. Korin tamo kayau museig biya od karī de fen, momoi den. Age dife di, naan dalen.

<sup>9</sup> Bō taka bun, Pol mala seleulā kurāf fen, Odug ī wogō fiyē mog, karī yen, “To kumī wo, ō od wogōya tobol wof ulauf, ait to ufokalauf, <sup>10</sup> ere nigin, aya ō ado. Taka nem to irounokon, tadū yōf, ere nigin, taun enei bun, neu tamo kayau musei dibodok.” <sup>11</sup> Anī nigin, Pol ī yar tekelei ado ogō sigis an ibod ken, tamo kayau Negur nē od ifelnēdin.

<sup>12</sup> Galio ī Akaiā provins nē gawaman mudur ibod mog, Juda tamo kayau idi weim kori de, Pol kiwai difen ken, ī kot bun diroulen. <sup>13</sup> Idi diron, “Tamo enei neda lo wal fe fen, tamo kayau waud yale di, Negur yana, tobonunā fire bun dalesauf nigin age fef.”

<sup>14</sup> Pol od wogō you fenē mog, Galio ī Juda tamo kayau irokenēdin, “Juda tamo kayau ā, mosor be, tobonunā sane nigin urokanagauf are, aya ā karī yeīya nigin kisi feleya. <sup>15</sup> Anī ere, morō enei, od nigin, yeneid nigin ado, āgenei lo nigin ouf are, ā aug madur gouf. Aya age fediya to es afouf.” <sup>16</sup> Age ye fen, ī idi kot bun

irudidin. <sup>17</sup> Age fe di, idi Juda neid uub fō mudur Sostenes dale fen, kot fofomala bun dun. Anī ere, Galio to eweid yon.

### Prisila, Akwila, Apolos Anidim

<sup>18</sup> Pol ī oun Korin taun naa musei ibodon. Agef fen, ī momoiya tamo kayau itorneīd fen, Prisila Akwila ado weim waag dale, Siria distrik dilen. Ī fau waag sōya sā mog, Senkria taun an yogon fatiya gudū difelen, ere nigin, ī Negur mala bun wau kuturol fen, iron, age afouf yen. <sup>19</sup> Idi Efesus taun wowā den, an Pol, Prisila Akwila ado itornēdin. Pol ī yogo Juda neid uub fō bun ile fen, Juda tamo kayau geid od kuruwa difen. <sup>20</sup> Ī idi geid sain naal meluk dibodōf nigin dirokenē di, itoron. <sup>21</sup> Anī ere, ī ilau fenē mā, idi irokenēdin, “Negur orouf are, aya kelauf.” Age ye fen, ī waag bun Efesus taun itor ilen. <sup>22</sup> Pol ī Sisaria taun kutū yeis fen, Jerusalem isel, sios aan fiyēdin. Agef fen, ī Antiok taun isilen.

<sup>23</sup> Pol sain naal an Antiok taun ibodkele fen, anenem fā ye, Galesia provins ado Frigia distrik ganan bun iyo ken, dō fiya tamo kayau ganan megeir fiyēdin.

<sup>24</sup> Sain anī bun, Juda tamo taka yana Apolos, Aleksandria fō morou, Efesus isin. Ī keleī biya ado tamo, Negur nē Itotoya bun ibodok anī nigin keleī biya bagai ado.

<sup>25</sup> Ī Odug nē naab anī difelnen, age dife di, ī totol ado wogō ye fen, Jesus nigin tutuk bagai ifelnēdidig, anī ere, ī Jon nē naan igūya anī dogol kelein. <sup>26</sup> Ī Juda neid uub fō bun, kumī sā od wogō yen. Prisila Akwila ado, ī wogō yen anī karī de fen, idi ī dogo neid fō bun dale diroule, Negur nē naab tutuk faded difiyen.

<sup>27</sup> Age difel fen, Apolos Akaiā provins bun ilauf nigin age fe di, momoiya tamo kayau idi ī wau dales fen, Akaiā teneub an dō fiya tamo kayau ī aan difiyēf nigin, pas ditotkenēdin. Apolos an wō ye fen, Negur nē wau ifenēya bunem momoi den idi, fatuk bagai isennēdin.

<sup>28</sup> Ere nigin, ī Juda tamo kayau geid mal atun fefe de fen, od megeir ado nem lai feid fen, Negur nē Itotoya bun Jesus ī anī Kristus ya anī, agef ifelnēdin.

### Pol Ī Oun Efesus Taun

**19** Apolos ī fau Korin taun ibod mog, Pol ī teneub atu iyok ile, Efesus taun wō yen. An ī, dō fiya tamo kayau tunī fotou fiyeīd fen, <sup>2</sup> to fiyēdin, “Ā momoi ge fen, Awa Uur Fateul walegen de?”

Idi ī dirokenen, “Sā, amā Awa Uur Fateul ibodok ya anīg to karī maun.”

<sup>3</sup> Age de di, Pol idi to fedin, “Age fiyauf are, ere naan anī ā walegen?”

Idi ī dirokenen, “Jon nē naan igūya anī.”

<sup>4</sup> Pol iron, “Jon nē naan igūya are wau faleiya nē naan igūya. Jon ī yogo, dumen tamo taka isif ī nigin momoi douf nigin, tamo kayau irokenēdin, tamo are Jesus.”

<sup>5</sup> Idi od enei karī de fen, Odug Jesus yana bunem naan dalen. <sup>6</sup> Pol ima tetedin ino di, Awa Uur Fateul idi bun isin. Age fe di, idi od fire fire nem wogō de fen, profet odeg wogō den. <sup>7</sup> Idi ganan tamo tuwelf age fiya.

<sup>8</sup> Pol Juda neid uub fõ bun ile fen, an ogõ towo bun, kumĩ sã od wogõ yen, ï tamo kayau geid od kuruwa de, idi waud falei ye, Negur nẽ tano nigin momoi douf nigin age fen. <sup>9</sup> Anĩ ere, idi tunĩ waud total le fen, to momoi den. Age dife fen, idi mal atun Odug nẽ naab nigin od sesen diron. Anĩ nigin, Pol idi itorneĩd fen, dõ fiya tamo kayau geif fen, naa ganan Tiranus nẽ ifelnẽya fõ bun od katõ difen. <sup>10</sup> Enei age fen are yar uru ilelen, anĩ bunem, Juda tamo kayau ado, Grik tamo kayau ganan Asia provins an dibodon idi, Odug nẽ od karĩ den.

<sup>11</sup> Negur ï Pol bunem memelik fire bagai age fedin, <sup>12</sup> are hankisip ado gabar masakeg, Pol bouwa kobũ dife fen, dagi tamo bun diroule dinodi di, dagi el feledin, are kaa sesen idi ditornẽdin.

<sup>13</sup> Juda tamo tunĩ, kaa sesen dirudiyouf nigin diyõdig, idi kaa sesenem dirounẽdin anidi bun Odug Jesus yana dale fen, idi eig de dirõdig, "Jesus ï nigin Pol wogõ yedig, ï yana bunem, aya õ ulõ wesiyouf nigin arokonok."

<sup>14</sup> Juda neid pris odug taka, Skeba nẽ gere tar sewen idig age difedig. <sup>15</sup> Naa taka bun, kaa sanem idi irokenẽdin, "Aya Jesus keleĩ, aya Pol nigin keleĩ, anĩ ere, ã aiyaim?" <sup>16</sup> Age ye fen, tamo kaa sane ado tetedin gurusã ye, ganan lalai feid fen, fatuk bagai idenẽdin. Age fe di, idi fõ anĩ bun tamal, gemũ naud adodo diyalelen.

<sup>17</sup> Juda tamo kayau ado Grik tamo kayau Efesus taun dibodon idi, enei karĩ de fen, idi ganan fatuk bagai kumĩ de, Odug Jesus yana ilun bagai dalesen. <sup>18</sup> Tamo kayau momoi den musei disi, sane age difedig anĩ, mal atun yaor dife, kurõ difesin. <sup>19</sup> Idi idegẽya bunem kosẽ dedig musei, dogo neid buk kori fiya guri de dirousi, kuru de, mal atun yã diraran. Idi buk kori fiya anĩ nẽ mala diwesen, are fifti tausen silwa moni † wõ yen.

<sup>20</sup> Anĩ bunem, Odug nẽ od bilalaũ fe fen, megeiref ilen.

<sup>21</sup> Enei ganan agef wõ ye le di, Pol Masedonia ado Akaia provins atu iyok ile anenem, Jerusalem ilauf nigin kisi yalen. Ì iron, "Aya an wõ au fen, aya Romeg ki afouf." <sup>22</sup> Age ye fen, ï yogon isennẽya tamo uru, Timoti Erastus ado Masedonia provins bun sur feid fen, ï Efesus an Asia provins bun sain naal ibodon.

### Efesus Taun Oun Kiwai Kuru Dalesen

<sup>23</sup> Sain anĩ bun, Odug nẽ Naab nigin, kiwai ado monẽya odug wõ yen. <sup>24</sup> Silwa nem ereb ereb inoya tamo, yana Demetrius, ï silwa nem kayau waitou yana Artemis dedig anĩ nẽ tempel malakanon inodig, anĩ bunem yogon kabĩ tamo moni musei daledig. <sup>25</sup> Demetrius ï, yogon kabĩ tamo tar ado, yogon kabĩ gen age fiya tutur iweig laisi fen, irokenẽdin, "Tamo ã, ã keleĩ, ada kabĩ enei bun moni biya taledig. <sup>26</sup> Anĩ ã gama uleg fen, karĩ gef, tamo Pol enei, ein Efesus ado mogo Asia provins ganan melsã bagai bun, tamo kayau musei waud yale fen, eig ye irok, tamo ima nem waitou inodif are anĩ waitou sã, yef. <sup>27</sup> Are karĩya sane yenek, ada neda moni kabĩ yana sane yalouf, takag, karĩya sane yenek are, kayau waitou odug Artemis nẽ tempel are

† Silwa moni tekelei are, naa tekelei bun kabĩ tamo nẽ mala.

ege bagai kaũ sãf. Age fe di, kayau waitou, Asia provins ganan bun ado teneub adok ganan bun, yana dalesedig, ï yana odug iseledig are lai difesilauf."

<sup>28</sup> Idi od enei karĩ de fen, fatuk bagai seye ise di, kakaĩ de diweig diron, "Efesus neid Artemis ï odug bagai!" <sup>29</sup> Age de di, taun anĩ bun ganan kuru dalesen. Tamo kayau idi, Gaius Aristakus ado, are idi Masedonia temeleid Pol geid diyõdig anidi, kaka difeid, guru fiya nẽ fõ odug namen, tamo tekeleim gudu ref iley a gen gudu den. <sup>30</sup> Pol ï guru fiya atun ilauf nigin age fen, anĩ ere, dõ fiya tamo kayau Pol katũ difiyen. <sup>31</sup> Asia gawaman nẽ uyu irouya tunĩ, are Pol nẽ mou tar idig, Pol guru fiya nẽ fõ anĩ bun to ilauf nigin digone ken, od sur difenen.

<sup>32</sup> Guru fiya anĩ bun nene delen. Tunĩ od taka diweig dirõ di, tunĩ od fire taka diweig diron. Musei ganan ereb nigin an guru difen anĩ, idi keleĩ san. <sup>33</sup> Juda tamo kayau, Aleksanda, tamo kayau wagedin mal atun sur dife, isel ifare di, tamo kayau tunĩ ï dile fen, Aleksanda ï anĩ morõ gariya den. Age dife di, Aleksanda ï tamo kayau meleid bun yogo bouwa isennẽf nigin, ï foro da-lauf nigin imam dogol fiyẽdin. <sup>34</sup> Anĩ ere, idi ï Juda tamo ya kelei ken, idi ganan aiteid tekelei dino fen, aua uru age fiya eig de diweig diron, "Efesus neid Artemis ï odug bagai!"

<sup>35</sup> Age de di, taun uyu irouya nẽ kabĩ tamo ï, tamo kayau foro weleg fiyẽdi di, foro delen, age dife di, iron, "Efesus tamo ã, teneub ganan bun tamo kayau ganan, Efesus taun anĩ, Artemis odug nẽ tempel ado yogon malakanon saa ilunem isin anĩ nẽ kulatun fiya taun anĩ, idi to keleĩ de? <sup>36</sup> Taka nem enei wa fiya kisi feleya sã, anĩ nigin, ã foro weleg fen, age fiya nigin to buroro gei. <sup>37</sup> Tamo eneidi ereb taka tempel buneg to bẽ dalen, idi neda kayau waitoug to kono difiyen, anĩ ere, ã idi ein guri wedig urousigel. <sup>38</sup> Age fiyauf are, Demetrius yogon kabĩ tura tar geid, tamo taka nigin nauseirya adouf are, kot ibodok, gawaman nẽ mudur adodo difaref. Idi an nauseirya anĩ diroulauf. <sup>39</sup> ã nauseir anĩ teten ereb taka manouf gouf are, tamo kayau neid kot guru fiya bun madur gouf. <sup>40</sup> Gama wõ yel enei nigin, karĩya sane yenek, kuru talesel enei nigin are ada kot bun dinenadauf. Age difouf are, ada guru fiya sane enei nigin faded fiya kisi feleya sã, ere nigin, are gariya sã." <sup>41</sup> Agef irokel fen, ï guru fiya anĩ irudin.

### Pol Masedonia Ado Grik Teneub Atu Ilen

**20** Kuru anĩ bure fele di, Pol ï od ino di, dõ fiya tamo kayau disin, age dife di, idi waud yales le fen, dabuo fiyeĩd lel, Masedonia provins ilen. <sup>2</sup> Pol ï Masedonia provins atu iyok ile, wau yaleseya od musei tamo kayau irokenẽdif ile, Grik kantri bun ulõ yeis fen, <sup>3</sup> ï an ogõ towo ibodon. Ì waag bun Siria distrik bun ilauf nigin agef mog, Juda tamo idi, ï dukesiyouf nigin lalĩ difiyek anĩ karĩ yen. Anĩ nigin, ï Masedonia provins atu kel ilauf nigin kisi yalen. <sup>4</sup> Pirus naal Sopata Berea taun tamal, Aristakus, Sekundus Tesalonika taun tamal, Gaius Derbe taun tamal, Timoti, Tikikus Trofimus ado Asia provins temeleid anidim, Pol geid diyon. <sup>5</sup> Ta-

mo eneidi idi ket Troas taun dile, an tari difaman. <sup>6</sup> Anĩ ere, Bret Yis Sã nẽ Sifa bure fele di, amã waag male, Filipai taun mator ken, naa faif ilele di, Troas taun wõ mau fen, fata mafiyëdin, an naa sewen mabodon.

### Troas Taun Oun Yutikus Laa Bun Tamal Kel Turĩ Fiyen

<sup>7</sup> Uub nẽ naa matu bun, amã weim bret mumã mafouf nigin guru mafalaisin. Pol tamo kayau od wogõ fiyëdif ile bõ atunen, ere nigin, ĩ, we fele di, itornëdiy-ouf nigin kisi fen. <sup>8</sup> Guru mafen nẽ aab ilun an, lam musei futu redin. <sup>9</sup> Tamo gaũ yana Yutikus, yau yaleya bobog ilun sõ yesel ibod ken, mulã kusu yalen. Pol od wogõ yef ile mog, ĩ mulã kusu yalef ile yen kele fen, fõ ilunenem tenebur kubũ ye isilen. Age fe di, idi ĩ laa dalesnen. <sup>10</sup> Anĩ ere, Pol isil, tamo anĩ teten kubũ ye, kakarai fiye ken, iron, "To terëg, ĩ mata!" <sup>11</sup> Age ye fen, ĩ baban fõ ilun isel, bret mumãf fen, yon. ĩ wogõ yef ile we fele di, ĩ itornëid ilen. <sup>12</sup> Tamo kayau, tamo gaũ anĩ mata dale dirou, fõ bun dile fen, waud el bagai fen.

### Pol Efesus Sios Neid Uyu Irouya Dabuo Fiyëdin

<sup>13</sup> Amã ket waag bun mele, sõ mau fen, Asos taun melen, an Pol waag bun malouf nigin kisi mafen. Pol ĩ, amã age mafouf nigin tetun irokanaman, ere nigin, ĩ ye naab iyok ile, an ilauf yen. <sup>14</sup> ĩ oun Asos fotou famã di, amã ĩ waag bun male fen, Mitilin taun melen. <sup>15</sup> Anenem waag bun mele, we fele di, Kios nuyo non wõ maun. Naa anĩ ile di, Samos taun mele wõ maun, naa anĩ ile di, Miletus taun mele wõ maun. <sup>16</sup> Pol ĩ, Asia provins bun an sain taka to ilalauf nigin, waag bun Efesus wal fouf nigin kisi yalen, ere nigin, kisi falauf are, ĩ Jerusalem Pentikos naa bun wõ youf nigin sibuyan.

<sup>17</sup> Miletus taun an, Pol ĩ Efesus sios neid uyu irouya fata difiyëf nigin od sur fen. <sup>18</sup> Idi disi wõ de di, ĩ irokenëdin, "Aya Asia provins bun, uruwa bagai asi wõ au fen, aya ã geid tabod ken, sain ganan naig be afe abodon are ã keleĩ. <sup>19</sup> Juda tamo idi aya kiwai difana fen, kisi sane dinon anim fatuk bagai kisi fiyan, anĩ ere, aya wau aukesil, maru ado fen, Odug aruna alen. <sup>20</sup> ã keleĩ, aya ã isenneĩf nigin ereb taka wogõya bun to afon, are aya mal atun ado fõ fõ bun afelnein. <sup>21</sup> Aya Juda tamo kayau ado Grik tamo kayau idi waud falei ye, Negur bun dino fen, neda Odug Jesus nigin momoi douf nigin total bagai arokenëdin.

<sup>22</sup> "Gama aya Awa Uurem toli fiyaf anĩ bunem, Jerusalem elef, an aya bun ereb wõ youf are aya keleĩ sã.

<sup>23</sup> Taun ganan bun Awa Uur Fateul, kalabus ado morõ tari difiyaf anĩ nigin wederou irouf, anĩ dogol aya keleĩ.

<sup>24</sup> Anĩ ere, aya neu naab adikalauf nigin ado, kabĩ Odug Jesus ifanan, are Negur nẽ wau ifenëya nẽ biya od wogõya kabĩ anĩ bure afalauf nigin dogol, kisi afef. Anĩ kisi afalauf are, aya neu mata are ege au fen, neu mata nigin to kisi afef.

<sup>25</sup> "Aya ã atun ayo ken, Negur nẽ tano nigin wogõ ayen, are gama aya keleĩ, ã atun takam baban to ileyauf.

<sup>26</sup> Anĩ nigin, naa enei bun, aya tutuk bagai yaor afe

arokeneik, tamo ganan neid naudeid nigin, aya neu mosor sã. <sup>27</sup> Ere nigin, aya Negur nẽ oroya ganan yaor afe arokeneĩf nigin, taka to afokelen. <sup>28</sup> ã aug nigin ado, sipsip ganan Awa Uur Fateulem lo wedigouf nigin imeĩ bun inon anĩ nigin, meleĩ adouf. Negur nẽ sios, ĩ yogon naud bunem na yalen anĩ nẽ sipsip lo fiya tamo ubodõgouf. <sup>29</sup> Aya keleĩ, aya atorneĩ mog, gaũ kuĩ sane ã atun disi, sipsip daũ difeidlauf. <sup>30</sup> ã tutur buneg tamo tunĩ fã de, dõ fiya tamo tunĩ momoi bun tamal didegneĩd fen, idi dõ difediyouf nigin weleid dino diroulauf. <sup>31</sup> Anĩ nigin, ã lo welegei! Yar towo bun, bõ ado gaa ado, maru ado ã mugu mugu ganan wedereĩ aroun anĩ karĩ walagauf.

<sup>32</sup> "Gama aya ã, Negur ado yogon wau ifenëya nẽ od bun, aneneik, od anim ã totalouf nigin megeir ifenei ken, yogon momoiya tamo tar ganan atun, in akor mata ibodkeleya anĩ ifeneĩf. <sup>33</sup> Aya takan nẽ silwa be, gol be, kolos yaleya nigin to wau yenen. <sup>34</sup> ã aug keleĩ, aya imau eneim kabĩ ale di, aya neu kabĩ turau tar geid, ereb lau mafen anĩ ifanaman. <sup>35</sup> Ereb ereb ganan aya age afen anĩ bunem, aya ã afelnein, are ada kabĩ total age taf tale fen, anĩ bun tamalem maleg tasennëdiy-ouf. Odug Jesus yogo eig ye iron anĩ karĩ taulauf, 'Ifenëya are el fiya barikã, yaleya nẽ wal fiya.'"

<sup>36</sup> Pol ĩ od enei wogõ yel fen, ĩ ibor bobou fe, idi ganan geid kosë den. <sup>37</sup> Idi ĩ kakarai difiyë, umã difiye ken, ganan inã dalen. <sup>38</sup> Idi ĩ nawa baban to dilouf fiyëdin od anim waud gudũ fen. Age dife fen, idi weim waag bun dinenen.

### Pol Jerusalem Ilen

**21** Amã dabuo mafiyëid matorneĩd fen, waag sõ mau, Kos nuyo tokõ mafelen. Naa anĩ ile di, amã Rodes nuyo mele fen, anenem Patara taun melen.

<sup>2</sup> Amã waag taka Fonisia distrik bun ile mog, fotou mafe fen, waag anĩ sõ mau melen. <sup>3</sup> Amã Saipras nuyo mail fen, wal mafe, anĩ ki melem Siria provins melen. Amã Taia taun kututũ maun, ere nigin, an waag udũ gei falaisiyouf nigin age fen. <sup>4</sup> Amã an dõ fiya tamo kayau fotou mafeid fen, weim naa sewen mabodon.

Idi Awa Uurem Pol Jerusalem to ilauf nigin total bagai dirokenen. <sup>5</sup> Anĩ ere, nemã sain bure fele di, amã matorneĩd fen, delë mayon. Dõ fiya tamo ganan dogo neid kayau kesu tar geid, taun tamal dinenamã, mele, maaĩ ubun ulõ maus fen, an amã iboramã bobou mafe fen, kosë maun. <sup>6</sup> Amã abob dabuo mafiyë ken, amã waag sõ mau di, idi fonõ keku de dilen.

<sup>7</sup> Amã Taia taun anenem tokõ mafel, Ptolemas taun kututũ maun, an amã momoiya tamo kayau aan mafiyëid fen, idi geid naa tekelei mabodon. <sup>8</sup> Naa anĩ ile di, amã matorneĩd mele, Sisaria taun wõ mau fen, an biya od wogõya tamo Filip nẽ fõ bun mabodon, ĩ kulu oun Jerusalem momoiya tamo sewen digirnëdin anidi taka. <sup>9</sup> Filip ĩ, ne barai tar aiwa adodo tamo sãsã, idi profet od wogõ dedig.

<sup>10</sup> An naa tunĩ mabodon, age mã mog, profet taka yana Agabus Judia distrik bun tamal isin. <sup>11</sup> ĩ amã garan isi, Pol nẽ lũ yale fen, yogo ye ima ado ifofa ken,

iron, "Awa Uur Fateul eig ye irok, 'Jerusalem oun Juda tamo idi lū enei nē marau eig de difo ken, haiden imeid bun dinenēf."

<sup>12</sup> Amā od enei karī mau fen, amā an tamo kayau geid Pol Jerusalem to ilauf nigin magonen. <sup>13</sup> Age mafe di, Pol iron, "Å ere nigin inā walege di, aya wau gudū fef? Aya Odug Jesus yana nigin, Jerusalem oun difōy-auf nigin ado laa fiyauf nigin, dodok afel." <sup>14</sup> Amā ī wala inoya kisi feleya sa ken, folō mafiye kele fen, moron, "Odug nē oroya anī kisi falauf."

<sup>15</sup> Age mafel fen, amā dodok mafel, Jerusalem mese-len. <sup>16</sup> Dō fiya tamo tunī Sisaria taun temeleid dinema ken, Nason nē fō bun mabodōf nē an dirouleman. Nason ī, dō fiya tamo uruwa bun temeleid anidi taka, Saipras nuyo tamal.

### Pol Jerusalem Wō Yen

<sup>17</sup> Amā Jerusalem wō mau di, momoiya tamo idi waud sere fiya ado aan difaman. <sup>18</sup> Naa anī ile di, amā Pol geid Jems mailauf nigin melen, sios uyu irouya gan-an an difaren. <sup>19</sup> Pol idi aan fiyeid fen, yogon kabī bunem Negur haiden atun ereb age fen anī, teke tekelei dir fenēdin.

<sup>20</sup> Idi od enei karī de fen, Negur yana dalesen. Age dife fen, idi Pol dirokenen, "Turamā, ō ulef, ganī tausen Juda idi momoi den, anī ere, idi ganan Moses nē Lo dō fiya nigin waud total bagai yenek. <sup>21</sup> Ō, Juda idi haiden neid teneub bun difaref ganan, Moses nē Lo ditor ken, dogo neid kesu tar mulū bun to dinenēdiyof, dogo neid tobonunā to dō difouf nigin ufelnēdin ya anī, idi mogo karī den. <sup>22</sup> Idi ō usil ya anī fau karī douf. Age difouf are, ada ere naig tafouf? <sup>23</sup> Anī nigin, amā marokonok anī, ago dō wo. Tamo aiwa adodo Negur mala bun age mafouf bagai den, idi yeir amā geid. <sup>24</sup> Tamo eneidi geid uleg fen, nonorou lilik fiya nē tobonunā bun ulagauf. Agog fen, na walekenēdiyof, ago di, idi fatiyeid korerē difalauf. Ago ge di, ō nigin od enei are momoi sā, ō ogo Moses nē Lo dō wedig anī, tamo kayau ganan keleī youf. <sup>25</sup> Haiden tamo kayau idi momoi den anidi bun, amā kisi mafon anī matotkenēdin, are idi saaf idegēya waitou bun sesewi difen anī to dāf, yaro naud adodo to dāf, yaro uleid kakā difeid fen, di-denkesif anī to dāf ado, noli tobonunā bun to dilauf."

<sup>26</sup> Naa anī ile di, Pol tamo anidi geif fen, ī yogo weim nonorou lilik difen. Age difel fen, ī tempel bun ile, ere sain nonorou lilik fiya naa bure fele di, idi mugu mugu sesewi difouf anī, pris keleī youf nigin irokenēdin.

### Rom Kusī Tamo Pol Dalen

<sup>27</sup> Naa sewen anī bure falau fenē mog, Juda tamo tunī Asia provins temeleid idi, tempel bun Pol dilen. Idi tamo ganan waud dalese di, seye de fen, Pol dale, <sup>28</sup> diweig diron, "Israel tamo, usenamāg! Tamo enei anī, neda tamo kayau, neda lo ado, modoū enei nigin, od sane teneub ganan bun, tamo ganan ifelnēdidig. Takag, ī Grik tamo tempel modoū bun gurif isi di, fateul modoū enei amuyē ifenen." <sup>29</sup> (Idi uruwa bun, Tro-

fimus Efesus taun tamal, Pol ado an taun diledin, anī nigin, idi kisi difen, Trofimus Pol im tempel modoū nam-en iroulen den.)

<sup>30</sup> Taun tamo kayau ganan fafā de fen, naab uyu fire fire bunem gududu de disin. Idi Pol dale, tempel bun tamal dī de diror diroule di, kaisā bagai sukar kotū difeledin. <sup>31</sup> Idi Pol dukesiyou fenē age de mog, od isel, Rom kusī tamo neid odug, Jerusalem taun tamo kayau ganan kuru dalesef ya anī karī yen. <sup>32</sup> Kaisā bagai, kusī tamo neid odug ī, kusī tamo neid orowa tunī ado kusī tamo geif fen, tamo kayau musei gedin gududu de disilen. Tamo kusī dalesen idi, kusī tamo neid odug ado yogon kusī tamo geid dileid fen, Pol dun anī folō difelen.

<sup>33</sup> Kusī tamo neid odug isi, Pol dale, sen uru nem difōf nigin iron. Age ye fen, Pol ī ai anī, ereb ī age fen anī ado nigineg, Juda tamo to fiyēdin. <sup>34</sup> Tamo kayau musei atun, tunī od gariya fire diweig diron, tunim od gariya fire taka diweig diron. Kusī tamo neid odug ī, idi kuru dalesen nigin momoi od yaleya kisi feleya san anī nigin, ī Pol kusī tamo neid fō bun dirou dilauf nigin iro-kenēdin. <sup>35</sup> Pol lata garan wō ye mog, tamo musei idi didid aus fele di, kusī tamom Pol faali difiyen. <sup>36</sup> Tamo musei idi dō difeid fen, diweig diron, "Ukesig!"

### Pol Tamo Kayau Musei Wogō Fiyēdin

<sup>37</sup> Kusī tamo idi, Pol kusī tamo neid fō aaben diroulau fenē mog, ī kusī tamo neid odug to fiyen, "Aya od taka tau arokonōf?"

ī aba solof iron, "Ō Grik od wogō wodig de? <sup>38</sup> Ō Isip tamal sā de? Kulu gawaman kiwai wene ken, gerere tuan fo tausen kiwai tamo uyu urou ulen anī."

<sup>39</sup> Pol iron, "Aya Juda tamo, Silisia provins oun Tasus taun tamal, taun yana ado nē fō morou. Utor-na len, tamo kayau od arokenēdiyof."

<sup>40</sup> Kusī tamo neid odug yo fiyē di, Pol lata bun ifar fen, tamo kayau imam fiyēdin. Idi ganan foro dele di, Pol Hibru od nem irokenēdin,

**22** "Turau tar ado dei geg, gama aya yug nigin isennēya od enei karī wog." <sup>2</sup> Pol Hibru od nem irokenēdi di, karī de fen, idi fatuk foro delen.

Age dife di, Pol iron, <sup>3</sup> "Aya Juda tamo, Silisia provins oun Tasus taun an wō au fen, taun enei bun biyaun. Aya Gamaliel bun tubuda tar neid lo nigin tai fiya fatuk alen. Age afe fen, ā ganan gama ago gef gen, ayag Negur nigin kisi total alen. <sup>4</sup> Aya Naab enei dō difedig tamo kayau, darau afeneid fen, adenkesin, tamo ado kayau gei afeid fen, kalabus araran. <sup>5</sup> Pris neid mudur ado, kaunsel neid uyu irouya ganan geideg, aya age afen anī nigin wogō douf. Aya tureid tar Juda idi oun Damaskus taun difaref anidi bun paseg idi bun ale fen, tamo kayau eneidi darau difenēdiyof nigin afofa ken, Jerusalem guri afeid alauf nigin an elen.

<sup>6</sup> "Gaa atun age fiya, aya ele, Damaskus wō au fenē mog, kaisā bagai, lalan fula fiya taka saa ilun tamal aya bun fula felen. <sup>7</sup> Aya tenebur kubū au asil fen, ait taka wogō fiya mog, karī aun, 'Sol, Sol, ere nigin ō aya daig wiyaf?'

<sup>8</sup>“Aya to afen, ‘Oduq, ò aim?’

“Í solof irokanan, ‘Aya Jesus Nasaret tamal, ò daig wiyaf anim.’ <sup>9</sup> Neu kabí turau tar fula fiya aní dilen, aní ere, idi ait wogò fiyan aní to karí den.

<sup>10</sup>“Aya to afen, ‘Ere naig afouf?’

“Oduq iron, ‘Fã wale fen, Damaskus taun ule, an ò ereb agouf nigin Negur igirkonon aní ganan irokonòf.’ <sup>11</sup> Neu kabí turau tar, imau gim de, Damaskus dirouleyan, ere nigin, lalan fula fiya anim malau gugum kelen.

<sup>12</sup>“Tamo taka yana Ananias ileyauf nigin isin. Í lo el fe dō fedig tamo, Juda idi an difaref ganan, í nigin biya difiyēdig. <sup>13</sup> Í aya sirun ifar fen, iron, ‘Turau, Sol, ò malã kelē yalauf!’ Sain aní bun bagai, aya í ileya kisi feleyan.

<sup>14</sup>“Age afe di, í iron, ‘Tubuda tar neid Negur, ò yogon oroya keleí youf nigin, Madur Bagai Tamo aní ulouf nigin ado, í awa bun od karí wouf nigin igirnon. <sup>15</sup> Ò ereb ulen ado karí won aní, tamo ganan bun í nigin wogò wouf. <sup>16</sup> Aní gama ò ere tari wof? Fã wale, naan wale, í yana uweigne ken, ogon mosor kulo wol.’

<sup>17</sup>“Aya Jerusalem kelau ele fen, tempel bun kosē au mog, malau seleulã kurãf fen, <sup>18</sup> Oduq wogò ye mog, ailen. Í aya irokanan, ‘Gama nem, kaisã bagai Jerusalem utur ule, ere nigin, idi aya nigin ogon od to karí douf.’

<sup>19</sup>“Age ye di, aya oron, ‘Oduq, idi dogo keleí, are aya Juda neid uub fō fō bun ele fen, ò nigin momoi den anidi kalabus bun aneneíd fen, adenēdidig. <sup>20</sup> Takag, ogon od wogò yedig tamo Stiwen naud fi felen sain bun, ayag an afaren, í dukesiyouf nigin wau iro ken, tamo idi í dukesin neid kolos tari afen.’

<sup>21</sup>“Age au di, Oduq irokanan, ‘Ule, aya haiden gedín gerō sur ayōf.’”

### Pol Í Rom Tamo Aní Kurō Fesin

<sup>22</sup> Tamo kayau musei Pol karí difiyek dile, í od enei irō di, idi kakaí de fen, diweig diron, “Ukesig, tenebur tamal uraileg! Í mata ibodōya to biya!”

<sup>23</sup> Idi diweig diro ken, dogo neid kolos dinukakã dirara ken, aas ilun diraran. <sup>24</sup> Age dife di, kusí tamo neid odug, Pol kusí tamo neid fō bun dirou dilauw nigin irokenēdin. Tamo idi Pol eig de diweig dirokenen aní nē gariya keleí youf nigin, Pol wagí difiye ken, to difiyēf nigin, í irokenēdin. <sup>25</sup> Idi í wagí difiyēf nigin yaí difiyē mog, Pol kusí tamo neid orowa an ifaren aní irokenen, “Á, Rom tamo, mosor ado be ya keleí sa ken, wagí fiya are lo dō fiya de?”

<sup>26</sup> Kusí tamo neid orowa od enei karí ye fen, í kusí tamo neid odug garan ile fen, í irokenen, “Ò ere naig wou fenē? Tamo enei í Rom tamo.”

<sup>27</sup> Kusí tamo neid odug Pol garan ile fen, to fiyen, “Ò urokana, ò Rom tamo de?”

Pol í iron, “Are momoi.”

<sup>28</sup> Age ye di, kusí tamo neid odug iron, “Aya Rom tamo wō auf nigin, moni odugem na alen.”

Pol iron, “Aní ere, aya Rom tamo gō difiyan.”

<sup>29</sup> Age ye di, tamo Pol to difiyēf nigin age difen idi, kaisã bagai folō difelen. Kusí tamo neid odug íg, Pol í

Rom tamo, sen nem ifon aní weder fokō yel fen, kumí yen.

### Juda Neid Uyu Irouya Guru Fiya Meleid Bun

<sup>30</sup> Naa aní ile di, kusí tamo neid odug í, Juda idi Pol bou bun od dun aní nē gariya tutuk bagai keleí youf nigin oron, aní nigin, í Pol yalisne ken, pris odudug ado Juda neid uyu irouya ganan guru difouf nigin irokenēdin. Agef fen, í Pol yale irusi, idi wagedin ifarnen.

**23** Pol guru fiya aní lo feid le fen, iron, “Turau tar, aya Negur kabí ifanan aní, wau karētut bagai ado age alef asi, gama naa enei bun.” <sup>2</sup> Od ení irō di, pris neid mudur Ananias, tamo Pol non difaren anidi í sigor daū difouf nigin irokenēdin. <sup>3</sup> Age ye di, Pol Ananias irokenen, “Negur ò inō irãf, ò pen lalaum garã naki fiya! Ò lo kilei es wiyauw nigin an ubodok, aní ere, ò lo wal wo fen, aya dinauf nigin urokenēdif!”

<sup>4</sup> Tamo Pol non difaren anidim í dirokenen, “Ò Negur nē pris neid mudur kumí sã kono wiyek de?”

<sup>5</sup> Age de di, Pol iron, “Turau tar, í pris neid mudur aní aya to kelein. Are Negur nē Itotoya bun ibodok, ‘Ogon tamo kayau neid uyu irouya nigin od sane to urōf.’ †”

<sup>6</sup> Age ye fen, Pol idi tuní Sadusia tamo, tuní Farisia tamo aní keleí ken, uyu irouya neid guru fiya mala bun iweig iron, “Turau tar, aya Farisia tamo taka, Farisia tamo naaluid. Aya laa bun tamal mata kel fãya nigin wau iseya ado nigin, kot bun afaref.” <sup>7</sup> Pol od enei irō di, Farisia tamo ado Sadusia tamo geid fefe de fen, guru fiya aní faraf uru fen. <sup>8</sup> (Sadusia tamo idi dirōdig, laa bun tamal mata kel fãya sã, engel sã, uureg sã, aní ere, Farisia tamo idi dirōdig, aní ganan are dibodok.)

<sup>9</sup> Aiteid oduduge di, lo ifelnēdiya tamo tuní, idig Fariisia bun temeleid fafã de fen, totol bagai fe de diron, “Amã tamo enei bun kũ fenēya taka to mailef. Í uurem be engel takam be irokenen are, naig fiyauw?” <sup>10</sup> Fefeya aní ile, sane le di, kusí tamo neid odug Pol fisik difouf ye fen, kumí yen. Aní nigin, í kusí tamo disil, imedin tamal totol ado son difeid, kusí tamo neid fō bun diroulauf nigin, irokenēdin.

<sup>11</sup> Bō aní bun, Oduq Pol non ifar fen, iron, “Totol uno! Ò Jerusalem ein, aya nigin wogò wol gen, ò Rom ouneg ago wogò wouf.”

### Pol Dukesiyouf Nigin Naab Dimiren

<sup>12</sup> Bonimeí di, Juda idi guru de fen, Pol yukesiya nigin kisi katō difen. Pol yukesiya sã mog, idi saaf ado naan to dãf nigin waud kuturol fen, od difon. <sup>13</sup> Tamo foti wal fiya anidim, enei nigin kisi katō difen. <sup>14</sup> Idi pris odudug ado uyu iroudiya bun dile fen, diron, “Pol yukesiya sã mog, amã ereb taka to mãf nigin waumã kuturol fen, od mafon. <sup>15</sup> Aní nigin, gama ã uyu irouya neid guru fiya geid, tamomoi ge fen, Pol nigin tutuk bagai keleí youf ge fen, í ã gein dirou disiyouf nigin, kusí tamo neid odug urokenēgouf. Amã, í ein wōya sã mog, í maukesiyouf nigin dodok mafef.”

† Eksodas 22:28

<sup>16</sup> Anī ere, Pol main nē naal kisi enei karī ye fen, ī kusī tamo neid fō bun ile fen, Pol irokenen.

<sup>17</sup> Age ye di, Pol kusī tamo neid orowa taka iweignē isi di, iron, “Tamo gaū enei wale, kusī tamo neid odug gein uroule. Ī od taka irokenēf nigin ado.” <sup>18</sup> Anī nigin, ī kusī tamo neid odug garan yale iroule fen, iron,

“Kalabus tamo Pol iweigna fen, tamo gaū enei ō gein arou asiyouf nigin irokanal, ere nigin, ī od taka irokonōf nigin ado.”

<sup>19</sup> Kusī tamo neid odug, tamo gaū ima yale irou, yerin dile fen, to fiyen, “Aya ere od anī urokanau fenē?”

<sup>20</sup> Tamo gaū iron, “Juda idi waud tekeleil, tamomoi de fen, Pol nigin tutuk bagai keleī youf de fen, nil uyu irouya neid guru fiya mala bun, ī diroulauf nigin dirokonōf. <sup>21</sup> Are idi to karī wiyēdiyof, ere nigin, tamo foti wal fiya anidim ī nigin dimin ken, tari difef. Pol yukesiya sā mog, idi saaf ado naan to dāf nigin waud kuturul fen, od difon. Idi dodok difel fen, Pol idi garan sur fiya nigin ogon yoya anī tari difef.”

<sup>22</sup> Kusī tamo neid odug tamo gaū anī weder irou fen, sur fen, “Ō enei urokanal anī, aib taka to urokenēf.”

### Pol Sisaria Taun Diroule Dinene

<sup>23</sup> Age fel fen, ī kusī tamo neid orowa uru iweigneīd, disi di, irokenēdin, “Kusī tamo tu hundred ado, kusī tamo sewenti hos adodo, kusī tamo tu hundred ot adodo anidim, bō nain kilok Sisaria taun ulagauf nigin, dodok gouf. <sup>24</sup> Pol teten ibod ken, Gawaman nē Mudur Feliks bun biya ile wō youf nigin, hos tunī dodok gouf.”

<sup>25</sup> Ī pas eig ye itoton:

<sup>26</sup> Aya Klodius Lisias,

Odug Gawaman nē Mudur Feliks aan ayok.

<sup>27</sup> Tamo enei Juda tamom dale fen, dukesiyou fenē age difen, anī ere, aya neu kusī tamo geid masi mäsennen, ere nigin, aya ī nigin kelein, ī Rom tamo.

<sup>28</sup> Idi ī bun od dun anī, aya gariya keleī youf nigin, ī dogo neid uyu irouya guru fiya bun aroulen. <sup>29</sup> Ī bun od dun are dogo neid lo nigin age difen, anī ere, ī laa fiya nē be, kalabus ilauf nē ereb taka to age fen anī aya kelein. <sup>30</sup> Aya ī dukesiyouf nigin naab dimirek ya anī karī au fen, aya kaisā bagai ī, ō gein sur afiyen. Ī bou bun od dun idig, ō malā bun nedi morō yaor difouf nigin arokenēdin.

<sup>31</sup> Anī nigin, kusī tamo idi irokenēdin kilei, dō def age difen, idi bō Pol dale dirou, Antipatris taun dilen. <sup>32</sup> We fele di, idi, kusī tamo hos adodo, Pol geid dilauf nigin dirokeneīd fen, idi kusī tamo neid fō bun keku de dilen. <sup>33</sup> Kusī tamo hos adodo Sisaria taun wō de fen, pas anī gawaman nē mudur difen ken, Pol ī ima bun dinon. <sup>34</sup> Gawaman nē mudur ī pas anī iwes fen, Pol ī teneub nanī bun tamal anī to fiyen. Gawaman nē mudur ī, Pol Silisia provins bun tamal anī keleī ken, <sup>35</sup> ī iron, “Aya ogon od, tamo ō bun od dun anidi ein disiyof bun, karī auf.” Age ye fen, ī Pol Herod nē fō bun dinene ken, lo difouf nigin irokenēdin.

### Pol Feliks Mala Bun Kot Fen

**24** Naa faif ilele di, pris neid mudur Ananias, uyu irouya tunī ado, lo keleī tamo yana Tertulus dedig geid, Sisaria taun disilen. Idi Pol bouwa bun od dūf nigin, gawaman nē mudur mala bun wō den. <sup>2</sup> Anī Pol diweignē, isi di, Tertulus Feliks mala bun, Pol bun bou yūya od anī gariya ino irokenen, “Amā ō farumen wau inosiya sain meluk mabodok masin. Ogon lo fiya biya bun, neda teneub bun ereb ereb biya musei wowā den. <sup>3</sup> Odug Feliks, modoū ganān ado naab ganān bun, amā enei keleī ken, anī nigin fatuk bagai de mayok. <sup>4</sup> Anī ere, aya ogon sain to akasiyouf nigin, ō waū ino ken, sain naal bagai karī wamāf nigin arokonok.

<sup>5</sup> “Tamo enei morō inoya tamo, teneub ganān bun, Juda tamo atun kuru yalesedig anī amā mailen. Ī Nasaret idegēya momoiya mala neid uyu irouya. <sup>6</sup> Ī tempeleg amuyē ifenēf nigin age fen, anī nigin, amā ī malen. <sup>8</sup> Ō † ogo tamo enei to wiyēf are, od ī bou bun manof anī ganān momoi bagai ya anī, ō keleī youf.”

<sup>9</sup> Juda tamo idi, ī bou bun od yūya bun megeir dife fen, are momoi, den.

<sup>10</sup> Gawaman nē mudur, Pol wogō youf nigin mudurem dogol fiyē di, Pol iron, “Aya keleī, yar musei ō teneub enei bun es fiya tamo ubodon, anī nigin, aya wau el fe fen, aya yug nigin megeir afouf. <sup>11</sup> Malai sā, ō yaor bagai keleī youf, are naa tuwelf dogol mogo ilef, aya Negur yana alesauf nigin Jerusalem eselen. <sup>12</sup> Aya bouwau bun od dun tamo idi keleī, aya aib taka ado tempel bun to fe maun be, Juda neid uub fō bun be taun nameneg, tamo kayau waud to alesen. <sup>13</sup> Idi gama aya bouwa bun od duk are momoi yeya anī, ō ifelnōya kisi feleya sā. <sup>14</sup> Anī ere, aya Naab idi idegēya dedig anī dō afe fen, tubuda tar neid Negur yana alesedig, are momoi auf. Aya Moses nē Lo ado, profet neid buk bun ditoton anī ganān nigin, momoi auf. <sup>15</sup> Ayag tamo eneidi gen Negur bun wau iseya ado, are madur tamo ado tamo sesen laa bun tamal mata ke de fā douf anī. <sup>16</sup> Anī nigin, Negur mala bun ado tamo meleid bun, aya wau karētut abodōf nigin sain ganān kabī total aledig.

<sup>17</sup> “Aya yar tunī firen abodkele fen, aya neu tamo kayau maleg nigin safina wau sā ado, Negur bun sesewi fiya nē safina, Jerusalem arou asin. <sup>18</sup> Aya nonorou lilik afel fen, enei age afe mog, idi aya tempel modoū bun fotou difiyan. Aya an tamo guru fiya mala taka geid san, katā san. <sup>19</sup> Anī ere, Juda tamo tunī Asia provins temeleid an difaren anidi, dogo bagai ō gein disi fen, bouwau bun od yūya idi adouf are, wogō dem bagai. <sup>20</sup> Sāf are, tamo eneidim, aya uyu irouya neid guru fiya meleid bun afaren sain, idi aya bun ereb mosor fotou difen anī wogō douf. <sup>21</sup> Tekelei dogol, aya idi meleid bun afar fen, aweig aron, are eig fiya, ‘Laa bun tamal

† Itotoya tunī eig de ditoton: malen. Age mafe fen, amā nemā lo kilei es mafiyēf nigin age mafen. <sup>7</sup> \*Anī ere, kusī tamo neid odug Lisias isi, ī imaman tamal total ado son fāman. <sup>8</sup> \*Agef fen, ī, tamo ī bou bun od dun anidi, ō gein disiyof nigin irokenēdin. Ō

mata kel fāya anī nigin, aya gama ā melein kot bun afaref.”

<sup>22</sup> Age ye di, Feliks ī yogo, Naab anī nigin keleī bagai, ī kot gudū fel fen, iron, “Kusī tamo neid odug Lisias isiyouf sain, aya ogon kot nigin od afōf.” <sup>23</sup> Ī, Pol lo difouf, anī ere, ī karika difen ken, yogon mou tar ī ereb lau fef anī kulatun difouf nigin yo fiyēdiyof nigin, kusī tamo neid orowa irokenen.

<sup>24</sup> Naa tunī ilele di, Feliks ī aiwa Drusila Juda kayau ado disin. Ī Pol nigin od sur fe, isi fen, ī Kristus Jesus bun momoia nigin wogō ye di, karī yen. <sup>25</sup> Pol ī Negur nē madur fiya nigin, tamo yogon oroya kulatun fiya nigin ado, es fiya fau isiyouf anī nigin dir fe di, Feliks ī kumī ye fen, iron, “Are de bure welef! Wadā ule. Sain biya adouf are, ō nigin od sur afouf.” <sup>26</sup> De sain anī bun, Feliks ī, Polem moni ifenēf nigin oron, anī nigin, sain musei Feliks Pol nigin od sur fe fen, urom wogō dedig.

<sup>27</sup> Yar uru ilele di, Porsius Festus, Feliks nē modoū yalen. Anī ere, Feliks Juda tamo meleid yalouf nigin, Pol kalabus bun itornē ibodon.

### Pol Festus Mala Bun Kot Fen

**25** Festus provins anī bun wō ye, naa towo ilele di, ī Sisariam Jerusalem iselen, <sup>2</sup> an pris odudug ado Juda neid uyu iroudiya geid, ī mala bun wō de fen, Pol bou yūya od anī dirokenen. <sup>3</sup> Festus ī wau ifeneīd fen, Pol Jerusalem sur fe di, ilauf nigin total bagai dirokenen, ere nigin, idi naab luwen dimin ken, Pol dukesiyouf nigin dodok difen. <sup>4</sup> Age de di, Festus ī irokenēdin, “Pol oun Sisaria kalabus bun ibodok. Aya yug mogo an alau fenē. <sup>5</sup> Anī nigin, tamo anī ereb kū fenen ouf are, āgenei uyu irouya tunī aya weim Sisaria mele fen, an ī bou yūya od wogō douf.”

<sup>6</sup> Festus ī idi geid, naa eit be ten dibodkele fen, Sisaria isilen. Naa anī ile di, ī es fiya modoū bun ibod ken, Pol ī wagen dirousiyouf nigin irokenēdin. <sup>7</sup> Pol wō ye di, Juda idi Jerusalem temeleid disin ī salili difiye ken, ī mosor sane bagai inon de fen, ī bou yūya od musei diron, anī ere, idi anī nē gariya to yaor difedin.

<sup>8</sup> Age dife di, Pol yogo nigin isennēya od iron, “Aya Juda neid lo nigin, tempel nigin, Sisa nigin be, ereb kū fenēya taka to age afen.”

<sup>9</sup> Anī ere, Festus ī, Juda tamo ī nigin waud yenēf nigin wau iro ken, Pol irokenen, “Ō Jerusalem usel fen, boū yūya od eneidi nigin an aya malaun kot bun ufarauf de?”

<sup>10</sup> Pol iron, “Aya gama Sisa nē kot bun yeir afaref, ein aya kot difiyau. Ō ogo keleī bagai, aya Juda tamo bun kū fenēya taka to anon. <sup>11</sup> Anī ere, aya laa nē mosor taka anon ouf are, aya laa nigin to atorok. Anī ere, Juda tamo eneidi bouwau bun od dun anī momoi sāf are, aya taka nem idi imeid bun inenaya kisi feleya sā. Aya Sisa bun kot afouf.”

<sup>12</sup> Festus ī, yogon lo keleī tamo geid, katō difel fen, iron, “Ō Sisa bun kot afouf wol. Ō Sisa gein ulauf.”

### Festus Pol Nigin King Agripa To Fiyen

<sup>13</sup> Naa tunī ilele di, King Agripa Bernis ado, Festus aan difiyēf nigin Sisaria taun disin. <sup>14</sup> Idi naa musei an dibodō di, Festus Pol nigin king ado katō de fen, ī iron, “Feliks ī, kalabus tamo taka ein itornen ibodok. <sup>15</sup> Aya Jerusalem ele di, pris odudug Juda neid uyu irouya geid, ī bun bou yūya od dirou disi fen, ī mosor ado afiyēf nigin dirokanan.

<sup>16</sup> “Anī ere, aya arokenēdin, Rom neid tobonunā bun, tamo taka bou bun od duk ī, yogon kiwai tar meleid bun ifar fen, bou bun od dun anī nigin, yogo bou isennēya od wogōya sā mog, are kaisā tamo anidi imeid bun to dinenēf. <sup>17</sup> Idi aya weim ein masi fen, aya to foi aun, we fele di, aya es fiya modoū bun abod ken, tamo are dale dirou disiyouf nigin arokenēdin. <sup>18</sup> Yogon kiwai tar fā de wogō den, anī ere, aya mosor kisi afen anī nigin taka to bou bun dun. <sup>19</sup> Anī ere, idi dogo neid momoia nigin ado, laa tamo yana Jesus, Pol ī nigin mata ibodok yedig anī nigin, ī geid fefe den. <sup>20</sup> Aya enei nigin naig afe tutuk keleī youf au fen, nene aun, anī nigin, aya ī Jerusalem ile fen, bou bun od dun enei nigin an kot bun ifarauf nigin to afiyen. <sup>21</sup> Anī ere, Pol ī kusī tamom lo difiyē dile, fau dum Sisam es fiyēf nigin irokanan. Anī nigin, aya ī lo difiyek dile, ī Sisa gein sur fiya nigin naab amir ken, sur afiyēf sain bun anī nigin arokenēdin.”

<sup>22</sup> Age ye di, Agripa Festus irokenen, “Aya yug tamo enei karī afiyē fenē.” Festus iron, “Ō nil karī wiyēf.”

### Pol Agripa Mala Bun Ifaren

<sup>23</sup> Naa anī ile di, Agripa Bernis ado, biya biyamā de disi, guru fiya fō aaben, kusī tamo neid odudug, taun nē uyu iroudiya geid dilen. Festus irō di, Pol aaben dirou disin. <sup>24</sup> Festus iron, “King Agripa ado tamo ganan weim tafaref ā, tamo enei ulegef. Juda tamo kayau ganan Jerusalem ado ein Sisaria, ī nigin total bagai dirokanan. Idi ī mata to ibodōf nigin diweig diron.

<sup>25</sup> Aya, ī laa fouf nē ereb taka to age fen anī ailen. Anī ere, ī Sisa bun kot fouf nigin iron, anī nigin, aya ī Rom sur fiya nigin kisi afon. <sup>26</sup> Anī ere, aya ī nigin ereb od Sisa bun atotkenēf anī yaor sā. Anī nigin, aya ā ganan meleī bun ī arou asil, King Agripa ō bun bagai, anī bunem aya ī to afiyē keleī ken, ī nigin ereb od itotoya nigin adouf be. <sup>27</sup> Ere nigin, aya kisi afef, kalabus tamo ī ereb mosor inon anī to yaor mog, sur afouf, are to biya.”

**26** Age ye di, Agripa Pol irokenen, “Aya ō ogo nigin wogō wouf nigin arokonok.” Anī nigin, Pol imam fe fen, yogo isennēf nigin wogō yen, <sup>2</sup> “King Agripa, bolē bagai, aya gama ō malā bun afar fen, Juda tamo aya bouwau bun od dun anī ganan nigin, aya yug isennauf nē od wogō auf. <sup>3</sup> Bolē bagai auf, ere nigin, ō Juda neid tobonunā ado luwa irouya anī ganan keleī. Anī nigin, ō folo reis fen, karī wiyau nigin agonok.

<sup>4</sup> “Aya kesu naalun naig be afe abodon are, Juda tamo ganan keleī. Uruwa bun, aya neu teneub bun abo-

don, age afe fen, Jerusalemeg abodon are idi keleĩ.

<sup>5</sup> Idi aya nigin sain meluk kelein, anĩ idi orodiyouf are, idi sã wogõ douf, are ada neda momoiya mala bun, Farisia tamo idi lo total bagai dõ difedig anidi neid taka abodon. <sup>6</sup> Negur ada tubuda tar bun age afouf bagai fiyēdin anĩ bun, aya wau iseya ado, anĩ nigin, aya gama kot bun afaref. <sup>7</sup> Negur age afouf bagai fiyēdin anĩ nigin, ada neda ibor tuwelf, gaa ado bõ ado total bagai Negur aruna dales fen, anĩ kisi fele di, dilouf nigin waud iseya adon. O king, wau iseya enei nigin, Juda idi aya bouwau bun od duk. <sup>8</sup> Ere nigin ã, Negur laa tamo kel turĩ fiyek anĩ kisi feleya sã gef?

<sup>9</sup> "Aya yugeg, Jesus Nasaret tamal yana kiwai afenēf nigin ereb ereb ganan age afouf aun. <sup>10</sup> Are aya Jerusalem an age afen. Pris odudug bun yoya ale fen, Negur nē tamo kayau musei kalabus bun anenēdin. Idi laa bun dinenēdin sain, ayag idi laa bun dinenēdiyof nigin yo aun. <sup>11</sup> Sain musei, aya idi darau afenēdiyof nigin, Juda neid uub fõ fõ bun elen, age afe fen, idi Negur kono difiyēf nigin nugo afiyēdin. Aya idi nigin nameu sane bagai yen ken, aya idi kafĩ fiya afenēdiyof nigin yaũ tauneg elen.

<sup>12</sup> "De anĩ nigin sain taka bun, aya pris odudug neid od ado, yoya bun Damaskus taun elen. <sup>13</sup> O king, gaa atun age fiya naab luwe ele mog, aya saa ilun tamal fula fiya taka, gaa nē medeĩya wal fiya, aya neu kabĩ turau tar geid bun, fula felen anĩ ailen. <sup>14</sup> Amã ganan tenebur kuku mau fen, ait taka Hibru od nem eig ye irokana mog, karĩ aun, 'Sol, Sol, ere nigin ò aya daig wiyaf? Ò aa waila ado bun yē urak are, ò nigin malai bagai.'

<sup>15</sup> "Age ye di, aya to afen, 'Odug, ò aim?'

"Odug iron, 'Aya Jesus, ò daig wiyaf anim. <sup>16</sup> Gama ò fã wale yem ufar. Aya ò bun wõ aul, ere nigin, ò neu kabĩ tamo wõ wo fen, ò aya nigin ereb ulen ado ereb afelnõf anĩ wogõ wouf nigin agirnon. <sup>17</sup> Aya Israel tamo kayau bun ado haiden buneg asennõf. Aya idi bun ò sur ayok, <sup>18</sup> idi meleid fokõ yel fen, gugum bun tamal lalan bun disiyouf ado, Satan nē megeir bun tamal Negur bun disiyouf, anĩ bunem idi neid mosor nigin weder tu keleya dale fen, aya nigin momoi de fen, fateuledin anidi atun dogo neid modoũ gei difouf.'

<sup>19</sup> "King Agripa, anĩ nigin, aya saa ilun tamal malau seleulã kurãf fen, ailen anĩ to adodon. <sup>20</sup> Uruwa, oun Damaskus taun difaref anidi bun, Jerusalem ado Judia distrik ganan bun difaref anidi bun ado, haiden buneg, idi waud falei ye, Negur bun falei dife fen, ereb age difef bunem, idi waud falei yen anĩ yaor difouf nigin wogõ aun. <sup>21</sup> Anĩ nigin, Juda idi tempel modoũ bun daleya fen, dinakesiyof fenē nigin age difen. <sup>22</sup> Anĩ ere, Negur aya isennaf isi, gama naa enei bun, anĩ nigin, aya ein afar fen, nanaal ado odudug bun wogõ auf. Aya Moses profet geid agef wõ youf den anĩ to adoden, wogõ auf, <sup>23</sup> are Kristus darau yale fen, ï ket laa bun tamal mata kel fã ye fen, Israel tamo kayau ado haiden geid bun, fula fiya anĩ nigin kurõ fesiyouf anĩ."

<sup>24</sup> Pol yogo bouwa isennēf nigin od enei wogõ ye di, Festus ıweig iron, "Pol, ò wadã inok. Ogon keleĩ odug anim wadã bun irouleyok."

<sup>25</sup> Pol iron, "Odug Festus, aya wadã sã. Ereb aya orok enei are momoi, gariya ado. <sup>26</sup> King ï enei nigin keleĩ, anĩ nigin, aya kumĩ sã wogõ ayok. Aya momoi auf, are enei taka ï mala bun to iminen, ere nigin, enei iminēyan to wõ yen. <sup>27</sup> King Agripa, ò profet ganan nigin momoi wof de? Aya keleĩ, ò momoi wof."

<sup>28</sup> Age ye di, Agripa Pol irokenen, "Ò kisi wof, are sain tobega eig fiya bun aya Kristen wõ auf nigin neu kisi falei wouf de?"

<sup>29</sup> Pol iron, "Sain tobega be, sain meluk, aya Negur kosē afiyēdig are ò nigin dogol sã, ganan gama aya karĩ wiyagef ãg, aya gen wowã gouf nigin, anĩ ere, sen enei dogol anĩ to difõyeif."

<sup>30</sup> Age ye di, king, gawaman nē mudur, Bernis ado, idi weim dibodon ganan fafã den. <sup>31</sup> Age de fen, idi aab ditor dile, abob diroken ken, diron, "Tamo enei ereb taka laa fouf nē be, kalabus ileya nē to age fef."

<sup>32</sup> Agripa Festus irokenen, "Tamo enei Sisa bun to kot fem are, ï yalisenya kisi feleyam."

### Pol Waag Bun Rom Ilen

**27** Amã † waag bun Itali kantri malauf nigin od difõ di, Pol kalabus tamo tunĩ geid, kusĩ tamo neid orowa taka yana Julius ima bun dinenēdin, ï Sisa nē Kusĩ Mala bun tamal taka. <sup>2</sup> Amã waag taka, Adramitium taun tamal Asia provins bun maaĩ ub ub ilau fenē agef mog, sõ mau fen, melen. Aristakus, Tesalonika taun tamo oun Masedonia provins bun tamal, ï amã weim.

<sup>3</sup> Naa ile di, Saidon taun wõ maun. Julius ï Pol wau ifen ken, ï mou tar gedin ile fen, ereb ï lau fef anĩ difenēf nigin yo fiyen. <sup>4</sup> Anenem amã baban waag bun sõ mau fen, Saipras nuyo wagenem melen, ere nigin, yau naaburamã gudũ fen. <sup>5</sup> Amã Silisia ado Pamfilia maaĩ atu mele fen, Lisia provins bun Maira taun wõ maun. <sup>6</sup> An kusĩ tamo neid orowa, Aleksandria taun tamal waag taka Itali kantri ilau fenē mog, ile fen, ï amã waag bun inenaman. <sup>7</sup> Amã naa musei, foinenem waag bun, Nidus taun non wõya nigin darau nem melen. Yau naaburamã gudũ fe di, amã Krit nuyo uyu Salmone wal mafe fen, Krit nuyo wagenem melen. <sup>8</sup> Amã darau kininem maaĩ ub dõ maf masil, modoũ yana Basis Biya dedig, Lasea taun non an wõ maun.

<sup>9</sup> Naa musei ilelen, agef fen, waag bun ileya are mogo sane bagai len, ere nigin, naa are Kuriya Naa †† dumen. Anĩ nigin, Pol wedereid iron, <sup>10</sup> "Tamo, aya ailef are, neda waag bun delē sanel fen, waag adoi, udũ adoi, tamo adag daũf sa kalauf." <sup>11</sup> Anĩ ere, kusĩ tamo neid orowa, Pol wogõ yen anĩ to karĩ ye fen, waag irouya tamo ado waag marau idi neid od dõ fen. <sup>12</sup> Basis are yau sain bun ifareya to biya nigin, musei ganan, waag bun tokõ mafel, Finiks wõ mau fen, an mabodõf

† Luk ï Pol geid, sain anĩ bun waag bun weim dilen. †† Kuriya Naa anĩ, Israel tamo kayau mosor yaleleya nē naa.



nigin kisi difon. Finiks are Krit nuyo nē basis taka, gaa ileyen saut ado not melem wage ifenek.

### Yau Uyē Ado

<sup>13</sup> Yau saut melem foinenem fū fe di, idi neid oroya kilei agef wō yen anī kisi difen. Anī nigin, idi anka dī difesel fen, waag bun Krit nuyo maaī ub dō de dilen.

<sup>14</sup> Sain meluk ileyā sā mog, yau odug total ado, yana 'Gaa iseyan not tamal' dedig anī, fā ye fen, nuyo bunem fūf irou isilen. <sup>15</sup> Yau odug total ado waag yū di, waag yau bun ileyā kisi feleya san. Anī nigin, amā waag ulum irouya matorō di, yaum irouleman. <sup>16</sup> Amā nuyo naal taka Kauda dedig dumenem wal mafe fen, isennēya nē waag naal darau nem dī mafen. <sup>17</sup> Tamo, isennēya nē waag naal, waag odug teten dalesel dino fen, gama idi malū nem waag odug anī to fara foug nigin luwa filu difen. Idi waag, maaī kulum yana Sirtis bun sōya nigin kumī de fen, anka folō difesi di, yaum waag iroulen. <sup>18</sup> Yau fatuk bagai waag yuk ile, we fele di, idi udū tunī naanū diraran. <sup>19</sup> Naa anī ile di, idi imedim waag nē safina naanū diraran. <sup>20</sup> Naa musei, gaa ado barisa to mailen, agef fen, yau odug total ado de agef yenen. Anī bunem, amā isennēya malouf nigin waumā iseya ganā sa kelen.

<sup>21</sup> Tamo idi sain meluk saaf sā denek dilen nigin, Pol meledin ifar fen, iron, "Tamo ā, neu od Kriteem waag bun to talauf nigin arokenein anī karī gem, are dem, ago gem are, daū fiya ado iraraileya enei to fotou gem. <sup>22</sup> Anī ere, aya total unogouf nigin total bagai arokeneik, ere nigin, āgenei taka to fō yalauf, waag dogol narī foug. <sup>23</sup> Nor bō, Negur, aya yogon, aya ī aruna aledig, yogon engel sirun ifar fen, <sup>24</sup> iron, 'Pol, to kumī wo. Ō de Sisa malan kot bun ufarauf. Negur ō wau ifon ken, ganā ō geid waag bun ulegef idi neid mata ō ifonon.' <sup>25</sup> Anī nigin, tamo, total unogouf, ere nigin, aya Negur bun momoiya anof, are ī irokanan kilei fau agef wō youf. <sup>26</sup> Anī ere, ada nuyo taka bun sō tauf."

### Waag Narī Felen

<sup>27</sup> Naa fotin nē bō anī bun, amā fau Mediterenian Maaī bun yaum iroulemā mog, bō atun age fiya waag tamo idi teneub melsā melef ya anī kerē fedin. <sup>28</sup> Idi naan nē mala es difoug nigin malū folō difele di, isil fen, naan nē mala foti mita dilen. Sain naal bagai dile fen, idi baban malū folō difele di, isil fen, naan nē mala teti mita dilen. <sup>29</sup> Idi waag meein tuwa bun ileyā nigin kumī de fen, idi waag dumen anka aiwa adodo folo folō difeledi di, disil fen, gaa nigin kosē den. <sup>30</sup> Waag tamo idi, waag bun tamal diyalalau fenē nigin, idi isennēya nē waag naal folō difele di, maaīwō isilen, tamo-moi de fen, waag uyu bun anka dirarāf nigin de fen, age difen. <sup>31</sup> Age dife di, Pol kusī tamo neid orowa, kusī tamo geid irokenēdin, "Tamo eneidi waag bun to dibodōf are, ā isennēya to walogouf." <sup>32</sup> Anī nigin, kusī tamo idi, malū isennēya nē waag naal iroun anī gudū difele di, ilen.

<sup>33</sup> We kurā fiya sā mog, idi ganā saaf dāf nigin, Pol ī total bagai irokeneid fen, iron, "Naa fotin bun ā sii yei ken, saaf sā usigen, ā saaf taka to wōgen. <sup>34</sup> Anī nigin, gama aya ā saaf wāgauf nigin total bagai arokeneik. Ā mata ubodōgouf nigin wāgauf. Āgenei taka, mudur bun fatiya tekelei bagai taka to kusuf irāf." <sup>35</sup> Pol od enei wogō yel fen, idi ganā meleid bun, ī bret tunī yale, Negur de fiyekel fen, mūf gariya ino yon. <sup>36</sup> Idi ganā waud yalese di, saaf don. <sup>37</sup> Amā waag bun mafaren ganā gu feleya are 276. <sup>38</sup> Idi dakas kisi fele di, idi waag karikauf nigin, wit ganā maaīwō diraran.

<sup>39</sup> Lalan ise di, teneub uyu nain be ya anī idi keleī san, anī ere, alelei ub mumul ado anī dilen, kisi falauf are, idi an waag dirou dilauf nigin kisi difon. <sup>40</sup> De sain tekelei bun maaīwō anka kokour de ditorarā yen ken, malū waag uyu gadi fiya nē pul difon anī biru difeledin. Age difel fen, idi yau bun sel dalesel fen, yau difenē di, waag ubun irou ilauf nigin age difen. <sup>41</sup> Anī ere, maaī irak isi abob bun dūdig nē an, waag maaī kulum yu ken, anī teten sō yesen. Waag uyu degē fel fen, tonoya kisi feleya san, age fe di, waag ibu maaim yū di, faraf fisik fe irailen.

<sup>42</sup> Kalabus tamo idi maaīwō to gaōgī de diyawauf nigin, kusī tamo idi didenkesiyouf nigin katō difen. <sup>43</sup> Anī ere, kusī tamo neid orowa Pol isennēf nigin wau iro ken, kusī tamo idi dogo neid kisi to dō de age difoug nigin gudū felen. Idi yoyōya kisi feleya anidi, ketem waag bun tamal gurusā de fen, teneub bun dilauf nigin, ī ari fedin. <sup>44</sup> Tunī ganā aa bun be, waag masasak bun an dilen. Anī bunem, idi ganā biya bagai totoū teneub bun wowā den.

### Malta Nuyo Ubun

**28** Amā biya bagai ubun wō mau fen, nuyo are yana Malta ya anī kelein. <sup>2</sup> Tamo kayau an temeleid waud fatuk bagai difanaman. Uyē isi fen, feluken nigin, idi yā kū dife fen, amā ganā an difaman. <sup>3</sup> Pol ī aa were gurif fen, yā teten ino mog, gogour sane yā uruwam iru di, Pol ima bun degē felen. <sup>4</sup> Tamo kayau an temeleid, gogour anī Pol ima bun kuuri ye mog, dile fen, idi abob dirokenen, "Tamo enei tamo yukesiya tamo bagai, ere nigin, ī maaīwō tamal iyawol, anī ere, neda waitou Madur Fiya anim ī mata ibodōf nigin to oron." <sup>5</sup> Age de di, Pol ī gogour wiri fe di, yā malan isilen, anī ere, ī bun ereb taka to wō yen. <sup>6</sup> Tamo kayau ī ima dī youf be, kaisā bagai kubū ye laa foug de fen, kisi difen. Anī ere, idi sain meluk lo difef dile, ereb taka ī bun to wō yen anī dile fen, idi kisi falei del diron, ī waitou den.

<sup>7</sup> Teneub akor melsā are, nuyo anī nē mudur, Publius nē teneub ibodon. Ī an fama ken, yogon fō bun gei famā iroule, naa towo el fe kulatun faman. <sup>8</sup> Ī tama dagi di, fataren yenen, bouwa uruwa ado te fururū yalen. Pol ī ilouf nigin ile kosē yel fen, ima teten ino di, dagi fara felen. <sup>9</sup> Enei wō ye di, nuyo bun dagi tamo tunī ganā ī garan disi di, el feid ledin. <sup>10</sup> Idi naab fire fire bunem el difama ken, amā waag sō mauf nigin do-

dok mafe di, idi amã ereb ereb lau mafen anĩ difanam.

### Rom Wowã Den

<sup>11</sup> Ogõ towo ilele di, amã, waag taka yau sain bun nuyo an si inon anĩ, sõ mau fen, melen. Waag are Aleksandria taun tamal, anĩ uyu bun, waitou aina ado Kastor Polluks ado meleidkanon dinon. <sup>12</sup> Amã Sirakus taun wõ mau fen, naa towo an mabodon. <sup>13</sup> Anenem amã waag bun mele, Regium taun wõ maun. Naa anĩ ile di, yau saut melem fã yen, baban naa anĩ ile di, amã Puteoli taun wõ maun. <sup>14</sup> An amã momoiya tamo tunĩ fotou mafiyēdi di, idi geid naa sewen mabodōf nigin dirokanaman. Age mafel fen, Rom taun masin. <sup>15</sup> Momoiya tamo an, amã masif ya anĩ karĩ de fen, idi diyok disi, Apius Maket ado Tamo Yenēya Fõ Towo bun an fotou difamãf nigin disin. Pol tamo anidi ileid fen, Negur de fiye ken, wau megeir yalen. <sup>16</sup> Amã Rom wõ mau fen, Pol ĩ mugu kusĩ tamo takam tari fiyek dibodōf nigin yo difiyen.

### Pol Oun Rom Kusĩ Tamom Tari Fe Mog, Biya Od Wogõ Yen

<sup>17</sup> Naa towo ilele di, Pol Juda neid uyu irouya iweig laisi, guru dife di, idi irokenēdin, "Turau tar, aya, neda tamo kayau ado, neda tubuda tar neid tobonunã to adodon, anĩ ere, aya Jerusalem oun daliya fen, Rom imeid bun dinenan. <sup>18</sup> Idi aya fele difiyale fen, dalisnau fenē age difen, ere nigin, aya laa nē mosor taka to anon. <sup>19</sup> Anĩ ere, Juda idi anĩ nigin kiwai dinon, aya neu tamo kayau nigin bouwa yūya od taka san, anĩ ere, naab taka san nigin Sisa bun kot afen. <sup>20</sup> Gariya anĩ nigin, aya fotou ayei ken, ã geid wogõ tauf nigin to ayein. Israel neid waud iseya anĩ nigin, aya sen enei nem difōyan."

<sup>21</sup> Idi diron, "Amã õ nigin Judia distrik bun tamal pas taka to malen, agef fen, turada tar idi anenem disin õ nigin od taka be, od sane taka to dirokanaman. <sup>22</sup> Anĩ ere, amã ogon kisi anĩ karĩ mauf nigin waumã irok, ere nigin, amã keleĩ, tamo kayau teneub ganan bun, ogon momoiya mala enei nigin kiwai od wogõ dedig."

<sup>23</sup> Idi Pol dilouf nigin naa taka dinon, naa anĩ bun, idi musei bagaim Pol ibodon nē an disin. Pol ĩ bonimei nem ile bõ, Negur nē tano nigin faded fiyeĩd fen, kurõ feis irokenēdin, ĩ Moses nē Lo ado profet neid itotoya bun, Jesus nigin idi neid kisi falei ye fen, momoi douf nigin age fen. <sup>24</sup> Tunĩ Pol wogõ yen anĩ bun waud falei yen, anĩ ere, tunĩ to momoi den. <sup>25</sup> Pol idikeleya od enei wogõ ye di, idi dogo dogol fefe de fen, dilelen, "Awa Uur Fateul profet Asaia sigor bunem eig ye wogõ yen, are ĩ tubuĩ tar momoi bagai od anĩ wogõ fiyēdin:

<sup>26</sup> "Tamo kayau enei bun ule fen, urõ, "ã wedereim karĩ gouf, anĩ ere, wedereĩ to fokõ youf, ã meleim ulogouf, anĩ ere, meleĩ to fokõ youf."

<sup>27</sup> Ere nigin, tamo kayau enei, idi waud katĩ felen, idi wederedim karĩya kisi feleya sã, age de fen, idi meleid difofakelen, age fiya sam are, idi meledim dilem, wederedim karĩ dem ado, idi waud fokõ ye fen, falei de di, aya idi el afedim.' †

<sup>28</sup> "Anĩ nigin, Negur nē isennēya haiden bun sur fen anĩ, ã keleĩ youf. Age fe di, idi anĩg karĩ douf!" ††

<sup>30</sup> Yar uru adok, Pol ĩ yogon fõ na yaledig bun ibod ken, ĩ dilouf nigin disin ganan aan fiyēdin. <sup>31</sup> Kumĩ sã ado kafĩ fiya sã, ĩ Negur nē tano nigin wogõ ye fen, Odug Jesus Kristus nigin ifelnēdin.

† Asaia 6:9, 10 †† Itotoya tunĩ eig de ditoton: douf!" <sup>29</sup> \* Pol od enei wogõ yele di, Juda idi dogo tutur fatuk bagai fefe de fen, dilelen.

# ROM

**1** Aya Pol, Kristus Jesus nê ferfer, aposel wõ auf nigin iweigna fen, Negur nê biya od wogõ auf nigin igirnan. <sup>2</sup> Biya od anī, Negur kulu bagai yogon profet promis od irokenēdi di, Negur nê Itotoya Fateul bun ditoton, <sup>3</sup> are yogon Naal, neda Odug Jesus Kristus nigin, ī tamo nê ibor bun are, Dawid nê ibor bun wõ yen, <sup>4</sup> agef fen, fateul nê Awa Uur bunem, ī laa bun tamal kel turī fiyen anim, Negurem Jesus ī Yogo Naal megeir barikā ado anī yaor kurõ fesin. <sup>5</sup> Ī bunem, amā yogon yana seli kulõ fiya nigin, haiden ganan atun temeleid, tamo kayau maweignēdi di, idi momoi de fen, dõ difouf nigin, amā wau ifenēya ado aposel nê kabī malen. <sup>6</sup> Āg, Jesus nê tamo kayau wowā douf nigin iweignēdif anidi atun, ubodōgef.

<sup>7</sup> Tamo kayau ganan Rom taun ubodōgef, Negur ā nigin wau laaf fen, tamo kayau fateul wõ gouf nigin iweignein, ā bun pas enei atotof.

Wau ifenēya ado wau inosiya, neda Tamada Negur ado Odug Jesus Kristus bunem, ā bun isiyouf.

## Pol Rom Ileya Nigin Bagai Wau Iron

<sup>8</sup> Uruwa bagai, aya ā ganan nigin, Jesus Kristus bunem, neu Negur de afiyek, ere nigin, āgenei momoiya nigin teneub ganan bun od iyokelen. <sup>9</sup> Negur ī nigin aya wau adok iro ken, ī Naal nê biya od wogõya bun aruna aledig, ī ileya mog, aya ā nigin toku neu kosēya bun faimud karī auledig. <sup>10</sup> Age afe fen, gama Negur orouf are, naab kā fele di, aya ā gein asiyouf nigin aya kosē auf.

<sup>11</sup> Aya ā ileyēya nigin bagai wau irok, are aya uur nê ege luwa tunī megeir ifareya nê anī afenēif nigin age afef, <sup>12</sup> anī bunem, aya ā geid, mugu mugu āgenei momoiya ado neu momoiya bunem abob tasennēf. <sup>13</sup> Turau tar, aya ā enei to keleī youf anī to orouf, aya, sain musei, ā gein isiya nigin kisi afen, anī ere, aya age fiya nigin, naab katī felef isi, gama enei bun, are aya, Juda sã anidi tunī ganan atun, age afen gen, ā atuneg gei ayeif nigin age afen.

<sup>14</sup> Negur aya isennan nigin, aya ī bun wareg ado. Anī nigin, Aya, tamo Grik od ado dogo neid tobonuneid keleī anidi ado, tamo Grik od ado dogo neid tobonuneid keleī sã anidi bun, kisi biya adodo, nene yedidiya buneg, wareg enei aūf. <sup>15</sup> Age fiya nigin, aya Rom taun ubodōgef ā buneg, biya od anī wogõya nigin kisi total alef.

<sup>16</sup> Aya biya od nigin to mama fiyaf, ere nigin, are Negur nê megeir, tamo ganan momoi def, kel gei fouf nigin, Juda idi bun keteme di, Juda sã anidi idi buneg age

fouf. <sup>17</sup> Ere nigin, biya od bun, Negur ī tamo kayau yogon mala bun madur bagai inenēdiya nê naab anī kurõ fesif, Negur ī tamo kayau yogon mala bun madur bagai inenēdiya nê naab anī momoiya bunem dogol isif, are Negur nê Itotoya bun ibodok kilei, “Madur tamo momoiya bunem mata ibodõf.” †

## Negur Nê Didi Tenebur Tamo Bun Isiyouf

<sup>18</sup> Negur nê didi, saa ilun tamal, tamo idi dogo neid sanem momoi anī lai difedig anidi neid mosor ado sane ganan bun yaoref, <sup>19</sup> ere nigin, ereb Negur nigin idi keleī youf are, idi bun yaor, ere nigin, Negur ī idi bun anī yaor fen. <sup>20</sup> Negur teneub saa ado kare fen sain bunem isi gamag, Negur nê tobonunā ileya kisi feleya sã anī, are in ibodkeleya megeir ado ī Negur ya anī, idi yaor diledig. Ereb Negur inodin anī bunem idi keleī, anī nigin, tamo idi galā taka sã.

<sup>21</sup> Idi Negur keleī, anī ere, idi ī Negur gen to yana dales fen, de difiyēdig, anī ere, idi neid kisi nene yel fen, idi neid waud neneya anī bunem dogo neid waud gugum kerū felen. <sup>22</sup> Idi amā kisi biya ado dedig, anī ere, idi neneya wowā de fen, <sup>23</sup> idi to bura leya Negur nê fula fiya medeīya anī falei difel, bura leya nê tamo, ninā, gaar ado, gaar luwedim diyōdig imedim meleidkanon dinon anī bun dinon.

<sup>24</sup> Anī nigin, Negur idi itornēdi di, idi neid waud irōya sane dõ de, noli mosor dino amuyē bun dile fen, idi neid bouwedim abob mama difenēdig. <sup>25</sup> Idi Negur nê momoi anī falei difel, idegēya bun dinon, age de fen, idi Negur ereb ereb kare fen anī ban, ereb ereb Negurem kare fen idi yeneid anī dales fen, aruneid daledig. Negur ī faimud yana yaleseyauf. Momoi.

<sup>26</sup> Enei nigin, Negur idi mama nê oroya bun itornēdi di, dilen. Idi neid kayaug, Negur bagu fedin geid bouweid bagu fiya ditor ken, falei del, kayau tutur Negur bagu fediya sã anidi geid bouweid bagu difedig. <sup>27</sup> Age fiya bagai, tamog Negur kayau ado bagu fedin anī ditor ken, idi abob bun noli nigin yā gaī de genen. Tamo, tamo tunī geid mama tobonunā age dife fen, idi neid idodōya mala darau dogo ke de dalen.

<sup>28</sup> Idi Negur nigin keleī yaleya ditoron, anī nigin, Negur idi itornēdi di, idi neid kisi sanel fen, idi ereb ereb to age fiya nê anī age difedig. <sup>29</sup> Idi tobonunā madur fiya sã fire fire ganan, sane, safina nigin neu dogol yeya ado, to ile oroya anim isokosen. Idi kiyeī, tamo yukesiya, kusī, idegēya ado, sanem barikā. Idi dumen od wogõ dedig, <sup>30</sup> idi bou yūya od wogõ dedig, Negur

† Habakuk 2:4

dudum difiyēdig, idi kono difedig, idi akoreid dūdig, idi dogo yeneid dalesedig. Idi sane age fiya nigin naab dimirēdig. Idi sineid temeid tar sigoreid to dō difedig. <sup>31</sup> Idi kisi biya sā, momoiya sā, waud laa fiya sā, waud yūya sā. <sup>32</sup> Idi Negur nē lo keleī, are idi anī age difef laa gurug difouf, anī ere, idi anī dogol to age difef diledig, anī ere, idi tunī anī age difedig anidig waud difenēdig.

### Negur Nē Es Fiya Madur Bagai

**2** Anī nigin, ò galā taka sā, ò aib taka es wiyēdig, erēb taka bun es wiyek, ò ogo boū uk, ere nigin, ò taka es wiyek, ò ogo de ago wodig. <sup>2</sup> Ada keleī, Negur nē es fiya idi age difef anidi bun isif, are momoi nē bun Negur es fedig. <sup>3</sup> Anī nigin, tamo ò aib, tunī age difef anidi es wiyēdig fen, òg anī ago wodig, ò Negur nē es fiya anī wal afouf wof de? <sup>4</sup> Ò, Negur nē biya fiya ò waū faleiya bun irouyō isif anī to keleī ken, yogon biya fiya, molol ado, feseya sā, idi kisi feleya bagai anī, ò kono wof de?

<sup>5</sup> Anī ere, ogon waū total ado ogon waū faleiya sā bunem, ò ogo nigin Negur nē didi wō youf naa bun walouf nigin didi kuru wof, sain anī bun Negur nē es fiya madur bagai anī yaorouf. <sup>6</sup> Negur ī “mugu mugu erēb age difen kilei ifenēdiyof.” <sup>7</sup> Idi feseya sā erēb biya age difen bunem, fula fiya medēiya, yana ado, to bura leya dimirēdig anidi, mata ibodkeleya ifenēdiyof. <sup>8</sup> Anī ere, idi dogo nigin dogol kisi de fen dimirē di, idi momoi anī ditor ken, sane dō difedig anidi bun, didi ado seyeya wō youf. <sup>9</sup> Morō ado darau, tamo sane age difedig ganān bun wō youf, Juda idi bun keteme di, haiden idi buneg age fouf. <sup>10</sup> Anī ere, fula fiya medēiya, yana ado, wau inosiya, idi biya age difedig ganān bun wō youf, Juda idi bun keteme di, haiden idi buneg age fouf. <sup>11</sup> Ere nigin, Negur ī Juda ado haiden, es fiya tekelei bunem es fediyof.

<sup>12</sup> Idi Moses nē lo sa ken, mosor dinof ganān, Moses nē lo sā daū falauf, idi Moses nē lo farumen dibod ken, mosor dinof ganān, Moses nē lo nem es fediyof. <sup>13</sup> Negur mala bun, idi lo karī dedig anidi madur bagai sā, anī ere, idi lo dō difedig anidi, Negur mala bun madur bagai youf. <sup>14</sup> Haiden idi lo sā dogo neid kisim erēb erēb lo irok kilei age difedig, idi lo sā, anī ere, idi dogo, dogo nigin lo. <sup>15</sup> Idi erēb erēb lo irok anī dogo neid waud bun itoton anī yaor difef, anī nigin, dogo neid kisi es fiya waud bun ibodok animeg, are momoi anī, yaor fe di, dogo neid kisim dogo bouweid yu ken, isenēid mog fef. <sup>16</sup> Neu biya od, Jesus nigin tamo kayau arokenēdif anī irok kilei, Negur Jesus Kristus bunem, tamo nē wau bun iminek anī es fouf naa bun, enei agef bagai wō youf.

### Juda Tamo Kayau Ado Lo

<sup>17</sup> Ò ogo nigin aya Juda tamo wof; ò lo bun ufar fen, aya Negur ado nigal mauf wo fen, yanā walesef; <sup>18</sup> ò lom faded yō di, ò Negur nē oroya keleī ken, erēb ma-

dur bagai anī ò biya wof; <sup>19</sup> ò ogo nigin momoi wof, are ò mala ifofakeleya neid ulum irouya tamo, ò idi gugum bun difaref anidi neid lalan, <sup>20</sup> ò neneya tamo neid tai fiya tamo, ò momou neid tise, ere nigin, ò lo bun keleī ado momoi anī barikā, <sup>21</sup> age fiyauf are, ò tunī ufelnēdidig, ò ogo to ufelnēdig de? Ò to bē walegei wodig, ò ogo bē waledig de? <sup>22</sup> Ò to seseirā unoi wodig, ò seseirā unodig de? Ò idegēya waitou anī to bagai oroyōdig, ò dogo neid tempel bun bē waledig de? <sup>23</sup> Ò aya lo ado wo fen, yanā walesedig, ò lo ifodulūya bunem Negur mama wenēdig de? <sup>24</sup> Are Negur nē Ito-toya bun ibodok kilei, “Ā bunem, haiden atun Negur yana kono difiyek.” †

<sup>25</sup> Ò lo dō wof are, mulū are isennok, anī ere, ò lo ufodulōf are, ò mulū ileya sā gen wō wof. <sup>26</sup> Anī nigin, idi mulū ileya sā anidim lo irok kilei dō difouf are, idi mulū ileyan gen to ilediyauf de? <sup>27</sup> Taka ī mulū to ile fen, lo dōf el fouf are, ī, ò lo itotoya ado fen, mulū ulen, anī ere, ò lo ifodulūya tamo ye fen, to es yōf de?

<sup>28</sup> Tamo ī bouwam dogol Juda tamouf, ī Juda tamo bagai sā. Bouwam dogol mulū ilef, areg mulū bagai sā. <sup>29</sup> Anī ere, tamo ī name bun Juda tamouf, ī Juda tamo bagai. Mulū bagai are, Awa Uurem, waud bun age fedig, lo itotoya bunem sā. Tamo age fiya, tamo bunem yana yaleseya to yaledig, anī ere, Negur bunem yaledig.

### Negur Age Afouf Yen Are Ī De Age Fouf

**3** Age fiyauf are, tamo ī aya Juda tamo yef bun, ere biya yalouf? Mulū bun ere biya adouf? <sup>2</sup> Naab ganān bun musei! Uruwa bagai, Negur nē od idi kulatun difouf nigin imeid bun inon.

<sup>3</sup> Juda tunī momoiya sāf are, naig fouf? Idi neid momoiya sā anim, Negur age fouf yen anī to age fouf de? <sup>4</sup> To bagai agef ilauf! Negur ī momoi bagai, age fe di, tamo ganān idegēya temeleid tauf. Are Negur nē Ito-toya bun ibodok kilei,

“Are sain ò wogō wouf bun, ò madur bagai anī yaorouf,

sain ò es diyōf bun, ò wal wediyof nigin.” †

<sup>5</sup> Anī ere, ada neda madur bagai sā anim, Negur nē madur bagai fatuk bagai yaor fouf are, ada ere tauf? Negur ī ada bun yogon didi ifanadauf nigin, ī madur sā tauf de? Aya tamo nē luwa irouya anī wogō auf. <sup>6</sup> To bagai agef ilauf! Age fiyauf are, Negur tamo kayau naig fe es fediyof? <sup>7</sup> Taka nem monē ye fen, irōf, “Neu idegēya anim Negur nē momoi bagai anī yaau du fe di, anī bunem, yogon fula fiya medēiya odugouf are, ere nigin aya fau mosor tamal ya ani, bouwau bun inouf?” <sup>8</sup> Ere nigin to eig youf, “Biya anī wō youf nigin, ada sane age tafouf” youf? Tunī amam od enei wogō maudig de fen, amā bouwamā yūya od dirōdig. Negur idi es feid fen, mala solo ifenēdiyof.

† Sam 62:12; Proverb 24:12

†† Asaia 52:5; Esekiel 36:22 † Sam 51:4

### Aibem Taka Madur Bagai Sã

<sup>9</sup> Amã ere mauf? Juda amã haiden wal fediya de? Gai sã bagai! Amã mogo, Juda ado haiden geid ganan mosor farumen kilei kilei dibodok ya anĩ, moron. <sup>10</sup> Are Negur nẽ Itotoya bun ibodok kilei,

"Madur bagai taka to ibodok, tekelei bargaig sã;

<sup>11</sup> taka nem kisi fokõya sã,  
taka nem Negur imirẽya sã.

<sup>12</sup> Ganan Negur nẽ naab fasis dife fen,  
ganan sesen len;

aibem taka to biya age fedig,  
tekelei bargaig sã." †

<sup>13</sup> "Idi neid uleidbanĩ, laa nẽ meku awa dede fiya sã gen;

idi neid baleid idegẽya wogõ dedig." ††

"Gogour sane nẽ mũ sigoredin ibodok." ‡

<sup>14</sup> "Idi neid eweid, isisĩya ado dirikeĩ bagai." ††

<sup>15</sup> "Idi neid yeid, tamo didenkesiyouf nigin tuninirya sã kaisã bagai dirãdig;

<sup>16</sup> idi neid iyõya bun, daũ fiya ado morõ dinodig,

<sup>17</sup> age de fen, wau inosiya nẽ naab idi keleĩ sã." ††

<sup>18</sup> "Idi neid meleid bun, idi Negur nigin kumĩ sã." †††

<sup>19</sup> Gama ada keleĩ, ereb lo irok are, idi lo farumen dibodok anidi irokenẽdif, anĩ bunem, eweid ganan omutukul del fen, tenebur tamo kayau ganan Negur nẽ es fiya farumen dibodõf. <sup>20</sup> Anĩ nigin, Negur ĩ, lo dõ fiya bunem, ĩ mala bun taka ĩ madur bagai to youf. Age fiya nigin, lom ada mosor tanon anĩ yaor fadadig.

### Madur Bagai Are Momoiya Bunem

<sup>21</sup> Anĩ ere, gama Negur ĩ tamo kayau yogon mala bun madur bagai inenẽdiya nẽ naab, are lo bunem sã anĩ yaor fen, are Lo ado profet neid wogõya bun kurõ difesin. <sup>22</sup> Negur ĩ tamo kayau yogon mala bun madur bagai inenẽdiya nẽ naab enei, Jesus Kristus nigin momoia bunem, idi momoi def ganan bun isif. Juda ado haiden bun de tekelei, <sup>23</sup> ere nigin, ganan mosor dinon, anĩ nigin, taka nem Negur fula fiya medeĩya bun ibodok ĩ wagen ileyã kisi feleyã sã. <sup>24</sup> Age dife di, Negur nẽ wau ifenẽya anim, kel gei fiya Kristus Jesus na yaledin bunem isin anĩ bunem, idi ege bagai madur bagai inodif. <sup>25</sup> Negur ĩ, Jesus nẽ naud bun momoia bunem, Negur nẽ didi yof fen, tamo kayau neid mosor yalekenẽdiya kabĩ yalouf nigin, Negurem Jesus sesewi founigin inenen. ĩ yogo madur bagai ya anĩ yaor fiya nigin, enei age fen, ere nigin, in molol bunem, uruwa mosor dinon anĩ mala solo ifenẽdiya sã itornẽdin.

<sup>26</sup> Sain enei bun, ĩ yogo madur bagai ya anĩ, yaor fiya nigin age fen, are ĩ yogo madur bagai ye fen, taka ĩ Jesus bun momoia ado ĩ madur bagai youf nigin age fen.

<sup>27</sup> Age fiyauf are, yana yaleseya anĩ nain? Yana yaleseya are sã. Ere gariya bunem? Lo dõ fiya bunem de? Sã, momoia bunem. <sup>28</sup> Ere nigin, ada keleĩ, Negur ĩ ta-

mo nẽ momoia bunem madur bagai youf, lo dõ fiya bunem sã. <sup>29</sup> Negur ĩ Juda neid dogol de? ĩ haiden neid sã de? Eo, ĩ haiden nedig Negur. <sup>30</sup> Negur ĩ tekelei, ĩ mulũ dilen anidi, momoia bunem madur bagai youf, agef fen, mulũ ileyã sãg, momoia de tekelei anim madur bagai youf. <sup>31</sup> Age fiyauf are, ada momoia eneim lo anĩ tadodõf de? Sã bagai. Age fiya ban, ada lo tarou kafĩ tafalauf.

### Negur Abraham, Ne Momoia Bunem Madur Bagai Yen

<sup>4</sup> Age fiyauf are, ada Juda tubuda Abraham, ere anĩ ĩ gurug fen nigin, ere tau? <sup>2</sup> Abraham yogon kabĩ bunem, madur bagai inenem are, Abraham ĩ yogo yana yaleseya nigin ereb taka adom, anĩ ere, Negur mala bun sã. <sup>3</sup> Negur nẽ Itotoya ere ye irok? "Abraham Negur nigin momoi ye di, Negur ĩ Abraham madur bagai yen." †††

<sup>4</sup> Tamo taka ĩ kabĩ yalef, yogon mala solo are ege luwa ifenẽya gen sã, are kabĩ mala. <sup>5</sup> Anĩ ere, tamo ĩ madur bagai wõ youf nigin kabĩ to yale fen, Negur, ĩ dõ fiya sã anidi madur fedidig, ĩ nigin momoi yef, Negur yogon momoia are madur bagai yef. <sup>6</sup> Dawid ĩg, tamo kabĩ bunem sã, Negur madur bagai yen, tamo anĩ nẽ el fiya nigin wogõ yen:

<sup>7</sup> "Idi neid kũ fenẽya nigin weder tu keledig,  
idi neid mosor yaleledig,  
are el fedif.

<sup>8</sup> Tamo ĩ yogon mosor nigin Odug to bagai iwesnẽf,  
ĩ el fiyek." §

<sup>9</sup> El fiya enei mulũ ileyã neid dogol de? Sã, are mulũ ileyã san neideg. Age fiya nigin, amã morõdig, Negur Abraham nẽ momoia bunem ĩ madur bagai yen.

<sup>10</sup> Ere sain bun Negur ĩ age yen? ĩ mulũ ilel mog de, mulũ ileyã sã mog? ĩ mulũ ilel mog sã, ĩ mulũ ileyã sã mog. <sup>11</sup> ĩ mulũ ileyã nẽ uris, are ĩ fau mulũ ileyã sã mog, momoia bunem Negur madur bagai yen anĩ nẽ uris yalen. Anĩ nigin, ĩ mulũ ileyã san momoi def ganan neid temeid, anĩ bunem, Negur idi madur bagai youf. <sup>12</sup> ĩ mulũ ileyã nedig temeid, idi mulũ dilen dogol sã, anĩ ere, idi tubuda Abraham ĩ mulũ ileyã sã mog, momoia ado iyon anĩ yebura dõ de diyõdig anidi nedig.

<sup>13</sup> Negur, Abraham ado in tubu tar irokenẽdin, are Negurem ereb ereb ganan idi afenẽdi di, akorediyouf yen anĩ, lo bunem sã, anĩ ere, madur bagai momoia bunem isif anĩ bunem. <sup>14</sup> Idi lo dõ difedig anidim, Negurem ereb ereb ganan idi afenẽdi di, akorediyouf yen anĩ akorediyouf are, momoia are ege ile di, ereb Negur iron are ege kilẽf, <sup>15</sup> are lo didi irou isidig nigin. Lo sãf are, lo ifodulũyag sã.

<sup>16</sup> Anĩ nigin, ereb Negur age afouf yen are, wau ifenẽya bunem, kabĩ yalef ya anĩ yaorouf nigin, momoia bunem isidig, are Negur ĩ, ege luwa Abraham nẽ ibor nẽ tubu tar ganan afenẽdiyof yen anĩ, megeir fiya nigin age fedig, idi lo dõ difedig anidi bun dogol sã, anĩ ere, idi Abraham nẽ momoia dõ difedig anidi buneg. Age fiya nigin, Abraham ĩ, ada ganan neda ta-

† Sam 14:1-3; 53:1-3; Eklisiastis 7:20 †† Sam 5:9 ‡ Sam 140:3 †† Sam 10:7 ††† Asaia 59:7, 8 ††† Sam 36:1

††† Genesis 15:6, 22 § Sam 32:1, 2

mada. <sup>17</sup> Are Negur nē Itotoya bun ibodok kilei, “Aya ò teneub akor musei neid temeid anenon.” † Negur mala bun, ĩ neda tamada, Abraham Negur nigin momoi yen, Negur ĩ tamo gare den mata ifeneĩd fen, ereb to ibodok anĩ iweig di, agef wō yedig, Negur ĩ anĩ.

<sup>18</sup> Wau iseya nigin gariya taka sã bun, Abraham in wau iseya bun momoi yen, are ĩ teneub akor musei neid temeid wō youf nigin age fen, are Negur ĩ eig ye irokenen kilei, “Ogon ibor agef yenēf.” ††<sup>19</sup> In momoiya bun felu reya sã, ĩ handred yar age fiya ibodon nigin, yogon bouwa anĩ laa gen ile fen, Sara kesu yaleya nigineg laa gen ilen. <sup>20</sup> Anĩ ere, ereb ĩ Negur iron anĩ nigin to wau uru fen, in momoiya to ilef isi fen, anĩ ere, ĩ yogon momoiya megeir fe fen, Negur fula fiya medeĩya ifenen. <sup>21</sup> Abraham ĩ, ereb Negur age afouf yen anĩ age fiya nigin, ĩ megeir ado, ye fen, momoi bagai yen. <sup>22</sup> Anĩ nigin, Negur, Abraham nigin ĩ madur bagai yen. <sup>23</sup> Od “Negur ĩ nigin madur bagai yen” are, ĩ nigin dogol to itoton, <sup>24</sup> anĩ ere, Negur ada nigin madur bagai youf anĩ nigineg itoton, are ada, Negur, neda Odug Jesus tamo gare den bun tamal kel turĩ fiyen nigin, momoi tauf anĩ. <sup>25</sup> Negur ĩ Jesus neda mosor nigin laa bun inene ken, ada madur bagai youf nigin, Jesus mata kel turĩ fiyen.

### Maror Kulĩya Ado

**5** Anĩ nigin, momoiya bunem, Negur ada madur bagai yen nigin, ada neda Odug Jesus Kristus bunem, Negur ado maror bun tabodok. <sup>2</sup> Neda momoiya bunem, Jesus Kristus ĩ, ada Negur nē wau ifenēya enei ada gama an tafaref anĩ namen irou ileda di, telen. Anĩ nigin, ada Negur nē fula fiya medeĩya nigin, wauda ise fen, kulĩ taudig. <sup>3</sup> Anĩ nigin dogol sã, ada neda morō nigineg kulĩ taudig, ere nigin, ada keleĩ, morō bunem feseya sã anĩ wō yedig, <sup>4</sup> feseya sã anĩ bunem atĩya biya wō yedig, atĩya biya bunem wau iseya wō yedig. <sup>5</sup> Wau iseya anim ada to fō fadadig, ere nigin, Awa Uur Fateul Negurem ifanadan anĩ bunem, in wau laa fiya ada wauda bun fi felen.

<sup>6</sup> Ada fau maleg tabod mog, in sain bun bagai, Kristus ĩ, ada Negur dō fiya sã anidi nigin laa fen. <sup>7</sup> Tamo takam, taka madur bagai nigin, laa fiya malai bagai, agef fen, tamo takam aib taka tobonunã biya ado nigin total ino fen, laa fouf be. <sup>8</sup> Anĩ ere, Negur ada nigin yogon wau laa fiya anĩ, enei bun ada ifelnadaf, are ada fau mosor bun tabod mog, Kristus ada nigin laa fen.

<sup>9</sup> Gama yogon naud bunem, Negur ada madur bagai yen nigin, ada ĩ bunem Negur nē didi bun tamal baban momoi bagai yalelkanadauf! <sup>10</sup> Sain ada Negur nē kiwai tamo tar tabod mog, yogon Naal nē laa bunem, ada ĩ geid komo fadan. Gama ada ĩ geid komo fadan nigin, baban momoi bagai, Kristus nē mata bunem ada kel gei fadauf! <sup>11</sup> Enei dogol sã, anĩ ere, ada, ereb Negur neda Odug Jesus Kristus bunem age fen nigineg kulĩ taudig, are Jesus Kristus bunem, ada gama komo fiya talen.

### Adam Bunem Laa Wō Yen, Kristus Bunem Mata Wō Yen

<sup>12</sup> Anĩ nigin, tamo tekelei bunem, mosor ket tenebur wō ye di, laa mosor bunem wō yen, age fiya bagai, ganan mosor dinon nigin, laa, tamo ganan bun wō yen. <sup>13</sup> Lo wōya sã mog, mosor tenebur ibodon. Anĩ ere, lo sãf are, mosor to iwesauf. <sup>14</sup> Anĩ ere, Adam nē sain bunem ile Moses nē sain bun, idi Adam age fen gen, to Negur nē ĩtãfiya wal difen anidig laa farumen dibodon, Adam ĩ taka fau isiyouf nē malakanon.

<sup>15</sup> Anĩ ere, Negur nē ege luwa are mosor Adam inon gen sã. Tamo tekelei nē mosor bunem musei gare den ouf are, Negur nē wau ifenēya ado ege luwa, tamo tekelei Jesus Kristus nē wau ifenēya bunem isin, naig fiya bagai tamo musei bun gogũ fouf! <sup>16</sup> Takag age fiya, Negur nē ege luwa are, tamo tekelei nē mosor mala age fiya sã. Es fiya mosor tekelei dōf fen, mosor inon nigin bouwa bun od yũya irou isin, anĩ ere, ege luwa mosor musei dōf fen, madur bagai anĩ irou isin. <sup>17</sup> Tamo tekelei nē mosor bunem, laa anĩ, tamo tekelei anĩ bunem mudur ibodon ouf are, idi Negur bunem, wau ifenēya barikã ado, madur bagai anĩ nē ege luwa barikã dalef anidi, momoi bagai, tamo tekelei Jesus Kristus bunem, mata bun mudur dibodōf!

<sup>18</sup> Anĩ nigin, mosor tekelei bunem, Negur tamo ganan mosor temeleid yen, age fiya gen, madur bagai tekelei age fen bunem, Negur tamo nigin madur bagai ye fen, tamo ganan nigin mata irou isin. <sup>19</sup> Tamo tekelei nē od wal fiya bunem, musei mosor adodo wowã den, age fiya gen, tamo tekelei nē dō fiya bunem, musei madur bagai wowã douf.

<sup>20</sup> Mosor ifageya nigin, lo isin. Anĩ ere, mosor ifaga di, Negur nē wau ifenēya fatuk bagai ifagan, <sup>21</sup> are mosor laa bun mudur ibodon gen, wau ifenēya madur bagai bunem mudur ibod ken, neda Odug Jesus Kristus bunem mata ibodkeleya irou isiyouf nigin age fen.

### Mosor Bun Laa, Kristus Bun Mata

**6** Age fiyauf are, ada ere tauf? Negur nē wau ifenēya ifagauf nigin, ada mosorei tauf de? <sup>2</sup> Sã bagai! Ada mosor bun gare taun; naig fe di, ada anĩ bun tau tabodōf? <sup>3</sup> Ada ganan Kristus Jesus bun naan talen, are yogon laa bun naan talen anĩ, ã to keleĩ de? <sup>4</sup> Anĩ nigin, ada, laa bun naan talen bunem, ĩ geid mũ fadan, are Kristus, Tama nē fula fiya medeĩya nē megeir bunem, tamo gare den bun tamal kel turĩ fen gen, adag ibodōya mata bun mata tabodōf nigin age fen.

<sup>5</sup> Ada yogon laa bun, enei gen ĩ geid bagu fadan ouf are, ada momoi bagai yogon kel fãya buneg, ĩ geid bagu fadauf. <sup>6</sup> Ada keleĩ, mosor nē bouwada yukesiyouf nigin, neda oroya tubu ĩ geid aa tetek bun yun, are ada mosor nē ferfer to tabodōf nigin age fen, <sup>7</sup> ere nigin, taka ĩ laa fen are, ĩ mosor nē megeir bun tamal yalnen.

<sup>8</sup> Ada Kristus geid gare taun ouf are, adag ĩ geid mata tabodōf nigin momoi tauf. <sup>9</sup> Ere nigin, ada keleĩ,

† *Jenesis 17:5* †† *Jenesis 15:5*

Kristus tamo gare den bun tamal, kel turī fiyen nigin, ī baban to bagai laa foug, ī laa nē megeirem baban to irounēf. <sup>10</sup> Ī laa fen are, ī mosor nē megeir yukesyouf nigin, sain tekelei bun dogol laa fen, anī ere, mata ī ibodok are, ī Negur bun mata ibodok.

<sup>11</sup> Age fiya bagai, ā aug nigin, mosor bun gareg fen, Kristus Jesus bunem, Negur bun mata ubodōgef anī kisi gouf. <sup>12</sup> Anī nigin, āgenei bouweī bura leya nē anī bun, mosor mudur ibodō di, ā in oroya sane anī dō gouf nigin to ago gouf. <sup>13</sup> Āgenei bouweī tunī, sane nē aruna yaleya nigin mosor bun to wenēgouf, anī ere, idi laa bun tamal kel turī fedin gen, ā aug Negur wenēg fen, āgenei bouweī tunī, madur bagai nē aruna yaleya nigin Negur bun wenēgouf. <sup>14</sup> Mosor āgenei odug to ibodōf, ere nigin, ā lo farumen sā, wau ifenēya farumen ubodōgef.

### Madur Bagai Nē Ferfer

<sup>15</sup> Age fiyauf are, naig fiya? Ada lo farumen sā, wau ifenēya farumen tabodok nigin, mosor tanouf de? Gai sā bagai! <sup>16</sup> Sain ā aug, taka sigor dōg fen, ferfer gen ī aruna walegef, ā taka sigor dō gef anī nē ferfer ubodōgef anī, ā to keleī de? Ā mosor nē ferfer ubodōgef, are laa bun irouleyeik, ā Negur dō fiya nē ferfer ubodōgef, are madur bagai bun irouleyeik. <sup>17</sup> Anī ere, ada Negur de tafiyēf, ere nigin, ā uruwa bun mosor nē ferfer ubodōgen, anī ere, ā tai fiya difenein anī, āgenei wauī adok dō gen. <sup>18</sup> Ā mosor bun tamal yalelneī di, madur bagai nē ferfer wō gen.

<sup>19</sup> Aya, ā bouweī bun felu reya nigin, tamo nē to-bonunā bunem wogō auf. Ā uruwa bun ferfer gen, āgenei bouweī, sane amuyē ado bun unogen, ago ge di, fatuk bagai sane len, age fiya gen, gama ā ferfer gen, āgenei bouweī, madur bagai bun unoge di, fateul bagai wō gouf. <sup>20</sup> Sain ā mosor nē ferfer ubodōgen, ā madur bagai nē farumen to ubodōgen. <sup>21</sup> Sain anī bun, ereb ā gama mama yeik bun tamal, ā ere mala biya walegen? Anī ganan are, laa bun irou isif. <sup>22</sup> Anī ere, ā gama mosor bun tamal yalelneī di, Negur nē ferfer wō gen, anī nē mala biya are, fateul bun irouleyeik, anī nē kaū are, mata faimud ibodkeleya. <sup>23</sup> Ere nigin, mosor mala, are laa, anī ere, Negur nē ege luwa, are neda Odug Kristus Jesus bun mata faimud ibodkeleya.

### Tamo Kayau Bagu Fiya Bun Od Malakanon

**7** Turau tar, aya, Moses nē lo keleī tamo ā aroke-neik, lo are tamo mata ibodok sain bun dogol, ī bun megeir ado anī, ā to keleī de? <sup>2</sup> Eig fiya gen, lo irok, kayau tamo aiwaf, ī tamo mata ibodok sain bun dogol ī aiwaf, anī ere, ī aiwa laa foug are, kayau ī bagu fiya nē lo farumen to ibodōf. <sup>3</sup> Age fiya nigin, kayau ī aiwa monog fau mata ibod mog, ī baban tamo taka yalouf are, ī seseirā kayau douf. Anī ere, yogon tamo laa foug are, lo anim kayau to irounē di, ī tamo taka yalouf, ī to seseirā kayau douf.

<sup>4</sup> Anī nigin, neu turau tar, āg Kristus bouwa bunem lo bun gare gen, are ā, taka ī tamo gare den bun tamal

kel turī fiyen anī nē wowāg fen, ada Negur bun faat biya taūf nigin ago gen. <sup>5</sup> Sain ada bouwa nē oroyam irounadan bun, lo anim mosor nē oroya turī fe di, mosor nē oroya anim bouwada bun kabī yalen, anī bun, ada laa nē faat taun. <sup>6</sup> Anī ere, gama ada ereb mogo irounadan bun gare taun nigin, ada lo bun tamal yalelnadan, anī nigin, ada Awa Uur nē naab mata bun aruna talef, naab tubu lo itotoya bun sā.

### Mosor Ado Kusīya

<sup>7</sup> Age fiyauf are, ada ere tauf? Lo anī mosor de? Sā bagai! Momoi, lo sam are, aya mosor are ereb yef anī to keleim. Ere nigin, taka nē safina ile to oroya nigin lo to age ye irom are, † aya taka nē safina ile to oroya nigin to keleim. <sup>8</sup> Anī ere, itāfiya anim mosor modoū ifenē di, aya nameun mosorem taka nē safina ile oroya fire fire ganan inodin. Ere nigin, lo sāf are, mosor are laa fen. <sup>9</sup> Uruwa aya lo sā bun mata abodon, anī ere, itāfiya isi di, mosor mata fā ye di, <sup>10</sup> aya laa fiyan. Lo anī mata irusiyouf aun, anī ere, ī momoi bagai laa irusin anī ailen.

<sup>11</sup> Ere nigin, itāfiya anim mosor modoū ifenē di, mosorem aya idegna fen, itāfiya bunem laa bun inenan. <sup>12</sup> Age fiyauf are, lo are fateul, itāfiya are fateul, madur fen, biya. <sup>13</sup> Age foug are, ereb biya anim aya bun laa irusin de? Sā bagai! Anī ere, mosor are mosor ya anī yaorouf nigin, mosorem ereb biya bunem aya bun laa irusin, are mosor itāfiya bunem mosor bagai wō youf nigin age fen.

<sup>14</sup> Ada keleī, lo are Negur bun tamal, anī ere, aya bouwa buru nē, mosor nē ferfer gen na nē sur fiyan. <sup>15</sup> Ereb aya age afef, are aya keleī sā. Ere nigin, ereb aya age fiya nigin orouf, are aya to age afedig, anī ere, ereb aya to orouf anī, aya age afedig. <sup>16</sup> Ereb aya age fiya nigin to orouf anī, aya age afouf are, aya lo are biya auf anī ifelnadaf. <sup>17</sup> Anī nigin, aya yug anī to age afef, anī ere, mosor aya nameun ibodok anim age fef. <sup>18</sup> Aya keleī, ereb biya taka, aya nameun, are mosor nē bouwau enei bun to ibodok. Ere nigin, aya ereb biya age fiya nigin orouf, anī ere, aya age fiya kisi feleya sā. <sup>19</sup> Ere nigin, ereb aya age afef, are ereb biya age fiya nigin orouf anī sā, anī ere, ereb sane aya age fiya nigin to orouf anī, aya faimud age afedig. <sup>20</sup> Aya ereb to orouf anī age afouf are, ayam anī to age afef, anī ere, mosor aya nameun ibodok anim age fef.

<sup>21</sup> Anī nigin, aya tobonunā eig fiya kabī yale mog, ailef: Sain aya biya age afou fenē di, sane anī aya ado ibodōdig. <sup>22</sup> Ere nigin, aya nameun Negur nē lo nigin wau kulī yedig, <sup>23</sup> anī ere, aya lo taka anī bouwau tunī bun kabī yale mog, ailef, are neu kisi biya nē lo ado kusī de fen, aya, mosor, bouwau tunī bun kabī yalef anī nē lo nē kalabus tamo inenadig. <sup>24</sup> O aya malaulon bagai! Aim anī aya laa nē bouwau enei bun tamal yalelnauf? <sup>25</sup> Neda Odug Kristus age fen bunem Negur ada yalelnadan nigin ī de tafiyēf!

† Eksodas 20:17; Diuteronomi 5:21

Age fiyauf are, aya yug neu kisi bun are, Negur nē lo nē ferfer, anī ere, aya mosor nē bouwau enei bun, mosor nē lo nē ferfer.

### Awa Uur Bunem Mata Ibodōya

**8** Anī nigin, idi Kristus Jesus bun dibodok anidi bun, mosor dinon nigin bou yūya taka gama to ibodok, <sup>2</sup> ere nigin, Kristus Jesus bunem, mata nē Awa Uur nē lo anim, mosor ado laa nē lo bun tamal yalelnan. <sup>3</sup> Mosor nē bouwa felu reya nigin, lo anim age fiya nigin kisi feleya sã anī Negur age fen, are ĩ yogon Naal, mosor tamo nē bouwa gen bun, mosor yaleleya nē sesewi fiya ibodōf nigin sur fiyen anī bunem, Negur ĩ, mosor, mosor tamo nē bouwa bun ibodok anī nē megeir yukesin, <sup>4</sup> are madur bagai wō youf nigin lo irok anī, bouwa nē oroya tator ken, Awa Uur nē oroya bun tabodōdig ada bun, kisi falauf nigin, Negur ĩ age fen.

<sup>5</sup> Idi bouwa nē oroya bun dibodōdig anidi, dogo neid kisi are, ereb mosor nē bouwa orof anī bun yenēdig, anī ere, idi Awa Uur nē oroya bun dibodōdig anidi, dogo neid kisi are, ereb Awa Uur orof anī bun yenēdig. <sup>6</sup> Kisi mosor nē bouwa bun yenēdig, are laa nē, anī ere, kisi Awa Uur bun yenēdig, are mata nē ado wau inosiya nē, <sup>7</sup> ere nigin, kisi mosor nē bouwa bun inodig, are Negur kiwai ifenēdig, are Negur nē lo farumen to ibodōdig, ĩ age fiya nigin kisi feleya sã. <sup>8</sup> Idi mosor nē bouwa bun dibodōdig anidi, Negur wau al fiya ifenēya kisi feleya sã.

<sup>9</sup> Anī ere, Negur nē Awa Uur ã namein ibodōf are, ã mosor nē bouwam to ulum iroukeneif, anī ere, ã Awa Uurem ulum iroukeneif. Anī ere, taka ĩ Kristus nē Awa Uur sãf are, ĩ Kristus nē sã. <sup>10</sup> Anī ere, Kristus ã namein ibodōf are, ãgenei bouweif mosor nigin laa foufeg, ãgenei uur madur bagai nigin mata ibodok. <sup>11</sup> ĩ Jesus tamo gare den bun tamal, kel turif fiyen anī nē Awa Uur, ã namein ibodōf are, ĩ Kristus tamo gare den bun tamal, kel turif fiyen, yogon Awa Uur ã namein ibodok anī bunem, ãgenei bura leya nē bouweif matag ifeneif.

<sup>12</sup> Anī nigin, turau tar, ada wareg ado, are ada mosor nē bouwa to dō tafouf, bouwa nē oroya bun to tabodōf. <sup>13</sup> ã bouwa nē oroya bun ubodōgouf are, ã gare gouf, anī ere, Awa Uur bunem ã bouwa nē tobonunã anī ukesigouf are, ã mata ubodōgouf, <sup>14</sup> ere nigin, idi Negur nē Awa Uurem uyu iroukenēdif are, idi Negur nē gere tar. <sup>15</sup> ã kumīya nē ferfer ineneīya nē uur to walegen, anī ere, ã Negur nē gere tar ineneīya nē Awa Uur walegen. Anī nigin, ĩ bunem ada taweig fen, “Aba, † Dei” taudig. <sup>16</sup> Awa Uur yogo, ada neda uur bun kurō falaisi, ada Negur nē gere tar yedig. <sup>17</sup> Ada in gere tar ouf are, ada ereb el fiya biya Negur ifanadauf nigin promis od iron anī talouf. Ada Kristus geid weim yogon fula fiya medeīyag talouf nigin ada momoi bagai ĩ geid weim yogon darau talouf are, ada Kristus geid weim ereb el fiya biya Negur ifanadauf nigin promis od iron anī talouf.

### Fula Fiya Medeīya Dumen Nē

<sup>18</sup> Aya kisi afef, fula fiya medeīya ada bun yaorouf, are ada neda darau gama talef anī wal fiya bagai.

<sup>19</sup> Ereb ereb ganan Negur inodin are, Negur yogo gere tar yaor fediyouf nigin, fatuk bagai tari difedig. <sup>20</sup> Ere nigin, ereb ereb ganan Negur inodin are, Negur uruwa idi yogon oroya dō difouf nigin kisi fen anī idi to dō difedig, are dogo neid oroya bunem sã, anī ere, ĩ agef inodin anī nē oroya bunem. Anī ere, waud iseya ado, <sup>21</sup> are ereb ereb ganan Negur inodin, idig dogo bura leya nē kafif fiya bun tamal yalelneif fen, Negur nē gere tar neid fula fiya medeīya nē karika ibodōya bun gurif iroulediyouf.

<sup>22</sup> Ada keleif, ereb ereb ganan Negur inodin, idi kesu gō fiya nē darau bun gen, gariya bunem osi def disi, gama sain enei bun bagaig, age difef. <sup>23</sup> Anī dogol sã, anī ere, ada, Awa Uur, are dumen fula fiya medeīya ada talouf nē faat uyulil yūya anī talen, ada dugeg, Negur ada bouwada kel geif fen, ada yogon gere tar bagai ya anī yaor fe kurō falaisiyouf nigin, fatuk bagai tari tafe fen, namedan osi taudig. <sup>24</sup> Ada kel gei fadan sain bun, ada wauda iseya enei talen. Anī ere, wau iseya malam ileya are, wau iseya bagai sã. Aim anī, ereb ĩ mogo ilef nigin wau isauf? <sup>25</sup> Anī ere, ada ereb ada fau ileya sã nigin wauda isauf are, ada total tano fen, tari tafouf.

<sup>26</sup> Age fiya gen, Awa Uur ĩ neda felu reya bun isennadadig. Ada ereb nigin kosē tauf anī ada keleif sã, anī ere, Awa Uur yogo od faded fiya kisi feleya sã anī, osi ye fen, ada nigin kosē yedig. <sup>27</sup> Age fe di, Negur ada wauda fele fedig, ĩ Awa Uur nē kisi keleif, ere nigin, Awa Uur ĩ tamo kayau fateul nigin Negur nē oroya kilei kosē yedig.

### Ada Kusif Wal Difen Anidi Wal Fediya

<sup>28</sup> Ada keleif, ereb ereb ganan bun, Negur yogo nigin waud laa fedig anidi neid biya fiya nigin Negur kabif yaledig, idi yogon oroya kilei iweignēdin anidi. <sup>29</sup> Idi Negurem mogo kelein anidi, Negur idi yogo Naal gen wowã douf nigin mogo igirnēdin, are yogon Naal, tura tar musei atun, kesu matu wō youf nigin age fen. <sup>30</sup> Agef fen, idi Negur igirnēdin anidig, ĩ iweignēdin, idi Negur iweignēdin anidig, ĩ madur bagai fiyēdin, idi Negur madur bagai fiyēdin anidig, ĩ fula fiya medeīya ifenēdin.

<sup>31</sup> Age fiyauf are, ada enei nigin ere tauf? Negur ĩ nedau are, aim anī ada daū fadaya kisi feleya? <sup>32</sup> ĩ yogo Naal bagai nigin to katū ye fen, ada ganan nigin yogo Naal itornen anī, naig fe di, ĩ yogo Naal ado ereb ereb gananeg, ege kilē to ifanadauf? <sup>33</sup> Aim anī, Negur igirnēdin anidi kot bun inenēdiyof? Negur yogo idi madur bagai fiyēdidig. <sup>34</sup> Aim anī, idi mosor dinon ye fen, idi bouweid bun od yūf? Kristus Jesus ĩ mogo laa fen, agef feneg, ĩ kel turif fe di, matan, ĩ Negur ima biyalē ibod ken, ada nigineg kosē yedig. <sup>35</sup> Aim anī, ada Kristus nē wau laa fiya bun tamal fara fadauf? Kafif fiya,

† Anī nē gariya, Aram od bun 'Dei.'



morõ, darau, naũ, gemũ, waila be, dimigem age foug de? <sup>36</sup> Are Negur nẽ Itotoya bun ibodok kilei,  
 “Õ nigin amã naa tekelei adok laa gurug mafef;  
 amã sipsip didenkesiya nigin age fiya gen dileman.”  
 †

<sup>37</sup> Anĩ ere, enei ganan bun, ada, ĩ ada nigin wau laa fen bunem, ada kusĩ wal difen anidi wal fediya tabodok.  
<sup>38</sup> Aya momoi auf, laa, mata, engel, kaa sesen, ereb gama nẽ, ereb dumen nẽ, ereb megeir taka, <sup>39</sup> ilun, kuren bagai be, ereb ereb ganan inodin bun ereb takam, Negur nẽ wau laa fiya, neda Odug Kristus Jesus bun ibodok anĩ bun tamal, ada fara fadaya nigin kisi feleya sã.

### Negur Yogo Bagai Igrin

**9** Aya Kristus bun momoi orok, aya idegẽya sã, neu kisi es fiya wau bun ibodok, Awa Uur Fateul bunem, aya bun anĩ megeir fef, <sup>2</sup> are aya fatuk bagai wau gudũf fen, aya faimud wau bun morõ ado. <sup>3</sup> Ere nigin, aya, neu turau tar, neu ibor anidi nigin, aya yug isisna fen, Kristus bun tamal yalelnauf anĩg, aya orouf. <sup>4</sup> Idi Israel tamo kayau. Negur nẽ gere tar ya anĩ dogo neid, Negur nẽ fula fiya medeĩya anĩ, idi bun yaor fen, Negur ado bar itenẽya, lo yaleya, tempel bun Negur yana yaleseya ado, ereb Negur age afouf ye fen igirin, are dogo neid. <sup>5</sup> Tubuid tar Abraham, Isak, Jakop are dogo neid, idi neid ibor anĩ isi isi Kristus wõ yen, Kristus ĩ Negur, ganan ĩ farumen dibodok, faimud ĩ yana talesauf! Momoi.

<sup>6</sup> Are Negur nẽ od irofosiya gen sã. Ere nigin, Israel ibor bun wõ den anĩ, ganan Israel sã. <sup>7</sup> Idi Abraham nẽ ibor nẽ tubu tar ba, anĩ ere, ganan Abraham nẽ gere tar bagai sã. Age fiya ban, “Isak bunem, ogon ibor tar douf.” <sup>††8</sup> Are, tamo nẽ tobonunã nẽ naud bunem Abraham nẽ gere tar wowã den anidi ganan, Negur nẽ gere tar sã, anĩ ere, promis nẽ gere tar idi, Abraham nẽ ibor tar youf. <sup>9</sup> Negur nẽ promis od anĩ eig fiya, “Yogon sain bun bagai, aya kelauf, Sara kesu adouf.” †

<sup>10</sup> Anĩ dogol sã, anĩ ere, Rebeka nẽ gere tar tama tekelei ado, are tubuda Isak. <sup>11</sup> Anĩ ere, kesu uru fau gõ fiya sã bun, ereb biya be sane be age fiya sã mog, Negur nẽ oroya anĩ, kabĩ bunem sã, iweignẽdif ĩ bunem, yogon igiriya bun ifarauf nigin, <sup>12</sup> ĩ Rebeka irokenen, “Matu anĩ, ibuye nẽ aruna yaleyẽf.” <sup>††13</sup> Are Negur nẽ Itotoya bun ibodok kilei, “Aya Jakop nigin wau laa fen, anĩ ere, Esau to oroun.” †

<sup>14</sup> Age fiyauf are, ada ere tauf? Negur madur sã de? Sã bagai! <sup>15</sup> Ere nigin, Negur Moses irokenen, “Aya aib nigin wau yuk anĩ bun, wau yũya afenẽf, aya aib nigin wau irok, ĩ nigin wau yenẽf.” <sup>†††</sup>

<sup>16</sup> Anĩ nigin, are, tamo nẽ oroya be kabĩ total yaleya bunem sã, Negur nẽ wau yũya bunem. <sup>17</sup> Negur nẽ Itotoya bun, Isip nẽ king Farao nigin eig ye irok, “Aya õ enei nigin bagai king anenon, are aya õ bun neu megeir yaor afe di, teneub ganan bun, neu yanau kurõ difalaisyouf nigin age afen.” <sup>†††18</sup> Anĩ nigin, Negur aib ĩ

wau yũya ifenẽya nigin orof bun, ĩ wau yũya ifenẽdig, agef fen, ĩ aib nẽ wau katĩ feleya nigin orof bun, ĩ katĩ feledig.

<sup>19</sup> Ā takam aya irokanauf, “Age fiyauf are, ere nigin Negur fau ada bouwada bun od yuk? Aim anĩ yogon oroya katĩ felef?” <sup>20</sup> Anĩ ere, tamo õ ai anĩ Negur od solo urokenẽf? “Ereb kare fen anim ĩ kare fen anĩ, ‘Ere nigin eig wo onoyan?’ fiyẽf de?” <sup>§21</sup> Mis inoya tamo ĩ mafef de tekelei anim, mis uru, taka kabĩ biya ifenẽya nẽ, taka kabĩ sane ifenẽya nẽ, yogon oroyam inoya kisi feleya sã de?

<sup>22</sup> Negur ĩ yogon didi anĩ yaor fe di, yogon megeir anĩ tamo kayau keleĩ youf nigin wau iro ken, yogon didi idi bun ile, daũ feidlauf anidi nigin molol bunem loloum fedid di, sain meluk ibodon ouf are, ada ere tauf? <sup>23</sup> Negur ĩ idi fula fiya medeĩya dalouf nigin dodok fe fen, yogon wau yũya ifenẽdiyof anidi bun, yogon fula fiya medeĩya barikã anĩ yaor fiya nigineg wau iron ouf are, ada ere tauf? <sup>24</sup> Ada buneg Negur iweignadan, Juda temeleid dogol sã, haiden buneg. <sup>25</sup> Are Hosia nẽ itotoya buneg Negur wogõ yef kilei,

“Aya idi neu tamo kayau sã anidi, neu tamo kayau auf,  
 age afe fen, aya neu oboiyou sã anĩ, neu oboiyou auf.” <sup>§†</sup>

<sup>26</sup> takag,

“Negur ‘Ā neu tamo kayau sã’ yen nẽ modoũ anĩ bun, idi anĩ ‘Negur mata ibodõya nẽ gere tar’ youf.” <sup>§††</sup>

<sup>27</sup> Asaia Israel nigin iweig iron,

“Israel tamo kayau maã ubun mumul gen musei bagai,

anĩ ere, musei sã dogol kel gei fediyouf.

<sup>28</sup> Ere nigin, Odug ĩ teneub bun,

yogon tamo kayau es fediyouf nẽ od ganan kaisã bagai dõf agef kisi falauf.” <sup>§†</sup>

<sup>29</sup> Are Asaia mogo iron kilei,

“Odug saa ilun nẽ kusĩ tamo guri feid uyu iroudig anĩ, neda ibor nẽ tubu tar tunĩ to itornẽdim are, ada Sodom gen wõ taum, ada Gomora gen tabodom.” <sup>§††</sup>

### Israel Tamo Kayau Momoiya Sã

<sup>30</sup> Anĩ nigin, ada ere tauf? Haiden idi madur bagai anĩ to dimiren anidi, momoiya bunem madur bagai anĩ dalen. <sup>31</sup> Anĩ ere, Israel idi madur bagai nẽ lo dõ difen, idi madur bagai anĩ yaleya sã. <sup>32</sup> Ere nigin yaleya sã? Idi Negur nigin momoiya bunem dõ fiya sã, anĩ ere, lo dõ fiya bunem, Negur mala bun madur bagai dalouf nigin age difen nigin. Idi ye tũ fiya nẽ meein anim yeid tũ fen. <sup>33</sup> Are Negur nẽ Itotoya bun ibodok kilei,

“Lo weleg, aya Saion oun tamo yeid tũ fiya nigin meein taka,

idi kubũ douf nigin sa tuwa taka anof,

age afe di, taka ĩ, ĩ nigin momoi youf, ĩ mama to bagai yalouf.” <sup>§†</sup>

† Sam 44:22 †† Jenesis 21:12 † Jenesis 18:10, 14 †† Jenesis 25:23 †† Malakai 1:2, 3 ††† Eksodas 33:19 ††† Eksodas 9:16

§ Asaia 29:16; 45:9 †† Hosia 2:23 ††† Hosia 1:10 †† Asaia 10:22, 23 ††† Asaia 1:9 †† Asaia 8:14; 28:16

**10** Turau tar, aya Negur ĩ Israel kel gei fediyouf nigin wau iro ken, Negur bun kosē audig. <sup>2</sup> Aya idi nigin kurō afeis eig auf, idi Negur nigin kisi total dinodig, anī ere, idi neid kisi total are keleī bunem sã. <sup>3</sup> Ere nigin, idi madur bagai Negur bunem isif anī to keleī ken, dogo neid madur bagai anī dalouf nigin dimiren, age dife fen, idi, Negur tamo kayau yogon mala bun madur bagai inenēdiya nē naab anī ditoron. <sup>4</sup> Kristus ĩ, idi momoi def ganan madur bagai wowã douf nigin, lo nē idikeleya wō yen.

<sup>5</sup> Moses ĩ madur bagai lo ganan dō fiya bunem isif nigin eig ye itoton, "Tamo ĩ lo enei dō fef, ĩ anī bunem mata ibodōf." <sup>16</sup> Anī ere, madur bagai momoiya bunem isif anī eig ye irok, "Ō waū bun to eig wo urōf, 'Aim anī saa ilun iselauf?' ††" (are, Kristus irou isiyouf nigin) <sup>7</sup> "Ōo 'Aim anī teneub kur bagai isilauf?' ††" (are, tamo gare den bun tamal Kristus irou isauf nigin). <sup>8</sup> Anī ere, ĩ ere ye irok? "Od anī ō wagen ibodok, are ogon sigor bun, ogon waū bun ibodok," †† are momoiya nē od amã wogō maudig anī. <sup>9</sup> Are ō ogon sigorom, "Jesus ĩ Odug," wo fen, ō waū bun, Negur ĩ Jesus tamo gare den bun tamal kel turī fiyen anī, momoi wouf are, ō kel yaleyōf. <sup>10</sup> Are, taka ĩ wau bun momoi ye di, Negur ĩ madur bagai yef, age fe di, taka ĩ sigorom momoi auf ye di, Negurem ĩ kel yalouf. <sup>11</sup> Are Negur nē Itotoya bun ibodok kilei, "Taka ĩ, ĩ nigin momoi youf, ĩ mama to bagai yalouf." ††<sup>12</sup> Juda ado haiden bun fire fire sã, Odug de tekelei anī ganan nē Odug, ĩ idi diweignek ganan bun el fiya fatuk bagai ifenēdidig, <sup>13</sup> are Negur nē Itotoya bun ibodok kilei, "Idi Odug nē yana dale diweignek ganan, Negurem kel gei fediyouf." ††

<sup>14</sup> Age fiyauf are, naig fe di, idi ĩ nigin to momoi den ani diweignēf? Naig de fen, idi to karī den anī nigin momoi douf? Taka nem to irokenēdiyof are, naig de fen, idi karī douf? <sup>15</sup> Idi to sur fediyouf are, idi naig de fen, od wogō douf? Are Negur nē Itotoya bun ibodok kilei, "Idi biya od diroulef anidi, yeid gai meli bagai!" ††

<sup>16</sup> Anī ere, Israel tunī biya od anī to dalen. Idi age difen nigin, Asaia eig ye iron, "Odug, aim anī nemã od nigin momoi yen?" <sup>17</sup> Anī nigin, momoiya anī biya od karīya bunem isidig, biya od karīya are Kristus nē od bunem isidig. <sup>18</sup> Anī ere, aya to afef; Idi to karī dedig de? Momoi, idi karī den, are Negur nē Itotoya bun ibodok kilei,

"Neu arū tamo neid aiteid, teneub ganan bun iyoke-len,

dogo neid od teneub idikeleya bun ilen." †

<sup>19</sup> Baban aya to afef: Israel idi to keleī de? Uruwa bun, Negur Moses bunem iron,

"Aya tamo kayau yeneid sã idi bun age afe di, idi nigin ã kiyē unogouf.

Aya tamo kayau keleī sã idi bun age afe di, idi nigin ã nameī saneuf." ††

<sup>20</sup> Takag, Asaia kukīya sã eig ye iron,

"Idi aya to dimirnan, aya dileyauf.

Idi aya nigin to fiya san anidi bun, aya yug yaor afouf." †

<sup>21</sup> Anī ere, Israel nigin ĩ eig ye iron,

"Naa tekelei adok, aya tamo kayau dō fiya sã, fe temeleid bun

imau dō au fen, tari afedif abodon." ††

### Israel Idi Atun Musei Sã Dogol

**11** Age fiyauf are, aya to afef: Negur ĩ yogon tamo kayau aulel fedin de? Sã bagai! Aya yug Israel temelou, Abraham nē ibor, Benjamin nē gī bun temelou.

<sup>2</sup> Negur ĩ, yogon tamo kayau, ĩ mogo gariya bunem keleī ken igirnēdin anidi to aulel fedin. Ereb Negur nē Itotoya bun Eliya nigin irok, are ĩ Negur ado, Israel idi nigin bou yūya od wogō den anī, ã to keleī de?

<sup>3</sup> "Odug, idi mogo ogon profet didenkeis fen, ogon alta narī difedin. Aya mugu dogol ditorna fen, idi aya dina-kesiyouf nigin age difef." ††<sup>4</sup> Age ye di, Negur ere od so-  
lof irokenen? "Aya, aya yug nigin sewen tausen tamo idi idegēya waitou Bal bun to iboreid bobou difen anidi, foi afen." ††<sup>5</sup> Age fiya gen, sain enei buneg, Negur wau ifenēya bunem musei sã igirnēdin anidi fau dibodok. <sup>6</sup> Igirīya anī, Negur nē wau ifenēya bunem isin, are tamo nē kabī bunem sã. Igirīya anī tamo nē kabī bunem isin ouf are, Negur nē wau ifenēya anī, wau ifenēya sa ken, mala ifenēya yenem.

<sup>7</sup> Anī nigin, ada ere tauf? Ereb Israel idi kabī total dale fen, dimiren anī, idi to dalen, anī ere, Israel tunī musei sã Negur igirnēdin anidim dogol dalen. Israel tunī ganan Negur waud ifofakelen. <sup>8</sup> Are Negur nē Itotoya bun ibodok kilei,

"Negur, idi kisi kurã fiya sã nē uur,

meleid to dilouf nē ado,

wedereid to karī douf nē anī ifenēdin,

anī bunem isi gama naa enei bun." ††

<sup>9</sup> Takag, Dawid eig ye iron,

"Neu kiwai tar, idi neid sifa nē tebol bun, saaf dokon waud kulī yen sain bun,

idi suk bun gei difediyouf, idi kor bun gei difediyouf, idi neid el fiyam, dogo yeid tū difouf nigin ado, mala solo fiya nē darau, idi bun wō youf nigin aya orouf.

<sup>10</sup> Dogo neid meleid gugum kele fen, to dilouf, dogo neid bagiyeid gai gai nigin fe fesilauf anī orouf." ††

### Aa Taka Nē Were Aa Taka Bun Inoya

<sup>11</sup> Age fiyauf are, aya to afef: Idi yeid tū fe di, kubū de fen, baban fāya kisi feleya sã de? Sã bagai! Anī fotokar, idi neid mosor nigin, kel gei fiya are haiden bun isin, are Israel idi kiyē dinouf nigin age fen. <sup>12</sup> Anī ere, idi neid mosor nigin tenebur tamo kayau bun el fiya kisi feleya bagai wō ye fen, idi neid kū fenēya nigin haiden bun el fiya kisi feleya bagai wō youf are, idi neid gire fiya anim naig fiya el fiya kisi feleya bagai irusiyouf!

<sup>13</sup> Aya ã haiden bun wogō auf. Aya haiden bun aposel nigin, aya neu kabī nigin fatuk bagai yanau alesef,

† Levitikas 18:5 †† Diuteronomi 30:12 † Diuteronomi 30:13  
†† Diuteronomi 30:14 †† Asaia 28:16 ††† Joel 2:32 †††  
Asaia 52:7 § Asaia 53:1 §† Sam 19:4 §†† Diuteronomi 32:21

§† Asaia 65:1 §†† Asaia 65:2 §† 1 King 19:10, 14 §† 1  
King 19:18 §†† Diuteronomi 29:4; Asaia 29:10 §†† Sam 69:22, 23

<sup>14</sup> are aya neu Israel tamo kayau turī afeid, idi kiyeī dinouf bun, idi tunī kel gei afouf nigin age afef. <sup>15</sup> Negur idi aulel fedin bunem, tenebur tamo kayau idi Negur geid komo fiya dalen ouf are, sain Negur idi yalediyouf bun, ere anī wō youf? Are idi tamo kayau ganan gare den bun tamal mata kel fā den gen ouf. <sup>16</sup> Wit uyulil faat yun anī bunem sesewi fiya nē bret dinof, anī nē masak fateul ouf are, bret gananege fateul. Warumutei anī fateul ouf are, were gananege fateul.

<sup>17</sup> Were tunī kokour fele fen, ō oliv aa kuī nē were, oliv aa bun bagu yō di, oliv aa nē warumutei bun saaf tekelei waledig, <sup>18</sup> anī nigin, Israel idi bun, ō haiden yanā to wales. Ō yanā walesauf are, enei kisi wo: Ō warumutei to usennek, anī ere, warumutei anī ō isenok. <sup>19</sup> Anī ere, ō eig wo urōf, “Aya aa anī bun bagu fiyauf nigin were kokour feledin.” <sup>20</sup> Are momoi. Anī ere, idi momoiya sã nigin kokour feledin, age fe di, ō momoiya bunem ufaref. Ō yanā to wales, anī ere, ō kumī wouf. <sup>21</sup> Ere nigin, Negur ī Israel idi oliv aa nē were bagai yalelnēdiyof nigin to katū yen ouf are, ī ō nigineg to katū youf.

<sup>22</sup> Anī nigin, Negur nē molol ado wau itenēya nigin kisi gouf, ī idi kubū den anidi bun wau itenen, anī ere, ā in molol bun toku ubodōgouf are, ī ā bun molol ibodōf. Anī ere, ā in molol bun to ubodōgouf are, āg kokour yeikalauf. <sup>23</sup> Israel idi momoiya sã bun toku to dibodōf are, idi baban aa oliv bun bagu fediyouf, ere nigin, Negur ī baban idi bagu fediya nigin kisi feleya. <sup>24</sup> Ō ogon gariya oliv aa kuī bagai bun tamal kokour fele fen, ogon gariya sã oliv aa bagai kulatun fedig anī bun bagu yon ouf are, oliv aa bagai nē were eneidi, naig fiya karika bagai dogo neid oliv aa bagai bun bagu fediyouf!

### Israel Ganan Kel Gei Fediyouf

<sup>25</sup> Turau tar, aya waa enei ā to keleī youf nigin to orouf, are ā aug nigin keleī biya ado to gouf nigin age afef. Waa are, Negurem Israel tunī waud ifofakelen, anī bunem idi dibodok disi mog, haiden idi Negurem igirnēdin anidi ganan Negur wagen disiyouf sain anī bun. <sup>26</sup> Age dife di, Israel ganan kel gei fediyouf, are Negur nē Itotoya bun ibodok kilei,

“Kel yaleya tamo Saion bun tamal isiyouf,  
ī Jakop bun tamal Negur nē od dō fiya sã nē tobonunā anī yalelauf.

<sup>27</sup> Aya, idi geid bar itenēya nē enei atenēf,  
anī bunem aya dogo neid mosor alelauf.” †

<sup>28</sup> Biya od nigin, idi ā nigin kiwai, anī ere, Negur nē igirīya nigin, idi tubuid tar nigin, Negur idi nigin wau laa fedig, <sup>29</sup> ere nigin, Negur nē ege luwa ado yogon igirīya anī falei fiya kisi feleya sã. <sup>30</sup> Ā uruwa bun Negur dō fiya sã, anī ere, ā gama, Israel Negur dō fiya sã nigin, Negur nē wau yūya walegen. <sup>31</sup> Age fiya gen, idig gama Negur dō fiya sã, are Negur nē wau yūya ā ifenein anī bunem, idig gama Negur nē wau yūya dalouf nigin age fen. <sup>32</sup> Age fiya nigin, Negur ī tamo ganan,

dō fiya sã nē kafī fiya bun inenēdin, are ī idi ganan wau yūya ifenēdiyof nigin age fen.

### Negur Yana Yaleseya Nē Od

<sup>33</sup> O Negur nē kisi biya ado keleī biya, are kisi feleya bagai ilon bagai isilef.

Yogon es fiya anī imir ken, keleīya kisi feleya sã, yogon delē iyōdig anī dir feleya kisi feleya sã.

<sup>34</sup> Are Negur nē Itotoya eig ye irok, “Aim anī Odug nē kisi kelein?

Aim anī ī ulum iroukenen?” ††

<sup>35</sup> “Aim anī Negur ifenen nigin

Negur ī aba kel ifenēf?” ‡

<sup>36</sup> Ada keleī, od enei are momoi, ere nigin, ereb ereb ganan ī bun tamal isif, ereb ereb ganan ī bunem ibodok, ereb ereb ganan ī bun ilef.

ī bun fula fiya medēya faimud ibodōf! Momoi.

### Mata Ibodōya Nē Sesewi Fiya

**12** Anī nigin, turau tar, aya, ā, Negur nē wau yūya ada ifanadan bunem total bagai arokeneik, āgenei bouweī, mata ibodōya nē sesewi fiya, fateul ado Negur wau kulīya nē anī gen Negur wenēgouf. Enei anī, āgenei uurem Negur yana yaleseya. <sup>2</sup> Tenebur enei nē oroya baban to dōg, anī ere, Negur āgenei kisi falei fe mata inoyeī di, āgenei kisi mata anī dō gouf, anī bunem, ā Negur nē oroya, are yogon biya nē, kulīya nē ado, kisi feleya nē oroya anī keleī youf.

<sup>3</sup> Negur nē wau ifenēya bunem, aposel kabī yaleya nē yana aya ifanan nigin, aya ā ganan arokeneik: Taka ī yogo nigin kisi fouf anī to wal fe fen, kisi fouf, anī ere, momoiya Negur ifenen anī kilei, es fiya biya bun yogo nigin kisi fouf. <sup>4</sup> Ada bouwada tekelei bun fara fiya musei ado, anī ere, fara fiya ganan bun kabī tekelei sã, <sup>5</sup> age fiya gen, ada fara fiya musei, anī ere, Kristus bun, bouwada tekelei, fara fiya mugu mugu tunī ganan geid bagu fedif. <sup>6</sup> Negur wau ifenēya ada ifanadan kilei, ada Negur nē igirīya ege luwa fire fire ado. Tamo ī profet od wogōya nē igirīya ege luwa adouf, utornēg len, ī yogon momoiya kilei wogō youf. <sup>7</sup> Ī aruna yaleya nē igirīya ege luwa adouf, utornēg len, ī aruna yalouf. Ī ifelnēya nē igirīya ege luwa adouf, utornēg len, ī ifelnēya kabī yalouf. <sup>8</sup> Ī wau yaleseya nē igirīya ege luwa adouf, utornēg len, ī taka nē wau yalesauf. Ī tunī lau fiya isennēya nē igirīya ege luwa adouf, utornēg len, ī wau sã ifenēdiyof. Ī uyu iroya nē igirīya ege luwa adouf, utornēg len, ī fō fiya sã uyu iroya kabī yalouf. Ī wau yūya ifelnēya nē igirīya ege luwa adouf, utornēg len, ī wau kulīya ado age fouf.

### Wau Laa Fiya

<sup>9</sup> Wau laa fiya are mala yaleya sã. Ereb sane anī seseg fen, ereb biya anī kafī weleg. <sup>10</sup> Ā abob bun tureī tar bagai nigin gen, wauī laa fiya bun wauī wenēgouf. Ā atun abob yana ketem ilun walesagauf. <sup>11</sup> Ā to fō yei ken, kabī total waleg. Āgenei uur nē total bunem,

† Asaia 59:20, 21; 27:9; Jeremaia 31:33, 34

†† Asaia 40:13 ‡ Job 41:11

Oduḡ aruna walogouf. <sup>12</sup> Wau iseya bun wauĩ kulĩ youf, morõ bun megeir ufaragauf, toku kosẽ gouf. <sup>13</sup> Negur nẽ tamo kayau lau difef anidi wenẽdigouf. Tamo urug waledigouf.

<sup>14</sup> Idi ã darau difeneik anidi el fiya wenẽdigouf, el fiya wenẽdig fen, to usisnẽdigouf. <sup>15</sup> Idi waud kulĩ yef geid kulĩ gouf, idi inã dalef geid inã walogouf. <sup>16</sup> Æ abob nigin wauĩ tekelei yenẽf. Æ yeneĩ to walesagauf, anĩ ere, ã tenebur difaref geid nival yũya nigin ago gouf. Æ aug nigin keleĩ biya ado to gouf.

<sup>17</sup> Æ aib taka sane age yeik anĩ, aba sane to wiyẽgouf. Tamo ganan meleid bun ereb madur age fiya nigin kaĩ walagauf. <sup>18</sup> Æ kisi feleyauf are, ganan geid wau inosiya bun ubodõgouf. <sup>19</sup> Neu oboiyou tar, ã aug mala solo to wenẽdigouf, anĩ ere, Negur nẽ didi nigin modoũ unogouf, ere nigin, Negur nẽ Itotoya bun eig ya ibodok, "Oduḡ irok, mala solo ifenẽya are neu. Ayam mala solo afenẽf." <sup>20</sup> Age fiya ban, Negur nẽ Itotoya bun eig ya ibodok,

"Ogon kiwai naũ foug are, saaf wenẽ yãf,  
ĩ naan ail foug are, naan wenẽ yãf.

Anĩ agouf bun, ĩ yogon ereb sane age fen nigin mama sane falauf." ††

<sup>21</sup> Æ sane anim to wal yeĩf, anĩ ere, ãgem biya bunem sane anĩ wal gouf.

### Gawaman Farumen Ibodõya

**13** Tamo kayau ganan gawaman farumedin dibodõf, ere nigin, gawaman Negurem to inodin anĩ taka to ibodok. Gawaman gama dibodok are Negur yogo inodin. <sup>2</sup> Anĩ nigin, taka ĩ gawaman kiwai ifenek, ĩ ereb Negurem inon anĩ kiwai ifenek. Idi anĩ age difef, idi es fiya dogo bouweid bun dinouf. <sup>3</sup> Ere nigin, uyu iroya tamo, idi biya age difef anidi kumĩ to difiyẽdidig, anĩ ere, idi sane age difef anidi kumĩ difiyẽdidig. Uyu iroya ĩ õ to kumĩ ifonõf anĩ, õ oroyok de? Agouf are, ereb tobonunã biya anĩ ago wo di, ĩ õ yanã yalesauf. <sup>4</sup> Ere nigin, ĩ ogon biya fiya nigin Negur nẽ kabĩ tamo inenen. Anĩ ere, sane ago wouf, õ kumĩ wouf, ere nigin, ĩ dimig ege to irouf. ĩ Negur nẽ kabĩ tamo, ĩ mala ifenẽya tamo, idi sane age difef anidi bun Negur nẽ didi irou isif. <sup>5</sup> Anĩ nigin, ã gawaman farumen bagai ubodõgouf, are darau kumĩya bunem dogol sã, Negur mala bun ada biya be sane es fiya nẽ kisi nigineg ago gouf. <sup>6</sup> Anĩ nigin, ã takiseg unogedig, ere nigin, gawaman nẽ kabĩ tamo are Negur nẽ kabĩ tamo, idi dogo neid sain ganan gawaman kabĩ nigin difenẽdig. <sup>7</sup> Æ ereb ganan ifenẽya nigin yenek are wenẽgouf, ã takis ifenẽya nigin ouf, takis unogouf, ã safina yaleya nẽ takis ifenẽya nigin ouf, safina yaleya nẽ takis unogouf, ã anini fiyẽya nigin ouf, anini wiyẽgouf, ã seli yabiya nigin ouf, seli wabigouf.

### Abob Nigin Wauĩ Laaf, Naa Mogo Dodolef

<sup>8</sup> Wareḡ taka to utorõge di, ibodõf, abob nigin wauĩ laa fiya nẽ wareḡ dogol ã atun ibodõf, ere nigin, taka ĩ

ne tã nigin wau laa fef, ĩ lo dõf kisi felef. <sup>9</sup> ĩtãfiya eig ye irok, "Seseirã to uno," "Tamo to ukeis," "Bẽ to ule," "Taka nẽ safina to malã ile orouf," \*ĩtãfiya eneidi ado ereb lo tunĩ ifaredif are, ĩtãfiya tekelei eneim ganan irouf, "Õ ogo nigin wau laa fef gen, nẽ tã nigin ago wau laa foug." †<sup>10</sup> Wau laa fiya anim, ne tã bun sane to age fedig. Anĩ nigin, wau laa fiya are lo dõf kisi felef.

<sup>11</sup> Anĩ nigin, sain enei nigin wedereĩ fokõf fen, enei ago gouf. Æ mulaĩ itorõya nẽ sain mogo isif, ere nigin, ada uruwa bun momoi taun bunem isi, gama ada neda kel gei fadaya nẽ sain anĩ melsak. <sup>12</sup> Bõ are mogo sa kalau fenẽ, naa mogo wõ you fenẽ. Anĩ nigin, ada gugum nẽ tobonunã tator, yerin gadi tafel fen, lalan nẽ tobonunã biya anĩ dõ tafouf. Age tafe fen, ada, kusĩ nigin kusĩ nẽ naki total difonũdig gen, tobonunã biya anĩ, ada bun ibodõf nigin age tafouf. <sup>13</sup> Tamo kayau we feleyan lo difeid le di, tobonunã biya age difedig gen, ada tobonunã biya dõ tafouf, bilãya ado naan yõya bun sã, noli tobonunã ado bouwa nẽ oroya nigin total sane wau fãya bun sã, kusĩ ado kiyeĩ buneg sã. <sup>14</sup> Anĩ ere, Oduḡ Jesus Kristus anĩ waleḡ, aug bun ufonũgouf, agog fen, bouwa nẽ oroya dõ fiya nẽ kisi anĩ bun to ufaragauf.

### Momoiya Felu Reya Ado Momoiya Total

**14** Taka ĩ momoiya felu ref are waleḡ fen, yogon keleĩ ã geid tekelei sã nigin to monẽ wiyẽgouf.

<sup>2</sup> Tamo taka in momoiya anim irõ di, ĩ ereb ereb ganan yõya nigin age fedig, anĩ ere, tamo taka in momoiya felu reya, ĩ sako dogol yõdig. <sup>3</sup> Tamo ereb ereb ganan yõdig anim, ne tã sako dogol yõdig to kono fiyẽf, age fe di, tamo ereb ereb ganan to yõdig anim, tamo ereb ereb ganan yõdig bou bun od to yũf, ere nigin, Negur ĩ yalen. <sup>4</sup> Õ ai anĩ taka nẽ kabĩ tamo es wof? ĩ kubũ be youf, ifar bẽf, are yogon Oduḡ bun ibodok. Anĩ nigin, ĩ ifarauf, ere nigin, Oduḡ ĩ yogo, ĩ ifareya nigin age fiya kisi feleya.

<sup>5</sup> Tamo taka ĩ, naa taka anĩ naa ganan wal fiya gen iledig. Tamo taka naa ganan are de kilei kilei iledig. Idi mugu mugu dogo neid kisi bun anĩ nigin waud diteneĩf. <sup>6</sup> Taka ĩ naa taka anĩ odug gen ilef, Oduḡ nigin ye fen, ĩ age fef. Age fiya gen, taka ĩ yaro muda yoko, Oduḡ nigin ye fen, yoko, ere nigin, ĩ Negur de fiyek. Taka ĩ ereb ereb tunĩ yõya nigin itorok, ĩ Oduḡ nigin ye fen, agef fen, Negur de fiyek. <sup>7</sup> Ere nigin, ada takam yogo nigin mata to ibodok, ada takam yogo nigin to laa fef. <sup>8</sup> Ada mata tabodok are, ada Oduḡ nigin mata tabodok. Ada gare tauf are, ada Oduḡ nigin gare tauf. Anĩ nigin, ada mata tabodok be, gare taufeg, ada Oduḡ nẽ.

<sup>9</sup> Gariya enei nigin, Kristus laaf fen, mata kel fã yen, are ĩ tamo gare den ado tamo mata dibodok neid Oduḡ ibodõf nigin age fen. <sup>10</sup> Age fiyauf are, õ ere nigin ogon turã es wiyek? Õ ere nigin ogon turã kono wiyek? Ada ganan Negur nẽ es fiya nẽ sia wagen tafarauf. <sup>11</sup> Age fiya nigin, Negur nẽ Itotoya eig ya ibodok,

† Diuteronomi 32:35 †† Proverb 25:21, 22

‡ Eksodas 20:13-15, 17; Diuteronomi 5:17-19, 21 †† Levitikas 19:18

“Odug irok, aya momoi bagai mata abodok nigin, iboreid ganan aya bun bobou difouf, baleid ganan kurō difeis, Negur yana dalesauf.” †

<sup>12</sup> Age fiya nigin, ada mugu mugu, ada dug nigin Negur kurō tafeis tarokenēf.

<sup>13</sup> Anī nigin, ada abob es fiyēya tatorōf. Anī ban, ā tu-reī nē naab bun ereb naabura gudūf kenēya nē taka be, ye tūf kenēya nē taka to unogouf nigin lo wala-gauf. <sup>14</sup> Odug Jesus kisi fokō fel kana di, aya momoi bagai kisi afef, are saaf, Negur mala bun amuyē ado taka to ibodok. Anī ere, taka ī saaf taka amuyē ado youf are, ī yogo bun saaf anī amuyē ado. <sup>15</sup> Ereb ō woko anī bunem ogon turā ī wau morō wenēf are, ō waū laa fiya bunem to agof. Ereb ō woko anī bunem, turā Kristus ī nigin laa fen anī to daū wiyē. <sup>16</sup> Anī nigin, ereb ā biya gef anī, tamo kayau idi to sane douf nigin ago gouf. <sup>17</sup> Ere nigin, Negur nē tano are, saaf yōya ado naan yōya nē sā, anī ere, Awa Uur Fateul bun madur bagai, wau inosiya ado, kulīya nē. <sup>18</sup> Taka ī naab enei bunem Kristus aruna yalef, ī Negur wau kulīya ifenē di, tamo dile fen, biya douf.

<sup>19</sup> Anī nigin, ada ereb maror inoya nigin ado abob yalesnēya nigin, kabī total talouf. <sup>20</sup> Saaf bunem Negur nē kabī to daū gouf. Saaf ganan amuyē sā, anī ere, tamo ī saaf yōya bunem, ne tā, Negur nigin momoiya nē naab dōf mog ye isog yale di, kubū youf, are sane. <sup>21</sup> Ō, nē turā kubūya nigin yaro to wāf be, aai to wāf be, ereb takag to agouf, are biyauf.

<sup>22</sup> Anī nigin, ereb ereb enei bun ogon momoiya naig be fe yenēf, are ō ogo ado Negur bun dogol ibodōf. Tamo ī, ereb ī momoi bagai kisi fen biya yef anī, age fef bun, ī yogo bou bun od to yuk are, Negur ī el fiyek.

<sup>23</sup> Anī ere, tamo ī kisi togouf fen, saaf yoko, ī yogo bou bun od yuk, ere nigin, yogon saaf yōya are momoiya bunem sā. Ereb ereb ganan momoiya bunem isiya sā, are mosor.

**15** Ada momoiya total ado, idi momoiya total sā neid morō faali tafouf. <sup>2</sup> Ada mugu mugu, neda tā tar, idi neid biya fiya nigin ado idi yalesnēdiyof nigin, wau al fiya tafenēdiyof. <sup>3</sup> Ere nigin, Kristus ī yogog yogo wau al foug nigin to age fen, are Negur nē Itotoya eig ye irok kilei, “Idi ō kono diyon anidi neid kono fiya, aya bun isin.” ††<sup>4</sup> Ereb ereb ganan kulu ditoton are, ada ifel-nadauf nigin ditoton, are morō bun feseya sā ifareya bunem ado wau yaleseya Negur nē Itotoya ani ifanad-af anī bunem, ada wauda iseya adouf nigin age difen.

<sup>5</sup> Negur, morō bun feseya sā ifareya ado wau yaleseya ifenēdig ī, ā Kristus Jesus dōg mog, ā atun wau tekelei nē uur ifenēif nigin aya orouf, <sup>6</sup> anī bun, wauī tekelei ado sigoreī tekelei bunem, ā Negur, neda Odug Jesus Kristus nē Tama fula fiya medeīya wenēgouf.

<sup>7</sup> Anī nigin, Negur yana fula fiya medeīya bun iselauf nigin, Kristus ā yaleyein gen, āg abob walogouf. <sup>8</sup> Aya ā arokeneik, Kristus ī, Juda neid kabī tamo wō yen, are Negur tubuda tar bun age afouf yen anī kilei bagai, Negur age foug anī, megeir fe ifelnēdiyof nigin ado,

† Asaia 45:23 †† Sam 69:9

<sup>9</sup> haiden idi Negur nē wau yūya nigin, Negur fula fiya medeīya difenēf nigin age fen, are Negur nē Itotoya bun ibodok kilei,

“Anī nigin, aya haiden atun ō yanā alesauf, aya ō yanā bun seg alouf.” ‡

<sup>10</sup> Baban ī irok,

“O haiden ā, in tamo kayau geid wauī kulī ye.” ††

<sup>11</sup> Baban,

“Haiden ā ganan, Odug yana waleseg!

Tamo kayau ā ganan, ī yana waleseg fen, seg waleg!” ††

<sup>12</sup> Baban, Asaia iron,

“Jesi nē warumutei bun bali mata fokū youf, ī wō ye fen, teneub ganan nē mudur ibodōf, haiden idi ī nigin waud isauf.” †††

<sup>13</sup> Wau iseya nē Negur, ā Negur momoi wiyēg mog, wau kulīya ado wau inosiya ganan, ā namein fi fele di, ise isokosauf, anī bunem, ā bun Awa Uur Fateul nē megeir bunem wauī iseya gogū foug nigin aya orouf.

### Pol, Haiden Atun Kabī Tamon

<sup>14</sup> Neu turau tar, aya yug momoi auf, ā aug tobonunā biya barikā, keleī barika ken, abob ifelnēya nigin kisi feleya bagai. <sup>15</sup> Anī ere, wau ifenēya Negur aya ifanan anī nigin, aya ā gariya tunī baban wedereī fokō youf nigin total ado atokenein, <sup>16</sup> wau ifenēya anī bunem, aya haiden bun Kristus Jesus nē kabī tamo wō au fen, pris gen Negur nē biya od wogō auf, are haiden idi, Negur mala bun sesewi fiya biya, Awa Uur Fateulem fateuledin, wowā douf nigin age afef.

<sup>17</sup> Anī nigin, aya Kristus Jesus bun, neu kabī Negur bun aledig nigin yanau alesef. <sup>18</sup> Aya ereb taka to wogō au fen, ereb Kristus aya bunem age fen anī dogol wogō auf, are aya ereb aya wogō aun ado ereb aya age afen bunem, haiden idi uyu arou di, idi Negur sigor dō difef anī, wogō auf, <sup>19</sup> are aya Awa Uur nē megeir bunem, uris ado memelik nē megeir bun age afen. Anī nigin, aya Jerusalem anenem gariya ano fen, tokō afel, Ilirikum provins ayo kele fen, Kristus nē biya od kisi feleya bagai yaor afen. <sup>20</sup> Aya, idi Kristus keleī sā anidi bun, an biya od wogō auf nigin, faimud kisi total aledig, are aya takam gariya inon anī bun, kabī to alouf nigin age afedig. <sup>21</sup> Are Negur nē Itotoya bun ibodok kilei,

“Idi ī nigin to karī den are dilouf,

agef fen, idi to karī den are keleī youf.” †††

<sup>22</sup> Aya biya od modoū age fediyon wogōya nigin sain musei aledig anim, aya ā gein isiya nigin sain musei naaburau gudū fedig.

### Pol Rom Taun Ki Ileya Nigin Kisi Fen

<sup>23</sup> Anī ere, gama aya kabī yaleya nigin, akor enei bun modoū taka sa ken, aya yar musei ā gein isiya nigin kisi total aledig nigin, <sup>24</sup> aya Spein alauf bun asi fen, ailiy-eif nigin kisi afen. Aya ileyā bunem ki ayei ken, aya ā

‡ 2 Samuel 22:50; Sam 18:49 †† Diuteronomi 32:43 †† Sam 117:1 ††† Asaia 11:10 ††† Asaia 52:15

geid sain naal uyu kũ ta tabod ken, ã neu delē nigin usennagauf nigin wau isef. <sup>25</sup> Anĩ ere, gama aya Negur nē tamo kayau aruneid yaleya nigin Jerusalem elef. <sup>26</sup> Ere nigin, Masedonia provins nē sios ado Akaia provins nē sios idi, Jerusalem oun Negur nē tamo kayau atun maleg anidi isennēdiya nigin waud al fen. <sup>27</sup> Idi age fiya nigin waud al fen, momoi bagai idi, Juda idi bun wareg ado. Ere nigin, haiden idi, Juda idi neid uur nē el fiya dalen nigin, haiden idi Juda idi bun safina nē el fiya bunem wareg dũf. <sup>28</sup> Anĩ nigin, aya kabĩ enei bure afel fen, idi isennēya enei dalen anĩ ail fen, Spein iley a nigin asi fen, ki ayeif. <sup>29</sup> Aya keleĩ, sain aya ã gein asiyouf bun, aya Kristus nē el fiya barikã ado asiyouf. <sup>30</sup> Turau tar, neda Odug Jesus Kristus bunem ado Awa Uur nē wau laa fiya bunem, aya ã total bagai arokeneik, ã, neu kabĩ nē morõ bun, aya nigin Negur kosē wiyēgouf bunem usennagauf. <sup>31</sup> Aya Judia teneub bun momoiya sã imedin tamal yalelna di, neu kabĩ Jerusalem oun Negur nē tamo kayau an anidim dirouwauf nigin kosē gouf, <sup>32</sup> ago ge di, aya Negur nē oroya bunem kulĩya ado ã gein asi fen, aya ã geid si tano fen, megeir alouf. <sup>33</sup> Wau inosiya nē Negur ã ganan bun ibodõf. Momoi.

### Pol Nē Aanya

**16** Aya nemã mainamã Foibe, Senkria taun nē sios neid kabĩ kayau biya ya anĩ, ã keleĩ youf nigin arokeneik. <sup>2</sup> ã Negur nē tamo kayau ago wiyēdigedig gen, ĩ Odug bun waleg fen, ĩ ã bun ereb lau fef anĩ usennēgouf, ere nigin, ĩ tamo kayau musei isenneif fen, ayag isennan.

<sup>3</sup> Kristus Jesus bun, neu kabĩ turau tar, Prisila Akwila ado, neu aanya wenēdigouf. <sup>4</sup> Idi aya nigin laa uyu ditoron. Aya dogol sã, haiden neid sios gananege idi de difiyēdif.

<sup>5</sup> Sios idi neid fõ bun guru difedig anidig, neu aanya wenēdigouf.

Neu oboiyou Epenetus, Asia provins bun Kristus nigin ĩ ketem momoiya tamo wõ yen anĩ, neu aanya wenēgouf.

<sup>6</sup> Maria ã nigin kabĩ total yalen anĩ, neu aanya wenēgouf.

<sup>7</sup> Neu sirag tar, Andronikus ado Junia † idi aya geid kalabus bun mabodon anidi, neu aanya wenēdigouf. Aposel atun idi ilun bagai difaref, aya momoiya sã mog, idi ketem Kristus nigin momoi den.

<sup>8</sup> Ampliatius, Odug bun neu oboiyou, neu aanya wenēgouf.

<sup>9</sup> Urbanus, Kristus bun neda kabĩ turada ado, neu oboiyou Stakis, neu aanya wenēdigouf.

<sup>10</sup> Apeles ĩ nigin Kristus bun, tamo kayau biya difiyēdig anĩ, neu aanya wenēgouf.

Idi Aristobulus nē ibor anidi, neu aanya wenēdigouf.

<sup>11</sup> Herodion, neu sirag, neu aanya wenēgouf.

Idi Narsisus nē ibor Odug bun dibodok anidi, neu aanya wenēdigouf.

<sup>12</sup> Trifena ado Trifosa, kayau idi Odug bun kabĩ total daledig anidi, neu aanya wenēdigouf.

Neu oboiyou Persis, kayau taka Odug bun kabĩ total yaledig anĩ, neu aanya wenēgouf.

<sup>13</sup> Rufus Odug bun igirnen ado, yogon sina, ĩg aya neu naai, neu aanya wenēdigouf.

<sup>14</sup> Asinkritus, Flegon, Hermes, Patrobas, Hermas ado, turada tar idi geid difaref anidi, neu aanya wenēdigouf.

<sup>15</sup> Filologus, Julia, Nereus ĩ main ado, Olimpadas ado, Negur nē tamo kayau ganan idi geid difaref anidi, neu aanya wenēdigouf.

<sup>16</sup> Abob fateul bunem umã wiyēgouf fen, aan wiyēgouf. Kristus nē sios ganan ã bun aanya sur difef.

<sup>17</sup> Turau tar, idi, ã Negur nigin keleĩ walegen anĩ, ditor ken, ã fara diyey ken, naabureĩ gudũ difedig anidi lo walagauf nigin, aya ã total bagai arokeneik. Idi sese wedigouf. <sup>18</sup> Ere nigin, tamo age fediya are, neda Odug Kristus aruna to daledig, anĩ ere, idi dogo neid oroya aruna daledig. Od dan biya ado mala yaleya nē od bunem, idi tamo kisi sã gen anidi didegnēdidig. <sup>19</sup> Tamo ganan āgenei Negur nē od dõ fiya biya anĩ karĩ den, anĩ nigin, aya ã nigin wau fatuk bagai kulĩ yef, anĩ ere, aya ã ereb biya nigin kisi biya waleg fen, sane nigin so-so gouf anĩ orouf.

<sup>20</sup> Wau inosiya nē Negur, mogo melsã Satan ã yeĩ farumen orok fouf.

Neda Odug Jesus nē wau ifenēya ã bun ibodõf.

<sup>21</sup> Timoti, neu kabĩ turau, yogon aanya ã bun sur fef. Neu sirag tar, Lusius, Jeson ado, Sosipater idig age difef.

<sup>22</sup> Aya, Tertiussem pas enei atotof, Odug bun neu aanya ã bun sur afef.

<sup>23</sup> Gaius ĩ, aya ado ein sios ganan isennēdidig, yogon aanya ã bun sur fef.

Erastus ĩ taun nē moni lo fiya tamo ado, neda turada Kwartus, idi neid aanya ã bun sur difef. ††

<sup>25</sup> Negur ĩ, neu biya od ado Jesus nigin wogõya anĩ bunem, ã yalesneĩya kisi feleya. Biya od nē waa kulu bagai iminēyan ibodon, <sup>26</sup> anĩ ere, Negur mata ibodkeleya anĩ, profet irokenēdi di, ditoton anĩ bun, kurõ falaisi gama yaoren, are teneub ganan ĩ nigin momoi de fen, dõ difouf nigin age fen. <sup>27</sup> Negur ĩ yogo dogol kisi biya barikã, Kristus Jesus bunem fula fiya medeĩya fai-mud ĩ bun ibodkalau! Momoi.

† Yana enĩ kayau nē yana. Itotoya tunĩ dum ditoton, are Junias den. Junias are tamo nē yana.

†† Itotoya tunĩ eig de ditoton: sur difef. <sup>24</sup> \*Ada neda Odug Jesus Kristus nē wau ifenēya, ã ganan bun ibodõf. Momoi.

# 1 KORIN

**1** Aya Pol, Negur nē oroyam Kristus Jesus nē aposel wō auf nigin iweignan, neda turada Sostenes ado, <sup>2</sup> Korin oun Negur nē sios ā bun, pas enei matotke-neik. Ā Kristus Jesus bun fateuleī fen, fateul ubodō-gouf nigin iweignein, are tamo kayau ganam fire firen difar fen, neda Odug Jesus Kristus, idi neid Odug ado neda Odug ī yana dalesedig anidi geid weim iweignein. <sup>3</sup> Negur neda Tamada ado Odug Jesus Kristus neid wau ifenēya ado wau inosiya, ā bun ibodōf.

## Pol Negur De Fiyen

<sup>4</sup> Aya wededem ā nigin Negur de afiyēdig, ere nigin, yogon wau ifenēya Kristus Jesus bun ā ifenein. <sup>5</sup> Ere nigin, Jesus bunem ereb ereb ganam bun, ā kisi feleya ifenein, are āgenei wogō ganam ado keleī ganam bun, <sup>6</sup> ere nigin, Kristus nigin neda wogōya, ā bun megeir ifaren. <sup>7</sup> Anī nigin, ā neda Odug Jesus Kristus yaorouf nigin wauī fatuk unog fen, tarig mog, ā Awa Uur nē ege luwa taka to lau gef. <sup>8</sup> Jesus ā total irouyeik ile, idi-keleya bun ilauf, anī bunem, neda Odug Jesus Kristus isiyouf nē naa bun, ā bouweī od sāf. <sup>9</sup> Negur ī, yogon Naal Jesus Kristus, neda Odug geid, ā nigal gouf nigin iweignein, ī ereb yef, de age fouf bagai.

## Sios Atun Fara Fiya

<sup>10</sup> Turau tar, aya neda Odug Jesus Kristus yana bunem total bagai arokeneik, are ā atun fara fiya taka to ibodōf nigin, ā ganam abob nigin wauī tekelei yen ken, ā wauī ado kisi tekelei bagai ubodōgouf. <sup>11</sup> Neu turau tar, tunī Kloe nē ibor bun tamal dirokanan, are ā atun luwa irouya ibodok. <sup>12</sup> Aya enei wogō auf, are eig fiya, ā atun takam irok, “Aya Pol dō afef,” takam irok, “Aya Apolos dō afef,” takam irok, “Aya Pita dō afef,” takag irok, “Aya Kristus dō afef.”

<sup>13</sup> Kristus ī fara furu fen de? Aya Pol ī, ā nigin aa tetek bun dun de? Ā aya Pol yanau bunem naan digunein de? <sup>14</sup> Aya Negur de afiyek, are aya ā taka to naan agunen, Krispus ado Gaius dogol naan agunēdin. <sup>15</sup> Anī nigin, taka nem to irōf, “Aya Pol yana nem naan agun.” <sup>16</sup> (Momoī, aya Stefanas nē ibor tareg naan agunēdin, anī teten, takag naan agunen be anī, to kisi afef.) <sup>17</sup> Ere nigin, Kristus ī aya naan agunēdiyof nigin to sur fiyan, anī ere, biya od wogō auf nigin sur fiyan, are Kristus nē aa tetek nē megeir to yalelauf nigin, tamo nē kisi biya wogōya anī bunem sā.

## Kristus Ī, Negur Nē Kisi Biya Ado Megeir

<sup>18</sup> Jesus aa tetek bun laa fen ya od anī, idi inanakele-diyof anidi bun are neneya, anī ere, ada isennadaf bun, od are Negur nē megeir. <sup>19</sup> Ere nigin, Negur nē Itotoya bun eig ye irok:

“Aya tamo kisi biya adodo neid kisi biya daū afalauf, aya tamo keleī odug adodo neid keleī alelauf.” †

<sup>20</sup> Tamo kisi biya adodo nain? Tamo keleī odug adodo nain? Sain enei nē keleī yaleya nigin luwa irouya tamo nain? Negur ī tenebur enei nē kisi biya anī to neneya inon de? <sup>21</sup> Negur nē kisi biya bunem, tenebur tamo dogo neid kisi biya anim, Negur nigin to kelein, anī nigin, neneya od dedig anī wogō taudig bunem, idi momoi def anidi isennēdiya nigin, Negur wau al fen. <sup>22</sup> Juda idi memelik nē uris dilouf nigin dirōdig, Grik idi kisi biya anī dimirēdig. <sup>23</sup> Anī ere, ada Kristus aa tetek bun dun anī wogō taudig, od anī Juda idi bun, ye tū fiya od, haiden idi bun, are neneya od, <sup>24</sup> anī ere, idi Juda ado Grik Negurem iweignēdin anidi bun, Kristus ī Negur nē megeir, Negur nē kisi biya. <sup>25</sup> Ere nigin, Negur nē neneya kisi are, tamo nē kisi biya wal fiya, Negur nē folo reya are, tamo nē megeir wal fiya.

<sup>26</sup> Turau tar, ā naig be fiya ufareg mog, ā iweignein anī kisi gouf. Ā musei sam, tamo nē keleī bunem, kisi biya ado wowā gen. Musei sam total ado wowā gen. Musei sam yeneī ado wowā gen. <sup>27</sup> Anī ere, Negur kisi biya adodo mama ifenēdiyof nigin, tenebur enei nē neneya igirnēdin. Negur ī megeir adodo mama ifenēdiyof nigin, tenebur enei nē folo reya igirnēdin. <sup>28</sup> Negur ī tenebur enei nē yeneid sāsā, meleid irim lai difedig ado, ereb taka sā dedig anī igirnēdin, are ereb ado dedig anī, yana sa kalauf nigin age fen, <sup>29</sup> anī bunem, Negur mala bun, taka nem yogo yana to yalesauf.

<sup>30</sup> Negur nigin ā Kristus Jesus bun ubodōgef, Jesus ī ada nigin Negur bunem kisi biya wō yen, are ada ī bunem madur bagai, fateul wowā tau fen, isennēya talen. <sup>31</sup> Anī nigin, Negur nē Itotoya bun eig ye irok, “Tamo ī yogo yana yalesef are, Odug ereb age fen anī nigin yana yalesauf.” ††

**2** Turau tar, aya ā gein asi fen, Negur yaor afouf nigin wogō ayein sain bun, aya od biya odug nem be, kisi biya odug nem to wogō aun. <sup>2</sup> Ere nigin, aya ā geid tabodon sain, aya ereb ereb ganam wederou tu kel fen, Jesus Kristus ado, ī aa tetek bun laa fen anī dogol kisi afouf nigin kisi afokelen. <sup>3</sup> Sain aya ā gein asin, aya totalou sā, fatuk bagai kumī tererē aun.

† Asaia 29:14 †† Jeremaia 9:24

<sup>4</sup> Neu od ado neu wogōya, are kisi biya nē, wauī faleiya nē od bunem sā, Awa Uur nē megeir nē ifelnēya bunem, <sup>5</sup> are āgenei momoiya, tamo nē kisi biya bun to ibodōf, Negur nē megeir bun ibodōf nigin age afen.

### Awa Uur Nē Kisi Biya

<sup>6</sup> Ada kisi biya nē od atīya anidi atun wogō taudig, anī ere, kisi biya anī, are sain enei nē sā, sain enei nē uyu iroya, fau inanakelediyouf anidi neid sā. <sup>7</sup> Anī ere, ada, Negur nē waa kisi biya anī, wogō taudig, are iminēyan ibodok, teneub kare fiya sā mog Negur neda fula fiya medeīya nigin mogo igirin anī. <sup>8</sup> Sain enei nē uyu iroya takam, kisi biya anī to keleim. Idi kisi biya anī keleim are, idi fula fiya medeīya nē Odug aa tetek bun to dum. <sup>9</sup> Anī ere, Negur nē Itotoya eig ye irok kilei:

“Negur nigin waud laa fedig idi nigin Negur dodok fen anī,

malam taka to ilen,  
weder takam to karī yen,  
kisi takam to fokō yen.” †

<sup>10</sup> Anī ere, Negur yogon Awa Uurem ada bun anī yaor fen.

Awa Uur ī ereb ereb ganan fai yeledig, Negur nē ereb ereb ilon bagaig fai yeledig. <sup>11</sup> Tamo atun aim, tamo taka nē kisi keleī? Are tamo anī nē uurem dogol keleī. Age fiya bagai, tamo takam Negur nē kisi keleī sā, Negur nē Awa Uurem dogol keleī. <sup>12</sup> Ada teneub enei nē uur to talen, anī ere, ada Awa Uur Negur bun tamal talen, are ereb Negur wau sā ifanadan anī, ada keleī youf nigin age tafen. <sup>13</sup> Ada enei anī wogō taudig, are tamo nē kisi biya bunem od difelnadan anī bunem sā, are od Awa Uurem ifelnadan anī bunem. Ada Awa Uur nē od bunem Awa Uur nē kisi wogō taudig. <sup>14</sup> Tamo Awa Uur sā ī, Negur nē Awa Uur bun tamal ereb isif anī to yale iroudig, ere nigin, yogon karīya bun, are neneya. Ī anī keleīya nigin kisi feleya sā, ere nigin, are Awa Uur adodom dogol es difedig. <sup>15</sup> Awa Uur ado tamo ī, ereb ereb ganan nigin es fedidig, anī ere, ī yogo taka nem to es fiyēf. <sup>16</sup> Negur nē Itotoya eig ye irok:

“Aim Odug nē kisi keleī ken,  
ī faded fiyēf?” ††

Anī ere, ada Kristus nē kisi ado.

### Sios Bun Fara Fiya

**3** Turau tar, aya ā momoiya nigin atīya gen to ayein, ā teneub enei nē dogol, ā Kristus bun momou gen ayein. <sup>2</sup> Aya su afenein, saaf total anī to afenein, ere nigin, ā anī nigin to saika gen. Momoi, ā gamag fau to saika gef. <sup>3</sup> Ā fau teneub enei nē dogol ubodōgef. Ā atun, kiyeī ado luwa iroya ibodok, anī nigin, ā fau teneub enei nē sā de? Ā teneub enei nē tamo gen to ago gef de? <sup>4</sup> Takam irok, “Aya Pol dō afef,” takam irok, “Aya Apolos dō afef,” ago gouf are, ā teneub enei nē tamo sā de?

<sup>5</sup> Agef ilauf are, Apolos ī ai? Pol ī ai? Amā Negur nē kabī tamo dogol, amā bunem ā momoi gen, are Odu-gem kabī morou morou ifanaman kilei. <sup>6</sup> Ayam faat atenē di, Apolosem naan fen, anī ere, Negurem odugouf nigin age fen. <sup>7</sup> Anī nigin, faat itenēya tamo ado naan fiya tamo are ege, anī ere, Negur ī yogo dogol odug, ere nigin, ī ereb odugouf nigin age fedig. <sup>8</sup> Faat itenēya tamo ado naan fiya tamo, idi karīya tekelei ado. Negur idi mugu mugu kabī dalen kilei, mala solo ifenēdiyof. <sup>9</sup> Ere nigin, amā Negur nē kabī tura tar, ā Negur nē kabī akor, Negur nē fō.

<sup>10</sup> Negur ī aya wau ifenēya ifanan anī bunem, aya fō inoya keleī biya tamo gen, fō inoya nigin gariya anon, age afe di, taka nem anī teten fō inof. Anī ere, tamo mugu mugu el de, lo de fen, fō dinouf nigin lo difalauf. <sup>11</sup> Ere nigin, fō gariya inon, are Jesus Kristus, taka nem fō gariya fire inoya kisi feleya sā. <sup>12</sup> Tamo takam fō gariya enei teten, gol, silwa, meein moni odug, aa, yeye be, wit turu nem fō inouf are, <sup>13</sup> yogon kabī naig be fiya ere yaorouf, ere nigin, Kristus nē naa bun, anī lalan bun irusi inouf. Are yā ado wō ye di, yā anim tamo mugu mugu nē kabī nē kaū es foug. <sup>14</sup> Ī ereb inon anī ifarlauf are, ī yogon mala solo yalouf. <sup>15</sup> Ī ereb inon anī isaikalauf are, ī agogon youf. Ī yogo Negurem kel yalouf, anī ere, ī yā malan tamal ulō yesiya tamo gen ibodōf.

<sup>16</sup> Ā aug are Negur nē tempel, Negur nē Awa Uur ā namein ibodōdig anī, ā to keleī de? <sup>17</sup> Taka ī Negur nē tempel daū foug are, Negur ī tamo anī daūf irailauf, ere nigin, Negur nē tempel are fateul, are ā tempel anī.

<sup>18</sup> Ā aug to udegnēgouf. Āgenei taka ī, gama sain enei nē keleī bunem, aya kisi biya ado yef are, ī neneya wō youf bagai, are ī kisi biya ado wō youf nigin age foug. <sup>19</sup> Ere nigin, Negur mala bun, teneub enei nē kisi biya are neneya. Negur nē Itotoya eig ye irok kilei, “Negur ī, kisi biya adodo tamo dogo neid keleī anim kor bun dilelel mog, gei fedidig,” †<sup>20</sup> Negur nē Itotoya takag irok, “Odug ī keleī, kisi biya adodo tamo neid kisi, are ege.” †<sup>21</sup> Anī nigin, tamo yeneid to walesagauf! Ere nigin, ereb ereb ganan are āgenei, <sup>22</sup> Pol, Apolos, Pita, teneub enei, mata ibodōya, laa, gama be, dumen, ereb ereb ganan, are āgenei, <sup>23</sup> ā Kristus nē, Kristus ī Negur nē.

### Kristus Nē Aposel Tar

**4** Anī nigin, tamo idi, amā nigin, idi Kristus nē kabī tamo tar, Negur nē waa lo fiya nigin idi imeid bun inon de fen, kisi difoug. <sup>2</sup> Tamo idi ereb lo difoug nigin imeid bun inon anidi, dogo neid marau sigor dō difef dile, age difoug anī, marau orof. <sup>3</sup> Ā aya es wiyagef be, tamo nē kot bun es difiyaf, are aya to sii fiyaf. Momoi, aya yug nigineg to es afedig. <sup>4</sup> Neu kisi are karētut, anī ere, anim aya mosor sā to auf. Odug im aya es fiyaf. <sup>5</sup> Anī nigin, es fiya nē sain fau wōya sā mog, to es gouf. Tari gef uleg, Odug isiyof bun. Ī ereb gugum bun iminek anī lalan bun irou isi fen, tamo neid waud bun kisi

† Asaia 64:4 †† Asaia 40:13

‡ Job 5:13 †† Sam 94:11



ibodok anī yaor foug. Sain anī bun, idi mugu mugu Negur bun yana odug dalouf.

<sup>6</sup>Turau tar, gama aya, āgenei biya fiya nigin, ereb enei arokenein, aya yug ado Apolos bunem, afelnein, anī bunem, ā wogōya eig fiya nē gariya, are amā bun keleī walogouf, “Itotoya bun yenek anī to ufodulagauf.” Ā anī keleī youf are, ā tamo taka anī yana waleseg fen, taka to lai gouf. <sup>7</sup>Ere nigin, aim ō, taka wal fiya inenok? Ō mogo ado, ere anī ō to walen? Ō mogo anī walen ouf are, ere nigin ō anī to walen gen, ogo yanā walesef?

<sup>8</sup>Ereb ā oroyeik ganān ā mogo ado. Ā mogo safina kisi feleya bagai ubodōgef. Ā mogo king wowā gen, are amā geid sā. Amā ā geid king wowā tauf nigin, ā momoi bagai king wowā gem anī, aya orouf bagai. <sup>9</sup>Ere nigin, aya kisi afef, Negur ī amā aposel, tamo yukesiya nigin dinenēdig gen, tamo dilouf nigin, gī bun idikeleyan bagai inenaman. Saa teneub ado, are tamo ado engel meleid bun, amā fele difamāf nigin inoman. <sup>10</sup>Amā Kristus nigin neneya mabodok, anī ere, ā Kristus bun kisi biya bagai ubodōgef. Amā totol sā mabodok, anī ere, ā totol ubodōgef. Ā yeneī dalese dig, amā yanamā to dalesedig. <sup>11</sup>Kulu nem isi gama sain enei bun, amā naū ado naan ail mayok, amā gabar masasak mafilaik, amā darau difanamak, amā fō sā. <sup>12</sup>Amā mug imamam kabī totol maledig. Sain amā disisnamak are, amā el fiya mafenēdidig. Amā darau difanamak are, darau anī faali mafedig. <sup>13</sup>Bouwamā bun od duk sain, amā molol nem od solo mafedig. Mabodok masi gama sain enei bun, amā teneub enei nē ido gen ado, ereb ereb ganān nē moto gen wō maun.

<sup>14</sup>Aya ā mama ifeneīya nigin enei to atotof, anī ere, ā neu kesu tar oboiyou gen wedereī arouf nigin age afef. <sup>15</sup>Ere nigin, Kristus bun, ā ten tausen kulat tamo ado, anī ere, ā temeī musei sā, are aya Kristus Jesus bun biya od bunem temeī wō aun. <sup>16</sup>Anī nigin, aya ā madē wiyagauf nigin totol bagai arokeneik. <sup>17</sup>Gariya enei nigin, aya neu kesu Timoti, ī Odug bun aya oboiyou ado dō fiya biya, ā gein sur afef. Im Kristus Jesus bun, neu mata ibodōya nē suma anī, ā wedereī fokō foug, are aya modoū ganān sios ganān bun afelnēdidig age fiya bagai.

<sup>18</sup>Ā tunī, Pol ī amā garan to isiyouf ge fen, ā aug yeneī walesegen. <sup>19</sup>Anī ere, Odug orouf are, aya kaisā bagai ā gein asiyouf, age afe fen, aya dogo yeneid yaleseya tamo eneidi naig de wogō def anī sā, anī ere, ereb megeir idi ado anī fele afoug. <sup>20</sup>Ere nigin, Negur nē tano are ege wogōya nē sā, are megeir nē. <sup>21</sup>Ere anī ā oroyeik? Aya wagagā yeīya nigin tibog ado ā gein asiyouf de, wau laa fiya ado molol bunem asiyouf?

#### Tureī Noli Tobonunā Ado Walelnēgouf!

**5** Ā atun, noli tobonunā age fiya, are haiden atuneg to wō yedig anī, ibodok yeya karī aun. Tamo taka ī tama nē kayau we fedig. <sup>2</sup>Age fe di, ā aug selī wabigedig! Age fiya ban, ā wauī gudūf fen, tamo tobonunā enei inof anī, āgenei uyu kū fiya bun walelnēgouf, are deuf. <sup>3</sup>Aya bouwau ā geid to ibodok, anī ere, uur bun

are, aya ā geid tabodok. Aya ā geid ibodōya gen, tamo enei age fen, are ī mogo es afiyen. <sup>4</sup>Ā neda Odug Jesus yana bunem guru gouf bun, aya uur bun ā geid tabodōf, are neda Odug Jesus nē megeir ibodōf sain bun, <sup>5</sup>tamo enei Satan ima bun unenēg, anī bunem, mosor nē bouwa daūf iraille fen, Odug nē naa bun yogon uur isennēya yalouf.

<sup>6</sup>Ā yeneī yaleseya are to biya. Yis naal bagai flawa obu namen kabī yaledig anī, ā to keleī de? <sup>7</sup>Ā flawa mata yis sā gen wō gouf nigin, yis tubu anī waleleg, are ā anī flawa mata yis sā. Ere nigin, Kristus, neda Pasa naa nē sipsip naal, sesewi difiyen. <sup>8</sup>Anī nigin, ada Pasa Sifa naa anī tarouwauf, are yis tubu, sesen ado to biya nē yis bunem sā, anī ere, bret yis sā, karētut ado momoi nē bret bunem age tafoug.

<sup>9</sup>Aya ā noli tobonunā dinodig tamo kayau geid to nugal gouf nigin, neu pas mogo atotkenein, <sup>10</sup>anī ere, aya teneub enei nē tamo kayau geid to nugal gouf nigin to orok, are idi noli tobonunā, ereb ereb nigin akorouya, idegēya bunem taka nē safina bē yaleya be, idegēya waitou yana yaleseya age difedig. Ā idi geid to nugal gouf are, ā teneub enei utorōgouf. <sup>11</sup>Anī ere, gama aya ā bun atotof are, ā taka ī yogo nigin tura ye fen, noli tobonunā, ereb ereb nigin akorouya, idegēya waitou yana yaleseya, bou yūya od wogōya, naan yōya be, idegēya bunem taka nē safina bē yaleya age fedig, ī weim to nugal gouf. Tamo age fiya ado weim saafeg to wāgauf.

<sup>12</sup>Ere nigin aya idi sios mayarē difaref anī es afedyouf? Are, idi sios namen difaref anī ā to es wiyēdigef de? <sup>13</sup>Negur idi sios mayarē difaref anī es fediyouf. Are Negur nē Itotoya bun eig ye irok kilei, “Ā atun tamo sane anī walelnēgouf.” †

#### Momoiya Tamo Kayau Atun Kot Fiya

**6** Āgenei takam, taka ado fefuya yenēf are, ere nigin ī Negur nē tamo kayau wagedin irouleya ban, ī idi momoiya sā anidi bun, mama sā gen es fiya nigin irouledig? <sup>2</sup>Are Negur nē tamo kayau teneub enei es difoug anī, ā to keleī de? Ā teneub enei es gouf are, ā morō naal bagai es fiya nigin kisi feleya sā de? <sup>3</sup>Are amā engel es mafedyouf anī, ā to keleī de? Age foug are, mata ibodōya enei nē morō es fiya nigin naig fiyau? <sup>4</sup>Anī nigin, ā teneub enei nē morō age fediya nigin fefuya adouf are, ā haiden idi, sios bun tamo yeneid sā anidi, es fiya tamo nigin ugirnēdigef de? <sup>5</sup>Aya ā mama yeīf nigin od enei orok. Are ā atun, momoiya tamo kayau fefuya idi atun ibodok anī, es fiya nigin kisi biya ado tamo taka sā de? <sup>6</sup>Anī ere, momoiya tamo takam tura taka kiwai ifen ken, kot bun iledig, are enei momoiya sā anidi wagedin irouledig.

<sup>7</sup>Momoi bagai, ā atun abob nigin kot bun fefuya ibodok anim, ā mogo kuku gen anī yaoref. Ere nigin ā idi to utornēdige di, sane diyēīf? Ere nigin ā idi to utornēdige di, didegneīf? <sup>8</sup>Age fiya ban, ā aug udegēg fen, sane ago gedig, are ā tureī tar bun enei ago gedig.

† Diuteronomi 17:7; 19:19; 21:21; 22:21, 24; 24:7

<sup>9</sup>Tamo tobonunã sesen idi, Negur nê tano to akorouf anĩ, ã to keleĩ de? Are ã idi to utornêdige di, didegneĩf. Idi noli tobonunã dinodig, idi idegêya waitou yana dalesedig, idi seseirã tobonunã dinodig, tamo idi bouweid na nê sur difedig, tamo tutur, kayau tutur noli tobonunã dinodig, <sup>10</sup>idi bê daledig, idi erab erab safina nigin akorou dedig, idi naan dôdig, idi bou yũya od wogô dedig, idi idegêya bunem taka nê safina daledig anidi ganan, Negur nê tano to akorouf. <sup>11</sup>Are ã tunĩ age fiya anĩ ago gedig. Anĩ ere, ã mosor bun tamal kulo yein, are ã fateul inenein, are ã, Odug Jesus Kristus yana bun ado neda Negur nê Awa Uur bunem, Negur mala bun madur bagai wowã gen.

### Noli Tobonunã

<sup>12</sup>Taka irôf, "Aya erab erab ganan nigin sã age afeid kisi feleya." Are de momoi, anĩ ere, erab erab ganan to isennadauf. Aya erab erab ganan nigin sã age afeid kisi feleya, anĩ ere, aya erab takam to irouna di, ferfer abodôf. <sup>13</sup>Taka irôf, "Saaf are te guroub nê, te guroub are saaf nê." Anĩ ere, Negur anĩ ganan daũ falauf. Bouwa are noli tobonunã nê sã, anĩ ere, Odug nê, are Odug ĩ bouwa anĩ nê. <sup>14</sup>Are, Negur yogon megeir bunem Odug laa bun tamal yalesnen, are adag ĩ yalesnadauf. <sup>15</sup>Ã bouweĩ are, Kristus yogo bouwa nê tunĩ anĩ ã to keleĩ de? Age fiyauf are, aya Kristus bouwa nê tunĩ ale fen, kayau bouwa na sur fedig ado bagu afouf de? Sã bagai! <sup>16</sup>Tamo ĩ yogo, kayau taka bouwa na nê sur fedig ado bagu difouf are, ĩ kayau anĩ ado bouwa tekelei youf anĩ, ã to keleĩ de? Ere nigin, Negur nê Itotoya bun eig ye irok, "Idi urom bouweid tekelei youf." <sup>17</sup>Anĩ ere, taka ĩ yogo Odug ado bagu difouf are, ĩ uur bun Odug ado tekelei youf.

<sup>18</sup>Noli tobonunã bun tamal uyagauf. Mosor tunĩ ganan tamo taka inof, are ĩ yogo bouwa serê inof, anĩ ere, taka ĩ yogon bouwam noli mosor inof, are ĩ yogo bouwa bun mosor inof. <sup>19</sup>Ã bouweĩ are Awa Uur Fateul nê tempel, Awa Uur Fateul are ã namein ibodok anĩ Negur bun tamal walegen are, ã to keleĩ de? Ã aug, ägenei sã, <sup>20</sup>ere nigin, ã mala odugem na yaleyain. Anĩ nigin, bouweĩ anim Negur yana walesagauf.

### Tamo Kayau Ado Bagu Fiya Nigin

**7** Gama od anĩ ã utotogen nigin arokeneik, tamo ĩ kayau to yalouf, are deuf. <sup>2</sup>Anĩ ere, noli tobonunã musei bagai ibodok nigin, are tamo mugu mugu ĩ yogon kayau adouf, are kayau mugu mugu ĩ yogon tamo adouf. <sup>3</sup>Tamo ĩ yogon bouwa nigin, yogon kayau to katũ fiyêf, age fiya gen, kayau ĩg yogon bouwa nigin yogon tamo to katũ fiyêf. <sup>4</sup>Kayau ĩ yogon bouwa nê mudur to ibodôf, are yogon tamo nê, age fiya gen, tamo ĩ yogon bouwa nê mudur to ibodôf, are yogon kayau nê. <sup>5</sup>Ã abob nigin bouweĩ to katũ gouf, anĩ ere, ã kosê gouf nigin, sain naal bagai yo ge fen, bouweĩ katũ gouf, are kisi falauf. Agog fen, ã bouweĩ kulatun fiya anĩ, malai nigin, are Satanem to kisi yeĩf nigin, ba-

ban ã bouweĩ bagu gouf. <sup>6</sup>Aya od enei karĩ gouf nigin orok, are ĩtäfiya sã. <sup>7</sup>Tamo ganan aya gen dibodok, are aya orouf. Anĩ ere, tamo mugu mugu idi, Negur bun dogo neid ege luwa dalef, taka ege luwa enei, taka ege luwa anĩ.

<sup>8</sup>Anĩ ere, aya kayau tamo yaleya sã, tamo kayau yaleya sã ado, waab arokenêdif, are idi aya gen age de dibodok dilauf, are deuf. <sup>9</sup>Anĩ ere, idi dogo bouweid nigin kulatun fiya kisi feleya sãf are, tamo idi kayau dalouf, kayau idi tamo dalouf, ere nigin, noli kisi waud bun yã gen bobo reya anĩ ban, tamo idi kayau yaleya, kayau idi tamo yaleya are deuf.

<sup>10</sup>Tamo idi kayau adodo, kayau idi tamo adodo bun, aya od enei arokenêdif, are ayam sã, Odugem. Are kayau ĩ ne tamo to itornêf. <sup>11</sup>Anĩ ere, kayau ĩ tamo itornêf are, ĩ tamo taka to yalouf be, are ĩ yogon tamo ado komo difouf. Are tamo ĩ yogon kayau to iru irailauf.

<sup>12</sup>Ã tunĩ ganan bun, aya od enei arokenêdif, are ayam, Odugem sã. Tura taka ĩ kayau ado, are kayau ĩ momoiya sã, anĩ ere, ĩ tamo ado ibodôya nigin oro fouf are, tamo ĩ kayau anĩ to iru irailauf. <sup>13</sup>Kayau taka ĩ tamo ado, are tamo ĩ momoiya sã, anĩ ere, ĩ kayau ado ibodôya nigin oro fouf are, kayau ĩ tamo anĩ to iru irailauf. <sup>14</sup>Ere nigin, tamo momoiya sã ĩ, yogon kayau bunem fateulen, are kayau momoiya sã ĩ, yogon momoiya tamo bunem fateulen. Age fiya sãf are, ã gereĩ tar idi karêrut to dibodôf. Anĩ ere, idi gama fateul dibodok.

<sup>15</sup>Anĩ ere, taka ĩ momoiya sã, iyawau fenê nigin oro fouf are, utornêge di, age fouf. Suma age fiya bun, momoiya tamo be kayau, erab taka anim to katĩ fiyek. Are Negur ĩ ada wau inosiya bun tabodôf nigin iweignadan. <sup>16</sup>Kayau ô, nê tamo usennêf be sã be anĩ, naig fe di, ô keleĩ youf? Tamo ô, nê kayau usennêf be sã be anĩ, naig fe di, ô keleĩ youf?

<sup>17</sup>Odug ada mugu mugu igirnadan kilei ado, Negur ada mugu mugu iweignadan kilei bagai, age tag, mata tabodôgouf. Are, aya sios ganan bun nun enei anof.

<sup>18</sup>Sain Negur ĩ tamo taka iweignen, tamo ĩ mogo mulũ ilen de? Are tamo ĩ mulũ ileya sã to ilauf. Sain Negur ĩ tamo taka iweignen, tamo ĩ mulũ ileya sã de? Are tamo ĩ to mulũ ilauf. <sup>19</sup>Mulũ ileya are ege, mulũ ileya sã are ege. Anĩ ere, Negur nê ĩtäfiya dô fiya anĩ odug bagai.

<sup>20</sup>Tamo mugu mugu ĩ Negur iweignen sain bun, ĩ ibodon suma anĩ bun, agef ibodôf. <sup>21</sup>Sain Negur ĩ iweignen, ô ferfer ubodon de? Ô anĩ nigin to morô yôf, anĩ ere, ô ferfer itorôya nigin kisi falauf are, anĩ ô agouf.

<sup>22</sup>Ere nigin, taka ĩ, Odugem iweignen sain bun, ferfer ibodon, ĩ Odug nê karika tamo ibodok, age fiya gen, taka ĩ iweignen sain bun, karika tamo ibodon, ĩ Kristus nê ferfer ibodok. <sup>23</sup>Ã mala odugem na yaleyain. Ã tamo neid ferfer to wowã gouf. <sup>24</sup>Turau tar, tamo mugu mugu ĩ Negur iweignen sain bun ibodon suma anĩ bun, agef Negur ado dibodôf.

<sup>25</sup>Kayau taulei nigin, aya Odug bun tamal ĩtäfiya taka to alen. Anĩ ere, aya, taka ĩ Odug nê wau yũya bunem momoi bagai tamo wô yen anĩ, aya neu kisi afeneik.

<sup>26</sup>Gama enei nê morô odug nigin, aya kisi afef, are ta-

† *Jenesis 2:24*

mo ĩ gama ibodok gen, agef ibodōf, are deuf. <sup>27</sup> Ō kayau ado de? Age fiyauf are, ō kayau iru iraileya nigin naab to umirēf. Ō kayau to walen de? Age fiyauf are, ō kayau taka yaleya nigin to umirēf. <sup>28</sup> Anĩ ere, ō kayau walef are, ō mosor to inof. Kayau taulei taka tamo yalef are, ĩ mosor to inof. Anĩ ere, tamo kayau dalef, kayau tamo dalef, idi mata ibodōya enei bun morō musei dalouf, are aya morō enei ā bun to wō youf anĩ orouf.

<sup>29</sup> Turau tar, aya od enei arokeneik, are sain mogo to-begaf, anĩ nigin, gama sain enei ilef bun, idi kayau ado, idi kayau sā gen dibodōf; <sup>30</sup> idi maruid isif, idi to maruid isif gen dibodōf; idi waud al difef, idi waud to al difef gen dibodōf; idi ereb taka na dalef, idi ereb taka sā gen dibodōf; <sup>31</sup> idi teneub enei nē safina diroudif, are idi waud adok anĩ bun to dinouf. Ere nigin, teneub enei, gama agef ibodok anĩ, inanakalauf.

<sup>32</sup> Aya ā to suwē gouf nigin orouf. Tamo kayau sā, ĩ Odug nē kabĩ nigin kisi fedig, are ĩ ereb age fe di, Odug al foug nigin kisi fedig. <sup>33</sup> Anĩ ere, tamo kayau ado, ĩ teneub enei nē bouwa isennēya nigin kisi fedig, are ĩ ereb age fe di, yogon kayau al foug nigin kisi fedig. <sup>34</sup> Age fe di, yogon kisi fara fedig. Kayau tamo sā be, kayau taulei, ĩ Odug nē kabĩ nigin kisi fedig, are ĩ bouwa ado uur bun fateul wō youf nigin age fedig. Anĩ ere, kayau tamo ado, ĩ teneub enei nē bouwa isennēya nigin kisi fedig, are ĩ ereb age fe di, yogon tamo al foug nigin kisi fedig. <sup>35</sup> Aya od enei āgenei biya fiya nigin orok, aya ā ifōyeif nigin to age afef, anĩ ere, ā madur agog fen, ā aug nigin Odug bun fara fiya sā wenēgouf nigin age afef.

<sup>36</sup> Anĩ ere, tamo taka ĩ, kayau taulei yaleya nigin digirnen anĩ, ĩ bun tobonunā biya sā age afef ye fen, kayau ĩ tamo yaleya nē sain mogo wal fe di, tamo ĩ kayau yaleya nigin kisi fef are, tamo ĩ yogon oroya kilei age foug. ĩ mosor to inof, are idi bagu difouf. <sup>37</sup> Anĩ ere, tamo ĩ yogon wau bun total ifar fen, taka nē kisim to we fiyēf, anĩ ere, yogon oroya dōf fen, kayau taulei anĩ to yalouf nigin yogon kisi ifōf are, areg ĩ tutuk age foug. <sup>38</sup> Anĩ nigin, tamo ĩ kayau taulei yalef are, ĩ tutuk age fef, anĩ ere, tamo ĩ kayau to yalef are, ĩ tutuk bagai age fef.

<sup>39</sup> Kayau ĩ yogon tamo fau mata ibodōf are, ĩ yogon tamo ado dibodōf. Anĩ ere, yogon tamo laa foug are, ĩ yogon oroya dōf fen, taka bun ileya kisi feleya, anĩ ere, tamo ĩ Odug nigin momoi yef anĩ bun dogol. <sup>40</sup> Anĩ ere, neu es fiya bun, kayau ĩ gama ibodok gen, ibodōf are, ĩ fatuk bagai al foug. Aya kisi afef, are ayag Negur nē Awa Uur ado.

#### Saaf Idegēya Waitou Bun Sesewi Difen

**8** Gama, saaf idegēya waitou bun sesewi difedig nigin, ada keleĩ, are ada ganan keleĩ ado. Keleĩ are yogo yana yaleseya inodig, anĩ ere, wau laa fiya anim biya yalesedig. <sup>2</sup> Tamo ĩ ereb taka nigin aya keleĩ yef are, ĩ ereb taka keleĩ youf anĩ ĩ fau keleĩ sā. <sup>3</sup> Anĩ ere, tamo ĩ Negur nigin wau laa fef are, Negur ĩ nigin keleĩ.

<sup>4</sup> Anĩ nigin, saaf idegēya waitou bun sesewi difedig anĩ yōya nigin, ada keleĩ, are tenebur ein idegēya wai-

tou are ege, anĩ ere, Negur taka sā, tekelei dogol ibodok. <sup>5</sup> Ere nigin, saa be teneub bun, idi waitou dedig anĩ dibodok, are momoi bagai waitou musei ado odug musei dibodok, <sup>6</sup> anĩ ere, ada bun Negur tekelei dogol ibodok, are Dei, ĩ bun tamal ereb ereb ganan wō yen, ĩ nigin ada mata tabodok. Odug tekelei dogol ibodok, are Jesus Kristus, ĩ bunem ereb ereb ganan wō yen, ĩ bunem ada mata tabodok.

<sup>7</sup> Anĩ ere, tamo ganan enei keleĩ sā. Tamo kayau tunĩ fau idegēya waitou nigin fatuk bagai kisi difedig nigin, sain idi saaf anĩ doko, idi saaf anĩ idegēya waitou bun sesewi difen de fen, kisi difedig, age dife di, idi waud total sā nigin, amuyēdig. <sup>8</sup> Anĩ ere, saafem ada Negur non to irouladauf, are ada saaf to tāf are, anim ada to daũ fadauf, ada saaf tāfeg, anim ada to isennadauf.

<sup>9</sup> Anĩ ere, ereb ā karika ago gouf anim, idi momoiya total sā anidi bun, naabura gudũ fiya to wenēdigouf nigin lo walagauf. <sup>10</sup> Ere nigin, taka ĩ wau total sā anĩ, ō keleĩ enei ado, idegēya waitou nē tempel bun saaf wō mog ileyōf are, ĩ saaf idegēya waitou bun sesewi difen anĩ, kumĩ sā to yāf de? <sup>11</sup> Anĩ nigin, turā total sā, ĩ nigin Kristus laa fen, are ogon keleim ĩ daũ fiyek. <sup>12</sup> Sain ā naab enei bun tureĩ tar bun mosor unog fen, dogo neid waud total sā anĩ daũ wedigef are, ā Kristus bun mosor unogef. <sup>13</sup> Anĩ nigin, ereb aya āf anim neu turau mosor bun inenēf are, ayam ĩ mosor bun to anenēf nigin, aya muda baban to bagai āf.

#### Aposel Ereb Yaleya Nigin Kisi Feleya

**9** Ereb takam aya katĩ fiyaf de? Aya aposel sā de? Aya Jesus neda Odug to ailen de? Ā Odug bun neu kabĩ bunem to wō gen de? <sup>2</sup> Tunĩ bun aya aposel sā be, anĩ ere, momoi bagai aya ā bun aposel. Ere nigin, ā Odug bun aya aposel kabĩ alef anĩ nē uris.

<sup>3</sup> Idi aya es difiyauf nigin dibodok anidi bun, isennaya od enei orok. <sup>4</sup> Amā saaf ado naan yōya nigin to kisi feleya de? <sup>5</sup> Amā, aposel tunĩ ganan, Odug nē tura tar ado Pita age difedig gen, kayau momoiya ado amā geid marou malauf, are to kisi feleya de? <sup>6</sup> Takag, aya ado Banabas dogol mata ibodōya nigin kabĩ malouf de?

<sup>7</sup> Aim kusĩ tamo kabĩ yale fen, yogo nigin ereb ereb na yaledig? Aim wain kabier wain iten ken, dogo neid biya to yōdig? Aim sipsip lof fen, dogo neid su sumin to yōdig? <sup>8</sup> Aya tamo nē lo fiya bunem dogol, od enei orok de? Lo anĩg enei nigin tekelei bagai to irok de? <sup>9</sup> Ere nigin, Moses nē Lo bun eig ye itoton, “Ō bulmakau, wit faat biya nē gabar loko fediyouf nigin lalai feid mog, yogon awa to ufokalauf.” † Negur ĩ bulmakau nigin kisi fef de? <sup>10</sup> Momoi, Negur ĩ od enei ada nigin to irok de? Momoi, od enei ada nigin itoton, ere nigin, tamo teneub gudũ fedig ado, tamo wit faat biya nē gabar yaleledig, idi kusu fiya sain bun dogo neid morou dalouf nigin waud ise fen, age difedig. <sup>11</sup> Amā ā atun āgenei uur nigin faat mararan ouf are, amā ā bun bouwa buru nē safina kusu mafouf are, anĩ odug biya

† Diuteronomi 25:4

de? <sup>12</sup> Tunī ā bun isennēya enei yaleya nigin kisi falauf are, amā idi wal fiya anī, to malouf de?

Anī ere, amā ā bun safina yaleya nigin kisi feleya enei to age mafen. Age fiya ban, amā Kristus nē biya od to naabura gudū mafouf nigin, erab erab ganana faali mafef masin. <sup>13</sup> Idi tempel bun kabī daledig anidi, dogo neid saaf tempel bun daledig, idi alta bun aruna dale-dig anidi, erab alta bun sesewi difen anī dale dogole-dig, are ā to keleī de? <sup>14</sup> Naab tekelei anī bun, Odug iron, are idi biya od wogō def anidi, biya od bunem mata ibodōya nē safina dalouf.

<sup>15</sup> Anī ere, aya safina yaleya nigin kisi feleya enei, anī taka to age afen. Age afe fen, aya, ā aya nigin ago gouf nigin, enei to atotof. Takam yanau yaleseya enei aya bun yalelauf are, aya laa fiyauf anī orouf. <sup>16</sup> Aya biya od wogō auf sain bun, aya yug nigin yanau to alesedig, ere nigin, Negurem biya od wogō auf nigin nugof fiyadig. Aya biya od to wogō auf are, aya bun morō odug bagai wō youf. <sup>17</sup> Aya neu oroya bunem kabī enei alouf are, aya mala yaleya kisi feleya. Are neu oroyam sã, anī ere, aya Negurem kabī ifanan nigin age afef.

<sup>18</sup> Age afouf are, ere anī neu mala solo? Are, sain aya biya od wogō auf, aya mala yaleya sã biya od wogō audig, are aya biya od bun mala yaleya nigin kisi feleya anī to age afedig.

<sup>19</sup> Aya tamo taka nē sã, are aya karika, anī ere, aya tamo musei kisi feleya bagai gei afouf nigin, aya yug tamo ganana nē ferfer wō auf. <sup>20</sup> Juda idi bun, aya Juda idi gei afouf nigin, Juda tamo gen wō aun. Idi lo farumen dibodok anidi bun, aya yug lo farumen to abodok, anī ere, aya idi lo farumen dibodok anidi gei afouf nigin, aya tamo lo farumen ibodok gen wō aun. <sup>21</sup> Idi lo sã anidi bun, aya Negur nē lo bun karika sã, are aya Kristus nē lo farumen abodok, anī ere, aya idi lo sã anidi gei afouf nigin, aya tamo lo sã gen wō aun. <sup>22</sup> Idi furūya anidi bun, aya idi furūya anidi gei afouf nigin, aya tamo furūya gen wō aun. Aya erab erab ganana kisi feleya anī bunem, tunī kel gei afouf nigin, tamo ganana bun, idi dibodok gen tobonunã age fiya gen wō aun. <sup>23</sup> Aya biya od nigin enei ganana age afedig, are aya biya od nē el fiya weim talouf nigin.

<sup>24</sup> Gududuya bun, tamo ganana gududu dedig, anī ere, tekeleim dogol mala yaledig anī ā to keleī de? Naab age fiya bun, gududu ge fen, mala walogouf.

<sup>25</sup> Tamo ganana kodē wal difouf nigin age difedig anidi, erab erab ganana bun total bagai tai difedig. Idi mala fau sa kalauf anī dalouf nigin age difedig, anī ere, amā mala gai gai ibodkalauf anī yaleya nigin age mafedig. <sup>26</sup> Anī nigin, aya tamo gariya sã gudu redig gen, to gudu raudig. Aya yau yūdig gen, to ege imau warū yeledig. <sup>27</sup> Anī ere, aya yug bouwau au ken, anī neu ferfer ibodōf nigin age afedig, are aya tunī wogō afiyēīd fen, aya yug mala solo yaleya nigin, kisi feleya sã to bagai wō auf nigin age afedig.

### Israel Neid Tubuid Tar Bun Weder Irouya Od

**10** Turau tar, aya ā enei to keleī youf nigin to orouf, are Moses nē sain bun, tubuda tar ganana budū

farumen difar fen, idi ganana Maaī Giriya atu diyok dilen. <sup>2</sup> Idi ganana budū bun ado maaī bun naan dale fen, Moses nē ibor tar wowā den. <sup>3</sup> Are, idi ganana uur nē saaf tekelei anī don, <sup>4</sup> idi ganana uur nē naan tekelei anī don, are uur nē meein idi geid weim diyok dilen anī bun, idi naan don, meein are Kristus. <sup>5</sup> Anī ere, Negur ī idi musei ganana nigin wau to al fen, anī nigin, dogo neid bouweid gerere tuan firagagaū difen.

<sup>6</sup> Enei ganana ada wederada irouya nigin wō yen, anī bunem ada idi age difen gen, erab sane nigin wauda to tanouf. <sup>7</sup> Idi neid tunī gen, ā idegēya waitou yana to walesagauf. Are Negur nē Itotoya bun eig ye irok, "Tamo kayau saaf naan doko dibod ken, fafā de dale, noli tobonunã dinon." <sup>8</sup> Ada idi tunī age difen gen, noli tobonunã to tanouf. Age dife di, naa tekelei bun, idi atun tuwenti tri tausen tamo kayau gare den. <sup>9</sup> Ada idi tunī age difen gen, Odug kisi fiya bun to tanenēf. Idi age difen, gogourum didenkesin. <sup>10</sup> Ada idi tunī gen, to nauseir tauf. Idi age difen, daū fiya nē engelem idenkesin.

<sup>11</sup> Eneidi ada ifelnadauf nigin idi bun wō yen, are idikeleya sain, ada bun mogo wō yen anī bun, wederada irouya nigin itoton. <sup>12</sup> Anī nigin, taka ī kisi fef, total ifaref yef, ī to kubū youf nigin lo falauf. <sup>13</sup> Kisi fiya ganana ā bun wō yedig, are tamo bun wō yedig dogol. Anī ere, Negur ī age afouf yef anī, age fedig, ī kisi fiya ā yaleya kisi feleya sã anī, ā bun to wō youf nigin age fouf. Anī ere, ā kisi yeīf sain bun, Negur ī iyawoya nē naab anīg ifelneīf, anī bunem ā total ufaragauf nigin sã kisi falauf.

### Saaf Idegēya Waitou Bun Dinon Ado Odug Nē Saaf

<sup>14</sup> Anī nigin, neu turau tar oboiyou, idegēya waitou yana yaleseya bun tamal uyalalagauf. <sup>15</sup> Aya ā tamo kayau kisi biya ado gen arokeneik, erab aya arok anī, ā aug es gouf. <sup>16</sup> De fiyēya nē kap, ada de fiya tafenedig, are Kristus nē naud bun bagu fiya sã de? Bret ada mumã tafedig, are Kristus nē bouwa bun bagu fiya sã de? <sup>17</sup> Bret tekelei dogol ibodok nigin, ada musei, anī ere, bouwada tekelei, ere nigin, ada ganana bret tekelei anī bun bagu tafedig.

<sup>18</sup> Israel tamo kayau nigin kisi walogouf, idi sesewi fiya nē saaf dōdig anidi, alta bun to bagu difedig de? <sup>19</sup> Age fouf are, ere anī kisi afef, are sesewi fiya nē saaf idegēya waitou difenek anī odug de, oo idegēya waitou anī odug de? <sup>20</sup> Sã, anī ere, haiden neid sesewi fiya anī kaa sesen bun difenedidig, are Negur bun sã. Are aya ā kaa sesen geid bagu gouf nigin to orouf. <sup>21</sup> Ā Odug nē kap bun ado kaa sesen neid kap buneg yōya nigin kisi feleya sã. Ā Odug nē tebol bun ado kaa sesen neid tebol buneg bagu fiya nigin kisi feleya sã. <sup>22</sup> Ada Odug kiyēī ifanadauf nigin age tafef de? Ada neda megeir ī wal fiya de?

### Momoiya Tamo Kayau Neid Tobonunã

<sup>23</sup> Tunĩ dirödĩg, “Ada erēb erēb ganān nigin, sã age tafeid, age fiya nigin kisi feleya,” anĩ ere, erēb erēb ganān to isennadauf. Tunĩ dirödĩg, “Ada erēb erēb ganān nigin, sã age tafeid, age fiya nigin kisi feleya,” anĩ ere, erēb erēb ganān biya fiya to inouf. <sup>24</sup> Taka ĩ yogon biya fiya nigin to imirēf, anĩ ere, tunĩ neid biya fiya nigin imirēf.

<sup>25</sup> Erēb erēb yaro maket bun na sur difedig anĩ, āgenei kisi bun to fiya sã wāgauf, <sup>26</sup> ere nigin, “Teneub ado erēb erēb ganān anĩ namen yenek are Odug nē.” †

<sup>27</sup> Momoiya sã tamo taka, saaf yōya nigin ā iweigneĩ di, ā ileya nigin oroyeĩf are, erēb erēb ā meleĩ bun inodin anĩ, āgenei kisi bun to fiya sã wāgauf. <sup>28</sup> Anĩ ere, taka ĩ ā irokenēĩf, “Enei are sesewi fiya bun difenen,” youf are, tamo irokenein ĩ nigin ado kisi es fiya yaor karētut ibodōf nigin, saaf anĩ to wāgauf. <sup>29</sup> Neu wogōya nē gariya are, tamo anĩ nē kisi es fiya nigin, are āgenei kisi es fiya nigin sã. Taka nem irōf, “Age fiyauf are, ere nigin neu erēb erēb nigin kisi feleya anĩ, tamo taka nē kisim es fouf? <sup>30</sup> Aya de fiya bunem saaf āf are, ere nigin taka nem saaf anĩ nigin, Negur de afiyek nigin bou yūya od irok?”

<sup>31</sup> Anĩ ere, ā saaf wāgauf, naan wāgauf ado, erēb erēb ganān ago gouf are, Negur nē fula fiya medeĩya nigin anĩ ganān ago gouf. <sup>32</sup> Juda tamo, Grik tamo be, Negur nē sios bun tamo taka, to ye tū fouf nigin ago gouf. <sup>33</sup> Ayag naab ganān bun tamo ganān al afiyēdiyof nigin age afedig gen, ago gouf. Ere nigin, aya neu biya fiya to amirek, anĩ ere, musei isennēdiyof nigin, dogo neid biya fiya amirek.

**11** Ayag Kristus madē afiyēdig gen, ā aya madē wiyagauf.

### Negur Yana Yaleseya Bun Mudur Kerũ Fiya

<sup>2</sup> Aya ā yeneĩ alesef, ere nigin, ā erēb erēb ganān bun aya nigin karĩ weleg fen, ifelnēya anĩ aya ale fen, ā afe-nein anĩ, kafĩ weleg uroug usigef.

<sup>3</sup> Anĩ ere, aya ā eig fiya anĩ keleĩ youf nigin orouf, are tamo ganān neid mudur are Kristus, kayau nē mudur are tamo, Kristus nē mudur are Negur. <sup>4</sup> Tamo ganān, taka ĩ yogon mudur kerũ fel fen, kosē yef be, profet od wogō yef, ĩ yogon mudur Kristus mama ifenek. <sup>5</sup> Kayau ganān, taka ĩ yogon mudur to kerũ fel fen, kosē yef be, profet od wogō yef, ĩ yogon mudur, are aiwa anĩ mama ifenek, are ĩ yogon fatiya korerē feleya gen. <sup>6</sup> Kayau taka ĩ yogon mudur kerũ fiya sãf are, ĩ yogon fatiya gudũ falauf. Kayau taka ĩ yogon fatiya gudũ fouf be, korerē fouf anim, mama ifenēf are, ĩ yogon mudur kerũ fouf. <sup>7</sup> Tamo taka ĩ yogon mudur to kerũ fouf, ere nigin, ĩ Negur nē malakanon ado fula fiya medeĩya, tamo bun. Anĩ ere, kayau ĩ tamo nē fula fiya medeĩya, kayau bun. <sup>8</sup> Ere nigin, tamo ĩ kayau bunem to isin, anĩ ere, kayau ĩ tamo bunem isin. <sup>9</sup> Takag, tamo ĩ kayau isennēf nigin to inon, anĩ ere, kayau ĩ tamo isennēf ni-

gin inon. <sup>10</sup> Age fiya nigin, kayau ĩ, engel idi neid meleid bun, ĩ tamo farumen ibodok anĩ ifelnēdiyof nigin, yogon mudur kerũ fouf.

<sup>11</sup> Anĩ ere, Odug bun kayau ĩ tamo bun yogo mugu to ifaref, tamo ĩg kayau bun yogo mugu to ifaref. <sup>12</sup> Ere nigin, kayau ĩ tamo bunem isin gen, tamo ĩg kayau bunem wō yen. Anĩ ere, erēb erēb ganān Negur bun tamal isif. <sup>13</sup> Ā aug es gouf, are kayau taka ĩ yogon mudur to kerũ fel fen, Negur kosē fiyek, are de de? <sup>14</sup> Tamo taka fatiya salo isiya adouf anim mama ifenek anĩ, tamo nē tobonunã anĩ to ifelneik de? <sup>15</sup> Anĩ ere, kayau taka ĩ fatiya salo isiya adouf, are yogon fula fiya medeĩya. Ere nigin, fatiya salo isiya are, yogon mudur kerũ fiya nigin ifenen. <sup>16</sup> Anĩ ere, taka ĩ od enei kiwai ifenēf are, ada suma taka sã, Negur nē sios buneg suma taka sã.

### Odug Nē Saaf

(Matyu 26:26-29; Māk 14:22-25; Luk 22:14-20)

<sup>17</sup> Faded fiya dō fiya enei bun, aya ā yeneĩ to alesef, ere nigin, āgenei guru fiya biya anĩ fotokar sane isidig. <sup>18</sup> Uruwa bun, aya karĩ aun, are ā sios nigin guru gef ā atun, fara fiya yenēdig, age afe fen, od tunĩ aya momoi auf. <sup>19</sup> Ā atun fara fiya bagai yenek, anĩ bunem, ā atun ai anĩ Negur yo fiyen anĩ ifelneĩf. <sup>20</sup> Anĩ nigin, sain ā guru gef, are Odug nē Saaf bagai anĩ to wōgedig, <sup>21</sup> ere nigin, sain ā saaf wōgef bun, ā abob tari fediya sã, mugu mugu saaf wōgedig, anĩ nigin, taka ĩ naũ ibodōdig, taka ĩ naan yōdig. <sup>22</sup> Saaf ado naan yōya nigin ā fō sã de? Ā Negur nē sios lai ge fen, idi safina sã anidi mama wenēdigef de? Aya ā ere ayeĩf? Aya enei nigin ā yeneĩ alesauf de? Sã bagai! Aya enei nigin ā yeneĩ to alesauf.

<sup>23</sup> Ere nigin, aya enei Odug bun tamal ale fen, āg afe-nein. Are Odug Jesus, Judas ĩ kiwai ifenen bō anĩ bun, bret yale, <sup>24</sup> Negur de fiye ken, bret anĩ mumāf fen, iron, “Enei neu bouwau, are ā nigin. Aya nigin karĩ walagauf nigin enei ago gouf.” <sup>25</sup> Naab tekelei bun, bō saaf bure difel fen, ĩ kap yale fen, iron, “Kap wain enei neu naudou bun bar itenēya mata. Sain ganān ā wāgauf, aya nigin karĩ walagauf nigin enei ago gouf.” <sup>26</sup> Ere nigin, sain ganān ā bret enei wōg fen, kap enei bun wāgauf, ā Odug nē laa nigin kurō wesig mog, ĩ fau isiyof.

<sup>27</sup> Anĩ nigin, taka ĩ tutuk sã bret anĩ yāf be, Odug nē kap bun yāf are, ĩ Odug nē bouwa ado naud bun mosor inouf. <sup>28</sup> Taka ĩ yogo nigin es fel fen, bret anĩ yoko, kap anĩ bun yāf. <sup>29</sup> Ere nigin, taka ĩ Odug nē bouwa nigin to kisif fen, bret yoko, kap bun yāf are, ĩ yogon es fiya anĩ yogo yoko. <sup>30</sup> Anĩ nigin, ā atun musei malegeid fen, dagi didig, āgenei tunĩ gare den. <sup>31</sup> Anĩ ere, ada nigin es tafouf are, ada es fiya bun to tabodōf. <sup>32</sup> Sain ada Odugem es fadauf, are ada Odugem madur fadauf, are ĩ teneub enei nē tamo kayau geid ada mosor ado to youf nigin age fouf.

<sup>33</sup> Anĩ nigin, neu turau tar, sain ā yōya nigin guru gouf are, ā abob nigin tari gouf. <sup>34</sup> Taka ĩ naũ fouf are, ĩ

fõ bun yãf, anĩ bunem, sain ã guru gouf, ã es fiya bun to ulagouf.

Sain aya asiyouf, aya faded fiya tobol afeneĩf.

### Awa Uur Fateul Nẽ Ege Luwa

**12** Turau tar, aya ã Awa Uur Fateul nẽ ege luwa nigin to keleĩ youf anĩ to orouf. <sup>2</sup> ã keleĩ, sain ã hai-den ubodõgen, naab fire fire bun ditonei ken, eweid ifofakeleya idegẽya waitou bun, fõ yeleya nigin dirou dileyein. <sup>3</sup> Anĩ nigin, aya ã arokeneik, are taka ĩ Negur nẽ Awa Uur bunem wogõ yef, ĩ to irõdig, "Jesus sane lauf." Takag, taka nem eig ye irõya kisi feleya sã, "Jesus ĩ Odug," are Awa Uur Fateulem dogol.

<sup>4</sup> Ege luwa nigin fire fire dibodok, anĩ ere, Awa Uur anĩ tekelei. <sup>5</sup> Kabĩ gariya fire fire dibodok, anĩ ere, Odug tekelei. <sup>6</sup> Kabĩ nẽ megeir fire fire dibodok, anĩ ere, Negur tekelei ĩ, tamo ganan bun, kabĩ nẽ megeir ganan nigin kabĩ yaledig.

<sup>7</sup> Tamo ganan isennẽdiyof nigin, tamo mugu mugu bun Awa Uur yaor fedig. <sup>8</sup> Taka bun Awa Uur bunem kisi biya nẽ od ifenek, taka bun Awa Uur tekelei bunem keleĩ nẽ od ifenek, <sup>9</sup> taka bun Awa Uur tekelei bunem momoia anĩ ifenek, taka bun Awa Uur tekelei anĩ bunem dagi el fiya nẽ ege luwa ifenek, <sup>10</sup> taka bun memelik inoya nẽ megeir ifenek, taka bun profet od ifenek, taka bun uur es fiya ifenek, taka bun od fire fire nem wogõya ifenek, taka bun od fire fire nem wogõya anĩ falei fiya ifenek. <sup>11</sup> Enei ganan Awa Uur tekelei dogol ĩ yogon kabĩ, ĩ yogon oroya dõf fen, tamo kayau mugu mugu anĩ ifenẽdidig.

### Bouwa Tekelei, Fara Fiya Musei

<sup>12</sup> Bouwa anĩ tekelei, anĩ ere, bouwa anĩ fara fiya musei bunem inof. Yogon fara fiya ganan are musei, anĩ ere, idi bouwa tekelei dinof. Kristus ĩg age fiya. <sup>13</sup> Ere nigin, ada ganan, Juda tamo be Grik tamo, ferfer be kafĩ fiya sã tamo, Awa Uur tekelei bunem naan tale fen, bouwada tekelei wõ taun, agef fen, ada ganan Awa Uur tekelei naan gen tokon, megeir talouf nigin ifanadan.

<sup>14</sup> Bouwa ĩ fara fiya tekeleim to inof, anĩ ere, fara fiya museim inof. <sup>15</sup> Ye ĩ, aya ima sã, anĩ nigin, aya bouwa nẽ tunĩ sã youf, anĩ ere, gariya anĩ bun ĩ aya bouwa nẽ tunĩ sã yeya kisi feleya sã. <sup>16</sup> Takag, weder ĩ, aya mala sã, anĩ nigin, aya bouwa nẽ tunĩ sã youf, anĩ ere, gariya anĩ bun ĩ aya bouwa nẽ tunĩ sã yeya kisi feleya sã.

<sup>17</sup> Bouwa adok malauf are, nainenem karĩ wouf? Bouwa adok wederouf are, nainenem sumeĩ walouf?

<sup>18</sup> Anĩ ere, momoi, Negur ĩ bouwa nẽ fara fiya, ĩ orof kilei bagai, mugu mugu ganan inenẽdin. <sup>19</sup> Bouwa nẽ fara fiya anĩ ganan tekelei youf are, bouwa ĩ nain ibodõf? <sup>20</sup> Age fiya gen, bouwa nẽ fara fiya musei dibodok, anĩ ere, bouwa de tekelei.

<sup>21</sup> Mala ima to irokenẽf, "Aya õ to orouf!" Are, mudur ye to irokenẽf, "Aya õ to orouf!" <sup>22</sup> Age fiya ban, bouwa nẽ fara fiya tunĩ total sã tailedig anĩ sãf are, bouwa ibodõya kisi feleya sã. <sup>23</sup> Ada bouwa nẽ fara fiya yana

sã gen tauf anĩ, ada yana talesedig. Ada bouwa nẽ fara fiya yaor fiya kisi feleya sã anĩ, dede ta, ed tafedig, <sup>24</sup> anĩ ere, bouwada nẽ fara fiya yaor fiya kisi feleya anĩ, ada to dede ta, ed tafedig. Anĩ ere, Negur ĩ bouwa nẽ fara fiya bagu feleid fen, fara fiya yana sã idi yana odug ifenẽdin, <sup>25</sup> anĩ bunem, bouwa bun foi fiya to ibodõf, anĩ ere, bouwa nẽ fara fiya idi abob nigin kilei kilei kisi difouf. <sup>26</sup> Bouwa nẽ fara fiya takam darau ya-louf are, bouwa nẽ fara fiya ganan ĩ geid darau dale-dig. Bouwa nẽ fara fiya takam yana yalouf are, bouwa nẽ fara fiya ganan ĩ geid kulĩ dedig.

<sup>27</sup> Gama, ã Kristus nẽ bouwa, are ã mugu mugu anĩ nẽ fara fiya. <sup>28</sup> Sios bun Negur ĩ uyulil aposel ganan igirnẽdin, anĩ dõ fiya profet, anĩ dõ fiya tise, age fe di, memelik inoya tamo ado, dagi el fiya nẽ megeir dalen anidi, tunĩ isennẽdiya nigin kisi feleya anidi, erob erob lo fiya nigin megeir dalen anidi, od fire fire nem wogõya nigin kisi feleya anidig igirnẽdin. <sup>29</sup> Idi ganan aposel de? Idi ganan profet de? Idi ganan tise de? Idi ganan memelik dinof de? <sup>30</sup> Idi ganan dagi el fiya nẽ megeir dalef de? Idi ganan od fire fire nem wogõ def de? Idi ganan od fire fire nem wogõya anĩ falei difef de? <sup>31</sup> Anĩ ere, Awa Uur nẽ ege luwa odug yaleya nigin kisi total walougouf.

Gama aya naab gai biya bagai taka afelneĩf.

### Wau Laa Fiya

**13** Aya tamo nẽ od fire fire nem ado engel nẽ od nem wogõ aufeg, wau laa fiya sãf are, aya belo gaõya be, kadod ait gũya gen dogol. <sup>2</sup> Aya profet od wogõya nigin Awa Uur nẽ ege luwa ado fen, Negur nẽ waa ganan ado keleĩ ganan kelei ken, arei godo fiya nigin momoia odug ado, anĩ ere, wau laa fiya sãf are, aya tamo ege. <sup>3</sup> Aya erob aya ado ganan maleg afeneĩd fen, bouwau atorõ di, yã malan dirãf, anĩ ere, aya wau laa fiya sãf are, aya mala biya taka to alouf.

<sup>4</sup> Wau laa fiya are molol, wau laa fiya are dor yaleya. ĩ to kiyey inodig. ĩ yogo yana to yalesedig. ĩ yogo to seli yabidig. <sup>5</sup> ĩ tobonunã sane sã, ĩ yogo nigin aya dogol to yedig, ĩ kaisã to seye yedig, ĩ sane difiyek anĩ to karĩ yeledig. <sup>6</sup> Wau laa fiya anĩ sane nigin to kulĩ yedig, anĩ ere, momoi nigin kulĩ yedig. <sup>7</sup> ĩ faimud kulatun fedig, ĩ faimud momoi yedig, ĩ faimud wau isedig, ĩ faimud feseya sã megeir ifaredig.

<sup>8</sup> Wau laa fiya are to bagai sa kalauf. Anĩ ere, profet od wogõya are sa kalauf, od fire fire nem wogõya are sa kalauf, keleĩ are sa kalauf. <sup>9</sup> Ere nigin, ada keleĩ tunĩ dogol kelei ken, profet od tunĩ dogol wogõ taudig, <sup>10</sup> anĩ ere, sain kibo feleya bagai anĩ isiyouf, kibo feleya bagai sã anĩ sa kalauf. <sup>11</sup> Aya simõ bun, aya simõ gen wogõ aun, aya simõ gen kisi afen, aya simõ gen karĩ aun. Sain aya biyau fen, aya simõ nẽ tobonunã dume-un arailen. <sup>12</sup> Gama ada dodo bun gen malakanon yaor sã tailedig, sain ada tarabã fadauf bun tutuk bagai tailauf. Gama aya tunĩ dogol keleĩ, sain anĩ bun Negur aya nigin ganan keleĩ gen, aya ganan keleĩ youf.

<sup>13</sup> Are gama towo eneidi difaref, momoiya, wau iseya ado, wau laa fiya. Anĩ ere, anĩ atun wau laa fiya anĩ odug bagai, ganan wal fiya.

### Profet Od Wogõya Ado Od Fire Fire Nem Wogõya Nigin Awa Uur Nẽ Ege Luwa

**14** Wau laa fiya nẽ naab dõg fen, Awa Uur nẽ ege luwa yaleya nigin kisi total walogouf, Awa Uur nẽ ege luwa bun profet od wogõya nẽ anĩ bagai walogouf. <sup>2</sup> Ere nigin, taka ĩ od fire nem wogõ yef, ĩ tamo to wogõ fiyẽdif, anĩ ere, ĩ Negur wogõ fiyek. Are, taka nem in od to keleĩ youf. ĩ Awa Uur bunem Negur nẽ waa wogõ yef. <sup>3</sup> Anĩ ere, taka ĩ profet od wogõ yef, ĩ tamo megeir ifenẽdiyof nigin, waud yalesauf nigin ado, waud yo foug nigin wogõ fiyẽdif. <sup>4</sup> Taka ĩ od fire nem wogõ yef, ĩ yogo dogol isennek, anĩ ere, taka ĩ profet od wogõ yef, ĩ sios isennek. <sup>5</sup> Aya ã ganan od fire fire nem wogõ gouf nigin orouf, anĩ ere, aya ã profet od wogõ gouf nigin orouf bagai. Taka ĩ od fire nem wogõ yef, ĩ sios isennẽf nigin taka nem yogon od to falei foug are, taka ĩ profet od wogõ yef anim, taka ĩ od fire nem wogõ yef anĩ wal fiya.

<sup>6</sup> Turau tar, aya ã gein asi fen, od fire nem wogõ auf sain bun, aya kurõ fesiya od tunĩ, keleĩ, profet od be, faded fiya nẽ od, ã bun to arou asiyof are, ere biya aya ã afeneĩf? <sup>7</sup> Ere idi mata sã aitedif, digẽ be gita age fiya, idi ailõ fire fire to dinouf are, naig fe di, taka nem ere seg kodẽ def anĩ keleĩ youf? <sup>8</sup> Takag, taur ait tutuk to wõ youf are, aim kusĩ nigin dodok foug? <sup>9</sup> Āg age fiya. Ā, āgenei baleim od fire nem yaor to wogõ gouf are, taka ĩ naig fe fen, ã wogõ gef anĩ keleĩ youf? Ā ege od yau bun urarāgouf dogol. <sup>10</sup> Tenebur ein od fire fire musei dibodok, anĩ ere, idi gariya sã taka to ibodok. <sup>11</sup> Aya ereb taka nem wogõ yef, anĩ nẽ gariya to keleĩ youf are, aya wogõ yef anĩ nẽ yaũ tamo, age fe di, ĩ aya bun yaũ tamo. <sup>12</sup> Āg age fiya. Ā Awa Uur nẽ ege luwa yaleya nigin kabĩ total walegedig, anĩ nigin, sios isennẽya nẽ ege luwa yaleya nigin kabĩ total walogouf.

<sup>13</sup> Age fiya nigin, taka ĩ od fire nem wogõ yef, ĩ ereb wogõ yef anĩ falei foug nigin kosẽ youf. <sup>14</sup> Ere nigin, aya od fire nem kosẽ auf are, neu uur kosẽ yef, anĩ ere, neu kisi faat yũya sã. <sup>15</sup> Anĩ nigin, aya naig afoug? Aya neu uur bun kosẽ auf, anĩ ere, aya neu kisi buneg kosẽ auf. Aya neu uur bun seg alouf, anĩ ere, aya neu kisi buneg seg alouf. <sup>16</sup> Ō ogon uur bun Negur yana walesauf are, taka ĩ idi anĩ to keleĩ anidi atun ibodok, ĩ ereb ō urok anĩ keleĩ sã nigin, naig fe fen, ĩ ogon de fiyẽya bun “Momoi” youf? <sup>17</sup> Ō ogon de fiya are biya bagai, anĩ ere, taka to usennek.

<sup>18</sup> Aya ã ganan wal yeĩya, od fire nem wogõ auf nigin Negur de afiyek. <sup>19</sup> Anĩ ere, sios bun, aya ten tausen od od fire nem wogõya anĩ fotokar, tunĩ tai fediya nigin od faif bun yaor wogõ auf anĩ orouf.

<sup>20</sup> Turau tar, āgenei kisi bun simõ gen to ufareg. Sane nigin, momon nẽ kisi gen ufareg, anĩ ere, āgenei kisi bun biyef ufareg. <sup>21</sup> Lo bun eig ye itoton:

Odug irok,

“Tamo od fire nem wogõ def anidi bunem ado, yaũ tamo sigoreid bunem, aya tamo kayau eneidi wogõ afediyof, anĩ ere, sain anĩ buneg idi aya to karĩ difiyauf.” †

<sup>22</sup> Anĩ nigin, od fire nem wogõya are, momoiya tamo kayau bun uris sã, anĩ ere, momoiya sã tamo kayau bun uris. Anĩ ere, profet od wogõya are, momoiya tamo kayau bun, momoiya sã tamo kayau bun sã. <sup>23</sup> Anĩ nigin, sios guru fiya odug bun, tamo kayau ganan od fire nem wogõ de di, tunĩ anĩ keleĩ sã be, tunĩ momoiya sã disiyof are, idi ã nigin wadã ideneik to douf de? <sup>24</sup> Anĩ ere, taka ĩ momoiya sã be, taka ĩ anĩ keleĩ sã, tamo kayau ganan profet od wogõ de mog, isiyof are, ĩ tamo kayau ganan neid wogõya bunem ĩ mosor tamo ya anĩ kisi fokõ ye di, tamo kayau ganan ĩ es difiyef, <sup>25</sup> age dife di, yogon wau bun iminẽdig anĩ yaorouf. Anĩ nigin, ĩ kusureis fen, Negur yana yales, “Momoi bagai, Negur ã atun ibodok,” youf.

### Negur Yana Suma Dõf Yaleseya

<sup>26</sup> Anĩ nigin, turau tar, ada naig tafoug? Sain ã guru gef, ã ganan atun taka seg ado, taka faded fiya nẽ od ado, taka kurõ fesiya od ado, taka od fire nem wogõya be, od fire nem wogõya anĩ falei fiya adof. Anĩ ganan sios megeir fiya nigin ago gouf. <sup>27</sup> Taka ĩ od fire nem wogõ youf are, uru be, towom dogol age fiya sain dale fen, teke tekeleim wogõ douf. Age fe di, taka nem od fire nem wogõya anĩ falei foug. <sup>28</sup> Od fire nem wogõya anĩ falei fiya tamo sãf are, wogõya tamo ĩ sios bun foro yel fen, yogo ado Negur bun wogõ youf.

<sup>29</sup> Profet uru be, towom age fiya wogõ douf, age de mog, tunĩ ganan, ereb wogõ yef anĩ el de es difoug. <sup>30</sup> Anĩ ere, idi guru fiya dibodok anidi atun, kurõ fesiya od taka, taka bun isiyof are, uyu wogõ yef are dẽ yalauf. <sup>31</sup> Ere nigin, ã ganan sain waleg fen, teke tekeleim profet od wogõ gouf, anĩ bunem, ganan keleĩ dale fen, waud yalesauf. <sup>32</sup> Profet neid uur are profet dogo kula-tun dife fen, dogo neid wogõya sain bun dogol wogõ douf. <sup>33</sup> Ere nigin, Negur ĩ ekul fiya nẽ Negur sã, ĩ wau inosiya nẽ Negur.

Tamo kayau fateul neid sios ganan bun age difedig gen, <sup>34</sup> kayau idi sios bun foro del difarauf. Idi wogõya nẽ modou to difenẽdiyof, anĩ ere, idi Lo irok kilei, anĩ dõ difoug. <sup>35</sup> Idi ereb taka nigin to fiya orodiyof are, idi neid fõ bun dogo neid tamo to difediyof, ere nigin, kayau taka sios bun wogõya are mama ado.

<sup>36</sup> Negur nẽ od ã bunem gariya inon de? Od anĩ ã bun dogol isin de? <sup>37</sup> Taka ĩ kisif, ĩ profet taka be, ĩ Awa Uur nẽ ege luwa alen youf are, ĩ ereb aya atotkeneik are Odug nẽ itãfiya ya anĩ keleĩ youf. <sup>38</sup> Taka ĩ enei welebi foug are, ĩ yogo welebi fiyef.

<sup>39</sup> Anĩ nigin, turau tar, profet od wogõ gouf nigin kisi total walogouf. Agog fen, od fire nem wogõya nigin to katũ wiyẽdigouf. <sup>40</sup> Anĩ ere, ereb ereb ganan suma bagai dõg fen, biya bagai ago gouf.

† *Asaia 28:11, 12*

### Kristus Nē Mata Kel Fāya

**15** Turau tar, aya biya od wogō ayeī di, waleg fen, anī teten ufaregef anī, baban ā kisi turī ayeīf ni-gin orouf. <sup>2</sup> Ā od aya wogō ayein anī, uroug kafī waleg fen, ege to momoi gen ouf are, biya od enei bunem ā kel gei yeīf.

<sup>3</sup> Ere nigin, ereb aya alen, are odug bagai nigin, uyulil anī aya ā afenein, are Kristus ī, Negur nē Itotoya bun yenek kilei, neda mosor nigin laa fe di, <sup>4</sup> ī mū difen, are Negur nē Itotoya bun yenek kilei, naa towo bun ī mata kel fā yen, <sup>5</sup> are ī Pita bun wō ye fen, anī dumen in dō fiya tar tuwelf bun wō yen. <sup>6</sup> Anī bure fele di, ī sain te-kelei bun tura tar faif hundred wal fiya meleid bun wō yen, anidi ganan musei fau dibodok, tunī gare den. <sup>7</sup> Agef fen, ī Jems mala bun wō yen, anī dumen aposel ganan meleid bun wō yen. <sup>8</sup> Anī ganan bure fel fen, idi-keleya bun, ī, aya kesu gō fiya sain sā bun gō difiyan gen anī, malau buneg wō yen.

<sup>9</sup> Ere nigin, aya aposel idi atun naal bagai, aya to biya nigin aposel yeya nigineg kisi feleya sā, ere nigin, aya Negur nē sios darau afenen. <sup>10</sup> Anī ere, Negur nē wau ifenēya bunem, aya gama afaref gen age wō aun. Aya bun yogon wau ifenēya anī ege to ilen. Sā, aya kabī to-tol idi ganan wal fediya alen, are ayam sā, anī ere, Ne-gur aya ado ibodon in wau ifenēya anim. <sup>11</sup> Age fiya ni-gin, ayam be, idim, amā enei wogō mauf, are ā enei momoi gen.

### Gare Den Tamo Neid Mata Kel Fāya

<sup>12</sup> Amā Kristus gare den anidi bun tamal mata kel fā yen anī wogō maudig, anī ere, naig fe di, ā tunī, gare den anidi mata to ke de fā douf gedig? <sup>13</sup> Gare den ani-di, mata to ke de fā douf are, Kristus īg mata to kel fā yem. <sup>14</sup> Kristus ī mata to kel fā yem are, nemā wogōya anī kaū sā di, āgenei momoiya areg kaū sam. <sup>15</sup> Age fiyam are, amā Negur nigin idegēya od wogō maudig anī dilemam, ere nigin, amā Negur ī Kristus gare den anidi bun tamal turī fiyen anī kurō mafesidig. Anī ere, Negur ī gare den anidi to turī fediyouf anī momoi ouf are, ī Kristus to turī fiyem. <sup>16</sup> Ere nigin, Negur ī gare den anidi to turī fediyouf are, ī Kristuseg to turī fiyem. <sup>17</sup> Negur ī Kristus to turī fiyem are, āgenei momoiya are ege, ā āgenei mosor bun fau ubodōgef. <sup>18</sup> Age fiyam are, idi Kristus nigin momoi de fen, gare den anidig fō delem. <sup>19</sup> Ada ein mata ibodōya enei nigin dogol, Kristus bun wauda iseya adouf are, ada tamo ganan wal fediya maladalon ado.

<sup>20</sup> Anī ere, Kristus momoi bagai gare den anidi bun tamal kel turī fiyen, are idi gare den anidi bun tamal faat uyulil yun gen. <sup>21</sup> Are, laa are tamo tekelei bunem isin nigin, gare den neid kel fāya areg tamo tekelei bunem isif. <sup>22</sup> Are, Adam bun ganan gare dedig, age fiya gen, Kristus bun ganan mata ifenēdiyof. <sup>23</sup> Anī ere, idi mugu mugu dogo neid sain bun age difouf: Kristus ī uyulil faat yūya, anī dumen, ī isiyouf sain bun, idi yogon dibodok anidi, mata ke de fā douf. <sup>24</sup> Anī bure fele

di, idikeleya sain isiyouf, sain anī bun, Kristus ī gawa-man ganan, yeneid ado ganan, megeir ganan daū fel fen, tano anī yale, Dei Negur ima bun inouf. <sup>25</sup> Ere ni-gin, ī king ibodok ile, yogon kiwai tar ganan yogo ye farumen inenēdiyof sain anī bun. <sup>26</sup> Kiwai idikeleya bun daū fiya nē, are laa. <sup>27</sup> Are Negur nē Itotoya bun eig ye irok kilei, “Negur ī ereb ereb ganan yogo ye farumen inenēdin.” † Sain ī irok, are ereb ereb ganan ī farumen inenēdin, are Negur ī ereb ereb ganan Kristus farumen inenēdin, Negur ī yogo enei farumen to ibodok ya anī yaor. <sup>28</sup> Sain Negur ī enei age fel fen, Naal yogo, Negur ī ereb ereb ganan Kristus farumen inenēdin anī, farumen inenēf, anī bunem, Negur ī ereb ereb ganan nē mudur ibodōf.

<sup>29</sup> Mata kel fāya anī sāf are, idi tamo gare den anidi nigin naan dalef idi naig difouf? Tamo gare den anidi to bagai kel turī fediyouf are, ere nigin tamo kayau idi nigin naan daledig? <sup>30</sup> Takag, amā nigin, ere nigin amā mug sain ganan bouwamā waila bun manenēdig?

<sup>31</sup> Turau tar, aya ā neda Odug Kristus Jesus bun ubodō-gef nigin, yanau alesedig anī bunem, momoi bagai enei totol bagai arok, are aya naa ganan laa bun ele-dig. <sup>32</sup> Aya tamo nē kisi bunem dogol, Efesus oun gaar kuī geid kusī aun ouf are, ere mala biya anī aya alen? Tamo gare den anidi to kel turī fediyouf are, Negur nē Itotoya bun yenek kilei,

“Saaf ado naan tāf,

ere nigin, nil gare tauf.” ††

<sup>33</sup> Ā taka nem to idegneīf. “Sane geid nigal yūya bun, tobonunā biya daū fedig.” <sup>34</sup> Kisi biya bun kel usig ufa-reg fen, mosor inoya utorōg, ere nigin, ā atun tunī Ne-gur nigin keleī sā difaref. Aya ā mama yeīf nigin enei wogō auf.

### Kel Fāya Nē Bouwa

<sup>35</sup> Anī ere, taka nem to fouf, “Tamo gare den anidi, naig fe kel turī fediyouf? Bouweid naig fiya bagai ado disiyouf?” <sup>36</sup> Ā neneya bagai! Ereb ō tu wouf anī, to laa fouf are, anī mata to wō youf. <sup>37</sup> Sain ō tu wof, ō fau ibodōf nē bouwa anī to utenek, anī ere, wit be, ereb ta-ka nē faat dogol. <sup>38</sup> Anī ere, Negur ī oron kilei, bouwa ifenēdig, agef fen, ī faat fire fire dogo neid bouweid fi-re fire ifenēdidig. <sup>39</sup> Bouwa ganan tekelei sā. Tamo nē bouwa are fire, gaar bouwa fire, ninā bouwa fire, gau bouwa fire. <sup>40</sup> Saa ilun nē bouweid ado di, tenebur nē bouweideg ado. Anī ere, saa ilun nē bouweid fula fiya medeīya fire di, tenebur nē bouweid fula fiya medeīya areg fire. <sup>41</sup> Gaa are futu reya fire di, ogō are futu reya fire, age fe di, barisa are futu reya fire. Barisa idi atu-neg futu reya fire fire ado.

<sup>42</sup> Age fiya gen, tamo gare den anidi neid mata kel fāya areg age fouf. Bouwa tu fiyaf nē are bura le di, bouwa kel fā yef nē are to bura ledig. <sup>43</sup> Sane bun tu fiya di, fula fiya medeīya bun kel fā yef. Totol sā tu fiya di, totol ado kel fā yef. <sup>44</sup> Bouwa buru maug are tu fiya di, uur nē bouwa are kel fā yef.

† Sam 8:6 †† Asaia 22:13



Bouwa buru maug ibodok are, uur nē bouwag ibodok. <sup>45</sup> Anī nigin, Negur nē Itotoya bun eig ye irok, “Uyulil inon tamo Adam ī mata ibodōya wō yen.” † Idi-keleya Adam ī mata ifenēya nē uur wō yen. <sup>46</sup> Uur nē bouwa ketem to isin, anī ere, bouwa buru maug ketem isin. Age fe di, anī dumen, uur nē bouwa. <sup>47</sup> Uyulil inon tamo are tenebur aas nē, anī dō fiya tamo are saa ilun nē. <sup>48</sup> Tenebur nē tamo idi, tamo teneub nem inon gen. Saa ilun nē tamo idig, tamo saa ilun tamal gen. <sup>49</sup> Ada tenebur tamo inon age fiya tabodok gen, adag tamo saa ilun tamal age fiya tabodōf.

<sup>50</sup> Turau tar, aya ā arokeneik, are tenebur nē bouwam Negur nē tano to akorou youf. Ereb bura ledig anīg to bura lauf anī to akorou youf. <sup>51</sup> Karī wog, aya waa taka arokeneif: Ada ganan to gare tauf, anī ere, ada ganan bouwada falei foug, <sup>52</sup> are ereb fili yeleya be, mala kamisāya gen idikeleya nē taur aitouf bun, bouwada agef falei foug. Taur aite di, tamo gare den anidi kel turī fedi di, to buraya nē ado fā douf, age fe di, ada bouwada falei foug. <sup>53</sup> Are, buraya nē anī to burauf nē anī ifonūf. Laa fiya nē anī to laa foug nē anī ifonūf. <sup>54</sup> Buraya nē anī to burauf nē anī ifonūf, laa fiya nē anī to laa foug nē anī ifonūf sain anī bun, Negur nē Itotoya bun ibodok enei agef kisi fel wō youf, “Negur-rem kusī bun laa wal fe fen, anī adok itob len.” ††

<sup>55</sup> “O laa, ogon kusī wal fiya nē megeir nain?” ‡

O laa, ogon waila nain?” ‡

<sup>56</sup> Laa nē waila are mosor, mosor nē megeir are lo.

<sup>57</sup> Anī ere, Negur de tafiyēf! Ī neda Odug Jesus Kristus bunem kusī wal fiya ifanadadig.

<sup>58</sup> Anī nigin, neu turau tar oboiyou, total ufareg. Ereb takam to yokū yeif. Faimud Odug nē kabī fatuk bagai walogouf, ere nigin, ā keleī, are ā Odug bun kabī walegef anī, ege to ilauf.

### Negur Nē Tamo Kayau Isennēdiya Nigin Kolekta

**16** Gama Negur nē tamo kayau isennēdiya nē kolekta nigin, ereb aya Galesia sios age difoug nigin arokenēdin anī ago gouf. <sup>2</sup> Uub ganan nē naa matu bun, ā mugu mugu, augeneī moni walegedig anī foig, fire unog fen, kuru gouf, anī bunem, sain aya asiyouf bun, kolekta baban to unogouf. <sup>3</sup> Sain aya wō auf, tamo ā ugirnēdigen anidi bun, pas afeneīd fen, āgenei ege luwa ado Jerusalem sur afediyouf. <sup>4</sup> Ayag idi geid ileyā nigin deuf are, idi aya geid weim malauf.

### Pol Nē Wau Irōya

<sup>5</sup> Aya Masedonia provins atu atu ele fen, ā gein asiyouf, ere nigin, aya Masedonia atu atu alauf. <sup>6</sup> Aya ā geid sain naal tabodōf be, yau ado menig sain bun ā geid tabodōf, anī bunem, ā neu iyōya nain be alauf bun usennagauf. <sup>7</sup> Aya gama ā ailiyei ken, sain naal ki yeīya anī to orouf. Odug yo youf are, aya sain naal meluk ā geid tabodōf anī wau irok. <sup>8</sup> Anī ere, aya Efesus ein abodok ele, Pentikos naa wō youf, <sup>9</sup> ere nigin, kabī kaū ado nē sukar odug, aya bun kā fen, age fe di, musei aya kiwai difanaf.

<sup>10</sup> Timoti isiyouf are, ī ā geid ibodōf bun, ī ereb taka nigin to kumī youf nigin lo welegei, ere nigin, ī aya gen Odug nē kabī faali fef. <sup>11</sup> Anī nigin, taka nem ī yaleya nigin to itorōf. Yogon delē bun wau inosiya ado sur wiyēge di, ī aya gein kel isiyouf. Ī tura tar geid disiyouf nigin, aya ololo afedif.

<sup>12</sup> Neda turada Apolos nigin, ī tura tar geid ā gein dilauf nigin, aya total bagai arokenen. Ī gama ileyā nigin wau yenēya sā, anī ere, ī ileyā nigin sain biya isiyouf are, ī ilauf.

<sup>13</sup> Lo welegei, momoiya bun total ufareg, tamo total ado kumī sā wōg, total waleg. <sup>14</sup> Ereb ereb ganan wau laa fiya bun ago gouf.

<sup>15</sup> Ā keleī, are Stefanas nē ibor, Akaia provins oun uyulil momoiya tamo kayau wō de fen, idi dogo neid oroya dō de, Negur nē tamo kayau disennēdiyouf nigin, kabī total daledig. Turau tar, aya total bagai aroke-neik, <sup>16</sup> are ā eneidi age fediya ado, idi ganan kabī bun disi fen, kabī dalef anidi farumen ubodōg. <sup>17</sup> Sain Stefanas, Fotunatus ado, Akaikus wō den, aya wau al fen, ere nigin, ereb ā bun tamal ifanamāya anī, idim ā fotokar difanaman. <sup>18</sup> Are, idi age dife di, neu uur ado āgeneig filolō fen. Anī nigin, tamo age fediya nigin de fiyēdiya nē kisi walogouf.

### Idikeleya Nē Aanya

<sup>19</sup> Asia provins bun sios idi, ā bun aanya sur difef. Akwila Prisila ado aanya, wau sere fiya ado Odug bunem ā bun sur difef. Sios idi neid fō bun guru difedig idig age difef. <sup>20</sup> Ein tureī tar ganā ā bun aanya sur difef. Ā abob aan wiyēg fen, fateul bunem umā gouf.

<sup>21</sup> Aya, Pol imaum bagai aanya enei atotof.

<sup>22</sup> Taka ī Odug nigin wau to laa foug are, isisīya ī bun isiyouf. O Odug, usi!

<sup>23</sup> Odug Jesus nē wau ifenēya, ā bun ibodōf.

<sup>24</sup> Neu wau laa fiya, Kristus Jesus bunem ā ganā bun ibodōf. Momoi.

† *Jenesis 2:7* †† *Asaia 25:8* ‡ *Hosia 13:14*

## 2 KORIN

**1** Pol, Negur nē oroya bunem Kristus Jesus nē aposel wō aun, neda turada Timoti ado, pas enei Negur nē sios Korin bun ado, tamo kayau fateul ganan Akaia provins bun dibodok bun matotof.

<sup>2</sup> Tamada Negur ado Odug Jesus Kristus neid wau ifenēya ado wau inosiya, ā bun ibodōf.

### Wau Yo Fiya Ganan Nē Negur

<sup>3</sup> Negur, neda Odug Jesus Kristus Tama, wau yūya nē Tama, wau yo fiya ganan nē Negur yana talesauf, <sup>4</sup> neda morō ganan bun wauda yo fedig, anī nigin, ada dug wau yo fiya Negur bun tamal talen anī bunem, idi morō adodo anidi waud yo tafedig. <sup>5</sup> Kristus nē darau gogūf, ada namedan isif gen, neda wau yo fiya anīg Kristus bunem gogū felef. <sup>6</sup> Amā darau malef are, anī āgenei wauī yo fiya nigin ado, kel gei yeīya nigin. Amā waumā yo fef are, anī āgenei wauī yo fiya nigin, anī bunem darau de tekelei amāg malef anī, ā faali gef ulegef. <sup>7</sup> Ā nigin nemā waumā iseya total ifaref, ere nigin, amā keleī, are ā nemā darau walegef gen, ā nemā waumā yo fiyag walegef.

<sup>8</sup> Turamā tar, darau amā Asia provins bun malen anī, ā to keleī youf anī, to oromak. Amā morō faali fiya kisi feleya sā bagai bun mabodon, anī nigin, amā mata ibodōya nē kisig matoron. <sup>9</sup> Momoī, amā waumā bun, es fiya tamo kot bun taka laa foug ye di, kisi fedig gen, kisi mafen. Anī ere, amā mug bun to mafar fen, Negur tamo gare den anidi kel turī fedidig ī bun mafarauf nigin enei wō yen. <sup>10</sup> Ī laa nē waila ado kafī fiya age fiya bun tamal yalelnaman, anī nigin, ī fau yalelnamāf. Ī to-ku yalelnamāf nigin waumā iseya ī bun manon. <sup>11</sup> Are ā, āgenei kosēya bunem usennamāge di, Negurem age foug. Negur ī musei neid kosēya solof fen, wau ifenēya nē ege luwa ifanamāf nigin, museim amā nigin Negur de difiyēf.

### Pol Iyōya Nē Delē Falei Yen

<sup>12</sup> Amā mug nigin seli yabiya are yeir: Nemā kisi es fiya bun kurō fesif, are amā tenebur ein, Negur nē fateul ado momoi bunem, ā bun bagai age mafedig. Amā tenebur ein bouwa buru isennēya nē kisi biya bunem to age mafedig, anī ere, Negur nē wau ifenēya bunem age mafedig. <sup>13</sup> Amā ereb ā uweseg fen, ā keleī anī wal fiya to matotkeneik. Gama ā amā nigin naal keleī, anī ere, ā amā nigin keleī bagai youf anī oromak, anī bunem amā Odug Jesus nē naa bun ā nigin selī malesauf gen, āg amā nigin selimā walesagauf.

<sup>15</sup> Aya enei momoi bagai agef wō youf au fen, ā sain uru el fiya walougouf nigin, ā ket ki yeīya anī kisi afen.

<sup>16</sup> Aya Masedonia provins ileyā nigin asi, ki ayei ken, Masedonia ele fen, anenem ā gein baban kela asi di, ā aya Judia distrik ileyā nigin sur wiyagauf nigin kisi afen. <sup>17</sup> Sain aya enei kisi afen, aya karika bagai age afen de? Aya, tenebur nē tamo kayau age difedig gen, nameun “Sā” au fen, sigoroum “Yo” auf de?

<sup>18</sup> Anī ere, Negur ī age afoug ye fen, agef bagai dō fedig gen, nemā od ā gein isif are yo ye fen, sāya sā.

<sup>19</sup> Ere nigin, Negur Naal, Jesus Kristus ī nigin, aya, Sailas Timoti ado geid ā atun wogō mayeīdig anī, ī sain tekelei bun, yo ye fen, to sā yedig, anī ere, ereb ī yo yef anī, ī faimud agef dōf kisi feledig. <sup>20</sup> Ereb Negur age afoug yen od anī ganan Kristus bun yoya dogol. Anī nigin, ī bunem ada Negur bun fula fiya medeīya tarou-siyoug nigin, sigoradam “Momoī” taudig. <sup>21</sup> Negurem, amā ado ā, Kristus bun total tafarauf nigin age fef. Ī igirnada fen, ada bun moul fi fel fen, <sup>22</sup> ī, ada yogon nigin, ada bun yogon uris ino fen, ī wauda bun, ereb isiyoug anī momoi bagai isiyoug ye fen, yogon Awa Uur iben.

<sup>23</sup> Negur ī aya nigin keleī bagai nigin, ī neu od megeir fe fen, isennēdidig, ī aya isennauf nigin aweignek, are aya ā nigin wauī ina fen, morō ifeneīya ator ken, Korin to kela asin. <sup>24</sup> Amā āgenei momoiya nugo fiyēya nigin to age mafef, anī ere, amā ā wauī al foug nigin ā geid kabī malef, ere nigin, momoiya bunem ā total ufaregef.

**2** Anī nigin, aya ā gein morō ado baban to ki ayeīf nigin, neu kisi afon. <sup>2</sup> Ere nigin, aya ā wauī morō afeneīf are, aim anī aya wau al fiya ifanauf, are ā aya morō afenein anim dogol sā de? <sup>3</sup> Aya enei bagai nigin atotkenein, are sain aya asiyoug bun, idi aya wau al fiya difanauf anidi bun, aya morō to aloug nigin age afen. Aya enei momoi auf, are sain aya wau al fef, ā gananege wauī al fef. <sup>4</sup> Aya morō odug ado wau gudū fiya bun, inā odug ado atotkenein, are aya ā morō afe-neīf nigin to age afen, anī ere, ā bun neu wau laa fiya odug bagai anī, ā keleī youf nigin age afen.

### Mosor Tamo Nē Mosor Nigin Weder Tu Keleya

<sup>5</sup> Tamo anim morō ifenen ouf are, ī aya morō to ifanan, anī ere, ī ā ganan morō sau fiya ifenein. Aya total bagai to arōf nigin ‘sau fiya’ auf. <sup>6</sup> Ā musei gananein ī darau wenēgen are, ī nigin kisi feleya. <sup>7</sup> Age fiya ban, gama ā in mosor wedereī tu kel fen, ī wau yo gouf, anī bunem, ī wau gudū fiya fatuk bagaim to kuroub fiyēf.

<sup>8</sup> Anĩ nigin, aya ĩ āgenei wauĩ laa fiya baban ufelnēgouf nigin total od arokeneik. <sup>9</sup> Aya, pas bun ā atotkenein, ere nigin, aya ā kisi ayeĩ di, ā ereb ereb ganan bun neu od dō gouf anĩ ailauƒ nigin age afen. <sup>10</sup> Ā taka nē mosor nigin wedereĩ tu kalauf are, ayag in mosor nigin wederou tu kalauf. Ereb taka weder tu keleya nē ibodō di, aya wederou tu kelen, are aya āgenei biya fiya nigin, Kristus mala bun wederou tu kelen, <sup>11</sup> are Sata-nem ada to wal fada fen, bilā youf nigin age afen. Ere nigin, ada yogon kisi keleĩ.

### Bar Itenēya Mata Nē Kabĩ Tamo Tar

<sup>12</sup> Sain aya Kristus nē biya od wogō auf nigin Troas taun ele fen, Odug ĩ aya nigin sukar kā fel mog ailen, <sup>13</sup> aya fau nameun wau inosiya san, ere nigin, aya turau Taitus an to ailen. Anĩ nigin, aya idi dabuo afiyeĩd fen, Masedonia provins elen.

<sup>14</sup> Anĩ ere, Negur de mafiyēf, ĩ faimud amā Kristus bun kusĩ wal fiya bun uyu iroukanamādig, agef fen, ĩ, amā bunem, Kristus nigin keleĩ anĩ nē sumeĩ biya, modoũ ganan bun firagagaũ feledig. <sup>15</sup> Ere nigin, amā idi kel gei fedif anidi ado idi isaikalauƒ anidi atun, Negur mala bun, Kristus nē sumeĩ biya. <sup>16</sup> Taka bun amā laa nē sumeĩ, taka bun amā mata ifenēya nē sumeĩ biya. Aim anĩ kabĩ age fiya yaleya kisi feleya? <sup>17</sup> Amā, musei idi Negur nē od nigin moni mala kabĩ daledig gen sã. Age fiya ban, Kristus bun, amā, tamo Negurem sur fedin gen, Negur mala bun momoi nē bunem wogō maudig.

**3** Amā baban yanamā yalesey a nigin gariya manof de? Amā, tamo tunĩ age difedig gen, kabĩ biya daledig nē isennēya pas, amam ā gein sur mafouf be, āgem amā bun sur gouf de? <sup>2</sup> Ā aug anĩ, nemā pas, are waumā bun itoton, age fe di, tamo ganan kelei ken, diwesedig. <sup>3</sup> Ā aug anĩ, Kristus nē pas, nemā kabĩ nē kaũ anĩ yaor gef, itoton are ink bunem sã, are mata ibodkeleya Negur nē Awa Uur bunem, meein fadaleya bun sã, are tamo waud bun.

<sup>4</sup> Amā enei morok, ere nigin, amā Kristus bunem, Negur nigin momoiya ado. <sup>5</sup> Amā ereb taka amā mug bunem isif yeya kisi feleya sã, anĩ ere, amā nemā kisi feleya Negur bunem isif. <sup>6</sup> Negur ĩ amāg bar itenēya mata nē kabĩ tamo wōya kisi feleya inenaman, are lo itotoya nē sã, Awa Uur nē, ere nigin, lo itotoya anim idenkesidig, anĩ ere, Awa Uur im mata ifenēdidig.

### Bar Itenēya Mata Nē Fula Fiya Medeĩya

<sup>7</sup> Kabĩ laa irou isidig, are meein bun gegē itoton anĩ fula fiya medeĩya ado isin, anĩ nigin, Israel tamo kayau yogon fula fiya medeĩya nigin meleid dē yel fen, Moses nē nawa lo feleya kisi feleya san, anĩ ere, fula fiya medeĩya anĩ komomor fen. Kabĩ age fiya fula fiya medeĩya ado isin ouf are, <sup>8</sup> Awa Uur nē kabĩ nē fula fiya medeĩya anim lo nē fula fiya medeĩya anĩ to wal fouf de? <sup>9</sup> Tamo neid mosor nigin bouweid bun od yũdig nē kabĩ anĩ, fula fiya medeĩyauf are, kabĩ madur bagai irou isidig in fula fiya medeĩya nē odug naig fiya bagai!

<sup>10</sup> Ereb kulu fula fiya medeĩya yenen, are gama nē fula fiya medeĩya odug bagai nigin, kulu nē are sa kelen.

<sup>11</sup> Ereb komomor falauf nē anĩ, fula fiya medeĩya ado isin ouf are, faimud ibodkeleya nē fula fiya medeĩya, yogon odug naig fiya bagai!

<sup>12</sup> Anĩ nigin, amā waumā iseya age fiya ado nigin, amā wogōya bun tuninirya sã. <sup>13</sup> Amā Moses gen sã, ĩ yogo nawa bun lalan komomor fe mog, Israel tamo kayau to dilouf nigin, yogo nawa bun gabar dede fedig. <sup>14</sup> Anĩ ere, idi neid kisi totolen, are sain enei bun, bar itenēya tubu iweseya bun gabar de anim fau ibodok. Gabar anĩ fau yaleleya sã ibodok, ere nigin, Kristus bun dogol anĩ yaleleyauf. <sup>15</sup> Sain enei buneg, Moses nē itotoya iweseya bun, gabar dogo neid waud dede fedig. <sup>16</sup> Anĩ ere, ereb sain taka ĩ Odug bun falei youf are, gabar are lelek felef. <sup>17</sup> Gama, Odug ĩ Awa Uur, Odug nē Awa Uur ibodok nē an, are katĩ feleya taka sã. <sup>18</sup> Anĩ nigin, ada ganan, nawada bun gabarem dede fiya sã are, Odug nē fula fiya medeĩya tail fen, ada bun so fe di, ada ĩ gen falei fada di, neda fula fiya medeĩya odugef iledig, are Odug bunem isidig, ĩ anĩ Awa Uur.

### Mis Namen Safina Biya Bagai

**4** Anĩ nigin, amā Negur nē wau yũya bunem kabĩ enei ado nigin, amā waumā bun to folo redig. <sup>2</sup> Anĩ ere, amā inokōya ado mama nē naab matoron, amā to madeg ken, Negur nē od to falei mafeledig. Anĩ ere, amā momoi nē anĩ yaor mafe fen, Negur mala bun, tamo ganan dogo neid kisi es fiya bun, amā mug nigin yanamā iseledig. <sup>3</sup> Amā nemā biya od dede fiyauf are, idi inanakalauƒ nē anidi bun dede fedif. <sup>4</sup> Teneub enei nē waitou, idi momoiya sã anidi neid kisi ifofakelen, anĩ nigin, Kristus ĩ anĩ Negur nē malakanon, yogon fula fiya medeĩya nē biya od anĩ nē lalan, idi ilya kisi feleya sã. <sup>5</sup> Amā, amā mug nigin to wogō maudig, anĩ ere, Jesus Kristus ĩ Odug mau fen, amā Jesus nigin āgenei ferfer maudig. <sup>6</sup> Negur ĩ iron, "Gugum namen lalan fula fei," † yen, inim Kristus nē nawa bun yogon fula fiya medeĩya anĩ, amā keleĩ youf nigin, yogon lalan waumā bun fula fouf nigin inon.

<sup>7</sup> Anĩ ere, amā nameman mis namen gen, safina biya bagai enei ado, are ereb ereb ganan wal fiya nē megeir, are amā nemā sã, Negur nē anĩ yaorouf nigin. <sup>8</sup> Amā siri ganan bun total bagai lai difamak, anĩ ere, narĩ famāya sã; ereb taka age mafouf nigin neneya difanamak, anĩ ere, amā waumā folo reya sã; <sup>9</sup> darau difanamak, anĩ ere, to folō famalef; didenamā dirarak, anĩ ere, daũ famaleya sã. <sup>10</sup> Amā faimud Jesus nē laa anĩ, bouwamā bun faali ma mayōdig, are Jesus nē matag bouwamā bun yaorouf nigin. <sup>11</sup> Amā mata mabodok, anĩ ere, faimud Jesus nigin laa bun dinenamādig, are yogon matag nemā laa nē bouwamā bun yaorouf nigin. <sup>12</sup> Anĩ nigin, laa, amā bun kabĩ yaledig, anĩ ere, mata, ā bun kabĩ yaledig.

<sup>13</sup> Negur nē Itotoya eig yef, "Aya momoi aun, anĩ nigin, aya wogō aun." †† Momoiya de tekelei anĩ nē kisi

† *Jenesis 1:3* †† *Sam 116:10*

bunem, amāg momoi mauf, anī nigin, amāg wogō mauf, <sup>14</sup> ere nigin, amā keleī, Negur ī Odug Jesus laa bun tamal kel turī fen anim, amāg Jesus geid kel turī fama ken, amā ā geid in mala bun inenadauf. <sup>15</sup> Enei ganan are, āgenei biya fiya nigin, anī bunem, wau ifenēya anī tamo kayau bun kaka fef ile di, dogo neid Negur de fiyēya gogū fef anim, Negur fula fiya medēya ifenēf.

<sup>16</sup> Anī nigin, amā waumā to folo redig. Amā bouwamā buru foinenem ilumuk iledig, anī ere, amā nameman naa ganan bun mataya tobol fe iledig. <sup>17</sup> Nemā karika ado sain modeg nē morō anim, faimud ibodkeleya nē fula fiya medēya, are morō anī ganan fatuk bagai wal fiya anī, amā malouf nigin kabī yaledig. <sup>18</sup> Anī nigin, ada ereb maladam tailef ani to lo tafalauf, anī ere, ereb maladam to tailef anī lo tafalauf. Ere nigin, ereb tailef, are sain tobega nē, anī ere, ereb to tailef, are faimud ibodkeleya nē.

### Saa Tanon Ibodōya Nē Bouwa

**5** Ada keleī, tenebur nē salafat ada anī namen tabodōdig anī narī foug are, ada fō taka Negur bun tamal ado, are saa ilun oun faimud ibodkeleya nē fō, are tamo imam inoya sā. <sup>2</sup> Gama ada fō enei bun tabod ken, osi taudig, age tafe fen, saa ilun neda ibodōya modoū bunem ifounnadauf nigin wauda fatuk irōdig, <sup>3</sup> ere nigin, ada saa tanon ibodōya nē bouwa ifounnadauf sain bun, ada gemū to diledauf. <sup>4</sup> Ada salafat enei bun tabod mog, morō faali tafe fen, osi taudig, ere nigin, ada salafat enei lelek fel kanauf nigin to orodadig, anī ere, saa ilun neda ibodōya modoū bun ifounnadauf nigin orodadig, anī bunem, ereb laa nē anī, mata anim itob lauf. <sup>5</sup> Negur ī enei nigin bagai ada inoda fen, ada wauda bun, ereb isiyouf anī momoi bagai isiyouf ye fen, Awa Uur iben.

<sup>6</sup> Anī nigin, ada faimud kisi total ado fen keleī, are ada bouwada buru ado tabodok sain anī bun, ada Odug weim to tabodōdig. <sup>7</sup> Ada momoiya bunem tabodōdig, ereb maladam tailef bunem sā. <sup>8</sup> Aya arok, ada kisi total ado fen, ada bouwada enei tator ken, Odug geid takai tabodōf nigin orodaf bagai. <sup>9</sup> Anī nigin, ada bouwada buru ado tabodok be tatorok be, ī wau al foug nigin ada kisi tatenēf. <sup>10</sup> Ere nigin, ada ganan Kristus nē es fiya sia wagen wō taur bagai, are mugu mugu, ereb biya be sane be, ada bouwada buru ado tabod ken, age tafan anī kilei, yogon mala solo yalouf.

### Komo Fiya Nē Kabī

<sup>11</sup> Amā Odug anini fiyēya anī keleī nigin, amā tamo waud yaleya nigin age mafedig. Amā naig fiya anī Negur keleī bagai, age fiya gen, amā nigineg āgenei kisi es fiya bun yaorouf nigin, aya wau irok. <sup>12</sup> Amā ā bun baban yanamā yaleseya nigin to age mafef, anī ere, ā amā yanamā walesagauf nigin sain mafeneik, anī bunem, idi ereb waud bun ibodok anī fotokar, ereb meleddim dilef anī nigin yeneid dalesedig anidi bun, ā solof

irōya kisi feleya. <sup>13</sup> Amā wadā idenamāf, are Negur nigin. Amā kisi biya adouf, are ā nigin. <sup>14</sup> Kristus nē wau laa fiya anim amā toli famādig, amā kisi mafef, tekeleim ganan nigin laa fen, anī nigin, yogon laa bun, ganan gare den. <sup>15</sup> Ī ganan nigin laa fen, anī nigin, idi mata dibodok anidi dogo nigin to dibodōf, anī ere, ī idi nigin laa fe di, kel turī fiyen anī nigin dibodōf.

<sup>16</sup> Anī nigin, gama einenem ilef ganan, ada tamo nē karīya bunem taka to keleī youf. Ada kulu naab enei bunem Kristus kelein, anī ere, ada baban to age tafedig. <sup>17</sup> Anī nigin, taka ī Kristus bun ibodok, Negur ī yale, mata bagai inon. Tubu are ilele di, mata anī isin. <sup>18</sup> Enei ganan Negur bun tamal, ī Kristus bunem ada ī geid komo fada fen, komo fiya nē kabī anī ada ifanadan. <sup>19</sup> Are Negur ī tamo nē mosor idi bun to iwes fen, Kristus bun tenebur tamo kayau ī geid komo fedin. Agef fen, Negur ī komo fiya nē od ada bun inon. <sup>20</sup> Anī nigin, amā Kristus nē soosi tamo, are Negur ī yogon wau irōya, amā bunem wogō yedig gen. Amā Kristus fotokar ā magoneik, Negur geid komo gouf. <sup>21</sup> Negur ī, ada nigin ye fen, Kristus mosor sā anī, mosor ī bun inon, are ī bunem, ada Negur nē madur bagai wowā taur nigin age fen.

**6** Negur nē kabī tura tar amā, ā total bagai marokeneik, are Negur nē wau ifenēya walegen anī, ege to aaluwan ilauf. <sup>2</sup> Ere nigin, Negur ī irok, “Neu wau ifenēya sain bun, aya ō karī ayon, kel yaleya nē naa bun, aya ō asennon.” † Aya ā arokeneik, gama eī Negur nē wau ifenēya nē sain, gama eī kel yaleya nē naa.

### Pol Nē Morō

<sup>3</sup> Amā taka delē ilauf bun ye to tū foug nigin meein to manodig, are nemā kabī yana sane to ilauf nigin age mafedig. <sup>4</sup> Age fiya ban, amā, naab ganan bun, amā Negur nē kabī tamo bagai ya anī mafelnēdidig, are feseya sā ifareya bun, darau, morō, wau morō bun, <sup>5</sup> didenamak bun, kalabus bun, kusī bun, kabī total bun, bō mulaī itorōya bun ado, naū bun, <sup>6</sup> karētut bun, keleī bun, molol bun, dor yaleya bun, Awa Uur Fateul bun ado, wau laa fiya bagai bun, <sup>7</sup> momoi nē wogō bun, Negur nē megeir bun, madur bagai nē waila ima biyalē ado ima kilē bun, <sup>8</sup> tunī yanamā dalesedig ado tunī to yanamā dalesedig bunem, yana sane inoya ado yana biya inoya bunem; amā momoi marok, anī ere, amā idegēya tamo gen kisi difedig; <sup>9</sup> idi amā nigin keleī, anī ere, keleī sā gen kisi difedig; gare mauf, anī ere, amā mata mabodok; didenaman, anī ere, to didenama-kesin; <sup>10</sup> waumā gudū fef, anī ere, faimud waumā kulī yedig; maleg, anī ere, musei safina kisi feleya manenēdidig; ereb taka sā, anī ere, ereb ereb ganan ado.

<sup>11</sup> Korin tamo kayau, amā karika wogō mayein. Age ma fen, amā ā bun waumā sukar fatuk bagai kā mafen. <sup>12</sup> Amā nemā waumā laa fiya ā bun to mafokeledig, anī ere, āgenei wauī laa fiya amā bun ufokededig. <sup>13</sup> Aya neu kesu tar bun gen ā wogō ayeik, ā solog fen, wauīg sukar fatuk bagai kāg.

† *Asaia 49:8*

### Momoiya Sã Geid To Bagu Gouf

<sup>14</sup> Momoiya sã geid to bagu gouf. Madur bagai sane ado naig de nigal dũf? Lalan gugum ado ere bunem nigal dũf? <sup>15</sup> Kristus Satan ado naig fe di, waud tekelei youf? Ere anĩ momoiya ado, momoiya sã atun tekelei? <sup>16</sup> Negur nẽ tempel, idegẽya waitou atun, ere mamad katõ fiya ado? Are ada mata ibodõya Negur nẽ tempel. Negur iron kilei, “Aya idi geid mabod ken, idi atun ayõf, age afe fen, aya idi neid Negur ouf, age afe di, idi neu tamo kayau ouf.” †

<sup>17</sup> “Anĩ nigin, utornẽdig fen,  
fire ufareg,  
Odug irok.

Ereb amuyẽ ado to kobũg,  
ago ge di, aya ã aleyeĩf.” ††

<sup>18</sup> “Aya ãgenei temẽ di,  
ã nau kesu tar, nau barai tar ouf,

Odug saa ilun nẽ kusĩ tamo guri feid uyu iroudig anĩ irok.” ‡

**7** ã neu oboiyu, ada Negur age afouf yen od enei ado nigin, ada dug ereb ereb ganan bouwa ado uur amuyẽ ifenẽdig anĩ lilik tafe fen, Negur anini fiyẽya bunem fateul bagai wõ tauf.

### Pol Nẽ Kulĩya

<sup>2</sup> ãgenei wauĩ bun, amã nigin modoũ unog. Amã aib taka bun to kũ mafenen, amã aib taka sane bun to manenen, amã aib taka idegnẽya bunem ereb ereb to son mafen. <sup>3</sup> Aya ã bouweĩ yũya nigin od enei to wogõ auf. Ere nigin, aya mogo oron, are ãgenei ibodõya modoũ, amã waumã bun ado nigin, amã ã geid mata tabodõf be, gare tauf. <sup>4</sup> Aya ã nigin fatuk bagai momoi au fen, fatuk bagai ã yeneĩ alesef. Aya wau fatuk bagai yalesef, nemã morõ ganan bun, neu wau kulĩya gogũ felef.

<sup>5</sup> Sain amã Masedonia masin, nemã bouwamã enei si inoya san, anĩ ere, amã siri ganan bun darau difanaman, serẽ kiwai difanamã mog, nameman kumĩ ado. <sup>6</sup> Anĩ ere, Negur ĩ waud morõ adodo waud yo fedidig, Taitus isin bunem ĩ waumã yo fen. <sup>7</sup> Are, in isin bunem dogol sã, anĩ ere, wau yo fiya ĩ wenẽgen anĩ bunem ado. ã aya uleyagauf nigin bagai oroyein, ereb wõ yen anĩ nigin ãgenei awaun yeya odug fen, ã aya nigin kisi fatuk bagai walegedig anĩ ĩ irokanaman, anĩ bunem, neu kulĩya odug bagai iselen.

<sup>8</sup> Aya neu pas bunem wauĩ gudũ fiya afenein, anĩ nigin, aya uruwa bun awaun aun. Anĩ ere, gama aya anĩ nigin to awaun auf, ere nigin, aya ailef, are neu pas anim, sain naal bagai dogol wauĩ gudũ fen. <sup>9</sup> Anĩ ere, gama aya wau al fef, are wauĩ gudũ fiya afenein anĩ nigin sã, anĩ ere, ãgenei wauĩ gudũ fiya anim, wauĩ faleiya bun irouleyein nigin. Ere nigin, ã Negur nẽ oroya kilei wauĩ gudũ fen, anĩ nigin, amã ã daũ fiya to mafenein. <sup>10</sup> Wau gudũ fiya Negur nẽ orof kilei anĩ, wau faleiya ırousi, kel yaleya bun ırouledig, anĩ nigin, ada to

† Levitikas 26:12; Jeremaia 32:38; Esekiel 37:27 †† Asaia 52:11; Esekiel 20:34, 41 ‡ 2 Samuel 7:14; 7:8

awaun taudig, anĩ ere, tenebur nẽ wau gudũ fiya laa ırousidig. <sup>11</sup> Negur nẽ wau gudũ fiya eneim, ã bun faat yun anĩ ulogouf, are ereb total bagai wauĩ ırõdig, morõ wõ yen anim to lai yeĩf nigin ereb ã aug madur gedig, ereb sane nigin seye gedig, ereb Negur nigin anini gedig, ereb taka nigin bagai oroyeĩdig, ereb kabĩ total walegedig, ereb sane age fen bun mala solo wenẽgedig. Ereb ereb ganan bun, ã aug enei nigin kũ fenẽya taka sã anĩ yaor gen. <sup>12</sup> Anĩ nigin, aya ã bun atoton are, taka ĩ sane age fen be, takam ĩ bun sane age fen anĩ nigin sã, anĩ ere, ã amã nigin naig ge wauĩ wanamãgef anĩ, Negur mala bun aug ulogouf nigin age afen.

<sup>13</sup> Enei ganan nigin amã waumã yo fef.

Amã waumã yo fiya anĩ teten, amã Taitus ĩ fatuk bagai wau al fen anĩ mail fen, fatuk bagai waumã al fen, ere nigin, yogon uur ã ganan bunem filolõ fen. <sup>14</sup> Aya ĩ bun yeneĩ alesen, age afe di, ã aya mama to wanagen. Anĩ ere, ereb amã wogõ mayein anĩ ganan momoi, age fiya gen, amã Taitus bun yeneĩ malesen areg, momoi anĩ yaoren. <sup>15</sup> ã ganan ĩ dõg fen, aniniya ado tererẽya bunem ĩ walegen anĩ, ĩ kisif fen, ã nigin yogon wau laa fiya mugı bagai ilen. <sup>16</sup> Aya, ereb ereb ganan bun, ã nigin, sã momoi auf nigin, wau al fef.

### Wau Ifenẽya Bunem Kolekta Inoya

**8** Turamã tar, amã, ã wau ifenẽya Negur Masedonia sios ifenẽdin anĩ keleĩ youf nigin oromak. <sup>2</sup> Idi morõ odug bagai dale fen, maleg bagai dibodon, anĩ ere, idi neid waud kulĩya mugı ado bun, idi isennẽdiya nigin kolekta moni musei difenẽdin. <sup>3</sup> Aya kurõ afeis eig au arokeneik, idi ifenẽdiya kisi feleya ado, anĩ wal fesiyag difenẽdin. Dogo neid oroyam, <sup>4</sup> idi Negur nẽ tamo kayau isennẽdiya kabĩ amã geid malouf, are dem de fen, anĩ nigin total bagai dirokanaman. <sup>5</sup> Age dife fen, idi, amã idi nigin kisi mafen kilei, to age difen, anĩ ere, idi anĩ wal fiya age difen. Idi dogo anĩ ketem Odug difen ken, anĩ dumen Negur nẽ oroya dõ de, idi dogo amã difanaman. <sup>6</sup> Anĩ nigin, amã Taitus total bagai marokenen, ĩ uruwa bun gariya inon nigin, wau ifenẽya nẽ kabĩ enei ã buneg bure falauf nigin marokenen. <sup>7</sup> Anĩ ere, ã ereb ereb ganan bun, momoiya bun, wogõ bun, keleĩ bun, wauĩ adok ırõya ganan bun, ãgenei wauĩ amã nigin laa fiya bun, kisi feleya ago gef gen, wau ifenẽya nẽ kabĩ enei buneg ã kisi feleya ago gouf.

<sup>8</sup> Aya ã ago gouf bagai nigin sii fiya to afeneik, anĩ ere, aya sios tunĩ kabĩ total dalef anĩ bunem, ãgenei wauĩ laa fiya anĩ, momoi be sã be anĩ es ayeĩf. <sup>9</sup> Ere nigin, ã neda Odug Jesus Kristus nẽ wau ifenẽya keleĩ, are ĩ safina kisi feleya, anĩ ere, ã nigin ĩ maleg wõ yen, are yogon maleg bunem ã safina kisi feleya wõ gouf nigin, ĩ age fen.

<sup>10</sup> Aya enei nigin neu kisi, ãgenei biya fiya nigin afe-neik. Yar tubu bun, ã ket wenẽdigen anĩ dogol sã, ã ago gouf nigin wauĩ iseya anĩg adon. <sup>11</sup> Gama kabĩ anĩ udikalagauf, anĩ bunem, ã ago gouf nigin, ãgenei oroya total bagai ibodon gen, ã safina kisi feleya kilei kabĩ anĩ bure walagauf. <sup>12</sup> Oroya anĩ an ibodõf are, Ne-

gur erab tamo taka safina ado kilei anī yalouf, erab tamo taka safina sā bunem sā.

<sup>13</sup> Amā nemā oroya, tunī waud karika ifenēdi di, ā wauī morō ifeneik anī sā, anī ere, ganan kisi kisi feleya ibodōya nigin oromak. <sup>14</sup> Sain enei bun, āgenei erab erab musei anim, erab idi lau difef anī gadō gouf, anī bunem, dogo neid erab erab musei animeg, abag erab ā lau gef anī gadō difouf, age dife di, kisi kisi feleya ubodōgouf, <sup>15</sup> are Negur nē Itotoya eig ye irok kilei, “Taka ī safina musei kuru fen, ī musei bagai to yalen, taka ī naal kuru fen, ī to lau fen.” †

### Taitus Korin Sur Difiyen

<sup>16</sup> Aya, Negur ī, kisi aya ā nigin ado kisi de tekelei, Taitus nē wau bun inon nigin, Negur de afiyek. <sup>17</sup> Ere nigin, Taitus ī, nemā od ā ki yeīya nigin anī, de ye fen, ī yogon wau irōya odug bagai ado, yogon oroyam ā gein isif. <sup>18</sup> Amā, turamā taka biya od bun yogon kabī nigin, sios ganan yana dalesedig anī, Taitus ado sur mafedif. <sup>19</sup> Enei dogol sā, turamā ī anī, wau ifenēya nē kabī enei bun, amā geid mayok malauf nigin, siosem digirnen, kabī are, amā Odug bun fula fiya medeīya marousiyouf nigin ado, amā nemā isennēdiya nigin waumā irōya mafelnēdiyof nigin kabī malef anī. <sup>20</sup> Amā, wau ifenēya bunem ege luwa musei dinon enei, lo ma mog, tunī anī nigin od sane to dirōf nigin oromak. <sup>21</sup> Ere nigin, amā Odug mala bun ado, tamo meleid buneg, erab madur bagai anī age mafouf nigin lo mafedig.

<sup>22</sup> Amā, turamā taka, idi geid sur mafedif, ī amā sain musei es mafiye ken, ī erab erab musei bun kabī total yaledig anī mailedig, ī ā nigin fatuk bagai momoi yef nigin, ī gama isennēdiya nigin kabī total yaleya orib yef. <sup>23</sup> Taitus nigin, ī neu tā tar taka, ī ā nigin neu kabī turau; nemā turamā tar nigin, idi sios neid arū tamo, Kristus bun fula fiya medeīya dirousidig. <sup>24</sup> Anī nigin, āgenei wauī laa fiya nē kaū ado, amā ā yeneī malese-dig anī nē gariya nē kaū, tamo eneidi ufelnēdigouf, anī bunem, sios idi anī dilouf.

**9** Ā mogo keleī nigin, aya Negur nē tamo kayau bun kabī enei nigin baban to atokeneīf. <sup>2</sup> Ere nigin, aya isennēdiya nigin āgenei wauī irōya total anī keleī ken, Masedonia tamo kayau bun yeneī alesedig, are yar tubu bun tamal isi, gama ā Akaia an isennēdiya nigin dodok gen anī arokenēdi di, isennēdiya nigin āgenei wauī irōya total anim, idi musei waud fā yen. <sup>3</sup> Anī ere, aya turau tar sur afedin, are amā ā yeneī malesedig anī enei bun ege to ilauf, anī ere, ā aya aron gen dodok gouf nigin, age afen. <sup>4</sup> Ere nigin, Masedonia tamo tunī aya geid masi fen, ā dodok fiya sā anī dilouf are, amā ā nigin momoiya age fiya ado nigin mama malouf, āg mama yeīf nigin erab od taka sā. <sup>5</sup> Anī nigin, aya kisi afen, aya turau tar total bagai arokenēdi di, idi ketem ā gein dile fen, ā wau ifenēya nē ege luwa musei wenēdigouf urōgen anī nigin dodok fiya bure difalauf, are deuf, aun. Age dife di, wau ifenēya nē ege

luwa dodok fiyauf, are nugo yeīya bunem ege luwa inoya sā.

### Wau Ifenēya Bunem Safina Ifenēya

<sup>6</sup> Enei karī walagauf, aib taka faat musei sā irarak, ī musei sāg kusu fouf, aib taka faat musei irarak, ī museig kusu fouf. <sup>7</sup> Tamo mugu mugu, erab yogon wau bun ifenēya nigin kisi ifon anī ifenēf, are wau morō bunem sā, takam nugo fiya bunem sā, ere nigin, Negur ī tamo wau kulīya bunem ifenek nigin wau laa fef. <sup>8</sup> Negur ī wau ifenēya ganā ā kisi feleya bagai ifenēya kisi feleya, are erab erab ganā bun, ā faimud erab ā kisig fen, lau gef anī ganā waleg fen, kabī biya ganā kisi feleya bagai ago gouf nigin age fef. <sup>9</sup> Negur nē Itotoya eig ye irok kilei:

“Ī yogon safina firagagaū feid fen, maleg ifenēdin; yogon madur bagai faimud ibodkalauf.” ††

<sup>10</sup> Negur ī, faat irarāya tamo, faat ado yōya nē bret ifenēdig, ī āgenei faat irarāya nigineg ifen ken, musei inouf, agef fen, ī āgenei madur bagai nē kusu fiya odug inouf. <sup>11</sup> Negur ī erab erab ganā bun, ā safina ado inoyeīf, anī bunem, ā sain ganā wau ifenēya bunem musei wenēdigouf, ago ge di, idi amā bunem āgenei ege luwa dale fen, Negur de difiyēf.

<sup>12</sup> Kabī enei ā walegedig anim, erab Negur nē tamo kayau lau difef anī nigin dogol to isennēdif, anī ere, ago ge di, musei idi Negur de difiyek buneg gogū lef. <sup>13</sup> Kabī ā walegedig anī bunem, ā aug nigin yaorgen, anī nigin, tamo idi Negur yana dalesauf, ere nigin, ā Kristus nē biya od kurō wesig fen, anī dōg fen, ā wau ifenēya bunem idi adok ganā bun musei wenēdigouf. <sup>14</sup> Age de fen, ā nigin idi neid kosē bun, dogo neid waud ā bun isiyouf, ere nigin, Negur ī wau ifenēya erab erab ganā wal fiya anī ā ifenein. <sup>15</sup> Negur nē ege luwa dir feleya kisi feleya sā anī nigin, Negur de tafiyēf!

### Pol Yogo Ne Kabī Nigin Isennēya Od

**10** Aya, Pol, tunī dirōdig, aya ā geid tabodok sain bun, are yukeleya dedig, aya ā geid to tabodok sain bun, are total od irōdig dedig, aya Kristus nē imatkesiya ado molol nem eig au, ā arokeneik. <sup>2</sup> Aya asiyouf sain bun, aya tunī amā teneub enei nē lo fiya bun mabodōdig dedig anidi bun, aya total od arōf nigin kisi afef gen, to age afouf nigin, aya ā agoneik. <sup>3</sup> Momoi, amā tenebur ein mabodok, anī ere, amā kusī nigin, tenebur ein age difedig gen to age mafedig. <sup>4</sup> Amā nemā kusī nē waila are, teneub enei nē sā, anī ere, idi kau total narī fiya nigin Negur nē megeir ado. <sup>5</sup> Amā, monēya ado, erab erab ganā Negur nigin keleīya nē naabura gudū fiya nigin yogo iselef anī, narī mafedidig, age mafe fen, amā kisi ganā male fen, Kristus dō fiya nigin marouledidig. <sup>6</sup> Sain ā, āgenei dō fiya ganā bun, kisi feleya bagai wō gouf, amā fe meleid ganā darau ifenēdiya nigin dodok mafef anī kisi falauf.

† Eksodas 16:18

†† Sam 112:9

<sup>7</sup> Ā ereb ereb teten nē anī dogol lo gedig. Taka ĩ yogo nigin Kristus nē ye fen, anī nigin total bagai momoi youf, amāg ĩ gen Kristus nē anī, ĩ baban kisi fouf. <sup>8</sup> Aya, ā daū yeīya ban yalesneīya nigin Odug yana ifanaman anī nigin, yanau naal yaor afe alesaufeg, aya anī nigin to mama fiyauf. <sup>9</sup> Aya neu pas bunem, ā kumī ifeneīya nigin age afef gen, ā kisi gef anī to orouf. <sup>10</sup> Ere nigin, tunī dirōdig, “In pas are morō ado fen, total ado, anī ere, ĩ amā geid mabodok sain bun, ĩ maleg le fen, yog-on wogō are ege iledig.” <sup>11</sup> Tamo age fediya idi keleī youf, amā ā geid to tabodok sain bun, nemā pas bun amā naig be fiya anī, amā ā geid tabodok sain bun, amā de dō maf, age mafouf bagai.

<sup>12</sup> Amā, tunī dogo neid yeneid dalesedig idi geid, kerē sā dede to mauf. Idi dogo, dogo nigin dogo bun fele dife fen, dogo nigin dogo bun es difef anidi, idi kisi biya sā. <sup>13</sup> Anī ere, amā yanamā to daū wal ma fen, malesauf, anī ere, amā kabī Negur igirkanaman bun dogol yanamā malesauf, kabī are ā buneg ilef. <sup>14</sup> Amā yanamā gerō bagai to males maroulef, amā ā gein to masim are, amā yanamā gerō bagai males maroulem, ere nigin, amā Kristus nē biya od ado, ā geineg masin. <sup>15</sup> Amā tunim kabī dalen anī bun to daū wal mafe fen, yanamā malesedig. Nemā waumā iseya are eig fiya, āgenei momoiya odugef isele di, ā atun amā nemā kabī akor fatuk bagai bilalaū fef ilauf, <sup>16</sup> anī bunem, amā āgenei akor wal mafesil fen, biya od wogō mauf. Ere nigin, amā tamo taka nē akor bun kabī dalen anī nigin, yanamā yaleseya to oromak. <sup>17</sup> Anī ere, “Taka ĩ yana yalesef, ĩ Odug bun yana yalesauf.” <sup>18</sup> Ere nigin, taka ĩ yogo yana yalesef nigin, Negur to de yedig, anī ere, taka ĩ Odugem yana yalesef anī, Negur de yedig.

### Pol Idegēya Aposel Geid

**11** Ā aya utornag len, neneya od naal wogō auf nigin aya wau irok, anī ere, ā mogo yeir ago gef. <sup>2</sup> Aya ā bun Negur nē kiyeī bunem kiyeī afeneik. Aya ā aiweī tekelei, Kristus bun agirnein, are aya ā kayau taulei bagai gen, ĩ gein arouliyeīf nigin age afen. <sup>3</sup> Anī ere, Eva gougourem ed fe idegnen gen, āgenei kisi sane le di, ā āgenei wauī bun, Kristus bun āgenei momoiya ado kisi karētut utorōg fen, sane lauf nigin, aya kumī auf. <sup>4</sup> Takam ā gein isi fen, Jesus taka nigin, amā wogō mayein anī nigin gen sā, wogō youf be, ā uur fire, uur ā walegen gen sā anī walogouf be, ā biya od fire, biya od ā walegen gen sā anī walogouf are, ā anī karika bagai karī wedigedig. <sup>5</sup> Anī ere, aya kisi afef, aya aposel yeneid odug anidi farumen to bagai abodok. <sup>6</sup> Aya wogōya nigin biya sā be, anī ere, aya keleī ado. Amā, enei, ā bun naab ganan bun, ereb ereb ganan bun ya-or mafen.

<sup>7</sup> Aya yug nigin aukesil fen, Negur nē biya od mala sā ege bagai wogō ayein bunem, ā alesnein anī mosor de? <sup>8</sup> Aya ā aruneī yaleya nigin, sios tunī bun tamal isennaya alen anī, sios tunī idi bun tamal bē alen gen. <sup>9</sup> Takag, sain aya ā geid tabod ken, ereb taka nigin lau afen, aya ā taka to morō afenein, ere nigin, turau tar

Masedonia bun tamal disin idi, ereb aya lau afen kisi feleya bagai difanan. Ereb ereb ganan bun, aya yug ā morō ifeneīya ator ken, toku age afouf. <sup>10</sup> Kristus nē momoi anī, aya nameun ibodok nigin, taka nem Akaia provins bun neu yanau yaleseya enei to katī falauf. <sup>11</sup> Ere nigin? Aya ā nigin wau laa fiya sā nigin de? Negur ĩ keleī, aya ā nigin wau laa fedig! <sup>12</sup> Aya ereb ereb nigin idi yeneid dalesedig anī bun, amā idi geid tekelei ya anī karī douf nigin orodidig anidi neid naabureid gudū fiya nigin, ereb aya age afef anī, toku age afouf. <sup>13</sup> Ere nigin, tamo age fediya are idegēya aposel fen, idegēya kabī tamo, idi Kristus nē aposel neweid dale fen, kabī daledig. <sup>14</sup> Are terēya sā, ere nigin, Satan ĩ yogo bagai fula fiya nē engel nawa yaledig. <sup>15</sup> Anī nigin, Satan nē kabī tamo idi, madur bagai nē kabī tamo neweid dalouf are, to terē tauf. Idi neid didikalauf bun, idi age difedig kilei dalouf.

### Pol Yogon Kabī Nigin Morō Musei Yalen

<sup>16</sup> Aya baban arok, taka nem aya nigin neneya tamo to youf. Anī ere, ā ago gouf are, aya neneya tamo gen waleyag, anī bunem, ayag yanau naal alesauf. <sup>17</sup> Aya yug yanau yaleseya enei bun, aya Odug gen to wogō auf, anī ere, neneya tamo gen wogō auf. <sup>18</sup> Musei idi, teneub enei nē tamo kayau age difedig gen, yeneid dalesedig nigin, ayag yanau alesauf. <sup>19</sup> Ā kisi biya bagai ado nigin, ā wauī al fiya ado neneya tamo karī wedigedig! <sup>20</sup> Ere nigin, taka nem ā ferfer ineneik, ereb ereb ganan bun ā kadir ineneik, idegēya bun yaleyeik, yogo yana yaor falaisi ilun iselef be, weleī fā fef bun, ā karī wiyēgedig. <sup>21</sup> Aya momoi eig au arok nigin mama fiyaf, are amā felu reya bagai nigin to age mafedig!

Anī ere, taka ĩ total ino fen, ereb taka nigin yana yalesauf are—aya neneya tamo gen wogō auf—ayag total ano fen, yanau alesauf. <sup>22</sup> Idi Hibiru tamo de? Ayag anī. Idi Israel tamo de? Ayag anī. Idi Abraham nē ibor nē tubu tar de? Ayag anī. <sup>23</sup> Idi Kristus nē kabī tamo de? (Aya wadā gen eig au wogō auf.) Aya idi wal fediya. Aya idi wal fediya kabī aledig, aya kalabus bun idi wal fediya abodōdig, aya idi wal fediya wagī difiyadig, age de fen, aya laa bun baba baban dinenan. <sup>24</sup> Juda idi aya sain faif bun teti nain wagī difiyan. <sup>25</sup> Sain towo bun, aya tibogem wagī difiyan, sain tekelei bun, aya meei-nem dinan, waag aya abodon sain towo sanen, aya, bō taka ado gaa taka ado, maaī atun abodon. <sup>26</sup> Aya toku ayok bun, kuwei sane waila wal afen, bē tamo nē waila wal afen, neu fō turau tar geid kiwai wal afen, haiden geid kiwai wal afen, taun bun kiwai waila wal afen, gerere tuan kiwai waila wal afen, maaī bun waila wal afen, idegēya turau tar nē kiwai waila wal afen. <sup>27</sup> Aya kabī total ale, morō ado fen, sain musei mulāi to ainēdig. Aya naū ado naan ail fiya fen, sain musei saaf sā aledig. Aya menig fiya fen, gemū abodōdig. <sup>28</sup> Ereb ereb ganan anī sirin, aya naa ganan bun, sios ganan nigin suwēya morō anim lai fiyadig. <sup>29</sup> Aib felu re di, aya to felu rauf de? Aib mosor bun iroule di, aya to wau morō fiyauf de?

<sup>30</sup> Aya yanau yaleseya nigin bagai youf are, aya ereb ereb neu felu reya anī yaor fedig anī nigin yanau alesauf. <sup>31</sup> Odug Jesus nē Dei, Negur, ī anī yana faimud yaleseya, ī keleī, aya to adegek. <sup>32</sup> Damaskus oun, gawaman nē mudur, King Areta farumen ī, aya yaleya nigin taun bobog bun lo fiya tamo inenēdin. <sup>33</sup> Anī ere, aya karam kuren dinena fen, kau mosokoronem folo folō difiya di, yogon iman tamal ulō aran.

### Pol Nē Mala Seleulā Kurā Fiya Ado Yogon Kudag Ke-reuk Fiya

**12** Aya yanau alesef alauf. Ereb mala to aloufeg, aya Odug bunem malau seleulā kurā fen ado, kurō fesiya od alen anī wogō auf alauf. <sup>2</sup> Aya tamo taka † Kristus bun ibodok anī keleī, ī kulu yar fotin ilelen bun, Negurem yale, saa tano towo bun irou iselen. Ī bouwa ado be, bouwa sã be, aya keleī sã, Negur keleī. <sup>3</sup> Aya keleī, tamo enei-ī bouwa ado be, bouwa sã be, aya keleī sã, anī ere, Negur ī keleī- <sup>4</sup> ī paradis bun irou iselen. Ī ereb ereb tamom faded feleya kisi feleya sã, tamom wogōya nigin katū fiyen anī karī yen. <sup>5</sup> Aya tamo age fiya anī yana alesauf, anī ere, aya yug nigin yanau to alesauf, aya neu felu reya nigin dogol yanau alesauf. <sup>6</sup> Aya yana yaleseya nigin agirīfeg, aya neneya to abodōf, ere nigin, aya momoi anī wogō auf. Anī ere, aya yana yaleseya nigin atorok, are taka nem ereb aya age afef be, wogō auf anī wal fe fen, aya nigin fatuk to kisi foug nigin age afef.

<sup>7</sup> Kurō fesiya odug bagai enei alen anī bunem, aya yug yanau yaleseya katī feleya nigin, bouwa bun kudag ifanan, Satan nē arū tamo darau ifanauf nigin bouwa bun yun, are aya yug yanau yaleseya katī feleya nigin. <sup>8</sup> Sain towo, Odug aya bun anī yalelkanauf nigin, aya ī agonen. <sup>9</sup> Anī ere, ī irokanan, “Neu wau ifenēya ō nigin kilei bagai, ere nigin, neu megeir felu reya bun kisi feleya bagai wō yef.” Anī nigin, aya fatuk bagai wau al fiya bun neu felu reya nigin yanau alesauf, are Kristus nē megeir aya bun ibodōf nigin age afouf. <sup>10</sup> Anī nigin, Kristus nigin, aya felu reya bun, kono fiya bun, wau morō bun, darau bun, morō bun, wau kulī yedig. Ere nigin, sain aya felu rauf bun, aya total adodig.

### Pol Korin Tamo Kayau Nigin Suwē Yen

<sup>11</sup> Aya yug nigin neneya tamo wō aun, anī ere, ā aya nugo wiyage di, aya age afen. Ā aya nigin yanau walesegem, are dem, ere nigin, aya ege, anī ere, aya aposel yeneid odug farumen to bagai abodok. <sup>12</sup> Aya ā atun abod ken, ereb aposel bagai nē anī, uris, ereb urug bagai ado, memelik, morō ganan bun, feseya sã anodin. <sup>13</sup> Aya sios ganan bun age afedig anī, ā buneg age afen, anī ere, ereb tekelei dogol ā bun to age afen, are aya ā isennaya nigin morō taka to afenein anī dogol. Neu kū fenēya enei nigin wedereī tu kel!

<sup>14</sup> Gama aya eneim sain towo ki ayēīf nigin saika afef, aya ā isennaya nigin morō to afeneīf, ere nigin, ereb

aya orouf are, āgenei safina sã, ā aug anī. Kesum sina tama nigin moni to kuru difedig, anī ere, sina tamam nedi gereneid tar nigin age difedig. <sup>15</sup> Anī nigin, aya wau al fiya odug bun, neu safinau ganan ā nigin araile fen, aya yugeg arailauf. Aya ā nigin wau fatuk afeneī di, ā aya nigin wauī naal bagai wanagauf de? <sup>16</sup> Ā tunī aya nigin urōgedig, Ī amā masennēf nigin morō to ifanaman, anī ere, ī idegēya keleī bagai, idegēya kor bunem gei famādig, gedig. <sup>17</sup> Aya tamo susur afedin anidi taka bunem, ā adegnei ken, āgenei safina alen de? <sup>18</sup> Aya Taitus ā gein ileya nigin total bagai aroken ken, aya amā turamā ī ado sur afedin. Taitus ī to idegnei ken, safineī yalen, ī age fen de? Amā kisi tekelei bun age mafe fen, naab tekelei dō mafen, anī sã de?

<sup>19</sup> Ā sain enei ganan, amā mug isennamāf nigin ā bun age mafedig be, kisi gedig. Amā, Negur mala bun, tamo Kristus nigin momoi def anidi gen, wogō maudig. Ā nemā oboimā, ereb ereb ganan amā age mafef, are ā megeir walogouf nigin. <sup>20</sup> Sain aya asiyouf, aya ā nigin kisi afef gen to ailiyēya nigin be, ā aya nigin kisi gef gen to uleyageya nigin, aya kumī auf. Ā bun an, kusī, kiyēī, seyeya, fara fiya, ne tā bou yūya, dumen od irōya, aya aya yeya be, ekul ge ufaregeya nigin, aya kumī auf. <sup>21</sup> Sain aya baban asiyouf, neu Negur ā meleī bun aya mama ifana di, musei kulu mosor dino fen, amuyē, noli tobonunā fire fire ado, bouwa nē oroya nigin total sane wau fāya bunem waud to falei difen anidi nigin, aya wau gudū foug nigin kumī auf.

### Idikeleya Nē Weder Irouya Od

**13** Eneim sain towo ā gein asif. “Od ganan isennēya urom be, towom sigoredim kurō difesiyouf anī megeir gouf.” †<sup>2</sup> Uruwa aya asi fen, baban asi ā geid tabodon sain bun, aya wedereī irouya od aroke-neī bure afelen. Gama aya ā geid to tabod ken, anī ket, idi uruwa mosor dinodin anidi geid tunī ganan aroke-neik: Aya kelau asiyouf sain bun, idi to loloum afediyouf, anī ere, kafi fiya afenēdiyof, <sup>3</sup> ere nigin, ā Kristus ī aya bunem wogō yef anī ileya oroyeik. Ī ā bun kabī yaleya nigin to felu ref, anī ere, ī ā atun megeir ado. <sup>4</sup> Ere nigin, momoi bagai, ī felu reya bun aa tetek bun dun, anī ere, ī Negur nē megeir bunem mata ibodok. Age fiya gen, amāg ī bun felu reya, anī ere, Negur nē megeir bunem, amā ī geid mata mabodōf. Age mafe fen, amā Negur nē megeir ā atun yaor mafouf.

<sup>5</sup> Ā momoiya bun ubodōgef be sã be anī, ulogouf nigin ā aug es gouf. Ā aug kisig uleg. Kristus Jesus ī, ā bun ibodok anī ā to keleī de? Sãf are, momoi bagai, ā es fiya bun kubū gef. <sup>6</sup> Anī ere, amā es fiya bun to kubū maun anī ā ulogouf nigin, aya momoi auf. <sup>7</sup> Ā ereb sane taka to ago gouf nigin, amā Negur bun kosē mauf. Are amā es fiya bun to kubū maun anī tamo kayau dilouf nigin sã, anī ere, amā es fiya bun kubū maun gen dilemāfeg, ā ereb madur ago gouf nigin. <sup>8</sup> Ere nigin, amā ereb taka momoi anī to kiwai mafenek, anī ere, momoi nē nigin dogol age mafef. <sup>9</sup> Amā felu mauf bun, ā megeir adof nigin, amā waumā al fef.

† Tamo taka anī, Pol yogo nigin irok.

†† Diuteronomi 19:15



Ã kisi feleya bagai wõ gouf nigin, amã kosẽ mauf.  
<sup>10</sup> Gariya eig fiya nigin, aya ã geid to tabod ken, enei atotof, are sain aya asiyouf, aya neu yanau bunem to-tol od ã to arokeneif nigin age afef, yanau are ã daũ yeïya ban yalesneïya nigin Odug ifanan.

#### Idikeleya Nẽ Aanya

<sup>11</sup> Idikeleya bagai, turau tar, dabuo. Kisi feleya bagai wõ gouf nigin ago gouf, aya neu wogõ anĩ karĩg, kisi

tekelei waleg, wauĩ inosiya bun ubodõg. Ago ge di, wau laa fiya ado wau inosiya nẽ Negur ã geid ibodõf.

<sup>12</sup> Fateul umãya bunem, abob aan wiyẽg. <sup>13</sup> Negur nẽ tamo kayau ganan, nedi aanya ã bun sur difef.

<sup>14</sup> Odug Jesus Kristus nẽ wau ifenẽya, Negur nẽ wau laa fiya ado, Awa Ur Fateul nẽ nigal yũya ã ganan bun ibodõf.

# GALESIA

**1** Aya Pol, aya aposel, tamo nē tobonunā bunem to wō aun, tamomeg aya to sur difiyan, anī ere, Jesus Kristus ado Tamada Negur ī Jesus Kristus laa bun tamal turī fe di, kel fā yen anim aya sur difiyan, <sup>2</sup> are aya neu turau tar aya weim mafaref anidi ganan geid, pas enei Galesia sios bun sur mafef.

<sup>3</sup> Negur neda Tamada ado Odug Jesus Kristus bun tamal, wau ifenēya ado wau inosiya ā bun ibodōf, <sup>4</sup> Kristus ī, neda Tamada Negur nē oroya dōf fen, sain sane enei bun tamal, ada kel gei fadauf ye fen, neda mosor nigin yogo luwa itoron. <sup>5</sup> Anī nigin, Negur ī bun fula fiya medēya gai gai ibodkalauf. Momoi.

## Biya Od Fire Taka To Ibodok

<sup>6</sup> Aya, ā kaisā bagai Negur ī Kristus nē wau ifenēya bunem ā iweignein anī utornēg fen, biya od fire bun falei ge di, terē auf. <sup>7</sup> Od are biya od bagai sā. Momoi bagai, tamo tunī, ā neneya bun dirāyei ken, Kristus nē biya od anī falei difalauf nigin age difef. <sup>8</sup> Anī ere, amam be, engel taka saa ilun tamalem, biya od fire, amā biya od wogō mayein anī to wogō yeif are, utornēg len, ī gai gai daū fiye kalauf! <sup>9</sup> Amā mogo maroke-nein gen, aya gama baban arokeneik: Aibem taka ā biya od fire, ā walegen anī to wogō yeif are, utornēg len, ī gai gai daū fiye kalauf!

<sup>10</sup> Aya tamo nē yo ya yaleya nigin age afef de, Negur nē yo ya yaleya nigin age afef? Aya tamo waud al foug nigin age afef de? Aya fau tamo waud al foug nigin age afoug are, aya Kristus nē ferfer sā.

## Pol Ī Negurem Iweignen

<sup>11</sup> Turau tar, aya ā enei keleī youf nigin orouf, biya od aya wogō ayein, are tamo nē kisim to dinon. <sup>12</sup> Aya anī tamo taka bun tamal to alen, takameg to ifelnan, anī ere, aya Jesus Kristus nē kurō falaisiya bunem alen.

<sup>13</sup> Aya kulu Juda neid momoiya bun abod ken, naig be afen are ā karī gen. Aya Negur nē sios darau fatuk bagai afen ken, daū afalauf nigin age afen. <sup>14</sup> Aya, Juda neid momoiya bun, Juda tamo aya gegen atun idi musei wawal afedin, age afe fen, aya neu tubu tar neid to-bonuneid dō fiya nigin fatuk bagai kisi total anon.

<sup>15</sup> Anī ere, Negur ī, aya sinau fau gō fiyaya sā mog, igirna fen, yogon wau ifenēya bunem aya iweigna di,

<sup>16</sup> aya haiden atun yogon Naal nigin wogō auf nigin, yogon Naal aya bun yaor fiya nigin wau iron, sain anī bun, aya aib bun keleī yaleya nigin tamo taka to, to afiyen. <sup>17</sup> Aya, idi aya aposel wōya sā mog, aposel dibodon anidi ailediyouf nigin Jerusalemeg to eselen. Anī

ere, aya kaisā bagai Arabia kantri ele fen, dum Damas-kus kelau elen.

<sup>18</sup> Yar towo ilele di, aya Pita ado uyu kū mafouf nigin Jerusalem esel fen, ī ado naa fiftin mabodon. <sup>19</sup> Aya aposel anidi taka to ailen, Odug nē tura, Jems dogol. <sup>20</sup> Aya Negur mala bun momoi arokeneik, aya atoskoneik are idegēya sā. <sup>21</sup> Anī dumen, aya Siria ado Silisia provins elen. <sup>22</sup> Judia distrik oun sios Kristus bun dibodok idi, aya nigin keleī sā. <sup>23</sup> Idi od enei dogol karī den: “Tamo ī kulu ada darau ifanadan, ī momoiya daū fouf nigin kulu age fen anī, gama wogō yef.” <sup>24</sup> Age de fen, idi aya nigin Negur yana dalesen.

## Aposel Idi Pol Daleyen

**2** Yar fotin ilele di, aya baban Jerusalem eselen, sain anī are Banabas ado. Aya Taituseg ale fen, meselen. <sup>2</sup> Aya Negur kurō fesiya ifelnan kilei, esel fen, biya od aya haiden atun wogō aun anī, idi faded afiyēdin. Anī ere, aya, ganan keleī sā mog, iminēyan idi sios nē uyu irouya gen ailedin anidi bun age afen, ere nigin, aya neu kabī alef ado mogo alen anī, ege ileyā nigin kumī aun. <sup>3</sup> Anī ere, Taitus ī aya weim mabodon, ī Grik tamal, anī ere, idi ī mulū ileyā nigin to nugo difiyen. <sup>4</sup> Morō are, idegēya turamā tar tunī, amā atun iminēyan disin anidi nigin fā yen, idi amā atun dimin ken, Kristus Jesus bun karika mabodon anī kofo de fen, amā lo nē kafī fiya bun diroulemāf nigin disin. <sup>5</sup> Biya od nē momoi anī, ā bun ibodōf nigin, amā idi neid od anī, sain naal bargaig to maroun.

<sup>6</sup> Idi sios bun yeneid ado anidi-idi naig be fediya are aya bun fire to ailedig, Negur ī tetenem lo fiya bunem to es fedig-tamo sios bun yeneid ado anidi neu od anī taka to tobol difen. <sup>7</sup> Age fiya ban, idi, Pita Juda idi bun biya od wogōya nē kabī ifenen gen, aya haiden bun biya od wogōya nē kabī ifanan anī dilen. <sup>8</sup> Negur ī, Pita Juda idi atun aposel kabī yalen anī bun kabī yalen gen, aya haiden atun aposel kabī alen buneg Negur kabī yalen. <sup>9</sup> Jems, Pita, Jon, idi sios nē monog tor gen dile-din anidi, idi Negur aya wau ifenēya ifanan anī dile fen, aya Banabas ado nigal maūf nigin, imamā biyalē bagu difen. Idi, amā haiden bun mele di, idi Juda anidi bun dilauf nigin, yo den. <sup>10</sup> Idi amā faimud maleg masennē-diyouf nigin dogol dirokanaman, kabī are, aya age afoug nigin kisi total aledig anī age afedig bagai.

## Pol Pita Ou Fiyen

<sup>11</sup> Sain Pita Antiok taun isi di, aya ī mala bun ou afiyen, ere nigin, ī yaor bagai kū fenen. <sup>12</sup> Jems tamo tunī

sur fedin anī fau isiya sā mog, Pita ī haiden geid saaf dō don. Anī ere, idi disi wō de di, ī haiden itorneīd fen, so fedin, ere nigin, ī idi mulū bun temeleid anidi kumī fiyeīd fen. <sup>13</sup> Juda tunī ganān, yogon mala yaleya anī dō difen, age dife di, dogo neid mala yaleya bunem, Banabaseg naab anī dō fen.

<sup>14</sup> Sain aya, idi neid tobonuneid, biya od nē momoi anī to dō dife di, ail fen, aya idi ganān meleid bun Pita arokenen, “Ō Juda tamo, anī ere, ō haiden gen ubodok, Juda tamo gen sā. Agouf are, naig fe di, haiden idi Juda neid tobonunā dō difouf nigin, nugo wiyēdif?”

<sup>15</sup> Ada Juda temelada gogū difadan, haiden mosor temelada sā. <sup>16</sup> Anī ere, ada keleī, tamo ī lo dō fiya bunem Negur mala bun madur bagai to wō yedig, anī ere, Jesus Kristus nigin momoiya bunem. Anī nigin, adag, Kristus Jesus nigin momoi taudig, are Kristus nigin momoiya bunem, lo dō fiya bunem sā, Negur mala bun madur bagai wō tauf nigin age tafedig, ere nigin, lo dō fiya bunem, aibem taka Negur mala bun madur bagai to wō youf.

<sup>17</sup> Ada, Kristus nigin momoiya bunem, Negur mala bun madur bagai wō tauf tau fen, ada dug mosor temelada anī dilouf are, Kristus ī mosor nē kabī tamouf de? Gai sā bagai! <sup>18</sup> Ere b aya daū afen anī, baban kare afouf are, aya yug, aya lo narī fiya tamo wō auf. <sup>19</sup> Lo bunem, aya lo mala bun laa fiyan, are aya Negur mala bun mata abodōf nigin age afen. <sup>20</sup> Aya Kristus ado aa tetek bun dinakesin, anī nigin, aya baban mata to abodok, anī ere, Kristus aya bun mata ibodok. Gama aya bouwau mata ibodok, are aya Negur Naal nigin momoiya bunem mata abodok, ī aya nigin wau laaf fen, aya nigin yogo luwa itoron. <sup>21</sup> Aya Negur nē wau ifenēya to tadū afouf, ere nigin, lo bunem Negur mala bun madur bagai wōya anī isiyouf are, Kristus ī ege laa fen.

### Lo Dō Fiya De, Momoiya?

**3** Galesia tamo kayau, ā neneya! Aim ā idegnein? Ā meleī bun bagai, Jesus Kristus aa tetek bun dukesin anī, yaor bagai mafelnein. <sup>2</sup> Ere b taka dogol, aya ā bun keleī you fenē: Ā lo dō fiya bunem Awa Uur walegen de, oo ereb karī gen anī nigin momoi ge di? <sup>3</sup> Ā fau neneya ufaregef de? Awa Uur bunem gariya unog fen, gama ā tamo nē total bunem udikalagau fenē de? <sup>4</sup> Ā darau fatuk bagai ege walegen de? Are momoi, ege bagai walegen de? <sup>5</sup> Negur ī, ā, lo dō fiya bunem yogon Awa Uur ifeneī di, ā atun memelik inodin de, oo ereb ā karī gen anī nigin momoi ge di?

<sup>6</sup> Abraham bun kisi gouf: “Ī Negur nigin momoi yen, age fe di, Negurem ī madur bagai fiyen.” <sup>17</sup> Anī nigin, karī gouf, idi momoi def anidi, are idi Abraham gere tar. <sup>8</sup> Negur nē Itotoya ketem, Negur ī haiden idi neid momoiya bunem madur bagai fediyouf anī ifelnadan, Negur ī, anī fau wōya sā mog, biya od anī ketem Abraham irokenen: “Teneub ganān ō bunem el fediyouf.” <sup>†††9</sup> Anī nigin, idi momoiya ado are, momoiya tamo Abraham geid el fedif.

<sup>10</sup> Idi lo dō fiya bunem dedig anidi ganān, are isisiya farumen dibodok, ere nigin, Negur nē Itotoya bun eig ye irok, “Idi ganān Lo nē Buk bun itotoya ibodok anī ganān toku to dō difouf are, isisiya farumen difaref.”

<sup>††11</sup> Taka ī lo bunem Negur mala bun madur bagai to wō youf, are yaor, ere nigin, Negur nē Itotoya eig ye irok, “Tamo madur bagai ī, momoiya bunem mata ibodōf.”

<sup>††12</sup> Lo are, momoiya bunem to ifaref, age fiya ban, Negur nē Itotoya eig ye irok, “Tamo ī enei age fedif, ī anī bunem mata ibodōf.” <sup>††13</sup> Kristus ī, ada fotokar isisiya nē wō ye fen, ada lo nē isisiya bun temelada kel yaledan, ere nigin, Negur nē Itotoya eig ye irok, “Ganān aa bun diseginnēdif, idi isisiya farumen dibodok.” <sup>††14</sup> Ī, el fiya Negurem Abraham ifenen anī, Kristus Jesus bunem, haiden bun isiyouf nigin, ada kel yaledan, are ada, momoiya bunem, Awa Uur nē promis anī talouf nigin age fen.

### Lo ado Promis Od

<sup>15</sup> Turau tar, aya tamo nē tobonunā bunem wogō auf: Tamo nē bar itenēya anīg, tamo waud iro ken, bar dite-nek anī, to dalelef be, to tobol difedig gen, eneig age fiya. <sup>16</sup> Negur ī, promis od anī, Abraham ado yogon ibor irokenēdin. Negur nē Itotoya to eig yef, “yogon ibor tar bun,” age youf are, are musei nigin, anī ere, Negur nē Itotoya, “ogon ibor bun,” <sup>†††</sup> yef, are tamo tekelei, ī Kristus nigin. <sup>17</sup> Aya wogō auf anī nē gariya, are eig fiya: 430 yar ilele di, lo wō yen anī, Negur kulu bar itenēya inon anī to we fel fen, Negur nē promis to yalelef. <sup>18</sup> Lo bunem akor anī yaleya nigin ouf are, promis bunem akor are to dalouf. Anī ere, Negur ī, yogon wau ifenēya bun promis bunem akor anī Abraham ifenen.

<sup>19</sup> Age fiyauf are, lo are ere nigin? Lo are mosor yaor fouf nigin ifenēdi di, anī ibodok ile, Abraham nē ibor ī nigin promis iron anī, wō youf bun bure falouf. Lo are, engelem, atun tamo Moses difenē di, lo anī yaor fen. <sup>20</sup> Atun tamo ī, tamo foi fiya tekelei nē dogol to ibodōdig. Anī ere, Negur ī tekelei dogol, ī yogo bagai Abraham promis anī ifenen. (Anī bun, atun tamo taka to ibodok.)

<sup>21</sup> Anī nigin, lo ado Negur nē promis kiwai youf de? Gai sā bagai! Lo ifenen anim tamo mata ifenem are, Negur mala bun madur bagai wōya are, momoi bagai, lo bunem isim. <sup>22</sup> Anī ere, Negur nē Itotoya kurō falaisi, tenebur tamo kayau ganān mosor nē kafī fiya bun difaref yef, are Negur nē promis Jesus Kristus nigin momoiya bunem ifenēf anī, idi momoi def anidi ifenēdiy-ouf nigin, Negur age fen.

<sup>23</sup> Momoiya enei isiya sā mog, ada lo nē kafī fiya bun tabodon, tabodok tele mog, momoiya anī yaoren.

<sup>24</sup> Anī nigin, lo anim ada ulum iroukanada di, Kristus wagen tele di, ī ada momoiya bunem Negur mala bun madur bagai fadauf nigin, inon. <sup>25</sup> Gama momoiya mogo isin nigin, ada gama baban lo farumen to tabodok.

† *Jenesis 15:6* †† *Jenesis 12:3; 18:18; 22:18*

‡ *Diuteronomi 27:26* †† *Habakuk 2:4* ††† *Levitikas 18:5*  
††† *Diuteronomi 21:23* †††† *Jenesis 12:7; 13:15; 24:7*

### Negur Gere Tar

<sup>26</sup> Ā ganan, Kristus Jesus nigin momoiya bunem, Negur gere tar ubodōgef, <sup>27</sup> ere nigin, ā Kristus bun naan walegen ganan, are mogo Kristus ufonūgen. <sup>28</sup> Ā gama, Juda tamo be Grik tamo, ferfer be kafī fiya sā, monog be gober to ufaregef, ere nigin, Kristus Jesus bun ā ganan tekelei ufaregef. <sup>29</sup> Ā Kristus nē ufaragauf are, ā Abraham gere tar, anī nigin, in promis bunem yogon akor anī walogouf.

**4** Aya eig au wogō auf, kesu monog tama fotokar ī fau simōf are, are ī tama nē akor ganan yaloufeg, ī fau ferfer gen ibodok. <sup>2</sup> Ī fau simō ibod mog, ī idi kulatun fiya tamo ado idi lo fiya tamo farumen ibodō di, idi yogon kabī nigin lo difef, ile, tama sain ifenek anī bun didikalauf. <sup>3</sup> Age fiya gen, adag Kristus fau isiya sā mog, simō bun, tenebur nē uur sesen farumen, ferfer gen kafī fiya bun tabodon. <sup>4</sup> Anī ere, yogon sain bagai wō ye di, Negur yogo Naal sur fe di, kayau bunem wō yen, lo farumen wō yen, <sup>5</sup> are idi lo farumen difaref anidi kel gei fediyouf nigin, age fe di, ada Negur gere tar ya bagai anī talouf nigin age fen. <sup>6</sup> Ā Negur gere tar nigin, Negur ī yogo Naal nē Awa Uur, ada wauda bun sur fe di, Awa Uurem iweig irōdig, “Abba, † Dei.” <sup>7</sup> Anī nigin, ō baban ferfer sā, ō in kesu. Ō in kesu ubodok nigin, Negur ī ōg yogon akor walouf nigin ineyon.

### Pol Galesia Sios Nigin Osi Yen

<sup>8</sup> Uruwa bun, ā Negur keleī sa ken, ā idi waitou bagai sā anī farumen ferfer ubodōgen. <sup>9</sup> Anī ere, gama ā Negur keleī, oo Negur ā nigin keleī youf auf are deuf, naig fe di, ā falei weleg fen, feseya ado maleg nē ifelnēya bun ulegef? Ā baban idim ferfer dineneif nigin oroyeik de? <sup>10</sup> Ā naa tunī, ogō tunī, saneya tunī ado, yar tunī anī bun, anī nē lo dōg fen, āgenei kisi unogedig! <sup>11</sup> Aya ā nigin kumī auf, are aya ā nigin ege be kabī alen.

<sup>12</sup> Turau tar, aya ā agoneik, aya gen wowāg, ere nigin, ayag ā gen wō aun. Ā aya bun ereb sane taka to ago gen. <sup>13</sup> Ā keleī, are aya dagi nigin, aya ā bun urug bagai biya od wogō ayein. <sup>14</sup> Neu dagi are ā morō ifenein, anī ere, ā aya to meleī irim wiyag fen, soso wiyagen. Age fiya ban, ā, aya Negur nē engel gen, Kristus Jesus yogo bagai gen, waleyagen. <sup>15</sup> Āgenei wauī kulīya ganan gama nain ibodok? Āgenei meleī kusuf yale, aya ifanaya nigin kisi feleyam are, ā kusug waleg aya wanagem, aya agef kurō feis irokeneīya nigin kisi feleya. <sup>16</sup> Aya age a momoi arokeneik bunem, āgenei kiwai wō auf de?

<sup>17</sup> Tamo anidi are ā gei diyēif nigin kabī total daledig, anī ere, biya nigin sā. Idi ā ama bun tamal dalelneif nigin orodif, are ā idi nigin kabī total walogouf nigin age difef. <sup>18</sup> Erebiya nigin kabī total yaleya, are biya, sain aya ā geid tabodok bun dogol sā, wededem ago gouf, are biya. <sup>19</sup> Neu kesu tar, aya ā nigin baban darau kesu gō fiya nigin gen alef ele, Kristus ā namein kare foug.

† Anī nē gariya, Aram od nem, Dei.

<sup>20</sup> Aya ā geid gama tabod ken, aya neu ailō falei afouf nigin aya wau adok irok, ere nigin, aya ā nigin nene auf!

### Hagar Sara Ado

<sup>21</sup> Aya urokanag, ā lo farumen ibodōya oroyeik, ā lo irok anī to keleī de? <sup>22</sup> Negur nē Itotoya bun irok, Abraham ī kesu uru ado, taka ferfer kayau bunem wō yen, agef fen, taka kafī fiya sā kayau bunem wō yen. <sup>23</sup> Yogon kesu ferfer kayau bunem wō yen are, tamo nē tobonunā bunem gō fen. Age fe di, yogon kesu kafī fiya sā kayau bunem wō yen are, promis od anī dōf fen, wō yen.

<sup>24</sup> Enei are yaab od gen tailauf: Kayau are, bar itenēya uru nigin. Bar itenēya taka are, Sinai Arei bun tamal anī kesu gogū fen, are ferfer wowā douf nigin. Are Hagar. <sup>25</sup> Hagar are Sinai Arei Arabia teneub bun ibodok anī nigin, takag, falei fel Jerusalem taun gama ibodok anī, ere nigin, ī yogon gere tar geid idi ferfer dibodok. <sup>26</sup> Anī ere, Jerusalem ilun ibodok, are kafī fiya sā. Agef fen, ī neda sinada. <sup>27</sup> Are Negur nē Itotoya eig ye irok:

“O kayau dali, ō kesu to gogū wodig, waū al fe.

Ō kesu gō fiya nē darau to walef, uweig fen, fatuk kaī wouf,

ere nigin, kayau dali nē kesu are musei biya fen, kayau tamo ado nē kesu wal fiya.” ††

<sup>28</sup> Turau tar, ā, Isak gen, promis nē gere tar. <sup>29</sup> Anī ere, sain anī bun, kesu tamo nē tobonunā bunem gō fen are, kesu Awa Uur nē megeir bunem gō fen anī darau ifenen. Gamag agef yenek. <sup>30</sup> Anī ere, Negur nē Itotoya ere yef? “Ferfer kayau ado yogon kesu uru uraileid, ere nigin, ferfer kayau nē kesu ī, kafī fiya sā kayau nē kesu akor anī to foi fenēf.” ††† Anī nigin, turau tar, ada ferfer kayau gere tar sā, kafī fiya sā kayau nē gere tar.

### Kristus Bun Kafī Fiya Sā Ibodōya

**5** Ada karika tabodōf nigin, Kristus ī ada kafī fiya bun tamal yalelnadan. Anī nigin, megeir ufareg fen, baban ferfer nē kafī fiya farumen to ubodōg.

<sup>2</sup> Karī weleg! Aya Pol, ā arokeneik, ā mulū bun ulalagauf are, Kristus ī, ā bun kabī sā bagai youf. <sup>3</sup> Tamo ganan mulū bun dilef are, aya baban arokenēdif, idi lo ganan bagai dō difouf. <sup>4</sup> Ā lo bunem Negur mala bun madur bagai wō gouf nigin ago gef, ā Kristus bun tamal fara yein. Ā wau ifenēya utorōg fen, uyagen. <sup>5</sup> Anī ere, ada momoi tau fen, Awa Uur bunem madur bagai wō tauf nigin, wauda ise fen, total bagai tari tafef. <sup>6</sup> Ere nigin, taka ī Kristus Jesus bun ibodok are, mulū ileyā be, mulū ileyā sā, anī ganan ege. Erebiya odug bagai are, momoiya, wau laa fiya bunem kabī yalef anī dogol.

<sup>7</sup> Ā meli bagai gududu gen. Aim anī ā momoi anī dō fiya nigin naabureī gudū fen? <sup>8</sup> Weder te yabiya od age fiya, are ī ā iweigneik anī bunem to isif. <sup>9</sup> “Yis naal ba-

†† Asaia 54:1 ‡ Jenesis 21:10

gai anim bret ganan gē yedig.”<sup>10</sup> Aya Odug bun ā nigin momoi auf, are ā kisi fire to walogouf. Aib ī ā ne-neya bun irailyeik are, mala solo sane yalouf. <sup>11</sup> Turau tar, aya mulū ileya nigin fau wogō auf are, ere nigin aya fau darau difanaf? Aya age afem are, Kristus nē aa tetek, are tamo yeid tū fiya nē meein to ibodom. <sup>12</sup> Idi ā wauī tū fiya difeneik anidi, idi dile, dogo bouweid gudū difouf nigin, aya wau irok.

<sup>13</sup> Neu turau tar, ā kafī fiya sā ufaragauf nigin iweignein. Anī ere, āgenei kafī fiya sā anī bunem, bouwa nē oroya to dō gouf, age fiya ban, wauī laa fiya bunem, abob aruna walogouf. <sup>14</sup> Lo ganan are lo tekelei bun bagu felef: “Ō ogo nigin wauī laa fef gen, nē tā nigin wauī laa fouf.”<sup>15</sup> Ā atun monēg fen, waila kaka gouf are, ā abob daū wiyēgouf nigin, lo walagauf.

### Awa Uur Bunem Ubodōgouf

<sup>16</sup> Anī nigin, aya orok, Awa Uur bunem ubodōgouf, ago gouf are, ā bouwa nē oroya to dō gouf. <sup>17</sup> Ere nigin, bouwa nē oroya ī, Awa Uur nē oroya anī to orodig, age fe di, Awa Uur ī, bouwa nē oroya to orodig. Idi urom abob kiwai difenēdig, are ā ereb oroyeik anī to ago gouf nigin age difedig. <sup>18</sup> Anī ere, ā Awa Uurem ulum iroukeneif are, ā lo farumen to ubodōgef.

<sup>19</sup> Bouwa nē oroya nē tobonunā are yaor: noli tobonunā, amuyē ado, bouwa nē oroya nigin total sane wau fāya; <sup>20</sup> idegēya waitou yana yaleseya ado idegēya kosēya; abob kiwai ifenēya, kusīya, kiyeī inoya, seyeya, aya dogol yeya, fara fiya, foi fiya ado, <sup>21</sup> name nameya, aai naanueiya, bilāya ado, tobonunā age fiya anī ganan. Aya ā kulu arokenein gen, gama total bagai arokeneik, idi age de difaref anidi, Negur nē tano to dalouf.

<sup>22</sup> Anī ere, Awa Uur nē faat are, wau laa fiya, wau kulīya, wau inosiya, wau yukeleya, wau ifenēya, tobonunā biya, dō fiya biya, <sup>23</sup> molol ado yogon bouwa tobonunā biya bun kulatun fiya. Lo takam enei ganan to katī felef. <sup>24</sup> Aib idi Kristus Jesus nē dibodok, mogo mosor nē bouwa anī, yogon mala ile oroya ado bouwa nē oroya geid, aa tetek bun dukesin. <sup>25</sup> Ada Awa Uur bunem tabodok nigin, ada Awa Uur bunemeg tayōf. <sup>26</sup> Ada yanada to talesauf, to seye talesauf, age ta feneg, abob nigin kiyeī to tanouf.

### Ganan Bun Biya Ago Gouf

**6** Turau tar, taka mosor ino mog ulogouf are, Awa Uur bun ufaregef ā, ī molol nem madur wiyēgouf.

† Levitikas 19:18

Anī ere, āg kisi fiya bun to ulagauf nigin, ā aug nigin lo walagauf. <sup>2</sup> Abob nē morō faali ge, agog fen, naab anī bunem, Kristus nē lo anī ā bun kisi falauf. <sup>3</sup> Taka ī aya odug ye fen, ī yana sā ege ibodōf are, ī yogo idegnek. <sup>4</sup> Tamo mugu mugu yogon kabī anī es fouf. Agef fen, ī yogo nigin dogol yogon yana yales fen, taka yogo ad nigin to es fouf. <sup>5</sup> Ere nigin, mugu mugu yogon morō anī faali fouf.

<sup>6</sup> Taka ī Negur nē od nigin keleī yalef, ī ereb ereb biya anī ganan, yogon tise ado foi difouf.

<sup>7</sup> Takam to idegneif: Takam Negur iseilnēya kisi feleya sā. Tamo ī ereb itenek de anī yaledig. <sup>8</sup> Taka ī yogo bouwa nē oroya dō fiya nigin itenek, ī bouwa nē oroya bunem daū fiya yalouf. Taka ī Awa Uur dō fiya nigin itenek, ī Awa Uur bunem mata ibodkeleya anī yalouf. <sup>9</sup> Ada ereb biya age fiya nigin wanda to folo rouf, ere nigin, ada to fese tauf are, ada tatenek anī, yogon sain bun bagai talouf. <sup>10</sup> Anī nigin, ada anī age fiya nigin naab wō youf are, ada, tamo kayau ganan bun biya age tag, are idi momoia nē ibor dibodok anidi bun bagai.

### Mulū Bun Ileya Sā, Anī Ere, Mata Wōya

<sup>11</sup> Aya imaum bagai od nē ereb gegē odug atotkenein anī uleg.

<sup>12</sup> Idi mayarē lo tafef anī bunem biya difamāf def anidim, ā mulū ileya nigin total bagai dirokeneik. Idi enei age difef are, idi Kristus nē aa tetek bunem darau yaleya ditor ken nigin dogol, age difef. <sup>13</sup> Idi mulū dilen anidig lo to dō difedig, anī ere, idi āgenei bouweī bunem yeneid dalesauf nigin ā mulū ileya nigin orodif.

<sup>14</sup> Aya yug nigin to bagai yanau alesauf, neda Odug Jesus Kristus nē aa tetek nigin dogol. Aa tetek bunem, teneub enei nē oroya, aya bun laa fen, age fe di, ayag neu oroya, teneub enei nē oroya bun laa fiyan. <sup>15</sup> Mulū ileya, mulū ileya sā be, are ganan ege. Safina odug are, mata wōya. <sup>16</sup> Wau inosiya ado wau yūya, idi od enei mogo wogō aul anī dō difef anidi ganan bun isiyouf, Negur nē Israel tamo kayau buneg isiyouf.

<sup>17</sup> Sain enei bunem ilauf ganan bun, taka nem morō to ifanauf, ere nigin, aya bouwau bun Jesus nē uris ibodok.

<sup>18</sup> Turau tar, neda Odug Jesus Kristus nē wau ifenēya āgenei uur bun ibodōf. Momoi.

# EFESUS

**1** Aya Pol, Negur nē oroya bunem, Kristus Jesus nē aposel wō aun,

Efesus Negur nē tamo kayau, Kristus Jesus el de dō difedig anidi bun, pas enei atotof.

<sup>2</sup> Negur neda Tamada ado Odug Jesus Kristus neid wau ifenēya ado wau inosiya, ā bun ibodōf.

## Kristus Bunem Uur Nē El Fiya Ifanadan

<sup>3</sup> Ada, neda Odug Jesus Kristus nē Tama Negur, ī ya-na talesauf, ī uur nē el fiya Kristus bun saa ilun dibodok anī ganan bunem el fadan. <sup>4</sup> Negur ī saa teneub ado kare fiya sā mog, ada yogon mala bun, fateul ado amuyē sā tabodōf nigin, Jesus bun igirnadan. <sup>5</sup> Wau laa fiya bun, Negur ī yogon wau kulīya ado oroya kilei, Jesus Kristus bunem, ada yaleda fen, Negur nē gere tar wowā tauf nigin, mogo igirnadan. <sup>6</sup> Anī nigin, Negur nē wau ifenēya, are Jesus Negurem ī nigin wau laa fedig anī bun, ege luwa ifanadan anī nē fula fiya medeīya nigin, Negur yana talesauf. <sup>7</sup> Jesus bun, ada, yogon naud bunem kel yaleya, mosor nigin weder tu keleya anī, Negur nē wau ifenēya barikā bunem, talen. <sup>8</sup> Negur ī yogon wau ifenēya bunem, kisi biya ado kisi fokōya ganan, ada bun foula fen. <sup>9</sup> Agef fen, ī yogon oroya nē waa anī ifelnadan, are yogon wau kulīya nē kisi Kristus bun kisi fen kilei, <sup>10</sup> yogon sain anī kisi fel wō youf bun kabī yalouf, sain anī bun, Negur ī saa teneub ado bun ereb ereb ganan dibodok anī, mudur tekelei, Kristus farumen gurif iroulauf.

<sup>11</sup> Negur ī yogon oroya dōf fen, ereb ereb ganan age fedig, ī yogon kisi dōf fen, ada mogo igirnadan, age fe di, adag Kristus bun yogon akor talen, <sup>12</sup> are ada uyulil Kristus bun wauda iseya talen anī, Negur nē fula fiya medeīya yana talesauf nigin age fen. <sup>13</sup> Ā momoi anī nē od, āgenei kel yaleya nē biya od anī karī ge fen, āg Kristus bun ubodōgen. Ā Kristus nigin momoi ge di, Negur ā bun uris, are Awa Uur Fateul Negur afeneīf yen anī inon. <sup>14</sup> Negur ī, idi Negur nē anidi kel yaleya fau wōya sā mog, ada neda akor momoi bagai talouf nigin megeir fe fen, Awa Uur Fateul iben, are ada yogon fula fiya medeīya yana talesauf nigin age fen.

## De Fiyēya Ado Kosēya

<sup>15</sup> Age fiya nigin, aya Odug Jesus nigin āgenei momoiya ado, Negur nē tamo kayau ganan nigin āgenei wauī laa fiya anī karī au fen, <sup>16</sup> aya ā nigin Negur de fiyēya to folō afelen. Aya neu kosēya bun ā nigin karī aul fen, <sup>17</sup> neda Odug Jesus Kristus nē Negur, Tamada fula fiya medeīya barikā, ī, ā ī nigin keleī bagai youf ni-

gin, kisi biya ado kurō fesiya nē Awa Uur ifeneīf nigin, kosē audig. <sup>18</sup> Aya āgenei wauī nē meleī fokō fouf nigineg kosē audig, are ā, wau iseya ī anī bun iweignein, yogon fula fiya medeīya barikā nē akor Negur nē tamo kayau bun ibodok anī ado, <sup>19</sup> yogon megeir barikā momoi tauf ada bun kabī yalef anī, keleī youf nigin, age afedig. Megeir are, yogon total barikā anim kabī yalef gen, <sup>20</sup> megeir de tekelei anim Kristus bun kabī yalef fen, ī laa bun tamal kel turī fiye ken, saa ilun Negur ima biyalē inenen. <sup>21</sup> Negur ī, Kristus, uyu irouya ganan, yeneid adodo ganan, megeir ganan, odudug ganan ado, yeneid sain enei bun ado sain fau isiyouf buneg ifenēdiyof ani ganan wal fiya bun inenen. <sup>22</sup> Agef fen, Negur ī, ereb ereb ganan Kristus ye farumen gō fel fen, ī sios nigin ereb ereb ganan neid mudur ibodōf nigin igirnen. <sup>23</sup> Sios are, yogon bouwa, ī naab ganan bunem ereb ereb ganan kisi feledig anī nē kisi feleya.

## Kristus Bun Mata Tabodok

**2** Ā kulu āgenei kū fenēya ado mosor bun gare gen. <sup>2</sup> Sain anī bun, ā teneub enei nē naab ado, owōbē tano nē mudur, are uur idi dō fiya sā anidi bun gama kabī yalef anī nē naab dō gen. <sup>3</sup> Idi atun ada gananeg, uruwa bun bouwada nē oroya anī dō tafe fen, yogon oroya ado kisi dō tafen. Ada, tamo tunī ganan idi gogū difedin gen, adag age de gogū difadan bunem, Negur nē didi farumen tabodon. <sup>4</sup> Anī ere, ada nigin yogon wau laa fiya odug bunem, Negur wau yūya barikā, <sup>5</sup> ī, ada kū fenēya bun gare taun sain buneg, ada Kristus geid turī fadan. Are wau ifenēya bunem, ā kel yaleyein. <sup>6</sup> Agef fen, Negur ī, ada Kristus geid kel turī fada fen, Kristus Jesus bun ada ī geid saa ilun tabodōf nigin inenadan, <sup>7</sup> are, fau isiyouf sain bun, ī yogon biya fiya Kristus Jesus bun ifanadan anī bunem, yogon wau ifenēya barikā ifelnēdiyof nigin age fen. <sup>8</sup> Wau ifenēya bunem, ā momoiya bunem kel yaleyein, are aug bunem sā, Negur nē ege luwa ifenein, <sup>9</sup> are kabī bunem sā, anī nigin, taka nem to yana yalesauf. <sup>10</sup> Ada Negur nē imaba, kabī biya talouf nigin Kristus Jesus bun ada kare fadan, kabī biya are Negur ada age tafouf nigin uruwa bun mogo dodok fanadan.

## Kristus Bun Ada Tekelei

<sup>11</sup> Anī nigin, uruwa bun, ā gō diyein bunem haiden ubodōge di, idi mulū dilen anidim (are tamo bouwa bun tamo imedim age difen) ā mulū ileya sā diyein anī karī weleg. <sup>12</sup> Sain anī bun, ā Kristus nigin gerō ufarengen, ā Israel buneg yeneī sā, promis nē bar itenēya

buneg ã yaũ, tenebur ein wau iseya sã, Negur nigin keleĩ sã ubodõgen anĩ karĩ weleg. <sup>13</sup> Anĩ ere, gama ã uruwa gerõ ufaregen anĩ, Kristus Jesus bun, Kristus nẽ naud bunem, Negur non guri yeĩ ırousiyein.

<sup>14</sup> Ere nigin, Kristus yogo ĩ neda maror, uru anĩ yale, tekelei inon, agef fen, kiwai fara fiya nẽ garaĩ anĩ narĩ fen. <sup>15</sup> ĩ yogo bouwa bunem lo, ĩtãfiya ado, nun anĩ yaleledin. ĩ yogo bun tamo uru anĩ bunem, tamo mata tekelei ino fen, maror inouf nigin age fen. <sup>16</sup> ĩ bouwa tekelei enei bun, idi uruwom aa tetek bunem Negur bun komo fediyouf nigin agef fen, ĩ aa tetek bunem dogo neid kiwai yukesin. <sup>17</sup> ĩ isi fen, ã haiden gerõ ufaregen bun maror nigin wogõ yei ken, idi Juda temeleid non difaren anidi buneg, maror nigin wogõ fiyẽdin. <sup>18</sup> ĩ bunem, ada uruwom Awa Uur tekelei bunem, Tamada wagen ileyã kisi feleya.

<sup>19</sup> Anĩ nigin, ã yaũ tamo ado tamo urug sã, anĩ ere, Negur nẽ tamo kayau geid tekelei fen, Negur nẽ ibor tar. <sup>20</sup> ã, aposel ado profet fõ gariya dinon anĩ teten fõ gen inoyein, are Kristus Jesus yogo ĩ monog tor gen. <sup>21</sup> Kristus bun, fõ ganan katõ fel fen, Odug bun tempel fateul wõ youf nigin fã yef. <sup>22</sup> Kristus bun, ãg, mata ibodõya nẽ modoũ Negur yogon Awa Uur bunem ibodõf nẽ anĩ wõ gouf nigin, weim inoyeik.

### Pol Haiden Bun Biya Od Wogõya Tamo

**3** Age fiya nigin, aya Pol, haiden ã nigin, Kristus Jesus nẽ kabĩ nigin au fen, kalabus bun abodok. <sup>2</sup> Momoi bagai, Negur nẽ wau ifenẽya ã nigin aya ifanan anĩ, naig fe kabĩ yalen are, ã karĩ gen. <sup>3</sup> Are waa Negurem kurõ fesiya bunem aya ifelnan, are aya mogo tobega bagai atoton gen. <sup>4</sup> ã enei uweseg fen, Kristus nẽ waa nigin aya wederou fokõ felen anĩ, keleĩ youf. <sup>5</sup> Are Awa Uurem Negur nẽ fateul aposel ado profet bun gama kurõ fesin gen, sain mogo ilelen anĩ nẽ tamo kayau bun tamo idi to agef ifelnẽdin. <sup>6</sup> Waa are, biya od bunem, haiden idi Israel geid Negur nẽ akor dalouf, idi ganan bouwa tekelei nẽ bagu fiya dibodõf, agef fen, Kristus Jesus bun promis nẽ akor anĩ weim dalouf. <sup>7</sup> Negur nẽ megeir kabĩ yale di, aya Negur nẽ wau ifenẽya ege luwa ifanan anĩ bunem, biya od enei nẽ kabĩ tamo wõ aun. <sup>8</sup> Negur nẽ tamo kayau ganan atun, tamo naal farumen aya gai naal bagai anĩ, wau ifenẽya enei aya ifanan, are Kristus nẽ kisi feleya, are imir ken, ileyã kisi feleya sã anĩ, haiden bun wogõ auf nigin ado, <sup>9</sup> waa enei, kulu isin ganan Negur ereb ereb ganan kare fen anĩ bun iminẽyan ibodon anĩ, naig fe kabĩ yalef anĩ, tamo kayau ganan bun yaor afouf nigin ifanan. <sup>10</sup> Negur nẽ kisi are, gama sios bunem, Negur nẽ kisi biya fire fire, saa ilun uyu ıroudiya ado yeneid adodo ifelnẽdiyof, <sup>11</sup> are Negur ĩ, yogon mata ibodkeleya nẽ oroya, neda Odug Kristus Jesus bun kisif bure felen anĩ kilei, age fen. <sup>12</sup> Kristus bun, ada Kristus nigin momoia bunem, karika ado kumĩ sã, Negur wagen ileyã kisi feleya. <sup>13</sup> Anĩ nigin, aya ã arokeneik, aya ã nigin darau alef ge fen, to felu gouf, darau are ã fula fiya medeıya ifeneıya nigin.

### Efesus Sios Nigin Kosẽya

<sup>14</sup> Gariya enei nigin, Dei ĩ bunem, yogon ibor ganan saa ilun ado tenebur ein dibodok, <sup>15</sup> dogo neid yeneid yaledig, aya ĩ wagen iborou bobou afef. <sup>16</sup> Aya kosẽ auf, ĩ yogon fula fiya medeıya kisi feleya bunem, yogon Awa Uur bunem megeir ã namein ife fen, megeir yeif nigin, <sup>17</sup> are Kristus ĩ momoia bunem ãgenei wauĩ bun ibodõf nigin. Age afe fen, aya kosẽ auf, ã warumutei ado gariya, wau laa fiya bun utenẽg fen, <sup>18</sup> ã Negur nẽ tamo kayau ganan geid, Kristus nẽ wau laa fiya anĩ, odug naig be fiya, meluk, ilun ado, namen naig be fiya anĩ ulogouf nigin megeir walogouf, <sup>19</sup> agog fen, wau laa fiya enei, keleĩ ganan wal fiya anĩ keleĩ youf, anĩ bunem, Negur nẽ kisi feleya ganan ã bun kisi falauf nigin kosẽ auf.

<sup>20</sup> ĩ gama yogon megeir ada namedan kabĩ yalef anĩ bunem, ereb ada to tafef be, kisi tafef anĩ ganan wal fiya, age fiya kisi feleya, <sup>21</sup> sios bun ado Kristus Jesus bun, fula fiya medeıya, ibor ganan gai gai ibodok ilauf bun, ĩ bun ibodõf! Momoi.

### Kristus Bouwa Bun Bagu Fiya

**4** Aya Kristus nigin kalabus bun abod ken, iweigya ã walegen kilei, mata ubodõgouf nigin total bagai arokeneik. <sup>2</sup> ã wauĩ adok ukalaisileg fen, molol bagai ubodõgouf. ã to feseg, wauĩ laa fiya bun abob nẽ morõ uteıgouf. <sup>3</sup> Awa Uur maror bunem bagu yein anĩ uroug kafĩ walagouf nigin, kabĩ total waleg. <sup>4</sup> Sain ã iweignein, ã wau iseya tekelei bun iweignein, age fiya gen, bouwa tekelei, Awa Uur tekelei, <sup>5</sup> Odug tekelei, momoia tekelei, naan igũya tekelei, <sup>6</sup> Negur tekelei, ĩ ganan neid Temeid, ĩ ganan wal fiya, ĩ ganan atun, ĩ ganan namen ibodok.

<sup>7</sup> Anĩ ere, ada mugu mugu wau ifenẽya, Kristus ege luwa ifenẽya nigin kisi fen kilei, ifanadan. <sup>8</sup> Negur nẽ Itotoya anĩ nigin eig ye irok,

“ĩ ilun iselen sain,

ĩ tamo musei geif ırou iselen,

agef fen, ĩ tamo ege luwa ifenẽdin.” †

<sup>9</sup> (“ĩ ilun iselen” ya nẽ gariya are ere? Anĩ nẽ gariya are, ĩ tenebur farumen bagai buneg isilen. <sup>10</sup> ĩ isilen are, ĩ anĩ saa ilun ganan wal fiya iselen, are owõ ganan inolauf nigin age fen.) <sup>11</sup> Inim anĩ, tunĩ aposel kabĩ, tunĩ profet kabĩ, tunĩ soosi kabĩ, tunĩ pastor kabĩ ado tise kabĩ ifenẽdin, <sup>12</sup> are Negur nẽ tamo kayau, aruna yaleyã kabĩ dalouf nigin dodok fedi di, Kristus nẽ bouwa odugouf nigin age fen. <sup>13</sup> Agef ile ile, ada ganan, momoia tekelei ado Negur Naal nigin keleĩ tekelei bun tasi fen, tamo kisi feleya bagai wõ tau fen, Kristus nẽ kisi feleya bagai bun talauf.

<sup>14</sup> Age tafouf, ada baban momou gen to tabodõf, maaĩ moloun wıya gen to age ta fen, tai fiya ganan, tamo neid beugya ado, idegẽya tamo neid kisi anidim, yaum fũ fe di, aarau ilef isif fedig gen, to wewu fadauf. <sup>15</sup> Age fiya ban, ada wau laa fiya bun momoi anĩ wogõ

† Sam 68:18

tau fen, ereb ereb ganan bun Mudur ibodok bun biya daf iselauf, Mudur are Kristus. <sup>16</sup> Ī bunem, dirumunā ganan bouwa isenne ken, katokitī fe, bagu fele di, bouwa nē fara fiya mugu mugu yogon kabī yalef bunem, bouwa adok odug fen, wau laa fiya bun yogo inof.

### Lalan Nē Gere Tar Gen Tabodōf

<sup>17</sup> Anī nigin, aya enei Odug bun total bagai aroke-neik, ā baban, haiden idi difaredig gen, kisi sã gen to ufaragauf. <sup>18</sup> Idi neid kisi gugum kel fen, Negur nē ma-ta bun ibodōya ditoron, ere nigin, idi wedereid to fokō ye fen, waud totolen. <sup>19</sup> Idi es fiya kisi ganan ditor ken, idi dogo bouweid adok sane bun difen ken, ereb ereb sane ganan, dogo nigin dogol, es fiya sã age difedig.

<sup>20</sup> Anī ere, ā Kristus nigin naab anī bunem to kelein. <sup>21</sup> Momoi bagai, ā ĩ nigin karī gen ado, ĩ bun difelnein, are momoi Jesus bun ibodok anī kilei. <sup>22</sup> Ā uruwa ubodōgen, āgenei oroya tubu, yogon idegēya oroya bunem sane len anī, utorōg fen, <sup>23</sup> āgenei kisi nē to-bonunā bun mata wōg fen, <sup>24</sup> oroya mata, madur ba-gai ado momoi nē fateul bun Negur gen inon anī, ufonūgouf nigin difelnein.

<sup>25</sup> Anī nigin, ā mugu mugu idegēya utorōg fen, ā neī tā momoi nem urokenēgouf, ere nigin, ada ganan bouwa tekelei nē tunī. <sup>26</sup> “Āgenei seyeya bun, mosor to unog.” † Ā wauī bun to seye yef ile, gaa kuru kalauf. <sup>27</sup> Agog fen, ā Satan nē modoū taka to utoumkenē-gouf. <sup>28</sup> Aib ĩ bē ilenouf, baban to bē ilauf, anī ere, yogo imam ereb biya nigin kabī yale di, ĩ lau difef anidi ifenēdiya nigin safina adouf.

<sup>29</sup> Āgenei eweī bun od sesen to wō youf, anī ere, idi lau difef anidi fã de dalouf nigin isennēya od anī dogol urōge di, idi karī def are isennēdiyof. <sup>30</sup> Negur nē Awa Uur Fateul to wau morō wenēg, ĩ bunem kel yaleya nē naa nigin uris ā bun inon. <sup>31</sup> Ereb ereb dirikeī ganan, didi fatuk iseya, seyeya, gurūya, dumen od irōya ado, ereb ereb sane ganan utorōg. <sup>32</sup> Abob el wiyēg fen, abob nigin wauī yu ken, Negur ĩ Kristus bun āgenei mosor nigin weder tu kelen gen, abob nē mosor nigin wedereī tu kalauf.

**5** Anī nigin, ā Negur gere tar oboi nigin, ĩ gen bagai ago gouf. <sup>2</sup> Kristus ada nigin wau laaf fen, ada nigin yogo bouwa ofa ado sesewi fiya sumeī biya gen Negur ifenen gen, wauī laa fiya bun agog ubodōgouf.

<sup>3</sup> Anī ere, ā atun, naal bagai noli tobonunā be, ereb amuyē ado taka be, safina musei youf nigin ima su lai fe fen sū we fiya taka to ibodōf, ere nigin, eneidi are Negur nē fateul tamo kayau bun to biya. <sup>4</sup> Takag, od sesen, neneya od be, od sane nem weli to unogouf, are ada nigin to biya, anī ere, de fiyēya od wogō gouf. <sup>5</sup> Ere nigin, ā momoi bagai enei keleī: Tamo noli to-bonunā ado, amuyē ado be, safina musei youf nigin ima su lai fe fen sū we fiya (tamo age fiya are idegēya waitou yana yaleseya tamo), ĩ Kristus ado Negur nē tano bun akor to yalouf. <sup>6</sup> To lo ge di, taka nem od egem idegneīf, ere nigin, age fediya bunem Negur nē didi,

† Sam 4:4

idi nokū difef anidi bun isidig. <sup>7</sup> Anī nigin, idi geid to niganal ūgouf.

<sup>8</sup> Ere nigin, ā uruwa bun gugum, anī ere, gama Odug bun ā lalan. Lalan nē gere tar gen agog ufareg. <sup>9</sup> Ere nigin, lalan nē faat are, biya fiya, madur bagai ado, momoi anī ganan bun ibodok. <sup>10</sup> Agog fen, ereb Odug wau al fouf anī keleī youf. <sup>11</sup> Ereb gugum bun tamal to-bonunā faat biya sã anī geid to niganal ūgouf, anī ere, yaor wedigouf. <sup>12</sup> Ere nigin, ereb fe temeleid iminēyan age difedig anī nigin irōya, areg mama ado. <sup>13</sup> Anī ere, ereb ereb ganan lalan bun yaor fef, are yaoredig, <sup>14</sup> ere nigin, lalan anim age fe di, ereb ereb ganan yaoredig. Enei nigin wogōya eig yef,

“Fã wale, mulaī tamal,  
laa bun tamal fã wo,  
ago di, Kristus ō bun fula fouf.” ††

<sup>15</sup> Anī nigin, āgenei ibodōya nigin el ge lo walagauf. Kisi sã gen to ufaragauf, anī ere, kisi biya ado gen ufaragauf. <sup>16</sup> Naa biya ā nigin wō youf ganan to sekil gouf, ere nigin, naa are sane. <sup>17</sup> Anī nigin, to neneg, anī ere, Odug nē oroya naig fiya anī ā keleī youf. <sup>18</sup> Ā wain musei to wō ge di, meleī wāī youf, are bouwa nē oroya nigin total sane wau fãya bun irouleyeīf. Age fiya ban, Awa Uurem nameī isokosauf. <sup>19</sup> Od Negur nē Itotoya Sam bun ibodok, Negur yana yaleseya seg ado, uur nē seg bunem abob wogō wiyēgouf. Āgenei wauī bun Odug bun seg waleg fen, kakū gouf. <sup>20</sup> Sain ganan bun, Negur Tamada ereb ereb ganan nigin, neda Odug Jesus Kristus yana bun de wiyēgouf.

<sup>21</sup> Kristus anini wiyēg fen, abob farumen ubodōg.

### Tamo Aiwa Ado Kayau Aiwa

<sup>22</sup> Kayau, ā Odug farumen ubodōgedig gen, aiweī tar farumen ubodōgouf. <sup>23</sup> Ere nigin, Kristus ĩ, sios nē mudur ibodok gen, tamo ĩ kayau nē mudur ibodok, agef fen, Kristus ĩ sios, yogon bouwa nē kel yaleya tamo. <sup>24</sup> Sios Kristus farumen ibodok gen, kayau idig ereb ereb ganan bun, dogo neid aiweid tar farumen dibodōf.

<sup>25</sup> Tamo, Kristus sios nigin wau laaf fen, yogo bouwa ĩ nigin ifenen gen, aiweī tar nigin wauī laa fouf.

<sup>26</sup> Kristus ĩ anī age fen, are sios fateul ibodōf nigin od bunem naan nem fili youf nigin kulof fen, <sup>27</sup> are sios medeīya bagai, diri sã, ifokoīya be, ereb age fiya taka sã, anī ere, fateul fen bouwa od sã, yogo bun iroulauf nigin age fen. <sup>28</sup> Age fiya bagai, tamo dogo bouweid nigin waud laa fedig gen, aiweid tar nigin agef waud laa fouf. Aib ĩ aiwa nigin wau laa fef, are yogo nigin wau laa fef. <sup>29</sup> Aibem taka yogo bouwa to sane fiyēdig, anī ere, ĩ ifout ken, kulatun fedig, Kristus sios nigin age fedig gen, <sup>30</sup> ere nigin, ada yogon bouwa nē tunī. <sup>31</sup> Are Negur nē Itotoya eig ye irok kilei, “Age fiya nigin, tamo ĩ yogon tama sina ado itorneīd fen, yogon aiwa ado bagu difouf, age de fen, idi uruwom bouweid tekelei youf.” †† <sup>32</sup> Waa enei are, odug bagai, anī ere, aya Kristus ado sios nigin wogō auf. <sup>33</sup> Anī ere, ā aug nigin wauī laa fedig gen, ā mugu mugu āgenei kayau tar nigineg

†† Asaia 26:19; 60:1; Rom 13:11 †† Jenesis 2:24



agog wauĩ laa fouf. Age fe di, kayau ĩ yogon tamo faru-  
men ibodõf.

### Sina Tama Kesu Tar Geid

**6** Kesu, Odug bun sineĩ temeĩ tar sigoreid dõ gouf, ere nigin, anĩ madur. <sup>2</sup>“Sinã tamã yeneid walesauf,” are ĩtäfiya matu promis ado bagu fen, <sup>3</sup>“anĩ bunem, õ ibodõya biya ile di, tenebur ein sain meluk ubodõf.” <sup>14</sup>Tama tar, gereneĩ tar waud saneya to wenẽdig, age fiya ban, Odug nẽ tai fiya ado ifelnẽya bunem lo wedigouf.

### Ferfer Ado Marau Tamo

<sup>5</sup>Ferfer, ã Kristus dõ gounẽ gen, tenebur ein ãgenei marau tamo, kumĩ ado aniniya ado, wauĩ adok bunem sigoreid dõ gouf. <sup>6</sup>Ã meleid yaleya bunem to sigoreid dõ gouf, anĩ ere, Kristus nẽ ferfer gen, Negur nẽ oroya, ãgenei wauĩ adok bunem ago gouf. <sup>7</sup>Ã Odug aruna walogounẽ gen, tamo nigin sã, wauĩ adok yen ken, aruneid walogouf, <sup>8</sup>ere nigin, ã keleĩ, ĩ ferfer be, kafi fiya sã, Odug ĩ mugu mugu ganan, ereb biya age difef anĩ kilei, mala solo ifenẽdiyof.

<sup>9</sup>Marau tamo ã, ãgenei ferfer naab de anĩ bunem el wedigouf. To kumĩya wenẽdig, ere nigin, ã keleĩ, ã ado idi nigin, ãgenei Marau saa ilun ibodok, ĩ bun taka nigin dogol anĩ, kinau ya sã.

### Negur Nẽ Kusĩ Nẽ Saki

<sup>10</sup>Od idĩya nigin, Odug bun ado yogon megeir barikã bun, total ufareg. <sup>11</sup>Negur nẽ kusĩ nẽ saki ganan waleg, naki weleg fen, Satan nẽ kisi, fe fiyẽya nigin, sã megeir ufaragauf. <sup>12</sup>Ere nigin, ada neda kusĩ are, bouwa ado naud nẽ oroya fe fiyẽya nigin sã, anĩ ere, uyu iroudiya, yeneid adodo, tenebur nẽ gugum nẽ me-

geir ado, saa ilun kaa sesen nẽ megeir nẽ total fe fiyẽya nigin. <sup>13</sup>Anĩ nigin, Negur nẽ kusĩ nẽ saki ganan waleg, naki weleg, anĩ bunem, sesen nẽ naa wõ ye di, ã tutub yũ ifareya nigin kisi feleya, agog fen, ã ereb ereb ganan agog fen, ufaragauf. <sup>14</sup>Anĩ nigin, total ufareg, momoi nẽ lũ luweĩ gug fen, madur bagai nẽ siot kapam akoreĩ dedeg, <sup>15</sup>agog fen, ãgenei yeĩ bun su ufonũg fen, maror nẽ biya od wogõya nigin dodok fiya saika ufaragauf. <sup>16</sup>Enei ganan bun tobol fe fen, momoiya nẽ makanam waleg, anĩ bunem, ã sesen nẽ magir yã bale ado isif anĩ ganan, sã gare walagauf. <sup>17</sup>Agog fen, kel yaleya nẽ hat kapa ado Awa Uur nẽ dimig, are Negur nẽ od, anĩ waleg. <sup>18</sup>Kosẽya ado to fiya ganan bun, sain ganan Awa Uur bun kosẽ gouf. Enei kisi bun unog fen, saika ge fen, sain ganan Negur nẽ tamo kayau ganan nigin kosẽ gouf.

<sup>19</sup>Aya nigineg kosẽ gouf, are sain aya od arõf bun ganan, Negurem od ifana fen, aya kumĩ sã biya od nẽ waa anĩ wogõ auf nigin ago gouf. <sup>20</sup>Biya od enei nigin, aya soosi tamo wõ au fen, kalabus bun abodok. Aya to kumĩ au fen, biya od sã kurõ afalaisiyof nigin kosẽg.

### Idikeleya Nẽ Aanya

<sup>21</sup>Tikikus, turau oboiyof fen Odug bun kabĩ tamo dõ fiya biya, ĩ ereb ereb ganan irokeneĩf, age fe di, ãg, aya naig be afef ado aya ere kabĩ alef anĩ, keleĩ youf. <sup>22</sup>Aya, ĩ, gariya enei nigin bagai ã gein sur afef, are ã amã naig be fiya mabodok anĩ keleĩ youf nigin ado, ĩ ãgenei wauĩ megeir foug nigin.

<sup>23</sup>Tamada Negur ado Odug Jesus Kristus bunem, turau tar, wau inosiya ã bun ibodõf, agef fen, wau laa fiya momoiya ado ã bun isiyof. <sup>24</sup>Idi, neda Odug Jesus Kristus nigin waud laaf fen, waud laa fiya anĩ to folõ difeledig anidi ganan bun, wau ifenẽya ibodõf.

† Eksodas 20:12; Diuteronomi 5:16

# FILIPAI

**1** Pol ado Timoti, Kristus Jesus nē ferfer, Filipai oun Kristus Jesus bun Negur nē tamo kayau ganan ado, uyu iroudiya ado uyu iroudiya farumen sios kabī daledig anidi bun pas enei matotof.

<sup>2</sup> Neda Tamada Negur ado Odug Jesus Kristus bunem, wau ifenēya ado wau inosiya ā bun ibodōf.

## De Fiyēya Ado Kosēya

<sup>3</sup> Sain aya ā nigin karī aulef ganan bun, aya neu Negur de afiyēdig. <sup>4</sup> Ā ganan nigin neu kosēya ganan bun, aya sain ganan bun wau kulīya ado kosē audig, <sup>5</sup> ere nigin, ā gariya bunem biya od nigin, amā geid uyu kū ta tasin isi, gama sain enei bun. <sup>6</sup> Aya enei nigin momoi auf, are taka ī ā namein kabī biya gariya inon are, tokō fel ile, Kristus Jesus nē naa bun idikalauf.

<sup>7</sup> Aya ā ganan nigin eig afe kisi afef, are tutuk, ere nigin, ā neu wau bun ufaregef, ere nigin, aya kalabus bun be abodok, biya od asen ken, kurō afeis fen megeir afef bun, ā ganan Negur nē wau ifenēya bun, aya geid tabodōgedig. <sup>8</sup> Kristus Jesus nē wau laa fiya bunem, aya ā ganan nigin wau naig be fe laa fedig, are Negur ī keleī.

<sup>9</sup> Enei nigin aya kosē auf, are āgenei wauī laa fiya anī, keleī ado es fiya kisi ganan bun, odugef ilauf, <sup>10</sup> anī bunem, ā ereb biya bagai ya es fiya keleī ken, ā karētut fen, od sā ubodōgef uleg, Kristus nē naa bun wō gouf, <sup>11</sup> ago ge di, madur bagai nē faat Jesus Kristus bunem isif anī, ā bun barikāf, anī bunem, Negur ī fula fiya medēya ado yana yalesya yalouf.

## Pol Kalabus Ibodon Anim Biya Od Fou Yelen

<sup>12</sup> Turau tar, gama aya ā enei keleī youf anī orouf, ereb aya bun wō yen anim, biya od el fe isennē di, fou yelen. <sup>13</sup> Anī bunem, Sisa † nē fō lo fiya tamo ganan ado tamo kayau ganan idi, aya Kristus nigin kalabus bun abodok ya anī keleī. <sup>14</sup> Aya kalabus bun abodok anī bunem, neu turau tar musei ganan, Odug bun dibodok idi, Negur nē od nigin, total ado kumī sā, wogō douf nigin waud yalesen.

<sup>15</sup> Momoi, tunī kiyēī ado kiwai bunem Kristus nigin wogō dedig, anī ere, tunī kisi biya bunem age difedig. <sup>16</sup> Idi kisi biya bunem age difedig anidi, wau laa fiya bunem age difedig, are aya biya od asennen bunem kalabus bun abodok anī idi keleī. <sup>17</sup> Idi kiyēī ado kiwai bunem age difedig anidi, kisi karētut ban, dogo yeneid nigin de fen, Kristus nigin wogō def, are sain aya kalabus bun abod mog, morō aya bun tobol fiya nigin de

fen age difedig. <sup>18</sup> Anī ere, ere naig fouf? Ereb odug bagai are, naab ganan bun, kisi kū fenēya bunem be, kisi tutuk bunem age difef, are Kristus nigin wogō def. Anī age dife di, aya wau al fef.

Momoi, aya neu wau al fiya tokō afalauf, <sup>19</sup> ere nigin, aya keleī, āgenei kosēya bunem ado Jesus Kristus nē Awa Uurem isennēya bunem, ereb aya bun wō yen anim, aya kafī fiya bun tamal yalelnauf. <sup>20</sup> Aya total bagai kisi afe fen, wau irok, are aya naab taka bunem to mama fiyauf, anī ere, aya kumī sā total barikā ano di, Kristus ī, sain ganan age fedig gen, gamag neu bouwau bun, mata ibodōya bun be laa buneg, yana ilun iselauf. <sup>21</sup> Ere nigin, aya bun, mata ibodōyauf are Kristus nigin, laa fiyauf areg aya biya alouf. <sup>22</sup> Aya fau bouwau bun mata abodok alauf are, aya faat biya yūf nigin kabī alouf. Anī ere, ere anī aya dō afouf? Aya keleī sā! <sup>23</sup> Aya uru anidim si sitakā dī difiyaf. Aya ile, Kristus ado ibodōya nigin orouf, are gai biya bagai, <sup>24</sup> anī ere, aya bouwau mata ibodōf are, ā nigin biya bagai youf. <sup>25</sup> Aya enei nigin momoi bagai au fen, aya keleī, aya fau abodōf, age afe fen, aya, āgenei momoiya biya ilauf nigin ado ā momoiya bun wauī kulī youf nigin, ā ganan geid tabodōf. <sup>26</sup> Age fe di, aya ā geid baban tabodōf anī bunem, aya bunem, āgenei wauī kulīya Kristus Jesus nigin ise gogū fouf.

<sup>27</sup> Ereb wō youf, Kristus nē biya od kisin bagai ereb ereb ago gouf. Anī bunem, aya asi ā ailiyēif be, aya ā atun ibodōya sa ken karī be dogol auf, aya keleī youf, are ā uur tekelei bun total ufareg fen, biya od nē momoiya nigin tamo tekelei gen, bagug fen, kabī total walogouf. <sup>28</sup> Idi naab fire fire bunem, kiwai difeneif anidi nigin, ā kumī sā ufaragauf. Are idi bun, idi daū feidlauf anī nē uris, anī ere, ā bun, Negurem ā kel yaleyēif anī nē uris. <sup>29</sup> Ere nigin, ā Kristus nigin momoi gouf nigin dogol, Kristus aruna yaleya nē el fiya to ifenein, anī ere, ā ī nigin daraug walogouf nigin ifenein. <sup>30</sup> Ā aya kusī aun ulegen, gamag fau kusī auf karī gef anī, āg ago gef.

## Kristus Nē Wau Yukesileya Anī Madē Gouf

**2** Anī nigin, ā Kristus bun wauī yalesya adouf are, Kristus nē wau laa fiya bunem wauī yo fiya adouf are, Awa Uur geid nigal yūya adouf are, molol ado wauī yūya adouf are, <sup>2</sup> neu wau kulīya anī, wauī tekelei, wauī laa fiya tekelei, uur ado kisi bun tekelei bunem tobol ge di, neu wau kulīya barikāf. <sup>3</sup> Aug nigin dogol be, ege yeneī yalesya bunem ereb taka to ago gouf, anī ere, wauī yukesileya bun, ā aug nigin kisi gef anī

† Rom neid king odug.

wal fiya, taka nigin agog kisi gouf. <sup>4</sup> Æ mugu mugu ägenei biya fiya nigin dogol to kisi gouf, anī ere, tunī neid biya fiya nigineg kisi gouf.

<sup>5</sup> Ägenei tobonuneī, Kristus Jesus nē ado tekelei youf:

<sup>6</sup> Æ yogo Negur bagai,

anī ere, Æ Negur gen ibodöya anī itoron,

<sup>7</sup> anī ere, Æ yogon kisi ganau yukalaisil fen,

ferfer gen ibod ken,

tamo bagai gen wö yen.

<sup>8</sup> Agef fen, tamo bagai gen wö ye mog, dilen.

Æ yogo wau yukesil fen,

laa nigineg sigor dö fen, agef fen, aa tetek buneg laa fen!

<sup>9</sup> Anī nigin, Negur Æ ilun bagai yaleselne ken,

Æ yana, yana ganau wal fiya anī ifenen.

<sup>10</sup> Age fe di, Jesus yana anī bun, iboreid ganau bobou difouf,

saa ilun ado, tenebur ado, teneub farumeneg.

<sup>11</sup> Age de fen, sigoreid ganau kurö difalaisi, Jesus Kristus Æ Odug de fen,

Tama Negur fula fiya medeīya difenēf.

### Barisa Gegen Fula Fiya

<sup>12</sup> Anī nigin, neu oboiyou tar, aya malau bun dogol sā, anī ere, fatuk bagai aya Æ geid to tabodok buneg, Æ gai dö gedig gen, ägenei kel yaleya nigin, kumī ado tererēya bunem, kabī total walogouf, <sup>13</sup> ere nigin, Negur nē kisi biya kilei, Æ kisig fen, dö gouf nigin, Negur Æ Æ namein kabī yaledig.

<sup>14</sup> Ereb ereb ganau, nauseirya sā, monēya sā bunem, ago gouf, <sup>15</sup> ago ge di, Æ bouweī od sa ken, karētut bagai, tenebur tamo kayau waud gogileya ado sane atun, Negur gere tar kü fenēya sā wowā gouf, Æ idi atun owöbē barisa gegen fula gouf. <sup>16</sup> Mata ifenēya nē od uroug kafī walagouf, ago ge di, aya Kristus nē naa bun, aya ege to gudu raun be kabī alen anī nigin, yanau alesauf. <sup>17</sup> Anī ere, aya, ägenei momoiya anī nē sesewi fiya ado aruna yaleya bun, wain ofa gen, nau-dou fi falaufeg, aya wau al fe fen, Æ ganau geid wauda kulī youf. <sup>18</sup> Anī nigin, äg wauī al fe fen, aya geid wauda kulī youf.

### Timoti Epafroditus Ado

<sup>19</sup> Odug Jesus bun, aya Timoti Æ bun kaisā bagai sur fiya nigin, wau isef, are aya Æ nigin od ale fen, ayag wau al fouf nigin age afef. <sup>20</sup> Aya ein, aib taka Æ gen, ägenei biya fiya nigin wau fāya anī to ailen. <sup>21</sup> Ere nigin, ganau dogo nigin dogol kisi difedig, Jesus Kristus nē biya fiya nigin to kisi difedig. <sup>22</sup> Anī ere, Æ keleī, Timoti Æ yogo nigin yaor fen, ere nigin, Æ aya urom, kesu yogon tama ado gen, biya od nigin kabī malen. <sup>23</sup> Anī nigin, aya bun ereb ereb naig fe wö youf anī ail fen, Æ Æ bun kaisā bagai sur fiya nigin, wau irok. <sup>24</sup> Age afe fen, aya Odug bun momoi auf, aya yug kaisā bagai asiyouf.

<sup>25</sup> Anī ere, aya kisi afef, aya Epafroditus Æ gein baban sur afiyēf are deuf auf, Æ neu turau, neu kabī turau ado, kusī tamo turau, Æ ägenei soosi tamo, Æ ereb aya lau

afef anī kulatun fiyauf nigin sur wiyēgen anī. <sup>26</sup> Æ Æ ganau ileyēya nigin wau fatuk bagai irok, agef fen, Æ dagi ado ya anī karī gen bunem wau morö ado. <sup>27</sup> Momoi Æ dagi fen, laaf genen. Anī ere, Negur Æ nigin wau yun, Æ nigin dogol sā, aya nigineg wau yu ken, aya wau gudū fiya teten, wau gudū fiya baban to alouf nigin age fen. <sup>28</sup> Anī nigin, aya Æ sur fiyēya nigin wau total bagai irok, age afe di, sain Æ Æ baban uleg fen, wauī al fe di, aya wau morö are wau warasa youf. <sup>29</sup> Æ Odug bun wauī al fiya odug bunem aan wiyēgouf, agog fen, tamo Æ gen yeneid walesagouf, <sup>30</sup> ere nigin, Æ Kristus nē kabī nigin laaf genen, Æ Æ aya isennēya ifanaya kisi feleya sā anī, aya ifanauf nigin, yogon bou itoron.

### Bouwa Nē Oroya Nigin To Momoi Ge

**3** Od idīya nigin, neu turau tar, Odug bun wauī kulī ye! Aya Æ bun de tekelei enei baban itotoya nigin morö sā. Are Æ kulatun yeīya nigin, age afef.

<sup>2</sup> Gaū anidi nigin lo walagouf, tamo idi sane age difedig, idi mulū ileyā nigin bouweid gudū difedig anidi.

<sup>3</sup> Ere nigin, ada anī mulū telen, ada anī Negur nē Awa Uur bunem Negur yana talesedig, ada anī Kristus Jesus nigin yanada talesedig, age ta fen, ada bouwa nē oroya nigin to momoi taudig. <sup>4</sup> Anī ere, aya yug bouwa nē oroya bun yanau yaleseya nigin gariya ado.

Aib taka Æ bouwa nē oroya bun yana yaleseya nigin gariya ado youf, aya Æ wal fiya. <sup>5</sup> Naa eit bun aya mulū elen, aya Israel tamo, Benjamin nē ibor bun tamal, Hi-bru tamo bagai, aya lo bunem Farisia tamal, <sup>6</sup> aya Negur nigin au fen, kabī total aledig, age afe fen, sios darau afenēdidig, lo dö fiya bunem madur bagai wöya nigineg, aya bouwau bun od sā.

<sup>7</sup> Anī ere, ereb ereb anī ganau aya isennauf aun are, Kristus nigin au fen, atoron. <sup>8</sup> Anī dogol sā, neu Odug Kristus Jesus nigin keleīya anī, ereb ereb ganau wal feid fen, odug bagai nigin, aya ereb ereb ganau are ege auf. Aya Æ nigin ereb ereb ganau ator ken, sisik gen kisi afef, are aya Kristus anī ale fen, <sup>9</sup> Æ ado bagu mafouf nigin age afen. Neu madur bagai aya bun ibodok are, lo bunem isiya sā, anī ere, madur bagai Kristus nigin momoiya bunem isif, are madur bagai Negur bun tamal momoiya bunem isif. <sup>10</sup> Aya, Kristus nigin, yogon mata kel fāya nē megeir nigin ado, yogon darau bun ifareya nigin kelei ken, yogon laa bun Æ gen wö auf nigin orouf, <sup>11</sup> are aya laa bun tamal kel fāya anī alouf nigin age afef.

### Pol Æ Daū Bun Wöya Nigin Gudu Ren

<sup>12</sup> Aya enei ganau mogo alen be, kisi feleya bagai wö aun gen to kisi afef, anī ere, aya, ereb aya yaleya nigin Kristus Jesus igirnan anī, yaleya nigin total bagai gudu rauf. <sup>13</sup> Turau tar, aya anī mogo alen to auf. Anī ere, ereb aya age afef are, ereb aya dudum afen are wederou tu kel fen, ereb malabag ifaref anī bun gudu rauf. <sup>14</sup> Aya, mala solo Negurem saa ilunem Kristus Jesus bun iweignan anī, alouf nigin daū bun gudu rauf.

<sup>15</sup> Ada atīya wō taun ganan, eig ya dogol kisi tafouf. Ā kisi tunī nigin fire kisi gouf, areg Negur ā bun yaor fouf. <sup>16</sup> Anī ere, ereb ada mogo talen anī dō tafouf.

<sup>17</sup> Turau tar, ā tunī geid bagug fen, aya dō wiyagauf, agog fen, ā, idi amā tobonunā mafelnein bun difaref anidi dō wedigouf. <sup>18</sup> Ere nigin, aya mogo sain musei arokeneik asin anī, gama baban maru isi fen arokeneik, musei idi Kristus nē aa tetek nigin kiwai dibodok. <sup>19</sup> Idi neid idikeleya are daū feleya bun, idi neid waitou are dogo neid naumeid, agef fen, dogo neid fula fiya are dogo neid mama bun ibodok. Dogo neid kisi are tenebur nē safina bun ibodok. <sup>20</sup> Anī ere, ada neda ibodōya modoū are, saa ilun ibodok. Agef fen, ada kel yaleya tamo Odug Jesus Kristus an tamal fatuk bagai tari tafef. <sup>21</sup> Kristus ī, ereb ereb ganan ī farumen irouleya nē megeir bunem, ada bouwada tenebur nē enei falei fele di, ī yogon bouwa fula fiya medeīya gen wō douf.

**4** Anī nigin, neu turau tar, aya ā nigin wau laaf fen, kisi total anodig, ā neu wau kulīya ado teter. Neu oboiyou tar, ā Odug bun agog ufareg, megeir lauf.

#### Wau Yaleseyā Od

<sup>2</sup> Aya Yuodia ō agonok, Sintike ōg agonok, ā Odug bun wauī tekelei youf. <sup>3</sup> Kabī turau bagai, aya ō arokonok, kayau eneidi biya od nigin aya isennaya nigin kabī total daledig anidi usenneīd fen, Klemen ado neu kabī turau tar ganan, dogo neid yeneid mata ibodōya nē buk bun ifaref anidig, usennēdiyof.

<sup>4</sup> Sain ganan Odug bun wauī kulī youf. Aya baban arokeneik: Wauī kulī ye! <sup>5</sup> Āgenei molol anī tamo ganan bun yaor gouf. Odug ī mogo melsak. <sup>6</sup> Ā ereb taka nigin to suwē gouf, anī ere, ereb ereb ganan bun, kosēya ado to fiya bunem, Negur de wiyēg fen, āgenei to fiya Negur bun unogouf. <sup>7</sup> Ago ge di, Negur nē wau inosiya tamo nē karīya ganan wal fiya anim, Kristus Jesus bun, āgenei wauī ado āgenei kisi kulatun fediyof.

<sup>8</sup> Od idīya nigin, turau tar, ereb momoi anī, ereb biya anī, ereb madur anī, ereb karētut anī, ereb wau laa fiya nē anī, ereb yana iseleya nē anī, ereb taka biya bagai fen, yana iseleya nē bagai anī, ereb ereb age fiya nigin kisi gouf. <sup>9</sup> Ereb aya bunem ā kelein, walegen, karī gen

be, aya bun ulegen anī, agog dō gouf. Ago ge di, wau inosiya nē Negur, ā geid ibodōf.

#### Pol Idi Neid Ege Luwa Nigin De Fiyēdin

<sup>10</sup> Gama ā aya isennaya nigin baban kisi fā yen nigin, aya Odug bun fatuk bagai wau kulī yef. Momoi, ā aya isennaya nigin kisi gen, anī ere, ā anī yaor fiya nigin naab taka to wō yen. <sup>11</sup> Aya ereb lau afef nigin, enei to orok, ere nigin, sain naig be fe isiyoufeg, aya wau inois ibodōya nigin kelein. <sup>12</sup> Aya maleg bun ibodōya are aya keleī, aya safina ado ibodōyag aya keleī. Nain be, ereb sain naig be fe wō youf bun, aya nameu isokosauf be, naū abodōf, aya safina musei ado be, aya safina naal bagai adoufeg, aya wau inois ibodōya nē waa are aya kelein. <sup>13</sup> Aya ereb ereb ganan, ī aya megeir ifanadig bunem, sā age afouf.

<sup>14</sup> Anī ere, aya neu morō bun isennaya nigin kisi gen are, ā biya ago gen. <sup>15</sup> Filipai tamo kayau ā gai keleī bagai, aya Masedonia provins ator ken, asi, biya od uyulil wogō ayein sain bun, sios takam safina yaleya bun be, ifenēya bun to isennan, āgem dogol. <sup>16</sup> Sain aya Tesalonika taun abodoneg, ā safina aya isennēya nigin aya lau afe mog, baba baban sur wanagen. <sup>17</sup> Aya safina ege luwa yaleya nigin to kisi afef, anī ere, aya āgenei dumen mala solo biya walogouf nigin kisi afef. <sup>18</sup> Aya ereb ereb ganan kisi feleya ale fen, anī wal fiyag alen. Aya fatuk bagai wanagen, gama aya Epafroditus bunem safina fire fire ege luwa sur gen anī alen. Anī ganan are, sesewi fiya sumeī biya ado anī, Negur wau al fiya ado yalouf. <sup>19</sup> Agef fen, neu Negur ī, Kristus Jesus bun, yogon kisi feleya fula fiya medeīya barikā bunem, āgenei lau gef ganan ifeneīf.

<sup>20</sup> Neda Tamada Negur bun fula fiya medeīya gai gai ibodkalauf. Momoi.

#### Idikeleya Nē Aanya

<sup>21</sup> Kristus Jesus bun Negur nē tamo kayau ganan aan wiyēdigouf. Turau tar aya geid mafaref anidim aanya sur difef. <sup>22</sup> Negur nē tamo kayau ganan, ā bun aanya sur difef, idi atun, idi Sisa nē ibor bun kabī daledig anidim bagai anī, ā bun aanya sur difef.

<sup>23</sup> Odug Jesus Kristus nē wau ifenēya āgenei uur bun ibodōf. Momoi.

# KOLOSI

**1** Aya Pol, Negur nē oroya bunem Kristus Jesus nē aposel wō aun ado, neda turada Timoti adom, <sup>2</sup>oun Kolosi taun, Negur nē fateul tamo kayau, Kristus bun momoiya turamā tar bun pas enei matot-keneik.

Wau ifenēya ado wau inosiya, Tamada Negur bunem ā bun ibodōf.

## De Fiyēya Ado Kosēya

<sup>3</sup>Sain amā ā nigin kosē mauf bun, amā faimud neda Odug Jesus Kristus nē Tama, Negur de mafiyēdig, <sup>4</sup>ere nigin, amā Kristus Jesus bun āgenei momoiya ado, ā Negur nē tamo kayau ganan nigin wauī laa fiya anī karī maun. <sup>5</sup>Ā mogo momoi nē od, biya od ā bun isin anī karīg fen, ereb ā nigin saa ilun inon nigin wauī ise fen, momoiya ado wauī laa fiya anī wō yen. <sup>6</sup>Sain ā biya od anī karīg fen, Negur nē wau ifenēya momoi bagai kelein sain anī bunem ilauf ganan, biya od anī ā atun age fen gen, teneub ganan bun, biya od enei faat yu ken, odugef. <sup>7</sup>Ā, nemā oboimā ferfer turamā Epaf-ras bun keleī anī walegen, ī amā nawamā yaleya, Kristus nē kabī tamo dō fiya biya, <sup>8</sup>agef fen, inimeg āgenei Awa Uur bun wauī laa fiya nigin irokanaman.

<sup>9</sup>Age fiya nigin, sain amā ā nigin karī maun bunem isif ganan, amā ā nigin Negur kosē mafiye ken, uur nē kisi biya ado kisi fokōya ganan bunem Negur nē oroya nigin keleī aura yeif nigin to fiyēya to matorōdig. <sup>10</sup>Age mafe fen, amā, ā Odug nē oroya bun ubodōg fen, ereb ereb ganan bun Odug wau al foug nē anī ago gouf nigin kosē maudig: faat biya kabī biya ganan bun yūf nigin, Negur nigin keleī, ā bun odugouf nigin, <sup>11</sup>yogon fula fiya medeīya nē megeir bunem megeir ganan ifeneī di, ā ereb ereb ganan bun, feseya sā megeir bagai ufaragauf nigin, agef fen, wauī kulīya ado, <sup>12</sup>Tamada ī, ā lalan nē tano bun Negur nē tamo kayau neid akor weim walogouf nigin age fen anī, de wiyēgouf nigin kosē maudig. <sup>13</sup>Ere nigin, ī ada gugum nē megeir bun yalelnada fen, in Naal Negurem ī nigin wau laa fedig anī nē tano bun gei fada irou isidan. <sup>14</sup>Ī Naal bun ada kel yaledan, neda mosor nigin weder tu kelen.

## Kristus Ī Ereb Ereban Ganān Wal Fiya

<sup>15</sup>Kristus ī, Negur ada to tailef anī nē malakanon, ī Negur nē kesu matu, ereb ereb inodin ganān anī nē mudur inenen. <sup>16</sup>Are, Kristus ī bunem ereb ereb ganān inodin, ereb ereb saa ilun ifaredif ado tenebur ein ifaredif, ereb ereb tailef ado to tailef, king, megeir, uyu iroudiya be, yeneid adodo; ereb ereb ganān Kristus

bunem Kristus nigin ye fen, inodin. <sup>17</sup>Kristus ī ereb ereb ganān wōya sā mog, ibodon, agef fen, ī bun ereb ereb ganān ifaref. <sup>18</sup>Ī bouwa are sios, ī yogo anī nē mudur. Ī gariya, tamo gare den bun tamal uyulil kel fā yen, are ereb ereb ganān bun ī mudur ibodōf nigin age fen. <sup>19</sup>Negur ī yogon kisi feleya bagai anī ganān, Kristus bun ibodōf nigin oro fen, <sup>20</sup>ī Kristus nē naud aa tetek bun fi felen anī bunem maror ino fen, Kristus bunem ereb ereb ganān tenebur ifaredif be, saa ilun ifaredif, ī geid komo difouf nigin oron.

<sup>21</sup>Uruwa bun, ā Negur nigin gerō ufareg fen, āgenei tobonunā sane bunem, āgenei kisi bun Negur nigin kiwai ubodōgen. <sup>22</sup>Anī ere gama, Negur ī, Kristus nē bouwam laa bunem, yogon lo fiya bun ā fateul, amuyē sā, od sā ineneif nigin ī geid komo yein. <sup>23</sup>Ā āgenei momoiya tobol ge fen, feseya sā total ufareg fen, biya od karī gen sain bun wauī iseya walegen anī bun to ulegef usigef gouf are, agog wō gouf. Biya od enei are, ereb ereb ganān saa farumen ifaref anidi bun kurō fesin, agef fen, aya Pol biya od anī nē kabī tamo wō aun.

## Pol Sios Nigin Kabī Total Yalen

<sup>24</sup>Gama aya ā nigin darau alef anī nigin wau al fef, age afe fen, Kristus ī yogon bouwa sios nigin darau yalen bun fau to kisi felef anī kisi falauf nigin, aya bouwaum darau anī ale di, kisi falauf. <sup>25</sup>Aya Negur nē od anī kisi feleya bagai afeneif nigin, Negur kabī ifanan anī nē kabī tamo wō aun. <sup>26</sup>Negur nē od are ī waa, kulunem ibor isin ganān bun iminēyan ibodon anī, gama Negur nē momoiya tamo kayau bun yaor fen.

<sup>27</sup>Negur nē tamo kayau bun, Negurem waa enei nē fula fiya medeīya barikā anī naig be fiya anī, haiden atun yaor foug nigin wau iron, waa are Kristus ā namein ibodok, anī nē fula fiya medeīya nigin wau iseya anī.

<sup>28</sup>Amā ī nigin kurō mafalaisi, tamo kayau ganān wedereid maroud fen, kisi biya ganān bun, tamo kayau ganān mafelnēdidig, are amā tamo kayau ganān Kristus bun, kisi feleya bagai manenēdiyof nigin age mafef. <sup>29</sup>Enei kisi falauf nigin, aya kabī total alef, yogon megeir aya nameun ibod ken, kabī total yalef anim aya gunī auf.

**2** Aya ā nigin, idi Laodisia taun difaref anidi nigin ado, idi aya to bagai dileyaf anidi ganān nigin, naig afe gunī auf anī, ā keleī youf nigin orouf. <sup>2</sup>Neu kisi bagai are, idi waud alese di, wau laa fiya bunem waud katō difouf, age fe di, idi kisi fokō feleya nigin keleī barikāf, anī bunem, idi Negur nē waa keleī youf, are

Kristus. <sup>3</sup> Ī bun kisi biya ado keleī nē safina biya ganan inokon ibodok. <sup>4</sup> Aya taka nem meleī yaleya od biyai biyai bunem to idegneīf nigin enei arokeneik. <sup>5</sup> Momoi, aya bouwaum ā geid to tabodok, anī ere, aya uur bun ā geid tabod ken, ā naig be ge tutuk ufareg fen, āgenei Kristus bun momoiya naig be fe megeir ifaref anī, ileyā nigin wau irok.

### Tamo Nē Lo Wal Fe Fen, Kristus Bun Mata Ibodōya

<sup>6</sup> Ā Kristus Jesus āgenei Odug walegen, anī nigin, ā ĩ bun mata ubodōgouf. <sup>7</sup> Ī bun warei urarāg fen, fō kare gen walesagauf, ā difelnein kilei, āgenei momoiya bun megeir ge fen, de fiyēya anī ā bun ise gogū fouf.

<sup>8</sup> Taka nem ā, tamo nē idegēya keleī kaū sā bunem to gurar yeī irouleyēif nigin lo walagauf, are Kristus dō fiya ban, tamo nē tobonunā ado tenebur enei nē tobonunā dō fiya nigin.

<sup>9</sup> Ere nigin, Kristus bun Negur nē kisi feleya bagai ganan bouwa bun ibodok. <sup>10</sup> Agef fen, ā Kristus bun kisi feleya bagai ifenein, Kristus ĩ megeir ganan ado yeneid adodo ganan neid mudur. <sup>11</sup> Ī bun āg mulū ulegen, are tamo imam mulū bun ineneīya sā, anī ere, mosor nē oroya yaleleya nigin, Kristusem mulū bun inenein. <sup>12</sup> Ā, ĩ geid naan yaleya bun mū yei ken, Negur ĩ laa bun tamal Kristus kel turī fiyen anī nē megeir bun, āgenei momoiya bunem ĩ geid kel turī yein.

<sup>13</sup> Sain ā, āgenei mosor nigin ado āgenei mosor nē oroya nigin mulū ileyā sā nigin, laa bun ufareg mog, Negur ĩ, ā Kristus geid kel turī yein. Ī neda mosor adok nigin weder tu kelen. <sup>14</sup> Ī lo nē ĩtāfiya itotoya, are ada weteda kiwai ibodon anī isasalen, ĩ anī yalel fen, aa tetek bun Yun. <sup>15</sup> Agef fen, ĩ, megeir adodo yeneid adodo neid totol ganan, ye farumen gō fel fen, Kristus nē aa tetek bunem kusī bun idi wal fedin anī dilouf nigin, ganan meleid bun yaor fen.

<sup>16</sup> Anī nigin, ā saaf be naan wāgauf, uub sifa naa fire fire be, ogō mata sigigi fiya naa be, Sabat naa † to dō gouf bun, taka nem to es yeīf. <sup>17</sup> Eneidi are, ereb fau isiyouf nē malakanon. Anī ere, ereb momoi bagai are Kristus bun fotou fiyauf. <sup>18</sup> Aib taka ĩ, mala yaleya nigin wau yukesileya ado engel yeneid yaleseyā nigin wau al fef anim, ā mala solo walogouf anī to wal yeīf. Tamo age fiya ĩ ereb ilen anī nigin nenerī meluk dir fe fen, yogon bouwa nē oroya anim, gariya sā fagā yedig. <sup>19</sup> Ī bouwa nē mudur Kristus anī folō fel fen ifaren, mudur are Kristus, ĩ bunem bouwa ganan tuwa katō fiya ado dirumunā anidim disennē di, katō fel ifar fen, Negur yogo age fe di, odugedig.

<sup>20</sup> Ā Kristus geid tenebur enei nē tobonunā bun laa yein, age fiyauf are, ere nigin anī ā fau anī nē gen ufareg fen, yogon ĩtāfiya eig fiya farumen ufaregef, <sup>21</sup> “Ā to uroug! Ā to kobūg uleg! Ā to dorōg uleg!”? <sup>22</sup> Enei ganan are, kabī wenēge di, sa kalauf, ere nigin, idi tamo nē ĩtāfiya ado tai fiya dogol. <sup>23</sup> Momoi, ĩtāfiya age age fediya are, dogo neid kisim seli kulō fiya, dogo neid idegēya waud yukesileya ado, dogo neid bouweid

† Sabat naa anī, Juda neid uub nē naa.

kafī fiya ifenēya bun, kisi biya gen ulegedig, anī ere, idi bouwa nē oroya lai fesileya nigin kisi feleya sā.

### Fateul Ibodōya Nē Faded Fiya

**3** Age fiya nigin, ā mogo Kristus geid keg fā gen nigin, āgenei wauī ereb ereb ilun nē nigin, Kristus Negur ima biyalē ibodok nē an, unogouf. <sup>2</sup> Āgenei kisi ereb ereb ilun nē nigin unogouf, ereb ereb tenebur nē nigin sā. <sup>3</sup> Ere nigin, ā gareg fen, āgenei mata gama Kristus geid Negur bun inokon. <sup>4</sup> Kristus ĩ āgenei mata, ĩ wō youf sain bun, āg ĩ geid fula fiya medēīya bun wō gouf.

<sup>5</sup> Anī nigin, ereb ereb āgenei tenebur nē oroya nē anī udenkesig: noli tobonunā, amuyē tobonunā, noli kisi, oroya sesen ado, safina musei youf nigin ima su lai fe fen sū we fiya (are idegēya waitou seli yabiya). <sup>6</sup> Eig fediya nigin, Negur nē didi isif. <sup>7</sup> Ā uruwa ubodōgen, naab enei bun uyōgen. <sup>8</sup> Anī ere, ā gama naab eig fediya, wau saneya, didi iseya, tobonunā sesen inoya, dumen od irōya ado, sigoreī bun od sesen wogōya, anī ganan utorōgouf. <sup>9</sup> Ā abob to udegnēgouf, ere nigin, āgenei bouweī nē oroya tubu yogon tobonunā ado uraileg fen, <sup>10</sup> oroya mata ufonūgen, are Negur nē malakanon nigin keleī bun mata falei yeīdig. <sup>11</sup> Ein baban, Grik tamo be Juda tamo, mulū ileyā be mulū ileyā sā, yaū tamo be tamo kuī gen, ferfer be kafī fiya sā tamo gen, fire fire to ibodok, anī ere, Kristus ĩ anī ganan, ĩ ganan anī namedin ibodok.

<sup>12</sup> Anī nigin, ā tamo kayau Negurem igirnein, fateul ado Negur nē oboi tar nigin, wau yūya, tobonunā biya, wau yukesileya, molol ado, kaisā to seyeya anī ufonūgouf. <sup>13</sup> Molol ufareg fen, abob nigin morō faali gouf, agog fen, ā atun abob ereb morō ibodōf anī nigin wedereī tu kalauf. Odug āgenei mosor nigin weder tu kelen gen, āg mosor nigin wedereī tu kalauf. <sup>14</sup> Agog fen, enei ganan teten, wauī laa fiya ufonūgouf, anim ereb ereb ganan tekelei guf irouwauf.

<sup>15</sup> Kristus nē wau inosiya āgenei wauī bun utorōg len, ulum irouwauf, ere nigin, ā bouwa tekelei bun wau inosiya bun iweignein. Agog fen, Negur de wiyēgouf. <sup>16</sup> Utorōg len, Kristus nē od fatuk bagai ā namein ibodō di, ā kisi biya ganan bunem abob ufelnēdig fen, abob weder urougauf, agog fen, od Negur nē Itotoya Sam bun ibodok, Negur yana yaleseyā seg ado, uur nē seg, āgenei wauī bun Negur de fiyēya ado walogouf. <sup>17</sup> Agog fen, ereb ā ago gef, od bun be kabī yaleya bun, anī ganan Odug Jesus yana bun agog fen, ĩ bunem Dei Negur de wiyēgouf.

### Momoiya Tamo Kayau Ibor Mata Ibodōya Nē Faded Fiya

<sup>18</sup> Kayau, āgenei tamo farumen ubodōgouf, are Odug nē lo fiya bun biya bagai.

<sup>19</sup> Tamo, āgenei aiweī tar nigin wauī laaf fen, idi waud morō to wenēdigouf.

<sup>20</sup> Kesu, ā ereb ereb ganan bun sineī temeī tar sigoreid dō gouf, anim Odug wau al fouf.

<sup>21</sup> Tama, ã gereneĩ tar to waud saneya wenēdigouf, ago gouf, idi agogon de fen, waud to al foug.

<sup>22</sup> Ferfer, ã ereb ereb ganan bun, āgenei marau tenebur enei nē sigoreid dō gouf, idi meledin dogol idi biya difamāf ya bunem meleid yaleya nigin dogol to ago gouf, anĩ ere, ã wauĩ momoi nē ado Odug nigin anini ge fen, ago gouf. <sup>23</sup> Ereb ago gef ganan, wauĩ adok iro ken, ago gouf, tamo nigin sã, Odug nigin kabĩ alef ge fen, kabĩ walogouf, <sup>24</sup> ere nigin, ã keleĩ, ã Odug bun tamal in akor mala solo walogouf. Are Odug Kristus anĩ ã aruna walekenēgef. <sup>25</sup> Aib taka ĩ sane age foug, yogon sane age fiya nigin mala solo sane yalouf, ere nigin, an anĩ kinau ya sã.

**4** Marau ã, āgenei ferfer ereb madur ado biya anĩ wenēdigouf, ere nigin, ã keleĩ, āg saa ilun āgenei Marau ibodok.

#### Faded Fiya Tunĩ

<sup>2</sup> Kosēya anĩ total uroug, lo weleg fen, Negur de wiyēgouf. <sup>3</sup> Agog fen, amã nigineg kosē gouf, are Negur amã od wogō mauf nigin bobog kã fel kanamã di, amã Kristus nē waa kurō mafalaisiyouf nigin kosē gouf, anĩ nigin aya kalabus bun abodok. <sup>4</sup> Negur aya biya od wogō auf nigin ifanan anĩ, sã yaor kurō afalaisiyouf nigin kosē gouf. <sup>5</sup> Ereb tamo kayau serē temeleid bun ago gou fenē, kisi biya ado ago gouf. Sain biya ã nigin wō youf ganan to sekil gouf. <sup>6</sup> Āgenei wogōya sain bun ganan wau ifenēya barikãf, od karĩya biya dogol wogō gouf, anĩ bunem, ã, tamo kayau ganan naig be fe solof irokenēdiya nigin keleĩ youf.

#### Idikeleya Nē Aanya

<sup>7</sup> Tikikusem aya nigin od ganan wogō yeĩf. ĩ neu turau oboiyou, kabĩ tamo dō fiya biya fen, Odug bun

kabĩ turau. <sup>8</sup> Aya, ĩ, ã bun enei nigin bagai sur afiyek, are ã, amã naig ma mafaref anĩ keleĩ di, anĩ bunem ĩ āgenei wauĩ yalesauf nigin, age afef. <sup>9</sup> ĩ Onesimus ado disiyouf, Onesimus ĩ neda turada dō fiya biya oboida, ĩ āgenei taka. Idi ereb ereb ganan ein agef wō yef anĩ dirokeneĩf.

<sup>10</sup> Neu kalabus turau Aristakus, ã bun yogon aanya sur fef, Mak, Banabas ne tam, ĩg agef aanya sur fef. (Ā ĩ nigin faded fiya walegen. ĩ ã garan isiyouf are, ã ĩ walogouf.) <sup>11</sup> Jesus ĩ yana taka Jastus dedig, ĩg aanya sur fef. Negur nē tano nigin neu kabĩ tamo turau tar atun, idi dogol anĩ Juda temeleid. Age de fen, idi momoi bagai de fen, neu wau dalesen. <sup>12</sup> Epafras ĩ āgenei taka, Kristus Jesus nē kabĩ tamo, ã bun aanya sur fef. ĩ faimud kosēya bun ã nigin total inodig, are ã Negur nē oroya ganan bun, kisi feleya bagai ado momoiya odug bun total ufaragouf nigin age fef. <sup>13</sup> Aya, ĩ, ã nigin, idi Laodisia taun difaref anidi nigin ado, idi Hierapolis taun difaref anidi nigin kabĩ total yaledig anĩ, sã ĩ nigin kurō afesif. <sup>14</sup> Nemã oboimã dokta Luk ado Demas aanya sur difef. <sup>15</sup> Tureĩ tar Laodisia taun dibodok anidi bun ado, Nimfa ado sios yogon fō bun guru difef anidi bun, neu aanya wenēdigouf.

<sup>16</sup> Pas enei uweseg le di, Laodisia sios buneg diwesauf, abag, Laodisia tamal paseg uwesagouf.

<sup>17</sup> Akipus urokenēg, “Ō Odug bun kabĩ walen anĩ, el wo udikalauf nigin karĩ walauf.”

<sup>18</sup> Aya, Polem aanya enei imaum bagai atotof. Aya kalabus bun abodok anĩ karĩ walagouf. Wau ifenēya ã ado ibodōf.

# 1 TESALONIKA

**1** Pol, Sailas, Timoti, amã, Tesalonika sios Tamada Negur, Odug Jesus Kristus ado bun ufaregef ã bun, pas enei matotof: Wau ifenëya wau inosiya ado ã bun ibodöf.

## Tesalonika Neid Momoiya Nigin De Fiyëya

<sup>2</sup> Amã faimud ã ganan nigin Negur de mafiyë ken, nemã kosë bun ã nigin marokenëdig. <sup>3</sup> Amã neda Negur Tamada mala bun, momoia bunem ägenei kabĩ faat yuk, wauĩ laa fiya bunem ägenei kabĩ yaleya ado, neda Odug Jesus Kristus bun wauĩ ise fen, ã to fese gen anĩ toku karĩ mauledig.

<sup>4</sup> Turamã tar, Negur ã nigin wau laa fedig anĩ, amã keleĩ, are Negur ĩ ã igirnein, <sup>5</sup> ere nigin, nemã biya od ã bun isin, are od dogol bunem sã, anĩ ere, megeir ado, Awa Uur Fateul ado, momoia bagai ado, ã bun isin. ã atun, ã nigin naig be ma mabodon anĩ ã keleĩ. <sup>6</sup> ã, amã Odug Jesus geid madë wamãgen. ã darau odug adon, anĩ ere, Awa Uur Fateulem kulĩya ifenein anĩ bun, ã od anĩ walegen. <sup>7</sup> Anĩ nigin, ã Masedonia Akaia provins ado bun, momoia tamo kayau ganan neid dodo gen wowã gen. <sup>8</sup> Odug në od ã bunem ilen, Masedonia Akaia provins ado bun dogol sã, ägenei Negur nigin momoia anĩ fõ fõ ganan iyokelen. Anĩ nigin amã baban ã ereb to mayeif. <sup>9</sup> Idi dogo, ã amã naig ge walemãgen anĩ kurö difalaisi kanamak. Age de fen, ã naig ge idegëya waitou utorög fen, Negur bun falei ge, mata ibodöya në ado momoi në Negur aruna waleg fen, <sup>10</sup> ĩ Naal ĩ laa bunem turĩ fiyen, are Jesus ĩ didi dumen isiyouf bun tamal kel yaledadig anĩ, saa ilun tamal tari gen anĩ dirokanamak.

## Pol Tesalonika Oun Kabĩ Yalen

**2** Turamã tar, ã keleĩ, amã nemã ki yeĩya ege to ilen. <sup>2</sup> ã keleĩ, amã Filipai taun oun darau ado kono fiya malen, anĩ ere, neda Negur në isennëya bunem amã totalo mano fen, naabura gudũ fiya totalo ibod mog, in biya od wogö mayein. <sup>3</sup> Amã totalo bagai marokeneik are, kũ fenëya bunem sã, kisi sane bunem sã, idegneiya bunemeg sã. <sup>4</sup> Age fiya ban, Negur biya od wogöya nigin igirneid fen, yo fiyëdin anidim gen, amã wogö maudig. Amã tamo waud al foug nigin to kabĩ malef, anĩ ere, Negur ĩ wauda es fedig, ĩ wau al foug nigin kabĩ malef. <sup>5</sup> ã keleĩ, amã meleĩ yaleya nigin to bagai wogö mau fen, naumamã nigin to nawamã dede mafedig. Are amã momoi morok anĩ Negur ĩ keleĩ. <sup>6</sup> Amã tamom yanamã seli kulö difoug nigin to mami- ren, ã bunem sã, taka bunemeg sã.

Amã Kristus në aposel mau fen, amã sã morö mafeneĩ youĩ në, <sup>7</sup> anĩ ere, ã atun, amã molol nem keso sina gere tar kulatun fedidig gen, age mafen. <sup>8</sup> Amã ã nigin waumã fatuk laaf fen, amã Negur në biya od ifeneiya nigin dogol sã, nemã mata ã nigin iraileya nigineg waumã iron, ere nigin, ã amã bun oboimã bagai wowã gen. <sup>9</sup> Turamã tar, momoi, amã kabĩ totalo morö ado malen anĩ ã karĩ welegef. Amã morö ã taka to mafeneif nigin, bö ado gaa ado kabĩ male fen, Negur në biya od ã bun wogö maun.

<sup>10</sup> ã, momoia tamo atun, amã naig be mafen, fateul, madur bagai, od sã mafaren, are ã keleĩ, Negureg keleĩ. <sup>11</sup> ã keleĩ, are amã, tama ĩ gere tar nigin suma inodig gen, ã mugu mugu bun suma manon, <sup>12</sup> amã wauĩ malesedig, wowor mayeifdig, Negur ĩ yogon tano ado fula fiya medeiya bun ulagauf nigin iweigneik, ĩ orof kilei ã ubodögouf nigin, wedereĩ maroudig.

<sup>13</sup> Age ma fen, amãg toku Negur de mafiyëdig, ere nigin, sain ã Negur në od amã bunem karig fen, walegen, are tamo në od gen to walegen, Negur në od bagai walegen, Negur në od anĩ, momoi gef ã bun kabĩ yalef. <sup>14</sup> Turamã tar, ã oun Judia distrik Negur në sios madë wiyëdigen. Sios Judia distrik oun Kristus Jesus bun difaref, Juda tamo bun darau dalen gen bagai, äg fõ tureĩ tar bun darau walegen. <sup>15</sup> Juda tamo idi, Odug Jesus profet geid didenkeis fen, amãg dirumã dirailen. Idi Negur wau al fiya to difenen, idi tamo ganan kiwai difenëdif. <sup>16</sup> Idi neid tobonuneid bun, amã haiden wogö mafiyëdi di, isennëya dalouf nigin naaburamã gudũ difedig. Naab anĩ bunem, faimud idi neid mosor tete tete dife di, mudu isedig. Age fiya nigin, Negur në didi kisi feleya bagai, idi bun mogo isin.

## Pol Tesalonika İleya Nigin Fatuk Bagai Wau Iron

<sup>17</sup> Anĩ ere, turamã tar, sain modeg bun, ã geid tabodon anĩ fara mafen (are bouwamam, kisi sã), amã ã ileyeyia nigin fatuk bagai waumã iro ken, naab ganan bun kabĩ totalo malen. <sup>18</sup> Amã ã gein masiyouf nigin waumã yenen. Momoi, aya, Pol, baba baban lakĩ afen. Anĩ ere, Satan naaburamã katĩ felen. <sup>19</sup> Neda Odug Jesus isiyouf bun, ere anĩ ĩ mala bun, nemã wau iseya, kulĩya, yana yaleseya në teter youf? Are ã anĩ sã de? <sup>20</sup> Momoi, ã nemã fula fiya medeiya ado, nemã kulĩya.

**3** Anĩ nigin, amã foiya kisi feleya sã nigin, amã kisi ma fen, amã mugu ein Atens mabodöf are deuf maun. <sup>2</sup> Amã, ã ägenei momoia bun megeir yei ken, wauĩ yalesauf nigin, Timoti, ĩ nemã turamã ado Kristus në biya od nigin Negur në kabĩ tura, sur mafiyen. <sup>3</sup> Are



takam morō eneidi bun to kisi rori youf nigin age mafen. Ā gai keleī bagai, are ada morō eneidi nigin igirnadān. <sup>4</sup> Momoi, amā ā geid tabodon bun, amā, ada fau darau difanadauf nigin toku marokenein. Age fiya bagai, agef wō yen, are ā keleī. <sup>5</sup> Anī nigin, aya foiya kisi feleya sā kisi afe fen, aya āgenei momoiya ileya nigin sur afen. Aya, naab taka taka bun kisi fiya tamo kisi yeī di, nemā kabī total ege ileya nigin kumī aun.

#### Timotim Pol Od Biya Iroulekenen

<sup>6</sup> Anī ere, Timoti gama bagai, ā bun tamal amā gein isi fen, āgenei momoiya ado wauī laa fiya nigin od biya irou isin. Ī irokanaman, are ā, amā nigin faimud biya karī welegedig ado, amā ā ileyēya nigin waumā irōdig gen, āg ilemāya nigin wauī irōdig yen. <sup>7</sup> Anī nigin, turamā tar, amā nemā waumā morō ado, darau ganān bun, āgenei momoiya bunem, amā ā nigin waumā yalesen. <sup>8</sup> Gama amā waumā kulīya ado mata mabodok, ere nigin, ā Odug bun megeir ufaregef. <sup>9</sup> Neda Negur mala bun, amā ā nigin waumā kulīya ifanaman enei ganān nigin, naig ma abag kisi mafel, ā nigin Negur de mafiyēf? <sup>10</sup> Amā masi mailiyēi ken, ereb ā fau āgenei momoiya bun lau gef anī isenneīya nigin, bō ado gaa ado Negur total bagai kosē mafiyēdig.

<sup>11</sup> Gama, neda Negur Tamada ĩ yogo, neda Odug Jesus ado, nemā naab ā gein isiya nigin dūf nigin oromak. <sup>12</sup> Odug āgenei wauī laa fiya gire fese di, amā ā nigin waumā laa fedig age fiya gen, abob nigin ado ganān nigin wauī laa fiya gogū foug nigin oromak. <sup>13</sup> Negur ĩ, āgenei wauī megeir fe di, neda Odug Jesus, in fateul tamo kayau ganān geid disiyouf sain bun, neda Negur Tamada mala bun, ā bouweī od sā fateul wō gouf nigin oromak.

#### Mata Ibodōya Bun Negur Wau Al Fiya Ifenēya

<sup>4</sup> Od idīya nigin, turamā tar, amā, ā Negur wau al fiya wenēgouf nigin naig ge ufaragouf nigin mafelnein, are gama agog ufaregef. Gama amā ā enei baba baban ago gouf nigin to mayei ken, Odug Jesus bun total bagai marokeneik. <sup>2</sup> Odug Jesus nē total bunem, amā ā faded fiya mafenein, are ā keleī.

<sup>3</sup> Negur nē oroya are ā fateul wowā gouf anī, are ā noli tobonunā sese wiyēgouf. <sup>4</sup> Ā mugu mugu bouweī kulatun ge di, fateul fen, yeneī biyauf nigin keleī youf. <sup>5</sup> Haiden Negur keleī sam, noli nigin mudureid ditenēdig gen to ago gouf. <sup>6</sup> Enei bun, takam ne tura sane to age fiyēf, idegēya bunem morō to ifenēf. Amā mogo marokenei ken, wedereī maroun, are Odug fau mosor age fediya ganān nigin tamo mala solo ifenēdiyof. <sup>7</sup> Negur ada amuyē adouf nigin to iweignadan, anī ere, fateul ibodōya nigin iweignadan. <sup>8</sup> Anī nigin, taka ĩ od enei idodōf, ĩ tamo to idodnek, are Negur in Awa Uur Fateul ifeneīdig anī idodnek.

<sup>9</sup> Gama tureī tar nigin wauī laa fiya anī nigin amā to matokeneīf, ere nigin, ā aug abob nigin wauī laa foug nigin Negurem ifelnein. <sup>10</sup> Momoi, ā tureī tar ganān Masedonia provins ganān bun difaref anidi nigin wauī

laa fedig. Anī ere, turamā tar, ā baba baban ago gouf nigin total bagai marokeneik.

<sup>11</sup> Amā marokenein gen, ā molol ibodōya nigin kisi total walogouf, āgenei kabī nigin kisig fen, aug imeim kabī walogouf. <sup>12</sup> Anī bunem, āgenei ibodōya bun tamo serē temeleid dileyei ken, anini douf, taka bun to utobōgouf.

#### Odug Isiyouf

<sup>13</sup> Turamā tar, amā ā gare den onudi nigin to keleī youf anī to oromak, takag, tamo tunī ganān, wau iseya sā gen wauī gudū foug anī to oromak. <sup>14</sup> Jesus laaf fen, kel fā yen nigin ada momoi taut, anī nigin, Negur, idi Jesus bun gare den anidi, Jesus geid guri feid isiyouf nigin momoi taut. <sup>15</sup> Odug nē od bunem, amā ā marokeneik, are ada fau mata tabodok, Odug isiyouf bun tafaref ada, idi gare den anidi to bagai wal tafedyouf. <sup>16</sup> Odug yogo bagai saa ilunem isiyouf, ait odugem irō di, engel uyu irouya nē ait ado, Negur nē taur bunem iweig di, Kristus bun gare den anidi ketem fafā douf. <sup>17</sup> Anī bure fele di, ada fau mata tabod ken, tafaref anī geif, idi geid bagu fada fen, lalo bun kutū fada se, Odug fotou fiya nigin saa ilun irou iselnadauf. An ada Odug geid mata gai gai tabodkalauf. <sup>18</sup> Anī nigin, od enei bunem abob wau talesauf.

<sup>5</sup> Gama, turamā tar, amā sain ado naa nigin to matokeneīf. <sup>2</sup> Ere nigin, ā keleī bagai, Odug nē naa, bē tamo bō isiyouf gen wō youf. <sup>3</sup> Tamo kayau wau inosiya ado morō sā tabodok de mog, daū fiya nunū idi bun, kayau kesu gō fiya nigin firi yedig gen isi di, idi to diyalalauf.

<sup>4</sup> Anī ere, turamā tar, ā gugum bun to ufaregef, anī nigin, naa anī bē tamo gen to isi fen, ba yeīf. <sup>5</sup> Ā ganān lalan ado we bun temeīf. Ada bō ado gugum nē sā. <sup>6</sup> Anī nigin, ada, idi tunī denek gen to tafarauf, anī ere, ada lo tafel fen, karī adouf. <sup>7</sup> Are idi mulaī temeleid, bō anī denēdig, idi aai meleid wā yedig, bō anī aai meleid wā yedig. <sup>8</sup> Anī ere, ada we nē nigin, ada dug nigin karī ado fen, momoiya wau laa fiya ado siot kapa gen tafoun ken, kel gei fiya nē wau iseya anim hat kapa gen kurū tafouf. <sup>9</sup> Negur ada didi yaleya nigin to igirnadān, anī ere, ada neda Odug Jesus Kristus bunem kel gei fadauf nigin igirnadān. <sup>10</sup> Ī ada nigin laa fen, are ada mata be tabodok, gare be taut are, ĩ geid tabodōf nigin age fen. <sup>11</sup> Anī nigin, abob wau tales fen, abob walesagauf, gama ago gef gen.

#### Idikeleya Nē Faded Fiya

<sup>12</sup> Turamā tar, gama amā marokeneik, idi ā atun kabī total dalef, idi Odug bun āgenei uyu irouya difar fen, wedereī dirouf anidi karī wiyēdigouf. <sup>13</sup> Idi kabī dirouf nigin ge fen, idi nigin wauī laaf fen, fatuk bagai karī wiyēdigouf. Abob nigin wau inosiya bun ufaragouf. <sup>14</sup> Turamā tar, amā total bagai marokeneik, fō temeleid wedereid uroug, anini temeleid waud waleseg fen, forō temeleid usennēdigouf, ganān nigin nameī ukeleg ubodōgouf. <sup>15</sup> Taka nem taka nē mosor to solo

fouf, anĩ ere, abob nigin ado ganan nigin, faimud to-bonunã biya ago gouf.

<sup>16</sup> Wauĩ bun faimud kulĩ youf, <sup>17</sup> toku kosẽ gouf, <sup>18</sup> ereb ereb ganan bun de wiyẽgouf, ere nigin, are ã nigin Kristus Jesus bun Negur nẽ oroya.

<sup>19</sup> Awa Uur nẽ yã to uroroukeleg, <sup>20</sup> profet neid od to welebi ge. <sup>21</sup> Ereb ereb ganan es gouf. Biya anĩ uroug, kafĩ walagauf. <sup>22</sup> Ereb sesen fire fire ganan sese gouf.

<sup>23</sup> Negur ĩ yogo, wau inosiya nẽ Negur, fateul kisi feleya bagai inoyeĩf. Āgenei uur, meleĩkanon ado,

bouweĩ anĩ ganan, neda Odug Jesus Kristus isiyouf bun od sãf. <sup>24</sup> Ī iweigneik ĩ yogon od dõ fiya biya, ĩ de age fouf.

<sup>25</sup> Turamã tar, amã nigin kosẽg. <sup>26</sup> Tureĩ tar ganan, umã fiya fateul bunem aan wedig. <sup>27</sup> Aya, tureĩ tar ganan bun pas enei uwesagauf nigin, Odug mala bun to-tol bagai arokeneik.

<sup>28</sup> Neda Odug Jesus Kristus nẽ wau ifenẽya ã ado ibodõf.

## 2 TESALONIKA

**1** Pol, Sailas, Timoti weim, Tesalonika sios, Tamada Negur, Odug Jesus Kristus ado bun ufaregef ã bun, pas enei matotof: <sup>2</sup>Wau ifenëya wau inosiyã ado, Tamada Negur, Odug Jesus Kristus ado bunem, ã bun ibodõf.

### De Fiyëya Ado Kosëya

<sup>3</sup>Turamã tar, amã ã nigin faimud Negur de mafiyëf bagai, are de age mafiyëf, ere nigin, ãgenei momoiya fau fau odugef iselef, agog fen, ã ganã abob nigin wauĩ laa fiya anĩ odugef. <sup>4</sup>Anĩ nigin, amã Negur nẽ sios atun, ã momoi ge fen, ã kafi fiya darau ganã ado walegef bun to fese gef nigin selĩ kulõ mafedig.

<sup>5</sup>Enei ganã anim, Negur nẽ es fiya are tutuk anĩ yaref. Anĩ bunem, ã Negur nẽ tano nigin kisi falauf, ã anĩ nigin kafi fiya walegef. <sup>6</sup>Negur ĩ madur bagai. ĩ morõ difeneik anidi morõ ifenëdiyof, <sup>7</sup>ã morõ walegef, ĩ karika ifeneif, amãg ifanamãf. Anĩ Odug Jesus, in engel megeir adodo geid, yã bale fitotoleya bun saa ilunem isiyof bun wõ youf. <sup>8</sup>Idi Negur keleĩ sã ado, neda Odug Jesus nẽ biya od to dõ difedig anidi, darau ifenëdiyof. <sup>9</sup>Idi daũ fiya faimud ibodkeleya nẽ kafi fiya dale fen, Odug mala bun tamãl ado, yagon megeir nẽ fula fiya medeïya bun tamãl, irudiyof. <sup>10</sup>Naa anĩ bun, ĩ isi, yagon fateul tamo kayau bun tamãl, fula fiya medeïya yale di, ĩ nigin momoi den anidi ganã, ĩ nigin meleid yũ yalouf. Are ã gedyof, ere nigin, ã nemã od nigin momoi gen.

<sup>11</sup>Anĩ nigin amã ã nigin toku kosë maudig, are neda Negur iweigneik anĩ kilei, ã kisi feleya inoyeif nigin, takag, Negur in megeir bunem, erëb erëb biya ganã ã ago gouf nigin kisi gef anĩ ado, ãgenei momoiya nẽ kabĩ ganã kisi falauf nigin. <sup>12</sup>Amã age ma kosë maudig, are neda Negur ado Odug Jesus Kristus neid wau ifenëya bunem, neda Odug Jesus yana ã atun fula fiya medeïya yale di, ãg ĩ bun fula fiya medeïya walogouf nigin age mafedig.

### Lo Wal Fiya Tamo Wõ Youf

**2** Turamã tar, Neda Odug Jesus Kristus isiyof nigin ado, ĩ wagen guru tagauf nigin, amã ã maroke-neik, <sup>2</sup>Odug nẽ naa mogo isin yeya anĩ, profet od, wogõya be, pas amã bunem isin ya anĩ karĩg fen, to kaisã terëg fen, wauĩ kui youf. <sup>3</sup>Naab taka taka bun, taka nem to idegneif nigin lo weleg, ere nigin, fau kiwai ketem wõ ye fen, lo wal fiya tamo, are daũ fiya bun ileya nẽ anĩ wõ ye bure fele di, naa are isiyof. <sup>4</sup>Ĩ kiwai ino fen, erëb erëb ganã waitou de fen, seli dabi-

dig anĩ ĩ farumen ineneid fen, ĩ yogo Negur nẽ tempel bun ibod ken, ĩ yogo nigin Negur ye kurõ fesiyof.

<sup>5</sup>Aya ã geid tabod ken, enei nigin arokeneidig anĩ, ã to karĩ welegef de? <sup>6</sup>Gama erëbem irounek are ã keleĩ, age fe di, fau yagon sain bun bagai, ĩ wõ youf. <sup>7</sup>Lo wal fiya nẽ waa megeir mogo kabĩ yalef, anĩ ere, ĩ gama irounek anim irouf ile iwaikalauf. <sup>8</sup>Age fe di, lo wal fiya tamo yaorouf, ĩ Odug Jesus in awa yau nesyam yukeis fen, Odug isiya nẽ medeïya anim ĩ daũ falauf. <sup>9</sup>Lo wal fiya tamo nẽ isiya, de Satan nẽ kabĩ ado susu fel, idegëya memelik, uris ado, erëb urug bagai fire fire ganã inodiyof. <sup>10</sup>Agef fen, sesen ganã bunem idi inanakelef anidi idegnëdiyof. Idi inanakelef, ere nigin, idi momoi nigin waud laaf fen, kel gei fediyof anĩ diton. <sup>11</sup>Age fiya nigin, Negur idegëya total sur fe di, idi anĩ nigin momoi douf. <sup>12</sup>Are idi momoi nẽ nigin to momoi de fen, sesen nigin waud al fen anidi ganã, Negurem es fediyof nigin age fef.

### Megeir Ifareya

<sup>13</sup>Anĩ ere, amã faimud, ã, turamã tar Odug nẽ oboi nigin, Negur de mafiyëf bagai, ere nigin, gariya bun, Negur, Awa Uur ã fateul ineneïya nigin kabĩ yalef bunem ado, ã momoi nẽ nigin momoi gef bunem, kel gei yeif nigin igrinein. <sup>14</sup>Ĩ nemã biya od bunem enei bun iweignein, are ã neda Odug Jesus Kristus nẽ fula fiya medeïya anĩ walogouf nigin age fen. <sup>15</sup>Anĩ nigin, turamã tar, megeir ufareg fen, sigoramã wogõya bunem ado pas bunem, mafelnein anĩ uroug kafi wala-gauf.

<sup>16</sup>Neda Odug Jesus Kristus ĩ yogo ado Tamada Negur, ĩ ada nigin wau laa fen ado, yagon wau ifenëya bunem, faimud ibodkeleya nẽ wau yaleseyã ado wau iseyã biya ifanãdan anĩ, <sup>17</sup>ã wauĩ yaleseyã difenei ken, erëb erëb biya ganã ago gef ado od wogõya bun megeir difeneif nigin oromak.

### Kosë Nigin To Fiya

**3** Od idïya nigin, turamã tar, Odug nẽ od, ã bun age fef gen, kaisã bagai iyokel fen, tamo kayau atun fula fiya medeïya yalouf nigin, amã nigin kosë gouf.

<sup>2</sup>Agog fen, amã tamo idodõya ado sesen bun tamãl yalelnamãf nigin kosë gouf, ere nigin, tamo ganãnem momoiya sã. <sup>3</sup>Anĩ ere, Odug ĩ yagon od dõ fiya biya, ĩ ã megeir ifenei ken, Satan bun tamãl kulatun yeif.

<sup>4</sup>Amã Odug bun momoi mauf, are amã ã marokeneik anĩ ago gef ulagauf. <sup>5</sup>Odug ãgenei wauĩ itoneĩ di, Ne-

gur nē wau laa fiya ado Kristus nē feseya sā megeir ifareya bun ilauf nigin oromak.

### Fõ Temeleid Wedereid Irouya

<sup>6</sup> Odug Jesus Kristus yana bunem, turamã tar, amã ã marokeneik, tureĩ tar fõ temeleid ganan, amã mafelnein kilei to mata dibodõdig anidi so wiyẽdigouf.

<sup>7</sup> Amã age mafen anĩ naig ge dõ gouf nigin, ã aug keleĩ. Amã ã geid tabodon sain bun, amã to fõ faman.

<sup>8</sup> Age ma fen, amã taka nē saaf na yaleya sā to mon. Age fiya ban, amã ã atun taka morõ to mafenēf nigin, bõ ado gaa ado kabĩ total malen. <sup>9</sup> Amã ã bun tamal isennēya yaleya kisi feleya, anĩ ere, to age mafen, ere nigin, ã amã bun ulemãg fen, ãg agog dõ gouf nigin.

<sup>10</sup> Amã ã geid tabodon sain bun, amã nun enei mafenein: "Taka ĩ kabĩ to yalouf are, ĩ saaf to yãf."

<sup>11</sup> Amã ã atun tunĩ fõ temeleid yeya anĩ karĩ maun. Idi fõ temeleid, anĩ ere, idi dogo nigin kabĩ to dale fen, ta-

ka nigin dogol wogoĩ dedig. <sup>12</sup> Tamo age fediya nigin, Odug Jesus Kristus yana bunem, amã total bagai moro ken, wedereid marouf, dē desil fen, dogo naumeid nigin kabĩ dalouf. <sup>13</sup> Aug nigin, turamã tar, biya ago gouf nigin to fõ yeĩf.

<sup>14</sup> Taka ĩ pas enei bun marokeneik anĩ to dõ fouf are, dē wiyẽ kalagouf. ĩ mama fouf nigin, weim to nigal ũgouf. <sup>15</sup> Anĩ ere, ĩ kiwai gen to ulogouf, ĩ tureĩ gen weder urougouf.

### Idikeleya Nē Aanya

<sup>16</sup> Gama wau inosiya nē Odug ĩ yogo, sain ganan bun, naab ganan bun, wau inosiya ifeneĩf. Odug ã ganan geid ibodõf.

<sup>17</sup> Aya, Pol, aya imaum aanya enei atotof, are neu pas ganan bun aya yug imauba. Aya eig afe atotodig.

<sup>18</sup> Neda Odug Jesus Kristus nē wau ifenēya ã ganan bun ibodõf.

# 1 TIMOTI

**1** Aya, Pol, Negur neda Isennadaya ado Kristus Jesus neda wauda iseya neid nigiya od bunem Kristus Jesus nē aposel wō aun,  
<sup>2</sup> Timoti, momoiya bun neu kesu bagai, bun pas enei atotof.

Tamada Negur ado neda Odug Kristus Jesus neid wau ifenēya, wau yūya ado, wau inosiya, ò bun ibodōf.

## Idegēya Lo Tai Fiya Tamo Nigin Weder Irouya

<sup>3</sup> Aya Masedonia provins alauf sain bun, aya ò total bagai arokonon, Efesus an ubod ken, tamo tunī uro-kenēdi di, idegēya keleī anī baban to tai difediyouf.

<sup>4</sup> Ago di, idi nenerī ege ado ibor idikeleya sā dir difedig anī so difediyouf. Age fediya are momoiya bunem Negur nē kabī yaleya ban, luwa irouya dogol dalese-dig. <sup>5</sup> Weder irouya od enei nē gariya are, wau laa fiya, are ī wau karētut, es fiya kisi biya ado, momoiya bagai bun tamal isidig. <sup>6</sup> Tunī enei bunem diya dile, od kaū sā wogōya bun dilelen. <sup>7</sup> Idi lo tai fiya tamo wōya orodif, anī ere, idi ereb wogō def ado, ereb nigin total dinof are idi keleī sā.

<sup>8</sup> Ada keleī, taka ī lo dōf el foug are, lo ī biya. <sup>9</sup> Ada keleī, lo ī madur tamo nigin to inof, ī lo wal fiya, idodōya, Negur dudum fiya, mosor temeleid, idi fateul sā, idi buru naumeī nigin kisi difedig, idi sineid temeid tar didenkesif, tamo yukesiya, <sup>10</sup> noliya, tamo tutur kayau tutur noliya, ferfer inouf nigin tamo bē yaleya, idegēya, momoi nē od wa fiya, ereb ganan ifelnēya biya wal difef anidi nigin lo inof. <sup>11</sup> Ifelnēya biya anī, biya od fula fiya medeīya, Negur el fiya barikā aya wogōya nigin ifanan anī susu felef.

## Odug Nē Wau Ifenēya Pol Bun Ilen

<sup>12</sup> Aya neda Odug Kristus Jesus megeir ifanan anī de afiyek, ere nigin, ī aya yogon od dō fiya biya anī ile fen, in kabī alouf nigin igirnan. <sup>13</sup> Aya kulu kono fiya tamo, tadū fediya tamo, seye tamo, anī ere, aya wau yūya ifanan, ere nigin, aya to kelei ken, momoiya sa ken, age afen. <sup>14</sup> Neda Odug nē wau ifenēya, Kristus Jesus nē momoiya wau laa fiya ado, mugi bagai aya bun foula felen.

<sup>15</sup> Od enei momoi bagai, ganan dale fen, momoi douf nigin: Kristus Jesus mosor tamo kel gei fiya nigin tenebur isin. Idi atun aya sane bagai, idi ganan wal fediya. <sup>16</sup> Anī ere, gariya eig fiya nigin, aya wau yūya ifanan, are aya mosor temeleid ganan wal fediya bun, Kristus Jesus in imatēya mugi bagai aya bun ifelnēdin, anī bunem idi momoi douf anidim dile fen, ī nigin mo-

moi de fen, mata ibodkeleya anī dalouf nigin ī age fen. <sup>17</sup> Gama King ibodkeleya, ī mata ibodkeleya, ileya kisi feleya sā, Negur yogo dogol anī bun yana ado fula fiya medeīya gai gai ibodkalauf. Momoi.

<sup>18</sup> Timoti, neu kesu, aya tai fiya od eig fiya afonok, are ò nigin profet od wogōya yenen anī dō wo di, ò sā biya kusī wouf nigin. <sup>19</sup> Momoiya ado wau karētut biya urou kafī wol. Tunī anī ditoraran nigin dogo neid momoiya tadū difelen. <sup>20</sup> Age difen atun are Himeneus Aleksanda ado, idi Negur to kono difiyēf anī keleī youf nigin, Satan ima bun anenēdin.

## Negur Yana Yaleseya Nigin Fadedya

**2** Aya ò total bagai orokonok, uruwa bagai, are nonī fiya, kosēya, taka nigin Negur irokenēya, de fiyēya anī, tamo ganan nigin agouf. <sup>2</sup> King ado kabī nē mudur ganan nigin agouf, are ada wauda inosiya ado foro tausil, Negur orof ganan ado fateul bun tabodōf nigin agouf. <sup>3</sup> Agouf are biya, Negur neda Isennadaya wau al fef, <sup>4</sup> Negur ī tamo adok ganan kel gei foug nigin ado, momoi nē keleī bun disiyouf nigin orof. <sup>5</sup> Are, Negur ī tekelei, agef fen, atun tamo tekelei, Negur ado tamo atun ifaref, tamo are Kristus Jesus, <sup>6</sup> tamo ganan fotokar ī yogo bouwa itoron, anī yogon sain bun bagai Negurem tenebur tamo kayau keleī youf nigin yaoren. <sup>7</sup> Age fiya nigin, aya arū tamo, aposel igirnan, aya momoi bagai orok, aya idegēya sā, aya, haiden atun, momoiya bagai nē ifelnēdiya tamo igirnan.

<sup>8</sup> Tamo fō fō ganan imeid fateul ilun dales fen, kosē douf anī aya orouf, seye sā, monē sā.

<sup>9</sup> Takag, aya kayau kolos biya, taka mama ifenēya nē ani sā, tamo kayau nē lo fiya biya bun ifonūya anī orouf, fatiya kori fiya sā, gol sā, maaī tuwa meli bagai pel nē kilelei sā, meein odug nē kolos sā anī orouf. <sup>10</sup> Anī ere, aya idi tobonunā biya dō difoug anī orouf, are kayau Negur yana dalesef ya anī susu falauf.

<sup>11</sup> Kayau ī foro yel dē yesil fen, dō foug anī bunem keleī yalouf. <sup>12</sup> Aya kayaum tamo ifelnēya be, wal fiye ken, uyu iroukenēya nigin to yo auf, ī foro yalauf bagai. <sup>13</sup> Ere nigin, Adam ketem inon, agef fen, Eva inon. <sup>14</sup> Agef fen, Adam anī to idegnen, kayau anī idegnē di, mosor bun kubū yen. <sup>15</sup> Anī ere, kayau idi toku tobonunā biya bun momoi douf, waud laa foug, fateul dibodōf are, idi kesu gō fiya bun isennēya dalouf.

## Uyu Iroudiya Ado Uyu Iroudiya Farumen Kabī Tamo

**3** Od enei are momoi bagai: Taka ī uyu irouya wō youf nigin wau irōf, ī kabī biya yaleya nigin orof.

<sup>2</sup>Uyu irouya, yana sane sã, ï kayau aiwauuf, anï ere, ï kayau tekelei youf, ï molol tamo, yogo nigin el fe kultatun foug, ï karï difiyëf, tamo dor yalouf, tai fiya kisi feleya, <sup>3</sup>aai to yödïg, to kusï youf, imatëya, monëya sã, moni nigin wau laa fiya sã. <sup>4</sup>Ï kayau kesu el fe, lo fediyouf bagai. Age fe di, in kesu el de dö de fen, karï difiyëf. <sup>5</sup>(Taka ï yogon kayau kesu lo feid fen, tutuk fediya kisi feleya sãf are, naig fe fen, ï Negur në sios lo foug?) <sup>6</sup>Ï gama bagai momoiya tamo wö ye fen, to uyu irouya ifarauf bagai, age foug are, ï biläya bunem faskor fele di, Negur Satan es fiyen gen, ïg es fiyëf be. <sup>7</sup>Ï serë temeleid buneg yana biya adouf bagai, anï bunem, ï yana sane to yale fen, Satan në kor bun to ilauf.

<sup>8</sup>Uyu iroudiya farumen kabï tamo anidi, areg age fiya, tamo idi karï difiyëdidig, idi baleid to kara urudig, aai fatuk to dödig, idegëya bunem safina to daledig. <sup>9</sup>Idi momoiya në keleï mugï, kisi karëtut atata feleya ado dirouwauf bagai. <sup>10</sup>Uruwa idi kisi difedyouf, age de fen, idi bun od taka sãf are, utornëdig len, uyu irouya farumen kabï tamo wö de fen, tamo kayau disennëdiyof.

<sup>11</sup>Naab tekelei anï bunem, nedi aiweid tar idig karï difiyëdiyof, idi dumen od to wogö douf, anï ere, idi molol fen, erëb erëb ganan kultatun fiya kisi falauf.

<sup>12</sup>Uyu irouya farumen kabï tamo ï kayau aiwauuf, anï ere, kayau tekelei fen, in kesu tar ado fö erëb erëb ganan anï el fe, kultatun fediyouf bagai. <sup>13</sup>Idi kabï biya dalen, are yeneid biya bagai dalef, age de fen, idi Kristus Jesus bun momoiya nigin kukïya sã wogö def.

<sup>14</sup>Aya ö gein kaisã bagai isiya nigin wau yenek, anï ere, aya faded enei atotkonok, anï bunem, <sup>15</sup>aya foi auf are, tamo kayau Negur në fö bun naig de age difoug are ö keleï youf, Negur në fö anï mata ibodöya Negur në sios, are momoi në monog tor ado gariya. <sup>16</sup>Neda momoiya në waa anï odug, are taka nem wa fiya kisi feleya sã:

Ï bouwa ado wö yen,

Awa Uurem ï madur bagai anï yaoren,  
age fe di, engelem dilen,

age de fen, teneub ganan bun ï nigin wogö de,  
momoi de di,

fula fiya medëya bun yalesnen.

#### Pol Timoti Faded Fiyen

<sup>4</sup>Awa Uur yaor bagai irok, dum bun tunï fau momoiya ditor ken, idegëya uur ado erëb erëb kaa sesen idim difelnëdiyof anï, idi dö difoug. <sup>2</sup>Ifelnëdiya age fediya are, idegëya tamo neid meleid yaleya bunem isif, idi neid kisi ain uruwam ifalege di, galig leya gen. <sup>3</sup>Idi tamo kayau yaleya katü difiyëid fen, saaf tunï nigineg katü difiyëdiyof, saaf are Negurem tamo momoi de fen, momoi nigin keleï anidi Negur de difiyen ken, däf nigin inodin. <sup>4</sup>Ereb erëb ganan Negur inon are biya, erëb erëb Negur de fiye ken, yaleyauf anï, to sese fiyëyauf, <sup>5</sup>ere nigin, are Negur në od ado kosë bunem fateul ifenek.

<sup>6</sup>Ereb erëb enei turã tar bun ufelndiyof are, momoiya od ado ifelnëya biya dö wodig anim megeir

ifonö di, Kristus Jesus në kabï tamo biya wö wouf. <sup>7</sup>Negur ditoron anï në od ado kayau tubau neid nenerï ege anï to urou, Negur në tobonunã dö fiya biya wö wouf nigin, ö ogo tai wouf. <sup>8</sup>Bouwa buru në tai fiya are naal isennadaf, anï ere, Negur në tobonunã dö fiya biya are erëb erëb ganan nigin isennadaf, anim gama mata ibodöya në ado dumen mata ibodöya në promis od irouf.

<sup>9</sup>Od enei momoi bagai, ganan dale fen, momoi douf nigin <sup>10</sup>(enei nigin, ada kabï tale fen, lakï tafef), are ada neda wauda iseya mata ibodöya Negur bun tanon, ï tamo ganan në isennëya, idi momoi def anidi neid bagai.

<sup>11</sup>Ereb erëb eneidi urokeneïd, su agog wiyëid fen, ufelneïd. <sup>12</sup>Ö kesu oosi de fen, takam to lai yöi, anï ere, wogöya bun, ibodöya bun, wau laa fiya bun, momoiya bun, amuyë sã karëtut bun, momoiya tamo neid suma ago fen, idi age de dö difoug nigin ufelndiyof. <sup>13</sup>Atun meleid bun Negur në Itotoya uwesauf, faded wediyouf, ago fen, ufelndif ule mog, aya asiyouf. <sup>14</sup>Uyu irouya imeid ö teten dino fen, profet od bunem uur në ege luwa walen anï to welebi wo.

<sup>15</sup>Ö suma enei ganan dö fen, waü adok wenëdiyof, anï bunem, tamo kayau ganan ogon kabï naig fe ilef anï dilouf. <sup>16</sup>Ö ogo nigin ado ogon ifelnëdiya nigin lo walauf. Anï feseya sã toku agouf, anï bunem, ö ogo ado idi karï diyöf anidi isennëya walogouf.

#### Momoiya Tamo Kayau Kultatun Fediya Nigin

<sup>5</sup>Tamo tubau total bagai to kãkã wiyëf, anï ere, ö tamã gen urokenëf. Kesu oosi, turã tar gen walediyof, <sup>2</sup>kayau biyeid are sinã gen, kayau momoul are main tar gen, kisi karë bagai ado walediyof.

<sup>3</sup>Kayau waab bagai kesu sã anidi el ge lo wedigouf. <sup>4</sup>Anï ere, waab taka ï gere tar be, tubu tar adouf are, uruwa idi neid Negur dö fiya në tobonunã biya tai fiya nigin, idi neid ibor el de kultatun difoug, nedi sineid temeïd tar simö bun lo difedin anï kilei abag age de kultatun difedyouf, anim Negur wau al foug. <sup>5</sup>Kayau waab bagai taka, ï mugu bagai, isennëya yaleya nigin yogon wau iseya Negur bun ino fen, bö ado gaa ado toku kosë ye fen, Negur bun isennëya yaleya nigin to fiyëf. <sup>6</sup>Anï ere, waab taka ï bouwa sigigi fiya nigin dogol ibodöf are, ï mata ibodok, anï ere, ï laa fen. <sup>7</sup>Faded eneig tamo kayau wenëdiyof, ago di, taka bouwa bun od to dinouf. <sup>8</sup>Taka ï yogon ibor tar to kultatun fediyouf, yogon sina tama kayau kesu bagai anï to kultatun fediyouf are, in wau momoiya wa fef, anï bunem, ï sane bagai, taka to momoi yef anï wal fiya.

<sup>9</sup>Waab taka ï aiwa tekelei ado el de dibodok dile 60 yar wal fen ouf are, waab neid daü bun unenëf, <sup>10</sup>agef fen, ï yogo tobonunã biya nigin yana ado, ï kesu kulat biya, ï tamo yaledig, momoiya tamo kayau yeid kulo fedig, morö adodo isenneïd fen, ï yogo erëb erëb biya ganan age fedig.

<sup>11</sup>Kayau waab fau gaü idi, waab neid daü bun to unouf. Ere nigin, idi neid bouwa në oroya anï, Kristus nigin momoiya anï wal fese di, idi tamo yaleya nigin

orodiyouf. <sup>12</sup> Anĩ bunem, idi es fiya dogo bouweid bun dinof, ere nigin, idi uruwa bun waud kuturol fen iron anĩ narĩ difen. <sup>13</sup> Takag, idi fõ fiya tobonuneid ado fen, fõ fõ dalef diyõdig. Fõ fiya dogol sã, dumen od wogõya ado, taka nigin wogõ yef iyõya, idim to wogõya nẽ anĩ wogõ dedig. <sup>14</sup> Anĩ nigin, kayau waab fau gaũ, tamo dalouf, kesu adouf, nedi fõ el de lo difouf, kiwaim idi dumedin irõya nigin naab to dukenẽdiyof anĩ aya orouf. <sup>15</sup> Tunĩ mogo ditor ken, Satan dõ difen.

<sup>16</sup> Kayau taka ĩ momoiya ado, in ibor bun waab adodiyof are, ĩ yogo isennẽdiyof, idi nigin sios morõ to ifenẽf, anĩ bunem, sios waab idi isennẽdiya nigin bagai yenek anidi isennẽdiyof.

<sup>17</sup> Uyu irouya sios nẽ kabĩ el de diroulef, yana biya ado mala solo biya bagai dalouf, are idi biya od wogõ def ado difelnẽdif anidi, age difouf bagai. <sup>18</sup> Negur nẽ Itotoya eig ye irok, "Bulmakau wit faat biya nẽ gabar yalelauf nigin lalai feid mog, yogon awa to ufokol," † takag, "Kabĩ tamo, yogon kabĩ mala yalouf." ††<sup>19</sup> Uyu irouya taka nigin bouwa yũya od to urouwauf, fau uruwom be towom dirõ di, anĩ urouwauf. <sup>20</sup> Idi mosor dinof are tamo kayau meleid bun ou wiyẽdiyof, are tunĩ wedereid fokõ youf nigin agouf.

<sup>21</sup> Negur, Kristus Jesus ado, engel igirnẽdin meleid bun, aya õ total bagai orokonok, faded enei dõ fen, taka dogol waũ to wenẽf, õ anĩ kinau ya anĩ bunem ereb taka to agouf.

<sup>22</sup> Tetedin imã inoya nigin to sibu wo, tunĩ neid mosor bun to kababal wo. Õ karẽ bagai ubodõf.

<sup>23</sup> Naan dogol to wãf, wain naal bagai walouf, ere nigin, ogon name darau nigin ado, ogon dagi baba baban wõ yedig nigin.

<sup>24</sup> Tamo tunĩ neid mosor are yaor, anĩ ketem es fiya bun ifaref, anĩ ere, tunĩ neid mosor dum yaorouf.

<sup>25</sup> Age fiya gen bagai, biya age fiya are yaor, idi biya age fiya gama yaor sã areg, iminẽya kisi feleya sã.

**6** Ferfer idi ganam, nedi moroid tar yana biya dino fen, karĩ difiyẽdiyof, anĩ bunem, Negur nẽ yana ado ama mafelnẽdif anĩ, to kono difouf. <sup>2</sup> Tunĩ idi, nedi moroid tar momoiya adouf are, amã tura tura de fen, to karĩ difiyẽdig gen to age difouf. Age fiya ban, idi el de aruneid dalouf, ere nigin, idi neid kabĩ bunem biya dalef are momoiya tamo, idi neid oboiyeid. Enei ganam anĩ ufelnẽid fen, total bagai urokenẽdiyof.

### Moni Nigin Wau Laa Fiya

<sup>3</sup> Taka ĩ idegẽya keleĩ ifelnẽid fen, Odug Jesus Kristus nẽ faded fiya biya ado fateul ibodõya ifelnẽdiya anĩ nigin wau to irõf are, <sup>4</sup> ĩ idegẽyam idegnẽ di, bilã yef, ĩ ereb taka to keleĩ. ĩ monẽya ado od luwa irouya nigin

oroya sane ado, anĩ bunem, kiyẽĩ, kusĩ, bou yũya od, sisiniya kisi sane irou fen, <sup>5</sup> tamo kisi sesen ado atun toku koũkã ya ibodõf, tamo kisi sesen ado anidi, momoi anĩ ditor ken, fateul ibodõya are moni odug yaleya nigin de fen, kisi difedig.

<sup>6</sup> Anĩ ere, safina nigin wau morõ sã ado fateul ibodõya anĩ, mala biya ado. <sup>7</sup> Ere nigin, ada teneub enei bun gemũ tasin nigin, age fiya bagai gemũ ke tauf. <sup>8</sup> Anĩ ere, ada saaf ado kolos adouf are, ada nigin de tauf. <sup>9</sup> Tamo kayau safineid ado ibodõya kisi difef anidi, kisi fiya bun, kor bun ado, neneya kisi ado willa dĩ fiya kisi musei bun kuku def, kisi anim tamo daũf sã ne lauf. <sup>10</sup> Moni nigin wau laa fiya, are ereb ereb sesen ganam nẽ gariya. Tamo kayau tunĩ moni nigin waud ditenen, momoiya ditor ken, idi dogo waud darau musei dalen.

### Polem Timoti Ago Dõ Woi Fiyen

<sup>11</sup> Anĩ ere, õ, Negur nẽ tamo, enei ganam nigin so rel fen, madur bagai ibodõya, fateul ibodõya, momoiya, wau laa fiya, feseya sã ifareya ado, molol dõ wouf.

<sup>12</sup> Momoiya nigin kusĩ biya walouf. Mata ibodkeleya are, õ musei meleid bun el wo, kurõ wesin sain bun, õ anĩ nigin iweignon anĩ urou kafĩ wol. <sup>13</sup> Negur ereb ereb ganam mata ifenẽdidig ado, Kristus Jesus ĩ Pontius Pailat mala bun el fe kurõ fesin, idi meleid bun, aya õ orokonok, <sup>14</sup> od enei dõ, kerema sã dõ wo ule, neda Odug Jesus Kristus wõ youf, <sup>15</sup> are Negur yogon sain bun irou isiyof, Negur ĩ el fiya ado ĩ dogol Uyu Irouya, king neid King ado odudug neid Odug, <sup>16</sup> ĩ dogol ĩ mata ibodkeleya, agef fen, ĩ lalan medeĩya barikã tamom an ileya nigin kisi feleya sã anĩ bun ibodõdig, taka nem to ilen, taka nemeg to ilouf. ĩ bun yana ado megeir fai-mud ibodkalauf. Momoi.

<sup>17</sup> Teneub enei bun safina musei adodo urokenẽdig len, yeneid to dales fen, moni nigin waud to diten, moni are gai to ibodkalauf, anĩ ere, idi neid waud Negur bun dinouf, ĩ ada wauda al fouf nigin, ereb ereb ganam kisi feleya ifanadadig. <sup>18</sup> Idi tobonunã biya age dife di, tobonunã biya inid ado dibodõf nigin, dor yaleya nigin ado, ne tã isennẽya nigin urokenẽdiyof. <sup>19</sup> Naab enei bunem, idi safina biya dogo neid dumen nẽ nigin gariya megeir ado dino fen, mudu dino di, iselauf, age de fen, idi mata are mata bagai anĩ dalouf.

<sup>20</sup> Timoti, ereb ereb õ bun inon anĩ kulatun wo. Momoiya sã neid od ado, kiwai kisi are idegẽya bunem keleĩ biya dedig anĩ so wiyẽ, <sup>21</sup> are tunĩ mogo wogõ den, anĩ age de fen, idi momoiya bun tamal ditor diyalelen.

Wau ifenẽya õ bun ibodõf.

† Diuteronomi 25:4 †† Luk 10:7

## 2 TIMOTI

**1** Aya, Pol, mata nē promis od, are Kristus Jesus bun ibodok anī kilei, Negur nē oroya bunem Kristus Jesus nē aposel wō aun,  
<sup>2</sup> Timoti, neu kesu oboiyou bun pas enei atotof.  
 Tamada Negur ado neda Odug Kristus Jesus neid wau ifenēya, wau yūya ado, wau inosiya, ò bun ibodōf.

### Momoiya Megeir Ifareya Nigin Wau Yaleseya Od

<sup>3</sup> Aya ò nigin, toku bō ado gaa ado, neu kosē bun karī aul fen, aya, neu talik tar age difen gen, Negur mala bun kisi karē bunem, Negur aruna aledig anī, de afiyek. <sup>4</sup> Ogon maru nigin karī aul fen, ileyōya nigin wau fatuk irok, are aya wau fatuk al foug nigin age afef. <sup>5</sup> Aya ogon momoiya idegēya sā anī karī aulen, momoiya anī, uruwa bun ogon tubū Lois sinā Yunis ado bun ibodon gen, aya momoi auf, are ò buneg agef ibodok. <sup>6</sup> Anī nigin, Negur nē ege luwa anī kebu wo di, futu rouf nigin wederē fokō afef, Negur nē ege luwa are imau teten anon anī bunem ò bun ibodok anī. <sup>7</sup> Negur ada kumī nē uur to ifanadan, anī ere, megeir nē, wau laa fiya nē ado, ada dug kulatun fiya nē uur ifanadan.

<sup>8</sup> Anī nigin, ò neda Odug kurō fesiya nigin ò to mama yōf, aya ī nigin kalabus bun abodok nigineg to mama yōf. Anī ere, Negur nē megeir bunem, ò aya ado bagu ta fen, biya od nigin darau talouf. <sup>9</sup> Negur ī kel gei fada fen, fateul ibodōya bun iweignadan, are ada ereb taka age tafen anī bunem sā, anī ere, ī yogon wau irōya ado wau ifenēya bunem ī age fen. Wau ifenēya enei, Kristus Jesus bun tetunem fau sain gariya inoya sā mog, ifanadan. <sup>10</sup> Anī ere, wau ifenēya anī gama neda Isennadaya, Kristus Jesus wō yen anī bunem yaoren, ī laa anī narī felen, agef fen, biya od bunem, mata ado faimud ibodkeleya anī yaor fen. <sup>11</sup> Biya od enei nigin aya soosi tamo, aposel ado ifelnēya tamo igirnan. <sup>12</sup> Age fiya nigin, aya darau enei alef, anī ere, aya to mama fiyaf, ere nigin, aya aib nigin momoi aun are aya keleī, Odug nē naa anī nigin, ereb aya ī kulatun foug nigin afenen are, ī lo fiya kisi feleya are aya keleī.

<sup>13</sup> Ereb aya bun tamal karī won, ifelnēya biya anī, Kristus Jesus bun momoiya waū laa fiya ado, el wo dō fen, urou. <sup>14</sup> Awa Uur Fateul ada namedan ibodok anī nē megeir bunem, ereb ereb biya ifonon anī kulatun wo.

<sup>15</sup> Ō keleī, Asia provins bun ganan ditornan, idi atun Figelus Hermogenes adog.

<sup>16</sup> Odug, Onesiforus nē ibor bun wau yūya ifelnēdiy-ouf nigin aya orouf, ere nigin, ī sain musei wau filolō

fiya bunem el fiyadig, aya kokolin difiyan nigin to mama fen. <sup>17</sup> Ī Rom taun ibodon sain, aya nigin fatuk bagai imirnaf ile, dum fotou fiyan. <sup>18</sup> Odug nē wau yūya, Odug nē naa anī bun, Odug ī ifenēf nigin aya orouf! Ō keleī bagai, ī naig fe naab musei bun Efesus taun oun isennan.

**2** Anī nigin, ò, neu kesu, Kristus Jesus nē wau ifenēya bun megeir uno. <sup>2</sup> Musei meleid bun aya wogō au di, karī won anī, karīya biya tamo anidi ufelnēdiyof, ago di, idi bagam tunī ifelnēdiya kisi feleyauf. <sup>3</sup> Kristus Jesus nē kusī tamo biya gen, ò amā geid darau karī taul fen, tafarauf. <sup>4</sup> Kusī tamo ī tamo ege neid tobonuneid to kababal fef, ī yogon mudur ado anī wau al foug nigin orof. <sup>5</sup> Age fiya gen, gudu reya tamo ī gudu ref, ī gudu reya nē suma to dō foug are, ī uyu irouya nē teter to yalouf. <sup>6</sup> Kabī tamo kabī to- tol yaledig ī, ketem kaū yalouf. <sup>7</sup> Aya orok anī kisi wo, Odug enei ganan nigin kisi fokō fonōf.

<sup>8</sup> Jesus Kristus laa bunem kel fā yen ī, Dawid nē ibor bun tamal anī karī walauf. Enei are neu biya od, <sup>9</sup> enei nigin aya darau ale fen, mosor tamo gen kokolin difiyan. Ani ere, Negur nē od kokolin fiya sā. <sup>10</sup> Anī nigin, aya igirnēdin anidi nigin, ereb ereb ganan bun feseya sā afaredig, are idig isennēya Kristus Jesus bun ibodok anī, fula fiya medeīya ibodkeleya ado dalouf nigin age afedig.

<sup>11</sup> Od enei momoi bagai:

Ada ī weim gare taun ouf are,  
 adag ī weim mata tabodōf.

<sup>12</sup> Ada feseya sā tafarauf are,  
 adag ī weim lo fiya nē mudur tabodōf.

Ada ī nigin wa tafouf are,  
 īg ada nigin wa foug.

<sup>13</sup> Ada to dō tafoufeg,  
 ī de agef dō foug,

ere nigin, ī yogo nigin wa fiya kisi feleya sā.

### Kabī Tamo Negurem Ile Fen, De Yen

<sup>14</sup> Idi ereb ereb enei nigin toku wedereid fokō wouf. Negur mala bun, od luwa irouya nigin wedereid urou, are kaū sā, are karī def anidi tadū difedidig dogol. <sup>15</sup> Ō Negur mala bun, kabī tamo ile fen, de youf, are kabī tamo ī yogon kabī nigin to mama foug, ī momoi od tutuk ifelnēdiya nē kabī el fe irouwauf anī, wō wouf nigin, kabī total bagai walouf. <sup>16</sup> Negur sā ado kaū sā nē od so wiyēf, ere nigin, idi anī bun dilelef are, fau gai momoiya sā bagai wowā douf. <sup>17</sup> Idi neid ifelnēya kaisā bagai gedi gen iyokalauf, idi atun are Himeneus Filetus



ado, <sup>18</sup> idi momoi nē anī so difiyē diyalelen. Idi dirōdig, mata kel fāya are mogo wō yen, age de fen, tunī neid momoiya daū difef. <sup>19</sup> Anī ere, Negur nē gariya totol ifaref, itotoya enei bun megeir fef, “Aib idi yogon are Odug ī keleī,” † ado, “Ganan idi Odug yana kurō difesif, sesen bun tamal falei douf bagai.”

<sup>20</sup> Fō odug taka bun, safina ereb ereb gariya fire fire nem dinon are dibodok, tunī gol ado silwa nem, tunī aa nem ado mafer nem dinon, tunī kabī odug ifenēya nē ado tunī kabī nanaal ifenēya nē. <sup>21</sup> Tamo taka ī, sesen enei bun tamal amuyē anī kulo felef are, ī fau kabī biya ifenēya nē wō youf, ī fateulouf, Marau mala bun, kabī biya yaleya kisi feleya wō ye fen, kabī biya ganan ifenēya nē wō youf nigin saika foug.

<sup>22</sup> Oosi nē bouwa oroya sane so wiyē, ago fen, madur bagai ibodōya, momoiya, wau laa fiya ado, wau ino-siya anī, aib idi waud karētut bun Odug diweignek anidi geid, dōg. <sup>23</sup> Neneya ado wadā keleī nē luwa irouya anī to fedē wo, ere nigin, ō keleī, are anī bunem kiwai wō yedig. <sup>24</sup> Odug nē ferfer to kusī youf bagai, age fiya ban, ī tamo kayau ganan nigin imatēya ifelnēdiyof, ifelnēdiya kisi feleyauf, to seye youf bagai. <sup>25</sup> Idi ī kiwai difenek anidi molol nem wedereid urouwau, ago di, Negur idi waud falei fe di, idi momoi nigin keleī youf nigin wau iseya adouf. <sup>26</sup> Anī bunem, idi wedereid fokō ye fen, Satan nē kor bun tamal, in oroya dō difouf nigin Satan gei fedin anidi ditor diyawauf.

#### Idikeleya Naa Bun Tamo Kayau Negur Ditorōf

**3** Anī ere, enei keleī youf. Idikeleya naa bun, morō odug wō youf. <sup>2</sup> Tamo kayau dogo nigin waud laa foug, moni nigin waud laa foug, yeneid dalesauf, aya aya yeya, Negur kono difouf, sineid temeid sigoreid wal difouf, disennēdi di to de difiyēdiyof, fateul to dibodōf, <sup>3</sup> wau laa fiya sā, kiwai nigin weder tu keleya sā, taka dumen wogōya, yogo nigin kulatun fiya biya sā, nirāya, tobonunā biya nigin kiwai inoya, <sup>4</sup> ne tā kiwai ifenēya, sibuya, kisim aya aya yeya, Negur nigin wau laa fiya ban bouwa nē oroya nigin wau laa fiya, <sup>5</sup> bouwedim dogol Negur nē tobonunā dō dife fen, in megeir wa difouf. Idi age fediya so weid.

<sup>6</sup> Age fediya anidim naab dimirek dile, fō bun dile fen, kayau maleg didegneīd, dogo neid kisi ulum diroukenēdidig, kayau mosor beberikā anidi, oroya sane fire fire bun waud dalesedig, <sup>7</sup> kayau idi gai toku keleī daledig, anī ere, momoi anī to bagai keleīdig. <sup>8</sup> Janes Jambres ado Moses kiwai difenen gen, tamo enidig momoi anī kiwai difenek, tamo anidi kisi gelele fiya ado, momoiya sā nigin itornēdin. <sup>9</sup> Anī ere, idi gerō bai to dilauf, ere nigin, tamo uru age difen gen, idi neid kū fenēya tamo kayau ganan meleid bun kaisā yaorouf.

#### Polem Timoti Ago Dō Woi Fiyen

<sup>10</sup> Anī ere, neu ifelnēya, neu tobonunā, neu kisi gariya, neu momoiya, sain meluk totol ifareya, wau laa fiya, feseya sā ifareya, <sup>11</sup> kafī fiya, darau, naig be fiya

Antiok, Ikonium ado, Listra taun bun darau morō aya alen anī ganan ō keleī. Anī ere, Odug anī ganan bun tamal yalelnan. <sup>12</sup> Momoi, tamo kayau ganan, idi Kristus Jesus bun Negur nē tobonunā dō difouf nigin orodiyof are, idi morō dalouf. <sup>13</sup> Agef mog, tamo sesen ado idegēya tamo, sane bunem sane bagai lauf, tunī didegneīd mog, abag didegnēdiyof. <sup>14</sup> Anī ere, ogo nigin, ereb ō keleī wale fen, momoi won anī toko tokō wo ule, ere nigin, idi difelnon are ō idi nigin keleī. <sup>15</sup> Agef fen, ō simō bunem Negur nē Itotoya fateul kelein, are ō isennō di, kisi biya wale fen, Kristus Jesus nigin momoiya bunem, kel yaleyōya kisi feleyauf. <sup>16</sup> Negur nē Itotoya ganan are Negur awa uur neseya bunem, are ifelnēya, sakāya, madur fiya ado, madur ibodōya tai fiya nigin biya. <sup>17</sup> Age fe di, Negur nē tamo, kabī biya ganan yaleya nigin kisi feleya bagai youf.

**4** Negur ado, Kristus Jesus ī isi fen, in tano inouf sain bun, ī mata dibodok ado gare den anidi es fe-diyof anī, idi meleid bun, aya od enei totol bagai arokonok. <sup>2</sup> Biya od wogō wo; biya od wogōya nigin, sain biya bun ado sain sane bun dodok wo, sain meluk feseya sā ifareya ado faded fiya bunem, madur wo, totol od urokenēīd, waud walesauf. <sup>3</sup> Sain fau isiyof bun, tamo biya od nigin to wedereid dinouf. Age fiya ban, idi dogo neid oroya dō dife fen, wederedim karīya nigin gegeī fedidig anī karī douf nigin, idegēya ifelnēdiya tamo musei gou difediyof. <sup>4</sup> Idi fau momoi anī ditor ken, wedereid fitok du ken, nenerī ege anī karī douf. <sup>5</sup> Anī ere, ō ereb ereb ganan bun kisi fokō wol fen, morō faali wo, soosi kabī wale, ogon kabī ganan wale anī kisi falauf.

<sup>6</sup> Aya mogo wain sesewi fiya gen fi afalau fenē, agef fen, neu ileya sain mogo isil. <sup>7</sup> Aya biya kusī aun, aya gudu reya mogo bure afelen, aya momoiya kafī afelen. <sup>8</sup> Gama aya nigin, madur bagai nē teter dodok fe ibodok, are Odug, Es Fiya Tamo madur bagai, fau naa anī bun ifanau fenē, anī ere, aya dogol sā, idi in isiya tari difef anidig ifenēdiyof.

#### Pol Timoti Ī Gein Kaisā Isiyof Nigin Irokenen

<sup>9</sup> Aya gein kaisā bagai usiyof nigin kabī totol wale. <sup>10</sup> Ere nigin, Demas ī tenebur enei nē nigin wau laa fen nigin, itorna fen, Tesalonika taun ilen. Kresen ī Galesia provins ilen, age fe di, Taitus ī Dalmesia distrik ilen. <sup>11</sup> Luk dogol aya ado mabodok. Mak wale fen, urom usig, ere nigin, ī neu kabī nigin isennaya kisi feleya. <sup>12</sup> Aya Tikikus Efesus taun sur afen. <sup>13</sup> Ō usiyof sain bun, neu saket meluk Karpus nē fō bun Troas taun oun atoron anī wale urou usiyof, neu buk kori fediya anīg urou usiyof, anī atun neu buk kori fediya meme gabar bun itotoya nē anī to bagai utorōf.

<sup>14</sup> Aleksanda ain kabī tamo ī, aya gai kiwai totol bagai ifanan. Odug fau ī ereb age fen anī nigin mala solo sane ifenēf. <sup>15</sup> Ōg ī nigin lo welei, ere nigin, ī neda od nigin totol bagai kiwai inon.

<sup>16</sup> Aya uruwa kot bun afaren sain, takam to isennan, anī ere, ganan ditornan. Anī nē mala solo to ifenēdiyof nigin aya orouf. <sup>17</sup> Anī ere, Odug aya sirun ifar fen,

† Namba 16:5

megeir ifanan. Age fe di, aya bunem biya od kisi feleya bagai wogõ au di, haiden ganan karĩ douf nigin age fen. Agef fen, aya laion awa bun tamal yalelnan.

<sup>18</sup> Odug fau kiwai sane ganan bun tamal yalelna fen, karika bagai in saa tanon irou iseleyauf. Ī bun fula fiya medeīya gai gai ibodkalauf. Momi.

#### Idikeleya Nē Aanya

<sup>19</sup> Prisila, Akwila ado, Onesiforus nē ibor tar geid, aanya enei wenēdiyof. <sup>20</sup> Erastus Korin taun ibodon,

agef mog, aya Trofimus dagi mog, Miletus taun oun atornen. <sup>21</sup> Yau sain fau mog, ein kaisā usiyof nigin kabĩ total wale. Yubulus, Pudens, Linus, Klodia ado momoiya turã tar ganan aanya sur difonok.

<sup>22</sup> Odug ogon uur ado ibodõf. Wau ifenēya ã bun ibodõf.

# TAITUS

**1** Aya Pol, Negur nē ferfer, Jesus Kristus nē aposel, Negur igirnēdin neid momoiya nigin ado, momoi nē keleī uyu irou di, idi fateul bagai dibodōf nigin, igirnan, <sup>2</sup> momoiya ado keleī anī, mata faimud ibodkeleya nē wau iseya bun ibodok, mata faimud ibodkeleya anī nigin Negur ī to idegēdig, fau sain gariya inoya sã mog, wau kuturol fen, promis od iron. <sup>3</sup> Agef fen, yogon sain bun bagai, Negur neda Isennadaya ī irō di, aya biya od wogōya kabī ifanan anī bunem wogō au di, in od yaoren,

<sup>4</sup> Taitus, neu kesu bagai, ada momoiya tekelei ado ð bun pas enei atotof:

Negur Tamada ado Kristus Jesus neda Isennadaya neid wau ifenēya ado wau inosiya ð bun ibodōf.

## Taitus Nē Kabī Oun Krit Nuyo

<sup>5</sup> Aya Krit nuyo an atornon anī nē gariya are, erab bure felediya san anī madur woid fen, taun ganan bun uyu irouya, aya ð orokonon gen ugirnēdiyof nigin.

<sup>6</sup> Uyu irouya are ī bouwa od sã, kayau tekelei aiwa, tamo ī ne gere tar momoiya ado, tetēya, idodōya sã.

<sup>7</sup> Sios lo fiya tamo ī, Negur nē kabī ifenēya nigin, ī bouwa od sã, to aya dogol yedig, kaisã to name isedig, aai fatuk to yōdig, to kusī yedig, idegēya bunem safina to yaledig. <sup>8</sup> Agef mǎ, ī tamo yaledig, erab biya nigin wau laa fedig, ī kisi biya ado ibodōdig, madur, fateul, ī yogo nigin biya kulatun fedig. <sup>9</sup> Ī momoiya od difelnen anī irou kafī falauf, anī bunem, ī sã tunī keleī biya bunem waud yalesauf, agef fen, ī idi keleī biya od nigin kiwai dinon anidi faded fiyēdiyof bagai.

<sup>10</sup> Ere nigin, an idodōya tamo, od kaū sã, idegēya temeleid musei difaref, idi atun mulū bun temeleid anidim age difedig bagai. <sup>11</sup> Idi sigoreid ufofāf, ere nigin, idi idegēya bunem safina yaleya nigin to ifelnēya nē anī difelneid fen, fō fō adok daū difedif. <sup>12</sup> Idi neid fonō profet taka eig ye iron, "Krit tamo kayau idi faimud idegēya temeleid, gaar kuī sane gen, fō temeleid saaf weweneid." <sup>13</sup> Od enei are momoi. Anī nigin, totol od urokeneid, ou wiyēdiyof, ago di, anī idi neid momoiya biyau, <sup>14</sup> anī bunem, idi Juda neid nenerī kaū sã to karī douf, age de fen, idi momoi nē anī ditoron anidi neid od to dō difouf. <sup>15</sup> Karē bun temeleid bun, erab erab ganan karē, anī ere, idi amuyē kisi ado momoiya sã anidi bun, karē taka sã. Momoi, idi neid waud ado kisi es fiya sane len. <sup>16</sup> Idi Negur keleī dedig, anī ere, nedi tobonuneid bun, idi Negur nigin wa difedig. Idi sane bagai, idodōya temeleid, idi erab biya age fiya nigin kisi feleya sã.

## Ereb Mala Fire Fire Ifelnēdiyau

**2** Ò erab biya od wogō yef anī kilei ufelnēdiyof. <sup>2</sup> Tamo biyeid dogo nigin biya kulatun difouf nigin, idi anī karī difiyēdiyof nigin, idi kisi biya ado dibodōf nigin ado, momoiya, waud laa fiya ado, feseya sã ifareya bun madur dibodōf nigin ufelnēdiyof bagai.

<sup>3</sup> Age fiya bagai, kayau biyeideg karī del dibodōf nigin, taka dumen od to dirōf nigin, wain fatuk bagai to dāf nigin, agef fen, erab biya anī difelnēdiyof nigin ufelneid. <sup>4</sup> Ago di, idi, kayau momoul, nedi aiweid tar adodo kesu tar nigin waud laa fouf nigin, tai difedyouf, <sup>5</sup> idi dogo nigin, sã biya kulatun difouf nigin ado bouweid od sã dibodōf nigin, fō bun kabī dalouf nigin, tobonunā biya age difouf nigin ado, aiweid tar nigin karī difedyouf, age dife di, taka nem Negur nē od to kobu fouf nigin, kayau momoul tai difedyouf.

<sup>6</sup> Age fiya gen bagai, kesu gaū, dogo nigin biya kulatun difouf nigin wedereid urou. <sup>7</sup> Erab erab ganan bun, idi dile fen, dō difouf nigin erab erab biya ago. Ogon ifelnēya bun, ð tutuk ifareya, wau adok ifelnēdiya bun ifenēya, <sup>8</sup> wogō biya tamo to kiwai difenēf nē anī ufelnēdiyof, ago di, idi kiwai difonok anī mama fediyof, ere nigin, idi ada nigin erab sane taka wogōya nigin are sã.

<sup>9</sup> Ferfer, erab erab ganan bun, nedi moroid tar karī difedyouf, waud al fiya difenēdiyof, aiteid to solo difouf, <sup>10</sup> idi bun tamal bē to dalouf, idi nedi moroid tar nē od dō fiya biya bagai anī difelnēdiyof nigin ufelnēdiyof, age dife di, naab ganan bun, idi age difef bunem, Negur neda Isennadaya nigin ifelnēya anī, tamo temeleid bun biya ile di, tamo neid oroya anī bun dinouf.

<sup>11</sup> Negur nē wau ifenēya, isennēya irou isidig anī, tamo ganan bun isin. <sup>12</sup> Anim, Negur nē tobonunā dō fiya sã ado tenebur nē oroya sane bun, "Bai" yeya nigin ifelnadadig, agef fen, ada dug nigin biya kulatun ibodōya, madur ibodōya ado, Negur nē oroya bun, gama sain enei bun ibodōya nigin, ifelnadadig, <sup>13</sup> agef mǎ, ada el fiya nē wauda iseya, are neda Negur odug ado Isennadaya, Jesus Kristus ī, fula fiya medeīya ado isiyof anī tarī tafouf, <sup>14</sup> Jesus Kristus ī yogo luwa ada nigin itoron, are ī sesen ganan bun tamal yalelnada fen, ī yogo nigin yogon tamo kayau bagai kulo fele di, idi erab biya age difouf nigin kabī totol dalouf nigin, ī age fen.

<sup>15</sup> Ereb ereb enei ò ufelnēdiyof. Ogon total ganan bunem, idi neid waud wales fen, wedereid urou. To loloum weid len, ò lai diyōf.

### Ereb Biya Anī Dōf Age Fouf

**3** Tamo kayau wedereid fokō wo, are idi lo fiya ado yeneid adodo tamo karī difediyof, to didodōf, idi biya age difouf nigin ololo difouf, <sup>2</sup> taka to bouwa bun od dūf, wau inosiya ado waud difenēdiyof, tamo ganan bun dimatkesiyof nigin ago.

<sup>3</sup> Adag kulu kisi neneya adon, tadodon, didegnadan, tenebur nē oroya fire fire ado bouwa nē oroya fire fire nē ferfer tabodon. Ada tobonunā sesen ado kiyēi bun tabodon, to dileda orodin, adag taileid to orodan. <sup>4</sup> Anī ere, Negur neda Isennadaya nē tobonunā biya ado wau laa fiya wō ye fen, <sup>5</sup> ī isennadan, are ada ereb madur age tafen anī bunem sā, are yogon wau yūya bunem. Ī mata wōya nē naan kulo fiya bunem ado, Awa Uur Fateulem mata falei fiya bunem isennadan. <sup>6</sup> Negur ī, Jesus Kristus neda Isennadaya bunem, Awa Uur Fateul, ada bun kisi feleya bagai foula fen, <sup>7</sup> are yogon wau ifenēya bunem madur fadan, anī bunem, ada mata faimud ibodkeleya nē wauda iseya ado fen, in akor anī talouf nigin age fen. <sup>8</sup> Od enei momoi bagai, anī nigin, aya, ò enei total wogō wo di, Negur nigin momoi

def anidi karī del fen, ereb biya anī el de age difouf anī orouf. Enei ganan are biya bagai, tamo ganan nigin deuf.

<sup>9</sup> Anī ere, neneya kisi abob fe fiyēya anī, ibor dir fiya, monēya ado, lo nigin luwa irouya anī sese wiyeīd, ere nigin, anidi are kaū sā, kabī ifenēya kisi feleya sā. <sup>10</sup> Taka ī, ā atun fara fef, uruwa bun weder urouwau, ago fen, babaneg weder urouwau. Anī bure fele di, ī utor-nēf. <sup>11</sup> Ō keleī youf, tamo age fiya are wau gogil fen, mosor bun ilen, ī yogo bouwa sanen inon.

### Idikeleya Nē Od

<sup>12</sup> Sain aya ò gein Artemas be Tikikus sur afiyē di, ò Nikopolis an, aya gein kaisā isiya nigin, total bagai naab umirēf, ere nigin, yau sain bun aya an abodōf nigin kisi anon. <sup>13</sup> Lo keleī tamo Senas ado Apolos, idi neid naab dilauf nigin, ereb ereb ganan usennēdiyof, ago di, idi ereb lau fiya sā dilauf. <sup>14</sup> Neda tamo kayau idig, ereb ereb biya age fiya nigin, idi de keleī anī dalouf bagai, are idi naa ganan nē safina dale fen, kaū sā to dibodōf nigin age difouf.

<sup>15</sup> Ganan aya geid mabodok anidim, ò bun aanya sur mafef. Momoiya bun amā nigin waud laa fef anidi aan wiyeīd.

Wau ifenēya ā ganan bun ibodōf.

# FILEMON

## Pol Nē Aanya

**1** Aya, Pol, Kristus Jesus nē kalabus tamo, neda turada Timoti ado, oboida ado kabī turada Filemon gein, <sup>2</sup> mainada Afia, kusī tamo turada Akipus ado, sios ogon fō bun guru difedig gein pas enei matotof. <sup>3</sup> Wau ifenēya ado wau inosiya, Negur neda Tamada ado Odug Jesus Kristus bunem ō bun ibodōf.

## De Fiyēya Ado Kosēya

<sup>4</sup> Aya, neu kosē bun, ō nigin karī aul fen, neu Negur faimud de afiyēdig, <sup>5</sup> ere nigin, aya, ogon momoiya Odug Jesus bun ilen anī karī au fen, Negur nē tamo kayau ganan nigin ogon waū laa fiya anī karī audig. <sup>6</sup> Aya, ō amā geid ogon momoiya nē uyu kū fiya anī kabī yale di, ereb ereb biya ganan, Kristus bun ada talef anī, ō kisi feleya bagai keleī youf nigin kosē auf. <sup>7</sup> Ogon waū laa fiya anim, wau al fiya odug ifana fen, neu wau yalesen, ere nigin, turau ō, Negur nē tamo kayau neid waud filolō fiya wenēdin.

## Pol Onesimus Nigin To Fen

<sup>8</sup> Anī nigin, Kristus bunem aya sā megeir afar fen, ō arokonō di, ereb ō agouf nigin kisi feleya, <sup>9</sup> anī ere, aya wau laa fiya bun afar fen, total bagai to ayok. Aya, Pol, tamo tubau fen, gama Kristus Jesus nē kalabus tamo, <sup>10</sup> aya neu kesu Onesimus nigin total bagai to ayok, ī kokolin afar mog, neu kesu wō yen. <sup>11</sup> Kulu ī ō nigin to biyan, anī ere, gama ī ada uruwom nigin biya bagai.

<sup>12</sup> Aya, ī, ō gein kel sur afef, ī aya neu oboiyou. <sup>13</sup> Aya ī uruwom mabodom are, sain aya biya od nigin kokolin afar mog, ī ogon modoū yale fen, isennam. <sup>14</sup> Anī ere, aya ō waū to irō mog, aya ereb taka naig be fiya age afouf nigin to oroun, are ō nugo yōya bunem sā, ogon oroya dō wo agouf nigin age afen. <sup>15</sup> Momoi, ī ō uruwom sain naal bagai fara gen nē gariya are, ō ī baban gai gai kel walouf nigin be, <sup>16</sup> ī baban ferfer gen sā, anī ere, ferfer wal fiya, turā bagai. Ī aya bun neu oboiyou, anī ere, ī ō bun ogon oboi bagai neu wal fiya, are tamo nē lo fiya bun ado Odug nē lo fiya bun age fiyauf.

<sup>17</sup> Anī nigin, ō, aya ogon kabī turā gen ago kisi wouf are, aya aan wiyaf gen, īg ago aan wiyēf. <sup>18</sup> Ī ō bun ereb sane taka age fen be, ereb wareg taka adouf, wareg are aya bun uno. <sup>19</sup> Aya, Pol, imaum bagai enei atotof. Aya fau aba afonōf, aya, ō aya bun ogon mata nigin wareg ado anī nigin ō to arokonok. <sup>20</sup> Turau, aya fau ō bun tamal, ereb biya Odug bun alouf nigin orouf, Kristus bun, aya wau filolō fiya wana. <sup>21</sup> Ogon dō fiya anī momoi auf nigin, aya atotkonok, aya to ayok anī wal fiya agouf anī aya keleī.

<sup>22</sup> Agef fen takag yeir. Aab taka, aya nigin dodok wana, ere nigin, āgenei kosēya bunem, aya baban ā bun kelau asi, an abodōf nigin, aya wau isef.

<sup>23</sup> Epafras, Kristus Jesus bun neu kalabus turau, ō bun aanya sur fef. <sup>24</sup> Mak, Aristakus, Demas ado, Luk, neu kabī turau tar idig age difef.

<sup>25</sup> Odug Jesus Kristus nē wau ifenēya āgenei uur bun ibodōf.

# HIBRU

## Negur Naal Engel Wal Fedif

**1** Kulu Negur, profet bunem, sain musei ado naab fire fire bun, tubuda tar wogō fiyēdin, <sup>2</sup> anī ere, gama idikeleya naa enidi bun, ī Naal bunem wogō fadan, Naal ī ereb ereb ganān akorouf nigin Negurem igirnen, ī bunem saa teneub ado inon. <sup>3</sup> Naal ī Negur nē fula fiya medeīya nē so fiya, ī Negur yogo gen bagai, in od totol ado bunem ereb ereb ganān megeir irou ifaref. Ī mosor lilik fiya anī age fel fen, saa ilun Negur Megeir Bagai ima biyalē ibodon. <sup>4</sup> Negur, Naal yana ifenen are engel yeneid wal fiya, age fiya bagai, Naal ī engel wal fediya.

<sup>5</sup> Ere nigin, Negur ī yogon engel taka to eig ye iroke-nen,

“Ō neu Kesu,  
gama aya ō Tamā wō aul.” †

Takag, Negur ī engel taka nigin to eig ye iron,

“Aya yogon Tama abodōf,  
ī neu Kesu ibodōf.” ††

<sup>6</sup> Takag, Negur ī yogon kesu matu tenebur ein irou isif sain bun, ī baban irok,

“Negur nē engel ganān ī seli dalouf.” ‡

<sup>7</sup> Negur ī engel nigin irok,

“Ī yogon engel yau gen wowā douf nigin inodif,  
ī yogon kabī tamo yā bale gen wowā douf nigin inodif.” ††

<sup>8</sup> Anī ere, Negur ī Naal nigin irok,

“O Negur, ogon tano gai gai ibodkalauf,  
ō ogon tano tobonunā madur bagai bun lo wouf.

<sup>9</sup> Ō tobonunā madur bagai nigin waū laaf fen, to-bonunā sane anī sese wedig,

anī nigin, Negur, ogon Negur kulīya nē moul ō bun fi felen,

anī bunem, nē tā tar wal feid fen, ilun inenon.” ‡

<sup>10</sup> Takag, ī irok,

“O Odug, gariya bun ō teneub nē gariya kare won,  
ō imam saa unon.

<sup>11</sup> Idi fau inanakalauf, anī ere, ō fau ubodōf,  
idi ganān kolos gen sanef ilauf.

<sup>12</sup> Ō idi saket gen kori wediyouf,

idi kolos gen falei wediyouf.  
Anī ere, ō ubodok gen ago ubodōf,  
ogon sain to idikalauf.” †††

<sup>13</sup> Negur ī yogon engel taka to eig ye irokenen,  
“Imau biyalē ubod mog,

ogon kiwai tar

ō yē inoya nē sawa anouf.” ††

<sup>14</sup> Age fiyauf are, engel idi ere? Idi uur Negur nē kabī daledig, tamo kayau isennēya dalouf anidi disennēdiy-ouf nigin Negurem idi sur fedidig.

## Karī Yeleya Nigin Weder Irouya

**2** Anī nigin, ada karī taun anī fatuk bagai lo tafalauf, anī bunem, ada to kū tafenēf. <sup>2</sup> Negur nē od tubuda tar bun engel bunem wogō difiyēdin are totol ado ibodon, anī nigin, idi od anī didod ken, to dō difen anidi are, anī kilei mala solo darau dalen. <sup>3</sup> Anī nigin, ada isennēya odug anī to karī tafiyēf are, naig ta taya-lalauf? Uruwa bun Odug ī isennēya enei nigin wogō yen, age fe di, idi ī karī difiyen anidim, isennēya are momoi anī, ada bun yaor difen. <sup>4</sup> Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

## Jesus Ī Kel Yaledaya Nē Uyu Irouya

<sup>5</sup> Negur ī, engel, teneub mata isiyouf tau fen, wogō taudig anī nē lo fiya tamo, to inenēdin. <sup>6</sup> Anī ere, Negur nē Itotoya bun taka nem mogo eig ye iron:

“Tamo ī ere anī, ō ī nigin kisi wof?

Tamo naal ī ere anī, ō ī nigin karī weledig?

<sup>7</sup> Ō ī sain naal engel farumedin unenen,

ō ī fula fiya medeīya yana ado anī nē teter kurū wiye ken,

“ye farumen ereb ereb ganān gō welen.” §

Negur ī farumen ereb ereb ganān gō felen, are ereb taka ī farumen sā anī taka to ibodok. Anī ere, gama ada ereb ereb ganān ī farumen ifaref anī to tailef. <sup>9</sup> Anī ere, Jesus Negurem ī sain naal engel farumedin inene ken, ī darau yale laa fen nigin, gama ī fula fiya medeīya yana ado anī nē teter kurū fiyen anī ada tailef, are Negur nē wau ifenēya bunem, ī tamo kayau ganān nigin laa ilen.

<sup>10</sup> Negur ereb ereb ganān, yogo nigin ado yogo bunem inon, ī kesu tar musei fula fiya medeīya bun irou isiyouf nigin, tamo kel gei fiya nē marau Jesus, darau bunem kisi feleya bagai wō youf nigin agef inenen, are tutuk. <sup>11</sup> Yogo tamo kayau fateul ifenēdif ado, fateuledif anidi geid, ibor tekeleif. Anī nigin, Jesus idi turau tar fiyēdiya nigin to mama fef. <sup>12</sup> Ī irok,  
“Aya ō yanā neu turau tar bun kurō afalaisiyouf,

† Sam 2:7 †† 2 Samuel 7:14, 1 Stori 17:13 ‡ Diuteronomi 32:43 †† Sam 104:4 †† Sam 45:6, 7 ††† Sam 102:25-27

‡‡‡ Sam 110:1 § Sam 8:4-6

tamo kayau guru difef meleid bun, aya õ selfi abiyouf nigin seg alouf.” †

<sup>13</sup> Ī baban irok,

“Aya ĩ bun neu momoiya anouf.” ††

Takag, ĩ baban irok,

“Aya yeir, Negur ĩ gere tar ifanan geid.” †

<sup>14</sup> Gere tar idi bouweid ado naudeid ado nigin, ĩg bouwa ado naud ado idi gen wõ yen, are ĩ yogon laa bunem, Satan ĩ laa nẽ megeir irouf anĩ daũ falauf nigin ado, <sup>15</sup> idi laa nigin kumĩ de fen, sain ganan anĩ nẽ ferfer dibodok disin anidi kafĩ fiya bun tamal yalelnẽdiy-ouf nigin age fen. <sup>16</sup> Are momoi bagai, Jesus ĩ engel to isennẽdif, anĩ ere, ĩ Abraham nẽ ibor nẽ tubu tar isennẽdif. <sup>17</sup> Anĩ nigin, Negur ĩ, Jesus naab ganan bun yogon tura tar gen inenen, are Jesus ĩ pris mudur wau yũya, dõ fiya biya ado wõ ye fen, Negur aruna yalouf nigin ado, ĩ Negur nẽ didi yof fen, tamo kayau neid mosor yalelkenẽdiya kabĩ yalouf nigin age fen. <sup>18</sup> Jesus yogon bun kisi fiya wõ yen sain bun, ĩ morõ yalen, anĩ nigin, ĩ idi kisi fiya bun difaref anidi isennẽdiya kisi feleya.

### Jesus ĩ Moses Wal Fiya

**3** Anĩ nigin, fateul turau tar, āg Negurem iweignein, Jesus ĩ yogo aposel ado pris mudur, are ada ĩ nigin momoi tauf taudig, ĩ bun kisi fatuk tanouf. <sup>2</sup> Moses ĩ Negur nẽ fõ ganan bun, Negur nẽ od el fe dõ fedig, age fiya bagai, Jesus ĩ, Negur ĩ igirnen anĩ ait el fe dõ fedig. <sup>3</sup> Fõ inoya tamo yogo yana odug yaledig, fõ anĩ wal fiya. Age fiya bagai, Jesus ĩ yana odug bagai, Moses wal fiya. <sup>4</sup> Fõ ganan fõ inoya tamo ado, anĩ ere, Negur ĩ yogo ereb ereb ganan inoya marau. <sup>5</sup> Moses ĩ, Negur nẽ fõ ganan bun kabĩ tamo ibod ken, Negur nẽ od el fe dõ fedig, agef fen, ĩ Negur dumen bun ereb wogõ youf anĩ kurõ fesin. <sup>6</sup> Anĩ ere, Kristus ĩ Negur Naal, ĩ Negur ait el fe dõf fen, Negur nẽ fõ lo fedig. Anĩ nigin, ada toku total tano fen, wauda isef anĩ nigin yanada talesef anĩ tarou tokõ tafalauf are, ada yogon fõ.

### Momoiya Sã Nigin Weder Irouya

<sup>7</sup> Anĩ nigin, Awa Uur Fateul eig ye irok kilei ago gouf:

“Gama ā, Negur nẽ ait karĩ gouf are,

<sup>8</sup> ā oun gerere tuan Negur kisi wiyẽg fen,

kiwai wenẽgen age fiya gen,

ā wauĩ to agef totalouf.

<sup>9</sup> An temeĩ tar aya kisi difiya fen, kiwai difanan, are idi yar foti bun ereb age afen are dilen.

<sup>10</sup> Anĩ nigin, aya ibor anidi nigin seye ise fen, oron, ‘Idi neid waud faimud itorna fen, fire iledig, age de fen, idi neu naab to keleĩdig.’

<sup>11</sup> Anĩ nigin, aya seye ise fen, wau kuturol fen, oron, ‘Idi neu si inoya bun to bagai dilauf.’ ††

<sup>12</sup> Turau tar, ā takam, wau sane ado momoiya sã anim, mata ibodõya Negur dudum fiyẽf anĩ to ago gouf nigin lo welegei. <sup>13</sup> Anĩ ere, od ‘Gama’ yeya Negur nẽ Itotoya bun yenek anĩ, ada bun fau agef yenẽf are,

naa ganan bun abob wau talesagauf, anĩ bunem, ā taka mosorem idegnẽ di, wau to totalouf. <sup>14</sup> Uruwa bun ada kisi total adon anĩ, kafĩ tafel tarou, idikeleya bun talauf are, ada Kristus nẽ ereb ereb ganan weim talef.

<sup>15</sup> Negur nẽ Itotoya eig ye irok kilei,

“Gama ā Negur nẽ ait karĩ gouf are,

āgenei tubuĩ tar Negur kiwai difenen age fiya gen, ā wauĩ to agef totalouf.” ††

<sup>16</sup> Are aiyaim karĩ de fen, kiwai dinon? Idi ganan Mosesem Isip tamal guri feid dilen anidim sã de? <sup>17</sup> Negur aiyai nigin yar foti wau sanen? Idi mosor dino fen, gerere tuan gare den anidi nigin sã de? <sup>18</sup> Negur aiyai nigin wau kuturol fen, idi yogon si inoya bun to bagai dilauf yen? Idi yogon od to dõ difen anidi nigin sã de?

<sup>19</sup> Anĩ nigin, ada talef, are idi to momoi den nigin, namen iley a kisi feleya san.

### Negur Nẽ Tamo Kayau Neid Sabat Si Inoya

**4** Anĩ nigin, Negur nẽ si inoya bun iley a nigin, Negur nẽ promis od anĩ fau yenek nigin, ā takam si inoya bun iley a nigin ā to biya ya anĩ, Negurem to ilouf nigin lo tafalauf. <sup>2</sup> Ere nigin, idi karĩ den gen, adag biya od karĩ taun. Idi od karĩ den, anĩ ere, idi bun faat yũya sã, ere nigin, idi od karĩ den sain, idi momoiya ado od anĩ to dalen. <sup>3</sup> Gama ada mogo momoi taun, are si inoya anĩ bun telef. Are idi to momoi den nigin Negur eig ye iron kilei,

“Aya seye ise fen, wau kuturol fen, oron,

‘Idi neu si inoya bun to bagai dilauf.’” †††

Negur nẽ kabĩ teneub kare fiya sain bun mogo bure felen, anĩ ere, ĩ od agef iron. <sup>4</sup> Negur nẽ Itotoya bun, Negur naa sewen nigin eig ye wogõ yen, “Naa sewen bun, Negur ĩ yogon kabĩ ganan bun si inon.” ††† Baban Negur nẽ Itotoya enei bun, ĩ eig ye irok, “Idi neu si inoya bun to bagai dilauf.”

<sup>6</sup> Anĩ nigin, tunĩ si inoya anĩ bun sã dilauf nigin fau ibodok, anĩ ere, idi uyulil biya od karĩ den anidi, si inoya anĩ bun to dilen, ere nigin, idi od anĩ to dõ difen.

<sup>7</sup> Anĩ nigin, sain meluk ilele di, Negur baban naa taka igir ken, are “Gama” yen anĩ, Negur ĩ Dawid sigor bunem wogõ yen, are mogo iron gen:

“Gama ā, Negur nẽ ait karĩ gouf are,

ā wauĩ to totalouf.” †

<sup>8</sup> Josua ĩ si inoya anĩ to ifenẽdin, ĩ si inoya anĩ ifenẽdim are, Negur anĩ dumen naa taka nigin to wogõ yem.

<sup>9</sup> Anĩ nigin, Negur nẽ tamo kayau neid Sabat <sup>st</sup> si inoya fau ibodok. <sup>10</sup> Ere nigin, Negur ĩ yogon kabĩ bun si inon kilei, taka ĩ Negur nẽ si inoya bun ilef, ĩg yogon kabĩ bun si inof. <sup>11</sup> Are, taka nem, od to dõ difen anidi to dõ feid fen, kubũ youf nigin, si inoya anĩ bun iley a nigin kabĩ total bagai talouf.

<sup>12</sup> Negur nẽ od mata ibod ken, kabĩ total yalef, are dimig willa si sitakã wal fiya. Are malakanon uur ado, tuwa katõ fiya, tuwa nẽ seselina ado atun borũ fel si sitakãdig. Are wau bun kisi ado oroya es fedig. <sup>13</sup> Ereb ereb ganan inodin are Negur mala bun taka to iminek.

† Sam 22:22 †† Asaia 8:17 † Asaia 8:18 †† Sam 95:7-11

†† Sam 95:7, 8 ††† Sam 95:11 ††† Jenesis 2:2 † Sam 95:7, 8 †† Sabat naa anĩ, Juda neid uub nẽ naa.

Ereb ereb ganan ĩ mala bun lelek feleya ado yaor. ĩ bun ada ereb age tafen anĭ faded tafiyĕf.

### Jesus Pris Mudur Odug

<sup>14</sup> Anĭ nigin, pris mudur odug saa ilun Negur gein iselen, are Jesus Negur Naal, ada ĩ ado nigin, ada momoiya kurō tafesif anĭ tarou kafĭ tafalauf. <sup>15</sup> Are, neda pris mudur ĩ, neda felu yabiya keleĭ bagai nigin, wau yŭya yaleya kisi feleya, ĩ ada gen mogo naab ganan bun kisi fiya yalen, anĭ ere, ĩ mosor sã. <sup>16</sup> Anĭ nigin, ada megeir tano fen, Negur nĕ sia wagen talauf, an wau ifenĕya ibodok, anĭ bunem, ada neda lau fiya sain bun, ada isennadauf nigin wau yŭya tale fen, wau ifenĕya fotou tafouf.

**5** Pris mudur idi ganan tamo atun yale fen, tamo kayau nigin Negur aruna dale, mosor nigin ofa ado sesewi fiya difenĕf nigin igirnĕdin. <sup>2</sup> ĩg yogo felu yabidig nigin, idi to kelei ken, kŭ difenek anidi, molol nem isennĕdiya kisi feleya. <sup>3</sup> Age fiya nigin, ĩ tamo kayau neid mosor nigin ado, yogon mosor nigineg sesewi fedig.

<sup>4</sup> Taka nem, pris mudur, yana odug anĭ, ĩ yogo bouwa bun to inodig, anĭ ere, ĩ Aron gen, Negurem dogol igirnĕdig. <sup>5</sup> Age fiya gen, Kristus ĩg pris mudur ibodōf nĕ fula fiya medeĭya yogo bouwa bun to inon. Anĭ ere, Negur ĩ irokenen,

“Ō neu Kesu,  
gama aya ō Tamã wō aul.” †

<sup>6</sup> ĩ taka bun eig ye irok,  
“Ō faimud ubodkalauf nĕ pris,  
Melkisedek nĕ gĭ bun.” ††

<sup>7</sup> Jesus ĩ tenebur mata ibodon sain bun, ĩ inã odug marum fe fen, Negur ĩ laa bun tamal isennĕya nigin kisi feleya, ĩ bun kosĕ ye fen, igonen. Jesus ĩ imatkeis fen, Negur farumen ibodon nigin, Negur ĩ karĭ fiyen. <sup>8</sup> Jesus ĩ Negur Naal, anĭ ere, ĩ darau yalen anĭ bunem, dō fiya nigin keleĭ yale fen, <sup>9</sup> kisi feleya bagai wō yen. Agef fen, ĩ ait dō difef ganan neid mata ibodkeleya kel gei fiya nĕ gariya wō ye di, <sup>10</sup> Negur ĩ Jesus Melkisedek nĕ gĭ bun pris mudur inenen.

### Momoiya Folō Feleya Nigin Weder Irouya

<sup>11</sup> Amã enei nigin wogōya musei ado, anĭ ere, amã faded yeĭya nigin total, ere nigin, ã keleĭya nigin forō gef. <sup>12</sup> Ā tise wōya nigin sain meluk adon, anĭ ere, ã fau taka nem Negur nĕ od tamo mata urug ifelnĕdidig age fiya baban ifelneĭf nigin ubodōgef. Ā fau su yōya nigin yenek, saaf total yōya nigin kisi feleya sã. <sup>13</sup> Taka ĩ su yoko are ĩ fau momou, anĭ nigin, ĩ madur bagai nĕ ifelnĕya keleĭ sã. <sup>14</sup> Anĭ ere, saaf total are biyeid neid, idi tai fiya bun, kisi def dile fen, enei biya, enei saneya keleĭdig.

**6** Anĭ nigin, ada, ifelnĕya gariya bunem Kristus nigin keleĭ daŭ are tator ken, keleĭ tōya bagai bun talauf. Ada keleĭ eig fediya nigin baban to gariya tanouf, are laa ileya nĕ suma bun tamal faleiyya, Negur

nigin momoiya, <sup>2</sup> naan igŭdiya, ima teten inoya, laa bun tamal kel fãya ado, faimud ibodkeleya nĕ es fiya. <sup>3</sup> Negur wau irōf are, ada keleĭ mugier bagai talauf.

<sup>4</sup> Idi Negur nĕ fula fiya mogo dalen, idi saa ilun nĕ ege luwa mogo kobŭ de dilen, idi Awa Uur Fateul dalen, <sup>5</sup> idi Negur nĕ od are biya bagai ado, sain fau isiyouf anĭ nĕ megeir mogo keleĭ, <sup>6</sup> age difen anidi momoiya folō difalauf are, idi baban waud faleiyya nigin guri feid isiya kisi feleya sã, ere nigin, idi dogo baban Negur Naal aa tetek bun du ken, mal atun mama difenek.

<sup>7</sup> Teneub anĭ bun sain musei uyĕ isi lŭf fen, kabĭ moroid saaf ifenĕdidig, teneub are Negur el fiya ifenĕdig. <sup>8</sup> Anĭ ere, teneub bun malŭ duri ado lili isedif, are teneub to biya, gelu fiya melsã ibodok. Idikeleya bun yã malan isaikalauf.

<sup>9</sup> Oboimã tar, amã eig ma wogō mauf, anĭ ere, amã ã bun age fiya to wō ye fen, biya fiya ã bun isiyouf nigin momoi mauf, biya fiya are kel gei fiya ado isiyouf.

<sup>10</sup> Negur ĩ madur, ĩ, ãgenei kabĭ ado wauĭ laa fiya, are ã Negur nĕ tamo kayau usennĕdigef usigef bunem Negur ufelneĭgef anĭ, weder to tu kalauf. <sup>11</sup> Amã, ã mugu mugu kabĭ total eig fiya bagai walegef uleg, idikeleya bun ulagauf anĭ oromak, ago ge di, ãgenei wauĭ iseya anĭ agef kisi falauf. <sup>12</sup> Amã, ã fō yeĭf anĭ to oromak, anĭ ere, ã, idi momoi de, to fese de fen, ereb Negur ĩ afe-neĭf yen anĭ dalef anidi, madĕ wedig ago gouf anĭ oromak.

### Negur Age Afouf Yen Anĭ Momoi Bagai Agef Wō Youf

<sup>13</sup> Negur ĩ Abraham age afouf fiyen sain bun, taka Negur yogo wal fiya, ĩ yana bunem Negur wau kuturoleya od wogōya nigin taka to ibodon, anĭ nigin, ĩ yogo wau kuturol fen, <sup>14</sup> iron, “Aya momoi bagai el fiya afon ken, momoi bagai gerĕ tar musei afonōf.” <sup>15</sup> Age ye di, Abraham ĩ feseya sã tari fef ile, Negur afonōf yen anĭ yalen.

<sup>16</sup> Tamo idi waud kuturol fen, dogo neid od megeir difouf are, tamo ĩ idi wal fediya yana bunem megeir difedig. Waud kuturoleya od anim, od wogō def anĭ megeir fe fen, luwa irouya ganan irukaka kesidig. <sup>17</sup> Age fiya bagai, Negur age afouf yen anĭ dalouf anidi bun, Negur ĩ yogon kisi to bagai falei youf anĭ yaor fenĕdiyouf nigin, ĩ wau kuturoleya od wogō yen anim, ĩ age afouf yen anĭ, megeir fen. <sup>18</sup> Od uru enei, are od Negur age afouf yen ado wau kuturoleya od anĭ, faleiyya kisi feleya sã, Negur ĩ od uru enei nigin idegĕya kisi feleya sã anĭ bunem, wau iseya malada bun ifaref anĭ tarou kafĭ tafalauf nigin, Negur nĕ ahahaya bun taya telen ada anĭ, wauda fatuk yalesauf nigin Negur age fen. <sup>19</sup> Wau iseya enei are, ada maladakanon nĕ anka, are total fen, to gebe yedig. Are anim, gabar tempel namen ibodok anĭ borŭ fel, modoŭ fateul bagai bun iledig. <sup>20</sup> Jesus ĩ Melkisedek nĕ gĭ bun faimud ibodkeleya pris mudur wō ye fen, ĩ mogo ada nigin an uyulil ilen.

† Sam 2:7 †† Sam 110:4

‡ Genesis 22:17



### Pris Melkisedek

7 Melkisedek enei Salem nē king, ĩ Negur Ilun Bagai nē pris. ĩ Abraham king geid kusī del wal feid fen, kel isi mog, fotou fe fen, el fiya ifenen. <sup>2</sup> Age fe di, Abraham ereb ereb ganan ĩ ado anī bun tamal ten tekelei ifenen. Yana Melkisedek nē gariya are “madur bagai nē king,” takag, “Salem nē king,” anī nē gariya, “wau inosiya nē king.” <sup>3</sup> Melkisedek ĩ sina tama sã, in ibor nē gī taka sã, wō yen nē naa ado laa nē naa taka sã, ĩ Negur Naal gen faimud ibodkeleya pris.

<sup>4</sup> ĩ naig fiya odug bagai anī kisi wog. Tubu Abraham ĩg safina kusī bun yalen anī ten tekelei ifenen. <sup>5</sup> Lo irok, are Lewi nē ibor nē tubu tar bun pris wowã def idi, tamo kayau bun ten tekelei dalouf, tamo kayau are nedi tureid tar. Tureid tar idig Abraham nē ibor, anī ere, idi age difedig. <sup>6</sup> Melkisedek ĩ Lewi nē ibor bun tamal sã, anī ere, ĩ Abraham bun tamal ten tekelei yale fen, Abraham Negurem age afouf fiyen anī el fiya ifenen. <sup>7</sup> Kisi togu fiya sã, tamo odugem, ĩ farumen anī el fiya ifenēdig. <sup>8</sup> Pris tamo, idi gare dedig, ten tekelei daledig, anī ere, Melkisedek nigin, Negur nē Itotoya yaor fef, ĩ mata ibodkeleya, ĩ ten tekelei yalen. <sup>9</sup> Ada sã eig tauf, Lewi ĩ ten tekelei yaledig, ĩg Abraham bunem Melkisedek ten tekelei ifenen, <sup>10</sup> ere nigin, Lewi ĩ fau tubu Abraham bouwa bun ibod mog, Melkisedek ĩ Abraham fotou fiyen.

### Jesus ĩ Melkisedek Gen

<sup>11</sup> Israel tamo kayau lo ifenēdin anī bun irok nigin, Lewi idi pris kabī daledig. Lewi neid pris kabī anī bun lau fiya to yenem are, ere nigin pris taka isiya nigin lau fiya fau yenen, Melkisedek nē gī bun tamal taka, Aron nē gī bun tamal sã? <sup>12</sup> Pris kabī falei fouf are, lo areg falei fouf. <sup>13</sup> Neda Odug nigin od enei wogō yen, are ĩ ibor fire bun tamal, yogon ibor bun tamal taka pris kabī to yalen. <sup>14</sup> Neda Odug ĩ Juda ibor bun tamal are yaor. Anī ere, Moses ĩ pris nigin wogō yen sain bun, Juda ibor nigin od taka to wogō yen. <sup>15</sup> Pris taka Melkisedek gen bagai wō yef are, od enei amã wogō maun are yaor bagai wō yef. <sup>16</sup> ĩ tamo pris kabī yaleya nē lo bunem pris to wō yen, anī ere, ĩ, mata, daū feleya kisi feleya sã anī nē megeir bunem pris wō yen. <sup>17</sup> Are Negur nē Itotoya eig ye irok kilei:

“Ō faimud ubodkalauf nē pris,  
Melkisedek nē gī bun.” †

<sup>18</sup> Lo tubu are megeir sã, kabī to yaledig, anī nigin, yerin gadi difelef, <sup>19</sup> (ere nigin, lo anim ereb taka to madur fedig). Anī ere, wau iseya biya anī wō yef, anī bunem, ada Negur non telef.

<sup>20</sup> Negur ĩ Jesus pris inenen, are wau kuturoleya od sã to inenen. Pris tunī ganan idi age fiya sã, idi wau kuturoleya od sã, pris wō den. <sup>21</sup> Negur ĩ Jesus irokenen sain bun, ĩ wau kuturoleya od ado pris wō yen:

“Odug wau kuturol fen iron,  
are yogon kisi to falei youf,

Ō faimud ubodkalauf nē pris.” ††

<sup>22</sup> Wau kuturoleya od enei nigin, Jesus ĩ bar itenēya tubu wal fiya nē megeir fiya wō yen.

<sup>23</sup> Pris idi museim dibodon, ere nigin, idi gare de fen, kabī to tokō difelen. <sup>24</sup> Anī ere, Jesus ĩ faimud ibodkelele, anī nigin, ĩ gai gai pris kabī yalef, are taka bun to ilauf. <sup>25</sup> Age fiya nigin, idi ĩ bunem Negur garan disif anidi, ĩ el fe isenneīd leya kisi feleya, ere nigin, ĩ mata faimud ibod ken, idi nigin Negur bun kosē yef.

<sup>26</sup> Pris mudur age fiya anim, sã isennadauf. ĩ fateul, kerema sã, amuyē sã, mosor adodo bun tamal gadi fe-len, Negur ĩ saa ilun bagai inenen. <sup>27</sup> Pris mudur tunī ganan, naa ganan, dogo neid mosor nigin ket sesewi dife fen, tamo kayau neid mosor nigin sesewi difedig, anī ere, Jesus ĩ pris anidi gen sã. ĩ yogo bouwa sesewi fen sain bun, ĩ idi neid mosor nigin sain tekelei dogol sesewi fen. <sup>28</sup> Lo are felu yabidig tamo pris mudur ĩgir-nēdidig, anī ere, Negur nē wau kuturoleya od, are lo dumen isin, od anim, Negur Naal, faimud kisi feleya bagai ibodkalauf nigin inenen, ĩ anī ĩgirnen.

### Bar itenēya Mata Nē Pris Mudur

8 Amã wogō mauf anī nē kaū, are yeir. Ada pris mudur age fiya ado, ĩ saa ilun Negur nē sia ima bialē ibod ken, <sup>2</sup> modoū fateul bagai, are tamom sã, Odug yogo bagai salafat inon anī bun aruna yalef.

<sup>3</sup> Pris mudur ganan, ofa ado yaro sesewi fiya difenēf nigin ĩgir-nēdif, anī nigin, neda Pris Mudur ĩg ereb taka ifenēf nigin adouf. <sup>4</sup> ĩ tenebur ibodom are, ĩ pris to wō yem, ere nigin, tamo lo irok kilei ofa difenēdif are mogo dibodok. <sup>5</sup> Idi modoū fateul bagai, are saa ilun ibodok age fiya gen, anī nē malakanon bun aruna dalef. Anī nigin, Moses ĩ salafat fateul inouf nigin age fen sain bun, Negur ĩ weder iron, “Lo welei, ō arei bun afelnon age fiya kilei bagai, ereb ereb ganan unouf.” <sup>6</sup> Anī ere, Jesus ĩ kabī yalen are idi neid kabī wal fiya, ere nigin, Negur ado tamo geid bar itenēya nigin, ĩ atun tamo kabī yalef, bar itenēya anī, bar itenēya tubu anī wal fiya, bar itenēya mata anī, Negur od age afouf yen, are od tubu wal fiya anī teten inon.

<sup>7</sup> Bar itenēya tubu bun kũ fenēya taka to ibodom are, mata nigin to lau fiyam. <sup>8</sup> Anī ere, Negur ĩ tamo kayau bun kũ fenēya ile fen, iron:

“Odug irok, sain fau isif,  
are Israel tamo kayau ado  
Juda tamo kayau geid  
bar itenēya mata anouf.

<sup>9</sup> Bar itenēya are,  
aya idi neid tubuid tar Isip bun tamal imeid gim afe elen sain bun,

idi tubuid tar geid,  
bar itenēya anon age fiya gen sãf.  
Idi neu bar itenēya to dō difen nigin,  
aya idi dudum afedin.

<sup>10</sup> Odug irok, sain anī dumen,  
aya Israel tamo kayau geid, bar itenēya enei anouf.  
Aya neu lo idi neid kisi bun ano fen,

† Sam 110:4

†† Sam 110:4 ‡ Eksodas 25:40

idi neid waud bun atotauf.  
 Aya idi neid Negur abodōf,  
 idi neu tamo kayau dibodōf.  
<sup>11</sup> Tamo takam ne tā to ifelnēf,  
 tamo takam tura to eig ye irokenēf, 'Odug nigin keleī  
 youf,'  
 ere nigin, idi ganan aya nigin keleī youf,  
 naal bagai bunem isel, odug bun.  
<sup>12</sup> Aya idi neid sane nigin wederou tu kel fen,  
 idi neid mosor nigin to karī aulauf." †  
<sup>13</sup> Negur ī bar itenēya enei "mata" yen, anī bunem  
 bar itenēya tubu are kabī sā. Ereb taka tubu, kabī sā  
 yen anī, kaisā bagai iminkalauf.

### Tenebur Negur Nē Salafat Bun Seli Yabiya

**9** Bar itenēya tubu anī, seli yabiya nigin nun ado  
 fen, seli yabiya nē modoū tenebur eineg adon.  
<sup>2</sup> Salafat taka dinon. Aab malabag anī bun, yal nē ti-  
 bog, tebol ado, bret sesewi difen anī an ifaredin, mo-  
 doū are Modoū Fateul dedig. <sup>3</sup> Gabar Modoū Fateul  
 bun ibodok anī dumen, aab taka Modoū Fateul Bagai  
 dedig ibodon, <sup>4</sup> an gol alta aa gaula sumeī nigin tō fiy-  
 adig ado, bar itenēya nē bogis gol nem ganan kerū fe-  
 leya ibodon. Bogis enei bun, gol darum mana ado,  
 Aron nē manig sana wō yen ado, meein bedu bar  
 itenēya itoton ado ifaredin. <sup>5</sup> Bogis teten Fula Fiya Me-  
 deīya Negur nē engel Serubim difaren, wayeid yarirī  
 dife, bogis mala dede difen, bogis mala are modoū,  
 Negur an mosor yaleledig. Anī ere, amā enei nigin ga-  
 ma to dir mafalauf.  
<sup>6</sup> Sain ereb ereb ganan age de dodok difel fen, pris  
 idi Negur nē kabī dalouf nigin, aab malabag bun naa  
 ganan diledig. <sup>7</sup> Anī ere, pris mudur dogol, aab Modoū  
 Fateul Bagai dedig gabar dumen ibodok anī bun, yar  
 tekelei bun sain tekelei dogol iledig. Ī naud sā to bagai  
 iledig. Ī yogo nigin ado, tamo kayau neid mosor to ke-  
 lei ken dinon anī nigin naud Negur ifenēdig. <sup>8</sup> Enei bu-  
 nem Awa Uur Fateul, salafat fateul urug bagai dinon  
 anī fau ifar mog, Modoū Fateul Bagai bun ileyā nigin,  
 bobog fau kā feleya sā anī ifelnēdin. <sup>9</sup> Enei are gama  
 sain enei nigin malakanon. Are ofa ado yaro sesewi  
 fiya Negur difenen anim, Negur seli yabidig tamo yog-  
 on wau kare keleya kisi feleya sā anī ifelnēdif. <sup>10</sup> Safina  
 age fediya anī, are saaf, naan yōya ado, amuyē lilik fiya  
 nē tobonunā fire fire dogol. Age fediya anī, are bouwa  
 buru nē lo, kabī yalef ile, suma mata nē sain bun.

### Kristus Nē Naud

<sup>11</sup> Kristus ī, ereb ereb biya mogo wō yen anī nē pris  
 mudur isin. Ī salafat fateul odug, biya bagai bun isour  
 yale ilen, salafat fateul are tamom to dinon, are ereb  
 kare fen enei nē tomīna sā. <sup>12</sup> Ī meme ado bulmakau  
 naal nē naud ado to ilen, anī ere, ī Modoū Fateul Bagai  
 bun, yogon naud bunem, sain tekelei dogol isour yale  
 ile fen, ada nigin kel gei fiya faimud ibodkeleya anī ya-  
 len. <sup>13</sup> Meme ado bulmakau nē naud ado, bulmakau

gober naal yā difalege di, isaikelen anī nē aas nem, idi  
 amuyē lilik fiya sā anidi tetedin wiri dife di, idi amuyē  
 lilik fele di, bouweid fili yedig. <sup>14</sup> Are momoi youf are,  
 Kristus nē naud naig fe yenēf! Ī Awa Uur faimud ibod-  
 keleya bunem, yogo bouwa amuyē sā, Negur bun  
 sesewi fen. Yogon naud anim, ada wauda laa bun ileyā  
 nē tobonunā bun tamal kulo fadalef, anī bunem, ada  
 mata ibodōya Negur aruna talouf.

<sup>15</sup> Gariya enei nigin, Kristus ī bar itenēya mata nē  
 atun tamo, anī bunem, tamo Negurem iweignēdin ani-  
 di, faimud ibodkeleya akor, are Negur age afouf yen  
 anī dalouf. Ere nigin, bar itenēya tubu bun, mosor di-  
 non anidi, nedi mosor bun tamal yalelnēdiyof nigin, ī  
 laa fen.

<sup>16</sup> Fadim anī kabī yalouf nigin, fadim yun tamo ī  
 mogo laa fen are yaorouf, <sup>17</sup> ere nigin, fadim are, tamo  
 laa fe di dogol, kabī yaledig. Fadim yun tamo fau mata  
 ibod mog, fadim anī to bagai kabī yaledig. <sup>18</sup> Age fiya  
 nigin, bar itenēya tubug naud sā to kabī yalen. <sup>19</sup> Mos-  
 es lo bun itāfiya ganān tamo kayau ganān wogō fiy-  
 eīd fen, ī bulmakau naal ado meme nē naud, naan ado  
 yale falei fe fen, sipsip siwi giriya ado aa hisop were  
 nem, lo buk bun ado tamo kayau ganān bun wiri fen.  
<sup>20</sup> Moses iron, "Enei are bar itenēya nē naud, are Negur  
 ā dō gouf nigin irokenein." †† Naab tekelei anī bunem,  
 ī salafat fateul ado sesewi fiya nē safina ganān bun  
 naud wiri fen. <sup>22</sup> Momoi, lo bun irok, melsā ereb ereb  
 ganān naud bunem kulo falauf, are naud to fi falauf  
 are, mosor nigin weder to tu kalauf.

<sup>23</sup> Anī nigin, saa ilun nē safina anī nē malakanon,  
 sesewi fiya enei bunem kulo feledig, anī ere, saa ilun  
 nē safina dogo, sesewi fiya enei wal fiya bunem, age  
 fedig. <sup>24</sup> Kristus ī modoū fateul tamom dinon, are mo-  
 doū fateul momoi bagai nē malakanon anī bun to ilen.  
 Ī saa ilun bagai anī bun ile fen, Negur mala bun ada ni-  
 gin wō yen. <sup>25</sup> Pris mudur ī, yogo naud sā, yaro naud  
 ado, yar ganān Modoū Fateul Bagai bun iledig. Anī  
 ere, Kristus ī yogo bouwa baba baban sesewi fouf ni-  
 gin saa ilun to ilen. <sup>26</sup> Kristus ī age fem are, teneub ka-  
 re fiya sain bunem isin are, ī sain musei darau yalem.  
 Anī ere, gama idikeleya sain enei bun, ī yogo bouwa  
 sesewi fe fen, mosor yalelauf nigin, sain tekelei dogol  
 wō yen. <sup>27</sup> Tamo ganān sain tekelei dogol gare douf,  
 anī dumen, Negur es fediyof. <sup>28</sup> Age fiya gen, Jesus īg  
 tamo kayau musei neid mosor yalel kenēdiyof nigin,  
 yogo bouwa sesewi fe, tekelei fen. Ī baban isiyof, are  
 mosor yaleleya nigin sā, anī ere, tamo idi ī tari difef  
 anidi kel gei fediyof nigin.

### Jesus Sesewi Fe, Tekelei Felen

**10** Lo are safina biya isif anī nē malakanon dogol,  
 momoi bagai safina biya anī sā. Agef yenek ni-  
 gin, lo are, sesewi fiya de tekelei anī, yar ganān gai to-  
 ku difenēdig anī bunem, idi Negur seli dabiyouf nigin  
 disif anidi, madur tamo bagai wowāya kisi feleya sā  
 bagai. <sup>2</sup> Age fiya kisi feleyam are, idi sesewi fiya ganān  
 ditorom. Ere nigin, Negur sesewi difedig tamo neid

† Jeremaia 31:31-34

†† Eksodas 24:8

mosor, momoi bagai kulo felem are, idi baban mosor nigin waud to morō fedim. <sup>3</sup> Anī ere, yar ganan bun sesewi fiya anim, tamo kayau idi, mosor nigin karī deledig, <sup>4</sup> ere nigin, bulmakau ado meme nē naud anim mosor yaleleya kisi feleya sā.

<sup>5</sup> Anī nigin, Kristus tenebur isi fen, iron:

“Ō sesewi fiya ado ofa to oroyon,  
anī ere, ō aya nigin bouwa taka dodok won.

<sup>6</sup> Ō, ofa yā bun ifaleg isaikelaya anī ado,  
mosor yaleleya nē ofa anī nigin waū to iron.

<sup>7</sup> Ago di, aya oron, ‘Aya nigin buk bun eig ye itoton,  
O Negur, aya yeir, aya ogon oroya dō afouf nigin asin.” †

<sup>8</sup> Ī uruwa iron, “Sesewi fiya ado ofa, ofa yā bun ifaleg isaikelaya anī ado, mosor yaleleya nē ofa anī ō to oroyon, anī nigin waū to iron” (anī ere, lo are, idi age difouf nigin iron). <sup>9</sup> Age ye fen, ĩ iron, “Aya yeir, aya ogon oroya dō afouf nigin asin.” Ī mata anī inouf nigin uruwa nē anī yalalen. <sup>10</sup> Oroya anī bun, Jesus Kristus ĩ yogo bouwa sesewi fe, tekelei felen, anī bunem, ada fateul wō taun.

<sup>11</sup> Naa ganan bun, pris ganan mugu mugu difar fen, Negur nigin dogo neid kabī daledig. Idi sesewi fiya de tekelei anī toku difenēdig, sesewi fiya anim mosor yaleleya nigin kisi feleya sā bagai. <sup>12</sup> Anī ere, Kristus ĩ mosor nigin gai gai nē sesewi fiya tekelei fele fen, Negur ima biyalē ibodon. <sup>13</sup> Sain anī bunem isi gama, Kristus ĩ, yogon kiwai tar Negurem Kristus ye inoya nē sawa inenēdiyof anī tari fef. <sup>14</sup> Ī sesewi fe, tekelei felen anim, idi mosor bun temeleid kulo feledif anidi, gai nigin madur feledin.

<sup>15</sup> Awa Uur Fateul ĩg od enei nigin eig ye irokanadaf. Uyulil ĩ irok:

<sup>16</sup> “Odug irok, sain anī dumen,  
aya idi geid bar itenēya enei anouf.

Aya neu lo idi waud bun ano fen,  
idi neid kisi bun atotauf.” ††

<sup>17</sup> Age ye fen, ĩ tobol fe irok:

“Dogo neid mosor ado sane age difedig are,  
aya to karī aulauf.” ‡

<sup>18</sup> Mosor enei weder tu kelen ouf are, baban mosor nigin sesewi fiya taka to yenek.

### To Fese Tauf Nigin Iweigya

<sup>19</sup> Anī nigin, turamā tar, ada Jesus nē naud bunem, Modoū Fateul Bagai bun tuninir ya sā ileya nigin kisi feleya. <sup>20</sup> An ileya nē naab are, mata ibodōya nē naab mata, are ĩ, ada nigin, gabar Modoū Fateul Bagai bun ileya nigin bobog katī felen anī serek felen bunem kā felen, gabar are yogo bouwa. <sup>21</sup> Ada Negur nē fō lo fiya nigin pris odug ado. <sup>22</sup> Anī nigin, ada wauda tutuk fen, momoiya total ado Negur non talauf, ere nigin, ada wauda, mosor nē wau morō bun tamal wirif kulo fada le fen, bouwada naan karētut nem kulo felen. <sup>23</sup> Neda wauda iseya ada wogō taudig anī, ada tarou kafī tafalauf, ere nigin, Negur age afouf yen, are ĩ de age foug bagai. <sup>24</sup> Ada wau laa fiya ado tobonunā biya bun ta-

† Sam 40:6-8 †† Jeremaia 31:33 ‡ Jeremaia 31:34

lauf nigin, abob wau yaleseya nigin kisi tafouf. <sup>25</sup> Ada guru fiya anī to tatorōf, tunī to guru difedig gen, to age tafouf, anī ere, ada abob wau talesef talauf, ere nigin, ā, Odug nē Naa melsā isif are ulegef.

<sup>26</sup> Ada momoi anī kelei ken, neda oroya dō tafe, mosor tanof talauf are, mosor yaleleya nē sesewi fiya taka to ibodok, <sup>27</sup> anī ere, Negur yogon es fiya ado, yā bobo reya anim yogon kiwai tar yakur feid isasaikalauf anī, kumī ado tari fiya dogol ibodok. <sup>28</sup> Taka ĩ Moses nē lo dudum fen, ĩ nigin tamo urom be towom, ĩ age fen anī yaor dife di, waud yūya sā dukesi di, laa fen. <sup>29</sup> Age fiy-auf are, taka ĩ, Negur Naal ye nem lai fe fen, bar itenēya nē naud anim ĩ mosor bun tamal kulo fiyeke-len anī, fateul sā gen inene ken, wau ifenēya nē Awa Uur kono fiyek ĩ, darau naig fiya bagai yalouf anī kisi gef. <sup>30</sup> Ere nigin, ada kelei, Negur eig ye iron, “Taka ĩ sane age foug, ĩ mala solo sane ifenēya are neu kabī, ay-am mala solo sane afenēf.” †† Takag, ĩ baban iron, “Odug ĩ yogon tamo kayau es fediyouf.” ††† Taka ĩ mata ibodōya Negur ima bun ilauf are, ĩ fatuk bagai kumī tererē youf.

<sup>32</sup> Ā uruwa bun fula fiya walegen, anī dumen naig wog ufaregen anī kisi waleg. Sain anī bun ā darau nē kusī odug walegen, anī ere, total ufaregen. <sup>33</sup> Sain tunī, ā mal atun kono diyey ken, darau difeneidig. Sain tunī, ā, idi morō age fiya dalen anidi usennēdigedig. <sup>34</sup> Ā tamo kalabus bun dibodon anidi nigin wauī yūya wenēdigen, agog fen, tamo idi āgenei safina ganan dale di, ā kulīya ado folō wol kenēdigen, ere nigin, ā keleī, ā aug safina biya, mata gai gai ibodkeleya nē ado.

<sup>35</sup> Anī nigin, āgenei kisi total anī to folō walagauf, are fau mala solo odug bagai ifeneif. <sup>36</sup> Ā total ufaragauf, anī bunem, ā Negur nē oroya dōg fen, ereb ĩ age afouf yen anī walogouf. <sup>37</sup> Ere nigin, sain naal bagai ilele di, “Tamo ĩ isif, are fau isiyouf, ĩ to foi youf.

<sup>38</sup> Anī ere, neu tamo madur bagai, ĩ momoiya bunem mata ibodōf.

Ī dumelem soso rouf are,  
aya ĩ nigin wau to al foug.” †††

<sup>39</sup> Anī ere, ada, idi dumelem soso de fen, fō delef gen sā, anī ere, ada, idi momoi de fen, isennēya dalef gen.

### Momoiya Bunem

**11** Momoiya are, ereb nigin wauda isef anī, de momoi bagai agef wō youf tauf anī. Momoiya are, ereb ada maladam to tailef anī, de momoi bagai ibodok tauf anī. <sup>2</sup> Kulu nē tamo kayau, dogo neid momoiya bunem, Negur idi nigin de fiyēdin.

<sup>3</sup> Momoiya bunem, ada keleī, Negur irō di, saa te-neub ado wō yen, anī nigin, ereb ada malada bun tailef are, maladam to tailef anim inodin. <sup>4</sup> Momoiya bunem, Abel ĩ sesewi fiya, Kain nē wal fiya Negur ifenen. Abel nē momoiya bunem, Negur ĩ Abel nigin madur tamo bagai yen, ere nigin, Negur ĩ Abel nē sesewi fiya are de yen. Abel ĩ laa fen, anī ere, momoiya bunem, ĩ fau wogō yef.

†† Diuteronomi 32:35 ††† Diuteronomi 32:36; Sam 135:14  
††† Habakuk 2:3, 4

<sup>5</sup> Momoiya bunem, Enok teneub enei bun tamal yalelnen, anī nigin, ī to laa fen. Negurem ī yalelnen nigin, takam ī to fotou fiyen. Negur nē Itotoya irok, Negur ī fau to yale mog, ī Negur wau al fiya ifenen. <sup>6</sup> Taka ī to momoi youf are, ī Negur wau al fiya ifenēya kisi feleya sā, ere nigin, taka ī Negur gein isif, are Negur ibodok anī ado, ī dimirnek anidi mala solo ifenēdidig anī, de momoi bagai youf.

<sup>7</sup> Momoiya bunem, Noa ī ereb malam fau ileyā sā mog, Negurem weder iron anī karī ye fen, ī Negur anini fiye ken, yogon ibor isennēdiyof nigin waag taka kare fen. Yogon momoia bunem, Noa ī, teneub enei mosor ado anī yaor fe fen, madur bagai, are momoia bunem isif anī, Negur bun tamal yalen.

<sup>8</sup> Negur ī, Abraham yogon akor fau yalouf modoū bun ilauf nigin iweignen sain bun, Abraham ī nain be ilauf ya anī keleī san. Anī ere, ī momoia bunem Negur nē od dōf fen, ilen. <sup>9</sup> Momoia bunem, Abraham ī, Negur afonōf yen teneub anī bun, yaū teneub bun yaū tamo gen ibodon. Ī salafat bun ibodon, Isak Jakop ado, idi Negur afonōf yen od tekelei Abraham yalen anī dalen, idig salafat bun dibodon. <sup>10</sup> Are Abraham ī, taun anī gariya teten total ifaref, are Negurem eig fe yenēf ye fen, kare fen anī tari fedig.

<sup>11</sup> Abraham ī tubau bagai, Sara ī yogo dali. Anī ere, momoia bunem, Abraham tama wōya nigin kisi felen, ere nigin, ī, Negur age afouf yen anī agef wō youf bagai ye fen, momoi yen. <sup>12</sup> Anī nigin, tamo tekelei ī tubau bagai laa tamo gen, ī bunem yogon ibor nē tubu tar, saa ilun barisa ado maaī ubun kulum yenek gen, iwesleya kisi feleya sā, fulus fen.

<sup>13</sup> Tamo kayau eneidi ganan momoi de fen, gare den. Idi ereb Negur ī age afouf yen anī to dalen. Are idi egerom meledim dogol dile fen, waud al fen. Age dife fen, teneub enei bun idi yaū tamo, namala den. <sup>14</sup> Tamo kayau age de dirok, are dogo neid teneub dimirek anī difelnadaf. <sup>15</sup> Idi teneub ditor disin anī nigin kisi dalen are, idi keku de dilauf nigin kisi feleya yenem.

<sup>16</sup> Age fiya ban, idi teneub biya bagai, saa ilun nē anī nigin waud yenen. Anī nigin, Negur ī, idi nemā Negur def anī nigin to mama fef, ere nigin, ī idi neid taun taka dodok felen.

<sup>17</sup> Momoia bunem, Negur Abraham kisi fiyen sain bun, Abraham ī, Isak anī Negur sesewi fiya ifenen. Abraham Negurem age afouf fiyen ī, naal tekelei bagai anī sesewi fiya ifenēf nigin age fen. <sup>18</sup> Negur Abraham irokenen, "Isak bunem, ogon ibor tar wowā douf."

<sup>19</sup> Abraham kisi fen, Negur ī laa tamo kel turī fiya kisi feleya. Anī nigin, ada eig tau wogōya kisi feleya, Abraham ī Isak laa bun tamal kel yalen.

<sup>20</sup> Momoia bunem, Isak ī, Jakop Esau ado, dumen bun idi neid ibodōya nigin el fiya ifenēdin.

<sup>21</sup> Momoia bunem, Jakop yogon laa melsā mog, Josef gere tar monog mugu mugu el fiya ifeneīd fen, yogon manig tubi bun mudur isen ken, Negur seli yabin.

<sup>22</sup> Momoia bunem, Josef yogon laa melsā mog, Israel tamo kayau Isip tamal ditor dilauf nigin wogō ye fen, yogon tuwa nigin faded fiyēdin.

<sup>23</sup> Momoia bunem, Moses sina tama adom, Moses wō ye di, ī ogō towo dinokelnen, ere nigin, Moses ī kesu meli bagai dile fen, idi king nē od nigin to kumī den.

<sup>24</sup> Momoia bunem, Moses ī biya fen, Isip king nē barai nē kesu yeya anī itoron. <sup>25</sup> Moses ī, mosor nē oroya sain naal bun dō fiya itor ken, Negur nē tamo kayau geid morō dalouf nigin wau iron. <sup>26</sup> Moses ī kisi fen, are Kristus nigin kono fiya yaleya anī, Isip nē safina biya bagai anī wal fiya, ere nigin, ī yogon mala solo dumen nē anī lo felen. <sup>27</sup> Momoia bunem, Moses ī Isip king nē seye nigin kumī sā, Isip itor ilen. Ī total ifaren, ere nigin, Moses ī, Negur ileyā kisi feleya sā anī, ilen gen age fen. <sup>28</sup> Momoia bunem, ī Pasa ado, bobog bun naud wiri fiya nē suma inon, are Yukesiya nē Engel ī, Israel neid kesu monog matu to idenkesiyof nigin age fen.

<sup>29</sup> Momoia bunem, Israel tamo kayau, teneub maug bun gen Maaī Giriya atu diyok dilen. Anī ere, Isip tamo idi dibal mog, naan kerub fedī di, gare den.

<sup>30</sup> Momoia bunem, Israel tamo kayau, Jeriko kau, naa sewen kalī dife di, Jeriko kau narī felen.

<sup>31</sup> Momoia bunem, naabur kayau Rahab, idi Negur ait to dō difedig geid to didenkesin, ere nigin, ī kofo tamo aan fiyēdin.

<sup>32</sup> Aya baban ere od taka arokenēf? Aya Gidion, Barak, Samson, Jepta, Dawid, Samuel ado, profet idi nigin dir feleya nigin sain sā. <sup>33</sup> Idi momoia bunem king geid kusī de fen, lai difedin. Idi madur bagai bunem kulatun difen. Idi Negur age afeneīf yen anī dalen. Idi laion eweid difofakelen. <sup>34</sup> Idi yā bale difofor len. Idi dimig waila wal difen. Idi total sā, anī ere, megeir dale fen, total difaren. Idi kusī namen total dale fen, yaū kusī tamo lai difedin. <sup>35</sup> Kayau dogo neid tar gare dedin, baban mata ke de fafā de di, daledin. Tunī darau sane bagai dale fen, kafī fiya bun tamal yalelnēdiya ditoron, are idi kel fāya biya anī, dalouf nigin age difen. <sup>36</sup> Tunī kono fiya ado tibog dalen, tunī sen nem difofa ken, kalabus bun dinenēdin. <sup>37</sup> Idi meein tulu difedin. Idi so nem kokour difedi di, uru wō yen. Idi dimig nem didenkesin. Idi sipsip gabar ado meme gabar difounkel dilen, are idi maleg dibodon, darau dalen, to biya difiyēdin. <sup>38</sup> Tenebur ein, idi ed fe ibodōya nigin to biya. Idi gerere tuan, arein, meein ku bun ado, teneub kur diyōdig.

<sup>39</sup> Eneidi ganan, Negur, dogo neid momoia nigin de fiyēdin. Anī ere, idi takam, Negur age afouf yen anī to yalen, <sup>40</sup> ere nigin, Negur ada nigin kisi biya bagai inon, are idi ada weim ouf dogol, kisi feleya bagai wowā douf nigin, Negur ī age fen.

### Negur Yogon Kesu Tar Madur Fiyēdidig

**12** Ada momoia tamo kayau age fediya musei budū gen kalilī difadaf. Anī nigin, ereb ereb ganan naaburada gudū fef anī ado, mosor karika sane fili

fadaf anī taraile fen, abob wawal fiya nē gudu reya Negurem inokanadan anī bun, feseya sā gududu tauf.

<sup>2</sup> Ada malada Jesus bun dogol tanouf, ī neda momoiya nē gariya ado, momoiya kisi feleya bagai wōya nē. Ī wau al fiya mala bun ifaren anī nigin ye fen, ī aa tetek nigin to fese ye fen, mama yaleya nigin to kukī yen, agef fen, ī Negur nē sia ima biyalē ibodon. <sup>3</sup> Jesus ī mosor adodo tamom kiwai fatuk difenen anī ganān faali fen, ī nigin kisi tafouf, are ā to fō yei ken, wauī folo rouf nigin age tafouf.

<sup>4</sup> Ā mosor ado gunī gedig, anī ere, ā fau kusīg fen, naudeī fi feleya sā. <sup>5</sup> Agog fen, ā wauī yaleseya od, Negur neu kesu tar yein anī wedereī tu kelen:

“Neu kesu, ō Odug nē madur fiya to ege wouf,

Odug ī ou yōf are, waū to folo rouf,

<sup>6</sup> ere nigin, Odug ī, idi nigin wau laa fedig anidi madur fiyēdidig,

agef fen, ī yogon kesu tar yaledif anidi ganān darau ifenēdidig.” †

<sup>7</sup> Morō ā ado are, Negur nē madur fiya anī de faali gouf. Negur ī, ā yogon kesu tar nigin age fef. Kesu nanī taka, tamam to madur fiyēdig? <sup>8</sup> Negur yogon kesu tar ganān madur fiyēdidig, anī ere, ī ā to madur yeif are, ā yogon kesu tar sā, ā dubur temeļē. <sup>9</sup> Ada ganān tamada tar ado, idi ada madur difada di, anī nigin bobou tafiyēdidig. Anī nigin, ada fatuk bagai neda uur nē Tama farumen tabod ken, mata tabodōf! <sup>10</sup> Ada tamada tar, sain naal bagai, idi biya kisi difen anī kilei, madur difadan. Anī ere, Negur neda biya fiya nigin, madur fadadig, are ada ī geid fateulouf nigin age fedig. <sup>11</sup> Sain madur fiya ganān bun, wau al fiya to taledig, darau anī taledig. Anī ere, dum, idi darau age fiya bunem madur fiyēdin anidi bun, madur bagai ado wau inosiya nē faat biya wō youf.

<sup>12</sup> Anī nigin, imeī bubur kelediya ado iboreī felu reya megeir weledigouf. <sup>13</sup> “Yeī nigin naab tutuk gouf,” †† anī bunem, yeī kirorōya to sesen lauf, are biya lediyouf.

### Negur Dudum Fiya Nigin Weder Irouya

<sup>14</sup> Tamo ganān geid wauī inosiya bun ubodōg fen, fateulouf nigin kabī total waleg. Fateul sāf are, takam Odug to ilouf. <sup>15</sup> Taka nem Negur nē wau ifenēya to folo rouf nigin ado, aa faat dirikeī gen to wō ye fen, musei morō ifeneīd fen, amuyē ifenēdiyof nigin lo welegei. <sup>16</sup> Taka nem noli tobonunā to inouf nigin be, Esau gen Negur nigin kisi sā to ibodōf nigin lo welegei. Esau ī, kesu matu nigin yogon akor fau yalouf anī, sain tekelei nē saaf anī nem na sur fen. <sup>17</sup> Anī dumen, ā karī gef kilei, ī el fiya enei akorouf nigin oron, anī ere, ī to yalen. Ī inā ado el fiya anī imiren, anī ere, ī wau faleiya nigin naab taka san.

<sup>18</sup> Ā arei eig fiya bun to usigen, arei are kobū fiya kisi feleya, yā balē yef ado, gugum, tubutubuya, uyē yau total ado, <sup>19</sup> taur ait, ait taka od wogōya nē, are tamo idi ait anī karī de fen, od baban to wogō fiyēdiyof nigin digonen, <sup>20</sup> ere nigin, idi eig ye irokenēdin anī yaleya kisi feleya sā, “Gaar taka arei anī kobū foufeg, me-

ein tulu difouf.” ††<sup>21</sup> Moses anī ile fen, fatuk bagai kumī ise fen, iron, “Aya kumī tererē auf.” ††

<sup>22</sup> Anī ere, ā Saion Arei bun, saa ilun nē Jerusalem, are mata ibodōya Negur nē taun usigen. Ā engel mala musei biya al de guru difef bun usigen. <sup>23</sup> Ā, Negur nē kesu matu, idi yeneid saa ilun itoton anidi neid sios bun usigen. Ā tamo ganān nē es fiya Negur bun ado, madur tamo kisi feleya bagai wowā den anidi neid uur bun usigen. <sup>24</sup> Ā, Jesus, bar itenēya mata nē atun tamo bun ado, naud wiri fen, are Abel nē naud wogō yef anī wal fiya od wogō yef anī bun usigen.

<sup>25</sup> Lo welegei, are ī wogō yef anī to dudum wog. Idi tenebur ein wedereid iroun ī dudum difiyen idi to diyalelen, ani nigin, ada saa ilunem wederada irouf ī dudum tafouf are, ada iyaleleya nigin malai bagai. <sup>26</sup> Sain anī bun, yogon aitem tenebur enei yokū fen, anī ere, gama ī promis od eig ye iron, “Baban aya tenebur dogol sā, saa ado yokū afouf.” ††<sup>27</sup> Od “baban” yef are ifel-nadaf, are ereb ereb inodin yokū fiya kisi feleya anī yokū feid fen, yalelauf, are ereb yokū fiya kisi felya sā anī fau ifarauf nigin age foug.

<sup>28</sup> Ada tano yokū fiya kisi feleya sā anī talef, anī nigin, Negur de tafiye ken, Negur wau al fouf nigin, kumī ado aniniya bunem, Negur seli tabiyouf, <sup>29</sup> ere nigin, neda “Negur ī isaikeleya nē yā.” ††

### Idikeleya Nē Wau Yaleseya Od

**13** Abob nigin tureī tar gen, toku wauī laa fouf.

<sup>2</sup> Tamo mata urug yalediya nigin to wedereī tu kalauf, tamo tunī age difen are, keleī sa ken, engel gei difedin. <sup>3</sup> Idi kalabus bun difaref anidi, ā idi geid takai kalabus bun ifareya gen, karī wedigouf. Idi to biya difiyēdif anidi, ā morō takai walegef gen, karī wedigouf.

<sup>4</sup> Tamo kayau ado bagu fiya nigin, tamo ganān, yana odug an dinouf. Tamo kayau ado bagu fiya nē fatar karētut ibodōf, ere nigin, Negur ī, idi seseirā tobonunā dinof anidi ado, idi noli tobonunā dinof anidi, es fediyouf. <sup>5</sup> Moni nigin kisi fatuk to unogouf, safina ā adof anī, are eī de gouf, ere nigin, Negur ī iron,

“Aya to bagai atorneif,

aya to bagai folō ayeikalauf.” †††

<sup>6</sup> Anī nigin, ada kumī sā torōf,

“Odug ī neu isennēya, aya to kumī auf.

Aya tamom ere naig fiyauf?” †

<sup>7</sup> Āgenei uyu irouya, Negur nē od wogō diyeyin anī karī walagauf. Idi naig de dibodok disi di, ereb wō yen anī kisig fen, idi neid momoiya madē gouf. <sup>8</sup> Jesus Kristus ī to falei yedig, nor, gama ado, sain ganān, de agef ibodkeledig.

<sup>9</sup> Ā ifelnēya fire fire anim to wewu yeī irouleyeif. Ada wauda, wau ifenēya anim megeir fouf anī biya, saaf nē lo dō fiya bunem ada wauda to megeir fouf, are idi saaf nē lo dō de doko anidi, anim to isennēdif. <sup>10</sup> Ada alta ado, an pris salafat fateul bun kabī daledig idi, neda alta anī bun yōya nigin kisi feleya sā.

† Proveb 3:11, 12 †† Proveb 4:26

‡ Eksodas 19:12, 13 †† Diuteronomi 9:19 †† Hagai 2:6  
††† Diuteronomi 4:24 ††† Diuteronomi 31:6 † Sam 118:6, 7

<sup>11</sup> Pris mudur, yaro naud anī, mosor nē sesewi fiya Negur ifenēf nigin, Modoū Fateul Bagai bun iledig, yaro bouwa are, fō mayā dumeitur difaleg isaikeledig.

<sup>12</sup> Anī nigin, Jesus īg yogon naud bunem, tamo kayau neid mosor yalelauf nigin, taun bobog dumeitur darau faali fen. <sup>13</sup> Anī nigin, ada, ī mama faali fen anī tale fen, fō mayā dumeitur ī gein talauf. <sup>14</sup> Ere nigin, ada, tenebur ein, faimud ibodkeleya nē taun sã, anī ere, ada taun fau isiyouf anī tamirek.

<sup>15</sup> Anī nigin, ada toku, Jesus bunem, yana yaleseya nē sesewi fiya, Negur tafenēf, yana yaleseya nē sesewi fiya are, sigoradam Jesus yana kurō tafesif anī. <sup>16</sup> Ereb ereb biya agog fen, abob wenēgouf anī to wedereī tu kalauf, ere nigin, sesewi fiya age fediya anim Negur wau al fedig. <sup>17</sup> Āgenei uyu irouya farumen ubodōg fen, karī wiyēdigouf. Idi ā lo diyeīdig, idi dogo neid kabī nigin dum Negur dirokenēf. Idi karī wiyēdigouf, anī bunem, idi neid kabī morō sã, wau kulīya ado dalouf, ere nigin, idi morō ado kabī dalouf are, ā to isenēif.

<sup>18</sup> Amā nigin kosē gouf. Amā momoi mauf, are amā kisi karētut ado, amā ereb ereb ganan bun biya age

mafouf nigin oromak. <sup>19</sup> Negur aya ā gein kaisã bagai sur fiyauf nigin, ā kosē gouf nigin, fatuk bagai arokenēik.

<sup>20</sup> Wau inosiya nē Negur ī, faimud ibodkeleya bar itenēya nē naud bunem, neda Odug Jesus, sipsip lo fiya tamo odug, laa bun tamal kel irusin. <sup>21</sup> Wau inosiya nē Negur ī, Jesus Kristus bunem, yogon oroya dō gouf nigin ereb ereb biya ganan ā ifenei ken, yogo wau al fouf nigin ada bun kabī yalouf anī amā oromak. Negur ī bun fula fiya medeīya gai gai ibodōf. Momoi.

<sup>22</sup> Turau tar, ā, neu wau yaleseya od anī, karī gouf nigin, total bagai arokenēik, ere nigin, aya pas tobega dogol atotkenein.

<sup>23</sup> Neda turada Timoti, kalabus bun tamal ulō yesin anī, ā keleī youf nigin aya orouf. Ī kaisã wō youf are, amā urom ā mailiyeīf nigin masiyouf.

<sup>24</sup> Āgenei uyu irouya ganan ado, Negur nē tamo kayau ganan aan wiyēdigouf. Idi Itali temeleid, ā bun, idi neid aanya, sur difeneik.

<sup>25</sup> Negur nē wau ifenēya ā ganan bun ibodōf.

# JEMS

**1** Aya Jems, Negur ado Odug Jesus Kristus neid ferfer,

Israel neid ibor tuwelf tenebur ein firagagaũ difen bun pas enei atotof.

Aan yeya.

## Morõ Bun Ado Kisi Fiya Bun

<sup>2</sup> Turau tar, ereb sain morõ fire fire walogouf are, ã wauĩ al fiya nigin gouf, <sup>3</sup> ere nigin, ã keleĩ, ãgenei momoiya, kisi fiya bunem, feseya sã ifareya wõ yedig.

<sup>4</sup> Feseya sã ifareya anĩ tobol ge di, ketẽ yese di, ã atiyẽĩ ken, kisi feleya bagai, ereb taka nigin lau fiya sã wõ gouf. <sup>5</sup> Æ taka kisi biya nigin lau fouf, Negur tamo ganan kisi biya nigin lau de fen to difiyẽf anĩ to ou fiyẽĩd fen, wau sã kisi biya kisi feleya ifenẽdidig anĩ to fiyẽf, age fe di, ã ifenẽf. <sup>6</sup> Anĩ ere, ã to fiyẽ fenẽ, ã momoi ye fen, to wau uru ouf bagai, ere nigin, taka ã wau uru ouf are, ã maã moloun wĩya gen, yaum wese fe di, ilef isif fedig gen. <sup>7</sup> Tamo age fiya, ã Odug bun tamal ereb taka alouf ye fen, to kisi fei. <sup>8</sup> Æ tamo wau uru ado, ereb age fef ganan bun, in wau to dẽ yesiledig.

<sup>9</sup> Momoiya turada taka ã maleg are, ã Negur mala bun yogon modoũ ilun nigin wau al fouf bagai. <sup>10</sup> Anĩ ere, taka safina musei ado, sain Negur ã lai fesilnẽf are, ã anĩ nigin wau al fouf bagai, ere nigin, ã odõ munĩ gen inanakalauf. <sup>11</sup> Gaa ise fen, yogon uruwa nẽ totol anim aayũ gariri keledig, age fe di, munĩ tu rel fen, kubũ ye fen, yogon gegẽ meli bagai anĩ inanakalauf. Age fiya gen, tamo safina musei ado ãg yogon kabĩ yalef ile mog, inanakalauf.

<sup>12</sup> Tamo taka ã, morõ bun megeir ifaref ilauf, ã el fiyek, ere nigin, ã kisi fiya bun ifaren nigin, ã mata nẽ teter Negur idi ã nigin waud laa fef anidi afenẽdiyof yen anĩ yalouf.

<sup>13</sup> Kisi fiya isi di, taka nem to irõf, "Negur aya mosor anouf nigin kisi fiyaf." Ere nigin, Negur ã sanem kisi fiyẽya kisi feleya sã, agef fen, inimeg taka mosor inouf nigin to kisi fiyẽf. <sup>14</sup> Anĩ ere, mugu mugu ã, yogon oroya sanem mala yũ yale di, kisi fiya bun iledig. <sup>15</sup> Age fe di, bouwa nẽ oroya anim, mosor wau bun kare fe di, mosor gõ fef, mosor anĩ isora le fen, laa gõ fef.

<sup>16</sup> Turau tar oboiyou, to didegneĩf. <sup>17</sup> Erebiya ganan ado ege luwa bagai ganan, are ilun tamal, Negur saa ilun nẽ lalan ganan kare fen ã bunem isif, ã to falei fulu yedig, ã buri ilef isif fedig gen to falei yedig. <sup>18</sup> Æ, yogon oroya bunem, ada, yogon momoi od bunem yogon gere tar wõ tauf nigin igirnadan, are ada ereb ã inodin anĩ ganan bun faat uyulil taka gen wõ tauf nigin age fen.

## Karĩya Ado Dõ Fiya

<sup>19</sup> Turau tar oboiyou, enei karĩ walagauf: Tamo ganan kaisã bagai karĩ gouf, kaisã to wogõ gouf, kaisã to seye gouf, <sup>20</sup> ere nigin, tamo nẽ wau saneya are, tutuk mata ibodõya Negur orof anĩ to irou isidig. <sup>21</sup> Anĩ nigin, ereb ereb amuyẽ ganan ado, sesen ketẽ yesen ganan walagauf, agog fen, wauĩ yukesileya bunem, od ã namein Negurem itenen, kel yaleyeĩf kisi feleya anĩ walogouf.

<sup>22</sup> Æ od ege karĩ dogol ya bunem, to aug bouweĩ udegnẽg. Erebiya yef anĩ dõg agog. <sup>23</sup> Aib taka ã od karĩ ye fen, ereb yef anĩ to dõ fef are, ã tamo yogo nawa dodo bun ilef gen, <sup>24</sup> ã yogo nawa felef, waĩf yale di, kaisã bagai yogo nawa nigin nene yedig gen age fiya. <sup>25</sup> Anĩ ere, tamo ã, lo kisi feleya bagai, karika ifenẽdig anĩ bun, el fe felef fen, faimud age fef ile, ereb karĩ yen anĩ to weder tu kel fen, anĩ agei fouf are, ã ereb age fef anĩ bun el fiyẽf.

<sup>26</sup> Aibem taka ã aya momoi auf ye fen, ereb ereb lo irok kilei bagai dõf age fouf, anĩ ere, yogon sigor to fa-teul inouf are, ã yogo idegne ken, yogon momoiya are kaũ sã. <sup>27</sup> Momoiya, Negur ada Tamada karẽtut ado kũ fenẽya sã gen iledig, are eig fiya: maad ado waab, nedi morõ bun kulatun fediya, agef fen, tenebur nẽ oroyam to amuyẽ iroudauf nigin lo feleya.

## Æ Wauĩ Wenẽgef Anĩ Dogol To Lo Walagauf

**2** Turau tar, ã, neda fula fiya medeĩya nẽ Odug Jesus Kristus nigin momoi gef nigin, ã wauĩ wenẽgef anĩ dogol to lo walagauf. <sup>2</sup> Tamo taka ã, ãgenei guru fiya bun ima sai gol ado kolos biya ifoun ken, isi di, maleg tamo taka kolos tubu adog namen isiyof. <sup>3</sup> Æ tamo kolos biya ado anĩ el ge lo weleg fen, "Ogon ibodõya modoũ biya bagai yeir," ge fen, maleg tamo urokenẽgouf, "Õ an ufar," be "Õ yeu gariyan tenebur ubod," wiyẽgouf are, <sup>4</sup> ã atun es ge fen foi gen, agog fen, kisi gariya sane bunem es fiya tamo wõ gen.

<sup>5</sup> Karĩg, turau tar oboiyou! Negur ã, tenebur tamo kayau meleid bun maleg anidi momoiya bun kisi feleya bagai wõ de di, Negur nẽ tano ã nigin waud laa fedig anidi afenẽdiyof yen anĩ, idi akor dalouf nigin to igirnẽdin de? <sup>6</sup> Anĩ ere, ã maleg anidi anĩ meleĩ irim uledigen. Tamo safineid adodom to lai diyeĩdig de? Idim ã kot bun to guri diyeĩ dirouleyeĩdig de? <sup>7</sup> Idim, Kristus yana biya anĩ bunem ã iweigneĩdig anĩ, to yana sane dinodig de?

<sup>8</sup> Ā, momoi bagai, neda King nē lo, Negur nē Itotoya bun ibodok, “Ō ogo nigin waū laa fef gen, nē tā nigineg ago waū laa fouf,” † anī dō gouf are, ā biya ago gef. <sup>9</sup> Anī ere, ā wauī wenēgef anī dogol lo walagauf are, ā mosor unog fen, lo bunem, ā lo wal fiya tamo wowā gef. <sup>10</sup> Ere nigin, taka ī lo ganān dōf fen, lo tekelei dogol wal fouf are, ī lo ganān wal fef. <sup>11</sup> Aib ī iron, “Ō seseirā to uno,” †† ī eig yeg iron, “Ō taka to ukeis.” ‡ Ō seseirā to unof, anī ere, taka ukseyouf are, ō lo wal fiya tamo wō wouf.

<sup>12</sup> Idi, lo karika ifenēdidig anim, es fediyouf age fe-diya gen wogōg fen, dō gouf, <sup>13</sup> ere nigin, Negur, es fiya wau yūya sā anī, aib wau yūya sā bun inouf. Taka ī taka nigin wau yūya ifelnēf are, ī es fiya anī wal fouf, ere nigin, īg Negurem wau yūya ifelnēf.

### Momoiya Ado Dō Fiya

<sup>14</sup> Turau tar, tamo taka aya momoi auf ye fen, to dōf age fouf, ī ere biya age fouf? Momoiya age fiam tau isennēf? <sup>15</sup> Turada be mainada taka ī, kolos ado saaf naa teke tekelei yōya nē sā. <sup>16</sup> Ā takam ī irokenēf, “Wau inosiya bun ule, aya ō de ailiyok, uruwa wale fen, wō el wo,” age ye fen, ī bouwa buru isennēya nigin ereb taka to age fouf, ī ere biya age fef? <sup>17</sup> Naab age fiya bagai, momoiya yogo dogol, dō fiya bunem to isennek, are laa fef.

<sup>18</sup> Anī ere, takam irōf, “Taka momoiya ado, taka dō fiya ado.” Kisi age fiya are kū fenēya.

Ogon momoiya, dō fiya sāf are, naig fe di, aya ō momoiya ado ya anī keleī youf? Anī ere, aya, neu dō fiya bunem, aya momoiya ado ya anī afelnōf. <sup>19</sup> Ō Negur tekelei ibodok ya anī momoi wof. Are de! Kaa seseneg age de momoi de fen, kumī tererē dedig.

<sup>20</sup> Ō neneya bagai, ō momoiya dō fiya sā are, ege bagai ya anī keleī you fenē de? <sup>21</sup> Ada tubuda Abraham yogo naal Isak alta bun Negur sesewi fiyēf nigin age fen bun, ereb ī age fen bunem, Negur ī madur bagai to fiyen de? <sup>22</sup> Ō, yogon momoiya ado yogon dō fiya bagu de kabī dale di, yogon momoiya, ereb age fen anī bunem, kisi felen anī ulef. <sup>23</sup> Anī bunem, Negur nē Itotoya eig ye irok anī kisi felen, “Abraham Negur nigin momoi yen, age fe di, Negur Abraham madur bagai yen,” †† age ye fen, Negur Abraham nigin neu mou yen. <sup>24</sup> Anī bun, ō ulef, are tamo ī ereb age fef anī bunem, Negur ī nigin madur bagai yef, momoiya dogol bunem sā.

<sup>25</sup> Age fiya bagai, Rahab naab kayau īg, kofo fiya tamo gei feid fen, naab taka bunem sur fedin anī bunem, Negur Rahab nigin to madur bagai fiyen de? <sup>26</sup> Bouwa uur sā are laa fef age fiya gen, momoiya dō fiya sā are laa fef.

### Sigoreī Kulatun Gouf

**3** Turau tar, ā atun musei tise wowāya nigin to kisi gouf, ere nigin, ā keleī, amā tise kabī malef, totol

† Levitikas 19:18 †† Eksodas 20:14; Diuteronomi 5:18 ‡ Eksodas 20:13; Diuteronomi 5:17 †† Jenesis 15:6

bagai es famāf. <sup>2</sup> Ada ganān naab musei bun kuku tau-dig. Aib taka ī ereb yef bun to kū fenēf, ī tamo kisi feleya bagai, yogon bouwa ganān ulum iroukenēya kisi feleya.

<sup>3</sup> Ada hos sigorada dō difouf nigin eweid bun ain to-bega tanof are, ada hos bou ganān, sā gadi tafiyēf.

<sup>4</sup> Takag, waag bun kisi gouf. Idi odug bagai fen, yau to- tolem irouledig, anī ere, ulum iroya tamo narib ileya nigin, ulum naal bagai anim waag anī narib ileya orof nē irouledig. <sup>5</sup> Age fiya bagai, bouwada bun baleda are gai naal bagai, anī ere, ī, ereb odudug ī age fef nigin, yogo yana seli yabidig. Dub odug yā ninimam age fe di, uu yedig age fiya gen bagai kisi gouf. <sup>6</sup> Baledag ī yā, bouwada ganān atun sane nē teneub. Ī tamo oditekei bouwa ganān amuyē ifenēdig, yogon mata ibodok ilauf ganān bun yā irādīg, age fe di, īg yogo hel bunem isaikalauf.

<sup>7</sup> Gaar fire fire ganān, ninā, gaar luwedim diyōdig anī ado, maaīwō difaref are ganān, maman difiyēdig nigin tamom maman difediyouf. <sup>8</sup> Anī ere, tamo takam bale maman fiya kisi feleya sā. Ī faimud sane fen, laa nē mū sanem barikā.

<sup>9</sup> Baledam ada neda Odug ado Tamada yana talese-dig, age tafe fen, de anim tamo Negur yogo gen inodin anī gelu tafedidig. <sup>10</sup> Awada tekelei anī bun tamal, yana yaleseya ado gelu fiya wō yedig. Turau tar, anī to agef ilauf bagai. <sup>11</sup> Maaī naan ado naan maug, warur tekelei bun tamal wōya kisi feleya de? <sup>12</sup> Turau tar, aa fig, aa oliv faat imaya kisi feleya de? Aa wain, aa fig faat imaya kisi feleya de? Age fiya gen, maaī naan, warur bun tamal, naan maug wōya kisi feleya sā.

### Tenebur Nē Kisi Biya Ado Negur Nē Kisi Biya

<sup>13</sup> Ā atun taka, kisi biya ado fen, kisi fokō feleya adouf are, ī yogon tobonunā biya bunem, wau yukesileya kisi biya bunem isif anī bun, dō fiya bunem anī yaorouf.

<sup>14</sup> Anī ere, ā āgenei wauī bun, kiyēī makik ado, aya aya yeya adouf are, ā yeneī to waleseg fen, aya kisi biya ado gouf. Ago gouf are, ā udegēg fen, momoi nē od anī to dō gouf. <sup>15</sup> Yeneī yaleseya nē kisi age fiya, saa ilunem to isif, anī ere, are tenebur tamal, bouwa nē oroya nē, Satan bun tamal. <sup>16</sup> Ere nigin, kiyēī ado aya aya yeya ibodok nē an, ekul fiya ado ereb ereb sane ganān ibodok.

<sup>17</sup> Anī ere, kisi biya saa ilunem isif are, uyulil karētut, age fe di, maror nigin wau laa fiya, molol, abob karī fiyēya, wau yūya barikā ado, faat biya yūya, anī kinau ya sā ado, mala yaleya sā. <sup>18</sup> Maur gudū fiya tamo ī maror bun itenek, ī madur bagai anī kusu fedig.

### Negur Farumen Ubodōgouf

**4** Erem age fe di, kusīya ado monēya ā atun ibodok? Are āgenei oroya ā namein kusī yedig anī bunem to wō yedig de? <sup>2</sup> Ā ereb oroyeik, anī ere, to walegedig. Anī nigin, ā safineid adodo udenkesig fen, ereb ereb yalekenēdiya nigin kisi gedig. Ā ereb oroyeik, anī ere, yaleya kisi feleya sā. Anī nigin, ā monēg fen, kusī



gedig. <sup>3</sup> Ā to walegedig, ere nigin, ā Negur to, to wiyē-gedig. <sup>3</sup> Sain ā to gef bun, to walegedig, ere nigin, ā wauī bun tutuk sa ken, to gedig, ā erēb walegef are aug naumeī nigin ge fen, iraileya nigin ago gedig.

<sup>4</sup> Ā gai de, tamo kayau seseirā dinodig gen! Ā tenebur nē oroya ado bagu gouf are, Negur kiwai wenēgef anī ā keleī sā de? Taka ī tenebur nē oroya ado bagu foug are, Negur nē kiwai tamo wō youf. <sup>5</sup> Ā kisi gef, Negur nē Itotoya ī gariya sā, “Uur ada namedan ibodōf nigin inon anī kiyeī total bagai ifenek,” yef de? <sup>6</sup> Anī ere, Negur ī wau ifenēya mugi bagai ada ifanadadig. Anī nigin, Negur nē Itotoya eig ye irok,

“Negur ī, dogo yeneid dalesef anidi kiwai ifeneīd fen, waud dukesil dibodok anidi wau ifenēdidig.” †

<sup>7</sup> Age fiyauf are, aug Negur farumen ubodōgouf. Sattan wal fiya nigin teībir gouf, ago ge di, ī ā folō yeikalauf. <sup>8</sup> Negur wagen usig len, ī ā wagein isiyouf. Mosor adodo ā, imeī kulo gouf, kisi uru adodo ā, kisi tenebur ein nē oroya bun uogef anī utorōg fen, kisi ganā Negur bun dogol unogouf. <sup>9</sup> Wauī gudūf, maruī isi fen, inā walogouf. Kasāya utorōg fen, wauī gudū foug, wauī kulīya utorōg fen, wauī morōf. <sup>10</sup> Odug mala bun wauī ukesileg, ago ge di, ī ā yalesneīf.

<sup>11</sup> Turau tar, ā abob, ō sane to wiyēg. Taka ī, tura, ō sane fiyek be, es fiyek, ī lo are sane ye fen, lo es fiyek. Ā lo es wiyēgouf are, ā lo dō fiya tamo sā, anī ere, ā lo nē marau gen wowāg fen, ā aug tamo es wiyēgedif.

<sup>12</sup> Lo ifenēya ado es fiya tamo, de tekelei dogol ibodok, ī yogo kel yaleya ado daū feleya kisi feleya. Anī ere, ā ere anī neī tā es wiyēgouf?

### Nil Nigin Yana Yaleseya

<sup>13</sup> Gama karī gouf, ō aib urōgedig, “Gama be nil, amā fau taun enei be anī bun mele, an yar tekelei mabod, bisnis mano fen, moni malouf,” gedig. <sup>14</sup> Anī ere, āgenei mata are nil naig fe ilauf anī, ā keleī sā. Āgenei mata are ere? Ā ogou sain naal bagai wō ye fen, iwaikeledig gen. <sup>15</sup> Anī nigin, ā eig gouf, “Odug orouf are, amā mabod ken, enei be anī age mafouf,” gouf. <sup>16</sup> Anī ere, ā agog wauī fā ye di, yeneī walesegedig. Yana yaleseya age fediya ganā are sane. <sup>17</sup> Age fiya nigin, taka ī biya nigin keleī ken, age fiya kisi feleya anī to age foug, ī mosor inouf.

### Safina Musei Adodo Bun Weder Irouya

**5** Gama karī weleg, ā safina musei adodo, morō odug ā bun isif anī nigin maruī isi fen, inā walogouf. <sup>2</sup> Āgenei safineī bura le di, dedek āgenei kolos dakasin. <sup>3</sup> Āgenei gol ado silwa maat te yun. Dogo neid maat te anim, ā nigin kiwai od wogō ye fen, yā nem gen āgenei bouweī yakasiyouf. Ā gamag idikeleya sain mog, safina kuru gen. <sup>4</sup> Ulegef! Kabī tamo āgenei kabier kusu fiya nigin oroi dilen anī to na waledigen nigin,

† *Proverb 3:34*

na yaleya nē wareg ā to wenēdigen anim, ā nigin kaī ye fen, iron. Age dife di, oroi tamo aiteid, Odug saa ilun nē kusī tamo guri feid uyu iroudig anī, wederen ilen. <sup>5</sup> Ā tenebur ein erēb erēb biyai biyai ado ubodōg fen, bouweī sigigi gen. Ā idenkesiya nē naa nigin bouweī gigiru unogen. <sup>6</sup> Ā, idi mosor sā, kiwai to difenein anidi, bouweid ūg fen, udenkesigen.

### Darau Bun Feseya Sā Ifareya

<sup>7</sup> Anī nigin, turau tar, to fese gef uleg, Odug nē isiya sain wō youf. Saaf kabī yaleya tamo, teneub bun saaf biya bagai wō youf nigin, naig fe tarif fen, uyē uruwan isif ile idikeledig anī atun, naig fe feseya sā tarif fen, kabī yaledig anī uleg. <sup>8</sup> Āg, to feseg fen, total ufara-gauf, ere nigin, Odug isiya nē naa are mogo melsak. <sup>9</sup> Turau tar, abob to nauseir wiyēg, abob nauseir wiyēgouf are, es fiya ā bun isiyouf. Es fiya tamo mogo bobogē ifaref!

<sup>10</sup> Turau tar, profet Odug nē yana bun wogō den anidi, darau bun feseya sā difaren gen āg ago gouf. <sup>11</sup> Ā keleī, ada idi feseya sā difaren anidi el fedif taudig. Ā Job naig fe feseya sā ifaren anī karīg fen, dum Odug ī bun erēb naig fen are ulegen. Age fiya gen, Odug ī wau ifenēya ado wau yūya barikā.

<sup>12</sup> Anī ganā wal fiya, turau tar, ā wauī kuturol fen, saa ilun bunem, tenebur bunem be, erēb taka bunem od to megeir wogouf. Āgenei yoya are de yo dogol gouf, āgenei sāya are de sā dogol gouf. To dō gouf are, es fiya bun ufaragauf.

### Momoiya Bunem Kosēya

<sup>13</sup> Ā atun taka ī morō bun ibodok de? Age foug, ī kosē youf bagai. Ā atun taka wau al fef de? Age foug, ī yana yaleseya nē seg yalediyouf. <sup>14</sup> Ā atun taka dāgi ado de? Age foug, ī sios nē mudur adodo ī nigin kosē de fen, Odug yana bun ī mudur bun mouf fi difalauf nigin iwegnēdiyof bagai. <sup>15</sup> Age fe di, momoiya bunem kosē def anim dāgi tamo el fiyēdig. Odug ī yalesneīf. Ā mosor inon ouf are, in mosor nigin weder tu kalauf. <sup>16</sup> Anī nigin, āgenei mosor nigin abob mala bun kurō wesig fen, abob nigin kosē ge di, ā karika walogouf. Madur tamo nē kosēya are megeir ado fen, kabī yaledig.

<sup>17</sup> Eliya ī tamo ada gen taka. Ā uyē to isiyouf nigin totol bagai kosē ye di, tenebur ein yar towo ogō sigis uyē to isin. <sup>18</sup> Ā baban kosē ye di, saa ilunem uyē isin, age fe di, tenebur nē saaf wowā yen. <sup>19</sup> Turau tar, ā atun taka, momoi nē naab kū fen ken, fasikor fel, me-teig ile di, takam ī momoi nē naab bun kel irousiyouf are, <sup>20</sup> enei karī gouf, aibem taka ī mosor tamo yogon kū fenēya nē delē bun tamal falei fiyek are, yogon malakanon laa bun tamal kel yale fen, mosor musei ganā nigin weder tu keleya anī irou isif.

# 1 PITA

**1** Aya Pita, Jesus Kristus nē aposel, Negur igirnēdin anidi, tenebur ein yaū tamo gen Pontus, Galesia, Kapadosia, Asia ado, Bitinia provins firagagaū de difaref anidi bun pas enei atotof. <sup>2</sup> Ā, erēb wōya sã mog, Negur Tamada nē keleĩ biya kilei igirneĩ di, Awa Uur nē kabĩ bunem fateul wō gen, anĩ bunem, ā Jesus Kristus sigor dōg fen, yogon naud ā tetein wiri fen.

Wau ifenēya ado wau inosiya ā bun barikāf.

## Mata Ibodōya Wau Iseya Nigin Negur Yana Yaleseya

<sup>3</sup> Negur, neda Odug Jesus Kristus nē Tama yana talesauf! Yogon wau yūya odug bun, Negur ĩ Jesus Kristus laa bun tamal kel fã yen bunem, ada mata gō fadan, are ada mata ibodōya wau iseya bun tele fen, <sup>4</sup> yogon akor, inanakeleya, bura leya be, sa keleya kisi feleya sã, ā nigin saa ilun dodok fen anĩ bun talauf nigin age fen. <sup>5</sup> Momoiya bunem, ā Negur nē megeir anim kulatun yeik ile, kel yaleya, idikeleya sain bun yaor foug nigin dodok fef anĩ, isiyouf. <sup>6</sup> Anĩ nigin, gama sain naal bagai, ā morō fire fire anĩ bun wauĩ morō yeĩ digeg, ā fatuk bagai wauĩ kulĩ yef. <sup>7</sup> Morō eneidi ā bun isin are, āgenei momoiya, gol yã nem difalegefeg, sa keledig anĩ wal fiya wō ye fen, āgenei momoiya anĩ, momoiya bagai yaore di, Jesus Kristus wō youf sain bun, yana ifenēya, fula fiya medeĩya ado, yana yaleseya walogouf nigin agef isin. <sup>8</sup> Ā ĩ to ulegen, anĩ ere, ā ĩ nigin momoi ge fen, wauĩ kulĩya dir feleya kisi feleya sã ado fula fiya medeĩya anim aura yeik, <sup>9</sup> ere nigin, ā āgenei momoiya nē kaũ, āgenei meleĩkanon kel yaleya anĩ mogo walegef.

<sup>10</sup> Kel yaleya enei nigin, profet idi wau ifenēya ā bun isin anĩ nigin wogō den anidi, fatuk bagai el de dimir ken, <sup>11</sup> Kristus nē Uur idi bun ibodon anĩ, Kristus nē darau ado anĩ dumen isiyouf nē fula fiya medeĩya nigin profet od wogō yen sain bun, ĩ ere nigin ado erēb sain nigin wogō yen anĩ, idi keleĩ youf nigin age difen. <sup>12</sup> Awa Uur Fateul saa ilunem sur fen anĩ bunem, soosi tamo idi biya od wogō diyein anim erēb wogō diyein, are enegeleg dilouf nigin total bagai orodif anĩ nigin, profet idi wogō den sain bun, idi dogo nigin sã, ā nigin aruna dalen anĩ, idi bun yaor fen.

## Fateul Ubodōgouf

<sup>13</sup> Anĩ nigin, dō fiya nigin āgenei kisi dodok gouf. Ā aug nigin biya kulatun gouf. Jesus Kristus yaor foug sain bun, wau ifenēya ifeneĩf anĩ nigin āgenei wauĩ

iseya barikāf. <sup>14</sup> Gere tar dō fiya biya gen, sain ā ne-neya bun ubodōg fen, oroya sane ā walegen anĩ to dō gouf. <sup>15</sup> Anĩ ere, Negur ā iweignein, ĩ fateul ibodok gen, erēb ā ago gef ganān bun fateul ubodōgouf, <sup>16</sup> ere nigin, Negur nē Itotoya eig ye irok, "Fateul ubodōg, ere nigin, aya fateul abodok." †

<sup>17</sup> Ā, Dei anĩ kināu ya bunem tamo mugu mugu nē kabĩ to es fedig ĩ, uweignēgef, anĩ nigin, ā tenebur ein yaū tamo gen, kumĩ ado aniniya anĩ bun, āgenei mata ubodōgouf. <sup>18</sup> Ere nigin, ā keleĩ, ā, mata ibodōya kaũ sã, tubuĩ tar bunem walegen anĩ bun tamal kel yaleyein, are silwa be gol age fediya gen, erēb bura lauf anĩ bunem sã, <sup>19</sup> anĩ ere, Kristus, sipsip naal amuyē sã, gerĩ tō fiya taka sã anĩ nē naud biya bagai anĩ bunem kel yaleyein. <sup>20</sup> Negur erēb erēb ganān kare fiya sã mog, ĩ igirnen, anĩ ere, ā nigin idikeleya sain enei bun ĩ yaor fen. <sup>21</sup> Kristus bunem, ā, Negur Kristus laa bun tamal kel turĩ fiye ken, fula fiya medeĩya ifenen ĩ nigin momoi gen, anĩ nigin, āgenei momoiya ado wauĩ iseya Negur bun ibodok.

<sup>22</sup> Ā gama momoi anĩ dō fiya bunem, aug nigin lilik ge fen, tureĩ tar nigin wauĩ laa fiya bagai walegen nigin, abob nigin fatuk bagai wauĩ bun wauĩ laa foug. <sup>23</sup> Ere nigin, ā bura leya nē faat bunem sã, to bura leya nē faat bunem baban gō yein, are Negur nē od mata ibod ken, faimud ibodkeleya anĩ bunem age fen. <sup>24</sup> Are Negur nē Itotoya eig ye irok kilei,

"Tamo ganān fisir gen,

agef fen, dogo neid fula fiya medeĩya ganān kabier odō munĩ gen.

Fisir gariri keleid fen, munĩ kuku redig,

<sup>25</sup> anĩ ere, Odug nē od faimud ibodkalauf." ††  
Od enei are ā wogō yein.

**2** Anĩ nigin, sane ganān, idegēya ganān, mala yaleya, kiyeĩ ado, dumen od irōya ganān urailagauf. <sup>2</sup> Momou mata gō fediya gen, uur nē sumin karētut nigin fatuk bagai oroyeĩf, ago ge di, ā anĩ bunem āgenei kel yaleya bun odugouf. <sup>3</sup> Gama ā, Odug ĩ biya yeya anĩ, mogo wōg ulegen.

## Mata Ibodōya Meein Ado Tamo Kayau Negurem Igir- nēdin

<sup>4</sup> Ā, ĩ mata ibodōya Meein, tamom dudum difiyen, anĩ ere, Negurem igirne ken, Negur mala bun biya bagai wō yen anĩ bun usig fen, <sup>5</sup> āg, mata ibodōya meein gen, uur nē fō inoyeĩ di, pris fateul wōg fen, Jesus Kristus bunem uur nē sesewi fiya Negur mala bun biya

† Levitikas 11:44, 45; 19:2; 20:7 †† Asaia 40:6-8

anī wenēdigouf. <sup>6</sup> Are Negur nē Itotoya eig ye irok kilei,

“Lo weleg, aya Saion oun meein taka,  
monog tor aya agirnen, biya bagai anī anof,  
age afe di, taka ī, ī nigin momoi yef,  
ī mama to bagai yalouf.” †

<sup>7</sup> Momoi gef ā bun, meein enei are biya bagai. Anī ere, idi to momoi def anidi bun,

“Meein fō inoya tamom sane de fen, ditoron anī,  
gama monog tor wō yen.” ††

<sup>8</sup> Agef fen,

“ī, tamo yeid tū fiya nē meein wō ye fen,  
idi kuku douf nē sa tuwa anī wō yen.” ‡

Idi yeid tū fef, ere nigin, idi od anī to dō difef, areg Negurem idi age difouf nigin igirin.

<sup>9</sup> Anī ere, ā tamo kayau Negurem igirnein, king nē pris, teneub fateul, Negur nē tamo kayau wowā gen, are ī ā gugum bun tamal iweignei ken, yogon lalan biya bagai bun irouleyein anī nē yana, ā walesagauf nigin, agog wō gen. <sup>10</sup> Uruwa bun, ā Negur nē tamo kayau sā, anī ere, gama ā Negur nē tamo kayau. Uruwa bun, ā wau yūya to walegen, anī ere, gama ā mogo wau yūya anī walegen.

<sup>11</sup> Turau tar oboyou, aya ā tenebur ein yaū tamo ado urug tamo gen anī, mosor nē oroya meleikanon geid kusī yedig anī so wiyēgouf nigin, totol bagai arokeneik. <sup>12</sup> Ā haiden atun tobonuneī biya bagai bun ubodōge di, idi ā nigin sane ago gedig dedig anidi, āgenei tobonuneī biya anī dile fen, Negur ada ki fadauf sain bun, idi Negur yana dalesauf.

### Yyu Iroudiya Ado Odudug Farumen Ibodōya

<sup>13</sup> Ā aug Odug nigin ge fen, megeir ganan tamo atun inodin anī farumen ubodōgouf, are king megeir ilun bagai ī farumen be, <sup>14</sup> gawaman nē mudur adodo idi, tamo sane age difef anidi darau difenēdiyof nigin ado, tamo tutuk age difef anidi yeneid dalesauf nigin, Negurem sur fedif anidi farumen ubodōgouf. <sup>15</sup> Ere nigin, ā ereb biya ago gef bunem, kisi neneya tamo neid neneya wogōya anī foro dalauf, are Negur nē oroya. <sup>16</sup> Tamo kafī fiya sā ubodōgouf, anī ere, āgenei kafī fiya sā anī sane kerub fiya nē kabī bun to unogouf. Negur nē ferfer ubodōgouf. <sup>17</sup> Tamo ganan anini wiyēdigouf. Momoiya tureī tar nigin wauī laa fouf. Negur kumī ado anini wiyēgouf. Agog fen, king anini wiyēgouf.

<sup>18</sup> Ferfer ā, aniniya ganan ado āgenei odudug farumen ubodōgouf, idi biya fen, waud yūdig anidi dogol farumen sā, idi wau morō difeneīdig anidig farumen ubodōgouf. <sup>19</sup> Ere nigin, tamo taka ī gariya sā darau yalef sain bun, ī Negur nigin kisif fen, darau nē morō anī faali fouf, are biya. <sup>20</sup> Anī ere, ā mosor unogen nigin wagī fiya waleg fen, morō faali gouf are, ā bun ere biya anī isiyof? Anī ere, ā ereb biya ago gen nigin darau waleg fen, anī faali gouf are, enei are Negur mala bun biya. <sup>21</sup> Enei bun ā iweignein, ere nigin, Kristus ā nigin darau yalen, are āg ī uleg fen, yogon delē anī dō gouf nigin age fen.

<sup>22</sup> “ī mosor taka to inon,

age fe di, yogon sigor bun idegēya taka to dilen.”

<sup>23</sup> Sain idi ī kono difiyen, ī idi to solo fedin. Sain ī darau yalen, ī kumī to ifenēdin. Age fiya ban, ī yogo Negur tutuk es fedig ī ima bun inon. <sup>24</sup> Neda mosor ī yogo bouwam aa tetek bun faali fen, are ada mosor bun gare tau fen, madur bagai bun mata tabodōf nigin age fen. Yogon gudū fiyam ā el yein. <sup>25</sup> Ā sipsip gen fō yeleyan ulegen, anī ere, gama ā sipsip marau, āgenei meleikanon nē lo fiya tamo bun keg usigen.

### Kayau Aiweid Tar Geid

**3** Kayau ā, age fiya bagai, aiweī tar farumen ubodōgouf, ago ge di, aib idi biya od nigin to momoi defeg, idi irokenēdiya bunem sā, nedi kayau tar neid tobonuneid bunem kel yalediyof, <sup>2</sup> are idi āgenei tobonuneī karētut ado aniniya anī dile fen, momoi douf. <sup>3</sup> Āgenei meli meli, mayarē naki anī, fatiya korif ifōya, gol sai ifonūya be, kolos biya ifonūya age fediya bunem to isiyof. <sup>4</sup> Age fiya ban, āgenei meli meli, ā namin uur molol ado imatēya anī nē meli meli to inana-kalauf, are Negur mala bun odug bagai anī bunem isiyof. <sup>5</sup> Naab enei bun, fateul kayau kulu temeleid idi, Negur bun waud dinon anidig, dogo nigin meli bagai wowā douf nigin age difedig. Idi dogo neid aiweid tar farumen dibodōdig. <sup>6</sup> Sara ī Abraham sigor dōf fen, ī nigin yogon odug yedig gen, ā ereb madur agog fen, kumī farumen to ubodōgouf are, ā ne barai tar wowā gef.

<sup>7</sup> Tamo āg, age fiya bagai, aiweī tar geid ubodōg fen, idi nigin kisi gouf, are idi forōya nigin tamo wal fiya sā, idi dum mata ibodōya nē ege luwa wau ifenēya, ā weim walogouf nigin, aniniya ado ago wiyēdigouf, ago ge di, āgenei kosēya, ereb takam to naabura gudū fouf.

### Biya Age Fiya Nigin Darau Yaleyā

<sup>8</sup> Od idīya nigin, ā ganan abob geid wauī tekelei bun ubodōgouf. Abob nigin wauī ūgouf. Tureī tar gen abob nigin wauī laa fouf. Wauī yūya ado wauī yukesileya bun ubodōgouf. <sup>9</sup> Sane anī sane bunem be, kono fiya anī kono fiya bunem to solo gouf, anī ere, el fiya bunem solo gouf, ere nigin, ā ago ge di, el fiya anī walogouf nigin, ā enei bun iweignein. <sup>10</sup> Are Negur nē Itotoya eig ye irok kilei,

“Aib ī mata nigin wau laaf fen,

naa biya ilouf,

ī yogo bale sane wogōya bun tamal so fiye ken,  
yogon sigor idegēya wogōya bun tamal so fiyēf bagai.

<sup>11</sup> Ī sane itor ken, biya age fouf bagai.

Ī maror imir ken, anī dō fouf bagai.

<sup>12</sup> Ere nigin, Odug nē malam tamo madur bagai lo fedidig,  
agef fen, yogon weder dogo neid kosēya anī karī yedig.

† Asaia 28:16 †† Sam 118:22 ‡ Asaia 8:14

Anī ere, Odug nē nawa, idi sane age difef anidi bun dudum fiyēdidig.”

<sup>13</sup> Ā biya age fiya nigin kabī total walogouf are, aim anī ā sane yeif? <sup>14</sup> Anī ere, ā ereb madur nigin darau walogoufeg, ā el yeik. “Ereb idi kumī def anī to kumīg, to morō yeif.” <sup>15</sup> Anī ere, āgenei wauī bun Kristus ĩ Odug unogouf. Idi wauī iseya ā namein ibodok anī nē gariya karī douf nigin to diyeik anidi ganān solog uro-kenēdigouf nigin, faimud dodok gouf. Anī ere, molol ado aniniya bunem enei agog fen, <sup>16</sup> kisi karētut walogouf, ago ge di, idi Kristus bun āgenei tobonunēi biya nigin od sane wogō def anidi, dogo neid dumen od wogōya nigin mama fediyouf. <sup>17</sup> Biya age fiya nigin darau yaleya, are Negur nē oroyauf, enei are, sane age fiya nigin darau yaleya anī wal fiya, are biya bagai youf. <sup>18</sup> Kristus ĩ, sain tekelei dogol, mosor nigin laa fen, ĩ madur tamo anī, idi madur sã tamo nigin laa fen, are ĩ, ā Negur bun irouleyeif nigin age fen. ĩ bouwa duketin, anī ere, Awa Uur bunem mata ibodon. <sup>19</sup> Awa Uur bunemeg ĩ ile fen, uur kalabus bun dibodon anidig wogō fiyēdin. <sup>20</sup> Eneidi are, kulu Noa nē sain bun, waag ifot mog, Negur idi nigin feseya sã tari fedidig, anī ere, idi fe den. Waag anī namen, tamo kayau musei sã, ganān eit dogol naan bunem kel yaledin. <sup>21</sup> Naan enei are, naan igūya, gama Jesus Kristus nē mata kel fāya bunem āg kel yaleyeik anī nē malakanon, are bouwa bun amuyē yaleleya sã, are Negur bun kisi karētut biya inoya. <sup>22</sup> Jesus Kristus ĩ saa ilun isel fen, Negur ima biyalē ibodok, age fe di, engel, yeneid ado-ado, megeir ganān ĩ farumen dibodok.

### Negur Nigin Mata Ibodōya

**4** Anī nigin, Kristus ĩ yogo bouwa bun darau yalen nigin, ā augeg yogon kisi de tekelei anī urougouf, ere nigin, taka ĩ yogo bouwa bun darau yalen, ĩ mosor inoya nigin folō felen. <sup>2</sup> Agef fen, ĩ tenebur ein yogon mata ibodōya fau ibodok bun, tamo bouwa nē oroya nigin to mata ibodōf, anī ere, Negur nē oroya nigin mata ibodōf. <sup>3</sup> Ā kulu sain meluk bagai, ereb haiden age difedig anī, ago gedig, idi bouwa nē oroya nigin total sane wau fāya, noli kisi, aai yōya, bilāya, mala odug bun naan yōya ado, idegēya waitou yana yaleseya sane bagai bun dibodōdig. <sup>4</sup> Ā idi geid, idi sane bagai age difedig anī bun to ulege di, idi anī dile fen, terē def, age de fen, idi ā nigin od sane wogō def. <sup>5</sup> Anī ere, idi, Negur idi mata dibodok anidi ado idi gare den anidi es fediyouf nigin dodok fef ĩ bun, dogo nigin kurō difeis dirokenēf. <sup>6</sup> Enei nigin, biya od anī, idi gama mogo gare den anidig wogō fiyēdin, are idi bouweid bun, tamo gen es feid fen, dogo neid uur bun, Negur mata ibodok gen mata dibodōf nigin age fen.

<sup>7</sup> Ereb ereb ganān nē idikeleya naa mogo melsak. Anī nigin, ā kosē gouf nigin, kisi el ge waleg fen, aug nigin biya kulatun gouf. <sup>8</sup> Anī ganān wal fiya, abob nigin fatuk bagai wauī laa fouf, ere nigin, wau laa fiya are mosor musei kerub fedidig. <sup>9</sup> Nauseirya sã, abob el ge waledigouf. <sup>10</sup> Ā mugu mugu, Negur bunem ege luwa wa-

legen anī bunem, Negur nē wau ifenēya fire fire nē lo fiya tamo dō fiya biya gen, abob aruna walogouf. <sup>11</sup> Aib taka ĩ od wogō yef, ĩ Negur nē od bagai wogōya gen wogō youf. Aib taka ĩ aruna yalef, ĩ megeir Negur ĩ ifenek anī bunem age fouf, are ereb ereb ganān bun, Jesus Kristus bunem, Negur yana dalesauf nigin age fouf. ĩ bun fula fiya medeīya ado megeir gai gai ibodokalauf. Momoi.

### Momoiya Tamo Ibodōya Nē Darau

<sup>12</sup> Turau tar oboiyou, ā darau yã isañeñ geneg gama walegef anī nigin, ereb urug ā bun wōya gen to terē gouf. <sup>13</sup> Anī ere, ā Kristus geid darau walegef nigin wauī kulī youf, ago ge di, ā yogon fula fiya medeīya anī yaor fouf sain bun, wauī fatuk bagai kulī youf. <sup>14</sup> Ā Kristus yana nigin de fen, kono diyeif, ā el yeik, ere nigin, fula fiya medeīya nē Awa Uur, are Negur nē anī ā bun ibodok. <sup>15</sup> Ā darau walogouf, are tamo yukesiya tamo, bē tamo, tamo tobonunã sane fire fire dinodig be, baula fiya tamo, nedi darau gen sãf. <sup>16</sup> Age fiya ban, ā momoiya tamo nigin darau walogouf are, ā to mama yeif, anī ere, ā Negur yana anī urougef nigin ĩ yana walesagouf. <sup>17</sup> Ere nigin, sain eif, Negur nē ibor bun, es fiya gariya inoya nē. Es fiya anī ada bun gariya inof are, idi Negur nē biya od to dō difedig anidi bun ere anī wō youf? <sup>18</sup> Are Negur nē Itotoya eig ye irok kilei, “Madur tamo kel yalediya nigin malai bagai youf are, tamo momoiya sã ado mosor temeleid nigin ere anī wō youf?” ††

<sup>19</sup> Anī nigin, idi Negur nē oroya bunem darau dalef anidi, idi dogo, Negur kare fedin yogon od dō fiya biya, ĩ ima bun dino fen, toku ereb biya anī age difef dilauf.

### Sios Nē Uyu Iroudiya Ado Kesu Oosi Bun

**5** Sios nē uyu irouya ā atun dibodok bun, aya, uyu irouya tureif, Kristus nē darau ail fen, kurō afesidig ado, fula fiya medeīya fau yaor fouf weim talouf anī, ā arokeneik. <sup>2</sup> Negur nē sipsip ā farumen dibodok anī nē lo fiya tamo wōg fen, kabī mala nigin ge fen to lo wedigouf, anī ere, ā wauī iro ken, Negur ā ago gouf nigin orof kilei lo wedigouf. Moni nigin ge fen, to ago gouf, anī ere, aruneid yaleya nigin bagai fen, ago gouf. <sup>3</sup> Idi ā gem lo wedigouf nigin inodin anidi to nugo wiyēdigouf, anī ere, ā sipsip dileyei ken, dō diyeif nē tobonunēi bun ago gouf. <sup>4</sup> Agog mog, sipsip lo fiya tamo neid mudur wō youf sain bun, ā fula fiya medeīya nē teter to bagai tu ralauf anī walogouf.

<sup>5</sup> Age fiya bagai, kesu oosi ā, biyeid uyu irouya farumen ubodōgouf. Ā ganān, abob nigin wauī yukesileya anī ufonūgouf, ere nigin,

“Negur ĩ yeneid dalesef anidi kiwai gen iledidig, anī ere, ĩ waud yukesileya anidi wau ifenēdidig.” ‡

<sup>6</sup> Anī nigin, Negur nē ima megeir barikã farumen wauī ukalaisileg ubodōgouf, ago ge di, ĩ ā yogon sain bun

† *Asaia 8:12*

†† *Proverb 11:31 ‡ Proverb 3:34*

yalesneif. <sup>7</sup> Āgenei suwēya ganan ī bun unogouf, ere nigin, ī ā nigin suwē yedig.

<sup>8</sup> Ā aug nigin biya kulatun ubodōg fen, lo walagauf. Āgenei kiwai, Satan ī laion ninirā ye fen, taka yakasiy-ouf nigin mumul katī fedig gen, age fedig. <sup>9</sup> Momoiya bun total ufareg fen, ī wal fiya nigin teībir gouf, ere nigin, ā keleī, ā tureī tar teneub ganan bun, darau de tekelei age fiya anī daledig.

<sup>10</sup> Ago ge di, wau ifenēya ganan nē Negur ī, ā Kristus bun, yogon fula fiya medeīya faimud ibodkeleya bun iweignein ī, ā sain naal darau walege di, ī yogo baban yalesnei ken, ā kisi feleya bagai total, megeir ado, feseya sā wōya nigin age foug. <sup>11</sup> Ī bun megeir gai gai ibodkalauf. Momoi.

### Idikeleya Nē Aanya

<sup>12</sup> Sailas, ī aya turau dō fiya biya gen kisi afedig, in isennēya bunem, aya ā tobega bagai atokenein, anī bunem, aya ā wauī ales fen, enei ā gama walegef anī momoi bagai Negur nē wau ifenēya au fen, kurō afesin. Anī bun total ufaragauf. <sup>13</sup> Sios Babilon ibodok, ī ā geid weim igrinein, ī ā bun yogon aanya sur fef, age fe di, neu kesu Mak īg age fef. <sup>14</sup> Wauī laa fiya bunem, abob umā wiyēg fen, aan gouf. Ā Kristus bun ufaregef anī ganan bun, wau inosiya ibodōf.

## 2 PITA

**1** Aya Simon Pita, Jesus Kristus nē ferfer fen aposel, idi neda Negur ado Isennadaya, Jesus Kristus nē madur bagai bunem momoiya meli bagai neda gen dalen anidi bun, pas enei atotof.

<sup>2</sup> ã, Negur ado neda Odug Jesus nigin keleĩ bunem, wau ifenēya ado wau inosiya ã bun barikãf.

### Negur Ī Ada Yogon Igirnadán

<sup>3</sup> Negur ĩ yogon fula fiya medeĩya ado biya bunem iweignadan, ada ĩ nigin keleĩ bunem, ada Negur nē oroya bun mata tabodōf nigin, ereb lau tafef anĩ ganan yogon megeir anim ifanadan. <sup>4</sup> Enei bunem, ĩ ada yogon promis od, odug fen meli bagai andi ifanadan, are anĩ bunem ã Negur nē tobonunã bun bagai ufareg fen, bouwa nē oroya sanem teneub ganan daũ fen anĩ utorōgouf nigin age fen.

<sup>5</sup> Age fiya nigin, āgenei momoiya bun, biya anĩ tobol fiya nigin kabĩ totol walogouf, agog fen, biya bun, keleĩ tobol fiya nigin, <sup>6</sup> agog fen, keleĩ bun, aug nigin biya kulatun ibodōya tobol fiya nigin, agog fen, aug nigin biya kulatun ibodōya bun, feseya sã ifareya tobol fiya nigin, agog fen, feseya sã ifareya bun, Negur nē oroya bun ibodōya tobol fiya nigin, <sup>7</sup> agog fen, Negur nē oroya bun ibodōya bun, abob geid nival yũya tobol fiya nigin, agog fen, abob geid nival yũya bun, wau laa fiya tobol fiya nigin kabĩ totol walogouf. <sup>8</sup> Ere nigin, ã tobonunã enei ganan waleg fen, tobol gouf are, ã neda Odug Jesus Kristus nigin keleĩ yaleya bun kabĩ biya kaũ ado walogouf. <sup>9</sup> Anĩ ere, taka ĩ eneidi taka to yalouf, ĩ melsã nigin dogol ileyã kisi feleyã fen, mala ifofakeleyã, agef fen, ĩ yogon mosor kulu tamal bun tamal lilik fiyekelen anĩ weder tu kelen.

<sup>10</sup> Anĩ nigin, turau tar, Negurem ã iweignei ken, igirnein anĩ tutuk bagai keleĩ youf nigin, kabĩ totol walogouf. Ere nigin, ã enei ago gouf are, ã to bagai kubũ gouf. <sup>11</sup> Ago ge di, ã, neda Odug fen Isennadaya, Jesus Kristus nē tano mata gai ibodkeleyã bun, ileyã nigin lakĩ fiya taka to ibodōf.

### Negur Nē Itotoya Nē Profet Od

<sup>12</sup> Anĩ nigin, ã enei nigin keleĩ ken, momoiya ã gama ado anĩ bun totol ufaregef, anĩ ere, aya enei nigin kisi gouf nigin, faimud wedereĩ fokō afouf. <sup>13</sup> Aya kisi afef, aya bouwau enei nē salafat bun abod mog, āgenei kisi turĩ afouf, are tutuk, <sup>14</sup> ere nigin, aya mogo, neda Odug Jesus Kristus kurō feis irokanan nigin, aya keleĩ, aya mogo melsã yerin awaikalauf. <sup>15</sup> Anĩ nigin, aya ã

atorneĩ mog, ã faimud enei karĩ walagauf nigin kabĩ totol alouf.

<sup>16</sup> Amã, neda Odug Jesus Kristus nē megeir ado isiya nigin ã marokenein sain are, amã nemã kisim tamo nē nenerĩ anĩ to wogō mayein, anĩ ere, amã malamam bagai yogon fula fiya medeĩya nē megeir mailen anĩ wogō maun. <sup>17</sup> Ait are Negur fula fiya medeĩya megeir ado bunem ĩ bun isi fen, iron, “Eĩ neu Kesu, ĩ nigin aya wau laa fedig, ĩ nigin aya wau kulĩ yedig,” † sain anĩ bun, ĩ, Tama Negur bunem, yana odug ado fula fiya medeĩya yalen. <sup>18</sup> Amã ĩ geid arei fateul bun mafar mog, ait enei saa ilunem isi mog, amã mug bagai karĩ maun.

<sup>19</sup> Agef fen, ada, profet neid od are momoi anĩ, megeir tafe, momoi tauf, are lalan gugum modoũ bun, we fef ile, we kasasa fe fen, bonimeĩ nē barisa wauĩ bun fã youf gen, ã profet neid od karĩ weleg fen, el ge dō gouf are, ã biya ubodōgouf. <sup>20</sup> Ere odug bagai are eig fiya, ã keleĩ youf, Negur nē Itotoya nē profet od taka, tamo nē kisim to faded fouf. <sup>21</sup> Ere nigin, profet od, tamo nē oroya bunem to wogō den, anĩ ere, tamo Awa Uur Fateulem ulum iroukenēdi di, Negur bun tamal od dale fen, wogō den.

### Idegēya Tise Ado Idi Daũ Fediya Nigin

**2** Anĩ ere, tamo kayau atun idegēya profeteg difaren, age fiya gen, ã atun idegēya tisege dibodōf. Idi fau tamo kayau daũ fediya nē idegēya od anĩ iminēyan difelneĩf, Odug na yaledin ĩ anĩ wa de fen, idi dogo bun kaisã bagai daũ feidleyã anĩ dinouf. <sup>2</sup> Musei dogo neid tobonuneid sane dō de fen, momoi nē naab are naabura gudũ difouf. <sup>3</sup> Dogo naumeid nigin, tise eneidi nenerĩ dogo neid kisim wogō diyei ken, safineĩ gei difouf. Negur idi mogo es fedin, agef fen, idi daũ fediya nē are mogo isiyouf.

<sup>4</sup> Negur ĩ engel mosor dino di, to isenneĩd fen, hel bun sur fiyēdin, dumen es fediyouf nigin ku gugum keleyã bun inenēdin. <sup>5</sup> Negur ĩ kulu tenebur nē tamo kayau to isenneĩd fen, tamo kayau idi Negur nē to difaren anidi bun kuwei sur fen, anĩ ere, ĩ, Noa madur bagai nigin wogōya tamo ado, sewen anidi geid ahaha fedin. <sup>6</sup> Negur ĩ, Sodom taun ado Gomora taun, yam yakur feid aasu ileyã bunem daũ feidlen, are tamo kayau Negur nē to difaref anidi bun, ereb wō youf anĩ ifelnēdiyof nigin age fen. <sup>7</sup> Negur ĩ, Lot madur tamo, tamo lo to dō difedig anidi neid tobonuneid sane nigin wau morōdig ĩ ahaha fiyen <sup>8</sup> (ere nigin, madur tamo

† *Matyu 17:5; Mak 9:7; Luk 9:35*

are, naa ganan bun, idi atun ibod ken, tobonuneid sane ilen ado karī yen anī bunem, yogon malakanon madur anī darau yalen).<sup>9</sup> Age fiyauf are, Odug ī naig fe fen, tamo Negur nē dibodok anidi, morō bun tamal yalnelneid fen, tamo Negur nē to dibodok anidi, darau bun irounēdif ile, es fiya nē naa bun ilya nigin anī keleī.<sup>10</sup> Negur ī, idi bouwa nē oroya sane dō de fen, Odug nē yana lai difedig anidi bun, momoi bagai age foug.

Idi kumī sā ado, dogo yeneid dalesedig. Idi, engel megeir adodo nigin bou yūya od wogōya nigin to kumī dedig.<sup>11</sup> Anī ere, enegeleg dogo neid total ado megeir odug bagai nigin tamo eneidi wal fediya, Odug mala bun, engel megeir adodo age fediya nigin bou yūya od to wogō dedig.<sup>12</sup> Anī ere, tamo eneidi, ereb idi keleī sā nigin kono difedig. Idi gaar kuī kisi sā, bouwa nē oroya dogol dō dife di, tamom kaka difeid fen, didenkesiyouf nigin dogol gō difedidig anidi gen. Gaar kuī gen, idig daū fediyouf.

<sup>13</sup> Idi sane age difen kilei, mala solo sane dalouf. Idi gaa atun bouwa nē oroya sigigi fiya nigin orodidig. Idi amuyē ado gerī tō fiya. Idi ā geid sifa dino fen, nedi bouweid nē oroya sigigi difedig.<sup>14</sup> Idi meleid bun seseirā tobonunā barikā ado fen, mosor inoya nigin to bagai ditorōdig. Idi, tamo kayau total sā difaref anidi, didī difedidig. Idi safina musei youf nigin imeid su lai de fen sū we fiya nigin keleī bagai. Idi daū feidleya nē gere tar.<sup>15</sup> Idi naab madur anī ditor ken, Beor naal, Balam ī sane nē mala solo nigin wau laa fedig anī nē naab dō difouf nigin fasis difen.<sup>16</sup> Anī ere, ī donki, gaar kuī wogōya kisi feleya sā anim, yogon kū fenēya nigin ou fiyen, donki ī tamo nē ait nem wogō ye fen, profet anī nē neneya kisi katū fiyen.

<sup>17</sup> Tamo eneidi, naan warur gere keleya gen ado, ogou uyē yau total ado bunem irou isidig gen. Modoū gugum keleya bagai anī, idi nigin saia fen.<sup>18</sup> Idi yana yaleseya od kaū sā wogō de fen, tamo kayau idi kū fenēya bun dibodok anidi bun tamal, mogo diyawof anidi, bouwa nē oroya, noli nigin kisi fāya bunem didī difedidig.<sup>19</sup> Tamo sane eneidi, tamo kayau karika ibodōya mafeneīf de dirokenēdidig, anī ere, idi dogo sane nē ferfer, ere nigin, tamo ī, ereb ī wal fiyek anī nē ferfer.<sup>20</sup> Idi, neda Odug ado Isennadaya, Jesus Kristus keleī ken, tenebur nē sane bun tamal soso dife di, baban tenebur nē sanem fili feid fen, wal fediyouf are, idi gariya bun sane dibodon anī wal fiya, idikeleya bun sane bagai dibodōf.<sup>21</sup> Idi madur bagai nē naab anī keleī ken, itāfiya fateul idi imeid bun dinon anī dudum difem are, idi madur bagai nē naab anī to keleim, are dem.<sup>22</sup> Od biya tamo kayau wogō dedig are, idi nigin momoi, "Gaū yogon iluf anī kel yōdig," † takag, "Bor naan igu kel fen, baban ile ed igūdig."

### Odug Nē Naa

**3** Turau tar oboiyou, eī neu pas baban ā bun sur afef. Aya pas uru enei atotodin are, kisi biya turī

akeneī di, wedereī fokō youf nigin age afen.<sup>2</sup> Aya, od profet fateul kulu wogō den ado, itāfiya neda Odug ado Isennadaya, āgenei aposel bunem ifenein anī, ā karī walagauf nigin orouf.

<sup>3</sup> Ā uyulil enei keleī youf, idikeleya naa bun, kono temeleid disiyouf, idi disī, kono de fen, dogo neid oroya sane dō difouf.<sup>4</sup> Idi dirōf, "Ī asiyouf yen promis od anī nain? Amā nemā tamamā tar gare den bunem isif, ereb ereb ganan uruwa bun kare fen gen, agef yenek."<sup>5</sup> Anī ere, idi, kulu bagai Negur nē od bunem saa wō ye fen, teneub naan bun tamal ado naan nem kare fen anī, karī del fen, wedereid tu kelen.<sup>6</sup> Naan anim, kuwei fā ye fen, sain anī bun teneub ganan daū felen.<sup>7</sup> Od de anim, saa ado teneub gama tailef are, yā nigin faraf foi fen, agef fen, tamo kayau momoiya sā es fiya ado daū feidleya nē naa nigin inon ibodok.

<sup>8</sup> Anī ere, turau tar oboiyou, ereb tekelei enei to wedereī tu kalauf, Odug bun naa tekelei are tausen yar gen, agef fen, tausen yar are naa tekelei gen.<sup>9</sup> Odug ī, yogon promis od kisi falauf nigin, tunī age dedig gen, to foi yedig. Ī taka daū feleyan ilya itor ken, ganan waud falei foug nigin, sain meluk tari yeīdig.

<sup>10</sup> Anī ere, Odug nē naa are, bē tamo gen isiyouf. Saa gududū ye fen, iwaikalauf, ereb ereb nanaal teneub inon are ganan yam daū falauf, agef fen, teneub ado ereb ereb ganā ī bun ibodok are yaor foug. †

<sup>11</sup> Naab enei bun, ereb ereb ganā daū falauf, anī nigin, ā tamo kayau naig fiya bagai wōya nigin kisi gef? Ā fateul ubodōg fen, Negur nē tobonunā bun ubodōgouf.<sup>12</sup> Ā, Negur nē naa tarig fen, kaisā bagai isiyouf nigin ololo gouf. Naa anī bun, yam saa daū falauf, ereb ereb nanaal teneub inon are uruwam naan kalauf.

<sup>13</sup> Anī ere, ada yogon promis od tarou fen, saa mata ado teneub mata ololo tafef, are madur tamo kayau an dibodōf.

<sup>14</sup> Age fiya nigin, turau tar oboiyou, ā enei tari gef nigin, Odug mala bun amuyē sā, od sā wowāg fen, ī ado wauī katō gouf nigin kabī total walogouf.<sup>15</sup> Āgenei kisi bun, neda Odug sain meluk tari fiya are, kel yaleya nigin gouf, are neda turada oboida Pol īg Negur kisi biya ifenē di, ā bun pas itoton kilei.<sup>16</sup> Ī yogon pas ganā bun, eig fe itotoid fen, enei nigin wogō yen. Yogon pas bun, ereb ereb tunī keleīya nigin lakī fiya bagai ibodok, are idi keleī sa ken, momoiya ilef isif anidi, Negur nē Itotoya tunī bun age difedig gen, falei difeid fen, dogo daū feidleya bun diledig.

<sup>17</sup> Anī nigin, turau tar oboiyou, ā enei mogo keleī nigin, lo wal fiya tamo neid kū fenēyam to guri diyēi ken, dile āgenei modoū biya utorōg fen, kubū geya nigin lo welegei.<sup>18</sup> Anī ere, neda Odug ado Isennadaya, Jesus Kristus nē wau ifenēya ado keleī bun, odugouf. Ī bun fula fiya medēya gama ado faimud ibodkalauf! Momoi.

† *Proverb 26:11*

†† *Itotoya tunī eig de ditoton: are yakur falauf.*

# 1 JON

## Mata Ibodōya Nē Od

**1** Are ĩ gariya bun tamal, are amā mogo karī maun, are amā mogo malamam mailen, are amā mogo mail fen, amā imamam kobū mafen–anī amā mata ibodōya nē Od mau fen, kurō mafesif. <sup>2</sup> Mata are wō yen. Amā anī mail fen, anī nigin kurō mafesif. Age mafe fen, amā, mata ibodkeleya ĩ, Tama ado dibod ken, amā bun wō yen anī, ā yaor mafe marokeneik. <sup>3</sup> Amā ereb mailen ado karī maun anī, ā yaor mafe marokeneik, are āg amā geid nigal taūf nigin age mafef. Age fe di, neda nigal yūya are, Tama ado yogon Naal Jesus Kristus geid nigal taūf. <sup>4</sup> Amā nemā waumā kulīya barikāf nigin enei matotof.

## Lalan Bun Iyōya

<sup>5</sup> Od enī, amā ĩ bun tamal karī mau fen, ā yaor mafe marokeneik: Negur ĩ lalan, ĩ bun gugum taka to ibodok. <sup>6</sup> Ada ĩ geid nigal tauk tau fen, gugum bun tayōf are, ada tadege fen, momoi anī bunem to tabodok. <sup>7</sup> Anī ere, ĩ lalan bun ibodok gen, adag lalan bun tayōf are, ada abob geid nigal taūf, age tafe di, Negur Naal, Jesus nē naud anim, mosor ganan bun tamal kulo fadalauf.

<sup>8</sup> Ada mosor sā tauf are, ada dug tadege ken, momoi anī ada namedan ibodōya sā. <sup>9</sup> Ada neda mosor kurō tafalaisiyof are, ĩ yogon od dō fiya biya fen, madur bagai, anī nigin, ĩ fau neda mosor nigin weder tu kel fen, ada neda madur bagai sā anī ganan bun tamal kulo fadalauf. <sup>10</sup> Ada mosor to tanon tauf are, ada, Negur ĩ idegēya tamal tau fen, in od ada namedan to ibodok.

## Kristus ĩ Ada Isennadaya

**2** Neu kesu tar, ā mosor to unogouf nigin, aya enei atotkeneik. Anī ere, taka ĩ mosor inouf are, taka ada isennadauf nigin yogon Dei irokenēdig anī ibodok, ĩ Jesus Kristus, madur bagai. <sup>2</sup> ĩ neda mosor nigin Negur nē didi yo fiya nē sesewi fiya, are neda mosor nigin dogol sā, anī ere, tenebur tamo kayau ganan neid mosor nigineg.

<sup>3</sup> Ada keleī, ada yogon ĩtāfiya dō tafef are, ada mogo ĩ keleī. <sup>4</sup> Tamo ĩ aya ĩ keleī ye fen, ereb ĩ irok anī to dō fouf are, ĩ idegēya tamo, agef fen, momoi anī ĩ bun to ibodok. <sup>5</sup> Anī ere, taka ĩ yogon od dō fef are, Negur nē wau laa fiya are momoi bagai ĩ bun kisi felef. Anī bunem, ada ĩ bun tabodok anī ada keleī. <sup>6</sup> Aib taka ĩ bun abodok yef, ĩ Jesus age fedig gen age fouf bagai.

## Ītāfiya Mata

<sup>7</sup> Turau tar oboiyou, aya ĩtāfiya mata to atotkeneik, anī ere, ĩtāfiya tubu, are abob nigin wau laa fiya anī, ā uruwa Jesus nigin momoi gen sain bunem karī gen. ĩtāfiya tubu enei are, od ā karī gen anī. <sup>8</sup> Anī ere, aya ĩtāfiya mata atotkeneik, are anī nē momoi anī, ĩ bun ado ā bun mogo ulegef, ere nigin, gugum mogo iwai-kele di, lalan momoi bagai anī mogo so fef.

<sup>9</sup> Taka ĩ lalan bun abodok ye fen, yogon tura nigin to orof, ĩ fau gugum bun ibodok. <sup>10</sup> Aib taka ĩ yogon tura nigin wau laa fef, ĩ lalan bun ibodok, age fe di, ereb anim ĩ ye tū fiya nigin, ĩ bun taka to ibodok. <sup>11</sup> Anī ere, aib taka ĩ yogon tura nigin to orof, ĩ gugum bun ibod ken, gugum bun iyōdig. ĩ narib ilef anī, ĩ keleī sā, ere nigin, gugum anim ĩ mala ifofakelen.

<sup>12</sup> Aya kesu tar ā atotkeneik, ere nigin, āgenei mosor in yana bunem weder tu kel.

<sup>13</sup> Aya tama tar ā atotkeneik, ere nigin, ā ĩ gariya bun ibodok anī keleī.

Aya kesu oosi ā atotkeneik, ere nigin, ā sane anī mogo wal gen.

<sup>14</sup> Aya kesu tar ā atotkeneik, ere nigin, ā Dei anī mogo keleī.

Aya tama tar ā atotkeneik, ere nigin, ā ĩ gariya bun ibodok anī keleī.

Aya kesu oosi ā atotkeneik, ere nigin, ā total ado, age fe di, Negur nē od ā bun ibodok, age fe di, ā sane anī mogo wal gen.

## Teneub Ein Nē Nigin To Wauī Laa Fouf

<sup>15</sup> Ā teneub enei be, ereb taka tenebur ibodok anī nigin to wauī laa fouf. Taka ĩ teneub enei nigin wau laa fouf are, Dei nē wau laa fiya ĩ bun to ibodok. <sup>16</sup> Ere nigin, ereb ereb ganan tenebur ein ifaref–mosor tamo nē oroya, yogon mala ile oroya ado, ereb ĩ ado fen ereb ĩ age fef anī nigin yana yaleseya–are Dei bun tamal to isif, anī ere, tenebur tamal isif. <sup>17</sup> Teneub ado yogon oroya are sa kalauf, anī ere, tamo Negur nē oroya dō fef, ĩ mata ibodkalauf.

## Kristus Nē Kiwai Tar Nigin Weder Irouya

<sup>18</sup> Neu kesu tar, sain enei are idikeleya sain. Kristus nē kiwai isif anī, ā mogo karī gen, age fiya gen, gamag Kristus nē kiwai tar musei disin. Anī bunem, sain enei are idikeleya sain anī, ada keleī. <sup>19</sup> Idi uruwa bun, ada



geid tabod ken, ada bun tamal dilen, anī ere, idi momoi bagai neda sã. Ere nigin, idi nedam are, idi ada geid tabodom. Anī ere, idi ada bun tamal dilen anim, idi ganan neda sã anī yaor fen.

<sup>20</sup> Anī ere, ã, Kristus ī Fateul anī bunem, Awa Uur Fateul waleg fen, ã ganan momoi anī keleī. <sup>21</sup> Aya ã momoi anī keleī sã nigin to atotkeneik, anī ere, ã momoi anī keleī nigin ado, idegēya taka momoi anī bun tamal to isif nigin, aya ã atotkeneik. <sup>22</sup> Ai anī idegēya tamo? Tamo, Jesus ī Kristus yeya anī wa fef anī. Tamo age fiya, are Kristus nē kiwai. Ī, Dei ado Naal wa fedif. <sup>23</sup> Taka ī Naal wa fef, ī bun Dei sã. Aib taka ī Naal kurō fesif, ī bun Deig ado.

<sup>24</sup> Ereb ã gariya bunem karī gen anī, ã bun agef ibodōf nigin lo walagauf. Ago gouf are, ã Naal bun ado Dei buneg ubodōgouf. <sup>25</sup> Agef fen, enei anī ereb ī age afouf fadan, are mata ibodkeleya.

<sup>26</sup> Aya, idi ã kũ fenēya bun dirouleyeīya nigin age difef anidi nigin, enei atotkeneik. <sup>27</sup> Æ nigin, Awa Uur Fateul ã ī bun tamal walegen are, ã bun ibodok, age fe di, aib takam ã ifelneīya nigin lau fiya taka to ibodok. Anī ere, yogon Awa Uur Fateul anim, ereb ereb ganan nigin ã ifelneīdig. Age fe di, Awa Uur Fateul anī momoi bagai, idegēya sã, anī nigin, ã ifelnein kilei anī, ī bun ubodōgouf.

### Negur Nē Gere Tar

<sup>28</sup> Neu kesu tar, gama ī bun agog ubodōgouf, ago ge di, ī wō youf sain bun, ī isi di, ī mala bun, ada kumī sã ado mama sã tafarauf.

<sup>29</sup> Æ, ī madur bagai anī keleī youf are, ã keleī, tamo idi ereb madur age difef anidi ganan ī bunem gogū fedin.

**3** Tamada, ada bun, wau laa fiya fatuk bagai ifanadan, anī nigin, Negur, ada in gere tar yedig. Are ada age fiya. Teneub enei ada nigin keleī sã, ere nigin, teneub enei ī nigin keleī sã. <sup>2</sup> Turau tar oboiyou, ada gama Negur nē gere tar. Age fe di, ada naig be fiya bagai wowã tauf, are fau yaor fiya sã. Anī ere, ada keleī, ī isyouf sain bun, ada ī gen wowã tauf, ere nigin, ada ī bagai anī tailauf. <sup>3</sup> Aib taka ī bun wau iseya anī ado, ī karētut bagai gen, ī yogo karētut ouf.

<sup>4</sup> Aib taka mosor inof, ī lo wal fef. Momoi bagai, mosor are lo wal fiya. <sup>5</sup> Anī ere, ã keleī, ī ada neda mosor yalelauf nigin wō yen. Agef fen, ī bun mosor sã. <sup>6</sup> Taka ī bun ibodok, ī mosor to inof iledig. Taka ī mosor inof iledig, ī to ilen be, oo, ī nigin keleī san.

<sup>7</sup> Neu kesu tar, ã takam to idegneīf. Aib taka ī ereb madur age fef, Odug ī madur bagai gen, ī madur. <sup>8</sup> Aib taka ī ereb mosor age fef, ī Satan nē, ere nigin, Satan ī gariya bunem mosor inof isin. Negur Naal ī, Satan nē kabī anī daū falauf nigin wō yen. <sup>9</sup> Taka Negur bunem gō fen, ī mosor to inof iledig, ere nigin, Negur nē faat ī bun ibodok. Ī mosor inof ileyā kisi feleya sã, ere nigin, ī Negur bunem gō fen. <sup>10</sup> Ada ai anī Negur nē gere tar ado, ai anī Satan nē gere tar anī, naig tafe keleī youf, are eig fiya. Aib taka ī ereb madur to age fef, ī Negur nē kesu sã, aib taka ī yogon tura nigin to wau laa fef, īg Negur nē kesu sã.

### Abob Nigin Wauī Laa Fouf

<sup>11</sup> Od enei ã gariya bunem karī gen, are ada abob nigin wauda laa fouf bagai. <sup>12</sup> Æ Kain gen to ago gouf, ī Satan nē fen, yogo tura yukesin. Ere nigin ī yogo tura yukesin? Ere nigin, yogon tobonunã are sane fen, yogo tura nē tobonunã are madur. <sup>13</sup> Turau tar, teneub enei nē tamo kayau sane diyēif are, to terē gouf. <sup>14</sup> Ada keleī, ada laa tator ken, mata ibodōya bun telen, ere nigin, ada neda turada tar nigin wauda laa fef. Aib taka ī to wau laa fef, ī laa bun ibodok. <sup>15</sup> Aib taka ī yogon tura nigin to orof, ī tamo yukesiya tamo, agef fen, ã keleī, tamo yukesiya tamo ī bun, mata ibodkeleya sã.

<sup>16</sup> Ere anī wau laa fiya naig tafe ada keleī youf, are eig fiya. Jesus Kristus ī ada nigin yogon mata itoron. Anī nigin, adag turada tar nigin neda mata tatorōf bagai.

<sup>17</sup> Aib taka ī safina ado fen, yogon tura lau fiya bun ibodok anī ile fen, ī nigin wau to yuk, Negur nē wau laa fiya naig fe ī bun ibodok? <sup>18</sup> Neu kesu tar, ada od be, sigorada wogōya bunem wauda to laa fouf, anī ere, age tafedig ado momoi bun age tafouf. <sup>19</sup> Anī bunem, ada momoi bagai nē anī, ada keleī youf, age tafe fen, ada wauda yogon mala bun si inouf, <sup>20</sup> ada neda wauda, ada nigin kafī fiya ifanadauf sain anī buneg, age fouf. Ere nigin, Negur ī neda wauda wal fiya, agef fen, ī ereb ereb ganan nigin keleī.

<sup>21</sup> Turau tar oboiyou, ada wauda kafī fiya to ifanadauf are, ada Negur mala bun kumī sã totol tafar fen,

<sup>22</sup> ereb ada ī to tafiyek anī, ī bun tamal talouf, ere nigin, ada yogon itāfiya dō tafe fen, ereb ī orof anī age tafef.

<sup>23</sup> Yogon itāfiya are eig fiya. Negur Naal, Jesus Kristus nē yana nigin momoi tau fen, ī ada irokanadan kilei, abob nigin wauda laa fouf anī. <sup>24</sup> Idi yogon itāfiya dō difef anidi, ī bun dibodok, agef fen, ī idi bun ibodok. Ī ada bun ibodok anī, naig tafe ada keleī youf, are eig fiya. Ada Awa Uur ifanadan anī bunem, ada anī keleī.

### Uur Nigin Es Gouf

**4** Turau tar oboiyou, uur ganan nigin to momoi ge fen, idi Negur bun tamal be sã anī ulogouf nigin, idi es wiyēdigouf, ere nigin, idegēya profet musei teneub ganan bun diyokelef. <sup>2</sup> Negur nē Awa Uur naig ge ã keleī youf, are eig fiya. Uur ganan Jesus Kristus ī tamo bouwa bun isin anī dirōdig, are Negur bun temeleid. <sup>3</sup> Anī ere, uur ganan Jesus nigin wa difef, are Negur bun temeleid sã. Enei are Kristus nē kiwai anī nē uur, are ī mogo isif ya anī karī gen, gamag ī mogo tenebur ibodok.

<sup>4</sup> Neu kesu tar, ã Negur nē ubodōg fen, idi wal wiyēdigen, ere nigin, ī ã bun ibodok anī, ī tenebur ein ibodok anī wal fiya. <sup>5</sup> Idi tenebur temeleid, anī nigin, idi tenebur nē lo fiya bunem wogō de di, tenebur tamo kayau idi karī difiyēdidig. <sup>6</sup> Ada Negur bun temelada, age tafe di, aib ī Negur keleī, ada karī fadadig, anī ere, aib ī Negur bun tamal sã, ada to karī fadadig. Anī bunem, ada momoi bagai nē Awa Uur ado kũ fenēya nē uur nigin keleī youf.

### Negur Nē Wau Laa Fiya Ado Neda Wauda Laa Fiya

<sup>7</sup>Turau tar oboiyou, abob nigin wauda laa foug, ere nigin, wau laa fiya are Negur bunem isidig. Ganan waud laa fedig idi, are Negurem gō fedi di, idi Negur keleī. <sup>8</sup>Aib taka ī to wau laa fedig, ī Negur keleī sā, ere nigin, Negur ī wau laa fiya. <sup>9</sup>Negur nē wau laa fiya eig fe ifelnadan. Ī yogon Naal tekelei bagai, ada ī bunem mata tabodōf nigin, tenebur sur fen. <sup>10</sup>Wau laa fiya are yeir. Ada Negur nigin wauda to laa fen, anī ere, ī ada nigin wau laaf fen, yogon Naal, neda mosor nigin Negur nē didi yo fiya nē sesewi fiya anī sur fen. <sup>11</sup>Turau tar oboiyou, Negur ī ada nigin agef wau laa fen nigin, adag abob nigin wauda laa foug bagai. <sup>12</sup>Takam Negur to bagai ilen. Anī ere, ada abob nigin wauda laa foug are, Negur ada bun ibod ken, yogon wau laa fiya ada bun kisi falauf.

<sup>13</sup>Ada keleī, ada ī bun tabodok, agef fen, ī ada bun ibodok, ere nigin, ī yogon Awa Uur ada ifanadan. <sup>14</sup>Ada tail fen, kurō tafeis, Dei, yogon Naal tenebur enei nē kel yaleya tamo wō youf nigin sur fen, taudig. <sup>15</sup>Aib taka Jesus ī Negur Naal youf are, Negur ī bun ibodok, age fe di, ī Negur bun ibodok. <sup>16</sup>Age fiya nigin, ada, wau laa fiya ada nigin Negur ado anī kelei ken, momoi taudig.

Negur ī wau laa fiya. Aib taka wau laa fiya bun ibodok, ī Negur bun ibodō di, Negur ī bun ibodok. <sup>17</sup>Naab age fiya bun, wau laa fiya ada atun kisi fele di, ada es fiya naa bun, kumī sā, total tafarauf, ere nigin, tenebur ein, ada Kristus gen tabodok. <sup>18</sup>Wau laa fiya bun, kumī taka to ibodok. Anī ere, wau laa fiya kisi feleya bagai anī, kumī irudig, ere nigin, kumī mala solo sane ado iledig. Taka ī kumī yef, ī wau laa fiya bun, kisi feleya bagai to wō yef.

<sup>19</sup>Ada wauda laa fedig, ere nigin, ī ketem ada nigin wau laa fen. <sup>20</sup>Aib taka ī aya Negur nigin wau laa fef ye fen, yogon tura nigin to orouf are, ī idegēya tamal. Ere nigin, aib taka ī yogon tura ī iledig anī nigin to wau laa fef are, ī Negur to ilen anī nigin wau laa fiya kisi feleya sā. <sup>21</sup>Kristus ī ada itāfiya enei ifanadan. Aib taka Negur nigin wau laa fef, ī yogon tura nigineg wau laa foug bagai.

### Negur Naal Nigin Momoiya

**5** Aib taka ī Jesus ī Kristus yef, ī Negurem gō fen, agef fen, aib taka tama nigin wau laa fef, ī yogon kesu nigineg wau laa fef. <sup>2</sup>Ada Negur nē gere tar nigin wauda laa fef ya anī, naig tafe keleī youf, are eig fiya. Negur nigin wau laaf fen, yogon itāfiya dō fiya bunem.

<sup>3</sup>Negur nigin wau laa fiya, are yeir. Yogon itāfiya dō fiya. Agef fen, yogon itāfiya are, ada age tafoug nigin morō to ifanadadig, <sup>4</sup>ere nigin, ganan Negur bunem wowā den idi, tenebur nē oroya wal difedig. Momoiya bunem, ada tenebur nē oroya wal tafedig. <sup>5</sup>Aim anī tenebur nē oroya wal fef? Ī, Jesus Negur Naal ye fen, momoi yef anim dogol.

<sup>6</sup>Enei anī, naan igūya nē naan ado laa nē naud bunem isin, are Jesus Kristus. Ī naan bunem dogol to isin, anī ere, naan ado naud bunem isin. Agef fen, Awa Uur anī kurō fesif, ere nigin, Awa Uur ī momoi bagai. <sup>7</sup>Towo anidim kurō difesif. <sup>8</sup>Awa Uur, naan ado, naud. Agef fen, towo are tekelei wogō def. <sup>9</sup>Ada tamom kurō difesif anī taledig, anī ere, Negur nē kurō fesiya are tamo nē wal fiya. Negur nē kurō fesiya are yeir, ī yogon Naal nigin kurō fesin. <sup>10</sup>Aib taka Negur Naal nigin momoi yef, ī kurō fesiya od enei in wau bun ibodok. Aib taka Negur nigin to momoi yef, ī Negur idegēya tamo yef, ere nigin, ī Negur yogon Naal nigin od kurō fesin anī to momoi yef. <sup>11</sup>Kurō fesiya od are yeir. Negur ada mata ibodkeleya ifanadan, age fe di, mata enei are yogo Naal bun ibodok. <sup>12</sup>Taka ī Naal ado, ī mata ado, taka ī Negur Naal sā, ī mata sā.

### Idikeleya Nē Od

<sup>13</sup>Aya, ā Negur Naal nē yana nigin momoi gef anī, mata ibodkeleya ā bun ibodok anī, ā keleī youf nigin enei atokeneik. <sup>14</sup>Negur mala bun, ada kumī sā total ado anī eig fiya. Ada yogon oroya dō tafe fen, ereb taka nigin to tafiyēf are, ī ada karī fadauf. <sup>15</sup>Age fe di, ada ereb nigin to tafiyek, ī karī fadadig anī ada keleī youf are, ada keleī, ereb ada to tafiyek are ada talef.

<sup>16</sup>Aib taka ī yogon tura mosor laa bun to irouledig anī ino mog, ilouf are, ī tura nigin kosē ye di, Negur tura mata ifenēf. Aya idi nedi mosor laa bun to guri feid irouledig anidi nigin wogō auf. Mosor laa bun guri feid irouledig are ibodok. Aya mosor anī nigin kosē youf nigin to wogō auf. <sup>17</sup>Kū fenēya ganan, are mosor, agef fen, mosor laa bun to guri feid irouledig anī ibodok.

<sup>18</sup>Ada keleī, aib taka Negur bunem wō yen, ī mosor to inof iledig. Negur Naal ī kulatun fiyē di, Satan nē anim ī to daū fiyēf. <sup>19</sup>Ada keleī, ada Negur nē gere tare di, teneub ganan Satan nē anī farumen ibodok. <sup>20</sup>Takag ada keleī, Negur Naal isi fen, ada keleī fokō fanadan, are ada, Negur momoi bagai anī, keleī youf nigin age fen. Age fe di, ada, Negur momoi bagai anī bun tabodok, are yogon Naal Jesus Kristus bun. Ī momoi bagai Negur fen, mata ibodkeleya anī.

<sup>21</sup>Neu kesu tar, idegēya waitou so wiyēdigouf.

## 2 JON

### Aan Yeya

**1** Aya, sios nē mudur ado, kayau † Negurem igirnen ado yogon gere tar bun pas enei atotof. Aya momoi anī bun ā nigin wau laa fedig, are aya dogol sã, anī ere, ganan idi momoi nigin keleī anidig, <sup>2</sup> are momoi anī ada namedan ibod ken, ada geid ibodkalauf anī nigin.

<sup>3</sup> Wau ifenēya, wau yūya ado, wau inosiya, Dei Negur ado Jesus Kristus, Dei nē Naal bunem, momoi ado wau laa fiya bun ada geid ibodōf.

### Momoi Bun Mata Ibodōya

<sup>4</sup> Aya ogon gere tar tunī, Dei ada irokanadan kilei, momoi bun diyō mog, ail fen, fatuk bagai wau al fen.

<sup>5</sup> Gama, kayau oboiyou, aya itāfiya mata ð to atotkonok, anī ere, ada gariya bunem talen anī dogol. Ada abob nigin wauda laa foug anī, aya to afef. <sup>6</sup> Enei anī wau laa fiya, are ada yogon itāfiya dō fiya bun tayōf. Enei anī yogon itāfiya, are ā gariya bunem mogo karī gen kilei, ā wauī laa fiya bun uyōgouf.

† Kayau are, kayau Jon ī nigin keleī anī be, oo, ī are sios.

<sup>7</sup> Idegēya tamo musei, teneub ganan bun diyok, idi Jesus Kristus tamo bouwa bagai bun isin anī wa difedig. Tamo age fiya ī idegēya tamo fen, ī Kristus nē kiwai. <sup>8</sup> Ā nigin amā kabī total maledig anī, ege kilē to ilauf nigin ado, ā mala solo kisi feleya bagai walogouf nigin lo walagauf. <sup>9</sup> Taka ī Kristus nē ifelnēya anī idod ken, anī bun to ibodok, ī namen Negur to ibodok. Aib taka ī ifelnēya anī bun tobol fef ilef, ī namen Dei ado Naal dibodok. <sup>10</sup> Aib taka ā bun isi fen, ifelnēya enei to irou isiyouf, ī āgenei fō bun to waleg uroulagauf, ī aane neg to wiyēgouf. <sup>11</sup> Aib taka ī aan fiyek, ī yogon kabī sane bun weim kabī dalef.

### Idikeleya Nē Aanya

<sup>12</sup> Aya ā bun itotoya nigin musei ado, anī ere, aya pe-pa ado ink nem itotoya nigin to orouf. Age fiya ban, aya ā ki ayei ken, abob nawa bun wogō tauf nigin wau irok, age tafe di, wauda al fiya anī isokosouf.

<sup>13</sup> Ogon main Negurem igirnen anī nē gere tar, nedi aanya sur difef.

# 3 JON

## Aan Yeya

**1** Aya, sios nē mudur ado, turau oboiyou Gaius, aya ĩ nigin momoi anĭ bun, wau laa fedig, ĩ bun pas enei atotof.

<sup>2</sup>Turau oboiyou, ogon malākanon biya ibodok gen, õ boũ biya ibod ken, ereb ereb ganān õ nigin biya ilauf nigin, aya kosē auf. <sup>3</sup>Turau tar tunĭ disi fen, õ momoi anĭ biya bagai dõ wo fen, momoi anĭ bun toku uyõdig anĭ dirokana di, aya fatuk bagai wau al fen. <sup>4</sup>Aya gereu tar momoi anĭ bun diyõdig karĭya anim, wau al fiya ereb ereb ganān wal fiya anĭ ifanadig.

## Negur Nē Kabĭ Tamo Kulatun Fediya

<sup>5</sup>Turau oboiyou, õ, turada tar idi, õ bun yaũ tamo anidi nigin el wo, biya ago wedidig. <sup>6</sup>Idi ogon waũ laa fiya nigin sios dirokenēdin. Õ idi tobonunā Negur orof kilei sur wediyouf are, õ biya ago wouf. <sup>7</sup>Idi Odug yana nigin, haiden bun tamal isennēya taka to dale fen, dilen. <sup>8</sup>Anĭ nigin, ada, momoi anĭ nigin weim kabĭ talouf nigin, tamo age fediya tasennēdiyof bagai.

<sup>9</sup>Aya sios bun pas atoton, anĭ ere, Diotrefes uyulil ibodõya nigin wau laa fedig, ĩ nemã od to karĭ yedig.

<sup>10</sup>Anĭ nigin, aya asiyouf sain bun, aya ĩ ereb age fef, amã nigin dumen od sane bagai irõdig anĭ yaor afouf. Anĭ dogol sã, ĩ turada tar yalediya nigin itoron. ĩ idi turada tar yaleya nigin orodif anidig katũ feid fen, idi sios bun tamal yalelnēdin.

<sup>11</sup>Turau oboiyou, ereb sane anĭ to madē wo, ereb biya anĭ madē wouf. Aib taka ereb biya age fef, ĩ Negur bun tamal. Aib taka ereb sane age fef, ĩ Negur to ilen.

<sup>12</sup>Demetrius ĩ nigin, ganān biya wogõ dedig, momoi anĭ ĩ yogog age fedig. Amãg ĩ nigin biya wogõ maudig, age mafe di, ã keleĭ, nemã wogõ are momoi.

## Idikeleya Nē Aanya

<sup>13</sup>Aya õ bun itotoya nigin musei ado, anĭ ere, aya pepa ado ink nem itotoya nigin to orouf. <sup>14</sup>Aya kaisã ileyõya nigin wau irok, age afe fen, abob nawa tail fen, wogõ tauf.

<sup>15</sup>Wau inosiya õ bun ibodõf. Turada tar ein, nedi aanya sur difef. Turada tar an mugu mugu yeneid nem aan wediyouf.

# JUD

**1** Aya Jud, Jesus Kristus nē ferfer fen, Jems ne tura, idi Negurem iweignēdin, Tamada Negur idi nigin wau laa fe di, Jesus Kristus kulatun fedidig anidi bun, pas enei atotof.

<sup>2</sup> Wau yūya, wau inosiya ado, wau laa fiya, ā bun barikāf.

## Momoiya Sā Tamo Neid Mosor Ado Daū Feidleya

<sup>3</sup> Turau tar oboiyou, aya, ā kel yaleya ada weim talen anī nigin atotkeneif nigin, kisi total aledig, age a mā, aya kisi afen, aya atot fen, momoiya sain ganan nigin sain tekelei bun, Negur nē tamo kayau imeid bun ifenēdin anī, el ge kulatun gouf nigin, total bagai aro-keneif, are deuf aun. <sup>4</sup> Ere nigin, tamo tunī idi daū feidleya nigin mogo kulu yeneid itoton anidi, ā keleī sā mog, ā atun iminēyan disin. Idi Negur nē ibodōya sā, idi neda Negur nē wau ifenēya anī falei difel, karika to-bonunā sane inoya nē gen dino fen, Jesus Kristus neda Uyu Irouya fen Odug yana wa difedig.

<sup>5</sup> Momoi, ā enei ganan mogo keleī, anī ere, aya ā, Odug yogon tamo kayau Isip bun tamal kel gei fedin, anī ere, dum idi to momoi den anidi daū feidlen anī nigin, baban wedereī fokō afouf nigin orouf. <sup>6</sup> Takag, engel idi dogo neid ifareya modoū bun to dibod ken, dogo neid modoū ditoron anidi, Negurem es fiya naa odug nigin ye fen, idi gugum bun ineneīd fen, sen mata ibodkeleya anim ifofakelen. <sup>7</sup> Age fiya bagai, Sodom Gomora ado, taun anidi kalilī fiya idi noli tobonunā ado tobonunā sane bun dilelen. Idi bun, yā mata faimud ibodkeleya nē darau dalouf anī nē malakanon iley-auf nigin age fen.

<sup>8</sup> Naab gai age fiya bagai, imīya tamo eneidi dogo bouweid amuyē dinoid fen, Negur nē yana dudum difiye ken, engel megeir adodo dumedin od dirōdig.

<sup>9</sup> Anī ere, engel neid mudur ado Maikel, sain ī Satan ado Moses bouwa nigin luwa dirou fen, ī bouwa bun kumī sā od sane wogōya nigin itoron, anī ere, ī iron, "Odug ō ou yok!" <sup>10</sup> Anī ere, tamo eneidi, ereb idi keleī sā anī nigin, od sane dirōdig. Age de fen, idi gaar kisi sam gen, bouwa nē oroya bunem idi keleī anī dō dife fen, daū feleya bun dileledig.

<sup>11</sup> Idi meleidlou ado! Idi Kain nē naab dō difen. Idi moni nigin de fen, Balam nē kū fenēya bun kaisā dilelen. Idi Kora nē kiwai inoya dō dife di, daū feidlen.

<sup>12</sup> Tamo enidi, āgenei wauī laa fiya nē sifa bun, ā geid kumī sā saaf dokon maaīwō sa tuwa waag daū fiyēdig gen, daū diyeīdig. Idi sipsip lo fiya tamo, dogo nau-

meid nigin dogol kisi difedig gen. Idi budū uyē sā, yaum irouf iyōdig gen. Idi aa wei, mayo sain bun faat sā, agef fen, laaf uru fen, warumutei teten isen gen.

<sup>13</sup> Idi maaī moloun fatuk fā ye fen, dogo neid mama sali moku fiya gen. Idi barisa ilef isif fedig, anidi nigin karos bagai gugum keleya gai gai nigin saia fen gen.

<sup>14</sup> Enok, ī Adam bunem isin ibor sewen, tamo eneidi nigin profet od wogō yen, "Uleg, Odug ī yogon fateul anidi tausen tausen geid disif. <sup>15</sup> Ī ganan es feid fen, Negur nē to dibodok anidi ganan, dogo neid to-bonunā sane, naab sane bun age difedig nigin ado, Negur nē to dibodok mosor temeleid anidi, od sane ganan ī nigin wogō dedig nigin, Negur nē to dibodok anidi neid mosor yaor fediyouf." <sup>16</sup> Tamo eneidi are nauseir temeleid fen, taka nē kū fenēya dimirēdig. Idi dogo neid oroya sane dō difedig. Idi dogo yeneid dalles fen, dogo neid biya fiya nigin, tunī meleid yaleya bun biya biya le fen, wogō dedig.

## Feseya Sā Ifareya Nigin

<sup>17</sup> Anī ere, turau tar oboiyou, ereb neda Odug Jesus Kristus nē aposel mogo dirokenein anī kisi gouf. <sup>18</sup> Idi ā dirokenein, "Idikeleya sain bun, kono fiya tamo wowā de fen, dogo neid oroya sane dō difouf." <sup>19</sup> Tamo eneidi ā fara diyeīf, idi tenebur nē kisi dō de fen, Awa Uur idi bun to ibodok.

<sup>20</sup> Anī ere, ā, turau tar oboiyou, ā aug nigin āgenei momoiya fateul bagai bun fō gen unogef useleg fen, Awa Uur Fateul bun kosē gouf. <sup>21</sup> Ā, neda Odug Jesus Kristus nē wau yūya anim, mata ibodkeleya bun irouleyeīf anī tarig fen, Negur nē wau laa fiya bun, aug nigin kulatun gouf.

<sup>22</sup> Idi momoiya total sā nene def anidi bun wauī wenēdigouf. <sup>23</sup> Tunī yā bun tamal gurar ge gei wedigouf. Agog fen, tunī bun wauī yūya aniniya ado ufelnēdigouf. Anī ere, dogo neid kolos, bouwa nē oroya sanem amuyē iroun anī utorōg.

## Negur Yana Yaleseya Nē Od

<sup>24</sup> Negur ī, ā to kubū gouf nigin kulatun yei ken, fula fiya medeīya ī mala bun, kū fenēya sā, wau kulīya odug ado ineneīya kisi feleya ī anī bun, <sup>25</sup> ada Isennadaya Negur tekelei dogol ī anī bun, fula fiya medeīya, total, megeir ado, yana odug, neda Odug Jesus Kristus bunem, kulu, gama ado, faimud ibodkalauf! Momoi.

# KURŌ FESIYA OD

## Od Uyu Irouya

**1** Jesus Kristus nē kurō fesiya od, are ereb kaisā ba-gai wō youf anī, Negurem yogon ferfer ifelnēdiy-ouf nigin Jesus ifenen. Jesus ī, yogon ferfer Jon od anī keleī youf nigin, yogon engel Jon bun sur fen. <sup>2</sup> Jonem ereb ereb ganān ī ilen anī kurō falaisif, are Negur nē od ado, Jesus Kristus nē od. <sup>3</sup> Taka ī profet od enei iwe-sef are ī el fiyek, agef fen, idi anī karī de fen, ereb anī bun itoton anī waud bun dinof anidi el fedif, ere nigin, sain mogo dodolef.

### Jon Sios Sewen Bun Yogon Aanya Sur Fen

<sup>4</sup> Aya Jon, Asia provins bun sios sewen bun pas enei atotof. Negur ī gama ibodok, kulu ibodon, dumen isiyouf bunem, uur sewen yogon king nē sia wagen difaref bunem ado, <sup>5</sup> Jesus Kristus ī Negur nē od el fe dōf wogō yedig, ī tamo gare den bun tamal uyulil kel turī fiyen, tenebur king ganān neid mudur ī bunem, wau ifenēya ado wau inosiya ā bun isif. Jesus ī ada nigin wau laaf fen, yogon naud bunem, ada neda mosor bun tamal yalelnadan. <sup>6</sup> Agef fen, ī ada yogon Tama Negur aruna yaleya nigin, in tano ado in pris inodan. Ī bun fula fiya medeīya ado megeir gai ibodkalauf! Momoi. <sup>7</sup> Log, ī lalo bunem isif. Age fe di, meleid ganān ī dilouf, idi ī gilī difen anidig dilouf. Age fe di, tamo kayau tenebur ein ganān ī nigin waud gudū fouf. Are agef ba-gai wō youf! Momoi. <sup>8</sup> Odug Negur irok, “Aya uyulil ado idikeleya, aya gama abodok, kulu abodon, dumen asiyouf, aya saa ilun nē kusī tamo guri afeid uyu aroudig anī.”

### Taka Ī Tamo Naal Gen

<sup>9</sup> Aya Jon, āgenei tureī, aya, Jesus bun darau, Negur nē tano ado, feseya sā ifareya, ā geid taledig, aya Negur nē od ado Jesus nē od wogō aun nigin, Patmos nuyo bun abodon. <sup>10</sup> Odug nē naa bun, aya Awa Uur namen abod ken, aya dumeun ait odug taur gen wō ye mog, karī aun. <sup>11</sup> Ait iron, “Ereb ō ulef anī, buk kori fiya bun utot fen, sios sewen bun sur wediyouf, oun Efesus, Smerna, Pergamum, Taiataira, Sardis, Filadelfia ado, Laodisia.”

<sup>12</sup> Aya ait wogō fiyan anī ileyā nigin falei aun. Aya falei aul fen, lam nē gol tutur sewen ailedin. <sup>13</sup> Lam tutur

anī atun, aib taka “tamo naal gen” † kolos meluk ifonū di, yen isilen ado, let gol akor gu fen anī ifaren. <sup>14</sup> In mudur ado fatiya, sipsip siwi lalau, saa lalo lalau gen, yogon mala are yā mala fitotoleya gen. <sup>15</sup> Yogon ye are bras yā malan ifalegeya medeīya gen, in ait are naan uhuhuya gen. <sup>16</sup> Yogon ima biyalē barisa sewen iron, agef fen, in awa bun tamal, dimig bala waila si sitakā wō yen. Yogon nawa are gaa ririya gen medeī yen.

<sup>17</sup> Aya ī ail fen, aya ī ye gariyan kubū au, laa gen ainen. Age afe di, ī ima biyalē aya teteun ino fen, iron, “Ō to kumī wo. Aya gariya, aya idikeleya. <sup>18</sup> Aya mata ibodōya nē, aya laa fiyan, anī ere, uleyaf, aya gai mata abodkalauf! Aya laa nē ado Hades nē ki aroudif.

<sup>19</sup> “Anī nigin, ereb ō ulen, ereb gama ibodok, ereb dumen wō youf anī utot. <sup>20</sup> Barisa sewen aya imau biyalē ulen ado, lam nē gol tutur sewen ulen anī nē waa nē gariya, are eig fiya: Barisa sewen are sios sewen neid engel, lam nē tutur sewen are sios sewen.

### Efesus Sios Bun Od Ilef

**2** “Efesus sios nē engel bun utot: Od enei are, ī barisa sewen ima biyalē irou mog, sewen gol lam tutur difaren atun iyok ilen nē od: <sup>2</sup> Ereb ō ago wof, are aya keleī, ogon kabī totol yaleya ado ogon feseya sā ifareya anī. Aya keleī, ō tamo sesen to loloum weid fen, idi dogo anī aposel dedig, anī ere, aposel sā anidi es wiyēid fen, idi neid idegēya anī ulen. <sup>3</sup> Ō totol ufar fen, neu yanau nigin morō faali won, anī ere, ō to fō yon. <sup>4</sup> Anī ere, aya ō nigin od enei ado: Ō uruwa aya nigin waū laa fen anī utoron. <sup>5</sup> Anī nigin, ō nainenem kubū won anī kisi wo! Falei wo fen, ereb uruwa agon anī agouf. Ō to falei wouf are, aya ō gein asi fen, ogon lam tutur ado yogon modoū bun tamal alelauf. <sup>6</sup> Anī ere, tobonunā biya enei ō ado: Ō Nikolas dō difiyek neid tobonuneid to oroyōdig, are ayag to oroudig. <sup>7</sup> Taka ī weder adouf, utornēg len, ī Awa Uur sios irokenēdif anī karī youf. Aib ī kusī anī wal fouf, aya ī mata ifenēya nē aa Negur nē paradis bun ibodok anī bun tamal, yōya nigin yo afiyēf.

### Smerna Sios Bun Od Ilef

<sup>8</sup> “Smerna sios nē engel bun utot: Od enei are, ī gariya ado idikeleya, ī laaf fen, ba-ban mata fā yen nē od. <sup>9</sup> Ogon darau ado ogon ma-leg nigin aya keleī, anī ere, ō safina musei ado. Aya

† *Daniel 7:13*

idi dogo nigin Juda tamo dedig, anī ere, idi Juda tamo sã, Satan nē guru fiya anidi neid bou yūya od nigin keleī. <sup>10</sup> Ereb mogo ō darau ifonōf nigin to kumī wo. Aya ō arokonok, Satan ī mogo ā tunī kisi yeīya nigin kalabus bun ineneīf. Age fe di, ā naa ten darau walogouf. Ō laa bun dinenōfeg, ogon momoiya urou kafī walauf, ago di, aya ō mata nē teter kurū ayōf.

<sup>11</sup> Taka ī weder adouf, utornēg len, ī Awa Uur sios irokenēdif anī karī youf. Aib ī kusī anī wal fouf, namba tu nē laa ī to daū fiyēf.

### Pergamum Sios Bun Od Ilef

<sup>12</sup> “Pergamum sios nē engel bun utot:

Od enei are, ī dimig bala willa si sitakā ado nē od.

<sup>13</sup> Ō ubodok nē an aya keleī, an Satan nē sia ibodok. Anī ere, ō neu yanau urou kafī welef. Antipas, neu dō fiya biya, aya nigin od wogō yedig, ī Satan ibodok nē āgenei taun an dukesin sain anī buneg, ō aya nigin ogon momoiya to folō welen.

<sup>14</sup> Anī ere, aya ō nigin od tunī ado: Ō tamo tunī an Balam nē keleī dirouf anidi ado, Balam ī Balak ifelnē di, Balak ī Israel tamo kayau yeid tū fiya nē meein ino fen, idegnēdi di, Israel idi saaf idegēya waitou bun sesewi difen anī dokon, noli tobonunā dinon.

<sup>15</sup> Age fiya gen, ō aneg tunī Nikolas nē ifelnēya dirouf anidi ado. <sup>16</sup> Anī nigin, waū falei wo! Sãf are, aya kaisã bagai ō gein asi fen, neu sigorou nē dimig ado idi geid kusī auf.

<sup>17</sup> Taka ī weder adouf, utornēg len, ī Awa Uur sios irokenēdif anī karī youf. Aib ī kusī anī wal fouf, aya ī mana iminēyan ibodok tunī afenēf. Aya ī meein lalau takag, yana mata teten itoton anī afenēf. Aib ī anī yalef dogol yana anī keleī youf.

### Taiataira Sios Bun Od Ilef

<sup>18</sup> “Taiataira sios nē engel bun utot:

Od enei are Negur Naal nē od, yogon mala are yã mala fitotoleya gen, yogon ye are bras yã malan ifalegeya medeīya gen. <sup>19</sup> Aya keleī, ō ereb agof, ogon waū laa fiya ado momoiya, ogon aruna yaleya ado feseya sã ifareya. Aya keleī, ō uruwa bun ago won anī wal fiya gama ō agodig.

<sup>20</sup> Anī ere, aya ō nigin od enei ado: Ō kayau Jesebel, ī yogo nigin profet kayau yef anī, loloum wedig. Ī yogon ifelnēya bunem neu ferfer idegnēdi di, idi noli tobonunā bun dile fen, saaf idegēya waitou sesewi difen anī dōdig. <sup>21</sup> Aya ī yogon mosor nigin wau falei youf nigin sain afenen, anī ere, ī to orof. <sup>22</sup> Anī nigin, aya ī darau nē fatar bun ara ken, idi ī geid seseirã dinodig anidi, kayau anī nē naab nigin waud to falei youf are, aya idi darau fatuk bagai afenēdiyof. <sup>23</sup> Aya ī gere tar adenkesiyof. Age afe di, sios ganan, aya waud ado kisi es afedig anī keleī youf. Age afe fen, aya ā mugu mugu ereb ereb ā ago gef kilei, mala solo afeneīf. <sup>24</sup> Anī ere, aya ā tunī ganan Taiataira ufaregef anī arokeneik, ā kayau anī

nē ifelnēya to uroug fen, Satan nē waa namen bagai dedig anī to kelein anī arokeneik (aya ā bun ereb morō taka to afeneīf). <sup>25</sup> Ereb ā urougef anī dogol urougef uleg mog, asiyouf.

<sup>26</sup> Aib ī kusī anī wal fe fen, neu oroya dōf ile, idikeleya bun ouf, aya ī teneub lo fediya nigin megeir afenēf.

<sup>27</sup> Ī ain manig nem ulum irokenēdiyof,

ī mis gen daū fedi di, urud falaisiyof,† are aya neu Dei bunem megeir alen gen. <sup>28</sup> Aya ī bonimeī nē barisa kilokilog afenēf. <sup>29</sup> Taka ī weder adouf, utornēg len, ī Awa Uur sios irokenēdif anī karī youf.

### Sardis Sios Bun Od Ilef

**3** “Sardis sios nē engel bun utot:

Od enei are, ī Negur nē uur sewen ado barisa sewen irouf anī nē od. Ō ereb agof, are aya keleī. Ō mata ubodok dedig, anī ere, ō laa yon. <sup>2</sup> Fã wale! Ereb mogo laa fou fenē anī megeir wenē, ere nigin, aya ō ereb agof are neu Negur nē mala bun tutuk bagai sã ailef. <sup>3</sup> Anī nigin, ereb ō walen, ereb ō karī won anī karī walauf. Anī dō wo fen, waū falei wo. Ō to fã walouf are, aya bē tamo gen asiyouf. Aya sain nanī be, ō gein asiyouf anī, ō to keleī youf.

<sup>4</sup> Anī ere, ō, Sardis an tamo kayau tunī, idi neid kolos amuyē fiya sã difaref anidi ado. Idi kolos lalau difoun ken, aya geid mayōf, ere nigin, idi kisi feleya bagai. <sup>5</sup> Aib ī kusī anī wal fouf, ī idi gen kolos lalau ifonūf. Aya yogon yana, mata ibodōya nē buk bun tamal to alelauf, age afe fen, yogon yana neu Dei ado yogon engel meleid bun kurō afesiyouf. <sup>6</sup> Taka ī weder adouf, utornēg len, ī Awa Uur sios irokenēdif anī karī youf.

### Filadelfia Sios Bun Od Ilef

<sup>7</sup> “Filadelfia sios nē engel bun utot:

Od enei are, ī fateul bagai ado momoi nē od, ī Dawid nē ki irouf. Ereb ī kā fef, taka nem to inolauf, agef fen, ereb ī inolelef, taka nem to kā falauf. <sup>8</sup> Ō ereb agof, are aya keleī. Ulef, aya, sukar kā feleya taka nem inoleleya kisi felya sã anī, ō wagen anon. Aya keleī, ō megeir naal bagai ado, anī ere, ō neu od dō wo fen, neu yanau to wa won. <sup>9</sup> Ulef, idi Satan nē guru fiya namen temeleid, idi dogo nigin Juda tamo dedig, anī ere, idi Juda tamo sã, idegēya tamo anī, ayam age afe di, idi disī, ō yē gariyan kubū de fen, aya ō nigin wau laa fedig anī idi keleī youf. <sup>10</sup> Ō feseya sã ufarauf nigin neu od urou kafī welen anī nigin, ayag idi tenebur dibodok kisi fediya nigin teneub ganan bun darau isiyouf sain bun, aya ō ahaha ayōf.

<sup>11</sup> Aya kaisã bagai asiyouf. Ō ereb urouf anī kafī walauf, ago di, taka nem ogon kurū fiya nē teter anī to yalouf. <sup>12</sup> Aib ī kusī anī wal fouf, aya, neu Negur nē tempel bun, ī monog tor atennēf. Ī anī baban to bagai itorōf. Aya ī bun, neu Negur nē yana ado, neu

† Sam 2:9

Negur nē taun yana, Jerusalem mata, are saa ilun tamal neu Negur bunem isiyouf anī atotauf. Age afe fen, aya neu yanau matag ī bun atotauf. <sup>13</sup> Taka ī weder adouf, utornēg len, ī Awa Uur sios irokenēdif anī karī youf.

### Laodisia Sios Bun Od Ilef

<sup>14</sup> “Laodisia sios nē engel bun utot:

Od enei are Momoi Barikā nē od, ī dō fiya biya ado, momoi bagai Negur nē od wogō yedig, ī ereb ereb Negur inodin ganan nē gariya. <sup>15</sup> Ō ereb agof anī aya keleī, are ō medir sā, uruwag sā. Aya ō medir be, uruwa anī taka ubodok nigin orouf. <sup>16</sup> Anī nigin, ō laigog, medir sā, uruwag sā nigin, aya ō mogo awau bun tamal atigil arāyōf. <sup>17</sup> Ō urōdig, ‘Aya safina ganan kisi feleya, aya safina musei alen nigin, aya ereb taka to lau afedig,’ wodig. Anī ere, ō keleī sā, ō gai sane bagai, malalon ado, maleg, malā ifofakeleya ado, gemū ubodok. <sup>18</sup> Aya ō arokonok, ō aya bun gol bagai, gol yā bun difalegen anī, ō safina ganan kisi feleya bagai wō wouf nigin, na walouf, ō kolos lalaug ufonū di, ogon gemū mama dede wouf nigin na walouf, ō mala marasin malā bun uno fen, kelē walauf nigin na walouf.

<sup>19</sup> Aya idi nigin wau laa fedig anidi, aya ou afeid fen, tai afedidig. Anī nigin, kabī total wale fen, mosor utor ken, waū falei wouf. <sup>20</sup> Lo weleg, aya bobogē afar fen, godu afef. Taka ī aitou karī ye fen, sukar kā fouf are, aya ī namen asi fen, ī ado saaf māf, age afe di, ī aya ado saaf māf.

<sup>21</sup> Aib ī kusī anī wal fouf, aya kusī wal afe fen, neu Dei nē king nē sia bun, neu Dei ado mabodok gen, īg neu king nē sia bun, aya ado mabodōf nigin yo afiyēf. <sup>22</sup> Taka ī weder adouf, utornēg len, ī Awa Uur sios irokenēdif anī karī youf.”

### King nē Sia Saa Ilun Ibodok

**4** Anī bure fele di, aya kelē aulen, aya wageun an saa ilun nē sukar kā feleya ifar mog, ailen. Age afe fen, ait aya uyulil taur gen wogō fiya di, karī aun are iron, “Ein use, ago di, ereb enei bure fele di, wō youf anī, afelnōf.” <sup>2</sup> Kaisā bagai aya Awa Uur namen abodon, age afe fen, wageun an saa ilun king nē sia bun, aib taka ibodon anī ailen. <sup>3</sup> Agef fen, taka an ibodon are, lo fiya bun meein medeīya jaspā ado meein giriya medeīya konilian gen wō yen. Walol taka, meein aarau mata age fiya medeīya emeral gen sof fen, king nē sia anī kalilī fen. <sup>4</sup> King nē sia anī sirin, tuwenti-fo king nē sia anim salili de fen, tuwenti-fo mudur adodo anī bun dibodon. Idi kolos lalau difoun ken, dogo neid mudureid bun king nē gol teter ado dibodon. <sup>5</sup> King nē sia bun kolimei filiya firagagaū fe sof fen, gurūya odug wō ye di, kolimei gudū yen. King nē sia wagen lam sewen futu redin, are Negur nē awa uur sewen anī. <sup>6</sup> Takag, king nē sia wagen, ereb taka maaī gen galas nem dinon anī, galas medeīya bagai age fiya ibodon.

Anī atun king nē sia salili fiya bun, ereb mata ibodōya aiwa adodo difaren. Idi meleid barikā, wage-din ado dumedineg. <sup>7</sup> Ereb mata ibodōya uyu ifaren are laion gen, anī dō fiya are bulmakau gen, anī dō fiya are nawa, tamo nawa gen, anī dō fiya are webi fatutu yef gen. <sup>8</sup> Ereb mata ibodōya aiwa adodo idi mugu mugu wayeid sigis ado fen, bouweid ganan bun meleid barikā, wayeid farumēg meleid ado. Bō ado gaa ado, idi eig yeya to folō difeledig:

“Fateul, fateul, fateul

are Odug Negur saa ilun nē kusī tamo guri feid uyu iroudig anī,

ī kulu ibodon, ī gama ibodok, ī dumen isiyouf.”

<sup>9</sup> Ereb sain ereb mata ibodōya idi, taka ī king nē sia bun ibod ken, mata faimud ibodkeleya anī bun, fula fiya medeīya, yana odug ado, de fiyēya difenēdig bun, <sup>10</sup> mudur adodo tuwenti-fo, ī king nē sia bun ibod mog, ī wagen kuku de fen, ī mata faimud ibodkeleya anī seli dalesedig. Idi king nē sia wagen dogo neid teter gō difel fen, dirōdig:

<sup>11</sup> “Nemā Odug Negur,

ō fula fiya medeīya, yana odug ado, megeir yaleya kisi feleya bagai, ere nigin, ō ereb ereb ganan ago di, wowā den, ago fen, ogon oroya bunem idi unodi di, age de difaref.”

### Buk Kori Fiya Ado Sipsip Naal

**5** Age de di, aya ī king nē sia bun ibodon anī ima biyalē, buk kori fiya si sitakā itotoya ado uris sewen nem itā de fen, sile fiyan anī ailen. <sup>2</sup> Age afe fen, aya engel megeir ado taka ailen, ī ait odugem iweig iron, “Aim uris eneidi narī feid fen, buk kori fiya enei fara feleya kisi feleya?” <sup>3</sup> Anī ere, saa ilun be, tenebur be, teneub farumen tamal, taka nem buk kori fiya anī fara feleya be, namen fele fiya kisi feleya sā. <sup>4</sup> Aya fatuk bagai inā alen, ere nigin, taka nem buk kori fiya anī fara feleya be, namen fele fiya kisi feleya to wō yen. <sup>5</sup> Age afe di, mudur adodo takam aya irokanan, “To inā wale! Ulef, Juda nē ibor bun tamal Laion, Dawid nē Warei mogo kusī wal fen. Inim, sā buk kori fiya anī yogon itāfiya uris sewen ado fara falauf.”

<sup>6</sup> Age ye di, aya Sipsip Naal dukessin anī gen, king nē sia ereb mata ibodōya aiwa adodo salili difiyen ado, mudur adodo atun ifar mog, ailen. ī karat sewen ado mala sewen ado, mala sewen are Negur nē awa uur sewen teneub ganan bun susur fedin anidi. <sup>7</sup> Sipsip Naal ī isi fen, ī king nē sia bun ibodon anī nē ima biyalē buk kori fiya anī yalen. <sup>8</sup> Sain ī anī yalen, ereb mata ibodōya aiwa adodo, mudur adodo tuwenti-fo geid, Sipsip Naal wagen kuku den. Idi mugu mugu harp † ado beī gol nem kaau sumeī biya isokoseya ado guri difen, kaau sumeī biya are momoīya tamo kayau neid kosē. <sup>9</sup> Age de fen, idi seg mata dalen:

“Ō buk kori fiya anī wale fen,

yogon itāfiya uris sewen anī fara feleya kisi feleya bagai,

† Harp anī gita gen musik kodē dedig.



ere nigin, ō dinōkesi di,  
ō ogon naud bunem

ibor ganan bun, od fire fire ganan bun, tamo kayau ganan bun ado, teneub ganan bun, Negur nē tamo kayau na waledin.

<sup>10</sup> Ō idi neda Negur aruna dalouf nigin, tano ado pris unenēdin,

ago di, idi teneub ganan lo fiya nigin mudur di-bodōf."

<sup>11</sup> Age de di, aya malau ara ken, engel musei bagai neid aiteid karī aun, idi tausen musei ado handred tausen musei wal fiya. Idi king nē sia, ereb mata ibodōya ado, mudur adodo salili difiyēdin. <sup>12</sup> Age de fen, idi aiteid odugem seg dalen:

"Sipsip Naal dukesi ū

megeir, safina, kisi biya, total, yana odug, fula fiya medeīya ado,

yana yaleseya yaleya kisi feleya bagai!"

<sup>13</sup> Agef fen, aya, ereb ereb ganan saa ilun difaref, teneub difaref, teneub farumen difaref ado, maaī bun difaref, ereb ereb ganan anī namen mata difaref idi seg dale mog, karī aun:

"Ī king nē sia bun ibodok ado Sipsip Naal bun,

yana yaleseya, yana odug, fula fiya medeīya ado, megeir,

gai gai ibodkalauf!"

<sup>14</sup> Ereb mata ibodōya aiwa adodo diron, "Momoi," age de di, mudur adodo kuku de fen, yana dalesen.

### Ītāfiya Uris

**6** Aya lo afe mog, Sipsip Naal ĩtāfiya uris sewen anī uyulil fara fen. Age fe di, aya, ereb mata ibodōya aiwa adodo takam, ait kolimei ait gen bun eig ye mog, karī aun, "Usi!" <sup>2</sup> Aya lo afen, aya wageun an hos lalau taka ifaren. Tamo anī teten ibodon ĩ wi taka iroun, ĩ kusī wal fiya nē teter ifenen, age fe di, ĩ hos bun kusī wal fe fen, kusī wal fediyouf nigin ilen.

<sup>3</sup> Sipsip Naal ĩtāfiya uris uyulil dō fiya anī fara fen, age fe di, aya ereb mata ibodōya uyulil dō fiya anī eig ye mog, karī aun, "Usi!" <sup>4</sup> Age ye di, hos taka isin, are giriya bagai. Tamo anī teten ibodon ĩ, tenebur tamal malol yalel fen, tamo abob didenkesiyouf nigin megeir ifenen. ĩ anī dimig odug ifenen.

<sup>5</sup> Sipsip Naal ĩtāfiya uris anī dō fiya fara fen, age fe di, aya ereb mata ibodōya anī dō fiya anī eig ye mog, karī aun, "Usi!" Aya lo afen, aya wageun an hos karos taka ifaren. Tamo anī teten ibodon, yagon ima bun ĩ foi fiya nē safina iroun. <sup>6</sup> Age fe di, aya ereb mata ibodōya aiwa adodo atun ait taka gen karī aun are iron, "Naa tekelei nē mala solo wit bret tekelei yalouf, naa tekelei nē mala solo baali bret towo yalouf. Ago fen, oliv moul ado wain to daū wo!"

<sup>7</sup> Sipsip Naal ĩtāfiya uris anī dō fiya fara fen, age fe di, aya ereb mata ibodōya anī dō fiya anī eig ye mog, karī aun, "Usi!" <sup>8</sup> Aya lo afen, aya wageun an hos bail-uya taka ifaren. Tamo anī teten ibodon ĩ yana Laa, age fe di, Hades ĩ degē degē fiyen. Idi tenebur tamo kayau aiwa adodo foi fiya atun taka anī, dimig nem, kadir

nem, dagi odug nem ado, tenebur gaar kuī nem didenkesiyouf nigin megeir ifenēdin.

<sup>9</sup> Sipsip Naal ĩtāfiya uris anī dō fiya fara fen, age fe di, aya idi Negur nē od dale fen, feseya sā od anī wogō de di, didenkesin anidi neid meleidkanon alta farumen ailedin. <sup>10</sup> Idi aiteid odugem diweig diron, "Ereb ereb ganan nē Odug, fateul fen momoi, ere sain bun bagai, ō tenebur tamo kayau es woid fen, idi amā didenama-kesin nigin mala solo wenēdiyof?" <sup>11</sup> Age de di, idi mugu mugu kolos lalau meluk ifenēdin, agef fen, idi naal sain meluk tari de mog, dogo neid kabī tureid tar ado momoiya tamo kayau Negur igirnēdin ganan, idi age difedin gen didenkesiya kisi falauf nigin irokenēdin.

<sup>12</sup> Aya ĩtāfiya uris anī dō fiya fara fel mog, ailen. Age fe di, mimī odug wō yen. Gaa gugum kel fen, wau gudū fiya nē gabar meme siwi nem iwaya gen karos kelen. Ogō oditekei naud giriya gen falei felen. <sup>13</sup> Age fe di, saa ilun barisa tenebur kuku ren, are aa fig faat dobi yau totolem yoū fe di, kuku redig gen age fen.

<sup>14</sup> Saa, pepa kori fiya gen iwaikelen, agef fen, arei ganan ado nuyo ganan, dogo neid modoū ditoraran.

<sup>15</sup> Age fe di, tenebur nē king, tamo yeneid adodo, kusī mudur, safina musei adodo, megeir adodo ado, ferfer ganan ado tamo kafī fiya sā bun difaref ganan, kuren ado arei nē sa atun diminanan. <sup>16</sup> Idi arei ado sa diweig dirokenēdin, "Tetenaman kubūg fen, ĩ king nē sia bun ibodok anī nawa ado Sipsip Naal nē didi bun tamal unokolnamāg! <sup>17</sup> Ere nigin, idi neid didi nē naa odug mogo isin, anī nigin, aim ifareya kisi feleya?"

### Israel Tamo Kayau 144,000 Bun Uris Dinon

**7** Anī bure fele di, aya engel aiwa adodo, teneub idikeleya uyu uyu aiwa adodo bun, difar fen, teneub uyu uyu aiwa adodo nē yau, yau takam teneub be, maaī be, aa taka bun to fū fouf nigin kafī difel mog, ailen. <sup>2</sup> Age afe fen, aya engel taka mata ibodōya Negur nē ĩtāfiya uris ado gaa iseyan ise mog, ailen. ĩ engel aiwa adodo teneub ado maaī daū fiya nē megeir ifenēdin anidi, ait odugem iweig irokenēdin: <sup>3</sup> "Ā teneub be, maaī be, aa taka fau mog to daūg, amā neda Negur nē ferfer demeid bun ĩtāfiya uris manol len." <sup>4</sup> Age ye di, aya idi ĩtāfiya nē uris dinon anidi ganī anī karī aun, are 144,000 idi Israel ibor ganan bun teme-leid.

<sup>5</sup> Juda nē ibor bun tamal 12,000 are ĩtāfiya uris dinon, Ruben nē ibor bun tamal are 12,000,

Gad nē ibor bun tamal are 12,000,

<sup>6</sup> Aser nē ibor bun tamal are 12,000,

Naftali nē ibor bun tamal are 12,000,

Manase nē ibor bun tamal are 12,000,

<sup>7</sup> Simeon nē ibor bun tamal are 12,000,

Lewi nē ibor bun tamal are 12,000,

Isakar nē ibor bun tamal are 12,000,

<sup>8</sup> Sebulun nē ibor bun tamal are 12,000,

Josef nē ibor bun tamal are 12,000,

Benjamin nē ibor bun tamal are 12,000.

### Guru Fiya Mala Odug Kolos Lalau Meluk Difonundin

<sup>9</sup> Anĩ bure fele di, aya lo afen, aya wageun an guru fiya mala odug bagai, taka nem iwesleya kisi feleya sã, idi teneub ganan bun, ibor ganan bun, tamo kayau ganan bun ado, od fire fire ganan bun temeleid, idi king nẽ sia wagen ado Sipsip Naal wagen difaren. Idi kolos lalau meluk difoun ken, pam boge anã boge gen anĩ imedim guri difen. <sup>10</sup> Age de fen, idi aiteid odugem diweig diron:

“Kel gei fiya are  
neda Negur king nẽ sia bun ibodok ado  
Sipsip Naal nẽ.”

<sup>11</sup> Engel ganan, king nẽ sia ado, mudur adodo ado, ereb mata ibodõya aiwa adodo salili difiyeĩd difar fen, king nẽ sia wagen neweid lẽ kuku de fen, Negur yana dalesen. <sup>12</sup> Idi diron:

“Momo!  
Yana yaleseya, fula fiya medeĩya,  
kisi biya, de fiyẽya, yana odug,  
megeir ado, total are  
neda Negur bun gai gai ibodkalauf.  
Momo!”

<sup>13</sup> Age de di, mudur adodo takam aya to fiyan, “Idi eneidi kolos lalau meluk difonun are nanidim, idi nainenem disin?”

<sup>14</sup> Aya ĩ arokenen, “Tamo biya, õ keleĩ.”  
Age au di, ĩ irokanan, “Eneidi are darau, kafĩ fiya odug bun temeleid disin. Idi dogo neid kolos meluk Sipsip Naal naud nem kulo dife di, lalaun. <sup>15</sup> Anĩ nigin, “idi Negur nẽ king nẽ sia wagen difar fen, yogon tempel bun gaa ado bõ ganan aruna daledig. Age dife di, ĩ king nẽ sia bun ibodok anim yogon salafat biraraũ fe fen, kerũ fediyouf.

<sup>16</sup> Idi baban to naũ fediyouf,  
to naan ail fediyouf.

Gaam be, ereb uruwa adom,  
baban to isaĩnẽdiyof.

<sup>17</sup> Ere nigin, Sipsip Naal king nẽ sia atun ifaref inim, dogo neid lo fiya tamo ibodõf.

Ĩ idi mata ibodõya nẽ naan warur bun gurif iroulediyof.

Age fe di, Negur ĩ idi meleid bun tamal maruid ganan waĩ falauf.”

### Ītãfiya Uris Namba Sewen Ado Aa Gaula Sumeĩ Biya Nẽ Gol Beĩ

**8** Sain Sipsip Naal ĩtãfiya uris namba sewen anĩ fara fele di, saa ilun hap aua age fiya karasã sã mutũ bagai yenen.

<sup>2</sup> Age fe di, aya engel sewen Negur wagen difaren anidi, taur sewen ifenẽd mog, ailen.

<sup>3</sup> Engel taka ĩ, aa gaula sumeĩ biya nẽ gol beĩ ado isi, alta bun ifaren. Ī aa gaula sumeĩ biya musei, momoiya tamo kayau ganan neid kosẽ ado, king nẽ sia wagen gol alta bun sesewi fouf nigin difenen. <sup>4</sup> Aa gaula sumeĩ biya nẽ kaau, momoiya tamo kayau neid kosẽ

ado, engel ima bun tamal Negur wagen iselen. <sup>5</sup> Agef fen, engel aa gaula sumeĩ biya nẽ beĩ yale, alta bun tamal yã ife fen, tenebur iran, age fe di, kolimeĩ gudũya, gurũya odug, kolimeĩ filiya ado, mimĩ wõ yen.

### Taur

<sup>6</sup> Age fe di, engel sewen taur sewen ado, taur wese fiya nigin dodok difen.

<sup>7</sup> Engel uyulil yogon taur wese fe di, uyẽ ais, yã naud ado bagu fen, isi di, tenebur iraran, age fe di, teneub tekelei faraf towo fiya gen anĩ taka adok isaikelen, aa ganan faraf towo fiya gen anĩ taka adok isaikelen, agef fen, fisir mata ganan isasaikelen.

<sup>8</sup> Engel uyu wõ yen anĩ dõ fiya yogon taur wese fe di, ereb arei odug gen yã fitotoleya ado maaĩwõ iran. Maaĩ faraf towo fiya gen anĩ taka, naud falei felen, <sup>9</sup> maaĩwõ ereb ereb mata ibodõya faraf towo fiya gen anĩ taka gare den, agef fen, waag ganan faraf towo fiya gen anĩ taka daũ felen.

<sup>10</sup> Anĩ dõ fiya engel taka yogon taur wese fe di, barisa odug yal gen kaur fen, saa ilunem, naan faraf towo fiya gen anĩ taka bun ado, naan warur anidi bun kubũ yen. <sup>11</sup> Barisa anĩ nẽ yana Dirikeĩ. Naan faraf towo fiya gen anĩ taka dirikeĩ kele di, tamo kayau musei, naan dirikeĩ kelen anĩ bunem gare den.

<sup>12</sup> Anĩ dõ fiya engel taka yogon taur wese fe di, gaa faraf towo fiya gen anĩ taka, ogõ faraf towo fiya gen anĩ taka ado, barisa faraf towo fiya gen anĩ taka yũ di, idi ganan faraf towo fiya gen anĩ taka gugum kelen. Naa faraf towo fiya gen anĩ taka lalan sa kelen, agef fen, bõ faraf towo fiya gen anĩ takag age fen.

<sup>13</sup> Aya lo afe mog, aya webi taka karĩ au mog, ilun fatutu ye fen, ait odugem iweig iron, “Malalon! Malalon! Malalon tenebur dibodok anidi bun, ere nigin, engel towog mogo taur ait wese difou fenẽ!”

**9** Engel anĩ dõ fiya engel taka yogon taur wese fe di, aya barisa taka saa ilunem tenebur kubũ yen anĩ ailen. Barisa are ku isil idĩya sã nẽ ki anĩ ifenen. <sup>2</sup> Ī ku isil idĩya sã anĩ kã fele di, kaau are yã odug kũ fiya modoũ bun tamal gen fã yen. Ku isil idĩya sã bun tamal kaau anim, gaa ado saa gugum kelen. <sup>3</sup> Age fe di, kaau namen tamal, totobi tenebur wowã den, are idi neid megeir, tenebur ābei neid megeir gen ifenẽdin. <sup>4</sup> Idi tenebur tamal fisir be, ereb aayũ be, aa taka to daũ difouf, anĩ ere, tamo kayau idi Negur nẽ uris demeid bun sã anidi dogol daũ difediyof nigin irokenẽdin. <sup>5</sup> Idi tamo idenkesiya nẽ megeir to ifenẽdin, anĩ ere, idi ogõ faif bun darau dogol difenẽdiyof nigin megeir ifenẽdin. Age fe di, idi neid darau arar, ābei tamo garũ fe di, darau arar iledig gen. <sup>6</sup> Naa anidi bun tamo laa dimirẽf, anĩ ere, to dilouf. Idi laa orodiyouf, anĩ ere, laa to gurug fediyouf.

<sup>7</sup> Totobi are hos kusĩ bun ileyã nẽ gegen. Idi neid mudureid bun, ereb gol teter gen kurũ difedin, idi neid neweid tamo neweid gen. <sup>8</sup> Nedi fatiyeid kayau fatiyeid gen, agef fen, waileid are laion willa gen. <sup>9</sup> Nedi siot kapa are ain nẽ siot kapa gen, agef fen, idi neid wayeid furũya are hos musei ado karis kusĩ bun gududu de

fen, gou redig gen. <sup>10</sup> Idi ibud ado waileid ābei neid gen, agef fen, idi ibud nem ogō faif bun tamo kayau darau difenēdiyof nigin megeir adon. <sup>11</sup> Idi uyu iroukenēdiya nē king ado, are ku isil idīya sā nē engel, in yana Hibru od nem are Abadon, Grik od nem are Apolion. †

<sup>12</sup> Morō odug uyulil anī bure felen, age fe di, morō odug uru are fau disif.

<sup>13</sup> Engel namba sigis anī yogon taur wese fe di, aya ait taka gol alta Negur wagen ifaref anī nē karat aiwa adodo bunem wowā yeid mog, karī aun. <sup>14</sup> Ait are engel namba sigis taur ado anī irokenen, “Engel aiwa adodo Yufretis naan odug bun difofan anidi fara woidle.” <sup>15</sup> Age ye di, engel aiwa adodo are aua, naa, ogō, yar enei bun bagai, tamo teneub ganan bun fara fiya towo anī taka adok didenkesiyof nigin, dodok fedin anī folō feledin. <sup>16</sup> Hos teten kusī bun ileya nē tamo anidi are 200 milion. Aya dogo neid namba karī aun.

<sup>17</sup> Aya malau seleulā kurā fiya bun, hos adodo tamo hos tetedin dibodon anidi eig fiya ailedin: Idi neid siot kapa are, yā giriya gen, maaī gegē gen ado, bailuya salfa gen. Hos mudureid are, laion mudureid gen, agef fen, idi eweid bunem yā, kaau ado, salfa wowā yen.

<sup>18</sup> Tamo tenebur ganan faraf towo fiya gen anī takagan, sane towo anim, yā, kaau ado, salfa idi eweid bun wowā yen anim didenkesin. <sup>19</sup> Hos idi neid megeir are eweid bun ado ibud bun ibodon, ere nigin, idi neid ibud are gogour gen fen, mudureid anim tamo kayau darau difenēdidig.

<sup>20</sup> Tamo kayau tunī ganan, sane eneidim to didenkesin anidi, idi imedim dinon anī to ditor ken, waud to falei yen. Idi kaa sesen yeneid yaleseya to ditor ken, gol, silwa, bras, meein ado, aa nē idegēya waitou, are lo fiya, karīya be, iyōya kisi felya sā anidi yeneid yaleseya itorōya sā. <sup>21</sup> Idi tamo yukesiya, dogo neid idegēya kosēya, dogo neid noli tobonunā be, dogo neid bē yaleya tobonunā nigineg waud to falei yen.

### Engel Ado Buk Kori Fiya Naal

**10** Anī bure fele di, aya engel megeir ado taka saa ilunem isi mog, ailen. Ī lalom silef fen, yogon mudur bun walol ado. In nawa gaa gen, agef fen, yogon ye are tor yā bobo reya gen. <sup>2</sup> Ī buk kori fiya naal taka ima bun fara feleya iroun. Ī ye biyalē maaī bun iten ken, ye kilē teneub bun itenen. <sup>3</sup> Agef fen, ĩ laion ninirā ye gen ken, ait odugem iweig iron. Sain ĩ iwegin, kolimeī gudūya sewen neid aiteid wogō den. <sup>4</sup> Kolimeī gudūya sewen wogō de di, aya anī atotau fenē age afen, anī ere, aya ait taka saa ilunem eig ye mog, karī aun, “Ereb kolimeī gudūya sewen wogō den anī bun itāfiya uris uno fen, ō to utotauf.”

<sup>5</sup> Age ye di, engel maaī bun ado teneub bun ifar mog ailen, are ima biyalē saa ilun yalesen. <sup>6</sup> Agef fen, engel ĩ, Negur gai gai mata ibodkeleya, saa ado erēb erēb ganan anī bun difaref, teneub ado erēb erēb ganan anī bun difaref, maaī ado erēb erēb ganan anī bun difaref inodin anī yana nem, wau kuturol fen, iron,

† Abadon ado Apolion nē gariya, Daū Fiya Tamo.

“Foiya nē sain sā! <sup>7</sup> Anī ere, engel namba sewen anī yogon taur wese foug naa bun, Negur nē waa, ĩ yogon ferfer profet irokenēdin kilei, agef wō ye kisi falauf.”

<sup>8</sup> Anī bure fele di, ait saa ilunem aya irokana di, karī aun, are baban irokanan, “Ule, engel maaī ado teneub bun ifaref anī ima bun, buk kori fiya fara feleya irouf anī wale,” yen.

<sup>9</sup> Age ye di, aya engel garan ele fen, buk kori fiya naal anī ifanauf nigin arokenen. Ī aya irokanan, “Are wale wō wakas. Are ō namē bun dirikeī youf, anī ere, ō awā bun are nin te gen dan yōf.” <sup>10</sup> Aya buk kori fiya naal engel ima bun tamal ale on. Are neu awau bun nin te gen dan fiyan, anī ere, aya akalaisile di, nameun dirikeī fiyan. <sup>11</sup> Age afe di, idi aya dirokanan, “Ō tamo kayau musei, teneub musei, od musei ado, king musei nigin, baban profet od wogō wouf.”

### Od Megeir Fiya Nē Isennēya Tamo Uru

**11** Aya sisi fiya nē tibog gen werī taka ifana fen, irokanan, “Ule fen, Negur nē tempel ado alta sisi wo fen, Negur yana an ganim dalesedig anī uwes.

<sup>2</sup> Anī ere, tempel fofomala anī utor. Are to sisi wo, ere nigin, are haiden ifenēdin. Idi foti-tu ogō bun taun fateul anī lai difalauf. <sup>3</sup> Age dife di, aya neu od megeir fiya nē isennēya tamo uru megeir afenēdi di, idi 1,260 naa anidi bun wau gudū fiya nē gabar difoun ken, profet od kurō difesiyof.” <sup>4</sup> Eneidi are oliv aa uru ado lam tutur uru, tenebur nē Odug wagen difaref. <sup>5</sup> Takam idi darau ifenēdiya nigin age foug are, yā eweid bunem wō ye fen, idi neid kiwai tar oditekei yakur falauf. Aibem taka idi darau ifenēdiyou fenē age foug, are agef laa foug bagai. <sup>6</sup> Tamo eneidi saa katī feleya nē megeir ado nigin, idi profet od wogō douf sain, uyē to isiyof, agef fen, idi naan falei fe di, naud wōya nigin megeir ado fen, erēb sain orodif kilei, idi erēb sane fire fire bunem teneub yūya nē megeir ado.

<sup>7</sup> Idi Negur nē od kurō fesiya bure difele di, gaar kuī anī ku isil idīya sā bunem ulō yeis fen, idi geid kusī de, wal feid fen, idenkesiyof. <sup>8</sup> Idi neid bouweid buru taun odug anī nē naabur yenēf, taun are yaab od bunem Sodom ado Isip dedig, an nedi Odugeg aa tetek bun dukusin. <sup>9</sup> Tamo kayau fire fire bun tamal, ibor fire fire bun tamal, od fire fire bun tamal ado, teneub fire fire bun tamal, tamo kayau idi, naa towo ado naa taka atun bun, nedi bouweid buru dile fen, mumā difouf nigin to yo douf. <sup>10</sup> Tamo kayau tenebur dibodok anidi, idi nigin waud al fe di, sifa dino fen, idi abob safina ege luwa difenēf, ere nigin, profet uru eneidi, idi tenebur dibodok anidi darau difenēdin.

<sup>11</sup> Anī ere, naa towo ado naa taka atun anī bure fele di, mata neseya nē uur Negur bunem idi namedin ilen, age fe di, idi fafā de difaren. Age dife di, idi diledin are kumī tererē den. <sup>12</sup> Anī bure fele di, idi saa ilunem ait odug eig ye irokeneīd mog, karī den, “Ilun ein useg,” yen. Age ye di, idi neid kiwai lo difeid mog, idi lalo bunem saa ilun diselen.

<sup>13</sup> Sain anī bun bagai, mimī odug wō ye di, taun anī bun ten tekelei adok daū felen. Sewen tausen tamo

kayau mimī anim idenkesin. Age fe di, idi gareya sā are kumī tererē de fen, saa ilun nē Negur fula fiya me-deīya difenen.

<sup>14</sup> Morō odug uyu ilen anī dō fiya bure fele di, morō odug anī dō fiya mogo melsā bagai isiyou fenē.

### Engel Taur Namba Sewen Anī Wese Fen

<sup>15</sup> Engel namba sewen anī yogon taur wese fe di, saa ilun ait odug wowā ye fen, diron:

“Tenebur nē tano are, neda Odug ado yogon Kristus nē tano wō yen,

age fe di, ī gai gai lo fiya nigin anī nē mudur ibodōf.”

<sup>16</sup> Age de di, tuwenti-fo mudur adodo, Negur wagen dogo neid king nē sia bun dibodon wageidlē kuku de fen, Negur yana dales, <sup>17</sup> diron:

“Odug Negur saa ilun nē kusī tamo guri weid uyu oundig anī,

ō gama ubodok, kulu ubodon, amā ō de mayok, ere nigin, ō ogon megeir odug wale fen,

lo fiya nigin king wō won.

<sup>18</sup> Teneub ganan waud sanen, anī ere, ogon didi mogo isin.

Tamo gare den anī es fediya sain mogo isin, ogon ferfer profet, ogon tamo kayau fateul ado, idi ogon yanā nigin anini den anidi nanaal ado odudug,

mala solo ifenēdiya sain mogo isin,

idi teneub daū difef anidi daū fediya sain mogo isin.”

<sup>19</sup> Anī bure fele di, Negur nē tempel saa ilun kā fele di, yogon tempel namen yogon bar itenēya nē bogis wō yen. Age fe di, kolimei filiya, gurūya odug, kolimei gudūya, mimī ado, uyē ais ado odug wō yen.

### Kayau Ado Gogour Odug

**12** Uris odug fire bagai saa ilun wō yen. Kayau taka gaa ifoun kel fen, yogon ye farumen ogolam ado, yogon mudur bun barisa tuwelf nē teter kurū fen.

<sup>2</sup> Ī bou ado fen, keso gō fiya sain melsā di, darau nigin kaī yen. <sup>3</sup> Age fe di, uris takag saa ilun wō yen. Gogour giriya odug bagai mudur sewen, karat ten ado, teter sewen mudur sewen bun difaren ado wō yen. <sup>4</sup> Yogon ibum barisa fara fiya towo anī taka saa ilun waif, tenebur iraran. Gogour odug anī kayau keso gō fiya sain melsā anī wagen ifaren, are ī yogon keso gō falaisi di, itobouf nigin age fen. <sup>5</sup> Kayau keso taka gō fen, are keso monog, ī teneub ganan ain manig nem ulum iro-kenēdiyof. Age fe di, yogon keso kaisā bagai garar fe yale, Negur ado yogon king nē sia wagen irouselen.

<sup>6</sup> Kayau, Negurem modoū dodok fenen nē gerere tuan iya ilen, an ī Negurem 1,260 naa kulatun fiyēf.

<sup>7</sup> Agef fen, saa ilun kusī wō yen. Maikel yogon engel geid, gogour odug geid kusī den. Age fe di, gogour odug, yogon engel geid, abag idi geid kusī den. <sup>8</sup> Anī ere, gogour odug in engel geid, idi neid megeir kisi feleya sā, anī nigin, idi saa ilun nedi modoū ditoron.

<sup>9</sup> Gogour odug bagai are dale diran, are gogour kulu tamal bagai, anī Devil be, Satan dedig, ī teneub ganan

idegnēdidig. Ī tenebur dale dira ken, yogon engeleg ī geid diraran.

<sup>10</sup> Age fe di, aya saa ilunem ait odug eig ye mog, karī aun:

“Gama neda Negur nē kel yaleya, megeir, tano ado, yogon Kristus nē total mogo isin.

Ere nigin, ī neda turada tar bouweid yūya od irōdig, ī neda Negur wagen, gaa ado bō, idi bouweid yūya od irōdig,

are mogo dale diran.

<sup>11</sup> Idi Sipsip Naal naud bunem ado, dogo neid Jesus nigin od wogōya bunem ī wal difiyen.

Idi dogo mata ibodōya nigin kisi fatuk to dale fen, laa uyu ditoron.

<sup>12</sup> Anī nigin, saa ilun ō ado, an ufaregef ā, wauī kulī ye!

Anī ere, teneub ado maaī ā, meleilon ado, ere nigin, Satan mogo ā bun isilen!

Seye ī bun isokosef, ere nigin, ī keleī, yogon sain mogo modegef.”

<sup>13</sup> Sain gogour odug ī tenebur diran anī ile fen, ī kayau kesu monog gō fen anī iruf ilen. <sup>14</sup> Kayau are, gere-re tuan modoū ī nigin dodok fenen anī bun fatutu ye ilauf nigin, webi odug nē waye uru difenen, an kayau gogour odug anim to ironēf nigin, yar towo ado yar taka atun, kayau anī kulatun difiyēf. <sup>15</sup> Age fe di, gogour ī awa kurenem, naan odug gen, naan foula fen, are kayau anī wal fiye ken, kuwei bun yale irousilauf nigin age fen. <sup>16</sup> Anī ere, teneub kayau isenne ken, awa āā ye fen, gogour odug awa kurenem naan odug foula fen anī yakasin. <sup>17</sup> Age fe di, gogour odug kayau nigin fatuk bagai name fen, kayau nē ibor tar fau dibodok anidi ganan geid kusīya nigin ilen, idi Negur nē itāfiya dō de fen, Jesus nē biya od dirouf anidi.

**13** Agef fen, gogour odug maaī yerin ifaren.

### Gaar Kuī Maaī Namenem Ulō Yesin

Age fe di, aya gaar kuī taka maaī namenem ulō yeis mog, ailen. Ī karat ten ado, mudur sewen ado fen, ī yogon karat ten bun teter adodo fen, mudur ganan bun Negur kono fiya nē yana ado. <sup>2</sup> Gaar kuī aya ailen are lepat † gen, anī ere, yogon ye are bea nē ye gegen, agef fen, awa laion nē gen. Gogour odug yogon megeir, yogon king nē sia ado, total odug, gaar kuī ifenen. <sup>3</sup> Gaar kuī nē mudur taka are dū di, laa fou fenē gen yenen, anī ere, dū di, laa fou fenē gen yenen are baban biya len. Teneub ganan terē de fen, gaar kuī dō difen. <sup>4</sup> Tamo idi gogour odug yana dalesen, ere nigin, ī gaar kuī megeir ifenen. Age de fen, idi gaar kuīg yana dales fen, diron, “Aim anī gaar kuī gen? Aim anī ī ado kusī yalesauf?”

<sup>5</sup> Gaar kuī ī, yogo seli kulō fiya nē od ado Negur nigin kono fiya nē od wogō youf nigin sigor ifen ken, foti-tu ogō bun kabī yalouf nigin megeir ifenen. <sup>6</sup> Gaar kuī ī Negur kono fiyēf nigin, Negur yana, Negur nē ibodōya modoū ado, idi saa ilun dibodok anidi bun bou yūya

† *Lepat are fus kuī odug gen.*

od wogō youf nigin awa kamen. <sup>7</sup> Gaar kuī ī, Negur nē tamo kayau geid kusī de fen, idi wal fediyouf nigin megeir ifenen. Agef fen, ī, ibor ganan, tamo kayau ganan, od fire fire ganan ado, teneub ganan nē mudur ibodōf nigin megeir ifenen. <sup>8</sup> Tenebur dibodok anidi ganan gaar kuī yana dalesauf, are idi, saa teneub ado kare fen sain bunem isi sain enei bun, idi yeneid Sipsip Naal dukessin anī nē mata ibodōya nē buk bun to itoton anidim age difouf.

<sup>9</sup> Taka ī weder adouf, utornēg len, ī karī youf.

<sup>10</sup> Taka ī kalabus bun ileya nigin igirnēf, ī kalabus bun ilauf.

Taka ī dimig nem dukesiyouf nigin igirnēf, dimig nem ī dukesiyouf.

Enei wō youf sain bun, Negur nē tamo kayau feseya sā totol difar fen, momoiya kafī difel dirouwauf.

### Gaar Kuī Teneb Bunem Ulō Yesen

<sup>11</sup> Anī bure fele di, gaar kuī taka teneburem ulō yeis mog, ailen. Ī sipsip naal gen karat uru ado, anī ere, ī gogour odug gen wogō yedig. <sup>12</sup> Ī gaar kuī uyulil ulō yesin anī lof mog, yogon megeir ganan yale fen, kabī yalen. Agef fen, ī, teneub ado idi tenebur difaref anidi ganan, gaar kuī uyulil ulō yesin, are dū di, laa fou fenē gen yenen anī baban biya len, ī yana dalesauf nigin nugo fedin. <sup>13</sup> Agef fen, ī uris memelik odug inodin, ī tamo kayau lo de mog, age fe di, yā saa ilunem tenebur isin anīg age fen. <sup>14</sup> Ī gaar kuī uyulil ulō yesin anī lof mog, megeir yale fen, memelik inodin nigin, ī tenebur difaref anidi idegnēdin. Ī, gaar kuī, are dimig nem dū di, baban biya len anī yana dalesauf nigin, idi anī nē malakanon dinouf nigin irokenēdin. <sup>15</sup> Ī gaar kuī uyulil ulō yesin anī malakanon mata ifenēya nē megeir ifenen, anī bunem, malakanon are sā wogō yen, ī age fe di, idi malakanon anī yana yaleseya ditoron anidi ganan didenkesin. <sup>16</sup> Gaar kuī dumen ulō yesin are, tamo kayau ganan, nanaal ado odudug, safina ado ado maleg, kafī fiya sā tamo ado ferfer, uris taka imeid biyalē be, demeid bun dalouf nigin nugo fedin. <sup>17</sup> Age fe di, aibem taka to na yale fen, to na sur fouf, ī gaar kuī nē uris adouf anī dogol, uris are gaar kuī nē yana be, yogo yana nē namba.

<sup>18</sup> Kisi biya adouf are, enei keleī youf. Are taka ī karīya biya adouf, ī utornēg len, gaar kuī nē namba iwesauf, ere nigin, namba are tamo nē. In namba are 666.

### Sipsip Naal Ado 144,000 Tamo

**14** Anī bure fele di, aya lo afen, aya wageun Sipsip Naal Saion Arei bun 144,000, yogon yana ado yogon tama nē yana demeid bun itotoyan anidi, ī geid difaren. <sup>2</sup> Age afe fen, aya ait taka saa ilunem, naan fatuk wī ye fen, gou redig gen ado, kolimei gudūya odug gen karī aun. Ait aya karī aun are, harp kodēya tamo harp kodē dedig gen. <sup>3</sup> Age de fen, idi, king nē sia, ereb mata ibodōya aiwa adodo ado, mudur adodo wagedin seg mata dalen. Aibem taka seg anī keleīya kisi feleya sā, 144,000 idi tenebur tamal kel gei fedin ani-

dim dogol. <sup>4</sup> Eneidi are kayau geid yen ken, amuyē inoya sā anidi, ere nigin, idi dogo nigin karētut bagai dibodon. Idi Sipsip Naal narib ile di, idi dō de diyōdig. Idi tamo ganan atun kel geif fen, faat uyulil yūya gen, Negur ado Sipsip Naal bun sesewi fedin. <sup>5</sup> Idi sigoredin idegēya taka to wō yen, idi bouweid bun od taka sā.

### Engel Towo

<sup>6</sup> Anī bure fele di, aya engel taka ilun bagai fatutu ye mog, ailen. Ī idi tenebur dibodok anidi, are teneub ganan, ibor ganan, od fire fire ganan ado, tamo kayau ganan bun kurō fesiyouf nigin, mata ibodkeleya nē biya od ado ailen. <sup>7</sup> Ī ait odugem iron, “Negur anini wiyēg fen, ī fula fiya medēya wenēg, ere nigin, yogon es fiya nē sain mogo isin. Ī saa, teneub, maāf ado, naan warur inodin anī yana waleseg.”

<sup>8</sup> Anī dō fiya engel takam dō fiye ken, iron, “Ī kubū yen! Babilon Odug kubū yen, ī teneub ganan yogon seseirā tobonunā nē wain totol ifeneīd don.”

<sup>9</sup> Anī dō fiya engel takam dō fiyeīd fen, ait odugem iron, “Taka ī gaar kuī ado yogon malakanon yana yales fen, yogon uris dama bun be, ima bun yalouf, <sup>10</sup> īg Negur nē didi nē wain yāf, are mogo totol adok yogon didi nē kap bun fi felen. Ī engel fateul anidi ado Sipsip Naal meleid bun, salfa yā bobo reya bun darau yalouf. <sup>11</sup> Age fe di, dogo neid darau nē yākaau fā ye, gai gai agef ibodkalauf. Idi gaar kuī ado yogon malakanon yana dalesedig anidi be, aib taka yogon yana nē uris yalen ī, naa be bō, si inoya nē sain sā.” <sup>12</sup> Enei wō youf sain bun, Negur nē tamo kayau, idi Negur nē itāfiya dō de fen, Jesus nigin momoiya dirou kafī difelef anidi, feseya sā megeir difarauf bagai.

<sup>13</sup> Anī bure fele di, aya saa ilunem ait taka eig ye mog, karī aun, “Utot: Idi sain enei bunem ilauf ganan, Odug bun gare douf are el fediyouf.”

Awa Uurem irok, “Momoi, idi dogo neid kabī bun si dinouf, ere nigin, idi ereb age difen are ado dilauf.”

### Tenebur Saaf Kusu Fiya Sain

<sup>14</sup> Aya lo afen, aya wageun lalo lalau taka ado, lalo bun ibodon are tamo naal gen, <sup>†</sup> ī yogon mudur bun gol teter kurū fen, yogon ima bun dimig gunō waila ado irouf anī ailen. <sup>15</sup> Age fe di, engel taka tempel bunem isi fen, ī lalo bun ibodon anī ait odugem iweig irokenen, “Ogon dimig gunō waila ado wale fen, kokour wo, ere nigin, kokour fiya nē sain mogo isin, tenebur saaf kusu fiya nē are mogo mayol.” <sup>16</sup> Age ye di, lalo bun ibodon ī, yogon dimig gunō waila ado tenebur waīf fe di, tenebur saaf kokour fen.

<sup>17</sup> Engel taka, saa ilun oun tempel bunem isin, īg dimig gunō waila ado iroun. <sup>18</sup> Age fe di, engel takag, yā lo fedig anī alta bunem isi fen, ait odugem ī dimig gunō waila ado iroun anī iweig irokenen, “Ogon dimig gunō waila ado wale fen, tenebur tamal wain nē biya kuru wo, ere nigin, wain biya are mayol.” <sup>19</sup> Engel ī yogon dimig gunō waila ado anī tenebur waīf fen, wain

† Daniel 7:13

biya kuru fen, agef fen, ĩ Negur nē didi nē wain asi fiya modoū odug bun iraran. <sup>20</sup> Wain biya are, taun yerin wain asi fiya modoū bun asi difen, age dife di, naud wain asi fiya modoū bunem isin, are 300 kilomita meluk fen, wan ado hap mita ilun.

### Engel Sewen Teneub Daū Fiya Nē Sesen Sewen Adodo

**15** Anī bure fele di, aya saa ilun uris odug taka fire bagai ailen. Are engel sewen, idikeleya nē teneub daū fiya nē sesen sewen adodo, are idi idikeleya nē, ere nigin, idi bunem Negur nē didi idikalauf. <sup>2</sup> Age afe fen, aya ereb taka maaĩ galas nem dinon anī, yā ado bagu fiya gen ail fen, idi gaar kuĩ, yogon malakanon ado, yogon yana nē namba kusĩ bun wal difen anidi, maaĩ yerin difaren anī ailen. Idi Negurem harp ifenēdin anī guri de fen, <sup>3</sup> Negur nē ferfer, Moses nē seg ado, Sipsip Naal nē seg dalen:

“Odug Negur saa ilun nē kusĩ tamo guri weid uyu urredig anī,

ō agodig anī odug fen, mala yū yaleya.

Teneub ganan nē King,

ogon naab are madur fen, momoi bagai.

<sup>4</sup> O Odug, aim anī ō to kumĩ yo ken,

ō yanā bun fula fiya medeīya to inouf?

Ere nigin, ō dogol fateul.

Ogon tobonunā biya madur bagai are yaor won nigin,

teneub ganan disi fen,

ō wagen yanā dalesauf.”

<sup>5</sup> Anī bure fele di, aya lo afe mog, saa ilun oun tempel, Negur nē Od Kurō Fesiya nē Salafat Fateul, are kā fen. <sup>6</sup> Tempel namenem, engel sewen idi teneub daū fiya nē sesen sewen adodo anī ulō desin. Idi kolos lalau amuyē sā, medeīya difoun ken, idi akoreid bun gol let gu difedin. <sup>7</sup> Age dife di, ereb mata ibodōya aiwa adodo takam, gol beĩ sewen Negur mata faimud ibodokeleya nē didi isokoseya anī, engel sewen ifenēdin.

<sup>8</sup> Age fe di, tempel are, Negur nē fula fiya medeīya ado yogon megeir nē kaau isokose di, engel sewen neid teneub daū fiya nē sesen sewen anī fau bure feleya sā mog, taka nem tempel namen ileyā kisi feleya sā.

### Beĩ Sewen Negur Nē Didi Ado

**16** Anī bure fele di, aya ait odug taka tempel bunem engel sewen irokenēid fen, eig ye mog, karĩ aun, “Uleg, beĩ sewen Negur nē didi adodo anidi teneub bun fi weleg.” <sup>2</sup> Engel uyulil ile fen, yogon beĩ teneub bun fi fele di, guruma sane darau odug bagai anī, tamo kayau gaar kuĩ nē uris ado fen, yogon malakanon yana dalesedig anidi bun, wowā yen.

<sup>3</sup> Anī dō fiya engel taka, yogon beĩ maaĩ bun fi fele di, maaĩ anī laa tamo nē naud gen falei fen, age fe di, ereb ereb maaĩwō mata dibodon ganan gare den.

<sup>4</sup> Anī dō fiya engel taka, yogon beĩ, naan odudug ado naan warur anidi bun fi felen, age fe di, naud falei feledin. <sup>5</sup> Age fe di, aya engel naan lo fedig anī eig ye mog, karĩ aun:

“Ō gama ubodok, kulu ubodon, ō Fateul Bagai, ō madur bagai, ere nigin, ō mogo ago es won.

<sup>6</sup> Idi ogon tamo kayau ado ogon profet didenkeis fen, dogo neid naud fi difelen,

anī nigin, ō idi naud yōya nigin wenēdin, are idi yōya kisin bagai wenēdin.”

<sup>7</sup> Age ye di, aya alta eig ye mog, karĩ aun:

“Momoi, Odug Negur saa ilun nē kusĩ tamo guri weid uyu urredig anī,

ogon es fiya are, momoi fen madur bagai.”

<sup>8</sup> Anī dō fiya engel taka, yogon beĩ gaa bun fi fele di, gaa tamo kayau yā nem ifalegnēdiyof nigin megeir ifenen. <sup>9</sup> Idi uruwa total bagai bunem ifalegnēdi di, idi, Negur teneub daū fiya nē sesen eneidi lo fedidig anī, yana kono difen, age de fen, idi waud falei ye fen, Negur yana yaleseya ditoron.

<sup>10</sup> Anī dō fiya engel taka, yogon beĩ gaar kuĩ nē king nē sia bun fi fele di, yogon tano gugum kelen. Tamo idi darau nigin baleid mū de fen, <sup>11</sup> dogo neid darau ado gurumeid nigin, saa ilun nē Negur kono difen. Anī ere, idi ereb sane age difen anī to ditor ken, waud to falei yen.

<sup>12</sup> Anī dō fiya engel taka, yogon beĩ Yufretis naan odug bun fi fele di, naan are, gaa iseyan tamal king disiyof nē naab dodok fiya nigin, gere kelen. <sup>13</sup> Anī bure fele di, aya kaa sesen towo felĩ gen, idi gogour odug awa kurem, gaar kuĩ awa kurem ado, idegēya profet awa kurem ulō deis mog, ailen. <sup>14</sup> Idi kaa sesen nē uur anidim memelik nē uris dino fen, idi teneub ganan nē king ganan bun dile fen, Negur saa ilun nē kusĩ tamo guri feid uyu urredig anī nē naa odug bun, idi kusĩ bun guru difouf nigin gou difedyouf.

<sup>15</sup> Jesus irok, “Lo welegei, aya bē tamo gen asiyouf! Taka ĩ mulaĩ yenēya sa ken, yogon kolos sirin ado ibodok are, ĩ el fiyek, ere nigin, ĩ gemū to ile di, yogon mama to dilouf.”

<sup>16</sup> Age de fen, idi king, Hibru od nem Amagedon dedig nē an guru difouf nigin gou difedin.

<sup>17</sup> Anī dō fiya engel taka, yogon beĩ ilun owōbē fi fele di, tempel namenem king nē sia bunem ait odug wō ye fen, iron, “Gama mogo bure felef!” <sup>18</sup> Age fe di, kolimeĩ filiya, gurūya odug, kolimeĩ gudūya ado, mimĩ odug wō yen. Tamo tenebur difar mog, mimĩ odug age fiya taka to wō yen, mimĩ are gai odug bagai. <sup>19</sup> Taun odug Babilon are faraf towo fen, agef fen, teneub ganan nē taun daū feledin. Negur ĩ Babilon Odug nigin weder fokōf fen, kap yogon didi barikā nē wain isokosen anī ifenen. <sup>20</sup> Nuyo ganan sa kele di, areig ilediya kisi feleya sā. <sup>21</sup> Saa ilunem uyē ais ado odug, teke tekelei 50 kilogram age fiya tamo bun kuku ren. Age fe di, idi uyē ais adom daū fedin nigin de fen, Negur kono difen, ere nigin, daū fiya are, gai sane bagai.

### Kayau Gaar Kuĩ Teten Ibodon

**17** Engel sewen beĩ sewen adodo anī takam isi fen, aya irokanan, “Usi, aya kayau bouwa na sur fedig odug, ĩ naan musei teten ibodōdig anī nē kafĩ fiya

afelnöf. <sup>2</sup> Tenebur nē king, ī geid seseirā tobonunā di-no di, tamo kayau tenebur difaref anidi, yogon seseirā tobonunā nē wain bunem, idi meleid waī yen.”

<sup>3</sup> Age ye fen, engel ī Awa Uur bunem aya gerere tuan yale irouleyan. An aya, kayau, gaar kuī giriya, bouwa bun kono fiya yeneid barikā, mudur sewen ado, karat ten anī teten ibod mog, ailen. <sup>4</sup> Kayau ī, kolos giriya tu releya medeīya ado giriya bagai ifoun ken, gol, meein meli bagai ado, maaī tuwa meli bagai pel naki yen. ī gol kap, ninir safineid ado yogon seseirā tobonunā nē sisik isokosen anī imam iron. <sup>5</sup> Waa nē yana are, yogon dama bun ditoton:

BABILON ODUG

KAYAU BOUWEID NA SUR FIYA ADO

TENEBUR NINIR IBODOK ANIDI NEID SINA.

<sup>6</sup> Aya, kayau, Negur nē tamo kayau neid naudeid ado, idi Jesus nē od kurō difenin anidi, nedi naudeid yokon, mala waī ye mog, ailen.

Aya kayau anī ail fen, fatuk bagai terē aun. <sup>7</sup> Age afe di, engel aya irokanan, “Ō ere nigin terē wof? Aya, ō, kayau nē waa ado, gaar kuī kayau anī teten ibodōdig, ī mudur sewen ado fen, karat ten ado anī nē waa anī faded ayōf. <sup>8</sup> Gaar kuī ulen are, kulu ibodon, gama ibodōya sā, agef fen, ī ku isil idīya sā bunem ulō yeis fen, yogo daū falauf bun ilauf. Tamo kayau tenebur dibodok anidi, saa teneub ado kare fen sain bunem isin, idi yeneid mata ibodōya nē buk bun to itoton, idi gaar kuī anī dile fen terē douf, ere nigin, gaar kuī ī kulu ibodon, gama ibodōya sā, agef fen, fau dum isiyouf.

<sup>9</sup> “Enei keleīya nigin, kisi biya adouf. Mudur sewen are, arei mudu sewen kayau teten ibodōdig anī. <sup>10</sup> Idig king sewen anidi. Faif idi kuku ralaisin, taka fau ibodok, taka fau isiya sā. Anī ere, ī isiyouf are, sain naal bagai ibodōf. <sup>11</sup> Gaar kuī kulu ibodon, gama ibodōya sā, are ī namba eit king, ī sewen anidi nē taka, ī yogo daū fiya bun ilauf.

<sup>12</sup> “Karat ten ō ulen are, ten king idi tano fau yaleya sā anidi, anī ere, idi gaar kuī geid, aua tekelei king nē megeir dalouf. <sup>13</sup> Idi kisi tekelei ado fen, dogo neid megeir ado total, gaar kuī difenēf. <sup>14</sup> Idi Sipsip Naal geid kusī douf, anī ere, Sipsip Naal idi kusī bun wal fediyouf, ere nigin, ī odug neid Odug ado king neid King. Idi ī iweignēdin anī, igirnēdin anī, feseya sā dō difen anidi, ī geid difarauf.”

<sup>15</sup> Age ye fen, engel aya irokanan, “Naan, kayau bouwa na sur fedig ī anī teten ibodon, ō ulen are, tamo kayau, guru fiya odug, teneub ganan ado, od fire fire ganan. <sup>16</sup> Karat ten ō ulen ado gaar kuī, idi kayau bouwa na sur fedig anī to orodiyouf. Idi ī daū difiye ken, gemū dinenēf. Idi ī bouwa dokon, yā nem tō difiyēf. <sup>17</sup> Negur idi neid waud bun kisi anī ino di, idi Negur nē oroya dō difouf nigin, idi kisi tekelei dino fen, dogo neid tano gaar kuī difenēf, age difef dile mog, Negur nē od kisi falauf. <sup>18</sup> Kayau ō ulen are, taun odug, tenebur nē king neid mudur ibodok anī.”

Babilon Narī Fen

**18** Anī bure fele di, aya engel taka saa ilunem isi mog, ailen. ī megeir odug ado, age fe di, yogon fula fiya medeīya anim teneub lalan len. <sup>2</sup> ī ait odugem, total bagai iweig iron:

“Kubū yen! Babilon Odug kubū yen!

ī, kaa sesen neid fō,

kaa sesen ganan neid fō ado,

ninā amuyē ado ninir sane to ile oroya ganan neid fō falei fen.

<sup>3</sup> Teneub ganan,

yogon seseirā tobonunā nē wain total don.

Tenebur nē king, ī geid seseirā tobonunā dinon,

age fe di, tenebur nē bisnis tamo idi, yogon safina

nigin oroya total ado bunem, safina musei dalen.”

<sup>4</sup> Anī bure fele di, aya ait taka saa ilunem eig ye mog, karī aun:

“Neu tamo kayau, ā yogon mosor anī utin to walogouf nigin ado,

ā in mala solo sane taka to walogouf nigin,

ā ī utornēg fen, usig,

<sup>5</sup> ere nigin, yogon mosor mogo mudu ilun isel saa ilune di,

Negur yogon idododin nigin weder fokō yen.

<sup>6</sup> ī ifenein kilei abag wenēgouf,

ereb ī age fen are, ī age fen anī ado, taka teten unog fen, wenēgouf.

Ereb ī yogon kap bun falei fen are, ī falei fen anī ado, taka falei ge fen, teten unogouf.

<sup>7</sup> ī fula fiya medeīya ado safina meli meli, yogo nigin yalen kilei,

darau ado wau gudū fiya fatuk bagai wenēgouf.

ī yogon wau bun, yogo yana yales fen,

‘Aya kuin abodok, aya waab sā,

agef fen, aya to bagai wau gudū fouf,’ yen.

<sup>8</sup> Anī nigin, naa taka bun, in daū fiyēya nē sesen ī bun isiyouf,

are laa, wau gudū fiya ado, kadir.

Agef fen, ī yā bun isaikalauf,

ere nigin, Odug Negur ī es fiyek, ī anī megeir barikā.

<sup>9</sup> “Tenebur nē king idi, ī geid seseirā tobonunā dino

fen, yogon safina meli meli foi difen anidi, ī isaī di,

kaau dile fen, idi ī nigin waud gudūf fen, inā logurouf.

<sup>10</sup> Idi in darau yaleya anī nigin fatuk bagai kumī de fen, gerō difar fen, dirōf:

“Malalon! Malalon, O taun odug,

O Babilon, taun megeir ado!

Aua tekelei bun, ogon daū fiya mogo isin!

<sup>11</sup> “Tenebur nē bisnis tamo idi ī nigin waud gudūf fen,

inā logurouf, ere nigin, taka nem idi neid safina baban

to na yalouf, <sup>12</sup> safina are, gol, silwa, meein meli meli

ado, maaī tuwa meli bagai pel; gabar lalau medeīya,

gabar giriya tu releya medeīya, gabar slika ado, gabar

giriya bagai; aa meli meli fire fire; ereb ereb fire fire

elefan karat nem, aa meli meli nem, bras nem, ain

nem ado, mambol nem dinodin; <sup>13</sup> sinamon, ye, aa

gaula sumeī nigin tō fiyadig, moul aa bun tamal sumeī

biya biya ado, moul biya takag; wain ado oliv moul; flawa ado wit, bulmakau ado sipsip; hos ado karis, ferfer ado tamo mata dibodok.

<sup>14</sup>“Idi dirōf, ‘Ereb erab yaleya nigin ō oroyon are, mogo sa kelen. Ogon safina musei ado erab erab fula fiya medeīya ganan, mogo sa kelen, idi baban to bagai fotou difouf.’ <sup>15</sup> Bisnis tamo safina eneidi na sur dife fen, ĩ bunem safina musei dalen anidi, yogon darau nigin fatuk bagai kumī de fen, gerō difarauf. Idi inā logur fen, waud gudūf fen, <sup>16</sup> diweig dirōf:

“Malalon! Malalon, O taun odug,  
kolos lalau meli bagai, giriya tu releya medeīya ado,  
giriya bagai ifoun ken,  
gol, meein meli bagai ado, maaĩ tuwa meli bagai pel naki yen!

<sup>17</sup> Aua tekelei bun dogol, safina odug bagai age fiya daũ felen!”

“Maaĩ bun ulum irouya tamo ganan, idi waag bun diyōdig ganan ado, idi maaĩ bunem dogo neid mata ibodōya nē safina daledig anidi ganan, gerō bagai difarauf. <sup>18</sup> Sain idi ĩ isaĩ di, kaau dile fen, idi diweig dirōf, ‘Taun odug eig fiya taka tau ibodon?’ <sup>19</sup> Idi aas mudureid bun digu ken, waud gudū fe di, inā logur fen, diweig dirōf:

“Malalon! Malalon, O taun odug,  
an idi maaĩ bun waag adon ganan,  
yogon safina odug bunem safina musei dalen!  
Aua tekelei bun, are daũ felen!

<sup>20</sup> O saa ilun, ĩ nigin waũ kulĩ ye!

Negur nē tamo kayau, aposel ado, profet, wauĩ kulĩg!

“Ī ā age yein kilei, Negur ĩ es fiyen.”

<sup>21</sup> Age ye fen, engel megeir ado, meein odug wit itutuya nē age fiya, yale fen, maaĩwō ira ken, iron:

“Waila sane eig fiya bunem,  
Babilon taun odug agef daũ fe di,  
baban to bagai dilouf.

<sup>22</sup> Harp kodēya tamo, seg tamo, kelel fiya tamo ado, taur fūya tamo,

idi neid ailō ō bun baban to bagai karĩ douf.

Kabĩ fire fire ganan nē keleĩ tamo,  
ō bun baban taka to bagai wō youf.

Wit itutuya nē meein ait,  
ō bun baban to bagai karĩ douf.

<sup>23</sup> Lam nē lalan ō bun baban to bagai so fouf.

Tamo kayau yalef yalef yeya ait,  
ō bun baban to bagai wō youf.

Ogon bisnis tamo idi, teneub ganan nē tamo odug.

Ō ogon idegēya kosē bunem, teneub ganan udegnēdin.

<sup>24</sup> Profet, Negur nē tamo kayau ado,  
tenebur ein didenkesin anidi ganan neid naudeid, ĩ bun dilen.”

**Halleluya!**

**19** Anĩ bure fele di, aya saa ilun tamo kayau guru fiya mala odug neid aiteid gou reya gen, karĩ aun:

“Halleluya!

Kel gei fiya, fula fiya medeīya ado, megeir are, neda Negur nē.

<sup>2</sup> Yogon es fiya are, momoi fen madur bagai.

Ī kayau bouwa na sur fedig odug,

Ī yogon seseirā tobonunā bunem teneub daũ fen anĩ, es fiyen.

Ī yogon ferfer neid naudeid, anĩ mala solo ĩ bun ifenen.”

<sup>3</sup> Idi baban diweig diron:

“Halleluya!

Ī bunem kaau faimud gai gai iselauf.”

<sup>4</sup> Mudur adodo tuwenti-fo ado, erab mata ibodōya aiwa adodo, kuku de fen, Negur king nē sia bun ibodon anĩ yana dalesen. Age de fen, idi diweig diron:

“Momoi, Halleluya!”

<sup>5</sup> Age dife di, ait taka, king nē sia bunem wō ye fen, iron:

“Ā in ferfer ganan,

Ī anini wiyēgedig,

nanaal ado odudug,

neda Negur yana waleseg!”

<sup>6</sup> Age ye di, aya guru fiya mala odug aiteid gen karĩ aun, are naan fatuk wĩ ye fen, gou redig gen ado, koli-me gudūya odug gen, diweig dirō mog, karĩ aun:

“Halleluya!

Ere nigin, neda Odug Negur saa ilun nē kusĩ tamo guri feid uyu iroudig anĩ, ĩ lo fiya nigin king ibodok.

<sup>7</sup> Ada wauda kulĩ ye, wauda al fe fen,

fula fiya medeīya tafenēf!

Ere nigin, Sipsip Naal kayau yaleya nē naa mogo isin, age fe di, yogon kayau mois mogo yogo nigin dodok fen.

<sup>8</sup> Kolos lalau meli bagai, medeīya ado filiya,

Ī ifonūf nigin ifenen.”

(Kolos lalau meli bagai are, Negur nē tamo kayau neid tobonuneid madur anĩ.)

<sup>9</sup> Anĩ bure fele di, engel aya irokanan, “Utot: ‘Idi Sipsip Naal kayau mois ado bagu fiya nē sifa bun ibodōya nigin iweignēdin are, idi el fedif!’” Age ye fen, ĩ tobol fe iron, “Enei are, Negur nē od momoi bagai.”

<sup>10</sup> Age fe di, aya ĩ yana alesauf nigin, ye gariyan kubū aun. Anĩ ere, ĩ aya irokanan, “To ago! Aya, ō ado, ogon turā tar idi Jesus nē wogōya kafĩ difel dirouf anidi geid, ada in ferfer. Negur yana wales! Ere nigin, Jesus nigin wogōya are, profet od wogōya nē uur anĩ.”

### Tamo Hos Lalau Teten Ibonon

<sup>11</sup> Aya saa ilun kā feleya ifar mog, aya wageun an hos lalau ifar mog, ailen. Tamo anĩ teten ibodon are, yana ‘Feseya Sā Dō Fiya Biya’ ado ‘Momoi Bagai’ dedig. Madur bagai bunem, ĩ es feid fen, kusĩ yedig. <sup>12</sup> Yogon mala are, yā mala fitotoleya gen, agef fen, yogon mudur bun teter musei biya. Ī yogo bun yana itotoya taka ado, are aibem taka to keleĩ, ĩ yogo dogol. <sup>13</sup> Ī kolos meluk naud bun nu fen anĩ ifonun. Yogon yana are, Negur nē Od. <sup>14</sup> Saa ilun nē kusĩ tamo, idi hos lalau tetidin dibodada ken, kolos meli bagai, lalau filiya difo-



un ken, ĩ dō difiyen. <sup>15</sup> ĩ yogon awa bunem, dimig waila ado, teneub ganan yũf nigin wō yen. "Ī ain manig nem ulum iroukenēdiyof." † ĩ, Negur saa ilun nē kusī tamo guri feid uyu iroudig anī nē didi total nē wain asi fiya modoũ bun, asi fof. <sup>16</sup> ĩ, yogon kolos meluk bun ado yogon tukuri bun, yana enei itotoya ibodok:

KING NEID KING ADO ODUG NEID ODUG.

<sup>17</sup> Age afe fen, aya engel taka gaa bun ifar mog, ailen, ĩ ait odugem ninā ganan ilun fatutu def anidi iweig irokenēdin, "Usig, Negur nē sifa odug bun gurug, <sup>18</sup> agog fen, ā, king bouweid, kusī mudur bouweid, tamo megeir adodo neid bouweid, hos ado hos tetedin dibodadak anidi neid bouweid, tamo kayau ganan, kafī fiya sã tamo ado ferfer, nanaal ado odudug, bouweid wāgauf."

<sup>19</sup> Anī bure fele di, aya, gaar kuī, tenebur nē king ado, dogo neid kusī tamo idi, tamo hos teten ibodon anī, yogon kusī tamo geid weim kusī douf nigin, guru de mog, ailedin. <sup>20</sup> Anī ere, gaar kuī are dale diroun, age de fen, idegēya profet, ĩ memelik nē uris gaar kuī mala bun inodin anīg, gaar kuī ado dale diroun. Uris anidi bunem, ĩ, idi gaar kuī nē uris dalen anidi ado, idi yogon malakanon yana dalesedig anidi idegnēdin. Idi urom mata dibod mog, ku kolili fiya meein salfa yã bobo reya barikã ado bun, gei de diraran. <sup>21</sup> Dogo neid kusī tamo ganan, dimig, tamo hos teten ibodon awa bunem wō yen anim, idenkesin, age fe di, ninā ganan idi neid bouweid dō dō, teid isokosen.

#### Tausen Yar

**20** Anī bure fele di, aya engel taka saa ilunem, ĩ ku isil idīya sã nē ki ado, sen odug imam irou fen, isi mog, ailen. <sup>2</sup> ĩ gogour odug, gogour kulu tamal bagai, are Devil be Satan dedig anī yale fen, tausen yar ifarauf nigin sen nem ifokelen. <sup>3</sup> ĩ ku isil idīya sã bun ira ken, ku katī fel fen, anī teten ĩtãfiya uris inon. ĩ tenebur tamo kayau to idegneid mog, tausen yar ilauf nigin age fen. Anī bure fele di, sain tobega dogol ĩ folō fiyekalauf.

<sup>4</sup> Aya, king nē sia anidi bun, idi es fiya nē megeir ifenēdin anidi dibod mog, ailedin. Age afe fen, aya, dogo neid biya od Jesus nigin wogō den ado, Negur nē od nigin, uleid kokour difedin anidi neid meleidkanon ailen. Idi gaar kuī be, yogon malakanon yana to dales fen, yogon uris demeid bun be, imeid bun to dalen. Idi mata ke de, fã de fen, Kristus geid, lo fiya nigin tausen yar ilauf anī nē mudur dibodon. <sup>5</sup> (Tamo gare den tunī ganan to ke de, fã de mog, tausen yar are bure felen.) Enei are, kel fãya uyulil anī. <sup>6</sup> Idi kel fãya uyulil anī bun ke de, fã den are, idi el feid fen, fateul. Laa uyulil anī dō fiya isif are, idi bun megeir sã. Anī ere, idi Negur nē ado Kristus nē pris dibod ken, tausen yar anī bun, Kristus geid, lo fiya nigin mudur dibodōf.

#### Satan Daũ Felen

<sup>7</sup> Tausen yar anī bure fele di, Satan ĩ yogon kalabus bun tamal yalelnē di, <sup>8</sup> ĩ tamo kayau teneub ganan bun idegnēdiyof nigin, teneub idīyan aiwa adodo, are Gog ado Magog bun ile fen, idi kusī bun ileyā nigin gou fediyof. Idi neid namba are, maaĩ ubun mumul ifaref age fiya. <sup>9</sup> Idi teneub modoũ odug bun dile fen, Negur nē tamo kayau neid modoũ ado, taun Negur anī nigin wau laa fedig anī salili difen. Anī ere, yã saa ilunem isi fen, idi yakur feidlen. <sup>10</sup> Age fe di, Satan idi idegnēdin are, ku kolili fiya meein salfa yã bobo reya ado bun dale diran, gaar kuī ado idegēya profet idi ketem mogo an diraran. Idi ganan an sain ganan, bō ado gaa ado, gai gai darau dalouf.

#### Gare Den Anidi Es Fediyof

<sup>11</sup> Anī bure fele di, aya king nē sia lalau odug ado, taka anī teten ibodon anī ailen. Teneub ado saa, ĩ mala iran nē waĩf yale di, idi modoũ san. <sup>12</sup> Age fe di, aya, gare den anidi, odudug ado nanaal, sia wagen difaren ado, buk ikoudiya anidig ailedin. Buk takag ikouya ailen are, mata ibodōya nē buk. Gare den anidi, ereb age difen buk bun itoton anī kilei, es fedin. <sup>13</sup> Maaĩ bun gare den anidi, maaim ifenēdi di, laa ado Hades, gare de di, idi bun difaren anidi difenēdin. Age fe di, mugu mugu ereb age difen kilei, es fedin. <sup>14</sup> Age fe di, laa ado Hades, ku kolili fiya yã bobo reya ado bun geif iraran. Ku kolili fiya yã bobo reya ado, are laa uyulil isin anī dō fiya laa anī. <sup>15</sup> Aib taka ĩ, yogon yana mata ibodōya nē buk bun itotoya sã ilen, ĩ ku kolili fiya yã bobo reya ado bun, yale iran.

#### Jerusalem Mata

**21** Anī bure fele di, aya, saa mata ado teneub mata, ailen. Saa uyulil ado teneub uyulil are waĩf yalen, agef fen, maaĩ baban to ibodon. <sup>2</sup> Aya Taun Fateul, are Jerusalem mata, Negur bun tamal, saa ilunem isi mog, ailen, are kayau mois tamon ileyā nigin naki rel fen, dodok fen gen. <sup>3</sup> Age afe fen, aya ait odug king nē sia bunem eig ye mog, karī aun, "Gama Negur nē salafat, tamo bun ibodok, age fe di, ĩ idi geid dibodōf. Idi yogon tamo kayau ouf, age fe di, Negur yogo bagai, idi geid dibod ken, idi neid Negur ibodōf. <sup>4</sup> ĩ idi neid meleid bun maruid ganan waĩ falauf. Baban laa, wau gudũ fiya, inã yaleya be, darau to ibodōf, ere nigin, ereb ereb tubu nē are, ganan sa kelen."

<sup>5</sup> ĩ king nē sia bun ibodon are iron, "Aya ereb ereb ganan mata anof!" Age ye fen, ĩ iron, "Enei utot, ere nigin, od enei are, agef bagai wō youf nigin momoi bagai."

<sup>6</sup> ĩ aya irokanan, "Gama mogo bure felen. Aya uyulil ado idikeleya, gariya ado idikeleya. Taka ĩ naan ail fof, aya ĩ mata ifenēya nē naan warur bun tamal, mala sã, afenē di, yãf. <sup>7</sup> Taka ĩ kusī wal fof, ĩ enei ganan akorouf, age fe di, aya yogon Negure di, ĩ neu kesu ibodōf. <sup>8</sup> Anī ere, idi dume dume age difedig, momoiya sã, to-

bonunā sane bagai dinodig, tamo dukesidig, noli to-bonunā dinodig, idegēya bun kosē dedig, idegēya wai-tou yana dalesedig ado, idegēya tamo ganān, idi neid modoū are, ku kolili fiya meein salfa yā bobo reya barikā ado bun. Enei are, laa uyulil dō fiya namba tu laa anī.”

<sup>9</sup> Engel sewen anī taka, beī sewen idikeleya nē sesen barikā teneub daū fiya nē ado anī taka, isi fen, aya irokanan, “Usi, aya kayau mois, Sipsip Naal nē kayau anī afelnōf.” <sup>10</sup> Age ye fen, ī aya Awa Uur bunem arei odug ilun bagai anī bun irouleya fen, Taun Fateul, Jerusalem, Negur bun tamal saa ilunem isi mog, ifelnan. <sup>11</sup> Taun are, Negur nē fula fiya medeīya anim so fen. Yogon medeīya are, meein na sur fiya nē meli bagai jaspa gen, yogon filiya are, galas medeīya bagai gen. <sup>12</sup> Taun are, yogon garaī odug ilun fen, bobog tuwelf ado. Agef fen, engel tuwelf bobog bun difaren. Bobog bun, Isra-el ibor tuwelf anidi yeneid itoton. <sup>13</sup> Bobog towo gaa iseyan, bobog towo not melē, bobog towo saut melē, bobog towo gaa ileyen age de difaren. <sup>14</sup> Taun anī nē garaī, gariya tuwelf ado, gariya tuwelf anī bun, Sipsip Naal nē aposel tuwelf yeneid ado.

<sup>15</sup> Engel aya wogō fiyan are, ī taun, taun nē bobog ado, yogon garaī sisi fediyouf nigin, sisi fiya nē gol tibog iroun. <sup>16</sup> Taun nē bagalam ado bogorou kilei kilei inon. Engel are tibog nem taun sisi fe fen, ilen, 2,200 kilomita meluk, yogon bagalam ado yogon ilun areg de anī kilei. <sup>17</sup> Engel ī, tamo nē sisi fiya bunem, taun garaī nē mugi sisi fen, are 65 mita, areg engel nē sisi fiya. <sup>18</sup> Garaī are, meein jaspa nem inon. Agef fen, taun are gol bagai nem dogol inon, gol filiya are galas medeīya bagai gen. <sup>19</sup> Taun garaī nē gariya are, meein meli bagai fire fire nem, naki fen. Gariya uyulil ifaren are jaspa nem, anī dō fiya are meein maaī gegē gen sapaia nem, anī dō fiya are meein kalsedoni nem, anī dō fiya are meein aarau mata gen emeral nem, <sup>20</sup> anī dō fiya are meein giriya ado lalau sadonikis nem, anī dō fiya are meein giriya konilian nem, anī dō fiya are meein aarau mayo gen krisolait nem, anī dō fiya are meein aarau mata gen beril nem, anī dō fiya are meein aarau mayo gen topas nem, anī dō fiya are meein krispres nem, anī dō fiya are meein haiasin nem, anī dō fiya are meein giriya ametis nem. <sup>21</sup> Bobog tuwelf are maaī tuwa meli bagai pel tuwelf, bobog teke tekelei, maaī tuwa meli bagai pel teke tekelei nem inon. Taun nē naab odug are, galas karētut bagai gen, gol bagai nem dogol inon.

<sup>22</sup> Aya taun an tempel taka to ailen, ere nigin, Odug Negur saa ilun nē kusī tamo guri feid uyu iroudig anī ado Sipsip Naal are, idi anī tempel. <sup>23</sup> Taun are, gaa lalan be, ogō lalan yaleya nigin to yenek, ere nigin, Negur nē fula fiya medeīya anim lalan ifenēdig, agef fen, Sipsip Naal are taun nē lam. <sup>24</sup> Tenebur tamo kayau, taun anī nē lalan bun diyō di, tenebur nē king, nedi fula fiya medeīya, taun anī bun dirousiyouf. <sup>25</sup> Naa taka bun, yogon bobog taka to bagai inolalauf, ere nigin, an bō sāf. <sup>26</sup> Tenebur tamo kayau idi, nedi fula fiya medeīya ado yana odug, taun anī bun dirou disiyouf.

<sup>27</sup> Ereb taka amuyē ado an namen to ilauf, agef fen, aib taka mama nē tobonunā age fedig be, idegēdig, īg an to ilauf, anī ere, idi yeneid Sipsip Naal nē mata ibodōya nē buk bun itoton anidi dogol dilauf.

### Mata Ifenēya Nē Naan Odug

**22** Anī bure fele di, engel ī, aya, naan odug, mata ifenēya nē naan, are karētut galas medeīya bagai gen, Negur nē ado Sipsip Naal nē king nē sia bunem isif anī ifelnan, <sup>2</sup> naan are taun nē naab odug atu isilen. Naan si sitakā, mata ifenēya nē aa difaren, are yar tekelei bun faat yū tuwelf fedig, ogō teke tekelei bun yogon faat yūdig. Agef fen, aa aarau are, tenebur tamo kayau dagi yalelkenēdiya nē. <sup>3</sup> Isisīya taka baban to ibodōf. Negur nē ado Sipsip Naal nē king nē sia are, taun namen ibodōf, age fe di, yogon ferfer idi, in aruna dalouf. <sup>4</sup> Idi in nawa dilouf, age dife di, yogon yana idi demeid bun ibodōf. <sup>5</sup> Baban bō taka to ibodōf. Idi lam nē lalan be, gaa nē lalan nigin, to kisi difouf, ere nigin, Odug Negur idi lalan ifenēdiyof. Age fe di, idi gai gai lo fiya nigin mudur dibodōf. <sup>6</sup> Engel ī aya irokanan, “Od eneidi are, agef bagai wō youf nigin momoi bagai. Odug, profet neid uur nē Negur, ī ereb mogo wō youf bagai anī yogon ferfer ifelnēdiyof nigin, yogon engel sur fen.”

### Jesus Mogo Isif

<sup>7</sup> “Ulef! Aya mogo kaisā bagai asiyof fenē! Taka ī profet od buk enei bun ibodok anī dō fef are, ī el fiyek.”

<sup>8</sup> Aya, Jon, ayam eneidi karī au fen, ailedin. Sain aya anī karī au fen, ailedin, aya engel aya ifelnan anī, ye gariyan kubū au fen, yana alesauf nigin age afen. <sup>9</sup> Anī ere, ī aya irokanan, “To ago! Aya, ō, ogon turā tar profet ado, idi buk enei nē od dō difef anidi ganān geid, ada in ferfer. Negur yana wales!”

<sup>10</sup> Age ye fen, ī aya irokanan, “Ō buk enei nē profet od anī bun, ītāfiya uris to uno, ere nigin, sain mogo melsak. <sup>11</sup> Aib ī mosor inof, utornēg len, ī agef mosorei youf. Aib ī sane age fef, utornēg len, ī sane agei fouf. Aib ī biya age fef, utornēg len, ī biya agei fouf. Aib ī fateul ibodok, utornēg len, ī fateulei youf.”

<sup>12</sup> Jesus irok, “Ulef! Aya mogo kaisā bagai asiyof fenē! Mala solo tamo ifenēdiya nē are yeir, aya bun ibodok, anī nigin, aya, tamo mugu mugu ereb age difen kilei anī afenēdiyof. <sup>13</sup> Aya uyulil ado idikeleya, uyulil nē ado dumen bagai nē, gariya ado idikeleya.

<sup>14</sup> “Idi dogo neid kolos meluk kulo difef, anī bunem, idi mata ifenēya nē aa bun ileyā nigin ado, taun nē bobog bunem taun namen ileyā nigin kisi feleya, are idi el fedif. <sup>15</sup> Mayarē difaref are, idi gaū, idi idegēya bunem kosē dedig, noli tobonunā dinodig, tamo dukesidig, idegēya waitou yana dalesedig ado, idi ganān idegēya nigin waud laaf fen, age difedig anidi.

<sup>16</sup> “Aya, Jesus, ayam kurō fesiya od enei sios nigin afe-neīf nigin, ā bun neu engel sur afen. Aya Dawid nē Warumutei ado Ibor, Bonimeī nē Barisa medeīya.”

<sup>17</sup> Awa Uur ado kayau mois dirok, "Usi!" Aib taka ĩ karĩ yef, irŏf, "Usi!" Aib taka ĩ naan ail fef, utornĕg len, ĩ isiyouf. Aib taka ĩ orof, utornĕg len, ĩ mata ifenĕya nĕ naan ege luwa yalouf.

<sup>18</sup> Aya, idi ganan buk enei nĕ profet od karĩ def anĩ, total bagai arokenĕdif: Aibem taka od enei teten ereb taka tobol fouf, Negur ĩ daũ fiya nĕ sesen buk enei bun itoton anĩ, ĩ bun tobol fouf. <sup>19</sup> Agef fen, aib taka profet

od nĕ buk enei bun od taka yalelauf, Negur ĩ, mata ifenĕya nĕ aa ado taun fateul, buk enei bun faded fel itoton anidi bun tamal, ĩ yalelnĕf.

<sup>20</sup> Taka ĩ enei ganan kurŏ fesif, are irok, "Momo, aya mogo kaisã bagai asiyou fenĕ."

Momoi. Odug Jesus usi.

<sup>21</sup> Odug Jesus nĕ wau ifenĕya, Negur nĕ tamo kayau bun ibodŏf. Momo.